



O uelhire uaia

Nehan New Testament

Contents

Matiu	1
Mak	70
Luk	111
Jon	179
Aposoul	232
Roum	297
1 Korin	327
2 Korin	355
Galesia	374
Epeses	385
Pilipai	396
Kolosi	404
1 Tesalonaika	412
2 Tesalonaika	419
1 Timoti	423
2 Timoti	432
Taitus	438
Pilimon	442
Hibru	444
Jems	466
1 Pita	474
2 Pita	483
1 Jon	489
2 Jon	496
3 Jon	498
Jud	500
O Uelhire geko ou	503



Nehan New Testament

The New Testament in the Nehan Language of the Autonomous Region of Bougainville, Papua New Guinea

Nupela Testamen long tokples Nehan long Niugini

Language: Nehan

Provided by: Wycliffe Bible Translators

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit www.dbs.org (USA), www.bibleleague.ca (Canada), and www.opendoors.org (Europe).

Copyright and Permission to Copy

Copyright © 2011 Wycliffe Bible Translators, Inc.

Copyright © 2011 Wycliffe Bible Translators, Inc. Scripture text used by permission.

PDF, ePub, and MOBI Bible covers and design are copyrighted 2017 by the Digital Bible Society (www.dbs.org).

PDF generated on 2017-08-24 from source files dated 2017-08-24.

840e7f31-5c9d-5d9c-8b6d-c256d7b22eb4

ISBN: 978-1-5313-0494-2

Matiu

O Uelhire Uaia ke boloin Matiu

No bolobolo Matiu

O Uelhire Uaia rone tang Matiu o moko teil tar timuhur uelhote. Matiu e ate uaia tun toro tar uelhote ger pensiouun. Sioun God ke uamatoto tasir tamata ra kilais o propeit tar bolo uahiuu tar inetenit i uoom. O bureher propeit ka mene uelhir sira tena niuangoul Iesu, doh na kalekinale. A mamang inetelik geke bolo uahiuuagir propeit sioun ke pokoso sira tun tena binaka Iesu ke uangoul pe tar uanene i kot. Matiu ke hire uakalahara tun tar puhonene mare ualasira tun pare, Iesu ter Kristo. (A tenkanar puhene 'Kristo e kulo pare,' Na Toia God.' O propeit ka hire pare, Kristo e turung uelkarus tur tagigeig tenagi niguata uasa.)

O Uelhire Uaia rone tang Matiu o ueluatata tena niuangoul Iesu. Matiu ke bolo uahiuu tar inete ke ualasiraig Iesu. No bolobolon e moko teil pono na menmene Iesu toro Matiu mahar 5-7. A menenena ra kilaig pare, 'A niualasir ger niualasira to tar susan.'

O Uelhire Uaia tang Matiu o hire uakalahara pono pare, Iesu ke uauia tasir bureher tamata res mat. Iesu ke guata tasir kut ka banga tapokis (Mat 20.29-34). Ke guata tasir kamelongo ka longor huara tapokis (Mat 11.5). Kare luaka liu tasir tamata gesir nihikung liouan (Mat 8.28).

Bo o gisiamehe pukur tamatasitier keiping uleik ke tokouasais tang Iesu. Ka tung pous to tang Iesu tar korose. Bo Iesu puk ke ate teil pare, a puhon e turung pokos (Mat 16.21). O poropeit ka bolo

uahiuo pare 'Kristo e turung mat (Aisaia 53; Mat 12.40). Tar binaka ke mate Iesu, inggono ke kale tar uelmahing teregi niguata uasaeig (Mat 26.28).

Bo Iesu puk ahik pah ke mate dede, God ke uatua tapokis tatanon (Mat 28). Doh Iesu a tua daan i Heuen.

O Mahar 1

Matiu ke ueluatata tasir tamatang Ju toso bunguna Iesu Kristo

1^aGine teka uakekene pe me ro bubunguna Iesu Kristo. Inggono ke la tur toso bunguna Debit. Debit ke la tur toso bunguna Abraham.

²Abraham te tamana Aisak.

Aisak a tamana Jekop.

Jekop te tamana Juda meso bung tahin.

^{3b}Juda te tamas Peres me Sera ara tinang Tamar.

Peres te tamana Hesron.

Hesron a tamana Ram.

⁴Ram te tamana Abinadab.

Abinadab a tamana Nason.

Nason te tamana Salmon.

^{5c}Salmon a tamana Boas, doh Boas tinana tang Rehab.

Boas a tamana Obed ge tinana tang Rut.

Obed te tamana Jesi.

^{6d}Jesi a tamana Toia Debit.

Debit te tamana Solomon.

Solomon tang tinana na kuaha baka uoum Uraia.

⁷Solomon te tamana Rehoboam. Rehoboam te tamana Abia.

Abia a tamana Asa.

⁸Asa te tamana Jehosopat.

Jehosopat te tamana Jehoram.

Jehoram a tamana Usaia.

⁹Usaia te tamana Jotam.

Jotam a tamana Ahes.

Ahes te tamana Hesekaia.

^a1:1 Uak 22.18; 1OUTT 17.11 ^b1:3 Uak 38.29-30; Rut 4.18-22

^c1:5 Rut 4.13-17 ^d1:6 2Sa 12.24

¹⁰Hesekaia a tamana Manase.
Manase te tamana Amon.

Amon a tamana Josaia.

¹¹eJosaia te tamana Jehoiakin meso
bung tahin. Tar binakonene o tamata
ka keip liu turis i Israel ka la i Babilon.

¹²fI muduhia tar binaka ka keip liu tur-
isir Israel ka la i Babilon.

Jehoiakin te tamana Sealtiel.

Sealtiel a tamana Serubabel.

¹³Serubabel te tamana Abiub.

Abiub a tamana Eliakim.

Eliakim te tamana Asor.

¹⁴Asor a tamana Sadok.

Sadok te tamana Akim.

Akim a tamana Eliud.

¹⁵Eliud a tamana Eleasar.

Eleasar te tamana Matan.

Matan a tamana Jekop.

¹⁶Jekop a tamana Josep.

Josep na bulout Maria,
doh Maria te tinana Iesu gera kilain
Kristo.*

¹⁷A siokor hangaul, doha toueit-
ingampe ro bubunguna ko uakekene tur
pe tang Abraham ko me lame tang Debit.
Doha siokor hangaul doha tang toueit
ponompe ro bunguna tang Debit e tuka
ka keip liu tur peisir tamat i Israel ka la
i Babilon. Doh tar binakonene ka keip-
isisin i Babilon, a siokor hangaul doho
touteit ponompe ro bunguna tamat e tuka
ka poho pein Kristo.

Tar binaka ka pohoin Iesu Kristo

¹⁸gGine te hape ke kotpokoso pe Iesu
Kristo. Maria tinanon a niuamatoto tar
le tang Josep. Bo tar binaka puk halana
rasina tura le, Maria ka ate manasain
pare, ke balakoso to tena nitampopoko-
hor Iabena Dedeil. ¹⁹Teene kompe a

tamata uايا pe na bulout Maria, Josep,
maeit ke marang hiliu uanomo kompe
tatanon. ²⁰Tar binaka re namana Josep
tar ineteninanine na anggelour Tamata
Noman ke kotpokoso tatanono toro bor-
borian. Ke kular anggelou pare, “Josep,
Ingga ter bunguna Debit, ahik paho
sokoro tar kale tang Maria pare, nang
kuah, ge a keketik pe e la tatanon e la tur
tar Iabena Dedeil. ²¹hInggon e turung
poho tar keketik bulout, doh ingga o tu-
rung uelkila tatanono tang Iesu, teene
inggon e turung uelkarus tur tasir tamata
tenas niguata uasa.” ²²A mamang in-
etelikinanine ke kotpokoso sira tun
tar uakalahara tar haua ke kulameigir
Tamata Noman tasir propet,

²³“Ualongor! A kuah ahik pah ke uan-
goul keip me bulout e turung
balakos,

kare turung poho tar keketik bulout,
kara turung uelkilain tang Emanuel.” *Ai-
saia 7.14; 8.8,10*

A puhon e kula pare, “God e uangoul
tagu tagigeig.”

²⁴Binaka ke gulete Josep, ke guata sira
manasampe ke kula pe na anggelour
Tamata Noman, kare kale tang Maria
pare, na kuah. ²⁵iBo inggono puk ke
uangoul uadedeil keip tatanon e tuka ke
la poho peono tar keketik bulout. Doh
Josep ke uelkila tatanono tang Iesu.

O Mahar 2

O tamatang iate ka me banga tang Iesu

2I muduhia ka poho to pein Iesu i
Betlehem tar pang uan i Judia, tar
binaka re toia Herot, o tamatang iate ra
la tur tar butur re harhara turuhar pisara

***1:16** A tengkanar puhene “Kristo” e kula pare, “A tang siokor tamatar nikedang ke uamatotoin God tar me uelkarus tasir tamat.”

^e**1:11** 2To 22–24; 2OUTT 36.10; Jer 27.20

^f**1:12** Esr 3.2

^g**1:18** Luk 1.27,35

^h**1:21** Luk 1.31; 2.21

ⁱ**1:25** Luk 2.21

ka me pokos i Jerusalem. ^{2j}Kara me dangata pare, “Ia kaeinir guama geke pohoin nas turung toiar Ju? Inggeim king bang huara tena pitopitono tar butur re uoto hara turuhar pizar, temaeit king lame tar me uatakai tatanon.”

³Tar binaka ke longoro Herot tar puhon, inggono ke hagouo uasa, meniangua pomonpe tasir Jerusalem. ⁴Herot ke kila toto tosnosio mamahoholikir pater, doho tamatang ualualasira tar ualatut, kare dangata tasisina ia ra turung poho toin Kristo. ⁵Kara hiresina pare, “I Betlehem tar pang uan i Judia.” Tekka hire pesin, “Ge teenina penine ka bolo uahuaigir propet pare,

^{6k}Bo ingga Betlehem, tar pang uan i Judia,

ingga ahik pah ter uadouhinar uan toro uan uleik i Judia. Ahik tun.

Teene a tamatang uoum keip e turung la tur totomua,

doh inggon e turung kaukaueke tosnogo tamatang Israelo.” *Maika 5.2; 2 Samuel 5.2*

⁷Doh Herot ke kila toto uanomo tasir tamatang iate, kare heheke tasisina tar binaka tun ka bang huara uakekenesina tar pitopit. ⁸Kare kulono tasisina ra la i Betlehem, kare kula pare, “Mu la, karung la sir uaia tar keketik, doh getung tuparoum tatanon, inggoum mung me hire tapokis totoguo maru la pono, karu la hatup, karu uatakai tatanon.”

⁹I muduhia ka ualongoro per tamatang iate tang Herot ger toia, kara la manasampe. Doha pitopit geke banga tolaisisina tar butur re harhara turuhar pisara teke uoum keip tasisin, e tuka ke la toko umatoto peono tar butur re uangoulinir keketik. ¹⁰Tar binaka ka bang huarar tamatang iate tar pitopit

ka uahauhantiehe tun. ^{11l}Ka lamesina tar uma gere uangoulinir keketik, kara banga tatanono me tinan Maria, kara baka uahiuais i kot tar uatakai tatanon. Song ka pukusina tar ineteng uauah, kara heir tatanono tar goul,† doha adua, doha uaiuai amiamuh. ¹²Bo God puk ke uahire toro borboriana tasisin, ahik pah ra tapokis tang Herot, maeit ka la tapokisisina tenas uan, bo ka uelhir puk tar giameher lel.

A toking tinana Iesu kura keip tatanon i Isip

¹³I muduhia ka hiliu baka per tamatang iate, na anggelour Tamata Noman ke me pokoso tang Josep toro borborian, kare kula pare, “Tentur, karo kale tar keketik me tinan, karung ualo liuila i Isip, ge Herot pe e turung sir tar keketik mare uiliatung pous tatanon. Uangoul i Isip e tuka getu hireo totomua tar tapokis.” ¹⁴Maieit Josep ke kale tas ramatina nar boungon, kara la manasampe i Isip. ^{15m}Doh Josep ke uangoul i Isip e tuka ke mate baka pe Herot. A puhonene ke kotpokoso sira tun tar puh ke kulainir Tamata Noman tasir propet, “Inggo ku kila tauete liu tur tar tug i Isip.”

Herot ke uiliatung pous tasir keketik bulout

¹⁶Tar binaka ke ate Herot pare, o tamatang iate ka longlongoro boho tatanon, inggono ke nimaliana uasa tun. Temaeit ke hireono tar puhung kula pare, o keketik buloututis ra uangoul i Betlehem ue gisis ra uangoul uiloho tar buturuon, geke torik uoum res krismas ue o keketik uain, ra uiliatung pousis. Herot ke ate tur teres krismasir keketik

†2:11 A goul a giamehe siokor pang haen a iauiuel, doha bulauana i ranantieh. Tena binaka Iesu a mani ka tuha keipin tar goul.

tasir tamatang iate ke heheke baka pe tasisin. ¹⁷Tar binakonene a puh ke kotpokoso noman, ke kulamein propet Jeramaia pare,

¹⁸“A alialinginar kirkiring, kara uelmahing, kara niueldolomo uleik ka longoroin i Rama.

Retiel[‡] e kiring toso bung tun, kare de mata ualabukin, teene ka mata pe ro bung tun.” *Jeramaia 31.15*

Josep me Maria kura tapokis keip tang Iesu

¹⁹I muduhia ke mate baka pe Herot, na angelour Tamata Noman ke mēnē tang Josep toro borboriana tar binaka ra uangoul harahaisin i Isip. ²⁰Ke kulonor angelou pare, “Tentur, kale tar keketik doh tinan, karung la tar pang uan i Israel, ge o tamata pe geka marang uiliatung pous tar keketik ka mate manas.” ²¹Temaeit, Josep ke kale tar keketik, doh tinan, kara la manas i Israel.

²²Bo ke longoro pukuono pare, nu Akeleus tere toia i Judia teene ke mate pe Herot ge tamanon. Temaene Josep ke sokoro mate la tar buturuon. I muduhia ka uahire peono toro borborian, inggono ke la tar pang uan i Galili ²³tar uan i Nasaret teka la uangoulusin. Temaene a haua ke kulamein God tasir propet ke kotpokoso noman, “Inggono ra turung kilain a peng Nasaret.”

O Mahar 3

Jon ger tang uahuhu ke kaleuatoro tena leler Tamata Noman

3 Jon ger tang uahuhu ke uakekene tar uelhire tauete to tar butur paden i Judia. ²°Kare kula pare, “Uapalih tenami niguata uasa, karung lame tang God, ge a Nitoiang Heuene pe ke uahuhut manasain.” ³Doh Jon ger tang uahuhu, teonene ke menmenemein Aisaia ger propet tar binaka ke kula pare, “Gine ter uauanar tang siok e kula ualeikala tar butur paden.

°Kaleuatoro tena leler Tamata Noman.

Guata tar lel, e kodkodoho tar binaka re lameon.” *Aisaia 40.3*

⁴°Na hikhiku Jon a nituha tar ulunar kamel, doh inggon e uoto pus tar kapokonor bulumakau. Na nieinon, o kakaring doho hani[¶] roke. ⁵O bureher tamata ka la turume i Jerusalem dohi Judia doh gisila uiloh tar kodom i Jordan tar me ualongoro tang Jon. ⁶Gisina ka uelhire tauete tenas niguata uasa, doh inggono ke uahuhu tasisina tar kodom i Jordan.

⁷°O bureher tamata uleikin tasir Ju ra kilais o Parisi, doho Sadiusi ka lame tar butur re uahuhu to Jon tasir tamata mara uahuhu ponois. Bo tar binaka puk ke banga Jon tasisin, kare kula pare, “Inggoum o soi uakap! Mai ke uahire tamiuoum tar ualo liu tanika tena nimalianana Godeit re turung lame? ⁸Guata me inete gere ualasira uakalahar tasir tamata pare, inggoum kung uapalih tenami niguata uasa. ⁹¶Doh ahik pah mung namana pare, e siauasioum tena

[‡]2:18 Retiel na kuaha Jekop ka mene uatuha tolain toso bung tinasir Israel.

[¶]3:4 hani, a teisir hoh, a lingiantiehe tun misianar suga.

[°]2:23 Ais 11.1; 53.2; Luk 2.39; Jon 1.45 [°]3:2 Mat 4.17; Mak 1.15

[¶]3:4 2To 1.8 [¶]3:7 Mat 12.34; 23.33 [¶]3:9 Jon 8.33,39; Roum 4.12

nimaliana God, teeit rung kula katongo pesioum pare, Abraham a tamamiueim. Inggo gine ru hire tamiuoum, God e banotong uakotpokoso tur mo bunguna Abraham tar palauanine. ¹⁰sGine daan a kangan e uahuhutung tokout uahiua tar douk, doha mamang doukulikinit ahik pahe uoto ua me niein uaia ra oboroig, kara bakalaig toro hue.”

¹¹t“Inggo u uahuhu keip tamiuoum tar kodomo tar ualasira pare, inggoum kung uapalih tenami niuangoul, kara niguatanitir sa. Bo a tang sioko puk e la uakelukume, inggon a i rana uain na nitampopokoho totoguo, bo inggo puk ahik paha tamata uaia tar kabkaba teil tena suon. Inggon e turung uahuhu keip tamiuoum tar Iabena Dedeil doho hue. ¹²Inggon e uadelauana tena uatunar raes-uit^s pare, inggon e turung kedanga liu tur tar kukuananar raes-uit tar mongmongonor raes-uit, kare uamokola tar kukuananar raes-uit tena umang raes-uit, bo e turung ualuh pukuono tar mongmongonor raes-uit toro hue ge ahik paho banotong lomoh.”

Iesu ka uahuhuin

¹³Tar binakono ke la turume Iesu i Galili, kare me lako tar kodom i Jordan mare me uahuhu Jon tatanon. ¹⁴Bo Jon puk ke de mate uahuhu tatanon, kare kula pare, “Ingga deh pake tero uahuhu totoguo. Ae maene ro lamea totoguo?” ¹⁵Bo Iesu puk ke kula pare, “Guata sira kompeene ru kula peo, ge raeig pe ira guata tar ineter kodkodoh.” Song ke guata sira Jon ke kula peon.

¹⁶uGitie ka uahuhu pein Iesu, doh tar binaka re puraka turuhaono tar laur,

i Heuene ke takapuk, doh inggono ke banga tena Iabena Dedeil God ke la uahiua siraha tar baluh, kare me tok i rana tatanon. ¹⁷vDoha puhung uelhire ke la turuha i Heuen, e kula pare, “Gine ter tuguo geru malauehiritiehe tunin, karu uahantiehe tun tatanon.”

O Mahar 4

Satan ke uatolaua tang Iesu

4 ^wDoh tar binakon a Iabena Dedeil ke keip tang Iesu tar butur paden mare la uatolaua to Satan tatanon. ²xDoh Iesu ahik mate ein tar toueitir hangaulur marein, doha toueitir hangaulur boung. I muduhia inggono ke gogo manas. ³Doha tamatang uatolaua ke pokoso manas, kare me kula tatanono pare, “Ge para tuna God nomana, kula toro palaua rone o uapalihin toro bereit.” ⁴Bo Iesu puk ke kula pare, “Ahik. A nibolo uahiu dehono tono uelhire God pare, ‘A tamat ahik pahe tua to puk re ein pe toro bereit,

bo e tua to tar mamang uelhirelik ke kulaig God.” *Ualatut 8.3*

⁵Doh Satan ke keip poluk tang Iesu tar uan uleik i Jerusalem, kare la uatur tatanono tar butur a i ranana tar umang lotu ger dedeil. ⁶Doh Satan ke kula pare tatanon, “Ge para tuna God nomana, siaka uahiuako i kot, ge a puh pe a nibolo uahiu tono uelhire God pare, ‘Inggon e turung hire tosno anggelou ra turung kauেকে totomua.

Doh gisina ra turung uasangana totomua tar limas

mara hikia pahe tukainir kekeim mo palau.” *Ker 91.11-12*

§3:12 A raes-uit a giniamehe siokor garas. A plaua, doha bereit ka tuha turig tar kukuananin.

§3:10 Mat 7.19; Luk 13.6-9 †3:11 Jon 1.26-27,33; Apo 1.5 †3:16 Jon 1.32

v3:17 Ker 2.7; Ais 42.1; Mat 12.18; 17.5; Luk 9.35 w4:1 Hib 2.18; 4.15

x4:2 KT 34.28

⁷Bo Iesu puk ke kula pare tatanon, “A puh pon e moko tonu uelhire God pare, ‘Ahik paho uatolaua tar Tamata Noman, a God a noumua.” *Ualutut 6.16*

⁸Doh Satan ke keip poluk tang Iesu tar lulunar siusan a i ranantieh, kare ualasira tatanono toro mamang uana uleik uakapa tunane tar kot, karo nitampopokoh, kara niuiana toro pang uaninanane. ⁹Kare kula Satan pare, “Geto hatup uahiu, karo lotu totoguo, inggo u siokor heir tar mamang inetelikinine totomua.” ¹⁰Doh Iesu ke kula pare tatanon, “Satan, uareing totoguo! Ge a puh pe a nibolo tonu uelhire God pare, ‘Inggoum mung lotu tar Tamata Noman nami Godoum, karung longoro kompe tatanon.” *Ualutut 6.13*

¹¹Song ke hiliu Satan tang Iesu, doho angelou ka lame, kara me kaueke tatanon.

Iesu ke uakekene tena kalekinale i Galili

¹²Tar binaka ke longoro Iesu ka uamoko pein Jon tar uih, kare tapokis i Galili. ¹³Doh inggono ke hiliu tar uan i Nasaret, kare la uangoul i Kaperneam, a uanon e tok i tektekene tar kodomo uiluiloh i Galili, tonosio mahar koto ra bungus Sebulun me Naptali. ¹⁴Iesu ke guata tar puhonene mare kotpokoso sira tunur puh ke kulain God tang propet Aisaia pare,

¹⁵“Inggoumeitir tamata toro mahar koto ro nas Sebulun me Naptali tar lele re lako i teh tar pang giamehenar kodomo i Jordan, toro mahar kotong Galili gera uangoulur bureher tamatasit ahik paho Ju

¹⁶gerung uangoul tar kitupun,

inggoum kung bang huara manasa tar uleikir luh, doh tamiuoumeit rung uangoul tar kitkitupun

a luh ke kotpokoso manasa tamiuoum.”

Aisaia 9.1-2

Iesu ke uakekene tar kila tosono tamatang uakuakeluk

¹⁷Tar binakonene Iesu ke uakekene tar uelhire tauete pare tasir tamat, “Uapalih tar niguata uasa doh tenami niuangoul, ge a Nitoiang Heuene pe ke uahuhut manasin.”

¹⁸Gitie ke latlateil pela Iesu i tehe tar kodomo uiluiloh i Galili, kare bangangua tas nu Saimon gera kilain Pita me nu Andru, rasina ramamahialik ura bakbaka tenasira uben, ge a toking tamatang uekih pe rasin. ¹⁹Doh Iesu ke kula pare tasrasin, “Mura uakelukuhane totoguo maru ualampir tamiraoum tar reihime tasir tamata tar la tang God.” ²⁰Doh rasina kura hiliu ualahurungua tenasira uben, kaura uakeluk tang Iesu.

²¹Gitie ke la uain pela Iesu, kare bang huarangua poluk tar toking gisiamer ramamahialik, rasina tes nu Jems me Jon, a toking tuna Sebedi, rasin ura panete teil tar bout menia tara tamas, doh gisina ra uma uaia tenas uben. Doh Iesu ke kila tasrasina tar la tagu pono tatanon, ²²maeit rasina kura hiliu ualahurungua kompe tar bout, doha ra tamas, kaura uakeluk tatanon.

Iesu ke uelhire tauete toro Uelhire Uaia, kare uauia tasir bureher tamat

²³Iesu ke uiloho uakap i Galili, kare la leka tenas umang lotusin, kare uelhire tauete toro Uelhire Uaia tar Nitoiang Heuen, doh ke uauia uakapa teres momouhur tamatasit res mat. ²⁴Doho

^y4:12 Mat 14.3; Mak 6.17; Luk 3.19-20

^a4:23 Mat 9.35; Mak 1.39; Apo 10.38

^z4:17 Mat 3.2; 19.27

^b4:24 Mak 6.55

ueluatata tang Iesu ko la uiloho uakapa tar pang uan i Siria, doho tamatisis ra maluana keip tar bureher mate ka keip pokosomeis tang Iesu mare uauiaono tasisin. Gisis res uelmahing uleik, doho nihikung liouan, o uoto lolong kapul, doha matar tukunus ka keip pokosomeis tang Iesu, kare uauiaono tasisina uakap. ^{25c}Doho burehentiehe tunur tamatang Galili doho tamatang tar pang uan i Dekapolis, dohi Jerusalem, dohi Judia, doho mahar kotong tar pang giamehenar kodom i Jordan ka uakeluk tatanon.

O Mahar 5

Iesu ke ualasira to tasir tamata i rana tar ponponin

5 Binaka ke banga Iesu tasir manai tamat, inggono ke lingua taro i rana tar ponponin, kare la tabil. Doh no tamatang uakuakelukono ka laha tatanon, ²kare uakekene manasono tar ualasira tasisina pare,

^{3d}“O tamata gera ateis a tabotantar iabeis tar ineter nang God, gisina tera banotong uah,

gisinar tamatasina tera banotong kale tar mamang inetelikinitier uiar nana Nitoiang Heuen.

^{4e}O tamata gera kiring, gisina tera banotong uah,

God e turung ualabuk tasisin.

^{5f}O tamata gesir hamhamasilik, gisina tera banotong uah,

a koto uakap a turung nasisin.

^{6g}O tamata gera malarantiehe tun tar uakeluk tar hagar uaiar nang God misiana tar tamatetie re gog, dohe kamadak tar marang kodom, gisina tera banotong uah,

God e turung heir uamototo tun tasisin.

⁷O tamata gera uoto ueldolomo tasir gisiamer tamat, gisina tera banotong uah,

God e turung ueldolom tasisin.

⁸O tamata ger dedeilir kolous, gisina tera banotong uah, ra turung banga tang God.

⁹O tamata gera uoto uahiarou tar uel-sae tasir tamat, gisina tera banotong uah,

gisina ra turung kilais o bung tuna God.

^{10h}O tamata gera huata tar niduh ka heirigir tamata tasisin,

teene ra uakeluk tun pesina tar hagar uaiar nang God, gisina tera banotong uah,

a Nitoiang Heuen a nasisin.”

¹¹ⁱ“Inggoumeit ra uelsigalasioum, kara heirisioum tar niduh, kara boho tolasioum tar bureher inet, teetirung uakeluk pe totoguo, inggoum mung banotong uah. ^{12j}Inggoum mung banotong bala uaiatun, karung uaha tun, ge a bulauamioum pe a uleik e uangougoul tamioum i Heuen. O tamata ka guata sira uoum tar niguataninanine tasir propet geka uangoul baka uoum siounuhia tamioum.”

O uelhire uaranga tar teh, doha luh

¹³“Inggoum misiana tar teh gane i kot, bo gete rouo pukur linglinginanin hape ra banotong uamaltehe poluk peiginin? Ahik paha uia baka poluk, bo ra turung baka liu puk manasaig, kara ueihueih taner tamat i kot. ^{14k}Inggoum misiana tar luh gere heir tar luh tar koto uakap. Misian tar uan uleik ger nituha uapon i rana tar ponponin ahik pahe banotong

^c4:25 Mak 3.7-8 ^d5:3 Ais 57.15 ^e5:4 Ais 61.2-3; UGO 7.17

^f5:5 Ker 37.11 ^g5:6 Ais 55.1-2 ^h5:10 1Pi 3.14 ⁱ5:11 1Pi 4.14

^j5:12 2OUTT 36.16; Apo 7.52 ^k5:14 Jon 8.12; 9.5

ou. ¹⁵lDoho tamat ahik pah ra touaouo tar luh i kukulebanga tar tolah, bo ra uatokoin i rana toro toktokono ro lam mare bala uakapar luhluhun iuma tar um. ¹⁶mTer siokono kompe, ingga pake ter luh tasir gisiameher tamata mara bang parokosin tar ineter uia ro guatagia, kara turung uatakai tang Tamoumua i Heuen.”

A tengkana te na puhung ualatut Moses

¹⁷n“Inggoum ahik pah mung namana ku lahao tar me kale liu tena ualatut Moses ue nas niualasirar propet. Ahik pah ku laha tar me kale liu taninin, bo tar me guata tenas niualasirasin e kotpokoso tun. ¹⁸oInggo u uamana tun tamiuoum e tuka tar binaka re kap i Heuene, dohi kot ahik uadeil me sikina tar ualatutunin re turung rouo liu e tuka gete kapa na kalekinalenin. Geta kikitilikimper puhung ualatutur nang Moses, kara uakelukumpein e tuka gete kapa na kalekinalenin. ¹⁹pDoh gete me tamat e katego tena kikitilikir puhung ualatut Moses, kare ualasira tasir gisiamehe tar guata tanininanin, inggono tar hangan e turung kikitilikir tar Nitoiang Heuen. Bo mai puk re uakeluk taninin, kare ualasira tasir gisiamehe ra uakeluk sira tatanon, inggon e turung tohangana tar Nitoiang Heuen.”

²⁰“Inggo u hire tamiuoum. Doh geta hik nami hagar uaiaoum paha uiantiehe liu tenas hagarir tamatang ualualasira tar ualatut, doho Parisi, inggoum ahik tununguampe pah mung banoto mung lekala tar Nitoiang Heuen.”

Ahik paho uiliatung pous tar tang giameher tamat

²¹qDoh Iesu ke kula poluk pare, “Inggoum kung longoro manasa tar puhung kula ka hirein tasir tamata sioun, ‘Inggoum ahik pah mung uiliatung pous tasir gisiameher tamat. Doh gete uiliatung pous me tamata tar tang giameh, inggon e la turung tur tar matanar tamata uleiking tar uelhehek.’ ²²rBo inggo gine ru hire tamiuoum pare, a tamata gere nimaliana uasa tang tahin, ahik me tengkan, inggon e la turung tur tar matanar tamata uleiking tar uelhehek. Doha tamata gere uelhire uasa tang tahin, inggon e turung tur tar matanar tamatang uelhehek ger i ranantieh. Doh gete kulono pare, ‘Ingga a popouluan,’ inggon e tagin teil geta bakalaiono toro hue i Hel.”

²³s“Temaene, geto lang heiria tenang uahung tang God toro olta, doho la namana huara tar uelsaer emiraoum me tahim, ²⁴hiliu to tenang uahung toro olta, karo la uakodkodoho keip baka tang tahim. Gete kodkodohon, song ro me heiria tenang uahung.”

²⁵“Gete marang uamoko me tamata totomua tar limaneit re uoto tabila tar uelhire, doh tar binaka mura la harahala raoum tar lel, ter binakono pako uakodkodoho keipia tatanon. Gete uamokono totomua tar limanar tamatang tabila tar uelhire, kare la heirilaono totomua tar tamata re uoto kaukeke tar karabus, kare tea ra bakalaia tar karabus. ²⁶Inggo u uamana tunumpe totomua, ingga ahik paho banotong hiliu tar karabus e tuka geto baka uadouh liua tenang uadouhina tunur mani.”

¹⁵:15 Mak 4.21; Luk 8.16; 11.33 ^{m5}:16 Epe 5.8-9; 1Pi 2.12

ⁿ⁵:17 Roum 3.31 ^{o5}:18 Luk 16.17; 21.33 ^{p5}:19 Jas 2.10

^{q5}:21 KT 20.13; Ual 5.17 ^{r5}:22 1Jo 3.15 ^{s5}:23 Mak 11.25

Iesu ke mene tar niguatang uraur

²⁷ Doh Iesu ke kula poluk pare, “Ing-goum kung longoro manasa sioun tar puh ke kulain Moses e kula pare, ‘Ing-goumur le, ahik pah mung guata toro ur.’” ²⁸ Bo inggo u hire tamiuoum pare, “Gete me bulout e banga me tang siokor kuah kare maha tatanon, i lolono tena ninamanon, inggono ke guata keip manasa tatanon tar hagar uasa. ²⁹ Temaene geta matoumuaoneitir pang mua ke reih totomua tar guata me hagar uasa, kale liu tatanon, karo baka liu. Auiantiehe geto baka liuia mo maharoum ter sa geta baka uadeilinir tukunumua i Hel. ³⁰ Doh gete ter pang limoumuaeitir pang mua ke reih totomua tar guata me niguata uasa, tokout liu tatanon, karo baka liu. Auiantiehe geto taboin mo maharoumua ter sa geta baka uadeilinir tukunumua i Hel.”

Iesu ke ualatoh ae maene a sa gete kategor tamata tono le

³¹ Iesu ke kula poluk pare, “Ing-goum kung longoro manasa pono tena ualatur Moses pare, ‘A tamata gere de tena kuah, inggono pake bolo baka uoum mo bolobolong uahire tena kuaha pare, rasin ura ueltageih.’” ³² Bo inggo u kula pare tamiuoum, gete me bulout e ueluel-tula liu tena kuaha tar binak ahikir kuaha pah teke guata tar niguata uasa, inggonor bulout teke guat, maene ke lekar kuaha tar puhung kular nana ro le. Ter hauon, binaka re la le palihir kua-honene tar tang giamehe siokor bulout, inggonener kuaha ke guata manasa pono toro ur. Doha bulout gere kale tar kua-honener nihiliu sioun, inggono ke leka

pono tar puhung kular nana ro le, kare guatangua pono toro ur.”

Inggoum ahik pah mung uamanato i ran

³³ Iesu ke kula poluk pare, “A giameher puh ka kulain ro bung tubumioum, doh inggoum kung longoro manas, e kula pare, ‘Ahik paho boho tar binaka ro kula pare, o man i ran! Doh tar binaka ro kula pare, o man i ran, tar binaka ro guata tar inetinanine, ingga pako uakelukunguampe tar puhung kulonene, karo guata uakodkodoho to tar inete tar matanar Tamata Noman.’” ³⁴ Bo inggo gine ru hire tamiuoum, inggoum ahik pah mung uaman i ran. Ahik pah mung kula pare, ‘O man i Heuen,’ ge i Heuene pe tono tabtabila God. ³⁵ Doh inggoum ahik pah mung kotou, ‘O man i kot,’ ge i koto pe e mok i kukulebang tang God. Doh inggoum ahik pah mung kotou, ‘O man i Jerusalem,’ ge i Jerusalem pe na uan uleikir toia uleik. ³⁶ Doh ingga ahik paho uamana to tar porem, ge ingga pe ahik paho banotong touo katongo me kabeleng ulum e la patour ue e kurkurum. ³⁷ Kula kompe ‘Aa’ ue ‘Ahik.’ Bor uelhire gera tumana baka polukulaig tar puhung uelhire, ginin e la tur tang Satan.”

³⁸ Iesu ke kula poluk pare, “Ing-goum kung longoro manasa tena puhung kula uapopokoh Moses gere kula pare, ‘Gete me tang siokor tamat e mamantouo me pang siokor matanar tang giameher tamat, git ke mamantouo ra mamantouo ponoinir pang siokor matan. Doh gete me tang siokor tamat e uatakalekus me siokor liunor tamat, inggono ra uatakalekus ponoin me siokor liun.’” ³⁹ Bo inggo u hire tamiuoum pare, ing-

[†]5:27 KT 20.14; Ual 5.18 ^u5:29 Mat 18.9; Mak 9.47

^v5:30 Mat 18.8; Mak 9.43 ^w5:31 Ual 24.1-4; Mak 10.4 ^x5:32 1Ko 7.10-11

^y5:33 NKP 19.12; Aha 30.2; Ual 23.21 ^z5:34 Ais 66.1; Mat 23.22; Jas 5.12

^a5:35 Ker 48.2; Ais 66.1 ^b5:38 KT 21.24; NKP 24.20; Ual 19.21

goum ahik pah mung pehahaua tar tamata gere guata uasa tamiuoum. Gete me tamat e posar tar pararoumuaitir pang mua, tur keip uiuir pono tatanono tar pang kais. ⁴⁰Doh gete me tang siokor tamat e marang poluk totomua, dohe kale tonongo hikhikua, auia, heir pono tonongo hikhiku barah tatanon. ⁴¹Doh gete me tang siokor tamat e kula tutup totomua tar huata mena inete duhono tar siokor kilomita, auia, la keip tatanono tar torikir kilomita. ⁴²Heir tar inete tasisit ra dangat, kara hik pah mung heir tar mudimiu tasisit ra marang kalkale baka puk.”

Inggoum ahik pah mung pehahaua tar niguata uasa ka guataig tamiuoum

⁴³c⁴⁴“Inggoum kung longoro manasa sioun tar puh e kula pare, malaelhir tang uanotoum, karo de tenang uelmatan. ⁴⁴d^{Bo} inggo u hire tamiuoum pare, malaelhir tosnomio uelmatan, karung mene uaia tasisit ra soul tamiuoum. Guata uaia tasisit ra de tamiuoum, karung poul tenami lotu tasisit ra heir tar niduh tamiuoum. ⁴⁵Getung guatoum pagiare, inggoum mung turung uangoul sira tun, o bung tuna Tamamiuenah i Heuen. Ge inggono pe e heir tar pisara tasir tamata uasa, doh tasir tamata uaia, doh inggon e heir tar huana tasir tamata uaia, doho tamata uasa pon. ⁴⁶Getung malaelhir pukuoum tasisit ra malaelhir tamiuoum hape re la uia to pelar puhonene? Gisisir ueuenau ra uoto guata pono pagiar. ⁴⁷Doh getung guata uaia pukuoum toso bung kaloumiu, hape rung giamehe sioko peoum tasir gisiameh? Gisis ponompe ra tele tang God ra guata uaia puk pono toso bung kaluas. ⁴⁸e^{Bo} inggoum puk pakung guata uakodkodoh misiana re

guata uakodkodoho pe Tamamiuenah i Heuen.”

O Mahar 6

Iesu ke ualasira hape ra poul peisir tamata gera malahir me nipoul

6^f“Mu tagin teil! Ahik pah mung ualasira tenami hagar uaia tar matasir manai mara bang, kara kale kai tar hangamiuoum geta hikoum pah mung kale me bulauamiu re la turuha tang Tamamiu i Heuen. ²Temaene tar binaka ro marang heiria me inete tar tamata gere malahir me nipoul, ahik paho u toro tuil tar uahire tasir tamata tar haua ko guatain misiana tasir tamata gesir tang uelhire kokop. O tamatasina ra boho kompe tasir manai mara namanar tamata pare, gisin o tamata uaia, kara uatamata uleik tasisin. Inggoum gine ru hire tamiuoum, o tamatasina ka kale uoum tar bulauas. ³Temaene geto marang poulia me tamata gere malahir me nipoul, ahik paho uahire me tamata tar haua ko guatain ⁴mare moko uaouor puhung nipoulonene. Doh Tamoumua gere ate tar mamang inetelikinit re ou, e turung bulaua uakalahara to totomua.”

Iesu ke ualasira hape ra lotu per tamat

⁵g^{Doh} Iesu ke kula poluk pare, “Ahik pah mung guata sira tasir tamatang mene kokop. Gisina ra uaha tar tur iuma tar umang lotu doh tar morener uan, kara lotu mara bangar tamata tasisin. Inggoum gine ru hire tamiuoum, gisina ka kale tun manasa uoum tar bulauas uakapa tun. ⁶Bo tar binaka ro lotua, la tar butur ro banot o uangoul me pahaim. Holoro toro pirik, karo lotu tang

^c5:43 NKP 19.18 ^d5:44 KT 23.4-5; Luk 23.34; Apo 7.60; Roum 12.14,20

^e5:48 NKP 19.2; Ual 18.13 ^f6:1 Mat 23.5 ^g6:5 Mat 23.5; Luk 18.10-14

Tamoum, ge ahik pah ra uoto bang huarain. Doh Tamoumua gere uoto bang huara tar inete ro guatang pahemigia ue o guata uauouogia e turung bulaua totomua.”

^{7h}“Doh tar binaka rung lotuoum, ahik pah mung kotouo me puhpuhung baramah puhpuhung lotu, misiana tasir tamatasit ra tele tun tang God. Gisina ra namana pare, geta guata keipisina me bureher uelhire God e longoro tasisin. ⁸ⁱInggoum ahik pah mung uakeluk tenas hagarisin. Ge Tamamiuoum pe e atensioum manasa tar hauar inete rung malaragioum tar binaka halanoum tung dangata tatanon.”

Gine te pake terung lotu peoum

⁹“Gine te pake terung lotu peoum. Tamamiueim, ingga kaeia i Heuen, inggeim mi uouongono tar hangoumua. ^{10j}O heiriha tenang Nitoia, doh tenang nikauek e kotpokosane i kot, doh tereng nimalara ra uakelukinane i kot ngohinanah i Heuen.

¹¹O heiriha tamiueim tar nieining daan. ^{12k}O kuse luara teremi niguata uasaem misiana ring kuse luara pe inggeim tasisit ra guata tar niguata uasa tamiueim.

^{13l}Inggga dehen to keip tamiueim tar uedang, karo uelkarus tur tamiueim tar tang siokor Tamata Uasa.

Ge a Nitoia pe doha nitampopokoh, doha hangana uleik a uiniator a noumua tar mamang binakalik.”**

^{14m}“Getung kuse luaroum tar niguata uasa ka guataig tamiuoum, Tamamiu-

oumenah i Heuen e kuse luara pono teremi niguata uasaoum. ¹⁵Bo getung de inggoum matung kuse luara tenas niguata uasar gisiameh, Tamamiuoum ahik pono pahe kuse luara teremi niguata uasaoum.”

Iesu ke ualasira tar hagarung ueil

¹⁶ⁿIesu ke kula poluk pare, “Tar binaka rung ueiloum tar niein, inggoum ahik pah mung guata sira tasir tamatasitir tang kokopo ra uoto guata pe. Ra pe mara bang parokois ra ueil pe. Inggou u uamana tun tamiuoum, gisina ka kale manasa tar bulauas. ¹⁷Bo tar binaka ro ueilia tar niein, ingga o uamoko me uaiuai toro lum, karo uahuhu tar porem. ¹⁸Mara hikir gisiamehe pah ra bang paroko ro ueil pe ingga. Tamoumua puk manasampe ge ahik pah ra uoto bang huarain tere ate. Doh Tamoumua gere bang huara tar inete ro guata uauouogia e turung bulaua uakalahar a totomua.”

Malaelhir tar ineter nang God ahik pah tar ineteng tar kot

^{19o}“Inggoum ahik pah mung uamoko toto tenami mamang inetelikitier uiaane i kot. Geta mamantouor kurkur ue me giniamhemper inete gere banotong uamout taninin, doho ueuenaua ra banotong leka uelhir, kara la uenau. ^{20p}Bo pakung uamoko toto puk tar ineter namiu i Heuen, tar butur ahik mo kurkur ue me giniamhemper inet e banotong uamout tananin ue mo ueuenau ahik pah ra banotong polaka, kara la uenau. ²¹Ge ia pe re mokor inete uaiar namiuoum ter buturuono re moko pono remi nimalaelhiroum.”

** **6:13** A giniamheher bolobolong sioun tabo teilinir vesene 6.13b.

^h**6:7** 1To 18.26-29 ⁱ**6:8** Mat 6.32 ^j**6:10** Luk 22.42

^k**6:12** Mat 6.14-15; 18.21-35

^l**6:13** Luk 22.40; Jon 17.15; 2Te 3.3; 2Ti 4.18; Jas 1.13 ^m**6:14** Mak 11.25-26

ⁿ**6:16** Ais 58.5-9 ^o**6:19** Jas 5.1-3 ^p**6:20** Mat 19.21; Luk 18.22

A matanar tamat ngohinar luh

²² Iesu ke kula poluk pare, “A matana tena luhur tukunun. Geta uiar matoumua, a luh e turung uoun uakapa tun tar tukunumua. ²³ Bo geta sar matoumua a tukunumua uakapa tun e turung kitup. Gete mokor luh totomua e ngohina paha kitup, a kitupon doh e turung kitupuntiehengua.”

Ahik me tamata re banotong kalekinale i kukulebanga tar tang torikir tamata uleik

²⁴ “Ahik me tang siokor tamata re banotong uangoul i kukulebanga tar tang torikir tamata uleik tokah. Ge inggono pe e turung huain me tang siok, kare uaha tar tang giameh. Ue inggon e turung malauelhir tar tang siok, kare de tar tang giameh. Inggoum ahik pah mung banotong uakeluk tokaha tang God, doha mani.”

Ahik paho namanantieh tar ineteng tar kot

²⁵ q“Temaene ru hireo tamiuoum, ahik pah mung namanantiehe tenami niuangoul, pare tar niein doha inum, doha haua ro gomoin tar tukunum. Na nituar tamat a i ranantiehe tar niein, doha tukununar tamat a i ranantiehe poluk tar gomon. ²⁶ rBanga tasir tetiau! Gisin ahik pah ra lebe tar uatun, kara lous ue ra ur toto, kara uamokola tar um, bo Tamamiuoum puk i Heuen e kauেকে teil tasin! Doh inggoum o inete uleik uain poluk tasir tetiaua tang God. ²⁷ Mai tamiuoum re uoto namanantiehe tar inetenin, kare namana pare, e banot e uabarah tena niuangoulane tar koto mare barah?”

²⁸ “Kara hik pah mung namanantiehe tar gomon. Banga re hua per kalanguh roke, ginin ahik pahe kalekinale ue e tuha katongo mena gomon. ²⁹ sBo inggoume ru hire tamiuoum Solomon ger toia, ahik pono na niuiniatoro paha mataia ue mena hikhiku sira re mataia per kalanguh rokeninanine. ³⁰ God e ualoho tar garasanine i moren, doh ginin e tua puk daan, bo tar giameher marein ginina ra tokoutig, kara ualuhig. Bo inggoum pukene ahik remi nitagorong mana paha popokoh, inggoum tekung i ranantiehe tun tar kalanguh, temaene inggoum pakung ate pare, God e turung kauেকে uaia tun tamiuoum.”

³¹ “Temaene inggoum ahik pah mung namanantiehe, karung kula pare, ‘A haua ri einigieig? Ue a haua ri inumugieig? Ue a haua ri lohogieig?’ ³² tTer ineteninanine ra uoto namanantiehe tunigir tamatasit ra tele tang God. Doh Tamamiuoumenah i Heuen e ate manasa mung malara peoum tar ineteninanine. ³³ uBo a inete uleik puk te pare, inggoum mung sir baka uoum tena Nitoia God mena tena hagar uaiaon, song re heir ponono tar ineteninanine tamiuoum.”

³⁴ “Temaene inggoum ahik pah mung namanantiehe tar marein roliuo. A ineteng roliuo e la manasampeig tar mareinon. A niduhun tar siokor marein e la manasampeig tena marein.”

O Mahar 7

Ahik pah mung uelkedangesioum

7 ^v“Ahik pah mung kedanga tasir gisiameher tamata mara hik ponoum pah ra kedangesioum. ² wGe tar siokonor hagar pe rung kedanga peoum tasir gisi-

^q6:25 Pil 4.6; 1Ti 6.6-8; 1Pi 5.7 ^r6:26 Mat 10.29-31; Luk 12.6-7

^s6:29 1To 10.4-7; 2OUTT 9.3-6 ^t6:32 Mat 6.8

^u6:33 1To 3.11-14; Ker 37.4,25; Roum 14.17

^v7:1 Roum 2.1; 1Ko 4.5; Jas 4.11-12 ^w7:2 Mak 4.24

ameh ter siokonor hagar kompe ra turung guata hahaua pono pesioum. ³Ae maene ro banga tar sikir mongmongo re moko teil tar matana kaloum, kara hik paho namana huara tar puhung douk uleikeit re moko teil tar matoum? ⁴Gete moko teil me puhung douk tar matoumua, ae maene ro banotong kula ingga tang kaloum pare, ‘Kaloug, inggo dehu marang kale liu tar sikir mongmongo re moko teil tar matoumua?’ ⁵Ir tang kokop! Ingga bo pake tero kale liu baka uoumumpe tar puhung doukeit re moko teil tar matoum maro bang huara uaiaa, song ro kale liu tar siksikir mongmongo re moko teil tar matana kaloum.”

⁶“Inggoum ahik pah mung heir tena inete God ger dedeil tasir lo ue ahik pah mung baka ueleheir tenami kuaman tasir hueit. Geta peirpeir uauhusin taninin, kara tur uiuir, kara eit tamiuoum.”

Na nitampopokohor lotu

⁷xIesu ke kula poluk pare, “Dangata mara heiriono tamiuoum, sir marung tuparoum, dok mara puka ueleheirisioum. ⁸yGe o tamata uakapa pe gera dangat, gisina tera kale, doh mair tamata gere sir, inggono tere tupar. Doh mair tamata gere dok, inggono tera puka ueleheirin. ⁹Gete me tuna me tang sioko tamiuoum, e dangata tang tamana tar heir mo bereit tatanon, tamanono here turung heir tatanono mo bahir? ¹⁰Doh gete dangatar keketik tang tamana tar heir me iana tatanon, tamanono here turung heir me soi tatanono bo? Ahik noman! ¹¹zInggoumur tamasir keketik mung uoto guata tar bureher niguata uasa, bo inggoum puk mung atentiehe tun tar heir tar ineter uia toso bung tu-

miu. Temaene inggoum mung ate tun pare, Tamamiuoumenah i Heuen e turung uaha tar heir tar inete uايا tang mai re dangata tatanon.”

¹²a“^aA mamang hagarinit rung malara-gioum paka guataigir tamata tamiuoum ter hagarinin pakung guata ponogioum tasisin. A puhung kulonene, e ragom tane uakapa tena ualatut Moses doh nas niualasirar propet.”

Inggoum pakung solola toro pipirikilik

¹³“Inggoum pakung solola toro pipirikilik. O pirik gero rabian, doha lele ger tahang, kara malagir tar uakeluk ter lelono re lihila i Hel, doho burehentieher tamata ra uoto lihila tar lelono, ¹⁴bo ro pirik gero lihila tar uan gere mokor nitua o kikitilik tun, doha lele re lihila tar buturuon a kisong, karo parakukuh tar uakeluk, doho gisiamehe pukumpe ra uoto tupar, kara uakeluk.”

Tagin tasir propet bohoboh

¹⁵b“^bTagin tasir propet bohoboh! Gisina ra uoto guata tar uelhirenitier uia tun tar reih tamiuoum. Bo res ninamana uleik tunusina tera marang uaheil pukumpe tamiuoum, kara mamantouo tamiuoum. Gisina misiana tasir lo roke gera gomois tar kapokonor sipsip mara banotong la uahuhut, kara buak, kara uiliatung poustasisin. ¹⁶c“^cInggoum mung turung ate to tar haua ra guataigisin, te misiana kompe, inggoum mung banotong bang paroko to toro douk tar uauan. Inggoum ahik pah mung banotong lous tur tar kukuananar kalok toro douk ueluelhung ue tar uaunar kahaue toro douk uasa gero uelmomohang, bidouh?

^x7:7 Mak 11.24; Jon 14.13; 15.7; 16.23-24 ^y7:8 1Jo 3.22; 5.14-15

^z7:11 Jas 1.17 ^a7:12 Mat 22.39-40; Luk 6.31; Roum 13.8-10

^b7:15 Mat 24.24; Apo 20.29; 2Pi 2.1 ^c7:16 Gal 5.19-22; Jas 3.12

¹⁷O douk gero huang tagal o ua me kukuanana uaia, bo ro douk gero hua uasa, ahik pahe uiar kukuanan. ¹⁸O douk gero huang tagal ahik paho ua me kukuanana me sa, doho douk gero hua uasa ahik paho ua me kukuanana me uia. ¹⁹^dDoha mamang doukulik ge ahik pahe uoto ua me kukuanana uaia ra tokout uahiuai, kara bakalaig toro hue. ²⁰^eTer siokono kompe rung turung ate peoum tasir propet bohoboho tar haua ra guatain.”

²¹^f“Ahik paho tamata uakapa tunusit ra kila totoguo pare, ‘Nag Tamata Noman, Nag Tamata Noman,’ ra turung lekala tar Nitoiang Heuen, bo teesit puk manasa kompe ra uakeluk, kara guata tena nimalara Tamouguo i Heuen. ²²Tar binaka re lamer mareining kedang, o bureher tamata ra turung kula pare totoguo, ‘Ir Tamata Noman, tar hangoumua inggeim king uelhire tauete tono uelhire God, doh teremuar nitampopokoh, inggeim king geil tauete tasir bureher liouana uasa, karing guata tar bureher nitou.’ ²³^gDoh inggo u turung kula pare tasisin, ‘Mu uareing totoguo, ge inggoum pe o tamatang guata tar nguata uasa. Inggo u tele tamiuoum.’”

Mu longor, karung uakeluk tena niualasira Iesu

²⁴“Temaene a tamata gere longoro tar uelhireniner nouguo, kare uakeluk taninin, inggono misiana tar tamatang iate geke tuha uapono tena uma tar papaluan. ²⁵Doha huana ke dur, karo reih ko kotpokos, doha romo ke tentur, doha mamang inetelikininanine ke uaguna tar um, bo ahik pukuono pah

ke pung, teene ka tuha uapono pein tar palau. ²⁶Bor tamata gere longoro tar uelhireniner nouguo, kara hik pah ke uakeluk taninin, inggono misiana tar tamatetie ahik mena niate geke tuha uapono tena um i rana tar ion. ²⁷Doha huana ke dur, karo reih ko kotpokos, doha romo ke tentur, kare u bise tar umon, teke punga uahiuu peon i kot, ke kapa tunungua.”

²⁸Tar binaka ke menmene uakapa manasa Iesu tar ineteninanine, o tamata ka lutarantiehe tun tena niualasiron, ²⁹^hteene inggono ke ualasis sira tar tamatetier tohangan, doh ahik pah misiana tosnosio tamatang ualualasirasina tar ualatut.

O Mahar 8

Iesu ke uauia tar tamat a toba

8 Tar binaka ke hiliu turuha Iesu tar ponponin, o bureher manai tamata ka uakeluk tatanon. ²Doha bulout e mate keip toro toba ke lame tatanon, kare me hatup uahiuu tatanon, kare kula pare, “Tamata Noman geto malara ingga o uadelauana totoguo.”

³Doh Iesu ke huela tar limana, kare tuha tatanono, kare kula pare, “Inggo u malar, ingga o delauan.” Kare delauana ualahur tununguar bulout, karo kapan-gua ponompe no toba. ⁴ⁱDoh Iesu ke kula tatanono pare, “Ualongor! Dehen to hirhire me tamat, bo o la dedengua kompe tar pater, karo la ualasisraia, karo la heir tar uahung geke kulain Moses tar ualasisra tasir tamata uakapa pare, ingga ko uia.”

^d7:19 Mat 3.10; Luk 3.9; Jon 15.6 ^e7:20 Mat 12.33

^f7:21 Luk 6.46; Jas 1.25 ^g7:23 Ker 6.8; 2Ti 2.19

^h7:29 Mak 1.22; Luk 4.32 ⁱ8:4 NKP 14.1-32; Mat 9.30; Luk 17.14

**Iesu ke uauia tena tamatang
kalekinale nas tang uoum
keipir soldiang Roum**

⁵Tar binaka ke lala Iesu i Kaperneam, nas tang uoum keipir soldia ke lame tatanon, kare me dangata uapopokoho tun tatanono pare, ⁶“Tamata Noman, nag tamatang kalekinaleo e momouh rikin tenag umo, dohe momouh uasa tun, doh ke mate uakapar tukunun.”

⁷Doh Iesu ke kula pare tatanon, “Inggo u turung lame, karu me uauia tatanon.”

⁸Bo nas tang uoum keip pukur soldia ke kula tapokis tatanono pare, “Inggo ahik paha tamata uauia tar kaleme to-tomua tar me uangoul ium tenag umo, bo o kula kompe me puh mare la uia nag tamatang kalekinaleo. ⁹Inggo u kula sira pare, ge inggo pe u uangoul pon i kukulebanga tasir tamata uleik gera kaueke teil totoguo. Doh inggo katong, nogu soldia ra uangoul i kukulebanga to-toguo. Doh getu kulo me tang sioko pare, ‘Ingga o la,’ inggon e la. Doh getu kula tar tang giamehe pare, ‘O lame,’ inggon e lame. Doh getu kulo tenag tamatang kalekinale pare, ‘Ingga o guata tar kalekinaleene,’ inggon e guat.”

¹⁰Tar binaka ke longoro Iesu tar in-eteninanine, inggono ke lutar, kare kula tasir tamata gera uakeluk teil tatanono pare, “Inggo gine ru hire tamiuoum, inggo ahik pah ku ueltupara me tamat tasir tamatang Israel, na nitagorong mana sira tar tamatene! ¹¹jInggo u hire tamiuoum pare, o bureher tamata ra turung la turume tar butur re harhara turuhar pisar, doh tar butur re la hukor pisar, kara me tabila tagu tas Abraham, Aisak, doh Jekop tar Nitotiangu Heuen. ¹²kBosir tamata^{††} geke

kedanga baka uoumis God tar la uangoul tena Nitoiaon, God e turung baka tauetela tasisina tar kitkitupun tera la kiring tosin, teeit ra nimaliana pe, kare uelmahingis.”

¹³Doh Iesu ke kula pare tenas tang uoum keipir soldia, “La tapokis tenang uan. Doha puhon e turung pokoso to-tomua, ter hauon ingga ko tagorong man.” Doh tar binaka tunumpeonene, ke uia tapokis na tamatang kalekinaleon.

Iesu ke uauia tena uarih Pita ger kuah

¹⁴Iesu ke lala tena uma Pita, kare la bangangua tena uarih Pita re momouh rikin pe toro uat, doha tukununon e uel-suk uasa tun. ¹⁵Doh Iesu ke tuha tar li-manon, kare la ariana dedengua kompeon, kare tenturunguaon, kare kaleua-toro tena niein Iesu.

¹⁶Nareuinar binakoneit, o tamata ka keip pokosome tang Iesu tasir tamata ra uangoul teilir liouana uasa, doh inggono ke geil liu keip tasisina tar puhung uelhire, kare uauia tasisit ka momouh. ¹⁷Ke guatono pare, tar uakalahara uakapa tun tar haua ke kulaig propet Aisaia sioun pare, “Inggono katongo ke kale teregi momouheig, kare huata teregi uelmahingeig.”

**Iesu ke hire tar hagarang
uakeluk tatanon**

¹⁸Tar binaka ke banga Iesu tasir manai tamata ka tur uiloho pe tatanon, kare kula pare tosno tamatang uakuakeluk. “Inggeig i la tar pang giamehener kodomo uiluiloh.” ¹⁹Doha tamatang ualualasira tar ualatut ke lame, kare me kula pare tang Iesu, “Ir tang ualasisir, o mamang buturulik ro lagia, inggo u turung uakeluk to-tomua.”

^{††}8:12 O tamata geke kedanga baka uoumis God tesir Ju.

j8:11 Luk 13.29 k8:12 Mat 22.13; 25.30; Luk 13.28 l8:17 Ais 53.4

²⁰mDoh Iesu ke hire tapokis pare tatanon, “O lo roke nas lebang, doho teti-aua nas niu, bor Tunar Tamat ahik mena uma uamatoto tun re hohouin, kara hik me butur re uadedeke toro lun.”

²¹nDoha tang giameher tamatang uakuakeluk ke kula pare, “Ir Tamata Noman, inggo u marang uakeluk totomua bo o uamaluaana baka kompe totoguo u la keu baka tang tamoug.”

²²Bo Iesu puk ke kula pare, “Uakeluk totoguo gete reng nitagorong mana, karo uamaluaana tasisit ahik mes nitagorong man ra keu tosnosio mat.”

Iesu ke louar, kare takoutunguar tukung uasul

²³Iesu ke panete tar bout, doh no tamatang uakuakelukono ka la tagu tatanon. ²⁴oKa hua matoto manasasin i uantinaninar kodomo uiluiloh i Galili, doha tukung uasul ke tentur, doha laur ke sasaopola tar bout, bo Iesu puk e hohouo rikinimpe. ²⁵Doho tamatang uakuakeluk ka la ualagura tatanon, kara kula pare, “Ir Tamata Noman, uelkarus tamiueim. Inggeig dehi mate manas!”

²⁶pDoh inggono ke kula pare tasisin, “Ae maene rung sokoroum? Remi nitagorong mana dehoum a kikitilik.” Song ke tentur kaion, kare louara tar romo pare, “Takoutir rom,” kare kula polukuono tar butuana pare, “Hiarou!” Song ke kapar rom, kare hiarouo tununguon. ²⁷Doh gisis ka lutarantiehe tun, kara kula pare, “A tamata hauonene maene ke longoror rom, doha butuana tatanon?”

Iesu ke geil liu tasir liouana uasa tar tang torikir bulout

²⁸Tar binaka ke lame Iesu tar pang giamehener kodom tar pang uan i Gadara,

inggono ke ueltupara tar tang torikir tamata kura tauete turuha toro lebangang mat. A toking tamata rasin a toking nihikung liouana uasa, doha toking ualasokor, kara toking mamantou tun, temaene ahik me tamata re uoto marang lihila tar lelon. ²⁹qKaura kula ualeik rasina pare, “Ir Tuna God, a haua ro marang guataia tamiueim? Ue teko laha tar me uauelmahing tanika tamiueim i uoumuhia, song re pokosor binaka tun?”

³⁰Doha pang hueit uleik ra uangoul uairehe sikoro kompela tar buturuon, ra ein. ³¹Doho liouana uasa ka dangata uapopokoho tang Iesu pare, “Geto marang geil taueta tamiueim, uamaluaana tamiueim mi la hikulala tar pang hueit.”

³²Doh Iesu ke kula pare tasisin. “Mula!” Doho liouana uasa ka hiliu tar toking tamat, kara la hiku tasir hueit. Doh gisinar pang hueit uakapa tunusine ka siokor ualontiehe tununguako tar hiuhiuon a i ranantieh, kara la siaka uahuako tar kodomo, kara la siokor houp matengua.

³³Doho tamatang kaukaueke tasir hueit ka bang, kara ualo liu, ka la pokososina tar uan kara la hire tasir gisimeher tamata tar mamang inetelik ke kotpokos. Doh ka ueluatata pono tar haua ke kotpokoso tar toking tamata ger toking nihikung liouan. ³⁴Doho tamata uakapa tun tar uanono ka lame tang Iesu. Doh tar binaka ka bangasina tatanono ka dangata uapopokoho tun tatanono tar hiliu tonoso mahar kotosin.

^m8:20 2Ko 8.9 ⁿ8:21 1To 19.20 ^o8:24 Ker 4.8

^p8:26 Mat 14.31; Ker 89.9 ^q8:29 Mak 1.24; Luk 4.41

O Mahar 9

Iesu ke uauia tar bulout a mater toking liman, doha toking keken

9¹Doh Iesu ke panete tar bout, kare sairkoutula tar kodomo uiluiloh i Galili, kare la kotpokoso tena uan. ²Doho tamata ka keipime tar tang siokor bulout tang Iesu, kura mate uakapar toking liman, doha toking keken, kare rikin kompe tono rikin. Doh Iesu ke bang paroko teres nitagorong manasin a uleik tun, kare kula tanenetir bulout pare, “Ir tug, Ingga o bangang uah! Reng niguata uasaa ka kuse luara manasaig.”

³Doho gisiameher tamatang ualualasira tar ualatut ka menemene katongois pare, “A sa tunumpe re marang kale tane per tamatene tena hagar God!”

⁴Bo Iesu puk e ate teilinsioun manasa teresi ninamanasin, kare kula pare, “Ae maene i lolono teremi ninamanoum inggoum mung namnamana uasa? ⁵O uelhire haua ro malagir totoguo tar men? Tar kula pare, ‘Reng niguata uasaa ka kuse luar manasaig,’ ue tar kula pare, ‘O tentur karo la.’ ⁶Bo inggo puk u malara mung ateoum pare, a Tunar Tamat na nitampopokohane i kot, doh inggon e banot e kuse luara tar niguata uasa.” Song ke kula tar tamateitir mater toking liman, doha toking kekena pare, “Tentur! Kale tonongo rikin, karo la ium.” ⁷Doh gitir tamata ke tentur, kare la tena um. ⁸Tar binaka ka bangar tamat, kara lutarantiehe tunungua, kara uatakaiantiehe tunungua pono tang God ke heir pe tar nitampopokohonine tasir tamat.

Iesu ke kila tang Matiu

⁹Tar binaka ke hiliu Iesu tar buturuon, doh gitie re la pelaon, kare bangangua tar tang kale takis a hangana tang Matiu, inggon e tabila tena buturung kalekinale. Doh Iesu ke kula pare tatanon, “Uakelukumeane totoguo.” Doh Matiu ke tentur, kare uakeluk tatanon. ¹⁰Doh tar binaka ra ein tabil to Iesu tena uma Matiu, o bureher tang kale takis, doho tamatang guata tar niguata uasa ka lame, kara me tabila tagu tang Iesu menia toсно tamatang uakuakeluk, kara ein tokah.

¹¹UO gisiameher tamatang iate tar ualatut ra kilais, o Parisi^{††} ka banga kara dangatangua toсно tamatang uakuakeluk Iesu pare, “Ae maene re ein keip nami tamatang ualualasiroum tasir tamata uasasine?”

¹²Iesu ke longoro tasisina, kare kula pare, “O tamata gesir tagal, ahik pah ra malara me nipoul e la tur tasir dokta, bo o momouh puk tera malara me nipoul. ¹³Mu la, karung la sir tur tar tengkanar niate tono uelhire God gero kula pare, ‘Inggo u malarantiehe tun teremi niueldolomoum tasir gisiameher tamat, e i ranantiehe uain tar uahung.’ Ge inggo pe ahik pah ku laha tar me kila tasir tamata uaia, bo ku laha tar me kila tasir tamata uasa.”

Iesu ka dangatain tar niguatang ueil

¹⁴WTar binakon no tamatang uakuakeluk Jon ger tang uahuu ka lame tang Iesu, kara me dangata pare, “Aeono maene, inggeim mesir Parisi mi uoto ueil, doh nongo tamatang

^{††}9:11 O Parisi ra uoto uakeluk, kara ualafir tar bureher ualatut doh na ualatut Moses.

[†]9:1 Mat 4.13 [§]9:4 Luk 9.47; Jon 2.25 [†]9:6 Jon 17.2 [¶]9:11 Luk 15.2

[¶]9:13 Hos 6.6; Mat 12.7 [¶]9:14 Luk 18.12

uakuakeluka ahik pah ra uoto ueil tagu?"

¹⁵Doh Iesu ke kula tapokis pare tasisin, "Tenas niguatar Ju, gete nihing ler bulout, o uanotonono ahik pah ra uangoul keip tar niduh, kara ueil tar binaka re uangoul keip harahono tasisin. Bo i muduhia puk tar binaka re turung kotpokosor mareining kale liu tar le timuh toso uanoton, ter binakono re turung sir toisisin, song ra ueil."

¹⁶"Ahik me tamata re banotong kaere tola toro mahar gomono timuh tar gomonor pensioum mare uauia, ge o mahara pe roeit ro timuh o turung takih liu, doha takihin e turung uleikintieh. ¹⁷Doh ahik pono me tamata re hedongo tola tar bino timuh tar itung kodomor pensioum."^f Gete guatono pare, a bino timuh e uoutuout kai, kare uatapuaka tar itung bino pensioum, kare uasuasangua tar itung tar bino. Temaene ra uoto hedongonguaigir timuhur bino tar timuhur itung bino maura siokor moko uaia tokah."

Iesu ke uatua tapokis tar tang siokor keketik, doh ke uauia tar kuaha geke tuha kout tono hikhikuon

¹⁸Binaka re menmene haraha Iesu tar ineteninane, a tamatang uoum keip tar umang lotu ke lame tatanon, kare me hatup uahiuane i koto tar kekenon, kare kula pare, "A tuguo dehon a kukuahalik ke nihing mat. Bo ingga puk o la ualahu-ruha, karo me tuha tatanono mare tua tapokison."

¹⁹Doh Iesu ke tentur, kare uakeluk tatanon, doh no tamatang uakuakelukono ka la tagu pon. ²⁰Doha tang siokor kuah e tutung bakue e la tagu teil pono tasir manai. Inggonor kuaha ke tutung bakue tar puhung

barah e banoto toro hangaul, doho torik ro krismas. Inggono ke lihime i muduhia tang Iesu, kare tuha kout toro suruna no hikhikuon. ²¹xTeene inggono ke namana pare. "Getu tuha pukuo tono hikhikuon, inggo u turung uia puk manas."

²²Doh Iesu ke tur uiuir, kare bangala tar kuah, kare kula pare, "Reng nitagorong mana ke uauia totomua." Doh tar binakangua kompeonene ke uiar kuah.

²³Doh Iesu ke la pokosola tena umar tamatang uoum keip tar umang lotu, kare banga tasir tamata ra kiring pe, kara u tar tulal, kara ualualagoreih. ²⁴Kare kula pare, "Mu uareing! A kukuahalik dehene ahik pah ke mat, inggono dehe hohouo puk!" Doh gisina ka uanuanio uanete tatanon. ²⁵Tar binaka ka ueltula tauete manasaisir tamat i kalahar, Iesu ke lekala tena tina umar kukuahalik, kare kusa tar limanon, kare tenturunguaon. ²⁶Doho ueluatata tar puhonene ko la uiloho uakapangua tar pang unianon.

Iesu ke uauia tar tang torikir bulout a toking kut

²⁷yDoh tar binaka ke hiliu Iesu tar unianon, doh gitie re la pelaon, a tang torikir bulout a toking kut kura kekete uakeluk tatanon. Kaura kulkula ualeik teil pare, "Ir Tuna Debit ueldolomo tamiraeim!"

²⁸Tar binaka ke la lekala Iesu tar um, rasitir toking kut kura lame tatanon, doh Iesu ke kula pare tasrasin, "Raoum mura tagorong mana pare, u banotong uauiao tamiraoum?" Kaura kula rasina pare, "Aa! Ir Tamata Noman, raeim mira tagorong man." ²⁹Song ke tuha Iesu tara matas rasin, kare kula pare, "A

^f9:17 A kapokonor sipsip ue a kapokonor meme ra uoto tuhaig pare, a itung bino.

x9:21 Mat 14.36 y9:27 Mat 20.29-34

haua ura tagorong manais raoum to-toguo u banotong guat, e turung kot-pokoso tamiraoum.”³⁰ ^zDoha ra matas rasina ke bang. Doh Iesu ke kula tane tassarasin pare, “Ahik pah mura hirhire me tamata tar ineteninanine.”³¹ Bo rasina puk kura hiliu, kaura la uelueluatata uel-tebeir tasir tamata tena nitampopokoho Iesu tar pang uanonene.

Iesu ke uauia tar bulout a pau

³²Tar binaka kura lar toking tamata rasit ka uauiaisira matas, o gisiamer tamata ka keip polukume tar tang siokor bulout a pau tang Iesu, teene re uangoul teil per liouana uasa tatanon.³³ ^aDoh tar binaka ka geil liuininir liouan, gitir pau ke mene huar, doho manai tamata ka lutarantiehengua, kara kula uapopokoho pare, “Ahik tunumpe me inete sira pare, ka banga toinane i Israel!”

³⁴ ^bBo o Parisi puk ka kula pare, “Tamas deher liouana uasaonene re heir tar nitampopoko tatanono tar geil tauete tasir liouan.”

Iesu ke ueldolomo tasir tamat

³⁵ ^cIesu ke la uiloho, kare la hahai toro uan uleik, doho uuanilik. Inggono ke ualasira to tonosio umang lotusin, kare uelhire tauete toro Uelhire Uaia tar Ni-toiang Heuen, kare uauia tasir tamata res mamang matelik.

³⁶ ^dTar binaka ke bangono tasir manai tamat, inggono ke ueldolomontiehe tun tasisin, teene gisina ra bangang hagouu uasa puk teil, kara hik me nipoul tatas misiana tasir sipsipisitie ahik menas tamatang kaukauek.³⁷ ^eDoh Iesu ke kula

tosno tamatang uakuakeluk pare, “A bureher niein ke mahoho manasa tar iom, bo o tamatang kalekinale puk o pag.³⁸ Temaene inggoum mung dan-gata tenami lotu tar Tamata Noman ge tanener iom mare heiriono mo bureher tamatang kalekinale tena iom.”

O Mahar 10

Iesu ke kedanga tosno siokor hangaul, doha tang torikir aposoul

10 ^fIesu ke kila toto tosno siokor hangaul, doha tang torikir aposoul, kare heir tasisina tar nitampopokoh mara banotong geil tauetesina tasir liouana uasa, kara banotong uauia tar mamang matelik.

² A hangasir aposoulusina teenine. Uakikilangana tun te Saimon, gera uoto kila ponoin tang Pita, doh Andru tahinon, doh Jems me tahin Jon, ger toking tuna Sebedi,³ Pilip doh Bartolomiu, doh Tomas me Matiu ger kalkale tar maning takis, doh Jems ger tuna Alpius, doh Tadius,⁴ doh Saimon ger Selot,^{§§} doh Judas Iskariot, geke tangana tang Iesu tasir uelmatan.

Iesu ke heir tenas kalekinale no aposoul

⁵ Iesu ke ualatue tasisin, kare kula tar puhung kulanine, “Ahik pah mung la toro uaninit ra uangoulur tamatasit ahik

§§**10:4** “A Selot,” a tamatang tur tane uapopokoho keip tosno tamat tar gavamanang Roum.

^z**9:30** Mat 8.4 ^a**9:33** Mak 2.12 ^b**9:34** Mat 12.24; Mak 3.22; Luk 11.15

^c**9:35** Mat 4.23; Mak 1.39

^d**9:36** Aha 27.17; 1To 22.17; Sek 10.2; Mat 14.14; Mak 6.34 ^e**9:37** Luk 10.2

^f**10:1** Mak 6.7; Luk 9.1

paho Ju ue noso uanir Samaria. ⁶Bo inggoum mung la tasir sipsiping Israelesit ka heil. ⁷^hMu la, karung la uelhire tauete pare, A Nitouang Heuene ke uahuhut manasain. ⁸Mu la uauia tasir momouh, karung uatentur tapokis tasir mat, karung uauia tasir toba, karung geil tauete tasir liouana uasa. Mu heirheir puk misiana kung kalkale puk pe.”

⁹ⁱ“Inggoum ahik pah mung kalkale teil me mani tar binaka rung la, ¹⁰^jkara hik pah mung kale me tolah ue mo giamehe ro hikhiku ue mo su ue mo tukan. A tamatang kalekinale ra heir uoumumpeinir haua re malarain. ¹¹Doh getung pokosoum tar uan uleik ue a uauanilik, inggoum mung lekala, karung la sir me tamata uaia, karung uangoul tagu tatanon e tuka getung hiliuoum tar uanion. ¹²^kTar binaka rung lekalaoum tar um mung kula pare, ‘A niuangoul uaia e moko tar umene!’ ¹³Doh geta uaha uangoulur tamatang tar umono tamiuoum, uamaluana tenami puhung kulang uelhiarou e mokououm, bo geta hikisina pah ra uaha uangoul tamiuoum, karung kale tapokisoum tenami puhung kulang uelhiarou. ¹⁴^lDoh geta hik mo uauanilik ue mo uan uleik ra uaha uangoul tamiuoum ue ahik pah ra longoro tamiuoum, karung titir liuinguoum tar siksikir koto tar kekeimiu tar uabang manate tasisin pare, ka guata uasa pe tamiuoum. ¹⁵^mInggou u uamana tun tamiuoum, tar Mareining Kedang a niduh re turung heirin God tar uanion e i rana uain poluk tar niduh ra turung heirin i Sodom dohi Gomora.”*

Isu ke hire tasir aposoul hape ra turung huata pela tar niduh

¹⁶ⁿIsu ke kula poluk pare, “Ualongor, inggo u kula tamiuoum tar la sira tasir sipsipisitie ra lala i uantinana tasir lo roke. Temaene inggoum pakung lang kanuh sira tasir soi, karung tagin teil tar haua rung marang guataig. Doh inggoum pakung uakeluk tenas hagarir baluh gesir niueluarur, kara hik pah mung namnamanang marang guata me niguata uasa. ¹⁷^oBo mung tagin teil pukuoum mo tamata gera turung reihila tamiuoum tar buturung uelhehek, kara turung kalkalopis to tamiuoum iuma tenas umang lotu. ¹⁸Doh inggoum ra turung reihilasioum tasir tamata uleik tar gavaman, doho toia, teene rung uakeluk pe totoquo. Tar binaka ra guatasin pare tamiuoum, inggoum pakung mene tauete toro Uelhire Uaia tasisin, doh tasisit pon ahik paho Ju. ¹⁹Tar binaka ra keipilasioum tar buturung uelhehek, ahik pah mung namanantiehe hape rung turung la kula pe ge ter binaka tun peono re turung hire God hape rung mene peoum. ²⁰^pGe a uelhire pe rung turung menegioum ahik paha namiuoum, bo e la tur tena labena Dedeil Tamamiuoum gere turung mene keip tamiuoum.”

²¹^q“Tar binakon e turung kotpokoso sira pare, o tamata ra turung reihila toso bung tahis katong mara uiliatung pousis, doho tamasir keketik ra turung guata sira pono toso bung tus, doho keketik ra turung uelmatana toso tinas,

***10:15** Banga Toro Bolobolong Uakeken 19.24. God ke mamantou i Sodom dohi Gomora, teene a toking uan rasina kura uoununtiehe tun tar niguata uasa.

[§]**10:6** Jer 50.6 ^h**10:7** Mat 3.2; 4.17; Luk 10.9,11 ⁱ**10:9** Luk 10.4

^j**10:10** Luk 10.7; 1Ko 9.14 ^k**10:12** Luk 10.5-6

^l**10:14** Luk 10.10-12; Apo 13.51 ^m**10:15** Mat 11.24; Jud 7

ⁿ**10:16** Luk 10.3; Roum 16.19 ^o**10:17** Mak 13.9-11; Luk 12.11-12; 21.12-15

^p**10:20** Jon 14.26 ^q**10:21** Mai 7.6; Mat 10.35; Mak 13.12; Luk 21.16

doho tamas, kara hire tasir tamata ra uiliatung pous tasisin. ²²Doho tamata uakapa tun e turung tokouasais tamiuoum, teene rung uakeluk peoum to-toguo. Bo mai puk re tur uapopokoh e tuka tar uadouhinar marein, inggono tere turung uaudeilin God. ²³Doh geta guata uasa mo tamata tamiuoum me siokor uan, inggoum pakung ualo liuila me giameher uan. Inggo u uamana tun tamiuoum, inggoum ahik pah mung uo-long uakapa tenami kalekinale toro mang uanilik i Israel, kare pokoso manasamer Tunar Tamat.”

²⁴r“Ahik me tamatang uakuakeluk re i rana uain tena tamatang ualualasir, doh ahik me tang kalekinale re i rana uain tena tamata uleik. ²⁵sA tamatang uakuakeluk e banotong uaha gete kotpokoso sira tena tamatang ualualasir, doha tamatang kalekinale e banotong uaha gete kotpokoso sira tena tamata uleik. Gete ka kilaio tang Belsebul,[†] o bunguguo tera turung uelkilais me hanga uasantiehe tun.”

Ahik pah mung sokoro tasir tamat, mung sokoro kompe tang God

²⁶tDoh Iesu ke kula poluk pare, “Inggoum ahik pah mung sokoro tasir tamata gera marang guata uasa tamiuoum. A huar inete ger nigomo uaou, ginin e turung padeneig. Doha huar inete re moko uaou, ginina ra turung uakalaharaig. ²⁷O uelhire ru meneio tamiuoum tar kitup pake terung uelhire taueteioum tar marein. Doho uelhire ru uelhimukuio tar talingamiuoum pake terung tur keipioum tar moren, karung uelhire tauete tasir tamat.”

²⁸u“Kara hik pah mung sokoro tasisit ra uiliatung pous tar tukunun, bo ahik puk pah ra banotong uiliatung pous tar iaben, bo mung sokoro kompe tang God gere banotong mamantouo tokaha tar tukunun, doha iabener tamat i Hel. ²⁹Inggoum mung iate, o tamata ra uoto bulaua tar torikir tetetiaualik tar siokor mani puk. Doh Tamamiuoum e uoto kauieke uaia tun tasisinar tetiau. Ahik me sioko tasisin e banotong pung i kot kara hik Tamamiuoum pahe ate teil. ³⁰Ter siokono kompe tamiuoum, Tamamiuoum e ate tamiuoum, doha ulumioum ponompenit, inggono ke aha manasa pon. ³¹vTemaene inggoum ahik pah mung sokor, inggoum o i ranantiehe poluk tar tukung pang tetetiaualik.”

Inggeig ahik pah matala tar hire o bunguna Iesu

³²“Mair tamata re hirein tasir gisiamer tamat pare, a nouguo, inggo u turung hire pono tang Tamougenah i Heuen a noug pe tatanon. ³³wBo mai puk re uolihin totoguo tasir tamat, inggo u turung uolih pono tang Tamougenah i Heuene pare, u tele tatanon.”

O matmatame ra turung uelsae

³⁴Iesu ke kula poluk pare, “Inggoum ahik pah mung namana pagiare, ku lahaoane tar koto tar me uahiarou tasir tamata uakap. Ahik, inggo bo ku laha tar me uatentur tar uelkoi tasir tamat. ³⁵xGe inggo pe ku laha tar me uaeluelsae toso matmatame, a bulout e sa tang taman, doha kuah e sa tang tinan, doh ramatang enan ura uelsae. ³⁶Ge no uelmatanar bulout pe te gisinempe tena uma ka-

[†]10:25 A hangene “Belsebul,” a giameher hangana Satan.

^r10:24 Luk 6.40; Jon 13.16; 15.20

^s10:25 Mat 9.34; 12.24; Mak 3.22; Luk 11.15 ^t10:26 Mak 4.22; Luk 8.17

^u10:28 Roum 8.31; Jas 4.12 ^v10:31 Mat 6.26

^w10:33 Mak 8.38; Luk 9.26; 2Ti 2.12 ^x10:35 Mai 7.6

tongon. ³⁷Mai re malaelhirintiehe tang tamana doh tinana totoguo, inggon ahik paha tamata uaia mara kulain pare, a nouguo, doh mai re malaelhirintiehe tar tuneitir bulout ue gitir kuah, inggon ahik paha tamata uaia mara kulain, a nouguo. ³⁸^yDoh mair tamat ahik pahe huata tena korose, kare uakeluk totoguo, inggon ahik paha tamata uaia mara kulain, a nouguo. ³⁹Mair tamata re kapil uanono tar nitua tatan, na nituaon e turung rou. Bo mair tamata gere naman, kare sanga dede tonogo Uelhire Uaiao, kare heir liu tena nitua, inggono tere turung tupara tar nitua gere moko dede.”

**Mair tamata re poul tasir tamata
gera uakeluk tang Kristo tera
turung kale bulauana uaia**

⁴⁰^z“Mair tamata re uaha uangoul to-
tomua, e uaha uangoul totoguo, doh mai
re uaha uangoul totoguo, e uaha uangoul
tar tamatene ke heiriha totoguo. ⁴¹Mair
tamata re uaha uangoul tar propet, ge
inggono pe na tamatang keip uelhire
God, inggon e turung kale me bulauana
sira tasir propet. Doh mair tamata re
uaha uangoul me tamata uaia, teene a
tamata uaia peon, inggon e turung kale
pono me bulauana sira tasir tamata uaia.
⁴²Doh mair tamat re naman e marang
poul tasir tamatasiner nang Kristo, kare
heir tar kodomo rigirig me kaluasisisiner
tiome ra uakeluk totoguo, inggo gine ru
hire tamiuoum a bulauanon ahik pahe
banotong rou.”

O Mahar 11

Iesu me Jon ger tang uahuhu

11 I muduhia ke uakapa baka pe
Iesu ke hire pe tar mamang ni-
ualasiraninanine tosno siokor hangaul,

doha tang torikir tamatang uakuakeluk,
kare hiliuinguaono tar buturuon, kare la
toro uan i Galili tar la ualafir, doh tar
uelhire tauete toro Uelhire Uaia.

²Jon ger tang uahuhu e uangoul
tar uih, doh tar binaka ke longorono
toro uelhire tar mamang kalekinalelik
ke guataig Kristo, kare kulangua tosno
tamatang uakuakeluk tar la dangata
tang Iesu pare, ³“Ingga ter tamata ke
menmenein Jon, e turung heirihain God
tar me uelkarus tamiueim ue paking
uanguangoul me tang giameh?”

⁴Doh Iesu ke hire tapokis tasisina
pare, “Mu tapokis, karung la hire tang
Jon tar huaa kung longoroig, karung
bangagioum. ⁵^aO kut ka bang, o peil ka
la uaia, o toba ka delauan, doho kame-
lono ka longor huar. O tamata geka
mat, ka tentur tapokis, doho tiome ka
longoro toro Uelhire Uaia geka uelhire
tauetein tasisin. ⁶A niguata uaia e la tar
tamata ge ahik pahe matala totoguo, bo
e uakeluk dede totoguo.”

⁷Gitie ka hiliu manasa pe no
uakuakeluk Jon, song ke ueluatata Iesu
tar mamang inetelik tang Jon tasir
tamata, “Tar binaka kung lalaoum tar
butur padenen, a huaa kung la marang
bangasioum? Here kung lang banga tar
romo re sasaula pe toro garas? ⁸Here
kung lang banga me tang siokor tamata
e hiku teil me hikhiku uaia uelhir? O
tamata gera hiku tar hikhikuninanine
ra uangoul tenas umar tang mani.
⁹Ae maeit kung lalaoumala? Tar lang
banga tar propet? Te paara noman, bo i
ranahia puk tasir propet. ¹⁰^bGe teono
pe gero kulkula teilin no uelhire God
pare,

‘Inggo u turung heir tenag tamatang keip
uelhire i uoumuhia totomua
tar uakalahara tenang lela.’ *Malakai 3.1*

¹¹ Inggo u uamana tun tamiuoum, Jon ger tang uahuhu, a tamat a i rana uain tasir tamata uakapasine ka kotpokos i kot. Bo a tamata puk ger tabo hangana tar Nitoiang Heuen, inggon a i rana uain poluk tang Jon. ¹² ^cKe uakekene tur tar binaka ke uelhire tauete Jon ger tang uahuhu ke me tuka daan, a Nitoiang Heuen ke kotpokoso keip tena nitampopokoh, doho tamatasitier tampopokoho ra petutup tun tar la kale tatanon. ¹³ Uakekene tur tang Moses e tuka tena binaka Jon, o propet uakapa tun, doh na ualatut Moses ke uelhire ponome hape tar Nitoiang Heueneit gere turung lame. ¹⁴ ^dDoh gerung marang tagorong mana inggoum tenas uel-hiresin, Jon te propet Elaija geka men-menemein e turung lame. ¹⁵ Geta to talingoumua, ingga o longor.”

¹⁶ “Bo getu marang uelhireo tenas niguatar tamatang daan, hingia ro uel-hire uaranga paku guataio? Gisina misiana tasir keketikisitie ra tabila tar moren, kara kila ualeik toso uanotous pare, ¹⁷ ‘Inggeim king u toro tulala marung doumoum, bo inggoum puk ahik pah kung marang doum, inggeim king kere tar kerekereng ueldolom, bo inggoum puk ahik pah kung marang kiring.’ ¹⁸ Ge tar binaka pe ke lame Jon, inggono ke uoto ueil, doh ahik pah ke inum me bino, doho tamata uakapa ka kula pare, ‘Inggono kaein me liouana uasa tatan!’ ¹⁹ ^eDoh tar binaka ke lamer Tunar Tamat, ke me ein, kare inum, doho tamata ka kula pare, ‘Banga tar tamatene! Inggono deha uoto ein tunumpe, doha uoto inum bino, doh inggon e matakaluana tasir tamatang kalkale tar maning takis doho

tamata uasa!’ Bo na niate puk God ke uakalaharaig a man tar haua ke uakotpokosoig.”

Iesu ke uatagin tasir tamata ge ahik pah ra tagorong man

²⁰ Song ke uakekene Iesu tar uelkukur tasir tamatang toro uan uleikinitie ke guata toono tar bureher nitou, teene gisin ahik pah ka uapalih tenas ni-uangoul, kara uakenua tar guata tar niguata uasa. ²¹ ^fKe kulono pare, “Kuasalikisoumeitir tamatang tar uan i Korasin, doh kuasalikisoumeitir tamatang tar uan i Betsaida! Ge pakene ka guata toigir nitouonine tamiuoum i Tair dohi Saidon, gisinar Tair doho Saidon pake daana tun ka uiuir tenas niguat, kara hiku tar hikhikung ueldolom, kara sorois tar taun tar ualasira pare, ra ueldolomo tun tar niguata uasa ka guatguataig. ²² Bo inggo gine ru hire tamiuoum, tar mareining kedang, a niduh re turung heirin God tasir tamatang Tair dohi Saidon a kikitilik uain tar niduh re turung kotpokoso tamiuoum. ²³ ^gBo inggoumur Kaperneam, tekung namana pare, mung kabe kai katongotigisium i Heuen? Ahik, inggoum ra turung baka uahiuakosium i Hel. Ge pakene ka guata toigir nitouo giniane tamiuoum gala i Sodom, inggono pake moko haraha daan. ²⁴ ^hBo inggo gine ru hire tamiuoum, tar mareining kedang, a niduh re turung heirin God tasir tamatang Sodom, a kikitilik uain tar niduh re turung kotpokoso tamiuoum.”

O tamata ra ueltupara to tar pepe uaha tang Iesu

²⁵ ⁱTar binakono Iesu ke kula pare, “Tamoug, ingga a tamata toiang Heuene

^c11:12 Luk 16.16 ^d11:14 Mal 4.5; Mat 17.10-13; Mak 9.11-13

^e11:19 Mat 9.14 ^f11:21 Ais 23; Isk 26-28; Jol 3.4-8; Amo 1.9-10; Sek 9.2-4

^g11:23 Uak 19.24-28; Ais 14.13-15 ^h11:24 Mat 10.15; Luk 10.12

ⁱ11:25 1Ko 1.26-29

dohi kot. Inggo u uatakai totomua ter hauon, ingga ko touaouo tar inetenina-nine tasir tamatasit res ninaman, doh res niate, karo ualasira puk tasir tamatasit ra uangoul sira pare, o keketik. ²⁶O mana tun, Tamoug! Gine te hape ko malara pea e kotpokos peon.”

²⁷J^dDoh Iesu ke kula poluk pare, “Tamouguo ke heir tar mamang inetelik to-toguo. Ahik me tamata re ate tar tuna God, bo te Tamana puk manasampeono tere ate. Doh ahik me tamata re ate tang Tamanon, bo ter Tuna puk manasampeono tere ate mesir tamatasitie ke ualasisir Tunon, teesina puk manasa tera ate.”

²⁸k⁴“Inggoumeitir tamata rung uoto huatantiehe tun tar bureher niduh, inggoum mung siokor lame totoguo maru heirio me niuangoulung uaha tamiuoum. ²⁹Inggoum mung uangoul i kukulebanga tonogo uelhireo, karung kale niate to totoguo, ge inggo pe a hamhamasilik, karu uoto kale uahua katongoio, karu uoto ualasira tar hagarir mamaolo tasir tamata mara hikir inete pahe heir me niduh tamiuoum, doh marung kaleoum me niuangoulung uah. ³⁰l^tTeene nogo uelhireo ahik paho parakukuh, doha inete ru heirio tamiuoum tar huat a mamaol.”

O Mahar 12

O gisiamer Parisi ka dangdangata tang Iesu tar Mareining Pepe Uah

12^mTar binakono Iesu mesno tamatang uakuakeluk ka lihila tar butur ka lebeigir raes-uit nar Mareining Pepe Uah. Doh no tamatang uakuakelukono ka gogo manas,

maene ka lous tar raes-uit, kara ein manasampe. ²n^rTar binaka ka bangar Parisi tar puhonene, kara kula pare tang Iesu, “Bang, a puh dehene ka guatain nongo tamatang uakuakeluka a sa tar guata to tar Mareining Pepe Uah.”

³o^dDoh Iesu ke kula pare, “Inggoum kung timana manasa toro ueluatata tang Debit tono uelhire God tar binaka ka gogo mesno tamat. ⁴p^dDebit ke lekala tena uma God, kare ein toro bereitinar uahung gere toubuiono mesno tamat, bo o patere puk tera matotong ein tang roon. ⁵q^dDoh inggoum kung timana manasa pono tena ualatut Moses gere kula pare, a mamang Mareining Pepe Uah o patere ra kat-ego tar puhung ualagononene, bo ahik pukumpe God pahe tohotola tasisina ka guata pe pare. ⁶r^dInggo gine ru hire tamiuoum, a tang siokor tamat e uangoulane ter i ranantiehe na kalekinale tena kalekinaler umang lotu ger dedeil. ⁷s^gGe pakung ate tunoum tar tengkanar puhene pare, ‘Inggo u malarantiehe tun teremi niueldolomoum tasir gisiamer tamat, e i rana uain tar uahung,’ Inggoum paka hik pah mung tohotola tasisine ahik mes niguata uasa. ⁸Ge a Tunar Tamata pe ter Tamata Nomanang tar Mareining Pepe Uah.”

Iesu ke uauia tar tamat a kikumoror limanan

⁹Doh Iesu ke hiliu tar buturuon, kare lekala tenas umang lotusin, ¹⁰t^dDoha tang siokor tamat a kikumoror liman e uangoul pono tar buturuon. Doho Parisitie ra bangeaha tang Iesu mara turung tohotola tatanono gete uauia tar tamatono tar Mareining Pepe Uah,

^j11:27 Mat 28.18; Jon 1.18; 3.35; 10.15; 17.2 ^k11:28 Jer 31.25

^l11:30 1Jo 5.3 ^m12:1 Ual 23.25 ⁿ12:2 KT 20.10 ^o12:3 1Sa 21.1-6

^p12:4 NKP 24.5-9 ^q12:5 Aha 28.9-10 ^r12:6 Mat 12.41-42

^s12:7 Hos 6.6; Mat 9.13 ^t12:10 Luk 14.3

ka dangata pare, “Tar niualagononor Mareining Pepe Uah, inggeig i banotong uauia tasir tamat?”

¹¹ ^uDoh Iesu ke kula pare, “Hape ge pake sololoko mena sipsip me kalami-uoum i lolono me tung tar Mareining Pepe Uah, ahikimpe pahe turung kale tauete tatanon?” ¹² Doha tamat a inete uleik uain poluk tar sipsip, bidouh? Te paara noman. Temaetie a puhung kulon e uauia tagigeig tar poul tar tang giamehe tar Mareining Pepe Uah.” ¹³ Song ke kula Iesu tar tamatetier kiki-moror limana pare, “O hue uamak-makoso tar limoum!” Kare hue uamak-makoson, kare uia tapokisinguar liman misiana tar pang giameh. ¹⁴ ^vDoho Parisi ka tauete liu tur tar umang lotu, kara la uelkodoh hape mara uiliatung pous tang Iesu.

Iesu tena tamatang kalekinale tun God

¹⁵ Iesu ke ate tar puhonene, maeit ke hiliu tar uanon, doho bureher manai tamata ka uakeluk tatanon, kare uauiaono tasir tamata uakapasitier momouh, ¹⁶ ^wkare kula uapopokoho tasisin ahik pah ra uaate tasir tamata tatanon. ¹⁷ Ke guatono pare, mare kotpokoso tunur puh ke kulamein God tang propet Aisaia pare, ¹⁸ ^x“Gine tenag tamatang kalekinaleo geku kedangain geru malauelhirio, karu uahantiehe tun tatanon. Inngo u turung heir uaponoha tatanono tenag Iabena Dedeil, doh inggon e turung uelhire tauete tenag hagar uaiiaor kodkodoho toro mamang uanilikane i kot. ¹⁹ Inggon ahik pahe me uelperere keip mo tamata ue e kula ualeik,

ue e guata me menemene ualeik tasir tamata tar lel.

²⁰ O doudoukulik ge ahik mono nitampopokoh, doho marang tago, inggon ahik pahe turung katego uadouh liu, doh inggon ahik pahe turung lomoho toro lam gero marang lomoh. Inggon e turung kalekinale e tuka gete hahauar hagar uaiar kodkodohane i kot.

²¹ Doho tamata ge ahik paho Ju ra turung tagorong mana tatanon, kara uangangoul tatanono tar me poul tasisin.” *Aisaia 42.1-4*

Iesu me Belsebul

²² Tar binakon o tamata ka keipime tar bulout a kut, kara pau tang Iesu, teene re uangoul teil per liouana uasa tatanon. Doh inggono ke uauia tatanon, kare banotong bang huara tapokisinguaon, kare mene huarangua ponompe. ²³ Doho tamata uakapa ka lutarantiehe tun tar inete ke guatain Iesu, kara uel-dangateis pare, “Inggono dehene here ter tuna Debit ger Kristo?”

²⁴ ^yBo tar binaka puk ka longoror Parisi tar puhonene, kara kula pare, “A tamata deheit e banotong geil tauete liu tasir liouana uasa, teene na tamata uleikon nu Belsebul, teene re heirheir tar nitampopoko tatanon.”

²⁵ Bo Iesu puk e ate teresi nina-manasin, maene ke kula pare, “A pang uan gere pakpakaha katongois, kara ueluiliatungeis gisina tera turung taltaliah, doha uan ue o matmatame gera pakaha katongois tar torikir toto tamat, kara ueluiliatunge katongois, gisina ra turung taltaliahangua. ²⁶ Ter siokono kompe gete geil tauete liu Satan tang Satan, inggono

^u12:11 Luk 14.5 ^v12:14 Jon 5.16 ^w12:16 Mat 8.4; Mak 3.12

^x12:18 Mat 3.17 ^y12:24 Mat 9.34; 10.25

ke pakpakaha katongoin hape mare tur uapopokoh na gavamanon? ²⁷ Doh getu geil tauete keipo tasir liouana uasa tena nitampopokoho Belsebul te mai re heir tar nitampopokoho tosnomio tamatang uakuakelukoum tar geil tauete liu tasisin? Temaene gisina tera turung bang kedanga tamiuoum. ²⁸ ^zBo gete na labena Godonene ru geil tauete keipio tasir liouana uasa, uaia, inggoum kung ate manas, na Nitoia God ke pokoso manasaha tamiuoum.”

²⁹ “Ahik me tamata re banotong polaka tena umar tamatetier tampopokoh, kare kale tena ineton, te gete uih tane uapopokoho tun baka uoumono tatanon, song re banotong kale tena mamang inetelikion.”

³⁰ ^a“Mai ahik paha kaluana totoguo, inggono nag uelmatano, doh mai ahik pahe poul totoguo tar reihime tasir tamata tang God, inggono tere uataltaliaha puk tasisin. ³¹ ^bTemaene ru hireo tamiuoum pare, nas mamang niguata ue nas nimene uasar tamat, God e banot e kuse luara tananin. Bo a tamata gere uelhire uasa tar labena Dedeil na niguata uasaon ahik tun pah ra banotong kuse luaraig. ³² Doh mair tamata re mene mo uelhire uasa tar Tunar Tamat inggono ra banotong kuse luaraig na niguata uasa. Bo mai puk re uelhire uasa tar labena Dedeil, inggon ahik pah ra kuse luaraig na niguata uasa gine daan ue gitila i uoum.”

O douk uasa o uoto ua tar niein uasa

³³ ^cIesu ke kula poluk pare, “Geto huang tagala ro douk a uauana roon e uia pon, doh geto hua uasa ro douk a uauana roon e sa pon. O douk ra tuana

toin no niuia geta banga toigir kukuanana hape re baka pe. ³⁴ ^dInggoumur matina soi! Hape marung guatoum me Uelhire Uaia? A tamat e uoto uelhire tauete tang hingiar ninamana re moko ue e uoum tar koloun. ³⁵ A tamata uaia, na ninamana uaia e moko tar koloun. Temaene re uoto guatono tar niguata uaia. Doha tamata uasa na bureher ninamana uasa e moko tar koloun. Temaene re uoto guatono tar niguata uasa. ³⁶ Bo inggo gine ru hire tamiuoum, tar mareining kedang God e turung heheke tar mamang uelhirelik ka meneigir tamat. ³⁷ Doh tar noumua katongor uelhire, God e kila totomua a tamata kodkodoho ue a tamata uasa.”

O gisiamer tamatang ualualasira tar ualatut, doho Parisi ka dangata tang Iesu tar guata me uaparok

³⁸ ^eDoho gisiamer tamatang ualualasira tar ualatut, doho Parisi ka lame, kara me dangata tang Iesu pare, “Ir Tang Ualasilir, inggeim deh mi marang banga totomua o guata me niuaparoko tar uahire pare, ka heir turuhaia tang God.”

³⁹ ^fBo Iesu puk ke kula tapokis pare, “O tamatang daan, gisin o tamata uasa doho mahang longoro tang God. Ra uoto pe tun pare, ra banga baka me uaparok. Bo gisina puk ahik pah ra turung banga me uaparok. Ahik noman, ter sioko komper uaparoko ra turung bangainisina tena uaparoko propeit Jona. ⁴⁰ ^gTer siokonon hagar puk tang Jona, inggono ke uangoul i lolono toro balanar buh tar touonor marein, doha touonor boung, doha Tunar Tamat e turung uangoul pono tar touonor marein, doha touonor

^z12:28 Apo 10.38; 1Jo 3.8 ^a12:30 Mak 9.40; Luk 9.50 ^b12:31 Hib 6.4-6

^c12:33 Mat 7.16-20 ^d12:34 Mat 3.7; 15.18; Luk 3.7; 6.45

^e12:38 Mat 16.1; Luk 11.16; Jon 6.30 ^f12:39 Mat 16.4; Mak 8.12

^g12:40 Jona 1.17

boung i lolono tar kot. ⁴¹^hTar mareining kedang o tamatang Niniva ra turung tur tagu pono tasir tamatang daana tar uelhehek, kara tohotola tasisin. Ter hauon, o Niniva ka longoro toro uelhire ke uelhire tauetein Jona, kara uapalih tenas niguata uasa. Bo gane puk, i uantinana tamiuoum, a tang siok a i rana uain poluk tang Jona. ⁴²ⁱTar mareining kedang, a kuah a toia a peng Siba e turung tur tagu pono tasir tamatang daan, kare tohotola tasisin. Teene inggono ke la tur tunume tar surunar koto tar me longoro tena niate Solomon ger toia. Bo gane puk i uantinana tamiuoum, a tang siok a i rana uain poluk tang Solomon.”

A liouana uasa ke tapokis poluk

⁴³“Tar binaka re tauete liu turur liouana uasa tar tamat inggon e la uiloho tununguala i lolono toro butur pade-nen, e sir me buturung pepe uah, bo ahik puk pahe tupar. ⁴⁴Kare kula katongoin pare, ‘Inggo dehu tapokis tenag uma geku hiliu baka uoumumein.’ Song re tapokison, dohe la tupara tar um a tabotan, kara delauan, doha nikaleuatoro uakapa tun. ⁴⁵^jSong re laon, kare la keip polukume tar gime mouitir liouan o santiehe uain tatanon, song ra me uangoul tokaha tar buturuon. Uakikilangana tun inggonor tamatonene ke uangoul uasa, bo gine daana puk inggono ke uangoul uasantieh. Ter siokono komper hagar re turung kotpokoso tasir tamata uasang daan.”

Mai tun tinana doho tahinalik Iesu

⁴⁶Iesu e ueluatata haraha tasir tamata tar binaka ka kotpokoso to me tinanon, doho bung tahin. Gisina ka tur i kalahar, doh ra marang menmene tatanon. ⁴⁷Doha tang siokor tamata ke

hire tatanono pare, “Tinoumua, doho bung tahimua gisitie ra tur i kalahar, doh gisina ra marang menmene keip totomua.”

⁴⁸Bo Iesu puk ke hire tapokis tar tamateit, kare hire tatanono pare, “Mai tunono tinouguo, doh mais tun ro bung tahiguo?”

⁴⁹Doh ke uamakosolaono tosno tamatang uakuakeluk, kare kula pare, “Bangane! Gisine teso bung tinouguo, doho bung tahiguo! ⁵⁰^kGe mai per tamata re guata tar inete re malauelhirig Tamouguoenah i Heuen, inggono te tahiguo ue a tatahigulikio ue a tinoug.”

O Mahar 13

Iesu ke uelhire uaranga tar tamata geke dudura tar uatunar raes-uit tar iom

13 I muduhia tar mareinon, Iesu ke hiliu tar um, kare lala tar tektekener kodomo uiluiloh i Galili, teke la tabilanguono, kare ualasira tasir tamat. ²¹Doho manai tamatasine ka la uangoul toto tatanon o burehentiehe tun, temaene ke panetono tar bout, kare tabil i lolon. Bosir tamata teka tur i kot. ³Doh inggono ke uelhire uaranga tasisina tar bureher inet, kare hire pare, “Ualongor, a siokor binak, a tang siokor tamata ke la dudura tar uatunar raes-uit tar iom. ⁴Gitie re dudura teil pelaono tar uatuna tar iom, a giniamer uatunar raes-uit ke pungpunga teil tar lel, kara eingingar tetiau. ⁵Doha giniamer uatunar raes-uit ke pungpunga teililatie tar butur papalauan, ahik paha kotan. Doh ginina ke tungara ualahur tun, teene a kotana sikoro puk peon. ⁶Bo tar binaka puk ke pidir pisara taninin,

^h12:41 Jona 3.5 ⁱ12:42 1To 10.1-10

^k12:50 Roum 8.29 ^l13:2 Luk 5.1-3

^j12:45 2Pi 2.20

kare makmakoronguanin, kare matenguampe, teene ge ahik pe me uana ke la huako i lolono tar kot. ⁷Doha giniameher uatunar raes-uit ke pungpunga teililatie i uantinanina ro uoho ueluelhung, karo hai tane roono tar raes-uit, kara hikinguanina pah ke banotong hua kai. ⁸Bo a giniamehe pukur uatunar raes-uit ke pungpunga teilila tar butur kotan, kare bungbunguanantiehe tun. Doha giniamehe tanininar raes-uit ke bungbunguana tar hangaulur hangaul, doha giniameh a tonomor hangaul, doha giniameh a touonor hangaul. ⁹Geta to talingoumua, ingga o longor!”

A tengkana maene re uelhire uaranga Iesu

¹⁰I muduhia, no tamatang uakuakeluk Iesu ka lame tatanon, kara me dangata pare “Ae maene ro uoto uelhire uaranga tasir tamat?”

¹¹Doh Iesu ke kula tapokis pare, “Inggoum ka heirisoum tar niateng tar uelhire uaouo tar Nitoiang Heuen, bo gisin ahik tagu pah ka heiris. ¹²^mGete me tamata ke kale manasa uoum mena inet, God e turung heir baka poluk me nanon, doh inggon e turung bureheng uain. Bo gete me tamat ahik mena inet, God e turung kale liu tar siksikir inetelikinitie ke kale uoumugion. ¹³Ter tengkanonene maene ru uoto uelhire uarango tasisina pare, gisina ra bangbanga puk, bo ahik puk pah ra bang parok, doh ra longlongoro kompe, bo ahik puk pah ra longor parok. ¹⁴ⁿDoh gisinar tamatasine teka uakalahara tar puh ke kotpokoso tun pare a man ke kulaig Aisaia tasisin pare, ‘Inggoum mung turung longoro toro uelhire tar bureher binak, bo ahik puk pah mung turung iate tar tengkana roon.

Doh karung turung banga tar bureher binak, bo ahik puk pah mung turung bang paroko me inet.

¹⁵Ge res ninamana per tamatasinasine ke kotpokos a tuktukar, kara pirik tane tar talingas, kara kut pipis.

Mara hik pah ra banotong bang paroko keip tar matas me inet, ue ra longoro keip tar talingas, ue e naman manate res ninamana tar tengkana ro uelhire, doh mara hik pah ra turung uiuir tenas niguata uasa, kara tapokisime totoguo, tar guata uaia tasisin.” *Aisaia 6.9-10*

¹⁶^o“Bo inggoum puk nogo tamatang uakuakeluko mung banotong uah, re uoto banga per matamiau tar inet, doh re uoto longor paroko per talingamiau tar uelhire. ¹⁷Inggo u uamana tun tamiuoum, sioun o bureher propeit, doho tamata uaia ka malahirintiehe tun tar banga tar haua rung bangagioum, bo ahik puk pah ka bang, doh ka marang longoro tar haua rung longorogoum, bo ahik puk pah ka longoro tagu.”

Iesu ke uakalahara toro uelhire uaranga tar uatunar raes-uit tosono tamatang uakuakeluk

¹⁸“Temaene mung ualongoro uaia manasoum tar tengkana ro uelhire uaranga tar uatunar raes-uit geke duduraig tar iom. ¹⁹Gisis ka longoro toro uelhire ro menmene teil tar Nitoiang Heuen, bo ahik puk pah ka naman manate, gisina te misianar uatunar raes-uit geke pungpunga teilila tar lel, doh Satan ke lame, kare me kale liu tar haua ka longoroigisin. ²⁰Doh tar uatuna geke pungpunga teilila tar papalauan,

^m13:12 Mat 25.29; Mak 4.25; Luk 8.18; 19.26

ⁿ13:14 Jon 12.40; Apo 28.26-27 ^o13:16 Luk 10.23-24

ahik paha kotan, te misiana tar tamata geke longoro toro uelhire, kare kale uateuele keipingua tar niuah. ²¹Bo o tabo uanana puk roono maro hiku tun i lolono tatanon, doho uoto moko sikoro baka puk. Bo tar binaka puk ra heirir tamata tar niduh, kara mamantouo tatanon, teene re uakeluk peono tonogo uelhireo, na nitagorong manar tamatonene e punta ualahurungua. ²²Doh tar uatuna geke pungpunga teilila tar uoho ueluelhung, ginina te misianar tamatetie ke longoro tonu uelhire God, bo inggono puk ke namanantiehe tun tar mamang inetelik tar niuangoulung gane i kot, doh ke malarantiehe tun pono tar mani, doh me giniamehemper inet. A mamang inetelikininanine teke uapekout tane uakapa tonu uelhire God, kara hikingua me niein uaia re turung kotpokoso tatanon. ²³Bo a uatunar raes-uit puk geke pungpunga teilila tar butur kotan, te misiana tasir tamatasitie ka longoro tonu uelhire God, kara naman manate, kara sanga dede tun tang roon. Kare kotpokosonguar niein uaia tasisin, ke ua sira pare, a giniameh a hangaulur hangaul, doha giniameh a tonomor hangaul, doha giniameh a touonor hangaul.”

O uelhire uaranga toro garasa uasa ko tungara tar iom

²⁴Iesu ke hire poluk toro giamehe ro uelhire uaranga pare, “A Nitoiang Heuene misiana tar tamatetie ke dudura tar uatunar raes-uitinitier uia tena iom, ²⁵Bo naboung puk tar binaka ra hohour tamat, na uelmatanono ke lame, kare me dudur kalehela tar uatunar garasa uasa i uantinanina tar raes-uit, kare hiliu. ²⁶Doh tar binaka ke tungarar raes-uit, kare hua kai, kare ua manasampe teka bang paroko toin ro garasa

uasa. ²⁷Doh no tamatang kalekinaleono ka lame tatanono, kara me kula pare, “Tamata uleik, a uatuna uaia tun deh giniala ko lebegia tenang iom, bo ia ro la tur ro garasa uasa?” ²⁸Doh inggono ke kula tasisina pare, ‘A uelmatana dehoneit ke guata pagiare.”

“Doho tamatang kalekinale ka dangata pare, ‘Doho malara ingga mi la us liueim toro garasa uasa?”

²⁹“Kare kulono pare, ‘Ahik, getung us liouum toro garasa uasa, karung us keip pono me giniamehar raes-uit. ³⁰Uamaluaana tar raes-uit, doho garasa uasa ura siokor hua tokaha bakampe e tuka tar binakang ueuer. Tar binakon u turung hireo tosnogo tamatang kalekinale pare, us liu uakikilanga tar garasa uasa, kara rokok, karung ualuh taninin, bo mung kale pukuoum tar raes-uit, karung uamokola tenag umang uamoko.”

O uelhire uaranga tar uatuna ro douk ra kilain o mastet

³¹Iesu ke hire poluk tasisina toro giamehe ro uelhire uaranga pare, “A Nitoiang Heuene misiana pare, a tang siokor bulout ke kale tar uatunar mastet, kare la lebe tena iom. ³²A uatunar mastet ter kikitilikintiehe tunur uatuna tar mamang nieinin tar iomo uakap, bo tar binaka puk ro hua kai roon, o la douk uleikingua, temaene o tetiaua ra me uoto toko tang roon, kara tuha tola tenas niu tar ranan.”

O uelhire uaranga tar is

³³Doh Iesu ke uelhire tauete toro giamehe ro uelhire uaranga pare, “A Nitoiang Heuene misianar sikir is geke kalegir kuah, kare uauelhouara keip tar siokor nouh plaua. Dohi muduhia gininar plaua ke siokor uout kai.”

Ae maene ke mene keip Iesu tar uelhire uarang

³⁴A mamang uelhirelik ke uelhireig Iesu tasir tamat, ke uelhire keip uakapa kompe tar uelhire uarang. Ahik tunumpe pah ke peng uelhire tasisina mo siokoro uelhire mo tabo uelhire uarangan. ³⁵Ke guatono pare, mare kotpokoso sira tunur inete ke kulameigir propeit pare, “Inggo u turung guata keip tar uelhire uaranga tar binaka ru ueluelhire tasisin, doh inggo u turung hire tasisina tar inete re ouiouome sioun tun tar binaka ke kotpokosor kot.” *Ker 78.2*

A tengkana ro uelhire uaranga toro garasa uasa

³⁶Tar binaka ke hiliu Iesu tasir tamat, kare lekala iuma tar um, no uakuakelukono ka lame tatanon, kara me dangata pare, “Hire tamiueim tar tengkana ro uelhire uaranga toro garasa uasa geko tungara tar iom.”

³⁷Doh Iesu ke hire tasisina pare, “A tamata geke lebe tar uatuna uaia, inggono ter Tunar Tamat. ³⁸Doha iomo ter udeilinear uan i kot doha uatuna uaia tesir matang tar Nitoiang Heuen, doho garasa uasa tesir tamata gesir nang Satan. ³⁹Doha uelmatana geke lebe taninin te Satan, doha binakang ueuer ter uadouhinar mareinane tar kot, doho matang ueuer tesir anggelou. ⁴⁰qMisiana tar garasa uasa ra kale toto peig, kara ualuhig toro hue ter siokono sira komper puh re turung kotpokoso tar uadouhinar marein. ⁴¹rA Tunar Tamat e turung ualatue tosno anggelou mara la kale liu turusina tena Nitoiaono tar mamang inetelikitie re uoto uasusa teres nitagorong manar tamat, doho tamat-

asitie ra uoto guata tar niguata uasa. ⁴²sDoho anggelou ra turung bakako tasisina toro tukuno hue tar butur ra turung kiring tosin, teeit ra nimaliana pe, kare uelmahingis. ⁴³tDoh no tamata God ra turung bala sira tar pisara tena Nitoia Tamas. Geta to talingoumua, ingga o longor!”

O uelhire uaranga tar bokising mani ger nitouaouo tar iom

⁴⁴Iesu ke kula poluk pare, “A Nitoiang Heuene misiana tar bokising mani ger nitouaouo tar iom. Doha tang siokor tamata ke tupar, kare la touaouo uain poluk. Inggono ke uaha tun, kare la uabulaua tena mamang inetelik, kare la bulaua tar iomonene.”

O uelhire uaranga toro inekih gero i ranar bulauan

⁴⁵“O giamehe ro uelhire uaranga te pare, a Nitoiang Heuen misiana tar tang siokor tang uabulaua gere sir toro inekih gero i ranar bulauan. ⁴⁶Tar binaka ke tuparono toro siok, o bulauana roon o i ranantiehe tun, kare la uabulaua tena mamang inetelik, song ke la bulaua tang roon.”

O uelhire uaranga tar uben

⁴⁷“Doha Nitoiang Heuene misiana pono pare, o gisiameher matang uekih ka baka tenas uben i laur, kara huar bureher mamang ian. ⁴⁸Tar binaka ke uounur uben, kara reih uahungin i kot, kara la tabilanguasin, kara kedanga tasir ian. Gisisier uia ka utelais tar tolah, doh gisisier sa ka baka liuis. ⁴⁹Te misiana kompe re turung pe sira per uadouhinar mareinane i kot. O anggelou ra turung laha, kara me kedanga liu tasir tamata uasa gera uangoul i uantinan-

^q13:40 Jon 15.6 ^r13:41 Mat 24.31; 25.31; Mak 13.27 ^s13:42 Mat 8.12

^t13:43 Dan 12.3

ina tasir tamata uaia. ⁵⁰uKara turung bakalais toro tukun o hue tar butur ra la kiring tosin, teit ra nimaliana pe, kare uelmahingis.”

Iesu ke menmene tar niualasirang sioun, doha timuhur niualasir

⁵¹Doh Iesu ke dangata pare tosono tamatang uakuakeluk, “Inggoum kung naman manate tar mamang inetelikininanine?”

Kara kula tapokisisina pare, “Aa.”

⁵²Song ke kula Iesu pagiare, “Temaene o tamatang ualualasira tar ualutut uakapa gera kotpokoso sira pare, o tamatang uakuakeluk tar Nitoiang Heuen, gisina misiana tang tanener uma gere kale tauete tur tar timuhur inet, doha ineter pensioum tar butur re uoto uamoko tena inet.”

Iesu ka uelueldein i Nasaret

⁵³Doh tar binaka ke menmene uakapa Iesu tar uelhire uaringanine, kare hiliu tar uanon, ⁵⁴vKare lame tena uan. Kare ualasila to tasir tamata tenas umang lotu. Doh gisis ka lutarantiehe tun, kara ueldangate pare, “Ia ke kale turono tar niate uaiaene, kara niguata popokohonine?” ⁵⁵wSong ka meneng uauanete pare, “Inggono pe deha tuna komper tuhtuha um? Doh inggeig i ate tang Maria te tinanon, doho bung tahinono tes Jems, doh Josep, doh Saimon, doh Judas. ⁵⁶Doho bung tatahinalikiono ra uangoul tunane. Iangua ke kale turono tar mamang niate, kara niguata popokohonine?” ⁵⁷xDoh gisina ka hagouo uasa tun, kara ueluelde mata tagorong mana tatanon.

Doh Iesu ke kula pare tasisin, “Na propeit God ra ueltadain toro mamang buturulik, bo tena uan katongon, o tahi-

nalikion, doh tasisina katongo ro matmatame ahik tagu me ueltad.” ⁵⁸Doh teene ahik pesina mes nitagorong mana tatanon, ahik tagunguaono pah ke guata to me bureher nitouo tar buturuon.

O Mahar 14

Herot e namana tang Iesu pah te Jon ger tang uahuhu

14 Tar binakon Herot ger toia i Galili ke longoro manasa tar ineteninanine ke guataig Iesu. ²Kare kula pare tosono tamatang kalekinale, “Gine deh te Jon ger tang uahuhu, inggono deh ke tua tapokis tur toro mat, temaene na nitampopokoho sirono pare.”

³⁻⁴yTeene sioun Herot ke kale tang Herodias pare, na kuah. Doh inggonor kuaha na kuaha baka uoum Pilip tahnono Herot. Doh Jon ke kula tang Herot pare, “Ingga ko katego tena ualutut Moses, ko kale pe tar kuaheit!” Temaene ke kusa Herot tang Jon, kare uih tane tatanon, kare uamoko tatanono tar karabus. ⁵zDoh Herot ke marang uiliatung pous tatanon, bo ke sokoro puk tasir tamatang Ju, teene o burehe ka namana tun tang Jon pare, a propet.

⁶Doh tar binaka ke kotpokosomer marein re namana tapokis Herot tar marein ka pohoin, a tuna Herodias, a kalan, ke me doumane i uoumuhia tasir tamatasiner nikil ke me uauaha tang Herot. ⁷Temaene Herot ke ualagaha tatanono pare, e turung heir me hauar inete re dangataiono tatanon. ⁸Doh tena niualatoho tinanon, inggono ke dangata tang Herot pare, “Heir kompemeene daana toro luna Jon ger tang uahuhu me peileit.” ⁹Doha toia ke ueldolom, karo duh ro balan, bo teene manasa ke ualagaha to peono tar

^u13:50 Mat 13.42; Luk 13.28 ^v13:54 Jon 7.15 ^w13:55 Jon 6.42

^x13:57 Jon 4.44 ^y14:3-4 NKP 18.16; 20.21; Luk 3.19-20 ^z14:5 Mat 21.26

matasir manai, temaeit ke tangana beil-beiliono tar haua ke dangatainir kuaha kalana tatanon. ¹⁰Temaene, ke ualatu-eono tar tang siokor soldia ke la tok-out toro luna Jon iuma tar umang uih. ¹¹Doho luna Jon ka uamokolain tar peileit, kara heirin tar kuaha kalan, kare keipinguaono tang tinan. ¹²Doh no uakuakeluk Jon ka lame, kara me kale tar tukununon, kara la keu, song ka la, kara la ueluatata tang Iesu.

Iesu ke ualaein tasir bureher tamat e matoto tar tolimar taosein

¹³Tar binaka ke longoro Iesu toro ueluatata tang Jon, kare panetengua tar bout, kare la tar butur a tabotan me pahen. Doho tamata ka longoro tang Iesu ke la pe tar bout, kara hiliu pono tonoso uan, kara lih uakeluk tatanon i kot. ¹⁴Doh gitie ke la hung pekoon, kare banga tasir bureher tamat, doh ke ueldolomontiehe tun tasisin, kare uauia teres momouhusin.

¹⁵Gitie ke reiu manasa peon, no tamatang uakuakelukono ka lame tatanono, kara me kula pare, “A butur dehene a tabotan, doh inggono gine ke reiu manas. Ueluelutula tasisina ra la toro uaninit ro uahuhut mara bulaua katongosina mes niein.”

¹⁶Doh Iesu ke kula pare tasisin, “Ae maene ra lasin? Inggoum katongo dehono mung heir me niein tasisin.”

¹⁷Doh gisina ka kula pare tatanon, “Inggeim deh ahik me mi bureher nieinane. Bo o tolima kompe ro bereit rasine, doha torikir ian.”

¹⁸Doh Iesu ke kula pare, “Keipimeane totoguo taninin.” ¹⁹^aSong ke kulono tasir tamata ra tabil i koto toro garas, kare kale toro tolima ro bereit, kara torikir ian, kare banga kai i Heuen, kare

uatakai tang God, kare pispis, kare heir tosono tamatang uakuakeluk, doh gisina ka bul hahai tasir tamata uakap. ²⁰Doho tamata uakapa ka ein, kara siokor mahmahur. Doho tamatang uakuakeluk ka ute tar siokor hangaul, doha torikir tolaha tang ginitie ke mokomok. ²¹Doh gisis ka ein kaelais tar tolimar taosein, o kuah, doho keketik ahik pah ka aha keip taguis, bo gisina ka ein ponompe.

Iesu ke la i rana tar laur

²²Doh Iesu ke kula tosono tamatang uakuakeluk ra panete tar bout, kara la uoum tar pang giamehe nar kodom, bo inggon e ueluelutula baka tasir tamat. ²³^{b1}muduhia ke ueltula peono tasir tamat, kare la kai taro tar siusana me pahene tar la lotu. Gitie ke reiu peon, inggon e uangoulumpe me pahen, ²⁴Doh tar binakonene a bout e uairehe harahanah i laur, dohe uasuasiakain tar butuan, teene a romo ke u tanela tasisin.

²⁵Doh na lulein Iesu ke la i rana tar laur tasir tamatang uakuakeluk. ²⁶^cDoh binaka ka bangasina tatanono re la peha tar laur, gisina ka sokorontiehe tun. Kara kalkaling ualeik tun. Kara kula pare, “A liouan!” ²⁷Bo Iesu puk ke mene ualahur tasisin pare. “Mu uaongolosioum! Inggodehon. Ahik pah mung sokor!”

²⁸Doh Pita ke mene ke kula pare, “Ir Tamata Noman, ge pare ingga nomanon, kula totoguo maru lahao totomua i rana tar laur.”

²⁹Doh Iesu ke kula pare, “Lame.” Doh Pita ke hioo tur tar bout, kare lihiko i rana tar laur tang Iesu. ³⁰Bo tar binaka puk ke bangono tar uleikir butuan, kare sokor, kare dududur, kare kula ualeik pare, “Tamata Noman, uaudeil totoguo!”

³¹dKare hue ualahurunguako Iesu tar pang limana, kare kusa tatanon, kare kula pare, “Ingga deha kikitilik reng nitagorong man! Ae maene ko tagorong boha?”

³²Song kura siokor panete rasina tar bout, kare takoutunguar rom. ³³Doh gisit tar bout ka hatup uahiu i koto tar kekenon, kara kula pare, “O mana tun, ingga ter tuna God.”

Iesu ke uauia tasir bureher momouh o peng Genesaret

³⁴Tar Binaka ka sairkoutusina tar kodomo uiluiloh i Galili, kara la hung manas i teh i Genesaret. ³⁵Doh tar binaka ka la bang parokor tamatang tar buturuono tang Iesu, kara kula tasir gisiamer tamata tar la hireme tasir momouh uakapa tun tar pang uanion, kara keipimeis tatanon. ³⁶eKara dangata uapopokoho tang Iesu, ge para banotong tuha pukusina tono suruna no hikhikuon. Doh gisina uakapasit ka tuha tatanono ka siokor uia tapokis.

O Mahar 15

No uelhire God o i ranantiehe tenas niualasirar mahoh

15 Doho Parisi mesir tamatang ualualasira tar ualatut ka la tur i Jerusalem, kara lame tang Iesu. Kara me kula pare, ²“Ae maene nongo tamatang uakuakeluka ra uoto katego tar ualatu-tung sioun ger nas ro tubumiueim? Gisin ahik pah ra uoto uabusa tar limas ngohina tar niguatang sioun, song ra ein.”

³Bo Iesu puk ke kula tapokis pare, “Doh maene rung uoto katego ponoum tena ualatut God, karung uairana tenas ualatut ro bung tubumiu? ⁴fGe God pe

ke kula pare, ‘Ueltada tang tamoum, doh tinoum, doh mair tamata ahik pahe ueltada tang taman ue tinan, inggono ra turung uiliatung pousin.’⁵ Bo inggoum mung uoto kula pare, ‘A tamat e banotong hire tang tamana ue tinan pare, inggo nag inete ru banotong guatain tar poul tamiraoum, bo ku heir manasa tar inetono tang God.’ A tamatonene ahik mena niueltada tang taman, doh tinan. ⁶Tar hagarionene, inggoum mung uoto bangan duk tono uelhire God, karung ueltada ter namiuir niguata kung kale turig toso bung tubumiu. ⁷Inggoum o tang uelhire kokop! Propeit Aisaia ke kulkula hung tunumpe tamiuoum tar binaka ke kula pare,

⁸‘O tamatasine ra uatakai keip kompe totoguo tar bilis, bo i lolono puk tar koloususin, doh res ninaman e uairehe tun totoguo.

⁹Gisin a tabo tengkana ra lotu pe totoguo, ter hauono gisina ra ualasira sira tenas ualatutur tamata paha nouguo.” *Ai-saia 29.13*

Iesu ke uelhire uakalahara tar inete re banotong guata tar tamata mara hik paha delauana tar matana God

¹⁰Doh Iesu ke kila totome tasir tamata tatan, kare kula pare tasisin, “Mu ualongor, karung naman manate! ¹¹gA inete gere lako i lolono tar uuanar tamat, ahik pah tere uauia tatanono tar matana God. Bo a inete gere tauete turuha tar uuanono tere guata tatanon, maetingua re la kotpokoson ahik paha delauan.”

¹²Song ka lame no tamatang uakuakelukon, kara me kula pare,

³15:4 Bolobolong Tenas Kalekinaler Pater 20.9

^d14:31 Mat 8.26; Mak 4.39 ^e14:36 Mat 9.20-21

^f15:4 KT 20.12; 21.17; Ual 5.16 ^g15:11 Mat 12.34

“Ingga o ate pare, ko uahagouo uasa pe tasir Parisi tar inete ko menmeneig?”

¹³Doh Iesu ke hire tapokis pare, “A mamang doukulik uakapa ge ahik Tamouguoenah i Heuene pah teke lebe ra turung us kaig. ¹⁴^hBangan duk tasisin! Gisin o kut, doh nosio tang uoum keipir kut, doh tar binaka re uoum keipir kut tar kut rasin ura siokor sololoko tar tung.”

¹⁵Doh Pita ke dangata pare tatanon, “Uelhire uakalahara tar tengkana ro uel-hire uaranga rone tamiueim.”

¹⁶Doh Iesu ke kula pare, “Ue ge inggoum pe halana ponompe tung naman manate? ¹⁷Ahikoum pah mung banga, a inete gere lako i lolono tar uauanar tamat e lako toro balanon, song re la tauete liu tar tukununon. ¹⁸Ge i lolono pe tar kolounor tamata tere la turur ninamana uasa gere uasa tar tamat. ¹⁹Ge i lolono pe tar kolounor tamat tere la turur ninamana uasa gere uakeip tatanono tar tung pous, karo le ra guata toro ur, doho kamobo ra guata sira pon, kara guatampe tar giniamerher niguata uasa misiana tar uenau, ra boh ue ra mamantouo tar hangasir gisiamer. ²⁰Ter hagarininanine re banotong guata tar tamat ahik paha delauan. Bo tar ein puk tar binak ahik pah ko uabus tar limoum, a puhon ahik pahe banotong guata tar tamata mara hik paha delauan.”

Na nitagorong manar kuah ge ahik paha Ju

²¹Song ke hiliu Iesu tar uanon, kare la tar pang uan i Tair dohi Saidon. ²²Doha tang siokor kuaha toro matinang Kennan, ahik paha Ju, e uangoul tar buturuono ke lame tang Iesu, kare me kula ualeik kirkiring pare, “Ir Tuna Debit, uel-dolomo totoguo! A tuguo ger kuah, e

uangoul teilir liouana uasa tatan, dohe hagouo uasa keip tun tar uelmahing.”

²³Bo Iesu puk ahik mate mene me puh tatanon. Doh no tamatang uakuakelukono ka kula uapopokoho tatanono pare, “Uelueltula liu tatanon! Ge inggono pe gine re kekete teil tagigeig, doh ke uamenemen!”

²⁴ⁱDoh Iesu ke kula pare, “God deh ke heir pukuha totoguo tasir tamatang Israelesit geke misiana tasir sipsipsitie ka heil.”

²⁵Bo git pukur kuaha ke lame, kare me hatup i uoumuhia tang Iesu, kare kula pare, “Ir Tamata Noman o poul totoguo.”

²⁶Doh Iesu ke kula tapokis pare, “Ahik dehono paha uia tar kale tena nieinir keketik, kara uakihaig tasir lo.”

²⁷Doh gitir kuaha ke kula tapokis pare, “O mana tunumper Tamata Noman, bo o lo puk pono ra uoto ein tar siksikir niein gere pungpunga uahiu tur i rana tenas teboul ro taneis.”

²⁸Song ke kula Iesu pare, “Ingga a kuaha reng nitagorong mana uleik! A haua ro malahiria, ra guata sirain ro malahir pea.” Doh tar binaka kompeon a tunono ke uangua kompe.

Iesu ke uauia tasir bureher momouh

²⁹Iesu ke hiliu tar buturuon, kare lihila tar kodom i Galili. Ke lih kai taroono tar hiuhiuon, kare la tabila uahiu. ³⁰Doho bureher tamata ka lame tatanono ra keip teil tasir peil, o kut, o pau, o kikumor, doho burehemper mat, kara me uamoko uamatotois tar kekena Iesu mare uauiaono tasisin. ³¹^jDoho tamata ka lutarantiehe tun tar binaka ka banga tasir pau ka mene tapokis pe, karo tamatasitier kikumoro ke udeil tapokisir tukunus, doho peil ka la uaua, doho kut

ka bang, doh gisina ka uatakai tenas Godor Israel.

Iesu ke ualaein tar toto tamat e matoto tar toueitir taosein

³²^kDoh Iesu ke kila totome tosno tamatang uakuakeluk, kare kula pare, “Inggo u ueldolomo tasir tamatasine, teene gisina ka uangoul tagu totoguo tar touonor marein, doh gine daan ahik manasasina me inete ra einin. Inggo u de pono matu ueluelutula puk tasisin o tabung ualaein geta pungpunga teililasina tar lel.”

³³Doho tamatang uakuakeluk ka kula pare tatanon, “Ia ring la sir tureim me niein tar buturener padenen maring uaelmatout tar ualaein tasir tamatasiner burburehe puk.”

³⁴Doh Iesu ke dangata pare, “Inggoum romio touih ro bereit?”

Kara kulasina pare, “O mouit pukumpe, doha toking iaianalik.”

³⁵Song ke kula Iesu tasir tamata ra tabila uahiu i kot mara tabilang ein.

³⁶Song ke kaleono toro mouit ro bereit doha ian, kare uatakai tun tang God, kare pis taninin, kare heir taninina tasir tamatang uakuakeluk, kara bul paka-hasina tasir tamat. ³⁷Doh gisina uakapa ka ein, kara mahmahur, doho tamatang uakuakeluk ka ute tar mouitir tolah mokomok. ³⁸Doh gisis ka ein ke mato-tois tar toueitir taosein, o kuah, doho keketik o tabung aha keip tagu tasisin, bo ka ein tagu ponompe. ³⁹Song ke uel-tula liu Iesu tasir tamat, kare panete tar bout, kare la tar pang uan i Magadan.

O Mahar 16

O Parisi ka dangata tang Iesu tar guata me uaparok e la tur i Heuen

16¹^o gisiameher Parisi doho Sa-diusi ka lame tang Iesu, kara me marang uatolau keip tenas puhung dangata tatanono tar guata ualasira tasisina me niuaparok, e la tur i Heuen.

²Bo Iesu puk ke hire tapokis tasisina pare, “Tar binaka re hutigir pisar, inggoum mung kula pare, ‘inggong e turung binaka uaia, teene re kubkubara per langit.’ ³Doh tar liliuolik, inggoum mung kula pare, ‘inggong e turung huan, teene a langit e kukurum, kare pilar pil.’ O mana noman, inggoum mung banotong bang paroko uaia tun tar marein, hape re baka pe rung banga to peoum tar langit, bo ahik pukuoum pah mung naman man-ate tang hingiar uahire, re uahirein Godene daan. ⁴^mO tamatang daan, gisin o tamata uasa, doh gisin ahik pahe uoto uiar balas tang God, ra uoto pe tun pare, ra banga baka me uaparok. Bo gisina puk ahik pah ra banotong banga me uaparok. Ahik noman. Ter sioko komper uaparoko ra turung bangainisina tena uaparoko propeit Jona.” Song ke hiliu Iesu tasisin, kare la.

Iesu ke uatagin tosno tamatang uakuakeluk tenas niualasirar Parisi doho Sadiusi

⁵Tar binaka ka sairkoutular tamatang uakuakeluk tar pang giamehe nar kodomo tar butur re uangoul Iesu, gisina ka malabobour mata kale tagu mo bereit. ⁶ⁿDoh Iesu ke uatagin tasisina pare, “Mu tagin teil, karung tur uapopokoho teres isir Parisi, doho Sadiusi.”

^k15:32 Mat 14.14 ¹16:1 Mat 12.38; Luk 11.16

^m16:4 Mat 12.39; Luk 11.29 ⁿ16:6 Luk 12.1

⁷Doh gisina ka ueluelmene katongois, kara kula pare, “Inggono deh here ke kula sira pare, teene ahik pe inggeig pahi kale teil mo bereit.”

⁸Doh Iesu e ate teil manasa tar haua ra ueluelmeneinis, kare dangata pare, “Ae maene rung namanantiehoun pare, ahik pe pah mung kale teil mo bereit? Inggoum a kikitilik tunumpe remi nitagorong man! ⁹Inggoum halanampe tung naman manate? Ahikoum pah mung namana huara tar binaka ku pispiso toro tolima ro bereit tar tolimar taoseinir tamat? A touihar tolah mokomoko kung utesioum? ¹⁰Doh hape toro mouit ro bereit gero eisir toueitir taoseinir tamat? A touihar tolah mokomoko kung utesioum? ¹¹Hapeono maene ahikioum pah mung naman manate tar binaka ku hireo tamiuoum tar tagin teil teres isir Parisi, doho Sadiusi? Inngo ahik pah ku menemene toro bereit noman.” ¹²Song ka naman manater tamatang uakuakeluk pare, ahikiono pah ke uatagin tasisina tar kaueke katongois tar isinar bereit, bo tenas niualasirar Parisi, doho Sadiusi.

Pita ke hire tauete mai tun Iesu

¹³Doh Iesu ke lala tar pang uan uleik i Sisaria Pilipai tar butur ke dangata toono tosno tamatang uakuakeluk pare, “Mai tunuonener Tunar Tamat, ra uoto kula per tamat?”

¹⁴Kara kulasina pagiare, “O gisiamehe ra kula pare, ingga te Jon ger tang uahuhu. Doho gisiamehe ra kula pare, ingga Elaija, doho gisiamehe ra kula pare, ingga Jeremaia ue a tang sioko ponomper propeit.”

¹⁵Doh Iesu ke dangata tasisina pare, “Bo inggoum hape rung kula pe totoguo mai?”

¹⁶Doh Saimon Pita ke hire tapokis pare, “Ingga te Kristo, a tuna God ger tua.”

¹⁷Doh Iesu ke kula pare, “Ingga o banotong uaha Saimon ger tuna Jona, ge a puh peonene ahik pah ke la tur me tamat, bo ke heir katkatongompein Tamouguoenah i Heuen. ¹⁸Doh inggo gine ru hire totomua, ‘Ingga Pita, o palau, doh toro palaua roon inggo u turung tuh uapono tenag sios.’ Doh na nitampopokoho ro mat ahik paho banotong kale uahiuu tatanon. ¹⁹Inggo u turung heir totomua tar ki nar pirpirik tar Nitoiang Heuen, doha inete gero uih tane giaane i kot, God e uih tane pono tanininanah i Heuen, doha haua ro luaka liuigiaane i kot, God e luaka liu pono taninin i Heuen.” ²⁰Song ke kula uapopokoho Iesu tosno tamatang uakuakeluk pare, ahik tun pah ra hirhire ueltebeir me tamata pare, teono pe te Kristo.

Iesu ke hire pare, e turung mat, kare tua tapokis

²¹Tar binakameon, Iesu ke uakekene tar hire uakalahara tosno tamatang uakuakeluk pare, “Inggo dehu la i Jerusalem, karu turung kale tur me bureher uelmahing tasir mamahoholik, doh tasir patere uleik, doho tamatang ualualasira tar ualatut. Inggo ra turung uiliatung pousuio, bo tar uatouononor marein puk inggo ra turung uatentur tapokis polukuio.”

²²Doh Pita ke kila liu tang Iesu, kare me uelkukur tatanon. Kare kula pare, “Ir Tamata Noman, ahik tun! A puh de-

^o16:9 Mat 14.17-21 ^p16:10 Mat 15.34-38

^q16:14 Mat 14.1-2; Mak 6.14-15; Luk 9.7-8 ^r16:16 Jon 6.69

^s16:17 Gal 1.15-16 ^t16:18 Jon 1.42; Epe 2.20 ^u16:19 Mat 18.18; Jon 20.23

honene ahik pahe banotong kotpokoso totomua!”

²³Doh Iesu ke tur bangala tang Pita, kare kula pare, “Satan o uareing to-toguo! Inga deho turtur tane puk tenag hagario, teene reng ninamananine ahik pahe la tur tang God, bo tena ninamana pukur tamat.”

²⁴vSong ke kula Iesu tosno tamatang uakuakeluk pare, “Gete me tamat e marang uakeluk to-toguo, inggono pake de tar inete re malarai, kare huata tena korose, kare uakeluk to-toguo. ²⁵wGe a tamata pe gere kapil uanono tena nitua, na nituaon e turung rouo tatanon, doh mair tamata re heir tena nitua re uakeluk pe to-toguo, inggon e turung tu-para tena nitua. ²⁶xGe a haua pe re turung kaleinir tamata gete siokor gono tar mamang inetelikane tar kot, kare oroho tena nitua? Ahik manasampe me inete baka poluk re banotong heiriono tar kale tapokis tena nitua. ²⁷yGe a Tunar Tamata pe ke uahuhutung lame, menia keip tosno anggelou i lolono tar balbalana na nitampopokoho Taman, kare me heir me niduh ue me bulauasir tamat e uelmatout keip to tar haua ka guatainisin. ²⁸O mana tun, inggo gine ru hire tamiuoum, o gisiamah gisis ra uangoul haraha daan, gisin ahik pah ra turung mat e tuka geta bangasina tar Tunar Tamat e la keipime tena Nitoia.”

O Mahar 17

A tukununa Iesu ke giamehe siok

17 Kura karuh bakar tonomor marein song ke keip taro Iesu tas Pita, doh ramamahialik Jems me Jon tar siusan a i ranantieh, kara la uangoul

tar buturuono mes pahes. ²zDoh gitie ra uakeis uanono pesin, a tukununa Iesu ke uapalih pare, ke giamehe siok. A porenono ke bala sira tar pisara doh na hikhikuono ke gaugaulintiehe tun, kare abeabantiehe misiana tar luh. ³Doh gisinang tang touono ka bang huara ponotas Elaija me Moses ura ueluatata tur keip tang Iesu.

⁴Doh Pita ke banga, kare kula pare tang Iesu, “Ir Tamata Noman, auia tunumpe ring uangoul pe inggeimane! Geto malara ingga, inggo u turung tuha me touonor taluhane, me sioko me noumua, me siokor nang Moses, doh me siokor nang Elaija.”

⁵aGitie re menmene peon, karo me ragom tane ro mahar langit tasisin, o abeabantiehe tun, kara longoro tar men e la tur toro mahar langit, e kula pare, “Gine ter tuguo, u malaelhirintiehe tun tatanon. Mu longoro tatanon.”

⁶Tar binaka ka longoror tamatang uakuakeluk tar menenanine, kara sokorontiehe tun, kara baka uahiuais, ka rakop i kot. ⁷Doh Iesu ke lame tasisin, kare tuha tasisin, kare kula pare, “Mu tentur, kara hik pah mung sokor!” ⁸Song ka banga kaisin, bo ahik puk pah ka banga me tang giameher tamat, bo Iesu kompe me pahen.

⁹Doh gitie ra la uahiuia pekosina tar siusan, Iesu ke kula uapopokoho tasisina pare, “Ahik pah mung hirhire me tamata tar puhene ke ualairain God tamiuoum e tuka geta uatentur tapokisinir Tunar Tamata toro mat.”

¹⁰bDoho tamatang uakuakeluk ka dangata pare tang Iesu, “Bo aeono maene ra kular tamatang ualualasira

^v16:24 Mat 10.38; Luk 14.27

^w16:25 Mat 10.39; Luk 17.33; Jon 12.25 ^x16:26 Mat 4.8-9 ^y16:27 Ker 62.12; NU 24.12; Mat 25.31; Roum 2.6; UGO 22.12 ^z17:2 2Pi 1.16-18

^a17:5 Ual 18.15; Ker 2.7; Ais 42.1; Mat 3.17; Mak 1.11; Luk 3.22 ^b17:10 Mal 4.5

tar ualatut pare, ‘Elaija tere turung la uakikilangame?’”

¹¹Kare kula Iesu pare, “Elaija e turung la uakikilanga nomaname, kare me turung kaleuatoro tar mamang inetelik. ¹²cBo inggo gine ru hire tamiuoum pare, Elaija ke la manasame, doho tamat ahik pah ka bang paroko tatanon, ka uakeluk kompe teres nimalar, kara guata tar bureher niguata uasa tatanon. Ter siokono sira kompe ra turung uel-sakil pesina, kara uauelmahing tar Tunar Tamat.” ¹³dSong ka naman man-ater tamatang uakuakeluk pare, inggon e menmene uatuha tola tang Jon ger tang uahuu.

Iesu ke uauia tar keketik bulout e uangoul teilinir liouana uasa

¹⁴Tar binaka ka tapokisihagina tasir manai tamat, a tang siokor bulout ke lame tatanon, kare me hatup uahiu i koto tang Iesu, ¹⁵Kare kula pare, “Ir Tamata Noman o ueldolomo baka tar tuguu, inggon a uoto lolong kapul, dohe uoto mate uasa tunungua, doha bureher binak e uoto pungulaono toro hue ue i laur. ¹⁶Doh inggo ku keipime tatanono tosnongo tamatang uakuakeluka, bo gisina puk ahik pah ka banotong guata uaiia tatanon.”

¹⁷Doh Iesu ke kula pare, “Ah, inggoum deher tamatang daan! Ahik tunumpe me emi nitagorong mana tang God! Remi ninamanoum doh nami niguat ahik tun paha kodkodoh. Paka touihar binaka ru uangoul keipio tamiuoum song rung tagorong manoum? Mate hape ru uangoul uabarah keip pelao tamiuoum? Keipime tar keketik totoguo.” ¹⁸Doh

Iesu ke uelkukur tar liouana uasa, kare hiliuinguaono tar keketik, doh tar binakangua kompeono ke uia tapokison.

¹⁹eDohi muduhia ka lamer tamatang uakuakeluk mes pahes, kara me dangata tang Iesu pare, “Aeono maene ahikieim pah king banotong geil liu tar liouana uasa e la tar keketik?”

²⁰fDoh inggono ke kula pare tasisin, “Teene inggoum a kikitilik remi nitagorong man. Ge inggo pe gine ru hire tamiuoum toro man geta uleik sira reng nitagorong mana tar uatuna ro douk ra kilain o mastet, ingga o banotong kula tar sisanene pare, ‘O in turane, karo inilala,’ kare turung ininguaon. Doh ahik me siokor inete re turung parakukuhin tamiuoum tar guat.

²¹Bo ter lotu puk manas, doh gete ueilir tamat, song re banotong geil liu tasir inetesinasine, ahik me giameher lele baka poluk.”^f

A uatorikinar binaka ke hire Iesu pare, e turung mat, kare tua tapokis

²²gTar binaka ka la toto tokahar tamatang uakuakeluk i Galili, kare hire Iesu pare tasisin. “A Tunar Tamata ka uahuhutung heir manasain tar limasir tamat, ²³gera turung uiliatung pou s tatanon, bo tar uatouononor marein puk inggono ra turung uatentur tapokisin.” Doho tamatang uakuakeluk ka uel-dolomontiehe tun.

A buluanar takis tar umang lotu ger dedeil

²⁴hTar binaka ka lame Iesu mesno tamatang uakuakeluk i Kaperneam, o tamatang kalkale tar buluanar takis tar

^g17:21 A giniamer bolobolon siun tabo teilinir 17.21.

^c17:12 Mat 11.14 ^d17:13 Luk 1.17 ^e17:19 Mat 10.1

^f17:20 Mat 21.21; Mak 11.23; Luk 17.6; 1Ko 13.2 ^g17:22 Mat 16.21

^h17:24 KT 30.13; 38.26

umang lotu ger dedeil ka lame tang Pita, kara me dangata pare, “Nami tamatang ualualasiroum e uoto bulaua tagumpe tar bulauanar takis tar umang lotu ger dedeil?”

²⁵ Doh Pita ke kula pare, “Aa.”

Tar binaka ke lekala Pita iuma tar um, kare uelhire uakikilanga Iesu pare, “Saimon, hape ro namana pea? O toia toro gavamanane i kot ra uoto kale tur tar takis tosnosio tamata ue tasir gime tamat?”

²⁶ Doh Pita ke kula pare, “Tasir gime tamat.”

Doh Iesu ke kula poluk pare, “Uelik, nosio tamatasina deh ahik tagu pah ra heir me takis. ²⁷ Bo a sa kompe geti uahagouo uasaeig tasisin, kara nimaliana tagigeig. Ingga o la tar kodomo uiluiloh i Galili, karo la uahu tar iauon, karo reh kai tar uakikilanganar iana gere kalotoin tar iail, dohi lolono tar uuanon e moko teilir mani e matoto tenag bulauanar takiso doha noumua. Kale tatanon, karo heir tasisina tenagira bulauanar takis raeig, kare guata siranguaon.”

O Mahar 18

Mair tamata uleikintieh tar Nitoiang Heuen?

18ⁱTar binakon o tamatang uakuakeluk ka lame tang Iesu, kara me dangata pare, “Inggeim mi marang iate pare, mair tamata uleikintiehe tun tar Nitoiang Heuen?”

²Doh Iesu ke kilame tar keketik, kare uatur tatanon i uoumuhia tasisin, ^{3j}Kare kula pare, “O mana tun, inggo gine ru hire tamiuoum geta hikoum pah mung uapalih, karung misiana tasir keketik, inggoum ahik pah mung banotong lekala

tar Nitoiang Heuen. ⁴Temaene mai re kale uahuuain, kare kotpokoso sira tar keketikene, inggono tere turung tamata uleik tar Nitoiang Heuen. ^{5k}Doh mair tamata re uaha uangoul me tang siokor keketik misianene, inggono ke uaha uan-goul totoguo.”

Iesu ke uatagin tar niguatang reih tasir gisiamer tamata mare punga res nitagorong man

⁶“Bo gete me tamata puk re guata me keketikisinasine re tagorong mana totoguo, e punga na nitagorong mana mare guata me niguata uasa, auiantiehe tatanonor tamata ge paka loloin ro uekuekono mo palaua uleik, kara la uadudurin tar kukurumun.”

⁷“Kuasalik tunumper tamatang gane i kot. Gisina ra uoto uapunga teres nitagorong manar gisiamer tamata mara guata tar niguata uasa. O mana noman a ineteninanine e turung kot-pokoso dedempe, bo a ualaueldolomo puk tang mai re turung uakotpokoso tar hagarinin. ^{8l}Doh geta limoumuaono ue a kekeimua re reih totomua tar guata me niguata uasa, tokout liu, karo bak! A uiantiehe geto la pukua ahik me limoum ue ahik me kekeim, karo kale tar nitua gere moko dede. Ter sa geta torikir limoumua doha torikir kekeim, kara baka uadeililaia toro hue rotie ahik paho uoto lomoh. ⁹Doh geta matoumuaono re uapung tereng nitagorong mana maro guata tar niguata uasa, kale liu tatanon, karo baka liu. A uiantiehe geto la keip pukua tar pang siokor pang matoum, karo kale tar nitua gere moko dede. Ter sa geto la keipia tar toking pang matoum, kara bakalalaia toro hue i Hel.”

ⁱ18:1 Luk 22.24 ^j18:3 Mat 19.14; Mak 10.15; Luk 18.17

^k18:5 Mat 10.40; Luk 10.16; Jon 13.20 ^l18:8 Mat 5.29-30

O uelhire uaranga tar sipsip geke heil

^{10-11 m}“Mu tagin teil, getung namana bo inggoum pare, o iinetelik pukur keketikisinasine, karung bangang uelsakil me tang sioko tasisin. Ahik tun. Inggogine ru hire tamiuoum, tar mamang binakalik i Heuen noso angelousina ra banga tar porene Tamouguoenah i Heuen.”⁸

¹²“Inggoum mung namana ah, gete me tamata mena hangaulur hangaulur sipsip, doh me sioko tasisin e heil, inggon e hiliu tasisisir lusiour hangaul, doha lusio, kare la sir taneneit ke heil. ¹³Inggogine ru hire tamiuoum, tar binaka re tuparono tatanon, inggon e turung uahantiehe liu tun tanene ke tuparain tasisisir lusiour hangaul doha lusio. ¹⁴Ter siokono komper hagar, Tamamiuoumenah i Heuen e de me tang siokor keketikisinasine mate rou.”

Hape ro banotong poul pe ingga tang tahim tar binaka re guata me niguata uasa totomua

^{15 o}“Gete guata uasa me tahimua totomua, o la uelhir tatanon, karo la uelhire ualasira tar haua ke guata uasaion. Bo mura uakodkodoh uaouo puk raoum. Gete longorono totomua, ingga ko reih tapokis tang tahim. ^{16 p}Bo geta hikiono pahe longoro totomua, kale me tang sioko ue me tang torik baka polukur tamata tar la tagu totomua mara tang torik ue a tang touonor tamata ra tur keip tar puh ko tohotolaia tatanon, kara bangeah. ¹⁷Doh geta hikiono pahe longoro tasisin, song ro hire ingga tar

sios, doh geta hik ponono pahe longoro tasir tamata uakap, karo guata sira tatanono tasisisir ueuenau, doho gisiameher tamata gera tele tar God noman.”

^{18 q}“Inggogine u uamana tun tamiuoum, a haua rung uih tanegioumane i kot, God e turung uih tane pono tanininanah i Heuen. Doha mamang inetelik rung luaka liuigioumane i kot, God e turung luaka liu pono taninin i Heuen.”

^{19 r}“Doh inggo u hire poluk pare tamiuoum, gete me tang torikir tamata tamiuoumane i kot ura ueluaiaie tar dangata me inete geura dangatain ue ura lotuin, Tamouguoenah i Heuen e turung heir tasrasin. ²⁰Ge a butur pe geura uangoul tokahainir tang torik ue a tang touon, inggo u uangoul tagu i uantinanina tasisin.”

A inete uleik maene ra kuse luaraig res niguata uasar gisiameh

²¹Tar binakono ke lame Pita tang Iesu, kare me kula pare, “Ir Tamata Noman gete guata uasang puk pela tahiguo to-toguo, a touihar binaka ru kuse luara tapokisio tatanon? Here tuka tar mouitir binaka?”

^{22 s}Doh Iesu ke kula pare tatanon. “Ahik, ahik dehono paha mouitir binak, bo a mouitir hangaul, kara mouitir binak.”

²³“Ge a Nitoiang Heuene pe misiana pare, a siokor binak e uangoulur toia, doh inggono ke marang bangaehetosno tamatang kalekinale geke kalkale puk baka tar mani tatanono mare kale tapokisio taninin. ²⁴Inggogine ke nihing ban-

§18:10-11 O gisiameher tamatang iate ra namana pare, a giameher puhung uelhire e moko teil pono tar puhene. A puhon e kula pare, “Ter hauon, a Tunar Tamat ke laha tar me kale tapokis tasir tamata geke heil.”

^m18:10-11 Hib 1.14 ⁿ18:10-11 Luk 19.10 ^o18:15 Luk 17.3; Gal 6.1

^p18:16 Ual 19.15; Jon 8.17 ^q18:18 Mat 16.19; Jon 20.23

^r18:19 Mak 11.24; Jon 15.7 ^s18:22 Luk 17.4

gaehe kompe, doh ter binakono ka keip pokosomeinir tang sioko tasisina geke kalkale puk baka tar hangaulur hangaulur mani. ²⁵Doh gitie ahik peono pah ke matotong heir tapokis tar manionener ululeik puk, kare kula uapopokohor toia tatanono meso bung tun, doh na kuaha pare, ra uabulauais menia keip tenas mamang inetelik tar uakapa tar buluanar manionener ululeik puk. ²⁶Doh gitir tamatang kalekinale ke punga uahiu i kot, kare hatup i uoumuhia tar toia, kare kula pare, 'Ir Tamata Uleik, ingga deho uangangoul hamas, karo heir baka me binaka totoguo maru turung heir tapokisio tar mani uakapa tun!' ²⁷Doh gitir toia ke ueldolomo tatanon, kare uamaluanana tatanon, kara hikingua ponompeono pah ke bulaua tar inete ke kalkale puk bakaig."

²⁸"Bo inggono pukur tamatonene ke tauetela i kalahar, kare la ueltupara tang uanoton geke kalkale puk baka tar mani tatanon, bo a papagalik pukunin. Kare kusa tane tatanon, kare uoho konomo toro uekuekonon, kare kula pare, 'Ingga pako uamate baka tar mani uakapa tun giniane ko kalkale puk baka turig totoguo.' ²⁹Doh git uanotonono ke longoro tar puhung kulonene, kare punga uahiu i kot, kare hatup uahiu tar kekenon, kare kula pare, 'Ingga deho uangangoul hamas, karo heir baka me binaka totoguo maru turung heir tapokisio tar mani uakapa tun!' ³⁰Doh inggonor tamatonono ke ueluelde, ahik pah ke marang ueldolomo ue e heir me binaka tatanon, kare uamoko tatanono tar umang uih e tuka gete uamate uakapa bakono tar manininanine."

³¹"Tar binaka ka bangar gisamehe ro uuanotous rasina tar haua ke kot-

pokoso kara lutarantiehe tun, kara hagouo uasa, maeit ka lasina tar toia, kara la hire tatanono tar mamang inetelik. ³²Song ke kila tapokisir toia tatanoneitir tamatang kalekinale, kare kula pare, 'Ingga deha tamatang kalekinale uasa. Banga tagu! Uakikilangan ingga ko kiring totoguo, doh inggo ku uamaluana tar mamang inetelik ko kale puk bakagia, teene ko dangata pe ingga. ³³Ingga deh pako ueldolomo tang uanotomene ura uoto kalekinale tokah misiana ku ueldolomo pe inggo totomua.' ³⁴'Doh gitir toia ke nimaliantiehe tun, kare uamokola tar tamatang kalekinaleonene tar umang uih tasir tamata gera turung heir tar uelmahing tatanon e tuka gete uamate uakapa tun bakono tar udeilinear mani."

³⁵"Doh Iesu ke la uelhire uakapa to pare, "Ter siokono sira kompe re turung guata pe Tamougou i Heuene tasir mamang tamatalik geta hikoum pah mung kuse luara tenas niguata uasa ro bung tahimiu i lolono tar koloumiu."

O Mahar 19

Iesu ke ualasira hape gete uelueluata liuir bulout tena kuah

19 Gitie ke menmene uakapa baka pe Iesu tar ineteninanine, kare hiliu tar pang uan i Galili, kare la tar pang uan i Judia tar pang giamehe nar kodom i Jordan. ²Doho manai tamata ka uakeluk tatanon, doh inggono ke uauia to tasisina tar buturuon.

³Doho gisameher Parisi ka lame tang Iesu tar me uatolaua tatanon, kara me dangata pare, "Nagi ualatoheig, e uauia tar bulout tar uelueluata liu tena kuaha tena nimalar?"

⁴vDoh Iesu ke kula pare, “Inggoum kung timana manasa tonu uelhire God gero kula pare, ‘Sioun, sioununtiehe tun tar binaka ke touo God tar mamang inetelik, inggono ke touo tasir tamata pare, a bulout doha kuah.’⁵wDoh God ke kula pare, ‘Ter tengkanonene, a bulout e hiliu tang taman, doh tinan, kaura la uangoul tokaha mena kuah, doh rasin ura la kotpokoso pare, a tang siok.’⁶Gitie ahik manasa pe rasina paha tang torik, bo kura la tang siok, ahik baka poluk me tamata re pakaha tar haua ke uamoko tokahain God.”

⁷xDoho Parisi ka dangata tatanono pare, “Bo ae maene ke heir Moses tar puhung kula pare, ‘A bulout e banotong bolo mo bolobolong ueltageih toro le, kara uelueltula liuinir kuah?’”

⁸Kare kula Iesu pare, “Teene inggoum a pirikir lumiu, karo mahang longoro tena niualasira God, temaene ke uamaluana Moses tamiuoum tar uelueltula liu tosnomio kuah. Bo sioun puk tar binaka ke touo God tar mamang inetelik, ahik uadeilimpe me puh sira baka pare. ⁹vDoh gete me kuaha me le, ahik pah ke ura keip tar tang giameher bulout, doh na bulouton e uelueltula liu tatanon, kare la le me tang giameher kuah, a buloutonene teke guata toro ur, kare guata tar niguata uasa tena kuaha uakikilang.”

¹⁰Doh no tamatang uakuakelukono ka longoro tar puhonene, kara kula tang Iesu pare, “Doh gete baka sira deher puhonene tar bulout mena kuah, auiantiehe deh geta hikir tamata pahe le.”

¹¹Doh Iesu ke kula tapokis pare, “A niualasironene ahik pahe la tasir tamata uakap, bo tasisis pukumpe ke heiris

God. ¹²Ge a burehe per tengkana maene ahikir tamata pah ra le. O gisiameh ahik pah ra le, teene o nipoho tanika manasampe pare, a sar tukunus, o gisiamehe ka ualahais mara hik pah ra banotong le, doho gisiamehe ka namana tanikampe pare, ra marang uoho tena kalekinaler Nitoiang Heuen, kara ualagono katongois pare, ahik pah ra le. Bo a tamata puk gere banotong kale toro uelhire rone tere kale.”

Iesu mesir keketik

¹³Doho gisiameher tamata ka keipime tasir gisiameher keketik tang Iesu mare me uaponono tar limana tasisin, kare lotu keip pon. Bo o tamatang uakuakeluk puk ka kula tane tasisin. ¹⁴zBo Iesu puk ke kula pare, “Uamaluana tasir keketik ra lame totoguo, kara hik pah mung kula tane tasisin, ge a Nitoiang Heuene pe a nasir babeir tamatonene.” ¹⁵Temaene song ke uaponolaono tar limana tasisin, song ke la.

A bulout kalan a tang mani ke ueluatata keip tang Iesu

¹⁶A siokor binak, ke lamer tang siokor bulout a tang mani, kare me kula pare tang Iesu. “Ir Tang Ualasisir, hape me hagar uaiia paku guataio maru banotong kale tar nitua gere moko dede?”

¹⁷aDoh Iesu ke kula tapokis tatanono pagiare, “Ae maene ro dangata ingga totoguo tang hingiar hagarir uia? A tang siokon sioun pukumper uia, God me pahen. Bo geto malara ingga o kale tar nitua gere moko dede, karo uakeluk tena ualatut God.”

¹⁸bKare dangata polukuono pare, “Hingiar ualatuton?”

v19:4 Uak 1.27; 5.2 w19:5 Uak 2.24; Epe 5.31 x19:7 Ual 24.1-4; Mat 5.31

y19:9 Mat 5.32; 1Ko 7.10-11 z19:14 Mat 18.2-3

a19:17 NKP 18.5; Luk 10.28 b19:18 KT 20.13-16; Ual 5.17-20

Kare hire Iesu tatanono pare, “Ahik paho tung pous me tamat, doh geto lea ahik paho ura keip tasir le, doh ahik paho uenau, doh ahik paho boho tola tar tang giameh. ¹⁹Karo ueltada tang tamoum, doh tinoum, doho malaelhir tang uanotoum misiana ro malaelhir pea.”**

²⁰Doh gitir bulout ke hire tapokis pare tang Iesu. “A mamang hagarininanit, inggo ku uakeluk uakap, bo me huar inete ru katup harahaio?”

²¹Kare kula Iesu tatanono pare. “Gero malara ingga o tamata uaia sira re malara per Tamata Noman pako baka pea, la, karo la uabulaua liu tenang mamang inetelik, karo heir tar mani tasir tiome, maro kale ingga tar bureher inete uaia i Heuen, song ro lame, karo me uakeluk totoguo.”

²²Doh tar binaka ke longoror buloutonene tar puhonene ke kulain Iesu, inggono ke duhin, kare kaleinir niueldolom, teene inggon a tang manintieh. Kare hiliuingua.

²³Doh Iesu ke hire tosno tamatang uakuakeluk pare, “O mana tun, inggo gine ru hire poluk tamiuoum, a parakukuhuntiehe tun tar tang mani tar lekala tar Nitoiang Heuen. ²⁴Inggo gine ru hire uapoul poluk, a kamel ahik pahe parakukuhin tar hikula tar tapokosonar harum, bor tang mani e parakukuh tunin tar lekala tar Nitoiang Heuen.”

²⁵Tar binaka ka longoror tamatang uakuakeluk tar puhonene, kara lutarantiehe tun, kara ueldangate katongois pare, “Doh maingua ra banotong uelkarusin?”

²⁶Doh Iesu ke bangala tasisin, kare kula pare, “O tamata ra banoto leu tar

puhonene, bo tang God puk, inggon e banotong guata tar mamang inetelik.”

²⁷Tar binaka ke kula Iesu pare, kare kula tapokis Pita pare, “Inggeim king hiliu tenami mamang inetelik, doha inete haa ring turung kalegieim?”

²⁸^dDoh Iesu ke kula pare tasisin, “Inggo gine ru hire tamiuoum toro man, tar binaka re timuh tapokisir mamang inetelik, doha Tunar Tamat e tabila tonotabtabilar toia menia keip tar nibalbalanar nitampopokoho ter binakon, inggoumur tamata gekung uakeluk totoguo, inggoum pono mung turung tabila tar siokor hangaul, doho torik ro tabtabilar nasir toia, karung turung kedangar tar siokor hangaul, doha torikir pang tamatang Israel. ²⁹Doh maisir tamata ka namana tar hangougou, kara hiliu tonoso um ue o tasisin ue o tatahisilik ue o tamas ue o tinas ue o bung tus ue nas mahar kot, gisina tera turung kale me siokor hangaulur hangaul baka polukur inet, dohi muduhia, ra turung kalesina tar nitua gere moko dede tar mamang binakalik. ³⁰^eBo o burehe pukur tamata gesir tohangas daan tesir tabo hangas tar mareineit re lame, doho bureher tamata gesir tabo hangas daan, gisina tesir tohangas tar mareineit re lame.”

O Mahar 20

Iesu ke uelhire uaranga tasir tamatang kalekinale tar iomo bino

20 “A Nitoiang Heuene misiana tar tang siokor tamata geke la naliliuolik tun, kare la kila hahai tasir tamatang kalekinale tar me kalekinale tena iomo binoon. ²O tamatang kalekinalesinasine ka ueluaia tar kale tar si-

**19:19 Bolobolong Ualatut 5.16; Kale Tapokis 20.12; Nas Kalekinaler Pater 19.18

^c19:26 Job 42.2 ^d19:28 Mat 25.31; Luk 22.30; UGO 3.21

^e19:30 Mat 20.16; Luk 13.30

sisiokor denarius^{††} tar mareinon, kare kulono tasisina ra la kalekinale manasa tena iomo binoon.”

³“Kenua, ke in kai sikoro manasahar pisara kaelainatie nar 9 kilok. Kare laonor tamata uleik tar buturung uelpokos, kare ueltupara tasir gisiameher tamata ra turtur teil pukumpe, ahik pah ra tuha me inet. ⁴Kare kula tasisina pare, ‘Inggoum pono mung banotong la kalekinale tar iomo bino maru turung bulaua uamatoto inggo tamiuoum tar haa rung kalekinalein.’ Song ka lasin. ⁵Doh na mareing uleik, ke la guata polukuono tar siokonor hagar, doh nar 3 kilok a siokono sira kompe. ⁶E lang uahuhut manasainir binaka tar 5 kilok, kare la polukuono tar buturung uelpokos, kare la ueltupara tasir gisiameher tamata ra uangoul haraha tar buturuon. Kare dangata tasisina pare, ‘Ae maene rung ueluelouroum tar udeilinar marein rung uanguangoul puk peane, kara hik me inete rung guatain?’”

⁷“Kara hiresin pare, ‘Ahik uadeil deh me tamata ke hire tamiueim mena kalekinale.’”

“Auia, mung la, karung la kalekinale tenag iomo binoo.”

⁸^f“Gitie ke reiu manasa peon, tanener iomo ke kula tena tamatang uoum keip tasir tamatang kalekinale pare, ‘Kila tasir tamatang kalekinale, karo bulaua tasisina tar bulauas, uakekene keip tas geke kila uadouhis, karo uadouh keip tas geke kila uakikilangais.’ ⁹Doho tamata geke uakekene tar kalekinale nar 5 kilok ka bulaua kahakahais tar sisiokor denarius. ¹⁰Doh tar binaka ka lamer tamatisis ka kila uakikilangais tar me kalekinale tar me kale tar bulauas, gisina ka namana pare, ra tu-

rung kale uairanantieh, bo gisina ka kale puk pono tar sisiokor denarius. ¹¹Gitie ka kale pesina tenas mani, kara menemene tar tamata uleik. ¹²Ka kula pare, ‘O tamata dehesine ka kila uadouhis tar me kalekinale ka me kalekinale puk tar sikin, doh inggeim teking kalekinalentiehe tunumpe tar udeilinar marein, kara pidpidina tagu poluk, doh karo bulaua tagu polukua tar bulauasisina misiana tamiueim!’”

¹³“Kare kula tanener iomo tar tang sioko pare, ‘Ualongoro kaloug. Inngo ahik pah ku guata uasa totomua. Bo toro kikilangana puk raeig kira ueluauiiae tar kale tar siokor denarius tar kalekinale tar siokor marein. ¹⁴Kale manasa tar bulauoum karo la. Doh inggo u marang heir pono tar bulauanar tamata geke kila uadouhin tar me kalekinale misianeit ku heir peo totomua. ¹⁵A ineteng totoguo. Ge inggo pe u uakeluk to tereg nimalahir tar bul tenag mani. Getu marang guata uaiiao me hagar uaiia tasir tamatasinasine, ae maene ro la hagouu uasa ingga?’”

¹⁶^gSong ke la uadouh keip to Iesu pare, “Ter siokono kompe, o tamata gesir tohangas daan tesir tabo hangas tar mareineit re lame. Doho tamata gesir tabo hangas daan, gisina tesir tohangas tar mareineit re lame.”

A uatouononor binaka ke hire Iesu pare, e turung mat, kare tua tapokis

¹⁷Gitie re lang la pe taro Iesu i Jerusalem, inggono ke kila toto sioko baka tar siokor hangaul, doha tang torik no tamatang uakuakeluk, doh gitie ra la haraha pelasin, Iesu ke hire pare, ¹⁸^h“Ualongor, inggeig gine ri la taro i Jerusalem tar butur ra turung

^{††}20:2 A denarius a bulauanar siokor marein tar tang siokor tamatang kalekinale.

^f20:8 NKP 19.13; Ual 24.15 ^g20:16 Mat 19.30; Mak 10.31

^h20:18 Mat 16.21; 17.22-23

heir toinir Tunar Tamata tar limasir paterere uleik doho tamatang ualualasira tar ualatut. Doh gisina ra turung uelhote pare, inggon e turung mat,¹⁹ kara heirin tasir tamat ahik paho Ju gera turung uauanete tatanon, kara halhaluh, kara uakusa tar korose, bo tar uatouononor marein puk, inggono ra turung uatua tapokisin.”

Jems me Jon kura marang kotpokos a toking tamata uleik

²⁰ Doh na kuaha Sebedi menia keip tar toking tun ka lame tang Iesu, kare me hatup uahiuu tinas rasina tang Iesu, kare kula pare, e marang dangata tang Iesu tar siokor inet.

²¹ ⁱ Doh Iesu ke dangata pare tatanon. “A haua ro malahiria?” Kare hireono pare, “O uauia ingga tar toking tuguo rasine ura la turung tabila uelpakaha toro tokino tabtabil tar noumuar Nitoia? Me tang sioko tar pang mua, doh me tang sioko tar pang kais.”

²² ^j Bo Iesu puk ke kula tapokis pare tas ramamahialik, “A inete kura dangatain raoum e banoto leu teremira ninamana raoum. Ue mura banotong inum tagu raoum tar kapang uelmahing geru turung inumuio?”

Kaura kula rasina pare, “Raeim mira banot.”

²³ Kare hireono pare, “Raoum mura turung inum tagu nomanampe tenagu kapang uelmahingo, bo ahik pukuono paha ineteng totoguo tar kula, mai re tabila tar pang mua, doh tar pang kais. A tabtabilana ke kaleuatoroig Tamouguo pare, a nasir tamata ke kaleuatorosiono sioun.”

²⁴ Doh tar binaka ka longoror siokor hangaulur tamatang uakuakeluk tasrasin, gisin ka nimaliana tasrasin. ²⁵ ^k Bo

Iesu puk ke kila toto tasisina uakapa, kare kula pare. “Inggoum mung ate tasir tamatang gime uan ge ahik paho Ju, noso tamatang uoum keipisina ra uairanais, kara uaikoto tasir gisiamah, doh noso tamata uleikisina ra ualatohontiehe tun, kara uasokor mara longorosin.

²⁶ ^l A puhonene paka hik pahe kotpokoso tagu tamiuoum, bo mai pukur tamata re malara pare, e tamata uleik i uantininanin tamiuoum, inggono pake tere kotpokoso pare, a tamatang kalekinale tamiuoum. ²⁷ Doh mair tamata re malara pare, e kotpokos a tohangan tamiuoum, inggono pake tere kotpokoso pare, a tamatang kalekinale tun pukumpe tamiuoum. ²⁸ ^m Misiana tar Tunar Tamata ke la peha, ahik pah ke laha mara me kalekinale ueleheirir tamata tatanon, bo inggono ke laha tar me kalekinale ueleheir tasir tamat, kare heir tar tukununa pare, a bulauana tar kale tapokis tur tasir tamata tenas niguata uasa.”

Iesu ke uauia tar tang torikir bulout a toking kut

²⁹ Gitie ra lang hiliu manasa pe Iesu mesno tamatang uakuakeluk i Jeriko, o bureher tamata ka uakeluk tatanon.

³⁰ Doha tang torikir bulout a toking kut ura tabila tar tektekener lel. Kura longoro rasina tang Iesu e la manasame, kaura uakekene manasampe tar kulkula ualeik pare, “Ir tuna Debit, o ueldolomo tamiraeim.”

³¹ Doho tamata ka uelkukur tasrasin, kara kula tasrasin ura tabtabila sikor. Bo rasina puk kura kulkula ualeikintiehe kalehe kompe pare, “Ir tuna Debit, o ueldolomo tamiraeim.”

³² Song ke tur uangoul Iesu, kare kila tasrasin, kare dangata pare, “A haua

ⁱ20:21 Mat 19.28; Luk 22.30 ^j20:22 Mat 26.39; Jon 18.11

^k20:25 Luk 22.25-26 ^l20:26 Mat 23.11; Mak 9.35 ^m20:28 Luk 22.27; Pil 2.7

ura malarain raoum u guata ueleheirio tamiraoum?”

³³Kaura kula rasina pare, “Ir Tamata Noman, raeim mira malar, o guata uaia ingga tara matamiraeim.”

³⁴Doh Iesu ke ueldolomo tasrasin, kare tuha tara matas rasin. Ahik me manasan, kaura banga uaia rasin, kaura uakelukungna tatanon.

O Mahar 21

Iesu ke la lekala i Jerusalem misiana tar toia

21 Gitie ka la uahuhut manasa pe Iesu mesno tamatang uakuakeluk i Jerusalem, kara la turuha tar uauanilik i Betpage tar Siusanang Oliv ter buturuono ke ualatueto ter Iesu tar tang torikir tamatang uakuakeluk, kare kula pare tasrasin, ²“Mura la tar uanela ra bang huaralain, doh getura lekala raoum tar uanion, kaura turung banga dedengua kompe tar donki a niuih uatur, e tur keipimpe tar tun, luaka tasrasin, kaura keipimeane totoguo. ³Doh gete kula me tamata me inet, hire tatanono pare, ‘A Tamata Noman e malara tasrasin,’ mare uamaluana ualahurono tamiraoum tar keipime tasrasin.”

⁴A puhonene ke kotpokoso sira tun tar uakalahara tar puh ke kulameinir propeit pare,

⁵“Hire tar uan uleik i Saion, ‘Banga tenang toia, git re lame totomua! Inggon a hamhamas e la sirame tar tamat a tabo hangan, doh inggon e tabila teil tar donki. Aa, inggon e tabila teil tar donki kalan.”

Sekaria 9.9

⁶Doh rasitir toking uakuakeluk kura la guata sira ke kula pe Iesu tasrasin.

⁷Kaura la keipime tar donki tinana doha tun, kaura heig uaponola tenasira

hikhiku baraha i rana tar toking donki, kare tabila uaponola Iesu i ran.

⁸O bureher tamata ka liaha tenas hikhikuane i koto tar lel, doho gisiamehe ka tokout tar randouk, kara uamoko ha-haiala tar lel. ⁹Doho tamatasitie ra la uoum teil tatanon, doh gisitie ra uakeluk teil ka kula ualeik pare,

“Hosana! Uaha tar tuna Debit!

God e guata uaia tar tamatonene re lame tar hanganar Tamata Noman.

Hosana!

Uataakai tun tar hangana God.” *Ker 118.25-26; 148.1*

¹⁰Doh tar binaka ke lekala Iesu i Jerusalem, o tamata uakapa tunane tar uan ka lutarantieh, kare nukur balas, kara ueldangata ueltebeir pare, “Mai tunumper tamatonene?”

¹¹Doho manai tamata ka hire pare, gine te propeit Iesu ger peng Nasaret i Galili.

Iesu ke geil liu tasir tamata ra uabulbulaua to tar umang lotu ger dedeil

¹²Doh Iesu ke la lekala tar umang lotu ger dedeil, kare la geil tauete tasir tamata gera bulbulaua, kara uabulaua to tenas inete tar buturuon, ke kaba dingono tar pateheng mani, doh nas tabtabilasis ra uabulaua tosnosio tetiau. ¹³“Kare kula pare tasisin, “A nibolo uahua dehono tono uelhire God pare, ‘Nag umo ra kilain a umang lotu, bo inggoum puk mung guata sira pare, nas buturung tokouaouor ueuenauon.”

¹⁴Doho bureher tamatar kut mesir tamatasiesier kikimoror limas, doha kekeis ka la to me tang Iesu iuma tar umang lotu ger dedeil, kare uauiaono tasisin. ¹⁵Bo tar binaka puk ka bangar patere uleik, doho tamatang ualualasira tar ualatut tar hagar uaianine ke guataig

Iesu, kare tasir keketik pono ra kulkula ualeik pe pare “Hosana! Uatakai tar tuna Debit!” Kare tokouasais tang Iesu. ¹⁶°Kara dangatasina tang Iesu pare, “Ingga o longor paroko tar haua ra kulkulainisin?”

Kare kula Iesu pare, “Aa, u longor, bo inggoum puk here halana tung timana tena puhung uelhire Godene, ‘Ingga ko ualasira tasir keketik, doho guama tar heir tar uatakai uaiantiehe tun.’” ¹⁷ Song ke hiliu Iesu tasisin, kare tauetela tar uan, kare lala i Betani teke la hohouono tar boungon.

**Iesu ke soul uasa toro douk o
hangana toro fig, karo la
makmakorongua roon**

¹⁸ Naliliuolik tun, gitie ke tapokis pela Iesu tar uan inggono ke gog. ¹⁹ Doh inggono ke banga toro fig o tur tar tektekener lel, kare la uelhir tang roon, bo ahik pukuono pah ke banga me uauana roon, bo a kamanana kompe. Kare kula pare toro douk roon, “Teko tuka, ahik baka poluk me kukuanana re turung alara tur totomua!” Ahik me manasan, karo makmakoro tur puk manasampe ro tukununa ro douk.

²⁰ Doho tamatang uakuakeluk ka banga tar puhonene, kara lutarantieh, kara ueldangateis pare, “Hape maene ko makmakoro ualahur tunungua ro douk rone?”

²¹ P°Doh Iesu ke kula tapokis pare, “O mana tun, inggo gine ru hire tamiuoum, gete me mi nitagorong manoum, doh ahik pah mung uaruara naman, inggoum mung banotong guata sira tar hagarene ku guataio toro fig, doh ahikiono pah tar puh pukene ka guatain toro fig, bo mung banoto ponompe mung kula tar siusana

pare, ‘Tentur, karo bakakoiako i laur,’ kare turung guata sirono tar puhene kung kulaioum. ²² qDoh getung tagorong manoum tang God, inggoum mung kale tar hauar inete rung dangatain tatanon.”

**Iesu ka dangatain, mai ke
uatohangana tatanon**

²³ Doh Iesu ke tapokisime tar umang lotu ger dedeil, doh gitie re ualasira peon, noso uleikir pater, doho mama-hoholik ka lame tatanon, kara me dangata pare, “Ia ko kale tura tar hanga uleikene, doh mai ke heir totomua tar nitampopokoh, maeit ko banotong guata pagiare?”

²⁴ Doh Iesu ke kula tapokis pare tasisin, “Inggo u marang dangatangua baka pono tamiuoum tar siokor puhung dangat. Doh getung hire tapokis uaiaoum totoguo, song ru hire pono tamiuoum tang mai ke uatohangana totoguo tar guata tar kalekinalenine.” ²⁵ Song ke dangata Iesu tasisina pare. “Bo na niuahuhu Jon, ia re la tur, tang God ue e la tur puk tasir tamat?”

Doh gisina ka menemene katongois pare, “Hapengua ri kula peeig? Geti hire taroeig pare, ‘E la tur tang God.’ Inggon e turung kula poluk pare tagigeig, ‘Bo aeono maene ahikioum pah kung tagorong mana tatanon?’” ²⁶ rBo geti kuleig pare, ‘E la tur tar tamat.’ Inggeig i sokoro me puh gera guatainir tamat, teene gisina ra siokor namana pare, Jon a propeit.” ²⁷ Song ka hire tapokisisina pare tang Iesu, “Inggeim mi tel.”

Kare kula Iesu tasisina pare, “Uelik, inggo ahik pono pahu hire tamiuoum tang mai ke uatohangana totoguo, maeit ru guata tar kalekinalene.”

°21:16 Ker 8.2 P°21:21 Mat 17.20; Luk 17.6; Jon 14.12; 1Ko 13.2

q21:22 Mat 7.7-11; 18.19 r°21:26 Mat 14.5

O uelhire uaranga tar toking Tunar Tamat

²⁸“Bo hape rung namana peoum tar puhene? A siokor binak e uangoulur bulout doha toking tun, a toking bulout. Maeit, inggono ke lala tanetier mamahoholik uoum, kare kula pare, ‘Ir tug, daan ingga o la, karo la kalekinaleala tar iomo bino.’ ²⁹Bo ke kula tapokis pukuono pare, ‘U de matu la.’ Bo i muduhia puk inggono ke uiuir tena ninamana, kare la. ³⁰Song ke la poluk ra tamas rasin, kare la hire tar uatang giamehenar tun tar siokono komper puh. Kare kulono pare, ‘Aa, tamoug, inggo u la.’ Bo ahik pukuono pah ke la. ³¹Hingia tasrasina rasine ke guata tena nimalara ra tamas?”

Kara kulasina pare, “Ger uakikilangan.”

Kare kula Iesu pare tasisin, “Inggo u uamana tun tamiuoum, o tamatang kale tar maning takis doho kuahastir ura ueltebeir ra la leka uakikilanga tamiuoum tena Nitoia God. ³²sGe Jon pe ger tang uahuhu ke lame tamiuoum tar me ualasira tamiuoum tar leler kodkodoh. Doh inggoum ahik pah kung tagorong mana tatanon, bosir tamatang kale tar maning takis mesir kuahasisir ura ueltebeir teka tagorong mana tatanon. Inggoumur Parisi, doho tamata uleik kung bangampe tar puhonene, kara hik dedempe pah kung uiuir teremi ninaman, karung tagorong mana tatanon.”

O uelhire uaranga tasir tamata uasa gera kaueke tar iomo bino

³³†Doh Iesu ke hire poluk tasir tamata uleik pare, “Mu ualongoro poluk toro giamehe ro uelhire uarang. A tang siokor tamata ke tuha tena iomo bino, kare ur tane tar pantui, kare koho tar tung

ra pouspous toigir kukuananar bino i koboro tar iom, kare tuha tar pang taluhatie tar iom, kare heir baka tasir gisiameher tamata ra kaueke uangoul, bo inggono ke la baka tar gime uan e uaireh. ³⁴Doh tar binaka ke lamer binakang kale toto tar kukuanananin, git tanener iomo ke ualatue tosno tamatang kalekinale tar la kale tena kukuananar binoon. ³⁵Bo o tamatang kaukaueke puk tar iomo ka kusa tane tosno tamatang kalekinaleon, kara uiliatung tar tang siok, kara tung pous tar tang giameh, kara bakbak pous tar tang giameh. ³⁶Song ke ualatue polukuono tasir gisiameher tamatang kalekinale, o burehe uain tas geke ualatue baka uoumulais. Doho tamatang kaukaueke ka me guata sira kompe tar siokonor hagar misiana ka guata uoum pe tasir uakikilangan. ³⁷Uadouhina tun, git tanener iomo ke ualatuela tar tun ger bulout tasisin, teene ke namana peono pare, ‘Song ra la ueltada nomanasina tar tugu.’

³⁸uBo tar binaka puk ka bangar tamatang kaukaueke tar tunon, kara uelkuleis pare, ‘Gine deh ter tuna tanener iomo gere turung kale uahiua tar iomo bino, ti la, ti uiliatung pous tatanon, mari kale inggeig tar mamang inetelikir nanon.’ ³⁹vSong ka kusa tane tatanon, kara baka tauete tur tatanono tar iomo bino, kara tung pous.”

⁴⁰Kare dangata Iesu pare, “Doh tar binaka re me pokoso tanener iom, hape re me guata peono tasir tamatasitie ka kaukaueke tena iomon?”

⁴¹Kara hire tapokisisina pare, “Inggono dehe turung uiliatung pous no-mananguampe tasir tamata uasasinasine, kare bulaua mo gisiameher tamata tar me kaueke tar iomo bino gera turung

²⁸21:32 Luk 3.12; 7.29-30 †21:33 Ais 5.1-2 u21:38 Mat 27.18

v21:39 Hib 13.12

heir tang tanener iomo tar kukuananar bino gete ua.”

⁴²W^wKare kula Iesu pare tasisin, “Ing-goum kung timana manasa tar puhung uelhire gero kula teilin no uelhire God? ‘O palaua geke deinir tamatang tuha toro um, teene ka namana pe o sa roon, karo iinetelik puk, roon ko uiuirin pare, o inete uleik tun.

A Tamata Noman ke guata tar ineteninanine doha mataia tun, king banga pe inggeim!” *Ker 118.22-23*

⁴³Kare kula ualatumana poluk Iesu pare tosnosio mamahoholikir Ju, “Temaene ru hireo tamiuoum pare, na Nitoia God ra turung kale liuin tamiuoum, kara heirin tasir tamata gera uoto ua tar kukunana uaia gere uauaha tang God. ⁴⁴Doh mair tamata re turung punga uahiuako toro palaua roon e turung tapolaka siksikin. Doh mair tamata re turung hungin tang roon e turung tamtamian.”

⁴⁵Tar binaka ka longoro noso tamata uleikir pater, doho Parisi toro uelhire uaranga rone ke hirein Iesu, kara ate pare inggon e menmene tasisin, ⁴⁶temaene ka marang kusesina tatanon e la tar karabus, bo ka sokoro puk tasir manai tamata gera tagorong mana pare, Iesu a propeit.

O Mahar 22

O uelhire uaranga toro niein uleik toro le

22 Doh Iesu ke guata poluk toro giamehe ro uelhire uaranga tasir mamahoholik pare, ²“A Nitoiang Heuene ra banotong uamisiana tolain tar toia geke pugul toro niein uleik tono ler tun ger bulout. ³O bureher

tamata ka kilais, doh inggono ke ualatue toсно tamatang kalekinale tar la kilame tasir nikil ra lame tar binaka ro taliaha ro niein, bo gisina puk ka de mata lame. ⁴Maeit inggono ke ualatue poluk tasir gisiamer tamatang kalekinale, kare heir toro uelhire rone tasisin, ‘Mu la hire tasisitir nikila pare, rog nieino o taliaha manas. O bulumakau, doho katiuo ululeik uelhirisitier nouguo, inggeim king uiliatung pous manas, doha mamang inetelik a nikaleuatoro uakap. Mu lame toro nieinin toro le.’ ⁵Bo gisipukur nikil ka mahang longoro tasisin, kara kalekinale dedempe tonoso kalekinale. A tang sioko ke la tena iom, doha tang giamehe ke la tena kalekinale tar situa. ⁶*Doho gisiamer nikil ka kusa tane tasir tamatang kalekinale, kara guata uasa tasisin, kara uiliatung pous. ⁷Doh gitir toia ke nimalianantiehe tun, song ke ualatueono toсно tamatang uiliatung teka la uiliatung pous tasisinar tang haluh, kara ualuh meniangua tenas uanisin. ⁸Song ke kulono toсно gisiamer tamatang kalekinale pare, ‘O nieinin toro le rone ku puguluio o nikaluator, bo o tamata puk geku kilasio ahik paho tamata uaia tar lame. ⁹Temaene mung la puk manasoum toro lele uleik, karung kilame mo bureher tamata ueltebeir gerung ueltuparais.”

¹⁰“Temaeit ka la manasampesisir tamatang kalekinale toro mamang lelelik, kara la kilame tas mais ka ueltuparais, gisisiemper sa, karo uia. Ke pe teil per umang ein to, doh ke uoung tasir tamatasitir nikil. ¹¹Doh gitir toia ke leke manasampela tar la uelgumgum tasir nikil, kare banga tar tang siokor bulout ahik pahe hiku teil me hikhikung toro le. ¹²Kare dangata tatanono pare, ‘Kaloug, hape ko leka pe me inggane

iuma tar binaka ahik menang hikhikung toro le?’ Bo git pukur bulout ahik pah ke men. ¹³ Doh gitir toia ke kula tosno tamatang kalekinale pare, ‘Uih tane tar toking pang limanon, doha toking pang keken, karung baka tauetela i kalahara tar kitkitupun, tar butur ra kiring tor tamat, teeit ra nimaliana pe, kare uelmahingis.’” ¹⁴ Doh Iesu ke la uelhire uakapa to pare, “Ge God pe e kila tasir bureh, bo e kedanga puk tasir gisiameh.”

**A maning takis ra heirin
tang Sisa ue ahik?**

¹⁵ Doho Parisi ka hiliu bak, kara la uelhote uaouo, hape mara tutlour keip tang Iesu me puhpuhung dangat. ¹⁶ Song ka ualatusina tosnosio tamatang uakuakeluk, doho gisiameher tamatasitie ra uoto uakeluk tang Herot ka la tang Iesu. Kara la kulasina pare tatanon, “Ir Tang Ualasil, inggeim mi ate pare, ingga a uauamana tun, doh toro man, ingga o uoto ualasila tena hagar uaia God, doh ahik paho sokoro me tamat, teene ingga ahik paho namana hape re baka per tamat a tohangana ue ahik. ¹⁷ Gon, hire tamiueim, hape ro namana pea? Tena ualatut Moses, auiampe ri heir pe inggeig tar maning takis tang Sisar ue ahik?”

¹⁸ Bo Iesu puk e atensioun manasa teres ninamana uasasin, kare kula pare, “Inggoumur tang kokop! Ae maene rung marang tutlouroum totoguo?” ¹⁹ Ualasila totoguo tar mani nar takis!”

Kara kale ueleheirisina tatanono tar mani.

²⁰ Kare dangata Iesu pare tasisin, “A poren, kara hangana maiene rung banga tosioium tar mani?”

²¹ ^a Kara hire tapokisisina pare, “A porene, kara hangana Sisa.”

Song ke kula Iesu pare tasisin, “Uelik, heir tar ineter nang Sisa tang Sisa, karung heir tar ineter nang God tang God.”

²² Doh binaka ka longorosina tar puhene, kara lutarantiehe tun, song ka hiliu tatanon, kara la.

**O Sadiusi ra tagorong
boho tar nitua tapokis**

²³ ^b Tar marein kompeon, o Sadiusi gera tagorong boh tar nitua tapokis tur toro mat, ka lame tang Iesu, ²⁴ ^c Kara me dangata pare. “Ir Tang Ualasil! Moses ke bolo toro uelhire sioun pare, ‘Gete mate liu me tamata tena kuah, bo ahik puk me tun, tahinon e turung le palih tar kua hene mare banotong uakotpokosono mo bung tuna tahinetie ke mat.’” ²⁵ Sioun, o mouitir mamahialik ka uoto uan-goulane, doh gitir uoum teke le, kare mat, bo ahik puk me tun. Doh gitir uatantorikin teke le palihingua tena kua-hon. ²⁶ Doha siokono dedemper hagar ke kotpokoso tar uatantorikin, doh tar uatantouonon, doh tasisina uakapa tununguamper mamahialik. ²⁷ I muduhia ka mata uakapa baka pesin, kare mate ponor kuah. ²⁸ Gon o hire, gitie ka siokor le pesina tatanon, doh tar marein ra tua tapokisir mat na turung kuaha mainguaon?”

²⁹ Kare hire tapokis Iesu tasisina pare, “Inggoum deh mung tele tono uelhire God, temaeit mung uatoboul katongosioium, karung tele pono tena nitam-popokoho God. ³⁰ Binaka ra tua tapokis turur tamata toro mat, o bulout doho kuah ra turung misiana tasir anggelousinah i Heuen, doh ahik pah ra le. ³¹ Doh tar puheit rung dangataioum tasir mate

^y22:13 Mat 8.12; 25.30; Luk 13.28 ^z22:15 Mak 3.6 ^a22:21 Roum 13.7

^b22:23 Apo 23.8 ^c22:24 Ual 25.5

ra tua tapokis. Inggoum kung timana manasa tar haua ke hirein God tamiuoum. Inggono ke kula pare, ^{32d}“Inggono ter God a nang Abraham, doha nang Aisak, doha nang Jekop.’ Ge inggono pe ahik pah nas Godor mat, bo nas Godor tua.”

³³Doh tar binaka ka longoror manai tar puhonene, kara lutarantiehe tun tena niualasiron.

Hingiar ualatut nang God ger uleikintieh?

³⁴Doh tar binaka ka longoror Parisi pare, Iesu ke uapepe bukubuk tasir Sadiusi, kara la toto tokah. ³⁵Doha tang sioko tasisin a tang iate tena ualatut Moses ke dangata tar puhung dangata tar uatolaua tatanon. ³⁶“Ir Tang Ualasil, tena ualatut God hingiar ualatut uleikintieh?”

^{37e}Kare hire tapokis Iesu pare, “Inggoum pakung malauehir tar Tamata Noman nami Godoum tar balamiu uakapa tun, doh tar iabeimiu uakapa tun, doh teremi nihagouo uakapa tun.’ ³⁸Inggonene ter uakikilanganar ualatut, kare ter uleikintieh uain. ^{39f}Doha uatorikina ter siokono sira kompe tatanono pare, ‘Inggoum pakung malauehir toso uanotoumiu misiana rung malauehir katongo pesioum.’ ^{40g}Rasinar toking puh rasine teura uatengkana tar mamang uelhireng ualatutulikir nang Moses, doh nas niualasirar propeit.”

Iesu ke dangata tasir Parisi tar tamata ger Kristo

⁴¹Tar binakene ka uiliodoutur Parisi, kare dangata Iesu pare tasisin, ^{42h}“Hape rung namana peoum tang Kristo? Hingiar o bungun ke la turion?”

Kara hire tapokisisina pare, “Inggono e la tur toso bunguna Debit.”

⁴³Kare dangata Iesu pare, “Doh ae maene ke ualasilar Iabena Dedeil tang Debit tar kila tatanono pare, a Tamata Noman. Debit pe ke kula pare,

⁴⁴ⁱ“God ke kula pare tenag Tamata Nomano, tabilane tar pang mua totoguo e tuka getu uamoko tosnongo uelmatana ra me hatup uahiua tar kekeimua.””

Ker 110.1

⁴⁵“Doh gete ke kila Debit tatanono pare, A Tamata Noman, hape maene e uatuna Debit tatanon?”

⁴⁶Doh ahik hagar me kaluasiasina ke banotong uelhire hahaua tar puhonene tang Iesu, doh teka tuka tur tunungua ponompesina tar binakon, ahik me tang sioko ke ongolo tun tar dangata tang Iesu me puhung dangat.

O Mahar 23

Iesu ke hire tosono tamatang uakuakeluk tar tagin teil tasir tamatang ualualasira tar ualatut, doho Parisi

23 Song ke uelhire poluk Iesu tasir manai tamat doh no tamatang uakuakeluk pare, ²“O tamatang ualualasira tar ualatut, doho Parisi teka palih tang Moses. ^{3j}Temaene inggoum pakung ueltad, karung uakeluk tar mamang inetelik ra hireigisina tamiuoum, bo ahik pukuoum pah mung guata sira tenas nipilesesin, ge gisina pe ahik pah ra uoto uakeluk tar haua ra uelhirein. ⁴Kara uahuata tasir tamata tar bureher niduh, kara hik pah ra marang heir me pang lima tasisina tar huata uelkout tar niduh.”

^d22:32 KT 3.6; Mat 8.11 ^e22:37 Ual 6.5 ^f22:39 NKP 19.18; Mat 7.12

^g22:40 Roum 13.10; Gal 5.14 ^h22:42 Jon 7.42 ⁱ22:44 Mat 26.64

^j23:3 Mal 2.7-8

⁵k“ A mamang inetelik ra guataigisina ra pe kompe pare, mara bangar tamata tasisin. Gisina ra tuha uauleik tar bobok-isilik tera uamokoigisina tar tukunus mare uanamana dede tasisina tonu uel-hire God, doh ra uoto uabarah tar suruna nas siksikir uoh e la baraha dedeko i kot tar uanamana tasisina tang God. ⁶Doh gisina ra malahir tar tabtabila uaia uelhir tar niein uleik, doh nas tabtabilar mahoho tar umang lotu. ⁷Doh gisina ra uoto pe dede pare, ra uauaha keipis tar ueltada tar butur ra uangoul totor tamat, kara uoto malara pare ra kilais, ‘Tamatang Ualafir.’ ⁸Bo inggoum puk ahik pah ra kilasioum pare, ‘Tamatang Ualafir,’ ge inggoum pe mung uangoul sira pare, o matahinalik uakap, kara tang siokon siounumpe nami tamatang ualualafir. ⁹Kara hik pah mung kila me tamatane i koto pare, ‘Tamoug,’ ge inggoum pe a tang siokon siounumpe Tamamiuenah i Heuen. ¹⁰Kara hik pah mung pe pare ra kilasioum, ‘Tamata Uleik,’ ge a tang siokon sioun pe nami tamata uleikioum nu Kristo. ¹¹Ge nomi tamata uleik peoum paka uangoul sira pare, nomi tamatang kalekinaleoum. ¹²mMair tamata re kale kai katongoin, inggon ra turung kale uahiuain, doh mai re kale uahiuain, inggono ra turung uairanain.”

**Iesu ke hire tenas niguata uasar
tamatang ualualafir tar ualatut,
doho Parisi tar haua ra uoto guatain**

¹³“Mu tagin teil, inggoumeitir tamatang ualualafir tar ualatut, doho Parisi! Inggoum o tang kokop! Ge inggoum pe mung uoto tur tane puk tasir tamata tar lekame tar Nitoung Heuen, kara hik katongo pah mung lek, doh ahik pono pah mung uamaluana

tasisit ra marang lek. ¹⁴Mu tagin teil, inggoumeitir tamatang ualualafir tar ualatut, doho Parisi! Inggoum o tang kokop! Inggoum pe mung uoto reih tenas manir kuahafisir nimate liu, karung uoto boho tar kotou tar puhpuhung lotunitier barah. Temaene inggoum ra turung heirisioum tar niduh a uleikintieh. ¹⁵Mu tagin teil, inggoumeitir tamatang ualualafir tar ualatut, doho Parisi! Inggoum o tang kokop! Ge inggoum pe mung uoto laere toro laur koutina ro uan ue mung lih i kot tar reihime tar tang siokon siounumper tamata mare kotpokosono nami tamatang uakuakeloum. Doh tar binaka re kotpokosono pare, a tamatang uakuakelouk manas, inggoum mung uoto ualafir uasantiehe tunungua tatanon, kare la tamata uasantiehe liuinguaono tamiuoum tar la i Hel misiana tamiuoum.”

¹⁶n“Mu tagin teil, inggoumeitir kut gesir tamatang uoum keip tasir tamata tar lel! Inggoum o tang kokop! Inggoum mung uoto ualafir pare, gete uamana tolar tamata tena umang lotu God ger dedeil, inggon a inetelik puk. Bo gete uamana to pukulaono tar goul gere moko tena umang lotu God ger dedeil, song pake guata nomana tar haua ke kulain. ¹⁷Inggoumeitir popouluan, karo kut! Ter hauar inete uleikintiehe tar matana God? Ter goul ue na umang lotu God ger dedeil gere uadeteil tar goul? ¹⁸Doh inggoum kung ualafir pono pare, gete ke uamana tolar tamata toro olta, inggon a inetelik puk, bo gere uamana tolaono tar uahung gere mok i rana toro olta, song pake guata sira ke kula pe. ¹⁹Inggoumur kut! Ge hingia per uleikintieh? A uahung ue o olta gero uadeteil tar uahung? ²⁰Temaene

^k23:5 KT 13.9; Aha 15.38-39; Ual 6.8; Mat 6.1 ^l23:11 Mat 20.26; Mak 9.35; Luk 22.26 ^m23:12 Job 22.29; NU 29.23; Luk 14.11; 18.14 ⁿ23:16 Mat 15.14

tar binaka re uamana tolar tamata toro olta, inggon e uamana tola tang roon, doh tar mamang inetelik re pono teil tang roon. ²¹ Doh tar binaka re uamana tolaono tar umang lotu ger dedeil, inggon e uamana tola tar umang lotu ger dedeil, doh tang God gere uangoul tar buturuon. ²² ^oDoh tar binaka re uamana tolar tamat i Heuen, inggon e uamana tola tono tabtabila God, doh tang gere uoto tabila tang roon.”

²³ ^p“Mu tagin teil, inggoumeitir tamatang ualualasira tar ualatut, doho Parisi! Inggoum o tang kokop! Gea mamang nieining koboro penit tar iomo re uoto ualingia tar niein, inggoum mung uoto polaka tar siokor hangaul ro mahar, karung heir toro sioko ro mahara tang God. Bo inggoum puk kung hiliu tar burehenar ualatut uleikir nang Moses misiana pare, tar uakodkodoho tar niuangoul, doha hagaring ueldolom, doha nitagorong mana tang God. Ter ualatutuninanine pake terung uakelukugium, kara hik pah mung hiliu me giniamer hagar uaia pon. ²⁴ Inggoumeitir kut gesir tamatang uoum keip tasir tamat, inggoum mung kusa uanono puk tar ualatutunitir kikitilik, karung bangang duk tar uleikinar ualatut. Inggoum misiana tar tamatetie re banga tar eirieir gere moko teil toro iru, kare uouh liu. Bo ahik pukuono pah ke banga tar tukung kamel gere moko teil toro iru, doh ke inumuon, kare konomo keip uadeilingua.”

²⁵ ^q“Mu tagin teil, inggoumeitir tamatang ualualasira tar ualatut doho Parisi! Inggoum o tang kokop! Ge inggoum pe mung uoto uadelauana puk i kalaharahia tenami kap, doho peileit,

bo i lolono puk tamiuoum ahik tun paha delauan, inggoum o uoun tun tar ninamanang kupal, karung uoto namana puk tatamiu. ²⁶ Inggoumur Parisisitir kut! Mu uadelauana baka uoum tar haua re mok i lolono tar balanar kap, doha peileit, song re delauana pon i kalahar.”

²⁷ ^r“Mu tagin teil, inggoumeitir tamatang ualualasira tar ualatut, doho Parisi! Inggoum o tang kokop! Inggoum pe misiana tar keuetier nibubun tar bubun gaugaul, kara mataia tun tar nibang, bo i lolono puk tar keu ke uoun tar hirousisis ka matmat, doha burehemper ineter beng. ²⁸ ^sTer siokono sira kompe rung uangoul peoum, o tamata ra banga tar tukunumioum, kara namana pare, o tamata uaiaou. Bo i lolono puk tamiuoum a uoun tar hagaring guata kokop, doha hagaring mahang longoro tena ualatut God.”

²⁹ “Mu tagin teil, inggoumeitir tamatang ualualasira tar ualatut, doho Parisi! Inggoum o tang kokop! Inggoum pe mung uoto tuha uaia tun tenas keuir propeit, karung umatmate hamas tonoso keuir tamatisisier kodkodoh. ³⁰ Karung uoto kula pare, ‘Ge pakung uangouloum tar binaka ka uangoulume ro bungumiu, paka hik pah mung poultasisina tar uatading tar deuatingisir propeit.”

³¹ ^t“Doh tar puhonene, inggoum mung kula katongongualasioum pare, inggoum teso bungusuis ka uiliatung pous tasir propeit. ³² Gon, mung uakapa keip baka tar haua ka uakekene keipimein ro bungumiu! ³³ ^uInggoum o soi, karo bung tusur soi! Hapengua marung turung uasiauoum tar binaka re kula God pare, mung laoum i Hel? ³⁴ Doh inggo gine ru

^o23:22 Ais 66.1; Mat 5.34 ^p23:23 NKP 27.30; Mai 6.8 ^q23:25 Mak 7.4

^r23:27 Apo 23.3 ^s23:28 Luk 16.15 ^t23:31 Apo 7.52

^u23:33 Mat 3.7; 12.34; Luk 3.7

hire tamiuoum, inggo u turung heiriha tasir propeit tamiuoum, doho tamatang iate, doho tamatang ualualasira tar ualatut. Bo inggoum puk mung turung uiliatung pous mo gisiameh, karung uakusa mo gisiamehe tar korose, karung halhaluh uauelmahing to mo gisiamehe tenami umang lotu. Karung turung geil liu tur tasisina tonomio uan, kara turung ualongualasina toro giniamhe ro uan. ³⁵vTemaeit a niduh ger eisir tamata geka tung pous tasir tamata uaia, uakekene tur tang Abel e tuka tang Sekaraia ger tuna Berekia, gekung tung pous toioum tar ueltageihinar umang lotu ger dedeil doho olta, e turung pono tamiuoum. ³⁶Doh inggo gine ru hire tun toro mana tamiuoum, a mamang niduhulikininanine e turung pono tasir tamata ra uan-goul daan.”

Iesu ke ueldolomo tasir tamatang Jerusalem

³⁷“Jerusalem, Jerusalem, ingga o uoto uiliatung pous tasir propeit, karo bakbak pous tasisit ke heirihais God totomua. A touihar binaka ku marang kale uiliod-ouito tosnogo tamata misiana tar paolo tinana gere auin tane toso bung tun tar toking pang titiauan, bo inggoum puk ahik pah kung uoto uamaluaana pare, u guato. ³⁸wBang! Gine daan God e hiliu tenami umang lotuoum ger dedeil e turung kalilono tok. ³⁹xDoh gine daanala, inggoum ahik pah mung turung banga baka poluk totoguo e tuka tar binaka getung kuloum pare, ‘God, o guata uaia tatanono gere laha tar hanganar Tamata Noman.”

O Mahar 24

Iesu ke hire tar bureher niduh re turung pokos

24 Doh Iesu ke hiliu tar umang lotu ger dedeil, doh gitie re lang la manasa peon, kara lame no tamatang uakuakelukono tatanon, ka marang uamakoso ualalasila tatanono toro tuha uma ka tuhaig toro umang lotu ger dedeil. ²yDoh Iesu ke hire tapokis tasisina pare, “Mu banga toro uma uakapanine? Inggogine ru hire tamiuoum pare, ahik mo sioko ro palaua ro turung toko uaponola me giniamhe. A palaua uakapa tun ra turung baka uahiuag.”

³Gitie ke tabila uahiu pe Iesu tar Siusan i Oliv, doh no tamatang uakuakelukono ka lame tatanon, kara me dangata uanomo tatanono pare, “Hire tamiueim, mangiha re turung kotpokosor inetenanine, doh kaein me uaparoko re turung uahire uoum tar binaka ro turung tapokisimea, doh tar binaka re kapar kot?”

⁴Doh Iesu ke hire tasisina pare, “Mu tagin teil geta uelourusiuom. ⁵zGe o burehe per tamata ra turung lame, ra keip teil tar hangougou, kara me hire pare, ‘Inggogine te Kristo,’ kara turung uelour mo bureher tamat. ⁶Doh inggoum mung turung longoro me uiliatung, doh me uelhireng uiliatung, bo ahik pukuoum pah mung sokor. Ginin e turung kotpokos, bo ahik pukunin pah tere turung uahire pare, ke uahuhutung kapar kot. ⁷Doho pang uan ra turung ueluiliatungeis me ro giniamhe ro pang uan, doho pang uan uleik ra turung ueluiliatungeis me ro giniamhe ro pang uan uleik, doha gog doha nun e turung kotpokoso toro butur ueltebeir. ⁸Gininar inetenanine

^v23:35 Uak 4.8; 2OUTT 24.20-21 ^w23:38 1To 9.7-8; Jer 22.5

^x23:39 Ker 118.26 ^y24:2 Luk 19.44 ^z24:5 Mat 24.23-24; 1Jo 2.18

e turung kotpokoso tar kot ngohina re uakekene per uelmahingina ro poh.”

^{9a}“Tar binakon inggoum ra turung kusesioum, kara keipisoum tar uelkodoh, kara heirisoum me niduh, kara tung pousioum, doho mamang uan uakapa tar kot e turung tokouasais tamiuoum, teene rung uakeluk pe inggoum totoguo. ¹⁰Doho bureher tamat e turung punga res nitagorong mana tar binakon, kara turung tangana katongois tosnosio uelmatan, kare uelueltokouasais. ^{11b}Doho bureher propeit bohoboh ra turung kotpokos, kara uelour mo bureher tamat. ¹²Doho bureher tamata ra turung hiliu tar hagaring malauelhir tar tang giameh, teene a hagar uasa e turung kotpokoso uauleik. ^{13c}Bo mai pukur tamata re tur uapopokoh e tuka tar uadouhinar marein, inggono tere turung uelkarusin God. ^{14d}Doho Uelhire Uaia tena Nitoia God ra turung uelhire tauetein toro mamang uan uakapane i kot mara longoro toro mana tang Iesu, dohi muduhia kompe e turung kapar kot.”

A inete uasa tun e turung kotpokos

^{15e}Iesu ke kula poluk pare, “Inggoum mung turung banga tar inetonene ke kulkulamein propeit Daniel. Inggono ke kula pare, ‘A Tamata Uasantiehe Tun Ger Mamantou e turung uatur tar inete ger ualangong iuma tar umang lotu ger dedeil mare mamantouo tatanon.’ Maia ro timana toro uelhire rone pako namamana hamas, karo naman manate a huar tengkan. ¹⁶Tar binaka ra bangar tamatasit i Judia e kotpokosor puhon, kara ualo liu ualahurunguala toro siusan. ^{17f}Doha tamata gere uangoul tar

kukuna um, ahik pahe hiuo uelhir baka poluk tar la kale tar huar inete re moko tena um. ¹⁸Doha tamata gere uangoul tar iom, inggono ahik baka poluk pahe la tapokis tar la kale tono hikhiku. ¹⁹Doh kuasalik tunur kuaha balakos, doh gisis ra uahuh tasir guam tar binakonene! ²⁰Mu dangata tenami lotu tang God mara hikir inetinanine pahe turung kotpokoso to tar binakang malahong ue a panguhua uleik ue tar Mareining Pepe Uah. ^{21g}Ter hauon, tar binakanin e turung kotpokosor niduhuntiehe tun, e uakekene tur tar binaka ke tuha God tar mamang inetelik e me tuka daan, kara hikingua baka poluk me niduh sira re turung kotpokos. ²²Toro mana tun geta hikir Tamata Noman pahe uapouhina tar binakanin, o tamata uakapa ra turung siokor mamantouis. Bo inggon e namanantiehe tun tasir tamata geke kedangasiono sioun, temaene re turung uapuhinono tar binakanin.”

^{23h}“Doh gete me tang siokor tamata re hire tamiuoum pare, ‘Bang! Gine deh te Kristo,’ ue e hire pare, ‘Gila dehon!’ Ahik pah mung tagorong mana tatanon. ²⁴ⁱGe o Kristo bohoboho pe, doho propeit bohoboho pono ra turung kotpokos, doh gisina ra turung guata tar niuaparoko uleik, doha ineteng ualutara mara uelour tasir tamat, doh geta matotosin, gisina ra uelour pono tasir tamata geke kedangais God.”

²⁵“Mu ualongor! Inngo ku hire baka uoum tamiuoum sioun. ^{26j}Temaene geta kulasioum pare. ‘Bang, inggono dehe uangoul tar butur paden,’ doh inggoum ahik pah mung la tar buturuon ue geta kulasina pare, ‘Bang, inggono deh gine re uangoul iuma tar um!’ Inggoum ahik

^a24:9 Mat 10.22 ^b24:11 Mat 24.5,24; 1Jo 4.1 ^c24:13 Mat 10.22

^d24:14 Mat 28.19 ^e24:15 Dan 9.27; 11.31; 12.11 ^f24:17 Luk 17.31

^g24:21 Dan 12.1 ^h24:23 Mat 24.5

ⁱ24:24 Ual 13.1-3; 2Te 2.8-9; UGO 13.13-14 ^j24:26 Luk 17.23-24

pah mung tagorong mana tenas menesin. ²⁷^kGe a Tunar Tamata pe e turung la sirame tar kanaua gere bala koutula tar langit uakap, e uakekene tur tar butur re harhara turuhar pisar, kare la bala uatukako tar butur re la hukor pisar. ²⁸^lGea butur pe re rikinir tukunumar mat, ra ate toin, teene ra uangoul toto per pasukadau.”

²⁹^m“I muduhia kompe tar binaka uasaninanine, a pisar ahik pahe turung pid, doha bialok ahik pono pahe pid. Doho pitopit ra turung punga turuha i ran,

doha mamang inetelik i ran e turung gun. *Aisaia 13.10; 34.4; Joel 2.10,31*

³⁰ⁿSong re turung kotpokoso na uahirer Tunar Tamata tar langit, doha mamang matina tamata uakapane i kot, ra turung kiringetie ra banga to manasa pela tar Tunar Tamat e lame tar mahar langiting Heuen menia tena nitampopokoh a uleikintieh, doha uleikinar uiniator a mataia tun. ³¹^oDoho tuil o turung urunguntiehe tun, kare turung ualatuono tosono anggelou ra la kale toto tosono tamatono geke kedangais o nan. O anggelou ra la kale tur tasir tamatasina toro mamang buturulik e la uatuka tar surunar pang uan i kot.”

Iesu ke uelhire uaranga toro douk, ra kilain o fig

³²Doh Iesu ke hire poluk pare tasisin, “Inggoum mung banotong kale niate tur tar uelhire uaranga toro fig. Roon o ualasira tamiuoum pare, tar binaka re tuiantar ranan, kare uakoupur kamanan,

inggoum mung ate manas, a binaka uaia, kara binakang pispisar e uahuhutung kotpokos. ³³Ter siokono komper hagar getung bangoum tar ineteninanine, inggoum mung ate manasa pare, a binakono ke uahuhut manasain, e marang uakekene manas. ³⁴^pDoh inggo u uamana tun tamiuoum, tar binaka halanar tamatang tar binakono ta mate uakap tere kotpokoso tor mamang inetelikininanine. ³⁵^qI ran, dohi kot ura turung kapa liu, bo nogo uelhireo ahik paho turung kapa liu tagu.”

Ahik me tamata re ate tar binaka re kotpokosor ineteninanine

³⁶^r“Ahik me tamata re ate tar marein, doh tar binaka re kotpokosor ineteninanine, doha anggelousinah i ran ahik pono pah ra ate, doha Tuna God^{‡‡} ahik pon, bo te Tamana pukuono tere ate. ³⁷^sA hagar geka guatainir tamata tena binaka Noa ter siokono polukumper hagar ra turung guatainisina tar binaka re kotpokosor Tunar Tamat. ³⁸Tar binaka halanar koto te siluin o tamata ka ein, kara inum, doho bulout, doho kuah ka ueluelee e tuka tar marein ke panete pe Noa tena bout. ³⁹^tKara hik dedempe pah ka bang paroko me inet e tuka ko kotpokoso pe ro silu uleik, karo me reih liu tasisina uakap. Ter siokono sira komper hagar re turung kotpokoso tar binaka re lamer Tunar Tamat. ⁴⁰Tar binakon a toking tamat ura turung kalekinale tar iom, doha tang sioko ra turung kale liuin, kara hiliuinir tang giameh. ⁴¹Doha tang torikir kuah ura soko tar plauang bereit,

^{‡‡}**24:36** O gisiamer tamatang iate ra namana pare, a puhung uelhirenene, “doha Tuna God ahik pon,” taboinene.

^k**24:27** Mat 24.37-39

^l**24:28** Luk 17.37 ^m**24:29** Isk 32.7; 2Pi 3.10; UGO 6.12-13 ⁿ**24:30** Dan 7.13; Sek 12.10; UGO 1.7 ^o**24:31** 1Ko 15.52; 1Te 4.16 ^p**24:34** Mat 16.28 ^q**24:35** Mat 5.18 ^r**24:36** Apo 1.7; 1Te 5.1-2 ^s**24:37** Uak 6.5-8 ^t**24:39** Uak 7.21-23

doha tang sioko ra turung kale liuin, kara hiliuinir tang giameh. ⁴² ^uTemaene inggoum mung uakuakeis, ge inggoum pe mung tele tar marein re lamein nami Tamata Noman. ⁴³ ^vMu namana dede tar puhene gete ate uamatoto tanener uma tar binaka re lamer ueuenau, inggon e turung uakuakeis, kara hik pahe uamaluane e polakar ueuenau tena umon. ⁴⁴ Ter siokono sira kompe, inggoum pono mung uakuakeis, karung kaleuatoro ponosiuom, ge a Tunar Tamata pe e lame tar binak ahikioum pah mung ate teil tena nilameon.”

O uelhire uaranga tar tamatang kalekinale uaia, doha tamatang kalekinale uasa

⁴⁵ Doh Iesu ke kula poluk pare, “Mair tamatang kalekinale na ninamana uaia, kara longlongoro uaia dede tar mamang binakalik? Inggono ter tamata geke uamokoin na tamata uleik tar kaueke tasir gisiamer tamatang kalekinale tar heir teresi nieinisina tar binaka ka uamoko uamatotoin. ⁴⁶ A tamatang kalekinaleone e banotong uaha tun gete tapokisime na tamata uleik, kare me banga re kalekinale peono tar kalekinaleone ka uamoko uatuhain tatanon. ⁴⁷ ^wInggone gine ru hire toro mana tamiuom, a tamata uleik e turung uamoko tatanono tar kaueke tena mamang inetelikion. ⁴⁸ Bo ge pakene a tamata uasar tamatang kalekinaleone, kare kula katongoin pare, ‘Nag tamata uleikio ahik pahe uolong lame.’ ⁴⁹ Kare uakekene tar halhaluh toso uanoton, kare la ein, kare inum tagu tasisitie ra uoto inumuntiehe tar inum popokoh, ⁵⁰ Song re la turung tapokisime na tamata uleikiono me marein re teleion, doh tar binak ahikiono pahe ate pare, e lameon. ⁵¹ Doh

na tamata uleikion e turung mamantouo tununguampe tatanon, kara baka liu tagulain tasir tamata gesir tang kokopo tar butur ra kiring tor tamat teit ra nimaliana pe, kare uelmahingis.”

O Mahar 25

O uelhire uaranga tasir siokor hangaulur kuaha kalan

25 ^xDoh Iesu ke hire poluk pare, “Tar binakon a Nitotiangu Heuen e turung misiana tasir siokor hangaulur kuaha kalana geke siokor kale tenas lam tar la ueltupara to tar lele tar buloutene re turung le. ² A tantolima tasisin ahik paho naman manate, doh gisisir gime tantolima tesir naman manate. ³ Gisis ahik paho naman manate ka kale tenas lam, bo ahik puk pah ka kale me giniamer uaiuai mara hedongig i muduhia. ⁴ Doh gisisir naman manate ka itu tenas giniamer uaiuai tar botol, kara kale keip tenas lam. ⁵ Doh gitir bulout ahik pah ke uolong pokos, temaene gisisir kuaha ka susua tabil manasampe, kara hohou. ⁶ Doh nar uantinaninar boung tun ka longorosina tar tamat e kula ualeik pare, ‘A bulout gere le gine manase! Mu lame, karung la ueltupara to tatanonala tar lel.’”

⁷ “Kara siokor guletenguar siokor hangaulur kuahasin, kara kaleuatoro manasampe tenas lam. ⁸ Doho kuahasin ahik paho naman manate ka kula pare tasisisir naman manate, ‘Mu heir baka me giniamer uaiuainitir namiu tamiueim, ge inggeim pe ke biolo nami lam.’ ⁹ Bo gisis pukur naman manate ka kula tapokis tasisina pare, ‘Doh geti uelpakah dehe inggeig, ginin ahik pahe la turung uelmatout tagigeig uakap,

^u24:42 Mat 25.13 ^v24:43 Luk 12.39-40; UGO 16.15

^w24:47 Mat 25.21,23 ^x25:1 Luk 12.35; UGO 19.7

mung la tar situa, karung la bulaua menamiu.”

¹⁰“Temaene song ka la bulauasina tenas uaiuai, doh tar binaka tabo harahaisisina teke pokoso tor buloutene re le. Doho tantolimar kuaha geke kaleuatoro teka me leka tagu uoum tatanono toro niein uleik toro le, kara holoroin ro pirpirik. ¹¹ʻI muduhia ka pokoso kalehesisir gisiamer kuah, kara me kula pare, ‘Ir Tamata Noman, Ir Tamata Noman, puka ueleheir baka tamiueim toro pirik!’ ¹²ʻBo ke kula tapokis pukuono pare, ‘Ahik nomanampe, inggo u tele tamiuoum.’”

¹³ʻKare la uakapa to Iesu tena uelhire pare, “Temaene inggoum mung uakuakeis, ge inggoum pe mung tele teil tar marein ue tar binaka re lameinir Tunar Tamat.”

**Iesu ke uelhire uaranga tar
tamatang kalekinale uaia, doha
tamatang kalekinale uasa**

¹⁴“Tar binakon, a Nitoiang Heuen e turung misiana tar tamata geke marang la baka tar gime uan e uaireh, bo ke kila toto baka pukuono tosno tamatang kalekinale, kare heir tasisina toro kalekinale tar kaukeke tena manion, doh tena mamang inetelik. ¹⁵ʻTar tang siok tang sioko tasisinasine, inggono ke heir kahakaha tenas kalekinalesin, re banga to pe tenas nikalekinalesin. Tar tang siok inggono ke heir tar tolimar mani, doh tar tang giameh inggono ke heir tar torikir mani, doh tar tang giameh ke heirono tar siokor mani, song ke la. ¹⁶Doh gitir tamata geke kale tar tolimar mani ke la uateuelengua, kare la kalekinale keip tar manionene, kare uakotpokoso uanoto poluk tar giameher tolimar mani. ¹⁷Kara siokono sira kompe ke guata

pono per tamatetie geke kale tar torikir mani, ke la uakotpokoso uanoto pono tar giameher torikir mani. ¹⁸Bo gitier tang giamehe geke kale tar siokor mani, ke la kompe, kare la koho tar tung i kot, kare u tane tena mani na tamata uleik.”

¹⁹“I muduhia ke la baka per puhung barah, nas tamata uleikisina ke tapokisime, kare me bangeaha manas, hape ka guata keip pesina tar mani. ²⁰Doh gitir tamatang kalekinale geke kale tar tolimar mani, ke lame, kare me heir tar uagiamehenar tolimar mani. Kare kula pare, ‘Ingga ko heir totoguo tar tolimar mani. Bang! Tar maniene ku uakotpokoso uanotoio, inggo ku uakotpokoso uanoto poluk tar giameher tolimar mani.’ ²¹ʻKare kula na tamata uleikono pare, ‘Ingga ter tamatang kalekinale uaia, kara longlongoro uaia tun, kara tang kalekinale keip tar inete kikitilik, temaene inggo u uamokongua totomua o kaukeke me bureher inet. Auia, lame karo me uaha uelkout totoguo.’”

²²“Song ke lamer tamatang kalekinaleetie ka heirin tar torikir mani, kare me kula pare, ‘Tamata Noman, ingga ko heir totoguo tar torikir mani. Bang! Rasine ter gime torikir mani ku uakotpokoso uanotosio.’ ²³Kare kula na tamata uleikono pare, ‘Ingga ter tamatang kalekinale uaia, kara longlongoro uaia tun, doha tang kalekinale keip tar inete kikitilik, temaene inggo u uamokongua totomua o kaukeke me bureher inet. Auia, lame, karo me uaha uelkout totoguo.’”

²⁴“Maait ke la kalehemeeitier tamatang kalekinale geke kale tar siokor mani, kare me kula pare, ‘Ir tamata uleik, inggo u ate totomua a tamatang uelhire uapopokoho tar inet, o uoto ueuere toro iomonitie ka lebeigir

^y25:11 Luk 13.25-27 ^z25:12 Mat 7.23 ^a25:13 Mat 24.42

^b25:15 Roum 12.6 ^c25:21 Mat 24.45-47; Luk 16.10

gime tamat, doh tar mahar kotonitie ka uasisir gime tamata tar uatun, ingga tero me uoto lous tar uauan. ²⁵ Temaene inggo ku sokor, karu la puk manas, karu la touaouo tenang mania i lolono tar kot. Bang! Ginine tenang mania geko heir bakaig.”

²⁶ “Kare kula na tamata uleikono pare, ‘Ingga ter tamatang kalekinale uasa tun, kara pul! Ingga ko ate pare, u uoto ueuero toro iomonitie ahik pah teku leblebeig, karu uoto kale toto tar nieininitie ahik pah teku uasisig. ²⁷ Doh maene ahikia pah ko uamokola tenag manio tar umang mani mare geru tapokisimeo u me banotong kale tapokis tenag maninine menia keip me giniamer mani geke kotpokos?’ ²⁸ Temaene, mung kale liuoum tar manionene tatanon, karung heir tar siokor mani tar tamatang kalekinale geke kale tar hangaulur mani. ²⁹ ^dGe tasir tamata uakapa pe ge nas giniamer pukur inet, inggo u turung heir baka poluk me giniamer inete tasisin, kare turung burehenguaisisin. Bor tamata ge ahik tun mena inet ue na iinetelik pukumpe, ginina ra turung kale liu tur kompeig tatanon. ³⁰ ^eDoh tar tamatang kalekinalener pul, inggoum mung baka tauetelala tatanono i kalahara tar kitkitupun tar butur ra kiring tor tamat, teeit ra nimaliana pe, kare uelmahingis.”

A Tunar Tamat e turung kedanga tasir tamat

³¹ ^f“Tar binaka re turung tapokis polukumer Tunar Tamata ger toia menia tena uiniator, doh no angelou uakapa tun, inggon e turung tabila tonoso tabtabilar toia tar kedanga tasir tamat. ³² ^gDoho tamata uakapane i kot ra tu-

rung la toto tatanon. Kare turung pakahono tasir tamata tar torikir toto misiana kompe re uoto pakaha liu per tamatang kaukaeuke tasir sipsip, e pakaha liu tur tasir sipsip tasir meme. ³³ Inggon e turung uamoko tasir sipsip tar pang mua, doho meme tar pang kais. ³⁴ Kare kular toia tasisit tar pang mua pare, ‘Inggoumeit ke guata uaiais Tamouguo, mung me kale tar Nitoia ke kaleuatoroin God tamiuoum, doha niuamatoto tanika manasampe tamiuoum sioun tar binaka ka touoinir kot. ³⁵ ^hTeene sioun inggo ku gog, karung ualaeinoum totoguo, karu malainum, karung heiroum totoguo tar kodom, kara peng tar gime uan, karung keipoum totoguo tonomio um. ³⁶ Ku palapal, karung ualohoum totoguo, karu momouh, karung me kauekoum totoguo, ku uangoul tar karabus, karung me ruh koutoum totoguo.”

³⁷ “Doh gisisir tamatar kodkodoho ra turung hire tapokis tatanono pare, ‘Ir Tamata Noman, mangiha king bangeim totomua, o gog, karing ualaein totomua ue o malainum, karing heir totomua me kodom? ³⁸ Mangiha tunumpe king bangeim totomua a peng tar gime uan, karing keip ualeka totomua tonomio um ue king banga totomua a palapal, karing ualoho totomua? ³⁹ Mangiha tun king bangeim totomua ko momouh ue ko uangoul tar karabus, karing la ruh kouteim totomua?’ ⁴⁰ ⁱDoh gitir toia e turung hire tapokis tasisina pare, ‘Inggo gine ru hire tamiuoum, hingiamper binaka kung guata uaiia inggoum tar hagarinine me tamata toso bung tahiguosiner kikitilikintieher hangas, inggoum kung guata tola totoguo.”

⁴¹ ^j“Kare turung kulono pare tasisit tar pang kais pare, ‘Mu uareingane totoguo,

^d25:29 Mat 13.12; Mak 4.25; Luk 8.18 ^e25:30 Mat 8.12; Luk 13.28

^f25:31 Mat 16.27; 19.28 ^g25:32 Isk 34.17; UGO 20.11-13

^h25:35 Ais 58.7 ⁱ25:40 NU 19.17; Mat 10.42; Mak 9.41 ^j25:41 Mat 7.23

ge mung turung kale peoum tar ineter sa geke heirin God tamiuoum, karung la toro hue ke kaleuatoroin Satan mesno anggelou. ⁴²Ge sioun pe, inggo ku gog, bo inggoum puk ahik pah kung ualaein totoguo, ku malainum, kara hikoum pah kung heir totoguo me kodom. ⁴³Kara peng tar gime uan, doh ahikoum pah kung keip ualeka tonomio um, ku palapal, kara hikoum pah kung ualoho totoguo, ku momouh, karu uangoul tar karabus, kara hikoum pah kung me ruh kout totoguo.”

⁴⁴“Kara turung kula tapokisisina pare tatanon, ‘Ir Tamata Noman, mangihar binaka king bangeim totomua, o gog ue o malainum ue a peng tar gime uan ue a palapal ue o momouh ue o uangoul tar uih, kara hik pah king poul totomua?’ ⁴⁵Kare turung kula tapokisir toia pare, ‘Inggo gine ru hire tamiuoum, hingiamper binaka kung deoum matung poul me kaluasine ro bung tahiguor tabo hangas, inggoum kung de matung poul totoguo.’ ⁴⁶^kGisinasine tera turung kulais ra la tar butur re mokor uelmahing uleik tun ge ahik pahe kapa tagu, bo gisitir tamatar kodkodoh tera turung la tar butur re mokor nituang tar mamang binakalik.”

O Mahar 26

Noso mamahoholikir pater, doh mamahoholik ka uelhote tar tung pous tang Iesu

26 Tar binaka ke ualasira uakapa Iesu tar mamang inetelikininanine, kare kula pare tosno tamatang uakuakeluk, ²¹“Inggoum mung iate pare, a torikir marein puk manasa rasit ura mok, karo kotpokoso

ro niein uleiking Leke Liu ro Mat. [¶] Kara turung uamokoinir Tunar Tamata tar limasir uelmatan, kara turung uakusein tar korose.”

³Tar binakon, o mamahoholik, doh nosio mamahoholikir patere ka la toto tena uma uleikir patere uleik, ger hangana tang Kaiapas. ⁴Kara uelhote tar sir me hagar mara kusa uanomo tang Iesu, song ra tung pous tatanon. ⁵Bo ka kula pukusina pare, “Inggeig ahik pahi banotong guata to tar puhono tar mareining lotu uleik geta bangar tamat, kara nimalian, kara uatentur me ueluelkoi.”

A kuaha ke ding to i Betani tar uaamiamuh toro luna Iesu

⁶Iesu ke uangoul i Betani, tena uma Saimon ger toba baka sioun. ⁷^mGitie re ein tabila pe Iesu, kare la keipimer kuaha tar botolo mataia e moko teilir uaamiamuh, a i ranantieher bulauan, kare me dingila toro luna Iesu. ⁸Doho tamatang uakuakeluk ka banga tar puhonene, kara nimalian, kara uelueldangateis pare, “Ae maene ke ueluelour pukuono tar amiamuh e la? ⁹A uaamiamuhono paka uabulauain mara kalein me uleikir mani, kara heirin tasir tiome.”

¹⁰Bo Iesu puk e atensioun manasa tar haua ra kulkulainisin, maeit ke kula pare, “Dehen tung heirheir me niduh tar kuahene, ge inggono pe ke guata tar hagar uaia tun totoguo. ¹¹ⁿTar mamang binakalik, o tiome ra turung uangoul tagu tamiuoum, bo inggo ahik pahu turung uangoul keip tamiuoum tar mamang binakalik. ¹²A haua ke guataion totoguo, ke ding pe tar uaamiamuh, teke guata tar kaleuato tanika tar tukunuguo tar keu. ¹³Inggo u uamana tun tamiuoum,

[¶]26:2 Leke Liu ro Mat a Pasova.

^k25:46 Dan 12.2; Jon 5.29 ^l26:2 KT 12.1-27; Mat 20.18

^m26:7 Luk 7.37-38 ⁿ26:11 Ual 15.11

iamper buturane tar koto uakapa ra uelhire tauetein ro Uelhire Uaia rone, tar haua ke guatainir kuahene ra turung ueluatatain tar namana dede tatanon.”

Judas ke uauia e tangana tang Iesu tar limas nosio mamahoholikir pater

¹⁴Doha tang sioko tasir siokor hangaul, doha tang torikir tamatang uakuakeluk a hangana tang Judas Iskariot ke la tasir patere uleik. ¹⁵°Kare la kula pare, “A haua rung turung heirioum totoguo getu tangano tang Iesu tar limamiuoum?” Doh gisina ka heir tatanono tar touonor hangaulur mani silva. ¹⁶Kare uakekene turungua tar binakonene, Judas ke sirsir manasa me lele hape mare tangana tang Iesu tar limasisin.

**Iesu ke ein toro niein uleiking
Leke Liu pe ro Mat mesno
tamatang uakuakeluk**

¹⁷P^TTar uakikilanganar mareining toro niein uleik ra kilain O Bereit Ahik me Is. O tamatang uakuakeluk ka lame tang Iesu, kara me dangata pare, “Ia me butur ro malara ingga, mi kaleuatoreim maro me ein to ingga toro niein uleiking Leke Liu pe ro Mat?”

¹⁸Doh Iesu ke hire tasisina pare, “Inggoum mung la i koboro tar uan uleikela, karung la tar tamatene, karung hire pare, ‘A Tang Ualasis ke kula pare, Na binakono ke uahuhut manasain. Inggo mesnogo tamatang uakuakeluk mi me turung ein to tenang uma toro nieining Leke Liu pe ro Mat.” ¹⁹Maait o tamatang uakuakeluk ka guata sira manasa ke ualatoho pe Iesu, kara kaleuatoro toro niein roon.

²⁰Gitie ke reiu manasa peon, Iesu mesno siokor hangaul, doha tang torikir

tamatang uakuakeluk ka tabilang ein. ²¹Doh gitie ra ein tabil pesin, kare kula Iesu pare, “Inggo u uamana tun tamiuoum, a tang sioko tamiuoum, e turung tangana totoguo tar limasir uelmatan.”

²²Doho tamatang uakuakeluk ka longoro tar puhonene, kara ueldolomon-tiehe tun, kara dangdangata uelture kompela tatanono pare, “Ir Tamata Noman, inggoono?”

²³°Kare hire tapokis Iesu pare, “A tamata gere turung tangana totoguo tar limasir uelmatan, teene re turung uahu tagu totoguo tono mahar bereit i lolono tar nouh. ²⁴A Tunar Tamat e turung mat misiana sira kompe ro kulkula teil pe no uelhire God, bo kuanalik tunur tamatene re turung tangana tatanono tar limasir uelmatan. Paka uiantiehe ge pakene ahikir tamatonene pah ka pohoin.”

²⁵Doh Judas ter tamata gere tangana tatanono tar limasir uelmatana ke kula pare tatanon, “Ir Tamata Noman, inggoono?” Kare hire tapokis Iesu pare, “Te paara ro kula sira peme ingga.”

**Iesu ke ein keip tosno tamatang
uakuakeluk toro uadouhina ro niein**

²⁶Gitie ra ein pesin, Iesu ke kale toro bereit, kare heir tar uatakai tang God, kare pis pakah, kare heir tang roono tasir tamatang uakuakeluk, kare kula pare, “Kale, karung ein, roono rone a tukunuguo.”

²⁷Kare kaleono tar kap bino, kare heir tar vatakai tang God, kare heir tar kap tasisin, kare kula pare, “Inggoum uakapa mung kale, karung inum to tar kapene. ²⁸r^{Ge} ginine pe ter deuatinguo gere uahail tane tar timuhur uelhote, doh gera uatadingig tasir bureher tamata mare kuse luara God tenas niguata uasasin. ²⁹Inggo gine ru hire

°26:15 Sek 11.12; Jon 11.57 P26:17 KT 12.14-20 ¶26:23 Ker 41.9

r26:28 KT 24.8; Jer 31.31-34; Sek 9.11; 1Ko 10.16

tamiuoum, inggo ahik pahu turung inum baka poluk me bino e tuka tar marein ru inum taguo tar timuhur bino tamiuoum iuma tena Nitoia Tamouguo.”

³⁰ Song ka keresina toro kereker, kara lala tar Siusan i Oliv.

Pita e turung uolih e tele tang Iesu

³¹ Song ke hire Iesu tasisina pare, “Tar boungon, inggoum uakapa tun mung turung ualo liu, karung hiliu totoguo, ter haouno no uelhire God ko kula pare, ‘God e turung uiliatung pous tar tamatang kaukaeuke tasir sipsip, kara turung ualualo ueltebeiringuar sipsip.’ *Sakaraia 13.7*

³² Bo tar binaka puk ra uatua tapokisio, inggo u turung uoumula i Galili.”

³³ Doh Pita ke hire tauete pare, “Geta siokor tagorong bohosina totomua, kara hiliu, inggo ahik nomanampe pahu turung hiliu tagu totomua.”

³⁴ Doh Iesu ke kula pare tang Pita, “Inggo u uamana totomua, daana tar boung tar binaka halanar paolo te koror, ingga o turung uolih uatouono pare, o tele totoguo.”

³⁵ Doh Pita ke kula uapopokoho tapokis pare, “Inggo ahik pahu banotong kula pagiar! Auia teilimpe getu mate taguo totomua.” Doh gisisir gisiamehenar tamatang uakuakeluk ka siokor kula sira pon.

Iesu ke lotu tang God i Getsemani

³⁶ Doh Iesu mesno tamatang uakuakeluk ka la tar butur ra kilain i Getsemani, kare kulono tasisina pare, “Mu tabilane geru la bakala inggoala, u la lotu.”

³⁷ Doh ke kale taguono tang Pita, doha toking tuna Sebedi nu Jems me Jon. Doh Iesu e hagouo manasa pare, e

ueldolomontiehe tun, kare hagouo uas-antieh. ³⁸ Kare hireono tasisina pare, “O balouguo o duhantiehe tun u hagouo sira pare, u uahuhutung mata tar niueldolom. Mu uangoulane, karung uakuakeis tagu totoguo.” ³⁹ Kare la sikoro baka polukulaono tar sikin, kare baka uahiuain, a porenon e bangako i kot, kare lotu pare, “Tamoug! Ge pare banoton, o kale liu tar kapang uelmahingene totoguo. Bo inggo u uakeluk puk tereng nimalara, ahik pah tereg nimalaro.”

⁴⁰ Doh Iesu ke la tapokisime tasir tantouong uakuakeluk, kare me tupara tasisina ra hohouo kompe, kare kula pare tang Pita, “Hapeono maene ahikioumur tang touono pah kung banotong uakuakeis tagu totoguo me sikir barahar binak? ⁴¹ Uakuakeis dede, karo lotu tang God mara hikia paho punga tar uatolau. A iabener tamat e malar e uakeluk tena nimalara God, bor tukunun a malmaluan.”

⁴² Doh Iesu ke la poluk tar uatorikinar binak, kare la lotu pare, “Tamoug! Geta hikir kapang uelmahingene pah ra banotong kale liuin e tuka getu inumo tatanon, auia, reng nimalara.” ⁴³ Ke tapokis polukumeon, kare me tupara tasir tamatang uakuakeluk ra hohou polukumpe, teene gisina ke duhantieher matas tar matahohou, kara hik pah ka banotong gulgulete uangoul.

⁴⁴ Maeit Iesu ke hiliu poluk tasisin, kare la lotu poluk, a uatouonono manasar binak, ke la kotouo polukumpe tar siokonor puhung uelhire. ⁴⁵ Song ke tapokisilaono tasir tamatang uakuakeluk, kare kula pare, “Mu hohouo harahampeoum, karung pepe uaha? Bang! A binaka ke pokoso manasa tar Tunar Tamata ra tanganain

^{26:30} Luk 22.39; Jon 18.1 ^{26:31} Jon 16.32 ^{26:32} Mat 28.7,16

^{26:34} Mat 26.69-75 ^{26:38} Jon 12.27

tar limasir tamata uasa. ⁴⁶xMu tentur geri laeig! Bang! A tamata gere turung tangana totoguo gine manase!”

Iesu ka kusein

⁴⁷Iesu e mene haraha tar binaka ke me pokoso Judas ger tang sioko pono tasir siokor hangaul, doha tang torikir tamatang uakuakeluk. Doho manai tamata ra la teil tagu tatanono menia keip tenas baenat, doha pus. Gisina ka ualatueisir patere uleik, doh nosio mamahoholikir Ju. ⁴⁸Doh Judas geke tangana tang Iesu, ke heir tanika baka tar puhung uahire tasisin pare, “Hingiar tamata ru nguhuo, inggono teon. Inggoum mung kusa tane tatanon!” ⁴⁹Doh Judas ke la uakodkodoho kompeha tang Iesu, kare me kula pare, “Ir Tang Ualafir,” kare la nguh tatanon.

⁵⁰Doh Iesu ke kula pare tatanon. “Kaloug, a inete gero lang guataia, guata manas.” Song ka lahasisir manai tamat, kara me kusa uanono tang Iesu. ⁵¹yDoha tang sioko tasisin ra tur tagu tang Iesu, ke reih tauete tono baenat, kare tok-out liu tar talingana na tamatang kalek-inaler patere uleik. ⁵²zDoh Iesu ke kula pare tatanon. “Uamoko tapokis tonongo baenat tena butur. O tamata gera uiliatung keip toro baenat, gisina tere turung uamateis ro baenat. ⁵³Inggoum herung tele pare, inggo u banotong dangata tang Tamoug mare heirihaono mo burehentieher angelou mo burehe uain tar siokor hangaul, doha torikir pang tamatang uiliatung, tar me poul totoguo? ⁵⁴Bo ahik puk, ter hauon, hapengua mare kotpokoso nomanar puh gere kulkula teil tono Uelhire God pare, a puhon e turung kotpokos?”

⁵⁵aSong ke kula Iesu pare tasir manai tamat, “Ue, ge inggoum pe kung la keip-

ime tenami baenat doh nami pus marung me kusa sira totoguo ngohina tar tamatetier ueuenau ue a tang uiliatung? A mamang marein ku tabilo, karu ualasila to tar umang lotu ger dedeil, kara hikoum pah kung kusa totoguo. ⁵⁶Bo a puh pukuninanine ke kotpokoso mare manar puhung uelhire ka boloigir propet.”

Doh no tamatang uakuakelukono ka siokor hiliu tatanono kara ualo liu.

Iesu e tur tar matanar kaunsol

⁵⁷Doho tamata geka kusa tang Iesu, ka keipila tatanono tena uma uleik Kaiapas, ger uleikir patere tar butur ra uangoul totor tamatang ualualasila tar ualatut, doho mamahoholik. ⁵⁸Doh Pita ke la uakeluk sikoro bakampela tang Iesu i kalaharahia tar buturung uangoungoul, kare la lek i koboro tar buturung uangoungoul tena umar patere uleik, kare la tabila tagu tasir tamatang kaukaueke tar umang lotu ger dedeil mare banga hape re turung kotpokoso pe me puh. ⁵⁹Doho patere uleik, doho kaunsol uakapa tun ka sirsir mo tamata gera me boho tola me inete ke guatain Iesu mara banotong tung poususin tatanon. ⁶⁰Bo ahik puk pah ka banotong tupara me puh. Gitiempe ka tur tauete pe mer bureher tamat, kara boho tola tatanono tar puhpuhung uelhire. Ahik tunumpe pah ka banotong tupara me puh ke guataion mare banoto tasisina tar uiliatung pous tatanon. Bo i muduhia puk, a tang torikir bulout kura tur tauet, ⁶¹bkaura kula pare, “A tamata dehene ke kula pare, ‘Inggo u banotong mamantouo tena umang lotu God ger dedeil, karu tuha tapokis kompe tatanono tar touonor marein.”

⁶²Doh nas uleikir patere ke tur kai, kare kula pare, “Ahika menang puh tar

^x26:46 Jon 14.31 ^y26:51 Jon 18.26 ^z26:52 Uak 9.6; UGO 13.10

^a26:55 Luk 19.47; 21.37 ^b26:61 Jon 2.19-21

uelhire tapokis tar puhpung mene-
nine ka tohtohotolaig totomua?" ⁶³Bo
Iesu puk e tur bolongur kompe. Doh nas
uleikir patere ke dangata poluk pare,
"Tar hangana God ger tua, hire tami-
ueim toro man ge pare, te Kristo nomana
ingga ger tuna God." ⁶⁴^dDoh Iesu ke hire
tapokis tatanono pare, "Aa, git ro kula
sira pea. Bo inggo gine ru hire tamiu-
oum. I uoumuhia, inggoum mung turung
banga tar Tunar Tamat e tabila tar pang
mua tang God ger tang popokoho tun,
kare turung lame i rana toro mahar lan-
giting Heuen."

⁶⁵^eDoh git nas uleikir patere ke ni-
maliana uasa tun tar puhonene, kare kih
katongo tono hikhiku, kare kula pare,
"Ae maene ri uangoul baka polukeig
mo uelhire? Inggoum kung nihing lon-
goro puk tono uelhire uasaono tang God!
⁶⁶^fHape rung namana peoum?"

Kara kula tapokisisit pare, "Inggono
deha tamata uasa, ra uiliatung pous
kompein e mat."

⁶⁷^gSong ka loulousina tar porenou,
kara uiliatungin, doho gisiamehe ka
posposara tatanono. ⁶⁸Kara kula pare,
"Kristo! Inggua ter tamata ke uaanasain
God, gon, ualafir tamiueim tenas ni-
ualasirar propet, maiene ke halhaluh
totomua!"

Pita ke uolih pare, e tele tang Iesu

⁶⁹Doh Pita e tabila manasampe i
koborohia tar buturung uanguangoul,
doha tang siokor kuaha na tang kalek-
inaler patere uleik ke lame tatanon, kare
me kula pare, "Inggua deh tena ueluel-
dokout pono Iesu ger peng Nasaret."

⁷⁰Doh Pita ke uolih, kare kula pare,
"Inggua u tele tunungua, a hauoneit ro
kulkulaia."

⁷¹Kare tauetela toro pirikinar butu-
rung uanguangoul, kare banga polukur
tang giameher kuah a tang kalekinale
pon, kare hire tasir tamatasis ra uan-
goul tar buturuono pare, "A tamata de-
hene teke uelueldokout pono tang Iesu
ger peng Nasaret."

⁷²Doh Pita ke uolih poluk. Kare kula
pare, "Inggua u uamana tun tamiuoum, u
tele tunumpe tar tamaton!"

⁷³I muduhia sikor, o tamatasis ra tur
tar buturuono ka lame tang Pita, kara me
kula pare. "O mana deh roon, ingga deh
ter tang sioko pono tasisin. Inggeim mi
longor paroko to tenang nimene ingga."

⁷⁴Doh Pita ke kula uapopokoho
tasisina pare, "Inggua u uamana tun i
rana tamiuoum, u tele tar tamatonene
rung kulkulaioum." Gitie ke kula peon,
kare kororongua komper paol. ⁷⁵^hSong
ke namana huara tapokis Pita tena
puhung kula Iesu geke kulain tatanon
pare, "Tar binaka halanar paolo te
koror, ingga o turung hire uatouono
pare, o tele totoguo." Doh Pita ke
tauetela i kalahara kare kirkiring
ualeikintiehe tunungua.

O Mahar 27

27 Naliliuolik tun, o patere uleik
uakapa tun doh nosio mamaho-
holikir Ju ka uelkodoho me puh hape
mara uiliatung pous tang Iesu. ²Ka
uihisina tatanono tar tiein, kara keip
tatanono tang Pailat ger gavana.

Judas ke tung pous katongoin

³Tar binaka ke banga Judas geke tan-
gana tang Iesu ka touahiua pein Iesu
tar uelhehek, doh ra turung uiliatung
pousin, kare uapalihingua tena nina-

^c26:63 Ais 53.7; Mat 27.12 ^d26:64 Ker 110.1; Dan 7.13; Mat 24.30

^e26:65 Mat 9.3; Jon 10.33 ^f26:66 NKP 24.16; Jon 19.7

^g26:67 Ais 50.6; 53.5 ^h26:75 Mat 26.34

man, kare la heir tapokis tar touonor hangaulur mani silva tasir patere uleik mes nosio mamahoholikir Ju. ⁴Kare la kula pare, “Inggo deh ku guata uasa ku tangana pe tar tamata giane tamiuoum, inggono deh ahik mena niguata uasa marung uiliatung pousoum tatanon.” Kara kulasina pare, “Ahik paha ineteng tamiueim, a ineteng totomua!”

⁵ⁱDoh Judas ge baka uahiu i koto tar umang lotu ger dedeil tar mani, kare la, ke la lolo katongoin.

⁶Doho patere uleik ka ur tar mani, kara kula pare, “A manionene, a bulauanar uatadingina ro deuating. Inggeig ahik pahi banotong uamoko tokaha keip tar mani nar umang lotu ger dedeil.” ⁷I muduhia ka ueluatata tokaha baka pesin hape ra guata keip pe tar mani, kara bulauanguain noso mahar kotor tamatang tuha tar nouh. Ka bulauain ro mahar koto roono pare, tere toko noso keuir tamatang gime uan. ⁸Temaene ra kila harahainir butur kotono pare, O mahar kotong deuating.

⁹Doha puhung uelhire geke kulamein propet Jeremaia sioun ke kotpokoso tun pare, o man.

“Gisina ka kale tar touonor hangaulur manionene ge teka ueluaui peinir tamatang Israelono pare, ter bulauanon.

¹⁰Ka bulaua keipingampein tonon mahar kotor tamatang tuha tar nouh misiana ke kula per Tamata Noman toguo.” *Jeremaia 32.6; Sakaraia 11.12-13*

Iesu ka keipin tang Pailat

¹¹Doh Iesu e tur manasampe i uoumuhia tar matanar Pailat ger gavana. Kare dangata Pailat tatanono pare, “Ingga tenas toiar Ju?”

Kare hire tapokis Iesu pare, “Aa, git ro kula sira pea.”

¹²^jDoho patere uleik mesnosio mamahoholikir Ju ka siokor tohotola tang Iesu tar bureher inet, bo Iesu puk ahik pah ke mene hahaua me puh.

¹³Doh Pailat ke dangata poluk pare, “Ahika paho longoro tar mamang inetelikinine ra siokor tohtohotolaig totomua?”

¹⁴Bo Iesu puk ahik me sikir mene tatanon, temaene Pailat ke lutarantiehe tun.

Pailat ke kula tang Iesu ra uakusein tar korose

¹⁵Doh tar mamang nieinilik gera kilain, Leke Liu ro Mat, Pailat e uoto luaka liu tar tang siokor tamatasitie ra uangoul tar umang uih, ngohina re uoto guatang sioun pe, bo e uatauete pukuono tang hingiar tamata teres malahirir Ju.

¹⁶Doh tar binakon a tang siokor tamat a hangana tang Barabas ra ueliatein pare, a tamata uasa, e uangoul pono tar binakono tar karabus. ¹⁷Temaene tar binaka ka uelpokoso manasar tamat, kare dangata Pailat tasisina pare, “Hingiar tamata rung malahirisioum u uataueto, Barabas ue Iesu gera kilain Kristo?”

¹⁸^kInggono ke kula sira pare, teene inggon e atensioun pare, o tamata uleiking tasir Ju ka heir tang Iesu tatanon, teene gisina ka gehe tatanon.

¹⁹Doh tar binaka re tabil haraha Pailat toro tabtabilang uelkodoh, na kuahono ke heirime toro uelhire tatanono pare, “Ingga ahik paho guata me inete tar tamatener kodkodoh. Teene naboung ku bango tatanono toro siokoro borborian, doh ku hagouo tun tar niduh.”

²⁰Doho patere uleik mesir mamahoholik ka uatentur tar balasir manai tar dangata tang Pailat mare luaka liuono tang Barabas, kara uiliatung pousin Iesu. ²¹Doh Pailat ke dangata tasir

manai pare, “Maiar tamata tasrasine rung malarasioum u uataueteio?” Kara kula tapokisisina pare, “Barabas!”

²²Doh Pailat ke dangata pare tasisin. “Bo a haua ru guataio tang Iesu gera kilain Kristo?” Kara siokor kula ualeik tarosin pare, “Tina uakusa tatanono tar korose!”

²³Bo Pailat puk ke dangata pare, “Ae a hauar inete uasa ke guataion?” Kara kula ualeikintiehe tununguasina pare, “Tina uakusa tatanono tar korose!”

²⁴^lTar binaka ke banga Pailat pare, ahik baka poluk me puh re la kodkodohola, doha uiliatung e marang tentur, kare kale tar kodom, kare uabusa uamakaha tar limana tar matasir manai, kare kula pare, “O deuatinginar tamatener kodkodoh ahik paha ineteng to-toguo a ineteng tamiuoumumpe.”

²⁵^mDoho manai tamata ka siokor kula tapokis pare, “Uamaluaana toro deuatinginon o pono tamiueim, doho bung tumiu tering turung huata me niduh tononaton!”

²⁶Song ke uatauetela Pailat tang Barabas tasisina, doh tar binaka ka kalkalopis uaelmahing baka pein Iesu, kare heirono tatanono tasir soldia mara la tinesina tatanono tar korose.

O soldia ka uauanete tang Iesu

²⁷Song ka kale no soldia Pailat tang Iesu, kara keip tatanono tena uma uleikir gavana, kara me siokor tur uiloho no soldia uakapa tunon. ²⁸ⁿDoh gisina ka kale liu tena hikhikuon, kara ualoho tatanono toro gomono kubkubar. ²⁹Song ka tuhasina toro taku, ka tuha keipin toro uoho ueluelhung, kara uamokoin toro luna Iesu, kara uamokoin tar puhung douk tar pang

mua, song ka hatup uahiua tatanon, kara uauanete pare, “A liuo tun, nas toiar Ju!” ³⁰^oKara loulou uapono tatanon, song ka kale tar puhung douk geka uamokoin tar pang mua, kara halhaluh keipin toro lunon. ³¹Tar binaka ka uauanete uakapasina tatanon, kara kale liu toro gomom, kara uahiku tapokisig na hikhiku, song ka keip tauete manasampein mara la tine uakusein tar korose.

Iesu ka tine uakusein tar korose

³²Doh gitie ka tauete liu pemesina tar uan, kara ueltupara kout tar tamat, a hangana tang Saimon ger peng Sairini. Doho soldia ka kula tutupe tatanono tar huata tena korose Iesu. ³³Doh tar binaka ka me la matoto manasasin tar butur ra kilain i Golgota, a tengkanar hanganar buturuono ra kilain, na butur ro lakok. ³⁴^pTeka heir tosina tang Iesu tar bino ueltek a nihouara tar marasin a uelbarang ra kilain a mur, bo tar binaka puk ke inum taginon, kare de mate inum.

³⁵^qI muduhia ka tine baka pesina tatanono tar korose, kara uelpakahangua tena hikhikuono tar ueluelpeikie mara ate pare hingia ro gomono ro la tang mai. ³⁶Song ka tabila uahiuasina tar buturuon, kara uelkaueke pukumpe tatanon. ³⁷Dohi ranahia toro lunono, ka bolosina tar puhung uelhireng uaate pare, “Gine te Iesu nas Toiar Ju.” ³⁸^rDoha toking ueuenaua ka tine ponois tar korose i uahuhut tang Iesu, a tang sioko ke kusehia tena korose tar pang mua, doha tang giamehe ke kusehia tena korose tar pang kais.

³⁹^sDoho tamatasisie ra la siausiauala tatanono ra heir tenas meneng uelsigala tatanon, kara bilbile tar lus. ⁴⁰^tKara kula pare, “Ingga ter tamatang maman-

^l27:24 Ual 21.6-9 ^m27:25 Apo 5.28 ⁿ27:28 Luk 23.11 ^o27:30 Ais 50.6

^p27:34 Ker 69.21 ^q27:35 Ker 22.18 ^r27:38 Ais 53.12

^s27:39 Ker 22.7; 109.25 ^t27:40 Mat 26.61; Jon 2.19

touo tar umang lotu ger dedeil, karo tuha tapokis poluk tar touono pukur marein.” “Ge para tuna Goda, o uelkarus katongoia, karo hiuo liu tar korose!”

⁴¹ Doho patere uleik mesir tamatang ualualasira tar ualatut, doho mamahoholik a siokono puk ponomper hagar ka guatain, kara uauanete pare, ⁴² “Inggono ke uelkarus tasir gisiameher tamat, bo ahik pukuono pahe banot e uelkarus katongoin. Ahikono pah nas toiar Israel? Gete hiua liu turono gine daana tar korose, song ri tagorong maneig tatanon! ⁴³ “Inggono e tagorong mana tang God, kare kula pare inggono ter tuna God. Auia, doh gete malara God tatanon, pake poul tatanono gine daan.”

⁴⁴ Doha toking ueuenaua geke tine taguis tang Iesu, kura uelsigala sira pono tatanon.

Iesu ke mat

⁴⁵ Doh nar marein uleik, nar 12 kilok, a kitup ke kokopo uakapa tar pang uan uakapa tun, ke la tuka namoloi nar 3 kilok. ⁴⁶ ^v Doh nar moloila, Iesu ke kula ualeik pare, “Iloi, Iloi, lama sabaktani!” A tengkana puhung uelhireonene, e kula pare, “Nag God, nag God, ae maene ko hiliua totoguo?”

⁴⁷ Doho gisiameher tamatasitie i hutuna ka longor, kara kula pare, “Inggono dehe kila tang Elaija!” ⁴⁸ ^w Doha tang siokor tamata ke ualola, kare kale toro mahar pous, kare uahu tar bino ueltek, kare uamoko tola tar puhung douk, kare hue kai taro tang Iesu mare inum. ⁴⁹ Bo o gisiamehe pukur tamata ka kula pare, “Halan! Ti banga bak, ge pare me poul Elaija tatanon.”

⁵⁰ Doh Iesu ke kaling ualeik poluk, kare mat.

⁵¹ ^x Doho mahar gomono gero kus i uoumuhia toro olta tar umang lotu ger dedeil ko takih pang torik tur i rana ko me tuk i kot. Doha koto ke gun, doha mahar palaua ke tapolaka uelpakah. ⁵² Doho keu ko takapuk, doho bureher tamatar nang God geke mate sioun ka uatua tapokisis, ⁵³ dohi muduhia ke tentur tapokis pe Iesu toro mat, kara hiliuinguasina tar keu, kara langua i Jerusalem tar butur ka banga tor bureheisir tamata tasisin.

⁵⁴ Doh tar binaka ke banga nas tang uoum keipir soldia, doho soldiasisie gisina ka kaukaueke tang Iesu, doh tar giniameher mamang inetelikinitie ke kotpokos, kara sokor, kara kula pare, “Inggono deha Tuna nomanampe God!”

⁵⁵ ^y Doho burehe kuaha pono, geke kekete turume tang Iesu i Galili, kara poul tatanon, ka banga tur ponompe i reh. ⁵⁶ Tasir kuahasinasine, a tang sioko hangana tang Maria Makdala, kare Maria gera tinas Jems me Josep, doha ra tinasar toking tuna Sebedi Jems me Jon.

Iesu ka keuin

⁵⁷ Gitie ke moloi manasa peon, kare me pokosor tang siokor tang mani a peng Arimatea hangana tang Josep, inggon a tang sioko pono tosono tamatang uakuakeluk Iesu. ⁵⁸ ^z Inggono ke la banga tang Pailat, kare la dangata, ge pare banot e kale tar tukununa Iesu. Doh Pailat ke kula tasir soldia tar heir tar tukununon. ⁵⁹ Song ke kale Josep tatanono, kare gomo toro mahar gomono gaugauil o timuh, ⁶⁰ ^a kare la uamokola tar tukununa Iesu tar timuhur keu a nanampeon,

^u27:43 Ker 22.8 ^v27:46 Ker 22.1 ^w27:48 Ker 69.21

^x27:51 KT 26.31-33; Hib 10.19-20 ^y27:55 Luk 8.2-3 ^z27:58 Ual 21.22-23

^a27:60 Ais 53.9

a nikoho tola toro lebang, song ke tula uatagegelela Josep toro palaua uleik toro matana ro lebanga, kare la. ⁶¹Doh Maria Makdala, doha tang giamehemper Maria ura tabila uahuhut tar keu, kaura bangbanga tar keu.

O soldia ra kaukaue tar keu

⁶²Doh tar uagiamehenar marein ter Mareining Pepe Uah, noso mamahoholikir patere mesir Parisi ka uiliodout, kara la banga tang Pailat, ⁶³^bkara la kula pare, “Ir Tamata Uleik, inggeim mi namana dede tar binaka re tua harahar bohoboho giala, inggono ke kula baka pare, ‘Tar touonor marein, inggo u turung tua tapokis.’ ⁶⁴Temaene ingga pako heir me puhung kula uapopokoh mara kaukeke uaiainir keu e tuka tar uatouonor marein mara hik no tamatang uakuakelukono pah ra banotong la uenaua tar tukununon, kara hire tasir tamata pare, inggono ka uatua tapokisin toro mat. Doho uadouhina ro boho roono rone tero turung santiehe tang gero uakikilangan.”

⁶⁵Doh Pailat ke kula pare tasisin, “Kale mo soldia, karung hire tasisina ra kaukeke uaia keip tar keu me hagar uaia tun rung ateioum.”

⁶⁶Song ka lasina tar keu, kara bulut tola toro mahar palaua mara hik me tamata re banotong tula liu, song ka kaukeke uangoulur soldia.

O Mahar 28

Iesu ke tua tapokis

28 I muduhia tar Mareining Pepe Uah, gitie re kih manasa pehainir giameher marein tar uakikilanganar marein tar uik, Maria Makdala mer tang giamehemper Maria kura la banga

tar keu. ²Doha tukung nun ke kotpokoso ualutara, doh na anggelou God ke la turuha i Heuene, kare me tula uatagegele liu toro palau, kare tabila uapono tang roon. ³Inggono ke bala sira tar kanau, doh na hikhikuon a gaugaulintiehe tun. ⁴Doho soldia ka sokorontiehe, kara poroportontiehe tun, kara punga uahiu i kot, ka baka sirangua tasir tamatasisie ka mate manas.

⁵Bo a anggelou puk ke kula pare tar toking kuah, “Ahik pah mura sokor. Inggo u ate, raoum mura sir teil tang Iesu geke tinein tar korose. ⁶Inggono taboinane. Inggono ka uatua manasain misiana ke kula baka pe. Mura lame, kaura me banga tar butur ke rikinon. ⁷Raoum mura la uateuelengua, kaura la hire tosno tamatang uakuakelukono pare, ‘Inggono ka uatua tapokis manasain toro mat, doh inggono ke la manasa uoum i Galili ter buturuono rung la banga tooum tatanon.’ Auia, inggo ku hire manasa tamiraoum.”

⁸Kaura hiliu uateuelengua kompe rasina tar keu menia keip tar nisokor, kara niuaha uleik, kaura uualo tar la hire tosno tamatang uakuakelukon.

⁹Doh Iesu ke ueltupara tola tasrasina tar lel, kare kula pare, “Aliuo tun!” Kaura la uahuhutuha rasina, kaura buaka tar kekenon, kaura lotu tatanon. ¹⁰^dSong ke kula Iesu pare tasrasin, “Ahik pah mura sokor. Mura la hire toso bung tahiguo ra la i Galili ter buturuono ra la banga tosina totoguo.”

O soldia ka hire tar haua ke kotpokos

¹¹Gitie ura la haraha pelar toking kuah, o gisiamer soldiasitie, ka kaukaueke tar keu, ka la tapokis tar uan uleik, kara la hire tosnosio mamahoholikir patere tar mamang inetelik

^b27:63 Mat 12.40; 16.21; Mak 9.31; 10.33-34; Luk 9.22; 18.31-33; Jon 2.19-21

^c28:6 Mat 12.40; 16.21 ^d28:10 Mat 26.32

ke kotpokos. ¹²Doho patere uleik ka la tabila tokaha mesir mamahoholik, kara la uelhote, kara heir tar uleikir mani tasir soldia. ¹³Kara kula pare, “Inggoum mung turung kula pare, no tamatang uakuakelukono ka lame naboung, kara me uenaua tar tukununono tar binaka rung hohououm. ¹⁴Doh gete longoror gavana tar puhene, mi turung uakodkodoho keip uoumeim tatanono mara hikoum pahe kusesioum me puh.” ¹⁵Song ka kaler soldia tar mani, kara guata sira manasampe misiana ka kula peis. Doho ueluatata rone ko la uiloho tasir tamatang Ju e tukampeene daan.

**Iesu ke kotpokoso tosono
tamatang uakuakeluk**

¹⁶eDoh gisisir siokor hangaul, doha tang siokor tamatang uakuakeluk ka la

manasampe tar siusaneit, ke kula uamatooin Iesu tasisina ra lain i Galili. ¹⁷Doh tar binaka ka bangasina tatanon, kara lotu tatanon, bo o gisiamehe puk tasisina res torikir ninaman ge pare, Iesu no-manon. ¹⁸fDoh Iesu ke la uahuhutume tasisin, kare kula pare, “God ke heir totoguo tar hanga uleik, doha nitampopokoho uleik tar kaueke tar mamang inetelik i Heuene dohi kot. ¹⁹gTemaene pakung laoum toro mamang uanilik, karung la guata tasir tamata nogo tamatang uakuakeluko. Karung uahuhu tasisina tar hangana Tamanon, doha Tunon, doha Iabena Dedeil. ²⁰Karung ualasira tasisina tar uakeluk tar mamang inetelik ku ualatohogio tamiuoum. Doh inggo u turung uangoul tagu tamiuoum tar mamang binakalik e tuka tar binaka re kapar kot.”

^e28:16 Mat 26.32 ^f28:18 Jon 13.3; Epe 1.20-22

^g28:19 Mak 16.15-16; Apo 1.8

Mak

O Uelhire Uaia ke boloin Mak

O bolobolo tang Mak

O uakikilanana ro Uelhire teno bolobolo Mak o kulo pare, “Rone teno Uelhire Uaia Iesu Kristo a tuna God.” Dohi lolono toro bolobolo roon, Iesu ke me tamat a tampopokoho tun, kara tohangana tar guata tar bureher kalekinale.

Inggeig i banga tena nitampopokohon, kare no tang iateono tar binaka re mene ualasira tasir tamat, doh tar binaka re geil liuono tasir liouana uasa, kare tar binaka re kuse luara liuono teres niguata uasar tamat. Iesu e kula katongoin pare, ke laha tar me heir katongo tar tukunun tar bulaua tapokis tasir bureher tamat (Mak 10.45).

Mak e ualuatata uaburehe tena kalekinale Iesu, bo ahik puk pahe ueluatata uaburehe tar menemene ke meneig Iesu ke ualualasira pe tasir tamat: Tar uakikilangan Mak e ueluatata tang Jon ger tang uahuhu, kare Iesu ka uahuhu pein, kare la uedangangua Satan tatanon.

Gine ke bolo toro bolobolo rone, ke ualasira pono tena kelekinala Iesu re mene ualasira pe, kare uauia tasir momouh. Ke la pelar binak, no tamatang uakuakeluk Iesu ka kale niate tur manasa pono tatanon.

Inggeig i banga pono pare, o gisiomeher tamata ka uelmatanangua tang Iesu, kara heiringua tar bureher niduh tatanon. Toro mahar uadohina ro Uelhire Uaia, Mak e ueluatata tang Iesu ke mata pe, kare tua tapokis.

O Mahar 1

1 Rone o uakekenena ro Uelhire Uaia tang Iesu Kristo ger Tuna God.

Tar kaleuatoro tar lel

²O Uelhire Uaia roono ko pokoso pare, Aisaia ger propet ke me bolo sioun, God ke kula pare,

“Inggo u turung ualatueha tenag ualu-alatue i uoumuhia totomua mare turung kaleuatorono tenang lela.”

Malakai 3.1

^{3h}“A uauanar tang siokor tamat e kula ualeik tur tar butur padene pare, ‘Kaleuatoro tena leler Tamata Noman, doh tuha uakodkodoho tena lele inggon!’” *Aisaia 40.3*

Jon ger Tamatang Uahuhu

⁴ⁱInggono Jon ger tamatang uahuhu ke kotpokos, kare uahuhu to tasir tamata tar butur paden, kare mene tauete tar uahuhung uapalih mara kaleliuigir niguata uasa. ⁵Doho Ju mesir tamatang Jerusalem, o burehentiehe tasisina ka la tang Jon, kara la hire tauete teres niguata uasa. Kare uahuhu tongua Jon tasisina tar kodom i Jordan. ^{6j}Doh Jon e uoto hiku tar hikhiku a nituha keip tar ulunar kamel. Doh inggon e uoto beil tar kapokonor bulamakau, dohe uoto ein tasir kakaring menia tar hani a pengolon. ^{7k}Inggono ke mene tauete toro uelhire pare, A tang siokor tamat e lame i muduhia totoguo. Na nitampopokohon e i rana uain liu tereg nitampopokoho. Inggo ahik paha tamata uaia maru banot u hatup uahiu, karu luaka tar bungbunguna na suon. ⁸Doh inggo u uahuhu tamiuoum tar laur, bo inggon e turung uahuhu keip tamiuoum tar Iabena Dedeil.

Jon e uahuhu tang Iesu

⁹Tar binakanin Iesu ke hiliu manasa i Nasaret gere moko tar pang uan i Galili, inggono ke laha tang Jon, kara me uahuhu toin i Jordan. ¹⁰Gine re boun uahung liu tur peha Iesu tar kodom, kare bangangua i Heuene ke takapuke pe, doha labena Dedeil ke la uahiuaha tatanono ngohina tar baluh. ¹¹^lDoh a uauanar tamat ke mene turuha i Heuene pare, “Ingga ter Tuguo! Geru malarantiehein, karu uahantiehe tun pono totomua.”

Iesu ke la tar butur paden

¹²Doh ahik me manasan a laben a Dedeil ke ueliuila tang Iesu e la i lolono tar butur paden. ¹³^mDoh Iesu ke uangoul tar buturuono ke matoto tar toueitir hangaulur marein. Doh Satan ke ueduedanga tatanon. Inggono ke uangoul tagu tasir inete roke, doh no anggelou God ka poul ponompe tatanon.

Iesu ke uakekene tena kalekinale

¹⁴ⁿI muduhia ka uamoko baka pein Jon tar karabus, Iesu ke la i Galili, kare mene tauete tono Uelhire Uaia God. ¹⁵^oInggono ke uelhire pare, “A binaka ke uamakoin God sioun ke kot-pokoso manas, doh na Nitoia God ke uahuhut manasain. Inggoumu uapalihisioun, karung tagorong mana pono toro Uelhire Uaia.”

Iesu ke kila toсно tamatang uakuakeluk

¹⁶Gine re la pela Iesu tar tektekenar kodomo uiluiloh i Galili, kare

bang huarangua tas Saimon me Anduru, rasina ramamahialik ura uoto uekih keip pukumpe tasir ian tar uben. Rasin a toking tamatang uekih. ¹⁷“Doh Iesu ke kula tasrasina pare, Raoum mura uakeluku me totoguo maru uualasira tamiraoum tar uekih tasir tamat.” ¹⁸Ahik me manasan, kaura hiliu rasina tenasira uben, kaura uakelukungua tatanon.

¹⁹Iesu ke la uain sikorola tar sikin, kare bangangua tang Jems me nu Jon, rasina ramamahialik pon, a toking tuna Sebedi. Rasin ura uangoulumpe tenasira bout, ura uma uaia tapokis tenasira uben. ²⁰Doh Iesu ahik mate uauana bak, ke kila puk manasampe tasrasin. Doh rasina kura hiliuinguampe tara tamas, e uangoul tagu tasir tamatang kalekinaleane tar bout, kaura la uakeluk tang Iesu.

Iesu ke geil liu tar liouan

²¹Iesu mesir gisiamer tamata ka lala tar uan uelik i Kaperneam. Doh tar binaka ke pokosor Mareining Pepe Uah,^{§§} Iesu ke haiala iuma tenas umang lotur Ju, kare la mene tauete toro Uelhire Uaia tasir tamat. ²²^pDoh gine ka longoro pesina tena uelhireon, gisina ka lutara uasa tun, teene inggon ahik pahe uualasira sira tasir tamatang uualualasira tar ualatut,* bo inggon e uualasira tasir tamata misiana tar tamata ger tohangan.

²³Doh gane iuma tar umang lotu e uangoulur tang siokor tamata ke hikuinir liouana uasa, inggono ke kula ualeikintiehe tun pare, ²⁴^q“Iesu ger peng Nasaret! Ingga o lang hau? O lang mantoua tamiueim? Inggo u ate totomua, ingga ter tang siokor tamata dedeil

§§1:21 Nas Mareining Pepe Uahar Ju ter Sarere.

*1:22 O tamatang uualualasira tar ualatut ra uoto uualasira tenas niguatar Ju, doh tono ualatoho Moses.

^l1:11 Ker 2.7; Ais 42.1; Mat 12.18; Mak 9.7 ^m1:13 Ker 91.11-13

ⁿ1:14 Mak 6.17 ^o1:15 Mat 3.2 ^p1:22 Mat 7.28-29 ^q1:24 Mak 5.7

a nang God!”²⁵ Doh Iesu ke uelkukur tatanonor liouana, kare kula pare, “Luar! Ahik paho men, doho hiliu ualahur tatanon!”

²⁶Maieit a liouana uasa ke uaporo-poro tar tamaton, kare kula ualeikintieh, kare tauete liuingua. ²⁷Gisisir tamata ka siokor lutarantiehe tun, kara uel-dangateis pare, “Tieh! A hauene? A ni-ualasira hauonene? A niualasirene ke gi-amehe siok, inggono ke ualasira ngohina tasisitir tohangas, kare ualatoho pono tasir liouana doho liouana ka longoro tatanon!”

²⁸Doho ueluatata tang Iesu ko ualo uateuele toro mamang buturulikane tar pang uan i Galili.

Iesu ke uauia tena uarih Saimon ger kuah

²⁹I muduhia Iesu mesir gisiamer tamata ka tauete tur manasa tar umang lotu. Doh ahik me manasan, kare laono tenasira uma Saimon me Andru. Doh Jems me Jon kura la tagu pon. ³⁰Na uarih Saimon e rikin iuma toro uat, e momouh. Doh gisina ka hire ualahur tun tang Iesu pare, “Inggon e momouh.”

³¹Maieit Iesu ke lala i tektekena tono uaton, kare kusa uatabila tatanon, doh ahik me manasan, kare arianon. Doh inggonor kuahene teke la tuhangua teres nieinisin.

Iesu ke uauia toro momouh tasir bureher tamat

³²Nar moloi, gine re hu pekor pisar, o tamatasitir momouh doho nihikung liouana ka keipimeis tang Iesu. ³³Doho manai tamatang toro mamang buturulik i Kapenaum ka la totoane i kalahara toro matana ro pirik mara bang. ³⁴Maieit Iesu ke uauia tasir bureher tamatisis res

mamang mat, kare geil liu pono tasir bureher liouana uasa. Gisinar liouana ra ate tatanon, temaeit Iesu ke kula tane tasisin, ahik pah ra men.

Iesu ke la i Galili

³⁵“Tar uagiomehenar marein, Iesu ke gulete naliliuolik, kare la tar butur amengana mare la lotu tang God. ³⁶Dohi muduhia Saimon meso uanotono ka la sir uakeluk tatanon. ³⁷Tar binaka ka la tupara manasasina tatanon, gisina ka la hire pare, “O bureher tamat ra sir totomua.”

³⁸Kare kula tapokis Iesu tasisina pare, “Inggeig i la pono toro giniamer ro uan gere uahutunane, maru mene tauete pono toro Uelhire Uaia tasisin. Temaene peono ku lameo.” ³⁹“Doh Iesu ke la toro mamang buturulik i Galili, kare mene tauete to toro Uelhire Uaia tasir tamata tonoso umang lotu, kare geil liu tur pono tasir liouana uasa tasir tamat.

Iesu ke uauia tar tamat a toba

⁴⁰Doha tang siokor tamat a toba ke lame tang Iesu, kare me hatup uahiuangua, kare dangata uapopokoho tatanono pare, “Geto malahiria, ingga o uadelauana totogou.”

⁴¹Doh Iesu ke ueldolomontiehe tatanon, kare tuha tatanon, kare kula pare, “Inggo u malar. Ingga o uia.”

⁴²Gine kompe daan o mata ko hiliu tatanon, kare uia. ⁴³Doh Iesu ke uelueluata ualahurungua tatanon, kare uatagin uapopokoho pare, ⁴⁴“Ahik paho hire me siokor tamata tar inete ke pokoso totomua. Bo o la uamakaha puk tar tukunum tang pater, song ro la guata tar uahung tar uakeluk tena ualatur Moses tar uabang manate tasisina pare, ingga ko delauana manas.”

^r1:26 Mak 9.26 ^s1:28 Mat 4.24 ^t1:34 Mak 3.10-12

^u1:35 Mat 14.23; Mak 6.46 ^v1:39 Mat 4.23; 9.35 ^w1:44 UGO 14.1-32

⁴⁵Bo inggono pukur tamatene ke ueluatata ueltebeir toro mamang buturulik tar inete ke kotpokoso tatanon. Te maene Iesu ahik pahe matot e la leka toro uan. Bo e uangoul pukungua toro buturunitir tabotan. Bo o tamatang toro mamang buturulik puk ra la dedempe me tatanon.

O Mahar 2

Iesu ke uauia tar tang siokor tamat a mater tukunun

2Ke karuh baka per giniamer marein, Iesu ke la tapokis tar uan i Kapenaum. Doho tamata ka longoro pare, inggono ke la polukula tenas uanisin. ²Maeit o bureher tamata ka me uelpokoso tar umeit re uangoulin Iesu. Doha uma ke uoununtieh, kara hik pono me hagarane i kalahara toro pirik, doh gane iuma tar um Iesu ke mene uakalahara tono uelhire God tasir tamat.

³Doho tantoueitir tamata ka pokoso ra huata teil tar tamat a ininteil, e rikin teil tono rikin. ⁴Gisin ahik pah ka banoto ra lihilaane tasir tamat tar keipila tar tamata ininteil tang Iesu. Gine ahik pesina pah ka banoto tar keipila tatanon, gisina ka moto kai keip tatanono tar kuku, kara la robongo tar kuku. Doh tar binaka ka robongo pesina tar kuku, gisina song ka uahiuo keipiko tar momouh tono uatane i uoum tang Iesu. ⁵Gine ke banga pe Iesu teres nitagorong manasin, inggono ke kula pare tar tamateitir ininteil, “Ir Tug, reng niguata uasa ingga, ka kale liu manasaig.”

⁶Doho gisiamer tamatang ualualasira tar ualatutung tar lotu gera tabila pon, ka uelkula katongois pare, ⁷“Ae tun maene re guaton, kare mene sira pare? Ingon e marang hahaua liu tang God?

God te me pahena re banot e kale liu tar niguatar sa.”

⁸Bo Iesu ke ate manasa teres ninamanasin, kare kula pare, “Ae maene rung namnamana ueltebeirintiehoum? ⁹Hingiar puhung uelhirer malagirintiehe tar kula tar tamatener mater toking keken? Ter kula pare, ‘A niguata uasar noumua ka kale liu manasaig.’ Ue getu kulo pare, ‘O tur, karo kale tonongo rikin, karo la.’ ¹⁰Inngo u guata marung atoum pare, A Tunar Tamat a tohanganane i kot tar kale liu tar niguata uasa.” Song ke kula pare tar tamateitir ininteil, ¹¹“Inngo u kula totomua pare, O tur, karo kale tonongo rikin, karo la tenang uan.”

¹²Doh tar binakene ka longorosin, gisina ka bangampe tatanonor ininteil ke tentur pe, kare kale tono rikin, kare la. A puhonene ke guatangua tasisina ka lutarantiehe tunungua, kara uatakaiantiehe tar hangana God, kara kula pare, “Inggeig ahik mati banga tun me puh sira tar inetene ke kotpokoso daan.”

Iesu ke kila tang Libai

¹³Tar siokor binak Iesu ke la poluk i tehe tar kodo mo uiuiloh i Galili. Doho manai tamata ka la polukume tatanon, kare mene ualasirono tasisin. ¹⁴Gine ke uahele pelaon, kare bangangua tang Livai ger tuna Alpius, e tabila tar buturung kale tar takis. Doh Iesu ke kula tatanono pare, “O tur, karo uakelukume totoguo.” Doh Livai ke tentur puk manas, kare uakelukungua tatanon.

¹⁵Gine re la tabilang ein pe Iesuane tena uma Livai, o bureher tamatang kale takis, doho bureher tamata uasa ka me ein tagu pono tatanono menia tasir tamatang uakuakelukur nanon. Doho bureher tamata ponosisis ra uoto la tagu pono tang Iesu tar mamang binakalik.

^{16x}Doh tar binakon o gisimeher tamatang iate tar ualatut, gera kilais o Parisi[†] ka banga tang Iesu re ein tagu pe tasir tamata uasa, doho tamatang kale takis pon. Kara la dangatangua tasir tamatang uakuakelukur nanono pare, “Ae maene inggon e ein tagu tasir tamatang kale takis, doho tamata uasa?”

¹⁷Doh Iesu ke longoro tar ueluatatine, kare hire tapokis tasisina pare, O tamatar uia ahik pah ra la tar dokta, bo o tamatasine ra momouh tera la tar dokta. Temaene inggo ahik matu laha tar me kila tasir tamata uai, ku laha tar me kila tasir tamata uasa.

Iesu ke ueluatata tar niguata tar binakang ueil

¹⁸A siokor binaka no tamatang uakuakeluk Jon, doho Parisi ka ueil. Temaene o gisimeher tamata ka me dangata tang Iesu pare, “Hapeono maene no tamatang uakuakeluk Jon, doho Parisi ra ueil, bosir tamatang uakuakelukur noumua ahik pah ra ueil tagu?”

¹⁹Doh Iesu ke hire tapokis tasisina pare, “Hape ra banoto per uanotonar buloutener le timuh ra ueil tar binaka re uangoul taguono tasisin? Gisin ahik pah ra banotong ueil tar binaka re ungoul tagu harahar le timuh tasisin. ²⁰Bo a binaka puk e turung lame, tar binaka ra me turung kale liuinir buloutener le timuh tasisin, doha mareiniono tera turung ueil tosin.”

²¹Ahik deh me tamata re banot e kaere tola mo mahar gomono timuh mo gomono pensiou. Gete guatono pare, o mahar gomono timuh o turung uatakihintiehe toro gomono pensiou. ²²Doh

ahik pono me tamata re hedongola me bino timuh tar ineteng hedongor pensiou. Gete guatono pare, a bino timuh e uatapuaka tar hedongong bino, doh inggon e turung uasuasangua tar bino mer hedongong bino. Ahik dehon! O tamata bo ra hedongola tar bino timuh tar ineteng hedongo ger timuh.

Iesu ke ueluatata tar niguata tar Mareining Pepe Uah

²³Tar siokor binaka nar Mareining Pepe Uah, Iesu ke lihila tar iom a nileber raes-uit. Doh gisisir tamatang uakuakelukur nanono ra la tagu teil pon, kara louslous teil pono tar kukuana-nar raes-uit, kara uelhaule keip tar limas, kara ein. ^{24y}Doho Parisi ka banga, kara dangata tang Iesu pare, Bang! Ae maene ra guatasina tar niguata ge ahik pahe uakeluk tar niguatang tar Mareining Pepe Uah?

^{25z}Doh Iesu ke hire tapokis tasisina pare, “Inggoum halana haraha tung timana toro ueluatata tar haua ke guatain Devit sioun, tar binaka ke gogo pe inggono meso uanoton? ^{26a}Tar binakon, Abiatar tere uleik tasir pater, Devit ke la lek iuma tar umang lotu ger nang God, kare la ein tar bereit ger niuadedeil. Ginin e matoto pukig tasir pater tera ein taninin. Bo Devid puk ke la ein, kare heir pono toso uanotona ka ein pon.”

^{27b}Kare hire poluk Iesu pare, “God ke heir tar Mareining Pepe Uah mare poul tasir tamat, ahik mate touo tasir tamata mara poul tar Mareining Pepe Uah. ²⁸Maait a Tunar Tamat tere Tamata Nomana ponompe tar Mareining Pepe Uah.”

[†]2:16 O Parisi ra uoto uakeluk kara ualasira tar bureher niualatut doho niualatoh a nang God

^x2:16 Mat 11.19 ^y2:24 Ual 23.25 ^z2:25 1Sa 21.1-6 ^a2:26 UGO 24.5-9

^b2:27 Ual 5.14

O Mahar 3

Iesu ke uauia tar tamata kikimoror liman

3 Iesu ke leka tar umang lotu. Doha tang siokor tamata kikimoror liman e uangoul pon. ²Doho Parisi ra uakeis uanono kompe tang Iesu mara turung tohotola tatanono gete uauiaono tar tamateitir kikimoror limana tar Mareining Pepe Uah. ³Iesu ke hire tar tamatar kikimoror limanana pare, “Ingga o tur kiane i uoum tasir tamat.”

⁴^cSong ke dangatono tasisitie pare, “A hauar uia tar guata to tar Mareining Pepe Uah? Ter guata uaiia ue ter guata uasa, tar uelkarus tur tar tang giomehe toro mat ue tar uiliatung pous?” Bo gisina puk ahik tun pah ra mene hahau.

⁵Doh Iesu ke bangang nimaliana hahai tasisin, doh inggono ke ueldolomontiehe tasisin, teene gisina o mahang naman manate. Song ke kulono tar tamatener kikimoror limana pare, “O hue uamakmakoso tar limoum.” Kare hue makmakoson, kare la uaianguar liman. ⁶^dDoho Parisi ka tauete liu ualahur puk manasane tar umang lotu, kara la uelhatala keip tosno tamata Herod tar sir me lel mara uiliatung pous tang Iesu.

O manai ka uakeluk tang Iesu

⁷Iesu mesno tamatang uakuakeluk ka hiliu manas, kara la tar kodomo uiluiloh i Galili, doho manai tamata ka uakeluk pono tatanon. ⁸Gisisir manai tamata ra la tur toro mamang buturulikane i Galili, dohi Judia, doh tar uan uleik i Jerusalem, dohi Idumia, doh tar painahia i Jordan menia toro uan gere

moko uiloho tar toking uan i Tair me i Saidon. Gisina ka lame tang Iesu, teene ka longoro pesina tar inete ke guataion. ⁹Temaeit o tamat o burehentiehe tun ka me tototo. Doh Iesu ke kula tosno tamatang uakuakeluk ra kaleuatoro me bout mare panetono geta kusukusun-tiehelar tamata tatanon. ¹⁰^eTeeit inggono ke uauia manasa tasir bureher tamat, doho tamatasitir momouh ra marang uaheheke uelhir dedempe mara me tuha tatanon.

¹¹^fDoh hingiar binaka ra bangar tamatasisir nihikung liouana tatanon, gisina ra punga uahiuane i kot, kara kaling ualeik pare, “Ingga ter tuna God!”

¹²^gBo Iesu puk ke kula tane uapopokoho tun tasisinar liouana pare, ahik pah ra hire tauete maion.

Iesu ke kedanga tar siokor hangaul doha tang torikir aposoul

¹³I muduhia Iesu ke la taro i rana tar siusan, kare kila uelhir tasir tamata ke malarais ra la tagu tatanon. Doh gisina ka lame tatanon. ¹⁴Song ke kedangono tar siokor hangaul, doha tang torikir tamat,[‡] kare kula tasisina pare, “Inggo ku kedanga tamiuoum marung uangoul taguoum totoguo. Doh inggo u uelkilo tamiuoum o aposoul maru ualatueo tamiuoum tar mene ualasira toro Uelhire Uaia, ¹⁵doh inggoum mu turung tohangamiu pono tar geil liu tasir liouana uasa.” ¹⁶^hGisine tesir hangaul doha tang torikir aposoul geke kedangais Iesu; Saimon geke uelkiloiono pare Pita.

¹⁷ⁱDoh Jems me Jon ger toking tuna Sebedi, bo Iesu puk ke kila tasrasina pare, Boanerges (inggon e kula pare, rasin a toking tunar pil).

[‡]**3:14** O gisiamer tamatang iate ra namana pare, a puhung uelhire poluk e mokane pare, gere kilasion, o aposoul.

^c**3:4** Luk 14.3 ^d**3:6** Mat 22.15-16 ^e**3:10** Mat 14.36 ^f**3:11** Luk 4.41

^g**3:12** Mak 1.34 ^h**3:16** Jon 1.42 ⁱ**3:17** Luk 9.54

¹⁸Doh inggono ke kedanga pono tang
 Andru
 me Pilip
 doh Bartolomiu,
 doh Matiu,
 doh Tomas,
 doh Jems ger tuna Alpius,
 doh Tadius,
 doh Saimon gera kilain pare, “a Selot,” ¶
¹⁹doh Judas Iskariot geke tangana tang
 Iesu tasir uelmatan.

Iesu doh Belsebul[§]

²⁰Song ke leka tapokisila Iesu ium,
 doho bureher tamata ka me tototo poluk
 tar umeit re uangouluion. Te maene Iesu
 mesno tamatang uakuakeluk ahikingua
 pah ka matoto ra ein. ²¹Tar binak ka lon-
 goro ro tahinalikiono tar puhion, gisina
 ka la marang kila tatanon. Teene o
 tamata ka hire pono pare, Inggono ke
 poupouluana manas.

²²JDoho gisiameher tamatang ualu-
 alasira tar ualatut ka kotpokoso turuha i
 Jerusalem, kara me kula pare, “Inggono
 deh ke hikuin Belsebul ge nas uleikir li-
 ouana uakap. Teono peene re geil liu kei-
 piono tasir liouana uasa.”

²³Maeit Iesu ke kila tasisin, kare mene
 tasisina toro uelhire uarangangua pare,
 “Hape re geil liu katongo pe Satan
 tang Satan? ²⁴Ngehina gete me pang
 uan re uelnimaliana katongois, a pang
 uanion ahik pahe banoto tar tur uanon.
²⁵A siokono puk, geto matmatame ra
 uiluiliatungeis, kara uelueltageih, o mat-
 matamesin ahik pono pah ra banotong
 tur uanon. ²⁶Doh gete uelsae keip katon-

goin Satan, inggon ahik pono pahe ban-
 otong tur uanon ge na binakang kapa pe-
 ono ke pokoso manas. ²⁷Toro mana tun,
 ahik me tamata re banot e leka uanomo
 tena umar tamata ger tampopokoh, kare
 la uenaua mena ineton e tuka gete uih
 tane bakono tatanon.”

²⁸“Inggono u hire tamiuoum toro mana
 pare, God e banot e kale liu me niguata
 uasa menia pono me nimene uasa tang
 God. ²⁹Bo me tamata gere mene uasa tar
 Iaben a Deideil, na niguata uasaon ahik
 tun pah ra turung kale liuig. Teene na
 niguata uasaon e turung moko dede tar
 mamang binakalik.”

³⁰Iesu ke kula paar, teene ka kula
 pesina pare, Inggono a nihikung liouana
 uasa.

Mai tinan doho tahinalik Iesu

³¹kTar binakon o bung tahina Iesu,
 doh tinana pono ka pokoso manas, kara
 me turane i kalahara tar umene re uan-
 goulin Iesu, maeit gisina ka ualatue tar
 tang siokor tamat e la kila me tatanon.
³²Doho tamatasitie ra tabila uiloho tang
 Iesu ka hire tatanono pare, “Tinoumua
 meso bung tahim, gisila i kalahara ra
 lang sir teil totomua.”

³³Bo Iesu puk ke dangata tapokis pare,
 “Maisir tinouguo, doh maisir tahiguo?”

³⁴Song ke bangbanga hahaiono tasi-
 sine ra tabila uiloho tatanon, kare kula
 pare, “Gisine teso bung tinouguo, doho
 bung tahig ³⁵Ge mai pe gere uoto
 uakeluk dede tena nimalara God, ing-
 gono te tahiguo, doho tatahigulikio doha
 tinaguo.”

¶3:18 A Selot, a tamatang tur tane uapopokoho keip tosono tamat tar gavamanang Roum.

§3:19 Belsebul a giameher hangan Satan.

j3:22 Mat 9.34; 10.25 k3:31 Mak 6.3; Jon 2.12; Apo 1.14

O Mahar 4

Iesu ke uelhire uaranga tar tamata geke dudura tar uatunar raes-uit

4¹Kare la poluk Iesu ke la mene ualasira to tasir tamatane i tek-tekener kodomo uiluiloh i Galili. Doho manaiar tamata ka la uangoul uiloho tatanon. Gisin o burehentiehe tun, temaene ke panetengua Iesu tar bout, kare la tabil, teke la menmene turuhaon. Bosir tamata ka tur hahailaane ion i hutun i laur. ^{2m}Doh Inggono ke mene ualasira tasisina tar bureher inet i lolono tar uelhire uarang, dohi lolono tena nimene ualasion, inggono ke kula tasisina pare,

³“Ualongor! A tang siokor tang kalekinale tar iom, ke la tar lang dudura tena uatunar raes-uit tar iom. ⁴Gine re dudura pela inggon, a giniamer uatuna ke duduko tar buturung la, doho tetiaua ka me ein taninin. ⁵Doha giniamer uatuna ke dudula tar butur papalauan ahik paha kotan. Doh gininar uatuna ke tungara ualahur, teene a kotana sikoro puk peon. ⁶Bo tar binaka puk ke hara pehar pisar, ginina ke siokor makmakor, kare siokor mat, teene ge ahik pe me uana ke hiua uabarah bak. ⁷Doha giniamer uatunar uit ke punggungala i uantinana tar uoho ueluelhung, karo hai tanengua, kara hikingua pah ke ua me kukuanan. ⁸Bor giniamer uatunar uit teke punggungala tar koto uaia. Ginina teke tabuara uaia tun, kare bungbunguanantiehe tun. Doha giniamer taninina ke kuselar touonor hangaul, doha giniamer ke ua tar tonomor hangaul, doha giniamer a hangaulur hangaul.”

⁹Doh Iesu ke kula poluk tasisina pare, “A tamata ger to talingana tar ualongor tere longor.”

Maene re uelhire uaranga Iesu

¹⁰Imuduhia ka la baka per manai, Iesu ke uangoul tagu tosono tamatang uakuakeluk, doho gisiamer tamat. Doh gisina teka dangata toro tengkana ro uelhire uarang geke uelhire tauetein Iesu.

¹¹Doh Iesu ke hire tapokis pare tasisin, “God ke uakalahara manasa tamiouom tar tengkanar uelhire uaouong tena nitoia God. Bosir tamata gesir gisiamer siok, gisina ra ueluatata pukis tar uelhire uarang. ¹²ⁿMaeit a haua ger nibolo uahiu, e turung pokoso pare o man.

‘Gisina ra bangampe tar inet,
bo ahik puk pah ra bang parok,
doh ra longlorompe,
bo ahik pah ra naman manate.
Te mara hikisina pah ra tur kauiur liu
teres niguata uasa,
kare kale liu God teres niguata uasasin.”

Aisai 6.9-10

Iesu ke uakalahara toro uelhire uaranga tar uatun

¹³Song ke kula Iesu tosono tamatang uakuakeluk pare, “Inggoum ahik pah mu naman manate toro uelhire uaranga rone? Hape marung ateoum tar giniamer uelhire uarang?”

¹⁴Gitir tang kalekinale tar iomo ke dudura tono uelhire God. ¹⁵A uatuna geke duduko tar lel, ngohina tasir tamata geke longoro tono Uelhire God, bo Satana puk ke la ualahur tunume, kare me kale liu toro uelhire roon ¹⁶Doho gisiamer tamata ngohinar butureitir papalauan geke dudukoigir uatun. Gisina ka longoro tono Uelhire

God, doh gisina ka kale ualahur tunugua tang roon, kara uahantieh. ¹⁷Bo teene o uelhire ahik mato hiua uaiaha tasisin, doh ko mokongua puk tar sisikinalikir binak. Tar binaka gere pokosor uel-sae ue me nimalianane tasisin, teeit ka kale pesina tono Uelhire God, gisina ra turung hiliu ualahur tun tang roon. ¹⁸Doho gisiamer tamata ngohinar koto geke dudukoigir uatun i rana toro uoho ueluelhung. Gisina teka longoro tono Uelhire God. ¹⁹°Bo gisina puk ra uahantieh tar niuangoulung gane i kot, doh ra malarantiehe pono menas mani bureh, doh ra mahamaha pono tar bureher inet. Gininanine tere uapekout tane tono Uelhire God, kara hikingua me niein uaia re turung kot-pokoso tur tasisin. ²⁰Doho gisiamer tamata ngohinar koteit ke dudukoigir uatun, doha kotana uaia tun. Teasina teka longor paroko tono uelhire God. Doh ka sanga dede tang roon, kare kot-pokosonguar niein uaia tasisin. Ngohina tar kukuanana ke burehe uainintieh, a giniamer a touonor hangaul, doha giniamer a tonomor hangaul, doha giniamer a hangaulur hangaul.”

O lam ahik pah ra uarakop tanein tar tohen

²¹°Doh Iesu ke uelhire uaranga poluk tasisina pare, “Me tamat e banot e keip ualeka toro lam iuma, kare la uarakop tane tana roono tar tohen ue e uamok i kukulebanga toro uat? Ahik! Inggono e uatoko toro lam i rana toro toktokan.

²²q“ A hauar inete re moko uaouo, ginina ra turung uakalaharaig, doha hauar inete re gom taneig ra turung pukaig. ²³Mai gere marang ualongor, pake ualongoro mare naman manate!”

²⁴°Inggono ke mene ualatuman poluk pare, “Namnamana hamas tun tar inete gero longoroin, ge hape ko kedanga pea tasir tamat, te hape ponompe ra turung kedanga peia, bo e la turung i rana uainintieh puk. ²⁵°Gete me tamata kaig mena inet, inggono ra turung heirin me giniamer inete poluk. Bor tamata ge ahik me inete tatan, ra turung kale liuig na siksikir inet.”

O uelhire uaranga tar uatuna geke tungar

²⁶Doh Iesu ke kula pono pare, “Na Nitoia God ngohina pare, a tamata ke dudura tar uatuna tena iom. ²⁷Inggono tamat e hohouo tar boung, kare gulete tar marein. Tar binakon a uatunanina ke tungara manas, kare tabuar, inggon e telempe hape ke tabuara penin. ²⁸A koto katongompe re uakotpokoso tananin, e uakikilanga per kamanan, song ter alaran, song re la pokosor kukuanan. ²⁹°Tar binaka re la mahohor kukuanan, inggonor tamat e tokout ualahur manasampe, ter hauon a binakang ueuere ke kotpokoso manas.”

O uelhire uaranga toro douk ra kilain o mastet

³⁰Doh Iesu ke mene poluk pare tasisin, “A haua paka uamisiana toin tena Nitoia God? Ue hingia ro uelhire uaranga ro banot o uakalahar? ³¹Na nitoia God te ngohina toro uatunar mastet gero sasalikintieh tar mamang uatuna gera lebeigane tar kot. ³²Gine o sasalik tun pe roon, roon o turung hua kai, karo la uleikintieh uain tar mamang doukane tar iom. A ranana roon e turungn uleik pon, doho tetiaua ra me turung tuha pono tenas niu tar momolouina roon.”

°4:19 Mat 19.23-24 °4:21 Mat 5.15; Luk 11.33 °4:22 Mat 10.26; Luk 12.2

°4:24 Mat 7.2 °4:25 Mat 13.12; 25.29; Luk 19.26 °4:29 Jol 3.13; UGO 14.15

Iesu e uelhire uaranga pukumpe

³³ Iesu ke mene keip tasisina tar bureher uelhire uarang ger siokona sira pare, re mene ualasira pe tasisina toro uelhire mara matotosina tar naman manate.

³⁴ Inggon ahik tun mate mene uakalahara me siokor inetenine ke meneig tasisin. Teeit a mamang menelikir nanon a uelhire uaranga kompe. Bo tar binaka puk ke la pahenaiono mesno tamatang uakuakeluk, inggono song ke mene uakalahara tasisina tar mamang inetelik.

Iesu ke kula tar rom e moko bukuk

³⁵ Na moloinar binakon, Iesu ke kula tosno tamatang uakuakeluk pare, “Ti sairkoutula tar pang giomehenar kodom.”

³⁶ Maeit gisina ka hiliu manasa tasir manai tamat, kara keip tatanon, inggon e panete teilimpe tar bout. O giniamehero bout ke la tagu pono tasisin. ³⁷ Doh ahik me manasan, kare u mer pang romo uleik, doha butuana uleik ke puahame i lolono tar bout, kare marang uounungua tar laur.

³⁸ Bo Iesu puk e hohouo rikinane i uoum tar bout, e dedeke rikin toro dedek. Maeit gisisir tamatang uakuakeluk ra kula tatanono pare, “Tang Ualasi! Inggahik pahosokoro tagu geti dudurieig?”

³⁹ Gine ke gulete pe Iesu, inggono ke louara tar rom, kare kula pare tar butuan, “Takout manas!” Doho hiarouo manas! Song ke molo uahiuor rom, kare la hiarouo tununguaon. ⁴⁰ Iesu song ke kula tosno tamatang uakuakeluk pare, “Ae maene rung sokoro inggoum? Inggoum halana harahampe tung tagorong man?”

⁴¹ Bo gisina puk ka sokorontiehe tun, kara ueldangata katongois pare, “Mair tamatonene? Maene a romo mer butuana ke longoro nomana tatanon?”

O Mahar 5

Iesu ke geil liu tur tasir liouana uasa tar tamat

5 Iesu mesno tamatang uakuakeluk ka la hunguko tar pang giamehenar kodomo uiluilohe i Galili tar painang Gerasa. ² Doh tar binaka ke la hiuono tar bout, a tang siokor tamat a nihikung liouana ke tauete turuha toro lebangang mat, kare lame tatanon. ³ Inggonor nihikung liouana e uoto uangoul puk manasampe toro lebangang uamoko tasir mat, doh ahik me tamata re banot e uih tane baka poluk tatanon. ⁴ Inggono ka uoto tiein tane bakaigir liman, doha toking pang keken, bo inggono puk e uoto salkout tar tiein, kare katego tar pang haeneng tar keken. Doh ahik pono me tamata re banotong kusa tane tatanon. ⁵ Tar mamang binakalik, tar boung mer marein, inggon e uiloho kompeane tar lebangang mat, dohi rana toro siusan, kare kalkaling ualeik, kare nulnula katingoin tar palau.

⁶ Tar binaka ke bang huara to pelaonotang Iesu i reh, inggono ke ualo uelhirila kare la hatup uahiuane i uoum tatanon. ⁷⁻⁸ Song ke kaling ualeik tun, kare kula pare, Iesu ger tuna God ger i ranantiehe tun, a haua ro marang guataia totoguo? Inggah o uamana tun tang God pare, ahik pahoturing uauelmahing totoguo.

Teeit Iesu ke kula manasa pare tar liouana uasa, “Ir liouana uasa! Tauete liu tur tar tamatene.”

⁹ Song ke dangata Iesu tatanono pare, “Mair hangomua?” Doh inggono ke mene hahaua pare, “Inggeim o manai,

ge inggeim pe o bureh.”¹⁰ Song ke kula tane uapopokoho poluk tang Iesu pare, ahik pahe uelueluata liuila tasisina me gime butur.¹¹ Tar buturion, o pang hueit ra einein teil tar pang giomehenar siusan i hutuna tasisin.¹² Doho liouana uasasit ka kula pare tang Iesu, “Kula tamiueim gering la uangoul tagu tasir hueitisila, uamaluana tamiueim gering la hiku tasisin.”¹³ Doh Iesu ke uamaluana tasisin, maeit gisina ka hiliu tur tar tamat, kara la hiku tasir hueit. Gisisir pang hueit here kaelaisane tar 2,000, ka siokor ualo uahiuoko tar urauanar kodom, kara la siokor dudur.

¹⁴Doh gisisir tamatang kaukeke tasir hueit ka bang, kara ualo liuingua. Kara la ueluatata ueltebeirisin toro uan, doh tar uan uleik. Temaeit o tamata ka longor, kara siokor languako tar la banga tar hauene ke kotpokos.¹⁵ Gine ka la pemesina tang Iesu, gisina ka me banga tar tamata geke hiku bakainir bureher liouana sioun re tabila pe, inggono ke loho tar gomono uaia, kare uia pono na ninaman, doh gisina ka sokorontiehe tun.¹⁶ Gisis ka me banga tar inetene teka la hire tasir gisiamuhe tar haua ke kotpokoso tar tamata ger nihikung liouan, doh tar haua ke kotpokoso tasir hueit.

¹⁷Temaeit gisina ka dangdangata tang Iesu tar hiliu tenas pang uanisin.

¹⁸Gine re lang panete tapokis pe Iesu tar bout, a tamatene ka hiku bakainir liouana ke dangdangata tatanono pare, Uamalauana totoguo u la tagu totomua!”¹⁹ Doh Iesu ahik mate uamaluana tatanon, bo ke kula puk pare tatanon, “O la tapokis puk tenang uan toso tahimulik, karo la hire tasisina tar mamang inetelik geke guataigir Tamata Noman totomua, ke ueldolomo pe.”²⁰ Temaeit a tamatono ke hiliu, kare la ueluatata tasir tamatang Dekapolis tar haua ke guataig

Iesu tatanon, doho tamata ka siokor lutarang touboul tun.

Iesu ke uatua tapokis tar kukuahalik, doh tang ger momouh

²¹Tar binaka ke sairkout tapokis polukula Iesu tar bout tar pang giomehenar kodom, o bureher tamata ka la tur uiloho tatanonane tar tektekenar kodom.²²⁻²³ Doha tang siokor tamatang uoum keipane tar umang lotu ger hangana tang Jairus ke lame ke bang huara pe tang Iesu, kare me baka uahiuainane tang Iesu, kare me kula uapopokoho tatanono pare, “A tuguo ger kukuahalik e marang mata manas. Inggga o la uateuele tunume, karo la uaponala tar limoum tatanono mare banoton e uia, kare uangoul baka poluk.”

²⁴Maeit Iesu ke la tagungua tatanon, doho burehentiehe ponor tamata ka la tagu tatanon, doh ra kusukus uiloho tun tatanon.²⁵ Doha tang siokor kuah a tutung bakue e la tagu teil pono tasir manai. Inggonor kuaha ke kaleinir tutung bakue ke banoto toro hangaul, doho torik ro krismas.²⁶ Inggono ke kale tur tar uleikintieher uelmahing tasir doktasis ke la hahais, kare uakapa to pono tena mani tasisin, doh ahikimpe pahe uia sikor, no maton o ululeik uaintiehe puk.²⁷ Tar binaka ke longoro kout pe inggono tang Iesu, inggono ke uaheheke turulainane i muduhia tasir tamat, kare la tuha tono hikhikuon.²⁸ Teene inggono ke namana pare, “Getu tuha pukuo tono hikhikuon, inggo u turung uia manasampe.”²⁹ Ahik me sikir manasan, o deuating tatanono ko uakenua tar noro tauet, doh inggono ke la hagouo tar tukununa ke hiliu per niduh.

³⁰^vDoh Iesu ke hagouo uateuele tun ke hiliu per nitampopokoho tatan. Maeit inggono ke tur kauiuirane i uatinanina

tasir manai, kare dangata pare, “Mai ke tuha tonogo hikhikuo?”

³¹ Doh no tamatang uakuakelukono ka mene tapokis pare, “Ingga o bang huara ponompe tasir manaisine ra kusukus to-tomua, karo marang dangatampe, Mai ke tuha totoguo?”

³² Bo Iesu puk e banga uiloho dedempe tasir tamata tar marang ate pare, mai ke tuha tatanon. ³³ Doh gitir kuaha ke ate manasa tar haua ke kotpokoso tatan. Maeit ke lame, kare me bake uahi-uainane tar kekena Iesu, kare poroporo keip tar nisokor, song ke hire tauete tun toro man. ³⁴ ^wDoh Iesu ke kula tatanono pare, “Ir tug! Ingga tereng nitagorong mana ke uauia totomua. O la keip toro hiarou, rongo mata ingga ko kapa manas.”

³⁵ Gine re menmene haraha pe Iesu, o gisiameher tamata ka la turume tena uma Jairus ger tamatang uoum keipane tar umang lotu. Gisina ka me hire tang Jairus pare, “A tumua deh ke mata manas, ae maene ro guata koutkout baka polukia tar tang ualansir?”

³⁶ Bo Iesu puk ahik mate namana tun tenas uelhiresin. Inggonono ke hirempe tang Jairus pare, “Ahik paho sokor, bo o tagorong mana puk totoguo.” ³⁷ Song ke kula tane Iesu tasir gisimaher tamata pare, ahik pah ra la tagu tatanon. Bo Pita puk manasa mes Jems doh Jon ge tahina Jems teka la tagu tatanon. ³⁸ Tar binaka ka la pokoso pelasina tena umar tamatang uoum keipane tar umang lotu, doh Iesu ke banga teres niuel-dolomor tamata ra kiring pe. ³⁹ Inggonono ke la lekala ium, kare la mene tasir tamat, kare dangata pare, “Ae maene rung kiringioun, karung ualagoreih? A keketik dehene ahik mata mat, e hohouo kompe!”

⁴⁰ Doh gisinar tamata ka uanuano tatanon. Bo inggonono puk ke kula tasisina ra tauet i kalahar. Song ke kila ualekalaono tar butur re rikinir kukuahalik tang tamanar keketik, doh tinan menia tena tang touonor tamatang uakuakeluk. ⁴¹ ^xInggonono ke la kusa tar limanon, kare kula tatanono pare, “Talita Kumi,” (a puhion e kula pare, inggar kukuahalik o gulet) ⁴² Doh inggonener kukuahalik no siokor hangaul, doho torik manasa no kirismas, inggonono ke uolo tentur ualutar, kare latlateil uiloh! Doha toking tinanono kura siokor uahantiehe tun. ⁴³ Bo Iesu puk ke ualatoho tane uapopokoho tasisina pare, ahik pah ra hirhire mo tamata tar puhion, song ke kula tasisina ra heir tatanono me niein mare ein.

O Mahar 6

Iesu ka ueldein i Nasaret

6 Iesu ke hiliu tar uanion, kare la tapokis keip tosno tamatang uakuakeluk i Nasaret ter uan uleikir nanon. ² ^yDoh tar Mareining Pepe Uah, Iesu ke la mene ualasila to tar umang lotu, doho bureher tamata ka lutarantehe tun. Kara ueluedangatais pare, “Ia ke kale turono tar niguataninane? Hingiar niate uaia ka heirin tatanon? Hape maene re banoton e uatouo tar inetenine? ³ Inggonono dehene ter tamata ger tang tuha um ger tuna Maria, doh ter tahina Jems mes Josep, Judas, doh Saimon. Doho bung tahinalikiono ra uangoul taguane tagigeig?” Gisina ka hagouo uasa tatanon, kara hikingua pah ka tagorong mana tatanon.

^{4z}Song ke hire Iesu tasisina pare, “Na propet God ra ueltadainane toro mamang buturulik. Gane puk manasampe tena uan katongono te ahikiono pah ra ueltadain menia ponompeane i uantinanina toso tahinalikion, doh gane katongompe tasisina ro matmatame.”

⁵Temaetit inggon ahikingua mate banot e guata to me nitouo tar uanion. Bo inggono puk ke banot e uaponola tar limana tasir gisiameher tamatisisir momouh, kare uauia tasisin. ⁶Doh inggono ke lutarantiehe tun, ahik pesina mes nitagorong mana tatanon.

Iesu ke ualatue tasir siokor hangaul, doha tang torikir aposoul

I muduhia Iesu song ke la hahai toro uauanilik, kare mene ualasira tasir tamata tonu Uelhire Uaia God. ⁷Inggono ke kila toto tasir siokor hangaul doha tang torikir tamatang uakuakeluk, kare heir tasisina tar nitampopokohong geil liu tasir liouana uasa. Song ke kula tasisina ra la tantan torik tar kalekinale.

^{8a}Doh inggono ke kula uapopokoho pono tasisina pare, “Getung laoum, inggoum ahik pah mu kale me inet, bo mu kale puk tenami tukan. Ahik pah mu kale me niein ue me tolah, doh ahik pah mu duk me mani. ⁹Mu hikumpe tonomio su, kara hik pah mu hiku uelbabar mo giamehe ro hikhiku. ¹⁰Tar binaka rung la pokosoum tar uan, karung la leka me siokor um, mu uangoul tar umon e tuka tar binaka rung hiliu tar uanion. ^{11b}Doh getung laoum tang hingiar uan, doh ahikir tamatang tar uaniono pah ra uaha uangoul tamiuoum ue ra de mata ualongoro tamiuoum, titire liu toro uoung tar uaniono tar kekeimiu tar binaka rung hiliu mara bang parokosina ka guata uasa pe tamiuoum.”

¹²Song ka la hahaisin, kara mene tasisin ra ueltuparis tar uapalih tenas niguat.

^{13c}Doh gisina ka geil liu tasir bureher liouana uasa, kara uauia pono tasir bureher momouh ra tunaha keip peis tar uaiuainar oliv.

Herot e namana tang Iesu pare, te Jon ger tang uahuhu

^{14d}Herod ger toia ke longoro tar haua ke kotpokos, teetit ka ueliatie tun pein Iesu. Doho gisiomeher tamata ka kula pare, “Iesu te Jon ger tang uahuhu ke tua tapokis tur tar keu, temaene na nitampopokohono tar uatouo tar inet.”

¹⁵O gisiomehe ra kula pare, “Inggono te nu Eilaija.” Bo o burehe puk ra kulampe pare, “Inggono deha propet ngohina tasir propeiting sioun.” ¹⁶Bo tar binaka puk ke longoro Herod tar puhon, inggono ke kula pare, “Inggono deh te Jon, giane ku tokoutuio ro lun, ke tua tapokis tur tar keu!” ¹⁷Ge Herod katongo pe teke ualatoho tasir uiluiliatung tar la reih tang Jon, kara uamokoin tar umang uih, teetit Herod e malarantiehe tang Herodias. Herodias tena kuaha Pilip ge tahinon, doh inggono ke le poluk tatanon. ^{18e}Doh Jon e uoto hire tang Herod pare, “Inggono deh ahik paha uia ko kale pe ingga tena kuaha tahim.”

¹⁹Maeit Herodias ke nimalianantiehe tun tang Jon, dohe malahir pare, e tung pous tatanon. Bo ahik puk pahe banot. ²⁰Teene Herod e sokorontiehe pono tang Jon, kare kaukeke pono tatanono gere ate peono tang Jon pare, a tamata kodkodoh, kara dedeil. Herod ahik pahe uoto hagouo uaia tar binaka gere mene tang Jon, bo inggono puk e uoto uaha tar ualongoro tena menemenon.

²¹Na binaka uaia tun Herodias ke kotpokoso manasa tar guata me inete

^z6:4 Jon 4.44 ^a6:8 Luk 10.4-11 ^b6:11 Apo 13.51 ^c6:13 Jas 5.14

^d6:14 Mat 16.14; Mak 8.28; Luk 9.19-20 ^e6:18 UGO 18.16

tang Jon. Tar binaka ke namana tapokis Herod tar binaka ka pohain, inggono ke guata toro iru, kare uairu tosno tamata uleik, mesno tamatang uoum keip tasir tamatang uiliatung, karo mamahoholik i Galili. ²²Tar binaka ke lekamer tuna Herodias ium, kare me doum, inggono ke uauaha tun tang Herod mesno tamatasitir nikila toro iru. Doh gitir toia ke kula pare tar kuaha kalan, “Gero dangata ingga me inete totoguo, inggo u heirompe.”

²³Doh inggono Herod ke ualapagaha katongoin, kare kula pare, “Ge me haua ro dangatia inggo u turung heir, u banotong uelpakaha tenag mamang inetelik, karu heir totomua.”

²⁴Maeit inggonor kuaha kalana ke la tauete ualahur tar um, kare lame tang tinan, kare me kula pare, “A haua ru dangataio?” Doh tinanono ke mene hahaua pare, “Ingga o dangata toro luna Jon ger tang uahuhu.”

²⁵Doh ahik me manasan, gitir kuaha kalana ke la tapokisila tar toia. Kare la kula tatanono pare, “Inggo u malara pare, ingga o heir manasene daana totoguo toro luna Jon ger tang uahuhu, ra uamokolain tar peileit.”

²⁶Doh nu Herod ger toia ke longor, kare duhuntehein, bo teene inggono ke namana tena niualapagah, kare tesir tamatasitir nikil, temaeit inggon ahik pah ke matot e ut. ²⁷Doh tar binakene, inggono ke ualatoho tar tang siokor e la kaleha toro luna Jon. Inggonor uiluiatung ke la manasa tar umang uih, kare la tokout koutungua toro luna Jon, ²⁸kare la keip tapokisihia toro lun, o moko teil tar peileit. Inggono ke me heir tana roono tar kuaha kalan, kare la heiringuaono tang tinan.

²⁹Gine ka longoro pe no tamatang uakuakeluk Jon tar puhiono ke kot-

pokoso pe, gisina ka lame, kara kale tar tukununon, kara la uamokoin toro lebangang mat.

Iesu ke ualaein tasir tamat e matotois tar tolimar taosein

^{30f}O aposoul ka tapokis manas, kara me tur uiloho tang Iesu, kara me ueluatata tar haua ka guatain, doh hape ka namana pe ³¹Song ke kula Iesu tasisina pare, “Inggeig deh paki hiliu baka tasir tamatasine mari la pepe uaha bak.” Inggono ke kula pare, teene o burehe per tamata ra uelueltapokise tasisin, doh gisin ahik menas binakang ein. ³²Maeit gisina ka la panete manasa mes paheis tar bout, kara la tar butur ger tabotan. ³³Bo o tamata burehe puk ka banga tasisina ka hiliu pe, kara bang paroko tasisin, kara ualohia i kot, kara la pokoso uoum tasisin. ^{34g}Doh tar binakene ke la hung peko Iesu, inggono ke ueldolomo tasisina ka me pokoso uoum pe. Teene gisina ngohina tasir sipsip ge ahik me tamatang kauek. Temaene ke ualasiro Iesu tasisina tar bureher inet.

^{35h}Doh tar binakonene, inggono ke molointiehe manas. Temaeit ka lame no tamatang ualelukion, kara me kula tang Iesu pare, “Inggono deh ke molointiehe manas. Doha buturene a butur paden, kara hik me uanane. ³⁶Uelueltula tasir tamatasine ra la ueltebeir toro uan, kara la sir katongo mes niein.”

³⁷Bo Iesu puk ke mene hahaua tasisina pare, “Inggoumumpe rung heir me niein tasisin.”

Doh gisina ka hire tapokis poluk tatanono pare, “Me mani gera bulauain me niein mara la uelmatoutur tamatasine pake la matoto sira tar bulauanar tamata tar tualir bialok. Ingga o malara pare, mi la bulaeim me niein me mani sira paar?”

³⁸Doh Iesu ke dangata tasisina pare, “O touiha ro bereit kaisane tamiuoum? Mu la banga tagin.”

Gine ka la banga pesin, gisina ka la hire pare, “O tolima ro bereit rasine, doha torik pukur ian.”

³⁹Song ke kula Iesu tasisina pare, “Inggoum mu uatabila toto hahai tasir tamata toro garas.” ⁴⁰Temaetit gisina ka tabila manas. Kara tabila pare, o giniameher toto e matoto tar tolimar hangaulur tamat, doho giniameher toto a hangaulur hangaul. ⁴¹Doh Iesu ke kale toro tolima ro bereit, doha torikir iana, kare uatakai i ran, kare kulang uauia tang God. Song ke pis mahmahara tar bereit, kare heir tosono tamatang uakuakeluk mara bul ueltebeirisina tasir tamat. Inggono ke pakaha pono tar toking ianane tasir tamat. ⁴²Gisina ka siokor ein uakap, kara siokor mahmahur. ⁴³Doho aposoul ka hedongola tar mokomoko tar siokor hangaul, doha torikir tohen. ⁴⁴Gisinasin ka ein tar nieininin ke la banotois tar tolimar taoseinir tamat.

Iesu ke hai i rana tar laur

⁴⁵Doh ahik me manasan, Iesu ke uapanete tosono tamatang uakuakeluk tar bout, kara tapokisila i Betsaida. Bo inggono ke uangoul, kare kula tasir tamata ra uelueltageih. ⁴⁶iI muduhia inggono song ke la kai taro i rana tar siusana me pahen, kare la lotu. ⁴⁷Doh nareu tun manas, a bout e boko harahampe i uantinanina tar kodom. Bo Iesu puk e uangoul harampe me pahen i kot. ⁴⁸Doh inggono ke banga taro re uasuasiaka peinir bout. Doho tamatang uakuakeluk ka takusing tar hua tutupa tar romo uleik. Doh na lulen Iesu ke la taro tasisin i rana tar laur. Inggono ke lang siaua uadeil puk tasisin. ⁴⁹jBo gisina puk ka bang

huara tatanono re hai peha tar laur, kara namana pare, a liouanon, kara kalkaling ualeikintiehe tun. ⁵⁰Gisina ka sokorontiehe tun ka banga pe tatanon. Bo Iesu puk ke mene ualahur tun tasisin, kare kula pare, “Auia dehon, gine te Inngo puk, ahik pah mu sokor.” ⁵¹kSong ke panetono tar bout, kare kapar rom. Gisina ka lutarantiehe tun tar haua ka bangain. ⁵²Gisina ahik dedempe pah ka naman manate tar inete ke guatain Iesu tar bereit. Gisina pe o mahang ate, kara hik dedempe pah ra tagorong man.

Iesu ke uauia tasir bureher tamat i Genesaret

⁵³Gine ka sairkout pela Iesu mesno tamatang uakuakeluk tar kodomo uiluilo, gisina ka la hungungua i Genesaret, kara la oto tar bout. ⁵⁴Ginampe ka hiua liu pesina tar bout, o bureher tamatang Genesaret ka bang paroko tang Iesu. ⁵⁵Kara ualualo ueltebeir toro uan, kara hire tasir tamata uakapa ra keipime tasir momouh tang Iesu tar buturene re uangoulion.

⁵⁶Iampe re la Iesu, gane toro uauanilik, doh gane toro uan uleik ue gane tar tektekenar pang uan, o momouh ra uarikin koutkoutisane toro buturung uabulbulau. Gisina ra dangata uapopokoho tatanono tar uamalua tasisina tar tuha puk tar surunar gomonor nanon, doh gisis ka tuhtuha tatanono ka siokor uia uakap.

O Mahar 7

No uelhire God tero i ranantiehe tenas mener mahoh

7 O Parisi mesir gisiamer tamatang ualualasira tena ualatur lotu ka la tur i Jerusalem, kara me tur uiloho

tang Iesu. ²¹Gisina ka me banga tu-para pono tasir gisiamene no tamatang uakuakelukono ka ein pe, bo ahik puk mata uabusa baka uoum tar limas. ³O Parisi mesir Ju ra uoto uakeluk tenas niguatang sioun pare, geta hikisina pah ra uabusa baka tar limas tar uakeluk tar niguatang sioun, gisin ahik pah ra banotong ein. ^{4m}Tar binaka ra la turumesina tar buturng uabulbulau, gisina ra uahuhu baka uoum tar limas, song ra banotong ein. Doh gisina ra uakeluk pono tar bureher niguat, ngohina pono tar uahuhu nar kap me ro sosopen, doho ketol, kara teboulung ein.

⁵Maeit o Parisi mesir tamatang ualualasira tar ualatut ka dangata tang Iesu pare, Ae maene ahik nongo tamatang uakuakeluka pah ra uangoul, kara uakeluk tagu tenas niguatar mahoh, ahik pah ra uahuhu baka tar limas song ra ein?

⁶Doh Iesu ke hire tapokis tasisina pare, Aisaia ger propet ke uamana no-manampe tar binaka ke uatagin pe tami-uoumur tang pepe boh. Inggon a nibolo pare,

“O tamatasine ra ueltada keip puk to-
togo tar uauasa puk,

bor koulousisin e uairehe tun totoguo

⁷Gisina ra uoto lotu keip totoguo tar lotu
a tabo tengkan,

kara uoto mene ualasira tar ualatut ahik
paha nang God.” *Aisaia 29.13*

⁸Inggoum kung kuse luara manasa tena ualatoho God, karung uoho uanono puk tar niguatang gane i kot.

⁹Doh Iesu ke hire poluk tasisina pare, “Inggoum mu ate uaia tun tar hagar-
ing uamoko uagele tena ualatoho God marung uakeluk tun tenami niguat!
¹⁰ⁿGe Moses pe ke kula pare, ‘Ueltada

tang tamoum me tinoum, doh mair tamata gere guata uasa tar toking tinan, inggono paka uiliatung pousin.’ ^{**11}Bo inggoum puk mu kula pare, ‘Inggon a uia tar tamata gere kula pare tar tok-
ing tinan, inggo ueldoloum tun, inggo ahik pahu banot u poul tamiraoum. Ge inggo pe ku heir tar nipoul geku marang heir bakain tamiraoum tang God.’ ¹²Doh inggoum ahikingua pah mu uamaluana tatanon e guata me inete tang tinana doh taman. ¹³Temaeit inggoum mu uoto guatangua tar niguatang gane i kot tere popokoho uain tena niualatut God. Doh inggoum mu uoto guata tar bureher niguata sira pare.

**Iesu ke uelhire uakalahara tar inete
re guata tar tamat ahik paha
delauana tar matana God**

¹⁴Iesu ke kila toto uagiomehe poluk tasir tamat tar lame tatanon, kare me kulono tasisina pare, Inggoum uakapa tun mu siokor ualongor, karung naman man-ate tar puhene. ¹⁵⁻¹⁶^oA ineteng kalahara tar tamat, kare lala i lolono tatanon, ahik pah tere banotong guata tatanono ahik paha delauana tar matana God. Bo a inete gere tauete tur tar tamat, ginina tere guata tar tamat ahik paha delauan.

¹⁷Iesu ke hiliu tasir tamatasin, kare la ium. Doh no tamatang uakuakelukono ka dangata tatanono toro tengkana ro uelhire uarang roon. ¹⁸Doh Iesu ke danagata tapokis tasisina pare, “Inggoum ahik pono pah kung naman man-ate? Ahikioum pah mu ate pare, ahik pe me ineteng kalahara re lekame i lolono tar tamata kare banotong uakotpokoso tar tamata pare, inggon ahik paha delauana tar matana God? ¹⁹Ge ginina pe ahik pahe banot e la hiku tar kolonon,

****7:10** Bolobolong Nas Kalekinaler Pater 20.9

l7:2 Luk 11.38 **m7:4** Mat 23.25 **n7:10** KT 20.12; 21.17; Ual 5.16

o7:15-16 Apo 10.14-15

bo ginin e la moko puk toro balanon, kare tauete tur polukumpe tar tukunun.” (Gine ke mene pe Iesu paar, Inggono ke uahirengua pare, a mamang niein uakapa tun “a delauan”.)

²⁰Doh Iesu ke hire poluk pare, “A hua gere tauete tur tar tamat, ginina tere guata tar tamat ahik paha delauan. ²¹⁻²²Ge a inete pe gere tauete tur tar tamat, ginin e latur tar kolonon, e tauete turur ninamana uasa, a niguatang ur, o ueuenau, tang haluh pous, kat-ego toro le, tang uahahai, ueluelsae, bohoboh, tampolil, gehegeh, ngur, mahang kul, karo tuktukar. ²³A mamang niguata uasalikinine e la tur i lolono tar kolonar tamat, doh teanina tere bantong guata tar tamata ahik paha delauana tar matana God.”

A kuahang Ponisia e tagorong mana tun tang Iesu

²⁴Song ke hiliu Iesu tar uanion, kare la tar butur e uahuhut tar uan uleik i Tair, kare lekangua tar um. Inggono ke de me tamata mate ate re uangoul peon, bo inggon ahik pahe matot e ou. ²⁵Toro mana tun, ginempe ke longoro kout per tang siokor kuaha ger nihikung liouanar tun pare, Iesu e uangoul tar um. Inggono ke lame, kare me bake uahiuainane i koto tar kekena Iesu. ²⁶Doh inggonor kuahono ahik paha Ju, a peng Ponisia tar pang uana uleik i Siria. Inggono ke dangata uapopokoho tun tang Iesu tar geil liu tar liouana uasa tar tunon. ²⁷Iesu ke kulangua tatanono pare, “Uamaluna tasir keketik gera ein uabanoto baka uoum, ge ahik peono paha kodkodoho tar ualaein teres nieinisina tasir lo.” ††

²⁸Bo a kuaha puk ke mene hahaua tatanono pare, Tamata Noman, o lo ra uoto uangoul i kukulebanga tar teboul,

kara ein tar siksikir niein ger eisir keketik gere pungpung i kot.

²⁹Song ke kula Iesu tatanono pare, “Teene ko mene tapokis uaia tun pea, gon o la manas, a liouana uasa ke hiliu manasa tar tumua.”

³⁰Maeit gitir kuaha ke la tapokis tena um, kare la banga tar tun, e hohouo uaia kompe toro uat, a liouana ke hiliu manasa tatanon.

Iesu ke uauia tar tamat a kamelong kara pau

³¹Song ke hiliu Iesu toro uan gere uahuhut i Tair, kare lih koutula tar uan uleik i Saidon, kare la uahiuako tar kodomo uiluilo i Galili, song ke la lihila tar painang Dekapolis. ³²Tar buturon, o tamata ka ueliuime tar tang siokor tamata tang Iesu, a tamaton ahik pahe banot e men, kara kamelong. Gisina ka me dangata uapopokoho tang Iesu tar uaponala tar limana tatanono mare uia. ³³Iesu ke keip liu tar tamatonane tasir manai, song ke uamoko tar toking kamot limana tar toking talinganon, kare lou tola tar limana tar nilou, kare tuha tar mianon. ³⁴Song ke banga kai taro Iesu i Heuen, kare ungang ran, kare kula tar tamaton pare, “Epata!” (A puhung uelhireon e kula pare, “Takapuk!”) ³⁵Ahik me sikir manasan a toking talinganono kura takapuk, doha mianono song ke guluh, kare uakekenanguaono tar men.

³⁶PDoh Iesu ke ualatoho uapopokoho tun tasisina pare, ahik pah ra hirhire mo tamat. Bo gine puk ke guata uaia peono tasir bureh, o tamata ra ueluatata dedempe tatanon ³⁷QO tamata ka siokor lutarang touboul tun, kara kula pare, “Inggono deh ke guata uaia tun tar bureher niguat. Gine meniampe ke uauia

††7:27 O tamata ahik paho Ju o Ju ka kilais o lo.

¶7:36 Mak 1.43-45 ¶7:37 Ais 35.5

pono tasir kamelong, doho pau ka mene pon.”

O Mahar 8

Iesu ke ualaein tar toto tamat e matoto tar toueitir taoseinir tamat

8^rTar binakanin o burehentiehe polukur tamata ka la toto polukume tang Iesu. Gine ahik pesina mesi niein mata ein, Iesu ke kila tosno tamatang uakuakeluk, kare kula pare, ²“Inggo u ueldolomo tun tasir tamatasine, gisina ka uangoul tagu totoguo tar touonor marein, doh ahik manasa mes niein. ³Geru kula inggo tasisina ra la tosno sio uan tar binaka ra gog, gisina ra dud tola tar lel, teene o gisiamehe tasisina ka la turume i reh.”

⁴Doh no tamatang uakuakelukono ka kula tapokis pare, “A buturene a tabotan, doh pakiangua ri kale turieig me niein mara ualaeinig tasisin?”

⁵Doh Iesu ke dangata tapokis tasisisna pare, “O touiha ro bereit kaesiat tamiuoum?” Doh gisina ka hire tapokis pare, “O mouit rasine ura mok.”

⁶Iesu ke kulangua manasa tasir tamata ra tabila i kot, kare kale toro mouit ro bereit, song ke kulang uauia tang God, kare pispis tar bereit, kare heir tosno tamatang uakuakeluk mara bul tasir tamat. Doh no tamatang uakuakelukono ka guata sirampe. ⁷Gisina ra kale teil pono tasir iianalik. Inggonono ke kulang uauia pono tananina tang God, kare kula poluk tosno tamatang uakuakeluk ra bul hahai tasisin.

⁸O tamata uakapa tun ka siokor ein uamatoto tunis, kara mahmahur. I muduhia o tamatang uakuakeluk ka utela tar mokomok i lolono tar mouitir

tohen. ⁹Here kaelainane tar 4,000ir tamata ra uangoul tar binakon. Gine ke ueluelu liu baka pe Iesu tasisin. ¹⁰Song ke la panetono mesno tamatang uakuakeluk tar bout, kara lala tar giameher painang Dalmatuna.

O Parisi ka la dangata me niuahireng Heuen

¹¹O Parasi ka lame, kara me dangdangata tang Iesu tar puhpuhung dangat. Gisina ka marang uedanga tang Iesu, gisina ka marang banga me uaparok gere la tur i Heuen. ¹²Inggonono ke undang ran, kare kula pare, “Ae maene ra dangatar tamatang daana me uaparok? Inggo gine ru hire tamiuoum toro mana tun, ahik me uaparoko ra turung heirin tamiuoum.” ¹³Song ke hiliuiono tasisin, kare la panete tapokis tar bout, kare sairkout polukula tar pang giomeh.

O uelhire uaranga teres isir Parisi doh Herot

¹⁴O tamatang uakuakeluk ka malabobor mata kale tagu me bereit, bo ra kale teil puk manasampe toro siok, ka panete pe tar bout ¹⁵“Doh Iesu ke uatagin tasisina pare, “Tagin teil! Banga uauia tun teres isir Parisi doh na is Herod.”

¹⁶Maeit gisina ke uelhalata katongois, kara kula pare, “Here teene dehon ahik pe inggeig pahi kale teil me bereit.” ¹⁷“Iesu e ate manas, hape ka ueluelmene peisisin, maeit ke dangata pare, “Ae maene rung ueluedangatasium pare, ahikieig megie bereit? Inggoum halanampe tung bang paroko ue halana tung naman manate?” ¹⁸Inggoum a to matamiuoumpe, bo maene ahikioum pah mu bang luar. Doh inggoum a to talingoumiu, bo maene ahikioum pah mu longor? Doh maene ahik ponoum

^r8:1 Mak 6.35-44 ^s8:12 Mat 12.39; Luk 11.29 ^t8:15 Luk 12.1

^u8:17 Mak 6.52

pah mu namana dede? ¹⁹vTar binaka ku pakaho toro toloma ro bereit geke einisir 5,000ir tamat, a touihar tohen kung uauounusioum tar mokomok?" Kara kula hahauasina pare, "A hangaul doha torik."

²⁰"Doh tar binaka ku pispisio toro mouit ro bereit geke ualaeinis tar 4,000ir tamat, a touihar tohen kung uauounusioum tar mokomok?" Kara kula hahaua polukusina pare, "A mouit."

²¹Maeit Iesu ke dangata poluk pare tasisin, "Inggoum halanampe tung naman manate?"

Iesu ke uauia to i Betsaeda tar tang siokor tamat a kut

²²Gisina ka la me i Betsaeda, doho gisiameher tamata ka keipime tar tang siokor tamat a kut, kara me kula uapopokoho tang Iesu tar tuha tatanon.

²³Doh Iesu ke kusa tar limanar kut. Tar binaka ke loula Iesu tar matanon, kare uaponola tar limana tatanon, song ke dangata tatanono pare, "Ingga o bang huarampe me inet?"

²⁴Doh Inggono ke banga kai i ran, kare kula pare, "Inggo u bang huara tasir tamat, gisina ngohina tar douk gere latlateil uiloh."

²⁵Doh Iesu ke uamoko polukula tar toking pang liman tar matanon. Inggonor kut, song ke banga ualuhluh, kare banga uaia tun poluk, kare bang paroko uaia tun tar mamang inetelik. ²⁶Maeit Iesu ke uelueltula tatanon e la tena uan, kare kula tane pare, "Ahik paho leka tapokis tar uaneitir uleik."

Pita ke hire tauete pare, mai tun Iesu

²⁷Iesu mesno tamatang uakuakeluk ka hiliu i Galili, kara la uamoto taro

toro uaning Sisaria Pilipai. Gine ra lala pelasina tar lel, inggono ke dangata tasisina pare, "O tamata ra kula pare, maio?"

²⁸wDoh gisina ka hire tapokis pare, "O gisiamehe ra kula pare, ingga te Jon ger tang uahuhu. Doho gisiamehe ra kula pare, ingga Elaija. Doho gisiamehe ra kula pare, ingga ter tang siokor propeiting sioun a nang God."

²⁹xSong ke dangata Iesu tasisina pare, "Bo inggoum mu kula pare, maio?"

Doh Pita ke mene hahaua pare, "Ingga te Kristo."††

³⁰yBo Iesu ke kula tane uapopokoho tasisina pare, "Ahik pah mu hirhire uel-tebeir me tamata maio."

Iesu ke hire pare, e turung mat

³¹Song ke uakekene Iesu tar hire tosno tamatang uakuakeluk pare, "A Tunar Tamat e turung kale uelmahing tar bureher inet, doh noso mahohor Ju, doho paterere uleik, doho tamatang ualualasira tar ualatut ra turung ueluelde tatanon. Inggono ra uiliatung pousin. Dohi muduhia tar touonor marein inggon e turung tua tapokis poluk." ³²Doh gine ke uakalahara uaia tun pe inggono tasisin, Pita ke kusela tatanonane i tekteken, kare la kula pare, inggono paka hik baka pahe mene sira paar. ³³Bo tar binaka puk ke kauiurilaono tosno tamatang uakuakeluk, inggono ke uelkukur tang Pita, kare kula pare, "Hiliu totoguo Satan! Ingga ahik paho uakeluk tena ninamana God, o uakeluk puk teres ninamanar tamat."

††8:29 A tengkana toro uelpouh Kristo te pare, A tang siokor tamatar nikedang, kare pikuring God tar me kale tapokis tosno tamat.

^{34z}Doh Iesu ke kilame tasir manai tamata menia tosno tamatang uakuakeluk tar lame tatanon, kara me ualongor. Inggono ke kula pare tasisin, “Ge me tamat e marang uakeluk totoguo, inggono pake de tar kapil tar haua re malaraiḡ, kare huata tena korose, song re uakeluk totoguo. ³⁵Gero kapilia tenang nitua totoum katong, inggon e turung rou. Bo gero heiria tenang nitua tar hangougou, doh toro Uelhire Uaia, ingga o turung tupara tenang nitua. ³⁶Doh gete me tamata re uoho uanonontiehe tar mamang ineteliking gane i kot, na nituaon e turung rou, hapengua re turung poul per mamang inetelik tatanon? ³⁷Me hauar inete re uelmatout tola tar nitua? ^{38a}Doh mair tamata re matala totoguo, doh tonogo uelhireo tar binakene daan, o tamata ra de tang God, kara guata uasa, a Tunar Tamat e turung matala pono tar tamatono tar binaka re tapokis polukume tena uiniatoro Taman menia tasir anggelou gesir dedeil.”

O Mahar 9

9^bDoh Iesu ke hire poluk tasisina pare, “Inggo gine ru hire toro mana tamiuoum, o gisiameher tamata kaeisane halana ta mat e tuka tar binaka ra turung banga tena Nitoia God gete kotpokoso keipiha tar nitampopokoh.”

A tukununa Iesu ke uapalih

^{2c}Kura karuh bakar tonomor marein, Iesu ke kilo tas Pita, Jems doh Jon, kara la kai taro tar siusan a i ranantieh ge ahik mo tamat. Tar buturiono teke la uapalih tor tukununa Iesuane i uoum tasisin. ³Na hikhikuono ke la gaugauil,

kare balobal, ke gaugauilintiehe uain poluk taninit ra uahuu turigane i kot. ⁴Doh Elaija me Moses kura pokos, kaura me tur tagu tatanon, doho tamatang uakuakeluk ka banga tasrasin ura menene pe tang Iesu.

⁵Maeit Pita ke kula tang Iesu pare, “Inggono deh auia tun king me uan-goul pe inggeimane. Inggeim deh mi tuha me touonor umane, me sioko me noumua, me siokor nang Moses, kare me siokor nang Elaija.” ⁶Pita ke toboulun-tiehe hape re mene pe, teene gisina ka sokorontiehe tun.

⁷Song ko hiuaha ro mahar langit, karo me gom tane tasisin. Kare mene turuher tamata toro mahar langit pare, “Gine ter tuguo geru malarantiehein. Mu longoro tatanon!” ⁸Ahik me manasana tar binaka ka banga uilohosin, gisin ahik pah ka bang huara baka poluk me tamat, te Iesu puk manasampe me pahen.

⁹Gine ra la uahiuu tapokis pekosina tar siusan, Iesu ke kula tane uapopokoho tasisin ahik pah ra ueluatata me tamata tar haua ka bangain, e la tukampe gete la tua tapokis tur bakar Tunar Tamata tar keu. ¹⁰Doh gisina ka uoho uanono toro uelhire roono tatas, kara ueldangata katongois pare, “O uelhire haua roono rone, A tamat e tua tapokis tar keu?”

^{11d}Doh gisina ka dangata tang Iesu pare, “Ae maene ra kular tamatang ualatut pare, Elaija tere turung la baka uoumuha?”

^{12e}Doh Iesu ke mene hahaua tasisina pare, “Roon o man! Elaija e uoum teilimpe tar me uakodkodoho tar mamang inetelik. Bo ae maene ka boloin ro ueluatatang sioun pare, ‘A Tunar Tamata ra turung uauelmahingintiehein, kara uelueldein?’ ^{13f}Bo inggo u hire puk tami-

^z8:34 Mat 10.38-39; Luk 14.27 ^a8:38 Mat 10.33 ^b9:1 Mak 13.30

^c9:2 Apo 3.22; 2Pi 1.17-18 ^d9:11 Mal 3.1

^e9:12 Ker 22.1-18; Ais 53.3; Mal 4.5-6 ^f9:13 Mat 11.14

uoum pare, Elaija ke la manasaha, doh gisina ka guata tatanono hape ka malara pe, e uakeluk sirampe hape ka bolo uatuha pein.”

Iesu ke uauia tar tang siokor keketik ger nihikung liouana uasa

¹⁴Tar binaka ka la hiua pokosokosina tar tenkanar siusan, gisina ka la uel-tupara tasir bureher tamata ra uan-goul uiloho pe tasir gisiamer tamatang uakuakeluk, doho tamatang ualualasira tar ualatut ra ueluelperere keip tasisin.

¹⁵Gine kompe ka bang huara per tamata tang Iesu, gisina ka lutarang uaha tun, kara siokor ualola tatanon, kara la uamarein uaia tun tatanon. ¹⁶Doh Iesu ke dangata tasisina pare, “A hauene rung ueluelpererisioum?”

¹⁷Kare kular tang siokor tamatane i uantinanina tasir manai pare, “Tang Ualasilir, inggo ku keipime tar tug totomua, inggono ke hikuinir liouan, doh ke uapauingua tatanon. ¹⁸Gere kale-onor liouana uasa tatanon, inggon e uoto baka uahiua tatanon i kot, kare pokosor peropere tar uauan, dohe boho ngungut, kare pagpagolor tukunun. Doh inggo ku me dangata tosnongo tamatang uakuakelukua tar geil liu tar liouana uasaan, doh ahik pah ka banot.”

¹⁹Doh Iesu ke mene hahaua poluk tasisina pare, “Inggoumur tamatang daan o tagtagorong bohulik, paka touihar binaka ru kale peo teremi niduhioum? Keipime tar keketikane totoguo.” ²⁰Kara keipimeinir keketik tatanon. Doh ahik me manasan tar binaka ke bangonor liouana uasa tang Iesu, inggono ke uaporoporo ualahur tun poluk tar keketik, kare la pung i kot, kare la iaaha teil, kare peroperer uauan.

²¹Doh Iesu ke dangata tang tamanonor keketik pare, “A touihar binaka ke uangouluono pare?”

Kare mene hahaua tamanono pare, “Inggono ke uakekeneina tar binaka re keketik ²²A bureher binaka gitir liouana e uoto uapungala tatanono toro hue ue i laur mare tung pous tatanon. Bo ge paro banoto ingga o guata me inet, auia ingga o ueldolomo tamiueim, doho poul baka tamiueim.”

²³¶Kare mene hahaua Iesu tatanono pare, “Getu banoto inggo! A tamata gete tagorong man, inggon e banot e guata tar mamang inetelik.”

²⁴Doh ahik me manasan gitir tamanonor keketik ke kula ualeik pare, “Inggo u tagorong man! Bo o poul pukua totoguo, ge inggo pe a katupa reg nitagorong man.”

²⁵Doh tar binaka ke banga manasa Iesu pare, o tamata ra burbu-rehe uainintiehe tun manas, inggono ke uelkukur tar liouan, kare kula pare, “Inggar liouana tang uapau, doha tang uakamelong, longoro totoguo! O hiliu tar keketikene, kara hik poho tapokis baka polukume tatanono me binak.”

²⁶^hDoha liouana ke kaling ualeikin-tiehe, kare uaporoprontiehe tar keketik, song ke hiliu tatanon. Doh inggonor keketik ke la rikin siarampeane i koto pah ke mat, maeit o bureher tamata ka kula pare, “Inggono deh ke mat.” ²⁷Bo Iesu ke kusa tar limanonor keketik, kare kusa uatur tatanon, kare tur katongonguaon.

²⁸Tar binaka ke la manasa Iesu ium, gisit no tamatang uakuakelukono ka dangata uanomo tatanono pare, “Ae maene inggeim ahik pah king banoto mi geil liu tar liouanon?”

²⁹ Kare mene hahaua Iesu pare, “A lotu puk manasampe tere banotong geil liu tar liouana sira pare.”

Iesu ke hire uagiomehe poluk pare, e turung mat

³⁰ⁱGisina ka hiliu tar uanion, kara la siauala i Galili. Iesu ahik pah ke malar ra ate mo tamat, ia ra uan-goulusin, ³¹^jteene inggon e marang ualasira toсно tamatang uakuakeluk. Inggono ke hire tasisina pare, “A Tunar Tamata ra turung tanganain tasir tamata mara tung pousin. Dohi muduhia tar touonor marein, inggon e turung tua tapokis poluk.” ³²^kBo gisina puk ahik pah ka naman manate tar tengkanar puhung uelhireon, doh ra sokoro pono tar dangata uaia tatanon.

Mai tunur i ranantieh

³³ Iesu mesno tamatang uakuakeluk ka la pokos i Kaperneam. Gine ka la leka pesina tar siokor um, Iesu ke dangata tasisina pare, “A haua giala rung ueluelpererisioum tar lel?” ³⁴ Bo gisina puk ahik pah ra men, teene gisina ka ueluelpentantane mai tunur i ranantieh. ³⁵^lDoh Iesu ke tabila uahiu, kare kila toto tasir hangaul, doha tang torikir aposoul, kare kula pare tasisin, “Gete me tamata re marang uairanain, inggon e kale uahiu katongoin misiana tar tamatang kalekinale gere kalekinale tasir tamata uakap.”

³⁶ Kare kusa Iesu tar tang siokor keketik, kara uaturin i uantinanina tasisin, kare buaka tar keketik, kare hire pare, ³⁷^m“Mair tamata re uaha keip me tang siokor keketik tar hangoguo, inggon e uaha keip pono totoguo. Doh mai gere uaha totoguo, inggon ahik pahe

uaha puk totoguo, bo tar tamata ponene ke ualatueha totoguo.”

³⁸ Doh Jon ke kula tang Iesu pare, “Tang Ualafir! Inggeim king banga tar tang siokor tamata e geil liu keip tasir liouana uasa tar hangoumua, Doh inggeim king kula tane tatanon, teene inggon ahik pahe uakeluk tagu tagigieg.”

³⁹ Maeit Iesu ke hire tapokis tasisina pare, “Ahik pah mu tur tane tatanon. Gete guata keipir tamata me nitou tar hangoguo, inggon ahik pahe turung uasua tar hangoguo. ⁴⁰ⁿGe mai per tamat ahik pahe uelmatana keip tagigeig, inggono ter uanotoumiuoum. ⁴¹^oInggono u hire tun tamiuoum toro mana pare, me tamata gere heir tamiuoum me sikir kodomo gerung uakeluk pe inggoum tang Kristo, inggon ahik pahe banotong rouor bulauan.”

A niuedanga gere uapunga tar nitagorong man

⁴² “Doh gete guata me tang siokor tamata tasir keketikisine gera tagorong mana totoguo mara guata me niguata uasa, inggono paka uia geta lolo tolain mo palaua uleik toro uekuekonon, kara la uadudurin i laur. ⁴³⁻⁴⁴^pGere guatar limoumua, maeit ro guata ingga tar niguata uasa, tokout liu tatanon. Inggono e la uiantiehe uain geto la keipia tar pang siokor pang limoum i Heuen. Inggono e la sa geta pang torikir pang limoumua, kara bakalaia toro hue i Hel tar butur ro luh dede ro hue ahik paho lomoh. ⁴⁵⁻⁴⁶ Doh geter kekeimua re guat, maeit ko guata ingga tar niguata uasa, tokout liu, inggon e la uiantiehe uain geto la ingga pare, a piuk tar uaning uaha geta pang torikir kekeim, kara

ⁱ9:30 Jon 7.1 ^j9:31 Mak 8.31; 10.32-34 ^k9:32 Luk 9.45

^l9:35 Mat 20.25-27; Mak 10.43-44; Luk 22.24-26 ^m9:37 Mat 10.40

ⁿ9:40 Mat 12.30; Luk 11.23 ^o9:41 Mat 10.42 ^p9:43-44 Mat 5.30

bakalaia i Hel. ⁴⁷⁻⁴⁸qGea matoumua re guat, maeit ko guata uasa ingga, uegolo liu! Auiantiehe uain geto la leka keipia tar pang siokor pang matoum tena Nitoia Godo geto la keipia tar toking pang matoum, kara la bakalaia i Hel tar butur ahikir sosoi pah ra mata tagu, doho hue ahik paho oso tagu.”

⁴⁹“Geo tamata uakapa tun pe ra turung uapalih keipis tar teheng toro hue. ⁵⁰rA teh auia, ra uoto uamokolaig toro mamang uahungulik mare siokor delauanar uahung tar matana God, te misiana sira kompe geto moko ro hue tasir mamang tamatalik. Bo gere kapa pukur linglinginar teh, ahik me tamata re banotong uakotpokoso tapokis tar linglingin. Ingga pake moko teil me tehe to-toum maro uangoul keipia toro hiarouo tasir gisiameh.”

O Mahar 10

Iesu ke uelhire tauete tar nigutang katego toro le

10 Iesu ke hiliu manasa tar uanene i Kaperneam, kare lala tar pang Judia, song ke sairkoutula i Jodan. Doho burehe polukur tamata ka la uelhirime tatanon, maeit inggono ke guata sira polukumpe re uoto guatang sioun pe. Inggono ke ualasira poluk tasisin.

²Doho gisiamer Parisi ka lame tang Iesu tar me uedanga tatanon, kara dangata pare, “Me tamat e banotompe e uaueltageih tono le, kare uelueluata liu tena kuaha?”

³Kare mene hahau Iesu pare, “O haua ro ualatoho ke heirin Moses tamiuoum?”

⁴sDoh gisina ka hire tapokis pare, Moses e uamaluana tar tamat e banot e

bolo toro pepang ueltageih toro le, kare ueltula liu tena kuah.

⁵Bo Iesu puk ke kula tasisina pare, “Moses ke bolo kompe tar puhung ualatution, teene inggono o mahang longor. ⁶tBo tar binaka puk ke uakekenar mamang inetelik, God ke tuha tar bulout doha kuah. ⁷⁻⁸uDoh a tenkar puhiono teene, a bulout e turung hiliu tang tinana doh taman, kare la uangoul tokaha mena kuah, kaura pokoso sira pare, a siokon siounur tukunun, kara hik baka poluk paha tang torik. ⁹Temaeit mais geke uauelkaloutis God, ahik me tamata re banotong uaueltageih.”

¹⁰I muduhia, Iesu mesno tamatang uakuakeluk ka la uangoul poluk iuma tar um, doh no tamatang uakuakelukono ka dangdangata poluk tatanono tar puhion.

¹¹vDoh Iesu ke hire tasisina pare, “Me tamata gere de tena kuah, kare kale palih me tang giomeher kuah, inggono ke guata toro ur, kare guata tar niguata uasa tena kuaha uakikilang. ¹²Doh mair kuaha re uelueluata liu tena bulout, kare le me tang giameher bulout, a kuahono ke guata toro ur, kare guata tar niguata uasa tena bulout.”

Iesu mesir keketik

¹³O tamata ka keip totouahame tasir keketikilik tang Iesu mare la tuha tasisin. Bo o tamatang uakuakeluk puk ka uelkukur tasisin. ¹⁴Bo gine puk ke banga pe Iesu tasisin, Inggono ke nimaliana tasisin, kare kula pare, “Mu uamaluana tasir keketik gera lame totoguo, ahik pah mu kula tane tasisin, ge na Nitoia pe God ter nosir keketik ge ngohinasine. ¹⁵wInggono u hire tun toro mana tamiuoum pare, Mair tamata ge ahik mena nitagorong mana sira tasir keketikisine,

^{99:47-48} Ais 66.24; Mat 5.29 ^{r9:50} Mat 5.13; Luk 14.34

^{s10:4} Ual 24.1-4; Mat 5.31 ^{t10:6} Uak 1.27; 5.2

^{u10:7-8} Uak 2.24; Epe 5.31-33 ^{v10:11} Mat 5.32 ^{w10:15} Mat 18.3

inggon ahik pahe banot e leka tena Nitoia God.”¹⁶ Song ke kila totoono tasir keketik, kare buaka hahai tasisin, kare uamoko tar limana tasisin, kare heir tena niguata uايا God tasisin.

A tang mani ke ueluatata tang Iesu

¹⁷Tar binaka ke marang la manasa Iesu, a tang siokor tamata ke ualualome tatanon, kare me baka uahuianane i uoum tatanon, kare dangata pare, “Tang ualasira uايا! A haua paku guataio maru kale tar nitua gere moko dede?”

¹⁸Doh Iesu ke mene tapokis pare, “Ae maene ro kula ingga totogou auia? Ahik me tang siokor tamata me auia, God puk manasamper uia me pahen.”¹⁹ Ingga ko ate manasampe tono ualatoho God gero kula pare, Ahik paho uiliatung pous me tamat, doh geto lea ahik paho uraur keip tasir le, doh ahik paho uenau, ahik paho bohoboh, kara hik paho uatouboul boh, doho ueltada tang tamoum me tinoum.”

²⁰Kare hire tapokisone tang Iesu pare, “Tang Ualasil! A niualatohone ku uakeluk turugio tar binaka ru keketik.”

²¹Doh Iesu ke bangahe tatanon, kare malahirintiehe tun tatanon, kare kulan-gua tatanono pare, “A siokor inete halana ingga to guat, la karo la uabulaua uakapa tun tenang mamang inetelik, karo heir tar mani tasir tiome. Gero guata ingga paar, ingga kaeig me nang inete uايا tun i rana tang God. Song ro uakelukume totogou.”

²²Gine ke mene pe Iesu tar puhion, a tamatono ke banga uasa, doh ahik pah ke hagouo uايا, kare hiliu, teene inggon a tang manintieh.

²³Doh Iesu ke uiliangara tapokis toсно tamatang uakuakeluk, kare kula tasisina

pare, “A tamata ger tang mani e turung parakukuhuntiehe tunin tar leka tena Nitoia God.”

²⁴Doho tamatang uakuakeluk ka lutarantiehe tun tar puhion. Bo Iesu puk ke la kula ualatumana poluk pare, “Ir keketik! Inggona parakukuh tun tar leka tena Nitoia God.”²⁵ A kamel ahik pahe parakukuhin tar hikula tar tapokosonar harum, bor tamata tang mani e parakukuh tunin tar leka tena Nitoia God.”

²⁶Doh gisitir tamatang uakuakeluk ka lutara uasa tun poluk, kara ueldangata katongois pare, “Doh maingua re banotora uelkarusin?”

²⁷Iesu ke bangahe tasisin, kare kula pare, “Tar nibangang tasir tamat, inggon a parakukuh uasa tun. Bo tang God, ahik me inete re parakukuh.”

²⁸Gine ke longoro pe Pita tang Iesu, inggono ke kula pare, “Inggeim king hiliu tenami mamang inetelik, karing uakeluk puk manasa totomua!”

²⁹Kare kula tapokis Iesu pare, “Inggo u hire tamiuoum toro mana pare, mair tamata ke hiliu tena um ue o bung tahin ue o bung tatahinalik ue taman ue tinan ue o bung tun ue na butur tar uakeluk totogou, doh tonogo Uelhire Uaiao,³⁰ inggon e turung kale uaburehentiehe mo um, mo bung tahin, mo tatahinalik, mo burehe ro bung tinan, mo bung tun, kare me bureher inet, doh me niguata uasa ra turung guataig tatanon. Bo gaat puk i muduhia, gisina ra turung kale tar nitua gere moko dede tar mamang binakalik.”

³¹y“O tamata gera banga sirais pare, o tohangasene daan, gisina tera turung uangoul sira pare, o uadohin, doh gisina ra banga sirais pare, o tabo hangasene daan tera turung i ranantieh.”

Iesu ke hire uatouon e turung mat, kare tua tapokis

^{32z}Gisina ka la lih taro i Jerusalem, doh Iesu e uoum teil tasisin. Doh gisis no tamatang uakuakelukono ka sokor, doho tamatasine ra uakuakeluk teil pono tasisina ka uoun tun pono tar nisokor. Doh Iesu ke kila sioko tasir siokor hangaul, doha tang torik. Inggono ke menmene uakalahara poluk tasisina tar inete re la turung pokoso to tatanon i Jerusalem. ³³Inggono ke kula pare, “Ualongor! Inggeig i la taro i Jerusalem kara turung tanganainir Tunar Tamata tasir patere uleik, doho tamatang ualualasira tar ualatut. Doh gisina ra turung uelhote pare, inggon e turung mat, kara heirin tasir tamata ge ahik poho Ju. ³⁴Doh gisina ra turung uauanete tatanon, kara loulouin, kara halhaluhin, kara tung pousin, dohi muduhia tar touonor marein, inggon e turung tua tapokis poluk.”

Jems me Jon ura malahir pare, teura i ranantieh

³⁵Jems me nu Jon ger toking tuna Sebedi kura la me tang Iesu, kaura kula pare tatanon, “Tang Ualasil! Raeim mira malahir pare, ingga o guata sira teremira nimalara raeim.”

³⁶Kare mene hahaua Iesu tasrasina pare, “A haua paku guataio tamiraoum?”

³⁷Kaura hire tapokis rasina pare, “O uamaluana tamiraeim maira la tabila tagu totomua. Me tang sioko tar pang mua, kare me tang sioko tar pang kais.”

^{38a}Kare mene hahaua Iesu tasrasina pare, “Raoum mura tel a hau ura dangatain. Raoum mura banotong inum

tagu tar kap geru turung inum tolaio? Doh mura banotong kale tar niuahuhu gera turung uahuhu keipin totoguo?”

^{39b}Doh rasina kura mene hahaua pare, “Raeim mira banot!”

Kare hire Iesu tasrasina pare, “Raoum mura turung inum nomana tar kap geru turung inum tolaio, kara turung uahuhuis raoum tar uahuhu gera turung uahuhin totoguo. ⁴⁰Bo inggo puk ahik pah teru banot u kula tang mai re turung tabila toro tabtabilang toia i tektekena toro nouguo. Godo ke kale uatoro tar buturunin a nasir tamat inggonompe ke umatot.”

⁴¹Doh tar binaka ka longorosinar siokor hangaulur tamatang uakuakeluk tas Jems me Jon, gisina ka uakekena tar nimaliana tas Jems me Jon.

^{42c}Maeit Iesu ke kilame tasisin, kare hire pare, “Inggoum mu ate toro uan uakapa daan, o mamang toiang tasir tamata ge ahik poho Ju, gisina ra ualatoho uapopokoho tosnoso tamat, doh nosio tamata uleikisin tera kaueke keip tasir tamatasine i kukulebanga tasisina tar nipetutup mara longorosin.”

^{43d}Bo gane puk i uantinanina tamiuoum inggono pake giamehe siok. Mai gere marang tamata uleik, inggono pake turung tamatang kalekinale tamiuoum. ⁴⁴Doh mair tamata re marang i ranantieh, inggono tere turung tamatang kalkalekinale puk tasir tamata uakapa tun. ⁴⁵Temaeit ke lamer Tunar Tamat, inggon ahik pah ke lame pare, mara me kalekinale ueleheirir tamata tatanon. Ahik! Inggono ke lame mare me kalekinale ueleheir tasir tamat, kare heir tena nitua tar bulaua tapokis tasir tamata uakap.

^z10:32 Mak 8.31; 9.31 ^a10:38 Mak 14.36; Luk 12.50

^b10:39 Apo 12.2; UGO 1.9 ^c10:42 Luk 22.25-26 ^d10:43 Mat 23.11; Mak 9.35

Iesu ke uauia tar tang siokor kut

⁴⁶ Maeit gisina ka la pokoso manas i Jeriko. Doh gine re lang hiliu manasa pe Iesu mesno tamatang uakuakeluk tar uan uleikion, a tang siokor tamat a hangana tang Bertimeus ger tuna Timeus, e tabila tar tektekenar lel, kare hinghinga inete tasir tamat. ⁴⁷ Tar binaka ke longorono tang Iesu ger peng Nasaret ke me la uahuhut pe tatanon, inggon ke uakekene tar kula ualeik pare, “Iesu ger tuna Debit, o ueldolomo totoguo!”

⁴⁸ Doh gisisir burehe ka uelkukur tatanon, kara hire pare, “Tabtabila sikor! Ahik paho menemen!” Bo inggono puk e kula ualeikintieh dedempe pare, “Tuna Devid! O ueldolomo totoguo!”

⁴⁹ Doh Iesu ke tur, kare hire pare, “Kilame tatanon. Maeit gisina ka kilame tatanon,” kara kula pare, “O uah, karo lame, inggono ke kila totomua.” ⁵⁰ Kare liur liuionor kut tono hikhiku, kare siaka kai, song ke la la tang Iesu.

⁵¹ Song ke dangata Iesu tatanono pare, “A haua ro malaria u guato totomua?”

Doh Bartimeus ger kut ke mene ha-haua pare, “Tang Ualafir! Inngo u marang bang.”

⁵² Doh Iesu ke kula tatanono pare, “Gon o la, reng nitagorong mana ingga ke uauia totomua.” Doh ahik me manasan, inggon ke bang, kare uakelukunguala tang Iesu tar lel.

O Mahar 11

Iesu ke lekala i Jerusalem ngohina tar toia

11 Tar binaka ka la uahuhut manasasin i Jerusalem, gisina ka la pokoso baka uoum tar toking uan i Betpage, dohi Betani, rasinar toking

uan ura uahuhut tar Siusanang Oliv. Doh Iesu ke kilame tena tang torikir tamatang uakuakeluk, ² kare kula pare, “Raoum mura la tar uaneit i uoum tamiroum. Doh tar binaka mura la leka raoum tar uanion, raoum mura turung tupara tar donki ger kalan, a nilolo tane. Doh inggon a nitabung panpanete harah. Mura luaka tatanon, kaura keipime. ³ Gete dangata me tamata tami-raoum, ‘Ae maene mura guata raoum pare, tar donki?’ Mura hire tapokis pare, ‘A Tamata Noman e malara tatanon, bo e turung heir tapokis ualahur puk.’”

⁴ Maeit rasina kura la manas, kaura la tupara tar donki kalan e tur tar lel, a nilolo tane toro pirik. Gine ura luaka tur pe rasina tatanon, ⁵ o tamata gera tur uahuhut ka dangata tasrasina pare, “A haua mura guatain raoum, maene ura luaka tar donki kalaneit?” ⁶ Doh rasina kura hire sirampe ke kula pe Iesu tas-rasin, song ka uamaluanar tamata tas-rasin. ⁷ Song kura keipime rasina tar donki tang Iesu, kara baka uaponalasina tenas hikhiku tar donki, song ke panete Iesu.

⁸ O bureher ponor tamata ka heig tenas gomono tar lel, doho gisiomehe ka heig tar rananar douk ge ka tokout turig toro butur malatahan.

⁹ Gisis ra uoumuoum teil kare gisis i mud ra kulkula ualeik teil pare, “Uatakai tang God!

Guata uauia tatanono geke laha tar hanganar Tamata Noman!

¹⁰ Guata uauia tena nilahar Nitoia ger nang Debit ger tubugieig!

Uatakai tang Godanah i rana tun!” *Ker 118.25-26; 148.1*

¹¹ Maeit Iesu ke leke manas i Jerusalem, kare la leke tar umang lotu ger uleik, kare la bangahe ueltebeir tar mamang inetelikane ium. Bo teene ke

reiu manasa peon, maene inggono ke la tauete liu polukane tar uan, kare lala i Betani mesno siokor hangaul, doha tang torikir tamatang uakuakeluk.

Iesu ke soul toro douk fig

¹²Tar uagiomehenar marein, naliuo gine ra lang hiliu manasa pesin i Betani, Iesu ke hagouo tar gog. ¹³^fKare bangala toro douk fig menia tar kamanana roon, maeit inggono ke lala tar la banga ge pare kaeig me kukuanan. Bo tar binaka puk ke lame Iesu toro douk fig, roon ahik poho ua, a kamanana puk, teene a binakon halanar douk te ua. ¹⁴Doh Iesu ke la kula toro douk fig pare, “Ingga ahik paho ua baka poluk, kara einir tamata me kukuanan, ahik tun!” Doh no tamatang uakuakelukono ka longoro ke mene pe inggon.

Iesu ke geil liu tasir tamatane tar umang lotu ger dedeil

¹⁵Tar binaka ka la tapokisilasin i Jerusalem, Iesu ke la leka tar umang lotu ger dedeil, kare uakekena tar geil tauete tasir tamatang uabulbulau menia tasir tamatang bulbulau. Inggono ke siokor tula bise tenas tebolusis ra uapualih tar mani, kare nosio taluh ponosis ra uabulbulaua tasir tetiau. ¹⁶Kare tur tane pono tasir tamatasis ra marang leka keipime tenas ineteng uabulbulau ¹⁷Song ke menmene ualasiroon tasisina pare, No uelhire God o nibolo pare, “Nag umo ra turung kilain pare, nas umang lotur mamang tamatalik. Bo inggoum puk kung uapalih tatanono pare, nas buturung tokauaouor ueuenau.” *Aisaia 56.7; Jeramaia 7.11*

¹⁸^gDoh gisisir patere uleik mesir tamatang ualualasira tar ualatut ka longoro toro uelhire roon, kara sir me ha-

gar tar tung pous tatanon. Bo gisina puk ra sokoro tatanon, teene ka lutarantiehe pesinar manai tena niualasiron. ¹⁹Doh nareiuinar binakon, Iesu mesno tamatang uakuakeluk ka hiliu tar uan uleik i Jerusalem.

O ueluelhirena ro douk fig

²⁰Tar uagiomehenar liuo, gine ka la siaua pelasina toro douk fig geke menenein Iesu, o tamatang uakuakeluk song ka la ate pare, ke maul per kamanana roon, karo mata uatuka toro tenkan. ²¹Doh Pita ke namana tapokis hape ke mene pe Iesu toro douk roon, kare kula pare, “Tang Ualasil! O banga toro douk fig rotie ko soul pousuia ko mata manas!

²²Kare mene hahaua Iesu tasisisna pare, “Mu tagorong mana tang God! ²³^hInggo u uamana tun tamiuoum pare, inggoum mu banotompe mu kula tar siusana pare, God e kabekai totomua, kare la bakako i laur, nang niualatoho ingga ra longorompein. A mamang inetelik ra malahirin ter nirtagorong mana puk manasampe, kara hik me namana tororik i lolono tar balamiu. ²⁴ⁱTemaene ru hire polukuo tamiuoum pare, Inggoum mu banoto mu lotu uatuha me inet, doh gerung tagorong manaoum, inggoum mu banotong kale. ²⁵^jBo tar binaka puk rung lotuoum, a uakikilangan inggoum mu kuse luara liu baka uoum me inete geke guata uasaig tamiuoum mare kuse luara liu pono tamamiuoumenah i Heuene teremi niguata uasaoum. ²⁶Ge Tamamiuoum peenah i ran ahik pahe banot e kuse luara teremi niguata uasaoum geta hikioum pah mu kuse luara tar niguata uasa ka guataisir gisiameher tamata tamiuoum.”

^f11:13 Luk 13.6 ^g11:18 Mak 14.1 ^h11:23 Mat 17.20 ⁱ11:24 Mat 7.7

^j11:25 Mat 6.14-15

Iesu ka dangatain mai ke uatohangana tatanon

²⁷ Tar binakanin, Iesu mesno tamatang uakuakeluk ka la pokoso tapokis manasa poluk i Jerusalem. Maeit gine re lala pela Iesuane tena buturur umang lotu ger uleik, a tamata uleiking tasir pater, o tamatang ualualasira tar ualatut, doho gisiameher tamatang uoum keip ka lame tatanon. Gisina ka me dangata uapopokoho tatanono pare,

²⁸ “Ta ko kale tura tar tohanganene, doh mai ke heir totomua tar nitampopokoh, maeit a tohangoum?”

²⁹ Kare mene hahaua Iesu tasisin pare, “Inggo u turung hire tamiuoum, mai ke heir tar nitampopokohene ru guata keipio getung mene hahauoum tar siokor puhung dangatene ru dangataio.

³⁰ Inggo u dangata tamiuoum pare, Na uahuhu Jon e la tur tang God ue ke la tur puk me tamat? Mu hire hahaua totoguo.”

³¹ Gisina ka ueluelmene katon-gonguais pare, “Geti kula inggeig pare, ‘E laturon i Heuen,’ inggon e turung dangat, ‘Ae maene ahikieig pah ki tagorong mana tatanon?’” ³² Bo geti hireeig pare, ‘E la tur pukuono me tamat,’ ahik pono pahe banot.” Teeit gisina ra sokoro geta nimalianar tamata tasisin, ge o tamata pe ra kula pare, Jon a propet nomana tunur nang God.

³³ Temaene, gisina ka uelhire hahauangua puk pare, “Inggeim deh mi teil!”

Kare hire Iesu tasisisna pare, “Inggo ahik pono pahu banot u hire tamiuoum, tang mai ke heir tar tohanganene ue a nitampopokohene ru guata keipio tar inetenine.”

O Mahar 12

O uelhire uaranga tasir tamata ra kaueke tar iomo bino

12^kIesu ke ueluatata poluk tasisina pare, “A tang siokor tamata ke lebe tar iomo bino, kare ur tar pantui, kare koho tar tung ra pous toigir kukuananar bino, kare tuha tar pang taluhung kauekane tar iom. Song ke heir bakono tar iomo tasir gisiomeher tamata mara kaueke, kare la tar giomeher pang uan. ²Tar binakang lous tar kukuananar bino, tanener iomo ke ualatu-uela tena tamatang kalekinale tasisis ra kauek mare la kaleono me kukuanan. ³Bo gisis puk ra kaueke tar iomo ka kusa tatanon, kara halhaluhin, song ka uelueluata liu tatanon, ahik mate kale baka me inet.”

⁴ “A tanener iomo ke ualatu polukula tar tang giameher tamatang kalekinale tasisin. Bo gisis puk tar iomo ka la haluh polaka baka puk tatanon, kara uamatala tatanon. ⁵Doh git tanener iomo ke ualatu polukumpela tar tang giameher tamatang kalekinale, doh inggono teka la uiliatung pousunguain. Inggono ke ualatu polukumpela tasir gisiameh, doho gisiamehe tasisina ka la uiliatung polukumpeis, karo gisiamehe ka uiliatung pousis. ⁶A tang sioko puk manasa ke uangoul, inggono ter tunonener tanener iomo gere malauelhirintiehe tunin. Doh inggono ke kula pare, Inggono a tuguo, inggono ra turung ueltadain. Kare ualatu uadouh tatanon.”

⁷ “Bo o tamata pukusis ra kaueke tar iomo bino ke uelmene katongois pare, Bang! Git re lame ter tunon, doh inggono tere turung kale uahiuo tar iomene. Mu lame, ti uiliatung pous tatanon, mari turung kale uahieig tar iomene a nagig.

⁸Maeit gisina ka kusa tatanon, kara tung poustin, song ka bakain i behia tar iom.”

⁹Doh me haua baka poluk re guatain tanenar iom? Inggon e turung uiliatung pous tasisis ka kaueke baka tar iomo bino, kare heir mo gisiamehe siok.

¹⁰Inggoum here halana tung timana tagu tono uelhire God? Roon o hire pare, “O palaua rone ka deinir tamatang tuh, kara bakain.

Roono ko uiuirin o inete uleik tun.

¹¹A niguatanine, tena niguatar Tamata Noman,

doh ginin a matmata hamas tun teregi nibangeig.” *Ker 118.22-23*

¹²Gisitir tamata uleik tasir Ju ra marang kusa tatanon, teene ke mene pe inggono paar, ge gisina pe ka la hagouo sira pare, tera menmene uatuhais, gisina te ngohina tasir tamata uasasisir tamatang kaueke tar iomo toro ueluatat. Bo gisina puk ka sokoro mata tuhtuha tatanon, teene o burehe per tamat. Maeit gisina ka hiliu tatanon, kara la.

A takis ra heirin tang Sisar ue ahik?

¹³m^I muduhia o mamahoholik ka ualatuela tasir Parisi mesno tamatang uakuakeluk Herot tang Iesu. Doh gisina ra marang uedanga tatanono mara uakouh tatanono gete mene uasaono me puh, song ra kusesina tatanon. ¹⁴Maeit gisina ka lame tatanon, kara me kula pare, “Tang Ualasil! Inggeim mi ate, ingga a uauamana tun, ingga ahik paho sokoro me tamat, karo guata tar siokonar niguata tasir tamata uakapa tun, gisisir tohangas ue ahik paho tohangas. Doh nang niualasira e la tunig tena hagar God. Doh ingga o hire baka tamiueim, a kodkodohompeono tar heir

tar takis tar gavamaning Roum ue a sa? ¹⁵Inggeim paking bulaua tar takis ue ahik?” Bo Iesu puk ke ate torosio tang kokoposin, kare kula pare, “Maiene rung marang tut louruoum tenami puhung dangatang uedang? Mu ualasila totoguo me siokor maning Roum maru hireo tamiuoum.” ¹⁶Gine ka me heir pesina tar mani, inggono ke dangata pare, “O luna mai rone ka uaanasalain, kara hangana mai?”

Kara kulasina pare, “Sisa.”

¹⁷n^{Kere} hire poluk Iesu tasisina pare, “Heirimpe tang Sisar tar inete ger nang Sisar. Bor mamang inetelik ger nang God paka heirimpeig tang God.” Doh gisina ka lutarantiehe tun ke mene ha-haua peon.

O Sadiusi ka dangata tang Iesu tar nitua tapokis

¹⁸o^{Song} ka la kalehemer Sadusi, gisin o toto tamatang Ju gera kula pare, ahik me tua tapokis tar binakang mat. Gisina ka dangata pare, ¹⁹p^{“Tang Ualasil!} Moses ke bolo toro uelhire sioun pare, Geta tamata ke mata liu tena kuah, bo ahik puk me tun, tahinon e turung le kalehe tar kuahono mare uakotpokoso me tuna tahinetie ke mat. ²⁰Auia, o mouitir mamahialik. Gitir uoum ke le, kare mata liu tar kuah, doh ahik me tun. ²¹Maeit gitir uakeluk tatanono ke le kalehe tanoneitir kuaha kamob, doh ahik paha puhung barah, kare mata ponono, doh inggon ahik pono pah ke uakotpokoso baka me keketik. ²²Doh gisina ro mamahialik uakapa ka siokor le kompe tar tang sioko komper kuahon, bo ahik puk me keketik. Doh gitir kuaha ke la mata pon. ²³Doh hapengua geta tua tapokisir tamat, maingua na turung kuaha tatanonor kuah, ge gisina

¹12:8 Hib 13.12 ^m12:13 Luk 11.53-54 ⁿ12:17 Roum 13.7

^o12:18 Apo 23.8 ^p12:19 Ual 25.5

per mouitir mamahialik ka siokor le tatanon?"

²⁴Doh Iesu ke hire tasisinar Sadusi pare, "A niduh re moko tamiuoum, teeit inggoum mu tele tono uelhire God, karung tele pono tena nitampopokohon.

²⁵Ge tar binaka pe ra tua tapokisir tamat, gisina ahik paho le. Gisina ra turung ngohina tasir anggeloung Heuen.

²⁶Bo tar nitua tapokis, inggoum halanampe tung timana tagu tena nibolobolo Moses toro ueluatatina ro douk geko luh? Ke la bakar puhung barah ke mata baka pe Abraham, Aisak doh Jakob, God ke kula pare tang Moses, Inggo tena God Abraham, na God Aisak, doh na God Jakob. ²⁷Maeit inggono tenas Godomper tua, doh ahik pah nas Godor tamata gesir mat. Inggoum mu uatoboul katongo kompesioum!"

Hingiar ualatutur nang God ro uleikintiehe

²⁸A tang siokor tamatang ualualasira tar ualatutur tar lotu e tur pon, kare ualualongoro tar ueluelmener nasir Sadusi mes Iesu. Inggono ke ate pare, Iesu ke mene hahaua uaia, maeit ke dangata pare, "Hingiar no ualatoho God ro uleikintiehe tar giameh?"

²⁹Kare mene hahaua Iesu tatanono pare, "O uleikintiehe ro ualatoh te rone, 'Inggoumur Israel mu ualongoro uaia, a Tamata Noman ge nagi Godeig ter tang sioko puk manasar Tamata Noman.

³⁰Inggoum pakung malauelhir keip tatanonor Tamata Noman ge nagi Godeig tar balamiu uakapa tun

menia tar iabemiu uakapa tun, doh teremi ninamana uakapa tun, kare teremi nitampopokoho uakapa tun.' *Ualatut 6.4-5*

³¹Doh o uatorikina no ualatoho God gero uleikintiehe te rone,

'Inggoum pakung malauelhir toso uonotomiu,

ngohina rung malauelhir katongo pesioum.' *Nas Kalekinaler Pater 19.18*

Ahik baka poluk mo ualotoh ro uleikintiehe toro torik ro uelhire rasine."

³²Doh gitir tamatang ualualasira tar ualatut ke hire tapokis tang Iesu pare, "Tang Ualafir, ingga ko mene uaia tun. Ingga ko mene tun toro man, ko kula pe pare a tang sioko puk manasamper God, kara hik baka poluk me tang giomeh. ³³Doh inggo u ate, inggon a inete uleik tun tar malara keip tang God toro baloug uakapa tun, doh reg ninamana keip pon, kare tereg nitampopokoh, karu malara pono toso uanotoug ngohina ru malara katongo peio. Gininonine ter inete uleikintiehe poluk geta uahunginir uahung nialuh tar uakeluk tar ualatut."

³⁴Gine ke ate pe Iesu tar tamatono pare, a tamatang ate, Iesu ke kulangua tatanono pare, "Ingga ahik paho uairehe tena Nitoia God."

Dohi muduhia, ahik baka poluk me tamata ke marang dangata poluk me puhung dangat.

Iesu ke dangata tasisina tar tamata geke kedangain God

³⁵I muduhia gine ke menmene ualasila to pe Iesu iuma tar umang lotu ger dedeil, Inggono ke dangata tasisina pare, "Ae maene ra kular tamatang ualualasira tar ualatutur tar lotu pare, tang Kristo a tuna Debit? ³⁶Ge Debit katongo pe, ke mene keip tena nitampopokohor Iabena Dedeil, kare kula pare,

'A Tamata Noman ke kula tenag Tamata Nomano pare,

O tabilane tar pang makoso totoguo

e tuka getu uamoko bako tosnongo uelmatania i kukulebanga tar kekeimua.’ *Ker 110.1*

³⁷Gine ke kilo katongo pe Debit tatanono pare, ‘A Tamata Noman,’ hape maene a tuna inggono tatanon?”

Doh gisitir manai tamata ra siokor marang ualongoro uaia tun tatanon.

O tamatang ualualasira tar ualatut ra uoto guata uasa

³⁸Doh ginine ter giniamer inete ke mene ualasingono tasisina tar binakon. “Tagin teil tasisitir tamatang ualualasira tar ualatutung tar lotu! Ge gisina pe ra uoto uaha tun tar latlateil keip tenas hikhiku barah, kara malahir tasir mamang tamatalik ra heir tasisina tar niueladane tar buturing uabulbulau.

³⁹Doh gisina ra marang tabila tar tabtabilitir uleik i uoumuhia tar umang lotu, doh tenas tabtabilar mahohane tar niein uleik. ⁴⁰Doh gisina ra tutlour, kara uenaua tenas ineter kuaha nimate liu, kara kokop tane tenas niguata uasa ra kotouo pe tar lotu barahane tar matasir manai. Temaene tar binaka ra kedangaisir tamat, gisinar tamatasine ra turung kale tar uleikintieher uelmahing.”

A mani ke heirigir kuaha nimate liu

⁴¹Iesu ke la tabila uahuhut tar buturing baka maniane iuma tar umang lotu ger uleik, kare bangahe tasir manai tamata ra me uamoko pe tenas mani tar bokis. Doho bureher tang mani ka me uamoko tar burehentieher mani. ⁴²Doha tang siokor kuaha tiome, a nimate liu, ke me uamoko pono tar toking mani e matoto tar 2 toia. ⁴³^tDoh Iesu ke kilame toсно tamatang uakuakeluk, kare hire tasisina pare, “Inggo u uamana tun tamiuoum, gitir kuaha tiome a nimate liu, inggono teke uamoko uaburehentiehe

tasir gisiomehe uakapa geka uamoko uoum. ⁴⁴Ge gisina pe o tang mani, kara heir puk tar giniamer, kare mokompe nas mani, bo giner kuaha kamob, inggono ke siokor heir tun tar hauar nan, doh ahik baka poluk mena mani ke la mok.”

O Mahar 13

Iesu ke hire tar umang lotu ger dedeil e turung tadur

13 Gine re lang hiliu manasa pe Iesu tar umang lotu ger dedeil tar binakon, na tang siokor tamatang uakuakelukono ke me kula pare, “Tang Ualasin o banga tar uma uleikinitie a mataia tun! Banga pono tar palaua uleikinitie tar pador!”

²^uKare kula Iesu tatanono pare, “O uma mataianinanine ra turung dura uahiuoig, doh ahik mo siokoro palaua ro turung toka uaponola mo giameh.”

Iesu ke hire tar bureher niduh e turung pokos

³I muduhia Iesu ke la tabila tar hiuhiuonar tar Suisanang Oliv tar paina re latur pemer malatahana tar umang lotu ger dedeil. Doh Pita, Jems, Jon, doh Andru ka la uanomo me tatanon, kara me dangata pare, ⁴“Mangiha tun re la turung pokosor puhunin? Doh kaempeig me uaparok i uoumuhia tar ualasin tamiueim, mangiha re la turung kotpokosor inetenine pare, o man?”

⁵Doh Iesu ke hire tasisina pare, “Ahik pah mu uamaluana me tamat e keip uahel teremi ninamanoum, ⁶ge o bureher per tamata ra turung lame, ra la keip teil tar hangoguo, gisina ra me hire pare, tesir Kristo, kara turung uelour tasir bureher tamat. ⁷Doh tar binaka rung longoroum me uiliatung ue me uelhireng

uiliatung, inggoum ahik pah mu por, ginin e turung kotpokoso bakampe, bor binaka puk re turung kapar mamang inetelik ahik dedempe pahe uolong kotokos. ⁸Doho pang uan ra turung uiliatung tar giameher pang uan, doho nitoia ra turung uiliatunge keipis me ro gininamehe ro nitoia. Doho nun e turung nun, kare kotpokosor gogo uleik e turung pokoso toro ginamehero uan. Bo ginino pukunine tere ualasira tar inete ualasokoro gere turung kotpokos.”

⁹v“Bo tar binaka puk re turung uakekenar inetenino tar kotpokos, inggoumu tagin teil! Inggoum ra turung heirilasioum tar buturung kedang, kara la halhaluh tosioum tar umang lotu. Inggoum ra turung tohotolasioum i uoum tasir tamata uleik mesir toia, teeit inggoum kung uakuakeluk totoguo. Doh inggono tenami turung binaka uaioum tar uelhire tauete tar hangouguo. ¹⁰Doho Uelhire Uaia roono ra uelhire uatauete baka uoumin toro mamang uanilikane i kot. ¹¹wDoh tar binakon inggoum ra turung kusesioum, kara keipisoum tar uelkodoh, inggoum ahik pah mu namanantiehe baka uoum tar haua rung uelpouhin. Mu hire puk toro uelhire gere heirin God tamiuoum tar binakoneit. Doh inggoum ahik pah terung turung men, bo a Iabena Dedeil tere turung men.”

¹²x“Doha tamat e turung heir katongompe tang tahina mara tung pousin, doho tamasir keketik ra turung guata sira ponomnpe toso tus tar siokonar niguat. Doho keketik ra turung nimaliana katongo toso tinas, kara turung heiris mara tung pousis. ¹³yDoho tamata uakapa ra turung tokouasais tamiuoum, teene rung uakeluk peoum

totoguo. Bo mais ra tur uapopokoh e tuka tar uadouhinar marein, gisina tere turung uelkarusais God.”

A inete uasa tun e turung kotpokos

¹⁴zIesu ke kula ualatumen poluk pare, “Mai re timana toro uelhire rone, inggon e namana uaia bak. Inggoum mu turung banga tar inete uasa tun, inggon e turung tur tar butur san. Doh tar binakon, mais gera uangoul i Judia, gisina paka ualo liu taro i rana toro siusan. ¹⁵aDoh me tamata gere uangoul i kalahara tena um, inggono paka hik pahe leke tapokis iuma tena uma tar la kaleuatoro baka mena inet. ¹⁶Doh me tamata gere uangoul tena iom, inggon ahik baka poluk pahe la tapokis mare la kale baka tono hikhiku. ¹⁷bDoh kuasalik tun ro kuaha gesir balakos, kare gisis ra uahuh tasir guam tar binakonene! ¹⁸Inggoum pakung lotu tang God mara hikir inetenine pahe kotpokoso to tar binakang malahong, ¹⁹cge a binaka penin, e turung kotpokosor niduh uleik tun ge ahik pahe uelmatout keip me niduh geke pokoso bakaoum, e uakikilanga tur ke uatouo pe God tar mamang inetelik e me tukene daan. Dohi muduhia, ahik me niduh sira paar re turung kotpokoso poluk. ²⁰Toro mana tun, geta hikir Tamata Noman pahe uapouhina tar binakanin, o tamata uakapa ra turung siokor mamantouois. Bo inggono e namanantiehe tun tasir tamata geke kedangasiono sioun, temaene re turung uapouhinono tar binakanin.”

²¹Doh tar binakanin gete me tang siokor tamata re hire tamiuoum pare, ‘Bangane, gine te Kristo!’ Ue e hire pare, ‘Teono gila!’ Ahik pah mu tagorong

v13:9 Mat 10.17-20 w13:11 Luk 12.11-12 x13:12 Mat 10.21

y13:13 Mat 10.22; Jon 15.21 z13:14 Dan 9.27; 11.31; 12.11

a13:15 Luk 17.31 b13:17 Luk 23.29 c13:19 Dan 12.1; UGO 7.14

mana tatanon. ^{22d}Ter hauon, o Kristo bohoboh, doho propet bohoboho pono ra turung kotpokos. Doh gisina ra turung guata tar niuaparoko uleik, doha ineteng ualutara uleik geta banotosina mara uelourisir tamata geke kedangais God sioun. ²³Mu tagin teil! Ge inggo pe ku hire baka uoumumpe tamiuoum tar mamang inetelik re turung kotpokos.”

I muduhia e turung tapokis polukuhar Tunar Tamat

^{24e}Doh Iesu ke kula poluk pare, “Dohi muduhia tar binaka uasaninanine,

‘a pisar e turung kitup, doha bialok ahik pahe pid,

²⁵doho pitopit ra turung punga turuha i ran

doha nitampopokoh i ran ra turung uagunain.’ *Aisaia 13.10; 34.4; Joel 2.10,31; 3.15*

^{26f}Doh tar binakonene, o tamata uakapa ra turung banga tar Tunar Tamata gete laha i lolono tar mahar langit menia tena nitampopokoh a uleikintiehe, doh tar luhluhunon a mataia tun.”

^{27g}“Doh inggon e turung ualatie tesno angelo mara la ur toto uakapa tesno tamatono geke kedangais God sioun, ra kale turis toro mamang buturulikane tar ura surunar koto uakap, dohi ran.”

Iesu ke uelhire uaranga toro douk ra kilain o fig

²⁸Kare hire poluk Iesu tasisina pare, “O douk, ra kilain o fig, o ualasira tamiuoum pare, tar binaka re timuhur ranana roon, kare uakoupur kamanan, inggoum mu ate manas, na binakar pisar e uahuhutung kotpokos. ²⁹Doha siokono pukompe tar binaka rung bangoum tar inetenine ku menegio, inggoum mu banotong ate manasa tar Tunar Tamata

ke uahuhutin tar pokosane toro pirik. ³⁰Doh inggo u uamana tun tamiuoum pare, o babeir tamatang daan ahik pah ra turung mata uakap e tuka tar binaka re kotpokosor mamang inetelikinine. ³¹I rana dohi kot ura turung rou, bo nogo uelhireo ahik paho turung kapa tagu.”

Mangiha re kotpokosor inetenininine

³²Kare hire poluk Iesu tasisina pare, “Ahik me tamata re ate tar binaka re kotpokosor inetenininine, doho anggelou i ran ahik pono pah ra ate, doha Tunon ahik pon, bo te Tamana manasampeono tere ate. ³³Mu tagin teil! Karung uakeis uanon. Ter hauon inggoum mu telengua mangiha re kotpokosor binakon.

³⁴Inggon e turung baka sira tar tamata geke la tar laer kare hiliu tena um, inggon e ualatoho baka tesno tamatang kalekinale. Doh inggon e heir baka tenas kalekinale kahakasin, song re hire bakono tar tamata gere kaueke toro pirik, Bangbanga uakeis tagin dedempe gete pokosomeon! ^{35h}Temaeit inggoum mu bangbanga tagin, ge inggoum pe mu turung tele pono mangiha re tapokisime tanener um. Inggono here tapokisime tar reiu ue tar uantinaninar boung ue tar binaka ra kororor paol ue tar liliuolik.

³⁶Bo inggon e turung santiehe getung uamaluanoum e me ueltuparono mu houhoum ³⁷A hua ru hireio tamiuoum, inggo u hire pono tasir tamata uakapa tun pare, Mu bangbanga uakeis tagin!”

O Mahar 14

O mamahoholik ka uelhote tar tung pous tang Iesu

14 Doha torik manasar marein rasit ura mok, kare pokoso man-

^d13:22 UGO 13.13 ^e13:24 UGO 6.12-13 ^f13:26 UGO 1.7

^g13:27 Mat 13.41 ^h13:35 Luk 12.38

asa nas marein uleikir Ju gera kilain, “Leka Liu ro Mat,” ^f“doho niein gera kilain, “O Bereit Ahik me Is.” Doh gisitir patere uleik mesir tamatang ualualasira tar ualatut, ka sir me hagar mara kusa uanomo toin Iesu, kara uiliatung pous tatanon. ²Bo gisina puk ka ueluelkule pare, ahik pah ra guata to me mareinane toro niein uleik, geta uakotpokososina me uelkoi tasir manai, kara maman-touongua tar uan.

³ⁱDoh tar binaka re uangoul Iesu i Betani, inggon e uangoul tena uma Simon ger toubia sioun. Doh tar binaka re tabilang ein Iesu ium, a kuaha ke lame, e kale teil tar amiamuh a nihedongo tola tar nouh mataia, ginin a i ranantieher bulauan. Doh gitir kuaha ke katego liu tar matanar nouh, kare pikir toro luna Iesu. ⁴Doho gisiomehe gera uangoulane ka bang, kara nimalian, kara ueldangata katongois pare, “Ae maene ke dingdinging mamantouo pukuono tar amiamuh pare? ⁵A amiamuh dehon e banoto ra uabulauain tar 300 kina, kara heirin tasir tiome.” Doh gisina ka uelkukur tar kuahon.

⁶Bo Iesu ke hire tasisina pare, Uamaluana tatanon. “Ae maene rung uelkukuroum tatanon? Inggono ke guata uaia tun tar inet a mataia totoguo. ⁷^jO tiome ra turung uangoul tagu dedempe tamiuoum, doh inggoum mu turung poulumpe tasisina me binaka gerung malar. Bo inggo ahik pahu turung uangoul tagu dede tamiuoum. ⁸^kA kuahene ke guata manasampe tar inete ke banotoin e guat. Inggono ke dingila tar amiamuh toro luguo tar kale uatoro tanika totoguo i uoumuhia tenag binako geta keuo. ⁹Inggono u uamana tun tamiuoum

pare, ia me buturane tar koto ra uelhire tauetein ro Uelhire Uaia, a inete ke guataiono ra uelhire tauete ponoin tar namana huara tapokis tar kuahene.”

Judas e tangana tang Iesu tasir patere uleik

¹⁰Judas Iskariot ger tang sioko tasir siokor hangaul doha tang torikir tamatang uakuakeluk, song ke hiliu tasisin. Doh inggono ke langua tasir patere uleik, kare la tangana tang Iesu tasisin. ¹¹Doh tar binaka ka longorosinar patere uleik tatanon, gisina ka uahantieh, kara uelhotengua pare, ra turung heir me mani tatanon. Te maene Judas e sirsir me binaka re banotong heir tang Iesu tasisin.

No niein uleikir Tamata Noman

¹²^lTar uakikilanganar marein toro niein uleik ra kilain, “O Bereit Ahik me Is,” ter mareiniono ra tung pous tosina tasir tunar sipsip ra einis toro niein uleik rone, ra kilain, “Leke Liu ro Mat,” gisinar tamatang uakuakeluk tang Iesu ka lame tatanon, kara dangata pare, “Ia ro malara mi la kaleuatoreim toro nieining Leke Liu ro Mat?”

¹³Song ke ualatue Iesu tena toking tamatang uakuakeluk, kare hire tasrasina pare, “Raoum mura la tar uan uleik. Doha bulout gere huata teil tar nouhung kodom, inggon e turung tupara tamiraoum, doh raoum mura uakeluk tatanon. ¹⁴Doh hingiar uma re la lekaion, raoum mura dangata tang tanener um pare, ‘A Tang Ualasilir e kula pare, Ia re moko me tina umang ein ru banotong ein to taguo mesnogo tamatang uakuakeluk tar nieining Leke

^f14:1 O niein uleik o nasir Ju ra kilain, Leke Liu ro Mat. Uanamana huara dede tar binaka toro mat o uleik ko leka liu tasir Ju i Isip. O Ju ra kialin, A Pasova. Bang toro Bolobolong Kale Tapokis Mahar 12.

ⁱ14:3 Luk 7.37-38

^j14:7 Ual 15.11

^k14:8 Jon 19.40

^l14:12 KT 12.6

Liu ro Mat?'¹⁵ Doh gitir tanener um e turung uamakoso tamiraoum tar tina uma uleik i ran gere moko ro teboul, doho tabtabil doho ineteng ein, te mura kaleu-atoro to raoum teregi einieg.

¹⁶ Maeit rasinar toking tamatang uakuakeluk kura haijala, kaura la tuparangua tar mamang inetelik ke hiregionono Iesu tasrasin, song kura kaleuatorongua tar niein.

¹⁷ Gitie ke reiu manasa peon, Iesu ke la pokoso mesno siokor hangaul, doha tang torikir tamatang uakuakeluk tar um. ¹⁸ Doh gitie ra ein tabila pesin, kare kula Iesu pare, "Inggo u hire tun toro man, a tang sioko tamiuoumene rung ein tagu totoguo e turung tangana totoguo tasir uelmatan."

¹⁹ Doh gisina ka hagouo uaduh, kara dangdangata tang sisiosokosina tang Iesu pare, "Inggo ahik, bidouh?"

²⁰ Doh Iesu ke hire tapokis pare, "Inggon a tang sioko tamiuoumener siokor hangaul, doha tang torik. Inggono ter tang sioko geke ein tagu totoguoene daan. ²¹ A Tunar Tamat e turung la puk ngohina pare, ka bolo pein sioun. Bo a nisa puk e la tar tamatonono re turung tangana tar Tunar Tamat. Auiantiehe tar tamatonono ge paka hik paha nipoh."

²² Doh tar binakene ra einisin, Iesu ke kale toro bereit, kare kulang uauia tun tar hangana God, kare pakaha toro bereit, kare heiringua tosno aposoul, kare kula pare, "Kale taninin, gininanine ter tukunuguo."

²³ Song ke kale polukuono tar kap bino, kare kulang uauia poluk tar hangana God, kare heir tar kap tasisin, kara inum tang sisiosokosin. ²⁴ Doh Iesu ke hire pare, "Gininanine ter deuatinguo, a deuatingin tar uelhote gera

ding ueleheirin tasir bureher tamat. ²⁵ Doh inggo u uamana tamiuoum pare, Inggo ahik pahu turung inum baka poluk me kukuananar bino e tuka tar marein ru turung inum to inggo tar timuhur bino tena Nitoia God." ²⁶ Maeit gisina ka kere manasa toro kereker, song ka la taro i rana tar Siusanang Oliv.

Iesu ke hire tang Pita e turung uolih

²⁷ Doh Iesu ke hire tasisina pare, "Inggoum uakapa tun mu turung tagorong boho totoguo, karung turung ualo liu. Ter hauon no uelhire God ko kula pare, 'Inggo u turung haluh tar tamatang kaukaueke tasir sipsip, kara turung ualo liu ueltebeiringuar sipsip.' *Sekaraia 13.7*

²⁸ Bo tar binaka puk ru tua tapokisio, inggo u turung la uoum tamiuoum i Galili."

²⁹ Kare hire tauete Pita pare, "Geta tagorong boho uakapasina totomua, kara hiliu, bo inggo ahik pahu turung hiliu tagu totomua."

³⁰ Kare mene hahaua Iesu tatanono pare, "Inggo u uamana totomua, daana tar boung tar binaka halanar paolo te kororo uatorik, ingga o turung uolih uatouono pare, o tele totoguo."

³¹ Doh Pita ke mene tapokis uapopokoho tun pare, "Gitiempe ge paku mata taguo totomua, inggo ahik nomana pahu banot u uolih pare, u tele totomua." Doho gisiomehe ke siokona uakapa pono nas uelhire.

Iesu ke lotu to i Getsemani

³² Song ka lasina tar butur ra ki-lain i Getsemani, kare hireono Iesu tesno tamatang uakuakeluk pare, "Mu tabila uangoulane. Inggo u la lotu baka

^m14:18 Ker 41.9

ⁿ14:24 KT 24.8; Jer 31.31-34; Sek 9.11; 1Ko 10.16; Hib 9.20

^o14:28 Mat 28.16; Mak 16.7 ^p14:31 Jon 11.16 ^q14:32 Jon 18.1

tang God.”³³ Kare kalenguaono tas Pita mes Jems, doh Jon, kara siokor la. Doh Inggono ke kanuhuntiehe tun, kare duhuntehe tun ponor tukunun.³⁴ Kare hireono tasisina pare, “O balouguo o duhuntehe tun, u hagouo sira pare, u uahuhutung mat. Mu uangoulane, karung kaueke uelkout.”

³⁵ Doh inggono ke hiliu uairehe sikoro tasisina tar sakin, kare la bake uahiuainane i kot, kare dangata tang God, ge pare banotor binakang uelmahing e leke liu tatanon.³⁶ Kare kula poluk pare, “Papa! Tamoug! Ahik me inete ro uparakukuhua. O kale liu tar kapang uelmahingene totoguo, bo ahik puk paho uakeluk tereg nimalaro, bo reng nimalarampe.”

³⁷ Song ke tapokisimeono tasir tang touon, kare me ueltupara tasisina ra hohou pe. Kare kulono tang Pita pare, “Saimon, ingga o hohouo? Ingga ahik paho banot o gulete baka me siokor aua, karo kaueke baka?”³⁸ O kaueke dede, karo lotu tang God mara hikia paho punga tar niuedang. A iabener tamat e malar, bo a tukununono tere malmaluan.”

³⁹ Maeit Iesu ke hiliu poluk, kare la lotu poluk tang God ngohina sira kompe ke lotu baka uoum pe.⁴⁰ Doh tar binaka ke tapokisimeono tasir tang touon, inggono ke me tupara polukumpe tasisina ra hohou. Teene gisina ka matahohouontiehe tun. Tar binaka ke me ualagura Iesu tasisin, gisina ra tele hape ra mene hahaua pe tatanon.

⁴¹ Inggono ke tapokisime tasisina tar uatouononar binak, kare me kula pare, “Inggoum mu hohouo harah, karung pepe uah? Ke banoto manas! A binaka ke pokoso manasene daan. Bang! A Tu-

nar Tamata ka tangana manasain tasir tamata uasa.⁴² Tur! Ti la manas. Bang! Gitie re lame ter tamata ke tangana totoguo!”

Judas ke tangana tang Iesu tasir tamata uasa

⁴³ Doh tar binakonene Iesu e menemene harah, Judas ter tang siok tasir siokor hangaul doha tang torik, ke pokoso keipime tasir manai tamata gera keip teil tar baenat, doha pus. Doh gisina teka ualatueisir patere uleik, doho tamatang ualatut, doho mamahoholik.⁴⁴ Doh Judas ger tang tanganalik ke heir baka tasisina tar uelhire pare, “Hingiar tamata ru nguahuio, inggono teon. Inggoum mu kusa uanono tatanon, kurung reih liu, doh mu tur ngungut uaia tun tatanon.”

⁴⁵ Doh ahik me manasan, kare pokoso Judasane tang Iesu, kare me kula pare, “Tang Ualasil! Kare nguhunguaono tatanon.”⁴⁶ Maeit gisinar manai ka bang, kara la kusa tang Iesu, kara kusa uanono tatanon.⁴⁷ Doha tang sioko gere tur tagu, ke keip tantane tono baenat, kare tokout liu tar talinganar tamatang kalekinale tar tamata uleiking tasir pater.

⁴⁸ Doh Iesu ke dangata pare tasisin, “Inggoum kung la keipime tar baenat mer pus tar me kusa totoguo ngohina tar tamatetier ueuenau, kara tang uiliatung?”⁴⁹ A mamang mareinilik inggo ku uangoul tagu tamiuoum tar umang lotu ger dedeil, karu ualasira tasir tamat, doh ahikioum pah kung marang kusa sikoro totoguo. Bo auia mare la siokono sirar puhiono tono uelhire God ko hire pe, hape re turung kotpokoso per mamang inetelik toro man.”

[†]14:34 Jon 12.27 [§]14:36 Mak 10.38; Jon 6.38

[†]14:49 Luk 19.47; 21.37; Jon 18.20

⁵⁰uDoh gisis no tamatang uakuakeluk Iesu ka hiliu manasa tatanon, kara ualo liuinguampe.

⁵¹Doha tang siokor mamanailik e loho teil tonon gomonogaugaul, ke uakelukume tang Iesu ka kusa tanein, ⁵²bo ke ualo liu tonon gomon, kare ualo palapal.

Iesu ke la tur i uoum tar matasir kaunsil

⁵³Maetit gisina ka keipila tang Iesu tar tamata uleiking tasir pater. Doh gisis ponor patere uleik, doho mamahoholik, doho tamatang ualualasira tar ualutut ka la uelpokos pon iuma tar kaunsil.

⁵⁴Doh Pita ke lala uakeluk sikorompe, bo e uarehe sikoro puk tang Iesu, kare la leke tagu tena uan nas uleikir pater, kare la tabila tagu i morene tasir tamatang kalekinale, kare la mahirum tagu toro hue.

⁵⁵Doho patere uleik, doho kaunsil uakapa ka sirsir me tamata tar tohotola tang Iesu me puh mara banotong tung pous tatanon, bo ahik puk pah ka tu-para me inet. ⁵⁶O bureher tamata ka bohoboho tolaane tar kaunsil tang Iesu, bo nas uelhire pukusin a kahakah, ahik paha siokon. ⁵⁷Doho gisimehe ka tur, kara boho uapoul polukula tasir kaunsil tang Iesu, kara hire pare, ⁵⁸v“Inggeim king longoro tatanono ke hire pare, ‘Inggo u turung dura liu tar umang lotu ger dedeilene ka tuhainir tamat. Dohi muduhia tar touonor marein u turung tuha tar giameh ahik pahotamata ra tuh.’” ⁵⁹Bo nas puhung menesin ahik ponon pahueimatout.

⁶⁰Doh nas uleikir patere ke tur kai i uoum tasisin, kare dangata tang Iesu pare, “Ingga ahik me puhung hahau tar uelhireinine ra tohotolaig totomua?”

⁶¹Doh Iesu e tur boulungur pukumpe, ahik pahue mene hahau. Doh nas uleikir patere ke dangata poluk tatanono pare, “Ingga ter Kristo a Tuna Godenah i ran?”

⁶²Kare hire hahaua Iesu tatanono pare, “Aa, te inggo! Doh inggoum mu turung banga ponon tar Tunar Tamat e tabila tar pang mua tang God ger tam-popokoho tun, kare turung la uaponaha toro mahar langiting Heuen.”

⁶³Doh git nas uleikir patere ke nimaliana uasa tun, kare kih katongo tonon hikhiku, kare kula pare, “Ae maene ri marang longoro baka polukueig mo giamehe ro uelhire? ⁶⁴wGine kung longoro manasampeoum tena uelhire uasaonon tang God. A hau rung namanaioum? A hau ri guataieig tatanon?” Doh gisisir kaunsil uakapa tun ka siokor hire pare, “Inggonon dehe ra tung pousin.”

⁶⁵Doh gisitir gisimehe ka la uakekena manasa tar loulou tatanon, kara rokok tane tar matanon, kara posposarain, kara nunin. Doh gisina ka kula pare, “Paparok! Maingua ke nun totomua?” Doho tamatang tur kaueke ka kale tatanon, kara posposar.

Pita ke uolih e tele tang Iesu

⁶⁶Pita e uangoulumpeane i kot i moren, doha a tang siokor kuaha ge na tang kalekinaler nas uleikir pater, ke lame. ⁶⁷Kare me banga tang Pita re mahirum pe toro hue, kare banga sosogoto tatanon, kare kulonon tang Pita pare, “Te ingga deh tena ueldokout ponon Iesu ger peng Nasaret.” ⁶⁸Doh Pita ke uolih pare, “Inggo u tele tunungua a hauoneit ro kulkulaia.” Kare la uain sikoro Pita i moren toro pirikinar uan, kare kororo uasiokonguar paolon tar binakon ⁶⁹Doh tar binakonon ke banga polukur kuahang kalekinale tang Pita, inggonon ke hire poluk tasisine ra uangoulusina pare, “A

tamatene ter tang sioko pono tasisin.”
⁷⁰Bo Pita ke uolih poluk.

Dohi muduhia sikor, gisis ra tur uahuhut tang Pita ka kula pare, “Ingga dehe ter tang sioko pono tasisin, teene ge ingga pe a peng Galili pon.”⁷¹Doh Pita ke uakekena tar kula uapopokoho tun, ke uolih pe tasisina pare, “Inggo u uamana tun i ran u tele tar tamatonene rung kulkulaioum.”

⁷²Doh ahik me sikir manasan, kare kororo uatorikir paol, kare longoro Pita, song ke namana tapokis manasa tena menemene Iesu, ke kula pe pare, “Daana tar boung, tar binaka halanar paolo te kororo uatorik, inggampe ro turung uolih uatouono pare, ‘Inggo u tele tatanon.’” Doh Pita ke mamahanung tar marang kiring, kare kirkiring ualeikintiengua.

O Mahar 15

Iesu ka keipilain tang Pailat

15^xDoh naliliuolik tun o patere uleik, o mamahoholik, doho tamatang ualualasira tar ualatut, mesir kaunsil uakapa ka uelhouste manas, kara uih tang Iesu, song ka keip tatanono ka la heir tang Pailat ger gavana.²Doh Pailat ke dangata tatanono pare, “Ingga tenas toiar Ju?” Kare mene hahaua Iesu pare, “Aa, te paar, git ro kula pea.”

³Doho patere uleik ka siokor tohotonguala tar bureher inete tang Iesu.
⁴Kare dangata poluk Pailat tatanono pare, “Ingga ahik paho bonot o mene hahaua tasisin? Ge ingga pe ko longoro manasa tar bureher puh ka tohotohaig totomua?”⁵Bo Iesu puk ahik pah ke mene hahaua mo sioko ro uelhirenit ka meneig, doh Pailat ke lutarantiehe tun.

⁶Doh tar mamang krismasilik toro niein uleikeit, nas niguatar Ju pare,

Pailat e uatauete tar tang siokor tamatane iuma tar umang uih, bo e uakeluk puk teres nimalarar Ju, hingiar tamata ra malauelhirinisina tere tauet.
⁷Doha tang siokor tamat a hangana tang Barabas tere uangoul pono tar umang uih mesir gisiamehe geke uiliatung keip tar gavaman, kara tung poustasir tamata tar uiliatunguon.⁸O tamata ka me uelpokos, kara dangata tang Pailat tar guata re uoto guatang sioun pe.
⁹Doh Pailat ke uelhire hahaua pare tasisin, “Inggoum mu malara totoguo u uatauete ueleheir tamiuoum tenas toiar Ju?”¹⁰Teene Pailat ke ate manasa pare, gisinar patere uleik ka gehentiehe tang Iesu, temaene ka tanganasina tatanono tang Pailat.¹¹Bo o patere uleik puk ka uatentur tar balasir manai pare, kara kila ualeik tang Pailat mare uatauete ueleheir tang Barabas tasisin.
¹²Kare dangata poluk Pailat tasisina pare, “Bo ahaua paku guataio tar tamatene rung kilaoum nas toiar Ju?”

¹³Doh gisina ka kula ualeik poluk taro tatanono pare, “Tina tatanono tar korose!”

¹⁴Kare dangata poluk Pailat tasisina pare, “Ae? A huar niguata uasa ke guataion?”

Bo gisina puk ra kulkula ualeikintiehe tun pare, “Tina tatanono tar korose!”

¹⁵Doh Pailat e marang uauaha pono tasir manai, temaene ke uatauete ueleheiriono tang Barabas tasisin. Kare tangana tang Iesu tasir soldia ra kalkalopis tatanon, kara la tina tatanono tar korose.

O tamatang uiliatung ka uauanete tang Iesu

¹⁶Maeit o tamatang uiliatung ka keip tang Iesu tar buturane i morene tar uma uleik ger nang gavana, kara kilame tasir

^x15:1 Luk 22.66 ^y15:5 Ais 53.7; Mak 14.61 ^z15:11 Apo 3.13-14

gisiamer tamatang uiliatung. ¹⁷Doh gisina ka uahiku tang Iesu toro hikhiku o tabeliah, kara tuha toro taku misiana tono takur toia, ka tuhain toro uoho ueluelhung, kara uamokoin toro luna Iesu. ¹⁸Gisina ka uakekena tar kula tatanono pare, “Auia tun, aliuo tun! Nas toiar Ju!” ¹⁹Gisina ka guata uabu-rehe paar, song ka halhaluh toro lunono tar puhung pata, kara loulou ponoin, kara hatup uahiu i kot, kara dumdumata uapoul pon tatanon. ²⁰Doh tar binakene ka la uakapa manasa pesina tar uauanet, song ka kale liuisina toro hikhiku rone ro tabeliah, kara uahiku poluk toro nanon, song ka keipin i kalahara mara la tinasina tatanono tar korose.

Iesu ka tinain tar korose

²¹^aGisina ka la ueltuparangua tar tang siokor tamata ke la uelsiaue to tasisinane i kalahara tasisin, inggon a hangana tang Saimon ger peng Sairin. Doho tamatang uiliatung ka petutupe tatanon, ke hu-ata tena korose Iesu. Inggon Saimon tera tamas Alesander me Rufus, doho soldia ka kula tutupe tatanono tar hu-ata tena korose Iesu. ²²Gisina ka keip manasako tang Iesu tar butur ra kilain i Golgota, a tengkanar hanganar butu-ruono ra kilain, na butur ro lakok. ²³Doh gisina ka marang heir tang Iesu tar bino a nihouara tar marasin ra kilain, a mur, bo inggon puk ke de, ahik mete inum ²⁴^bSong ka tinasina tatanono tar korose, kara ueluelpeikie tena gomomono tar pilai laki mara ate hingia ro mahar gomono ro la tang mai.

²⁵Inggon 9 kiloko naliuoene ka tine taneiono tar korose. ²⁶Doh gisina ka bolo tar puhung uelhireng uaate, kara uamokoin i rana tar korose. A puhung uelhireon e kula pare, “Nas toiar Ju.”

²⁷Doh tar binakono ka tinasina tang Iesu tar korose, gisina ka tina pono tar tang torikir ueuenau, a tang sioko tar pang muahia tang Iesu, doha tang gisiamer tar pang kais tang Iesu. ²⁸^cDoh no uelhire God ge ka boloin sioun, roon ko pokoso toro man, “Gisina ka kedanga tagu tatanon tasir tamata uasa.” ²⁹^dDoh gisisir tamata gera la siausi-auala, ka menmene tenas meneng uel-sigala tatanon, kara bilbile tar lus, kara kula pare, “Tieh! Ingga ter tamatang ma-mantouo tar umang lotu ger dedeil, karo tuha tapokis poluk tar touono pukur marein. ³⁰O uelkarus katongoia, karo hiua liu tar korose!”

³¹Doho patere uleik mesir tamatang ualualasira tar ualatut ra guata pono tar siokonar niguat, ra ueluanio pe tatanon, kara kula pare, “Inggon ke uelkarus tasir gisiamer, bo ahikiono pehe banot e uelkarus katongoin! ³²Ti uamalua-geri banga bakeig ge pare ter Kristoene, kare nas toiar Israel gete hiua liu tur-ono tar koroseene daan, inggeig song ri tagorong mana tatanon.” Doh rasiner toking tamata geka tine taguis tang Iesu, rasina kura uelsigala pono tatanon.

Iesu ke mat

³³Doh nar marein uleik nar 12 kilok, a kitup ke kokop tane tar pang uan uakap, ke la tuka nar 3 kilok nar moloi. ³⁴^eDoh tar binakon, Iesu ke kaling ualeik pare, “Iloi, Iloi lama sabaktani.” A puhung uel-hireon e kula pare, “Nagu God, Nagu God, ae maene ko hiliua totoguo?”

³⁵O gisiomer tamatasine ra tur uahuhut ka longor, kara kula pare, “Ua-longor! Inggon e kilkila tang Elaija.” ³⁶^fDoha tang siokor tamata ke ualo la, kare la kale tar mahar kekebul, kare uahu tar bino ueltek, kara uamokoin tar

^a15:21 Roum 16.13 ^b15:24 Ker 22.18 ^c15:28 Ais 53.12

^d15:29 Ker 22.7; 109.25; Mak 14.58 ^e15:34 Ker 22.1 ^f15:36 Ker 69.21

puhun douk, kara hue kai taroin tang Iesu mare inum. Doh gitir tamata ke hire pare, “Halan! Ti banga baka gete lame Elaija e me louh uahua tatanon.”

³⁷Doh Iesu ke kaling ualeik, kare mat.

³⁸Doho mahar gomono uleik gero kus ium tar umang lotu ger dedeil ko takih polaka tur i ran, ko me tuk i kot. ³⁹Tar binakonene ke mata Iesu, a tang siokor tamata uleik tasir uiluiliatung gere tur i uoumuhia tang Iesu, ke longoro tar kaling ualeik, kare banga tatanono ke mata pe, kare kula pare, “O mana tun, inggonene ter tun a God!”

⁴⁰Doho gisiomeher kuaha gera uan-goul pono ka bangbanga tur i reh. A tang sioko tasisin, Maria ger peng Magdala mes nu Maria tinana Jems ger uakeluk, doh Jose, kare Salome. ⁴¹Gisina ro kua-hasine teka uakeluk turume tang Iesu i Galili, kara poulpoul pono tatanon. Doho burehempe ro kuaha geka la tur tagume tatanon i Jerusalem, gisina ra uangoul pon.

Iesu ka keuin

⁴²A mareinionene ter Mareining Kaleuatoro tar Mareining Pepe Uah,^{§§} doh inggono ke moloï uakapa manas. ⁴³Te maeit Josep ger peng Arimatea ke ongol, kare lame tang Pailat, kare me dangat e marang kale tar tukununa Iesu. Inggono Josep a tang siokor tamata uleik pono tar kaunsil, doh ra ueltada ponoin. Doh inggono ter tang sioko re uanguangoul pono tena Nitoia God. ⁴⁴Doh Pailat ke lutara ke longoro pe tang Josep pare, ne Iesu ke mata manas, kare kila me tenas tamata uleikir tamatang uiliatung, kare me dangata tatanono pare, “Iesu ke

mata nomanampe, ue ahik?” ⁴⁵Doh gitir uleiking tasir uiluiliatung ke hire tapokis tatanono pare, “Aa, inggono ke mata dede manas.” Te maeit ke uauia Pailat tang Josep e la kale tar tukununon. ⁴⁶I muduhia Josep ke la bulaua toro gomono gaugauil, song ke la louh uahua tar tukununon, kara gomoin, kara la uamokoin toro lebanga ka kohoinane tar palau. Song ke tula uatagegelelaono Josep toro palaua uelik toro matana ro lebang ⁴⁷Doh Maria Makdala me nu Maria tinana Josep kura banga pono tar butur ka uamokoin Iesu.

O Mahar 16

Iesu ke tua tapokis

16 Na reiuinar giameher marein tar Mareining Pepe Uah,* Maria Magdalen, doh Salome, kare Maria ge tinana Jems ka bulaua tar inete amiamuh mara la tunahaig tar tukununa Iesu.

²Doh naliliuolik tar uakikilangar marein tar uik,[†] gine re hara pehar pisar, gisina ro kuah ka lala toro lebang. Gisina ka la toro lebangang mat. ³Gisina ke ueluekdangateis pare, “Mai re turung uatagegele liu ueleheir tagigieg toro palaua uleik toro matana ro lebang?” ⁴Bo tar binaka puk ka banga kaisin, gisina ka banga manasa toro palau, roon o uleik o niuatagegele liu manasane toro matana ro lebang.

⁵Gine ra leka pelasina toro lebang, gisina ka banga tar tamata kalan e hiku teil tar hikhiku gaugauil, inggon e tabila tar pang muahia. Doh gisina ka lutarantiehe tun. ⁶Bo inggono puk ke hire tasisina pare, “Ahik pah mu lu-

§§15:42 Tar Mareining Kaleuator tar Mareining Pepe Uah ter Fraide.

*16:1 Tar Mareining Pepe Uah ke kapa tar reiu tar 6 kilok.

†16:2 Tar mareining uakikilanganar uik ter Sande.

tarang sokor! Inggoum mu sir tang Iesu ger peng Nasaret geke tinain tar ko-rose. Inggono deh ka uatua tapokis man-asain. Inggon ahik pah kae baka polukinane. Mu bang tar buturene ka uarikin-ion. ^{7h}Bo inggoum mu la, karung la hire toсно tamatang uakuakelukono menia pono tang Pita pare, inggono ke uoum tamiuoum, ke la uoum i Galili. Terung la turung banga tooum tatanono ngohina sirampe ke kula pe inggon.” ⁸Song ka tauetesis ro kuah, kara ualo liu turane toro lebang, ge gisina pe ka poroporo keip tar nisokoro uleik. Doh gisin ahikinguampe mata hire me tamat, teene gisina ka sokor.

Maria ger peng Makdala ke banga tang Iesu

⁹Doh naliliuolik tar uakikilanganar marein tar uik, i muduhia ke tua tapokis baka pe Iesu, inggono ke kotpokoso uakikilanga tang Maria Magdalen ter kuaha geke geil liu turiono tar mouitir liouana uasa. ¹⁰Maria ke lame tasir tamata geke uanguangoul tagu sioun tang Iesu, tar binaka ra uangoulung uel-dolomosin, kara urung. ¹¹Doh gine ka longoro pesina tang Maria re hire pe pare, Iesu ke tua tapokis manas, doh inggono ke banga tatanon, bo gisina puk ahikompe mata tagorong mana tatanon.

¹²I muduhia tar puhionene, Iesu ke uagiomehe siokoin, kare kotpokoso poluk tar tang torikir kaluasisina geura lang la i Jerusalem. ¹³Doh rasina kura la hire tasir gisiameher tamatang uakuakeluk, bo ahik pukusina pah ka tagorong mana tasrasin.

Iesu ke pokoso tasir siokor hangaul, doha tang siok

¹⁴ⁱDohi muduhia song ke kotpokoso Iesu tasir siokor hangaul, doha tang sioko tar binaka ra einisin, kare uelkukur tasisin, teene gisina ka tagorong boh, doh ahik pah ka tagorong mana tasir tamata geke banga uoum tatanono ke tua tapokis pe. ^{15j}Doh inggono ke kula tasisina pare, “Inggoum mu la uelte-beir tar koto uakapa tun, karung la hire tauete tonogo Uelhire Uaiao tasir tamata uakap. ^{16k}Mair tamat re tagorong mana toro Uehire Uaia, doh ra uahuhuin inggono tera turung uelkarusin. Bo mair tamata ge ahik pehe tagorong mana toro Uelhire Uaia, inggono ra turung uakouhin. ^{17l}Doh God e turung guata tar niparoko tar limasar tamatang tagorong man. Gisina ra turung geil liu keip tar hangouguo tasir liouana uasa, kara turung uelhire pono tar giniameme siokor uelhire. ^{18m}Gisina ra turung banoto pono tar kusa tasir soi, doh tar binaka ra inumusina me bilih, gisin ahik pah ra matotong sa. Doh gisina ra turung uapono tar limas tasir momoh, kara turung uia poluk.”

¹⁹ⁿDohi muduhia ke menmene baka pe Iesu ger Tamata Noman tasisin, song ka kale kai taroion i Heuen, kare la tabilahia tar pang makoso tang God. ^{20o}Song ka la uelteibeirir tamatang uakuakeluk, kara mene tauetane toro mamang buturulik, doha Tamata Noman e kalekinale tagu tun tasisin, re uatouo pe tar nitouo tar uatampopokoho toro Uelhire Uaia. O mana tun.

^h16:7 Mat 26.32; Mak 14.28 ⁱ16:14 1Ko 15.5 ^j16:15 Apo 1.8

^k16:16 Apo 2.38 ^l16:17 Apo 2.4; 8.7 ^m16:18 Luk 10.19; Apo 28.3-6

ⁿ16:19 Apo 1.9-11; 2.33-34 ^o16:20 Apo 14.3; Hib 2.3-4

Luk

O Uelhire Uaia ke boloin Luk

No bolobolo Luk

Toro Uelhire Uaia geke boloin Luk, inggeig i banga pare, Iesu ter tamatang kale tapokis tasir Israel, doho gisiamer toto tamat, o bulout, doho kuaha pon. Doh tar binaka re marang uatentur Iesu tena kalekinale, inggono ke hire tasir tamata pare, a Iabena Dedeil ke uatentur tatanono tar mene tauete tono uelhire God gero uia tasir tiome (Luk 4.18). Doh roon o mana tun toro buk rone Luk ke ueluatata uaburehe tang Iesu ke uel-dolomo tasir tamatasine ra huata teil pe tar mamang niduhulik, kare guata uain-gua tasisin.

Gininar inetenine ke guataig Iesu teke guata maeit ka uahantieher toto tamatasiner nanon. Tar binaka ke poha Maria tatanon, o tamata ka uaha tun (Luk 1.42-48 doh Luk 2.10). Doh gine re lang kapa manasa per ueluatata toro buk rone, Iesu ke la i Heuen, doh gisinasiner tamata ka uahantiehe tunungua (Luk 24.52).

Luk ter tang sioko puk manasampe ke ueluatata tar bureher inete tena ni-uangoul Iesu ke uangoul peme. Gininar ueluatatanine ahik pahe moko teil tagu tar giniamer buk. Te Luk puk manasampe ke ueluatata tar bureher inete geke kotpokoso tar binaka ke kotpokoso Iesuane tar kot. Luk puk manasampe ke bolo toro uelhire uaranga geke mene tauetein Iesu ke ueluatata pe tar tamata ger peng Samaria ke poul pe tar tamata geke tupara uasain tasir tamata uasa (Luk 10.30-35). Doho uelhire uaranga pono tar keketik geke hiliu tang taman, kare la uangoul uelte-

beir (Luk 15.11-23). Kare na giniamer polukomper uelhire uaranga Iesu. Luk puk manasampe ke ueluatata tar inetenit geke kotpokoso tang Sakius, inggonor tamatane tere uoto kale tar mani tar takis.

Luk e moko teil na bureher mene tar giniamer inete pare, tar hagar-ing lotu uatampopokoh, doh tena kalekinaler Iabena Dedeil. Kare ter niguatang kusa luara liu tenas niguata uasar tamat. Luk na burehe ponor uelhire ke mene uatuha to ponolaig tar haua ka guataigir kuah.

O Mahar 1

O uelhire uakalahar

1^PTeopilus o bureher tamata ka uedanga tar uamoko uahiu tar nibolbolo nar mamang inetelik geke guataig God, doh ke kotpokoso sira tun i uantinanina tamiueim, ²misiana sira kompe ka uelueluahiu pehar tamatang kalekinale tono uelhire God tamiueim, teasinatine teke banga uakikilanga katongo tunur matas.

³Temaeitingua git tar binakanina sioun inggo ku sirsir hamas uaia tun me paheig tar mamang inetelik, e baka sirono paku bolo uahiu uauelturelao menang nibolobola Teopilus ger tamata uleik. ⁴Inggo ku guata pare, maro ate pona toro mana tun tar mamang inetelik geke ualasiraig totomua.

Jon ger tang uahuhu ka me hirein ra turung poho pein

⁵Tar binakene tang Herot ger toiang Judia, e uangoulur pater a hangana tang Sekaraia, inggon a patere tar paina tang Abia. Elisabet tena kuahon, e la tur toro matina tasir patere pon, bo toro gime matina puk. ⁶Rasina tokah a tok-

ing tamata uaiā, ura uoto guata uakodkodo ho dedeane tar matana God, kaura uakeluk uaiā tun tena niualatut, doh na niualatohon. ⁷Bo rasina puk ahik mo ra bung tus, teeit Elisabet a bouh, doh rasina toka a toking mahohontiehe tun.

⁸Maeit tar binakonene nas binaka manasar patereng toso bubunguna Abia tar guata tar kalekinale, doh Sekaraia ke la kalekinale sira manasa pono tar pater i uoumuhia tang God iuma tar umang lotu ger dedeil. ⁹Inggono ka kedanga toin toro bakbaka uadud tar uakeluk tar niguatang tasir patere mare lekala tena umang lotu Tamata Nomana ger uleik tar la ualuh tar adua. ¹⁰Doh tar binakonene o manai tamata uakapa tun ra lotu to i kalahar ra ualuh peigir adua.

¹¹⁻¹²Doh na angelour Tamata Noman ke me pokoso tang Sekaraia, kare me turuhia tar pang makoso na ro oltang uahung tar adua. Doh Sekaraia ke lutarantiehe keip tun tar nisokoro uleik ke banga pe tar angelou. ¹³Bo a angelou puk ke kula tatanono pare, “Sekaraia, ahik paho sokor, ge nang lotu pea ka longoro manasain. Nang kuaha Elisabet e turung poho me tumua me bulout, ingga o turung uelkila tatanono tang Jon. ¹⁴A niuaha uleik tun e turung laha tamiraoum, doh mo bureher tamata pono ra turung uaha uelkout tagu tamiraoum tar binaka ra pohoion. ¹⁵Ge inggono pe e turung kotpokos a tamata uleik tar matanar Tamata Noman. Inggon ahik tun pahe banot e inum me bino ue me inum popokoh, doh inggon e turung uoun tur tar Iabena Dedeil tar binaka halana ta pohoin. ¹⁶Inggon e turung uiuir mo bureher tamatang Israel mara lame tar Tamata Noman ge nas Godosin. ¹⁷Doh inggono e turung haliala uoum teil tar Tamata Noman, dohe

keip teil tar nitampopokoho misiana sira tena nitampopokoho Elaija mare uelua keipisir tamasir keketik toso bung tus, doho gisisir mahang longoro ra kale tar kodkodohonar niate mare kaleuatoro tanikais tena nilamer Tamata Noman.”

¹⁸Doh Sekaraia ke kula tar angelou pare, “Hape ru matoto pe inggo u ate pare, a puhon e turung pokos? Ge inggo pe ku mahohontiehe tun, doh nagu kuaho ke pipigogolik pon?” ¹⁹A angelou ke mene hahaua tatanono pare, “Inggo Gebriel geru uoto tur i uoumuhia tang God, doh inggo ka ualatuhaio u me mene totomua, karu me ueliu totomua toro Uelhire Uaiā rone. ²⁰Ualongor, gine ahik pe ingga mato tagorong mana tenag uelhireo gere turung pokoso tun toro mana tena binak, ingga o turung pau, ahik paho banot o men e tuka tar mareinene re pokosor inetenin.”

²¹Tar binakene ra uangangoul harahar tamata tang Sekaraia, gisina ra namamanaeh, a hauar tengkana, maene ke uaotoungon iuma tar umang lotu ger dedeil. ²²Doh gine ke tauete pe meon inggon ahik pahe matotong mene tasisin. Gisina ka bang paroko sira tatanono ke banga to me inete siok iuma tar umang lotu ger dedeil. Doh inggon e sarsara uagulguluh kompela tar limana tar marang uahire tasisin, bo ahik puk pahe banot e men. ²³Tar binaka ke siokor uakapono tena kalekinale tar umang lotu, song ke la tapokisono tena uan. ²⁴I muduhia Elisabet na kua hon, ke me balakoso manas, doh tar tolimar bialok, inggono ke uangoul uaouo kompe iuma tena um. Doh inggono ke kula pare, ²⁵“Gine ter haua ke guatainir Tamata Nomana totoguo ke ualasila pe tena nimalara totoguo, ke kale liu pe

^{¶1:9} KT 30.7 ^{¶1:15} Aha 6.2-3 ^{¶1:17} Mal 3.1; 4.5-6; Mat 17.11-13

^{¶1:19} Dan 8.16; 9.21

tereg nimatalo i uantinana tasir manai tamat.”

A anggelou ke laha tang Maria

²⁶Tar uatonomonor bialoko ke balakoso pe Elisabet, God ke ualatueha tang anggelou Gebriel e laha tar pang uan i Galili tar uauanilik ra kilain i Nasaret. ²⁷^uAnggelou Gebriel ke laha tar kuaha ge halana te hohouo keip me bulout. A kuahon a hangana tang Maria ger ni-ualamatot e le tang Josep gere la tur toro matina tang Debit. ²⁸Doha anggelou ke kula tatanono pare, “A marein uaia tun totomua! Ingga ter niguata uaia tun, a Tamata Noman e uangoul tagu totomua.”

²⁹Tar binaka ke longoro Maria tena uelhireon, inggono ke kanuh, kare namanaehe pare, a uamarein uaia hauon. ³⁰Song ke kula polukur anggelou tatanono pare, “Maria ahik paho sokor, ge God pe ke guata uaia tun totomua. ³¹^vUalongor! Ingga o turung balakos, karo turung poho tar keketik bulout, karo turung uelkila tatanono tang Iesu. ³²^wInggon e turung kotpokos a tamata uleik, doh ra turung kilain a tuna God ger i ranantieh. Doh God ger Tamata Noman e turung uatoia tatanon ngohina tang Debit ge tubunon, ³³doh inggono tere turung uoum keip uakodkodoho tasir tamatang Israel tar mamang binakalik, doh na Nitoiaon e turung moko dede.”

³⁴Kare kula Maria tar anggelou pare, “Hape re turung pokoso per puhonene ge inggo pe ahik matu hohouo keip me bulout?” ³⁵Kare mene hahauar anggelou tatanono pare, “A Iabena Dedeil e turung la uaponaha totomua, doh na nitampopokoho God ger i ranantieh e turung ragam tane totomua, maeit a keketik

bulout gero turung pohoia ra turung kilain a tuna God, kara dedeil. ³⁶Elisabet ge tahimulikia ke pigogo nomanampe, kara bouh, bo gine daan a puk, inggon e balakoso teil tar keketik bulout, doh na tonomo manasar bialok. ³⁷^xGe God pe ahik me inete re uaparakukuhin.”

³⁸Song ke kula Maria pare, “Inggo tena kuahang kalekinaler Tamata Noman, uamaluana gero pokoso ro uelhire roono totoguo, hape ko kula sira pe ingga.” Song ke hiliuir anggelou tatanon.

Maria ke la banga tang Elisabet

³⁹Tar binakoneit Maria ke kaleuator, kare uateuelein tar la tar uauanilik tar ponponina tar pang Judia, ⁴⁰kare la lekala tena uma Sekaraia, kare meneng uaha tang Elisabet.

⁴¹Tar binaka ke longoro Elisabet tena meneng uaha Maria, a guamene re uangoul teil tang Elisabet ke siaka kai keip tar niuah, doh Elisabet ke uoun tun tar Iabena Dedeil, ⁴²kare mene ualeik ualutara pare, “God ke guata uaiantiehe tun totomua, a i rana uain tasir gisiamehe ro kuah, kare guata uaiantiehe tun tar keketik gero turung pohoia! ⁴³Inggo deh ahik paha kuaha uaia mare me ruh koutur kuaha gere uatinanain nag Tamata Nomano. ⁴⁴Gine ku longoro pe inggo tar meneng uaha ko menegia, a guamene i lolono totoguo ke siaka kai keip tar niuah. ⁴⁵Doh ingga ra turung guata uaia tunuia ro tagorong mana teil pe tar haua ke meneinir Tamata Nomana totomua e turung kotpokoso tun toro man.”

No kerekereng uatakai Maria

⁴⁶^yKare kula Maria pare,

^u1:27 Mat 1.16,18 ^v1:31 Ais 7.14; Mat 1.21-23

^w1:32 2Sa 7.12-13,16; Ais 9.7 ^x1:37 Uak 18.14 ^y1:46 1Sa 2.1-10

“A kolouguo e uatakai tar hanganar Tamata Noman.

⁴⁷ Doha iabeiguo e uahantiehe tun tang God ge nag tang Uelkarusio.

⁴⁸ Teeit ke namana uanono peono tena kuahang kalekinale re kale uahiua pein.

Uakekena tur daan o mamang babeir tamata ra turung kula totoguo ka guata uaia keipio tar niguata uleik.

⁴⁹ Ge God pe ter tang sioko ger uleikintiehe na nitampopokoh, kara dedeilir hangan teke guata tar uleikir niguata totoguo.

⁵⁰ ^zNa niueldolomono e la tasisit ra ueltad, kara longoro tatanon, e uakekena tur pe tar babeir tamatang daan, kare uelueluahiuela tasir tamatang gaat i muduhia.

⁵¹ ^aInggono ke uatouo ualasira keip tar limana tar uleikir nitou, kare geil ueltebeir tasisit re uairana keipis teresir ninaman.

⁵² ^bInggono ke guata tasir gisiamer toia ka touahiuais, bo ke kale kai puk tasisit re kale uahiuais.

⁵³ ^cInggono ke uauoun tasisit ra gogo tar inete uaia, kare uelueltula liu tasir tang inete ra uasabelima teil puk.

⁵⁴⁻⁵⁵ ^dInggono ke poul i Israel gesno tamatang kalekinaleono tar namana huara tar niueldolomo geke ualapagah keipiono tang Abraham menia toso bunguna tar mamang binakalik.”

⁵⁶ Maria ke uangoul tagu tang Elisabet kaelainane tar touonor bialok, song ke tapokis tena uan.

Jon ger tang uahuhu ka pohoin

⁵⁷ A binaka ke kotpokoso tang Elisabet tar poho manas, doh inggono ke poho tar keketik bulout. ⁵⁸ Doho tamatasit ra uangoul uahuhut, doh gisis re ueliahe keipisio ka longoro kout tar Tamata Noman ke ualasira pe tatanono tar niueldolom, doh gisina ka uaha uelkout tagu tatanon.

⁵⁹ ^eTar uatualinar marein gisina ka laha tar me poko tar kapokonar keketik bulout, doh gisina ka marang uelkila uahiua tatanono tang Sekaraia ge tamanon. ⁶⁰ Bo tinana pukuono ke mene hahaua tapokis pare, “Ahik! Inggono deh ra kilain tang Jon.”

⁶¹ Kara kulasina tatanono pare, “Bo ingga puk ahik tun me tahimulik re moko teilir hangonene.” ⁶² Temaeit, gisina ka sarang pau tang tamanar keketik tar uahire tatanon, hingiar hangana re malaraion e uelkila tar tun. ⁶³ Inggono ke dangata me ineteng bolo keip, kare bolongua pare, inggono tar hangana te Jon. Doh gisina ka siokor lutarantiehe tun. ⁶⁴ Ahik me sikir manasan, kare mene Sekaraia, kare uakekenengua tar uatakai tang God. ⁶⁵ Gisit ra uangoul uahuhut ka ueltada keip tar nisokoro tang God, doh gane uakapa toro uaning toro ponponina tar pang uan i Judia, o tamata ra siokor mene pono tar puhon. ⁶⁶ Gisit ka longoro tar ineteninanine ka namanaeh, kara kula pare, “A haua tununguampe re turung guatainir keketik gete hua kai.” A puh peonene e uakalahara tena nitampopokohor Tamata Nomana re uangoul teil pe tatanon.

^z1:50 Ker 103.13,17 ^a1:51 2Sa 22.28 ^b1:52 Job 12.19; 5.11; Ker 147.6

^c1:53 Ker 34.10 ^d1:54-55 Uak 17.7; Ker 98.3; Mai 7.20

^e1:59 Uak 17.12; KT 12.3; Luk 2.21

No kerekere Sekaraia

⁶⁷ Doh Sekaraia ge tamanono ke uoun tar Iabena Dedeil, kare hire tauete toro uelhire geke heirinir Iabena Dedeil pare,
^{68 f}“Uatakai tar hanganar Tamata Noman, ger Godong Israel, teeit inggono ke me bulaua tapokis toсно tamat.

^{69-70 g}Ge inggono pe ke heiriha tar tamatang uelkarus ger tampopokoho tun e la tur toro matina tang Debit ge na tamatang kalekinaleono tar me uelkarus tagigeig, ngohina sira ke mene keip peono toсно propet gesir dedeil, ke la tur peme sioun.

^{71 h}Te mare uelkarus turiono tagigeig toсноgio uelmatan, doh tasisit re tokouasais tagigeig.

^{72 i}Inggono ke ualasira tena niueldolomo toсно bung tamagigeig, doh tar namana huara tena uelhote ger dedeil.

^{73 j}A ualapagaha geke guata keipiono tang Abraham ge tamagigeig,

^{74-75 k}ke uelkarus liu tagigeig toсноgio uelmatan

mari banoto i uakeluk keip tar nidedeil, doha nikodkodoho tar matana God tar mamang binakalik ri uangoul pe.

^{76-77 l}Doh inggar tug, God ger i ranantieh

e turung guata totomua pare, na propet, ge ingga pe o turung la i uoumuhia tar Tamata Nomana tar kaleuatoro tena lelon,

tar ualasira toсно tamata God, hape re matoto pe God e uelkarus tasisin gete kusa luar teres niguata uasasin.

^{78-79 m}Teeit tena niueldolomor Godener nagigeig, temaeit a pisar e turung hara turuha i Heuen e laha tagigeig mare heir me luh tasisit ra uangoul tar kitkitupun, kara uangoulung mat, doh inggon e turung keip tagigeig tena lele ro hiarou.”

⁸⁰ Doha keketik ke huang tabuar, kare tampopokoho na nitagorong mana tang God, doh inggono ke uangoul tar butur padenen e tuka tar binaka ke me kot-pokoso uakalahara peono tasir Israel.

O Mahar 2

Iesu ka pohoin

2 Doh tar binakaninanine o ualatoho popokoho o la tur tang Agustus ger toia, roono ko la uakapa toro pang uan gero mok i kukulebang tar nikauekeng Roum pare, o tamata ra la uamoko tar hangas toro bolobol. ²Inggonene ter uakikilanganar uamoko hangana tasir tamata tar binaka re tamata uleik Kuirinius i Siria. ³Doho tamata uakapa tun ra tapokis tonosio uauanilik tar uamoko tar hangas. ⁴Temaeit Josep ke hiliu tar uan gera kilain i Nasaret gere mok i Galili, kare la uamoto taro i Judia tena uan Debit gera kilain i Betlehem, ge inggono pe a peng toro matina tang Debit. ⁵Inggono ke lang uamoko tara hangas me Maria ger niualamatoto tar le tatanon, doh inggon a balakoso manas.

⁶Doh tar binakene ura uangoul rasin i Betlehem, a binakang poho tar keketik ke pokoso manas. ⁷Kare pohonguaono tar uakikilanganar tun, a bulout. Kare auih uiloho tar gomono tatanon. Kare

^f1:68 Ker 72.18 ^g1:69-70 Ker 18.2 ^h1:71 Ker 106.10

ⁱ1:72 Uak 17.7; Ker 105.8-9 ^j1:73 Uak 22.16-17 ^k1:74-75 Tai 2.12-14

^l1:76-77 Ais 40.3; Jer 31.34 ^m1:78-79 Ais 60.1-2

uarikin tatanon i lolono tenas buturung einir bulamakau mesir sipsip, teeit o umang hohouo ke uoun uakap.

O angelou ka me pokoso tasir tamatang kauেকে tasir sipsip

⁸Tar boungon, o tamatang kaukaueke tasir sipsip ra uangoul, kara kauেকে tonosio sipsip tar butur gere uahuhut i Betlehem. ⁹Doh na angelour Tamata Nomana ke pokos i uoumuhia tasisin, kare balo uilohonguaha na luhur Tamata Noman, ke balantiehe tun, doh gisina ka sokorontiehe tun. ¹⁰Bo a angelou puk ke kula tasisina pare, “Ahik pah mu sokor! Ualongoro uaia tun, inggo u lang ueliu taueteha toro Uelhire Uaia gero turung keip pokoso tar niuaha uleik tasir mamang tamatalik. ¹¹Daan nami tang uelkarusioum ka poho toin tena uan nu Debit. Inggono te Kristo ger Tamata Noman. ¹²Doh gine ter uaparok e la tamiuoum pare, inggoum mu la tupara tar guam ger niauih uiloho tar gomon, kare rikin i lolono tenas buturung ein tor bulamakau mesir sipsip.”

¹³Ahik me manasan, o burehe tunur gisiamer angelou ka me pokoso pon, kara siokor uatakai tang God pare,

¹⁴n^a“Uatakai tang God ger i ranantiehe tun.

Doh gane i kot, o moko ro hiarouo tasir tamatasit re malauelhiris God.”

¹⁵Gitie ka hiliu per angelou tasisin, kara la tapokis i Heuen, o tamatang kaukaueke tasir sipsip ka ueluelkuleis pare, “Ti siokor la i Betlehem, kari la banga tar inetonene ke kotpokoso geke hireinir Tamata Nomana tagigeig.”

¹⁶Temaeit gisina ke uateueleis tar la, kara la tupara tang Maria, doh Josep,

doha keketik e rikin tenas buturung ein tor bulamakau mesir sipsip. ¹⁷Git ka banga baka pesina tatanon, gisina ka ueluatata tauete toro uelhire hape ka hire peis tar keketik. ¹⁸Doh gisine uakapa tun ka siokor longoro toro uelhire roono ka siokor lutara tun ka hire per tamatang kauেকে tasir sipsip tasisin. ¹⁹oBo Maria puk ke uamoko toto tar mamang inetelikininanine toro balan, kare namanaehe tun hape pake kalahara per uelhirenin. ²⁰Song ka la tapokisir tamatang kauেকে tasir sipsip ra uatuatakai teil, kara heir tar hangana uleik tang God tar haua geka siokor longoroigisin, kara bang. A mamang inetelik a siokono sira tun hape ka hire peisisin.

Iesu ka keipin tar umang lotu ger dedei

²¹pTar uatualinar marein tar binakeit ka pokoinir kapokonor guam, inggono ka uelkilain tang Iesu. A hangonene ke heirinir angelou i uoumuhia tar binaka halanono te koup i lolono tang tinan.

²²⁻²⁴qA binaka ke la manasame tang Maria, doh Josep tar guata sira hape re kula pe na ualatut Moses pare, “O kuah ra kale uadelauanais tar matana God i muduhia ra poho pe tar guam.” Temaeit kura keip rasina tang Iesu i Jerusalem kaura la heir tar uahung pare, a torikir matang baluh ue a torikir babaluhulik tar uakeluk tena ualatutur Tamata Noman. Tar binakonene rasina kura heir pono tang Iesu tang God, ter hauono na ualatutur Tamata Noman e kula pare, “O mamang keketik buloutulik gera poho uakikilangais paka heir sirais pare, o nana Tamata Noman.”

^m2:14 Luk 19.38 ^o2:19 Luk 2.51 ^p2:21 Luk 1.31

^q2:22-24 KT 12.1-8; 13.2,12

**O uelhire ke mene uatuhain
Simeon tang Iesu**

²⁵Doh tar binakoneit e uangoulur tamat i Jerusalem a hangana tang Simeon. Inggon a tamata kodkodoho tun, kare uoto uakeluk uaia tun tang God, doha Iabena Dedeil e uangoul teil tatanon. Inggono ke uanguangoul tang God e ueliuiha tang Kristo tasir Israel.

²⁶Inggono ke ualasira uakalaharainir Iabena Dedeil pare, inggon ahik pahe uolong mat e tuka gete banga bakono tar tamatang uelkarus geke heir uahiuahainir Tamata Noman. ²⁷Doh inggono ke keipilainir Iabena Dedeil tar umang lotu ger dedeil. Tar binakonene a toking tinana Iesu kura lekala tar umang lotu ger dedeil tar guata tar uahung, kaura ueliu sira ponola tar guama pare, a uahung e la tang God tar uakeluk tenas ualatutur Ju. ²⁸Gine ke banga pe Simeon tar guam, kare la buakangua tatanon, kare uatakai tang God, kare e kula pare, ²⁹⁻³¹r^u“Nag Tamata Noman ger i ranantieh,

Ingoene daan song ku unga uaha tun, u banot u mata keip toro hiarou, ge inggo pe ku banga manasa tatanon, ngohina ko ualapagah pe ingga totoguo.

Ingo ku banga katongo manasa tar Tamatang Uelkarus geko kedangaia mara bangar tamata uakap.

³²sInggono ter luh gere turung luh uakalahara toro mana

gero noumua tasisit ge ahik paho Ju.

Doh inggon e turung heir tar hangana uleik tasir Israel ges nongo tamata.”

³³Maria me Josep kura siokor lutara tun tar haua ke menmene uatuhaig Simeon tang Iesu. ³⁴tKare dangatan-

gua Simeon tang God me niguata uaia tasisin, kare kula tang Maria ge tinanono pare, “A keketikene teke umatotoin God tar guata tasir bureher Israel mare punga uahiuu res nitagorong man, doho gisiamehe ra turung tentur kai keip tar nitagorong man, doh inggono tere turung pokoso sira pare, a uaparoko tasir tamata mara tapokisime tang God, bo o burehe puk ra turung ueluelde tatanon. ³⁵Temaet a hauar ninamananine re moko tar kolousur bureher tamat e turung kotpokoso uakalahar, doh ingga e turung kalentieheiar niueldolomo ngohina toro baenat gero turung soup pokoso tunula tar koloumua.”

**Ana ke uatakai tang God ke
banga pe tang Iesu**

³⁶Tar binaka tunoneit a propet a hangana tang Ana ke la uahuhutume tasisin, inggon a tuna Penuel gere la tur toro matina tang Aser. Ana ke le, doh ke uangoul tagu tena bulout toro mouit ro krismas, kara mata liuin. ³⁷Inggono ke uangoulung kamob e tuka ke la tual per hangaul, doho toueit no krismas, doh ahik pahe uoto hiliu tagu tar umang lotu ger dedeil re uoto lotu pe tar mamang binakalik, kare uoto ueil pon. ³⁸Gine ke me banga peono tar keketik, inggono ke uatakai tar hangana God, kare ueluatata tang Iesu tasir tamata uakapasit ra uangangoul tar toia ger niualapagaha tar laha, kare me uelkarus tasir Jerusalem.

³⁹uTar binaka kura guata uakeluk pe Josep me Maria tar mamang inetelik, hape ro kula pe no ualatut God ger Tamata Noman, rasina kura tapokis tenasira uan i Nasaret tar pang uan i Galili. ⁴⁰Doha keketik e huang tabuar, kare me tampopokoh pon. Inggon a tang namana tun. Doh na nimalael-

^r2:29-31 Isa 52.10; Luk 3.6; Tai 2.11 ^s2:32 Ais 42.6; 49.6; 52.10

^t2:34 Ais 8.14; Mat 21.42; 1Pi 2.8 ^u2:39 Mat 2.23

hirir Tamata Noman menia tena nipoul e moko teil tatanon.

Iesu ger keketik ke la tar umang lotu ger dedeil

⁴¹ Tar mamang krismasilik a toking tinanon ura uoto la i Jerusalem toro niein uleik gera kilain, Leke liu ro Mat. ⁴² Tar binakene no siokor hangaul, doho torik manasa no krismas Iesu, gisina ka la kai taro toro niein misiana ra uoto guatang sioun pe tar niguatan tasir Ju. ⁴³ Tar binaka ke karuh baka per mareinene toro niein, a toking tinanon ura lang la tenasira uan i Nasaret, bo Iesu puk ke uangoul dede i Jerusalem, doh rasin ura tel. ⁴⁴ Rasin ura namanampe pare, e la tagu teilimpeono tasisin, doh gisina ka la manasa tar siokor marein, song kura bangahe rasi-nane i uantinanina toso ra tahisilik, doho ra bung kaluas. ⁴⁵ Gine ahik pe rasina pah kura ueltupar tatanon, rasina kura tapokis poluk i Jerusalem tar la sir tatanon. ⁴⁶ Kura karuh bakar touonor marein song kura la ueltupar to rasina tang Iesu tar buturung uelpokosane tar umang lotu ger dedeil, e tabila tagu tasir tamatang ualualasir, kare dangdangata heke tapokis tasisin. ⁴⁷ Doho tamata-sine ka ualongoro tatanono ka siokor lutarantiehe tun hape re ate uaia tun peono re hahaua pe tenas nidangatasin.

⁴⁸ Tar binaka kura bang huara pe tamanon, doh tinanono tatanon, rasina kura lutarantiehe tun. Kare kulangua tinanono pare, "Ir tug! Ingga paka hik paho guata pare tamiraim! Raeim me tamoumua kira kanuh tun, kira sirsir pe totomua."

⁴⁹ Doh Iesu ke mene hahaua pare, "Raoum deh pakura ate tun pare, inggo paku uangoul tena uma Tamoug." ⁵⁰ Bo

rasina puk ahik matura naman manate tar haua ke mene uatuhaion.

⁵¹ W^I muduhia Iesu ke tapokis tagu i Nasaret tasrasin. Kare tang longoro dede tun tasrasin. Bo tinana pukion, ke uamoko toto tar ineteninanine tar koloun. ⁵² Doh Iesu ke huang tabuara tunur tukunun, kara tang namana tun, doh God mesir tamat ra malarantiehe tun tatanon.

O Mahar 3

Na kalekinale Jon ger tang uahuhu

3 Taiberias Sisar ke toia tar gavaman i Roum toro hangaul, doho tolina ro krismas. Doh Pontius Pailat teke gavana tar pang uan i Judia, doh Herot ter tamata uleik tar pang uan i Galili, Pilip ge tahinono ter tamata uleik tar pang uan i Ituria, me i Trakonitis, doh Lisianias ter tamata uleik tar pang uan i Abilene. ² Doh tar binakonene, Anas me Kaiapas ter toking pater geura i rana uain tasir pater, doh no uelhire God ko laha tang Jon ger tuna Sekaraia tar butur paden. ³ Doh inggono ke la uiloho hahai toro uan uakap gere moko uahuhut tar kodom i Jordan. Kare uelhire tauete toro uelhire tasir tamata tar uapalih, kara tur liu tenas niguata uasa, kara kale tar uahuhu mare kusa luara liu God tar niguata uasar nosisin. ⁴ Misianar nibolo uahiua peono tono buk propet Aisaia pare,

"A tang siokor tamata gere kila uauleik tur tar butur paden e kula pare,

'Kaleuatoro tena leler Tamata Noman, uakodkodoho tanika toro lel,

⁵ o ueltageihina ro siusana ra siokor uig, doho siusan mero ponponina ra uamalatahaig,

^v2:41 KT 12.24-27; 23.14-17; Ual 16.1-8

^w2:51 Luk 2.19

^x2:52 1Sa 2.26; NU 3.4 ^y3:3 Apor 13.24

doho lele ger pudpudo ra
 uakodkodohoig,
 doho butur ger sa ra tuha
 uamamadalouoig,
⁶doho tamata uakapa ra turung banga
 gete uelkarus God tasir tamat.” *Ai-
 saia 40.3-5*

Uapalih tenami niguata uasa!

^{7z}Jon ke kula tasir manai tamatasine
 ka lame mare me uahuuono tasisina
 pare, “Inggoum o sa o bung tunar soi!
 Mai ke uatagin tamiuoum marung ban-
 otong ualo liu tena nimaliana God gere
 turung lame? ^{8a}Ahik! Bo inggoum puk
 mu uapalih, karung ueldolomo katon-
 gosioum mare ualasiyasioum pare, kung
 uapalih tenami niguata uasa. Doh ahik
 pah mu uelkule katongosioum pare,
 ‘God ahik pahe uabato tagigeig, ge
 inggeig pe o bunguna Abraham.”

“Inggou gine ru hire tamiuoum, God e
 matot e guata mo bubunguna Abraham
 tar paluanine! ^{9b}Ginempe daan God e
 kaleuato tar uabato tasir tamata ge
 ahik pah ra uapalih tenas niguata uasa.
 God e turung uabato tasisina ngohina tar
 tamata gere kaleuato tar kangana tar
 tokout uahiu tar doukunit ge ahik pahe
 uauaia me kukuanan, kare ualuh tanin-
 ina toro hue!”

¹⁰O tamata ka dangata tang Jon pare,
 “Bo hape paking guata pe inggeim.”

¹¹Jon ke mene hahaua tasisina pare,
 “Mai kompe ge no torik ro hikhiku, e
 heir mo sioko tang mai ge ahik mo nan.
 Doh mai ge mena niein, inggon e heir
 tagu taninina tang mai ge ahik me en.”

^{12c}O tamatang kale tar takis ka la
 ponome tang Jon mare uahuu taguono
 tasisin. Gisina ka dangata tatanono
 pare, “Ir Tang Ualasi! A hua paking
 guataieim.”

¹³Doh Jon ke hire tasisina pare, “Kale
 tur tasir tamata tar touihar buluanar
 takis manieit ro kulain ro ualatut.”

¹⁴Song ka dangata ponor tamatang
 uiliatung tatanono pare, “Doha hauan-
 gua paking guataieim.”

Kare mene hahaua Jon tasisina pare,
 “Ahik pah mu petutupe tasir tamata tar
 heir tamiuoum me mani. Ahik pah mu
 boho tola mo tamat, mu uaha kompe
 hape ra bulaua pesioum.”

A tang sioko gere i rana uain tang Jon

¹⁵O tamata ra uanguangoul uatuha
 tang Kristo tar pokos, doh gisina ra
 namnamanaehe tang Jon ge pare te
 Kristo. ^{16d}Temaeitie Jon ke mene ha-
 haua tasisina pare, “Inggou u uahuu keip
 tamiuoum tar kodom, bo a tang sioko
 ger i ranantiehe uain na nitampopokoho
 totoguo, inggon e turung lame. Doh
 inggo ahik pono paha tamata uaia tar
 luaka tena toking bungbungunar suon,
 inggono tere turung uahuu keip tamiu-
 oum tar Iabena Dedeil, doho hue. ¹⁷Ing-
 gon e kaleuato tar uauelpakaha liu
 tur tasir tamata uasa tasir tamata uaia
 misiana tar tamata gere uauelpakaha
 tar uatunar raes-uitinit re moko teil tar
 kapokon, doha doukdoukina ge ahik pah
 ra guata keip taguig me inet. Doh ing-
 gon e turung uamoko tasir tamata uaia
 me butur uaia misiana tar tamatatie re
 uamoko tar raes-uit iuma tar umang
 uamoko toto. Bo inggono puk e turung
 uabato tasir tamata uasa misiana tar
 tamata gere bakala tar kapokonar raes-
 uit, doha doukdoukin i lolono mo hue
 ge ahik me tang siokor tamata re banot
 e lomoh.” ¹⁸Doh Jon ke mene ualeik
 uapopokoho tasir tamat tar bureher uel-
 hire, kare hire tauete toro Uelhire Uaia
 tasisin.

^z3:7 Mat 12.34; 23.33 ^a3:8 Jon 8.33,39 ^b3:9 Mat 7.19 ^c3:12 Luk 7.29
^d3:16 Ap0 13.25

Herot ke uamoko tang Jon tar umang uih

^{19e}Doh Jon ger tang uahuhu ke uelkukur tang Herot ger tamata uleik, teeit ke le peono tang Herodias ge na kuaha tahinon, doh tar burehemper niguata uasa geke guatagion. ²⁰Temaait Herot ke uamokongua tang Jon tar umang uih, ke uanotongua polukular puhonene tar giniamerher niguata uasanit ke guatagion.

Iesu ka uahuuin

²¹Tar binaka ka siokor uahuhuisir tamat, Iesu ka uahuhu ponoin, doh gine re lotu peon i Heuene ke takapuk, ^{22f}doha Iabena Dedeil ke la uaponaha tatanon misiana tar tukununar baluh, kare mene turuha God i Heuene pare, “Ingga ter tuguo geru malahirintiehe tunin, doh inggo u uaha totomua.”

Gisine ter hangas ro bunguna Iesu

^{23g}Tar binaka ke uakekena Iesu tena kalekinale, inggono kae siralain pare, no touonor hangaul ro krismas re mahoho pe. Inggono ter keketik bulout gera atein pare, a tuna

Josep ter tuna Heli.

²⁴Heli ter tuna Matat.

Matat ter tuna Libai.

Libai ter tuna Melki.

Melki ter tuna Janai.

Janai ter tuna Josep.

²⁵Josep ter tuna Matatias.

Matatias ter tuna Amos.

Amos ter tuna Nahum.

Nahum ter tuna Esli.

Esli ter tuna Nagai.

²⁶Nagai ter tuna Mat.

Mat ter tuna Matatias.

Matatias ter tuna Semein.

Semein ter tuna Josek.

Josek ter tuna Joda.

²⁷Joda ter tuna Joanan.

Joanan ter tuna Resa.

Resa ter tuna Serubabel.

Serubabel ter tuna Sealtiel.

Sealtiel ter tuna Neri.

²⁸Neri ter tuna Melki.

Melki ter tuna Adi.

Adi ter tuna Kosam.

Kosam ter tuna Elmadam.

Elmadam ter tuna Er.

²⁹Er ter tuna Josua.

Josua ter tuna Elieser.

Elieser ter tuna Jorim.

Jorim ter tuna Matat.

Matat ter tuna Libai.

³⁰Libai ter tuna Simeon.

Simeon ter tuna Juda.

Juda ter tuna Josep.

Josep ter tuna Jonam.

Jonam ter tuna Eliakim.

³¹Eliakim ter tuna Melea.

Melea ter tuna Mena.

Mena ter tuna Matata.

Matata ter tuna Natan.

Natan ter tuna Debit.

^{32h}Debit ter tuna Jesi.

Jesi ter tuna Obed.

Obed ter tuna Boas.

Boas ter tuna Salmon.

Salmon ter tuna Nason.

³³Nason ter tuna Aminadab.

Aminadab ter tuna Atmin.

Atmin ter tuna Arni.

Arni ter tuna Hesron.

Hesron ter tuna Peres.

Peres ter tuna Juda.

³⁴Juda ter tuna Jekop.

Jekop ter tuna Aisak.

Aisak ter tuna Abraham.

Abraham ter tuna Terah.

Terah ter tuna Nahor.

^e3:19 Mat 14.3-4; Mak 6.17-18 ^f3:22 Jon 1.32 ^g3:23 Luk 4.22; Jon 6.42

^h3:32 Rut 4.17-22

³⁵Nahor ter tuna Serug.
 Serug ter tuna Reu.
 Reiu ter tuna Peleg.
 Peleg ter tuna Eber.
 Eber ter tuna Sela.
³⁶ⁱSela ter tuna Kainan.
 Kainan ter tuna Arpaksat.
 Arpaksat ter tuna Siem.
 Siem ter tuna Noa.
 Noa ter tuna Lamek.
³⁷Lamek ter tuna Metusela.
 Metusela ter tuna Enok.
 Enok ter tuna Jaret.
 Jaret ter tuna Mahalalel.
 Mahalalel ter tuna Kenan.
³⁸^jKenan ter tuna Enos.
 Enos ter tuna Set.
 Set ter tuna Adam.
 Adam ter tuna God.

O Mahar 4

Satan ke uedanga tang Iesu

4 Gine ke tapokis tur peha Iesu tar kodom i Jordan, inggono ke uoun tun tar Iabena Dedeil, doh inggono ke keipilainir Iabena Dedeil tar butur paden. ²Kare la uedangene Satan tatanono tar toueitir hangaulur marein. Tar mamang binakalikinin, Iesu ahik mata ein me niein, doh tar binaka ke la kapa per mareininin, inggono ke gogontieh.

³Doh Satan ke kula tatanono pare, “Ge para tuna God nomana ingga, o mene toro palua rone maro uapalihin o bereit!”

⁴Bo Iesu puk ke kula tatanono pare, “No uelhire God o nibolo pare, ‘A tamat ahik pahe tua to puk re ein pe toro bereit.’” *Ualatur 8.3*

⁵Doh Satan ke keipingua poluk taro tatanono tar siusana ger i ranantiehe, kare la ualasira toro mamang nitoia-

likane i kot tar sisikinalikir binak. ⁶Kare kula poluk Satan tatanono pare, “Inggo u turung heir totomua tar nitampopokohong kauek, doha mamang uinatorong toro nitoianin, ge ginina pe a niheir totoguo, doh inggo u banoto tar heir taninina me tamata geru marang heirin. ⁷Temaeit geto hatup uahiu, karo lotu totoguo, ginina uakapa tun a turung noumua.”

⁸Bo Iesu puk ke mene hahaua pare, “No uelhire God o nibolo pare, ‘Loutu tar Tamata Noman, ger God a noumua, karo kalekinale kompe tatanon.’” *Ualatur 6.13-14*

⁹Song ke uoum keip poluk Satan tang Iesu i Jerusalem, kare la guata tatanon, maeit re la tur i rana tar butur ger i ranantiehe tar kukunar uamang lotu ger dedeil. Kare kulono tang Iesu pare, “Ge para tuna God nomana ingga, siaka uahi-uakoane! ¹⁰Roon o nibolo tono buk God pare,

‘Inggon e turung ualatoho uatuha totomua tosno anggelou tar kaueke uaia tun totomua.

¹¹Gisina ra turung kabe kai totomua tar limas, te mara hikia paho uabir tar kekeim mo palau.” *Ker 91.11-12*

¹²^kBo Iesu puk ke kula tatanono pare, “No uelhire God o kula pono pare, ‘Ahik paho uedanga tar Tamata Nomana ger God a noumua.’” *Ualatur 6.16*

¹³^lTar binaka ke uedanga uakapa Satan tar mamang uedangalikinine, inggono ke hiliu tatanon e tuka me giameher binaka uaia.

Iesu ke uakekene tena kalekinale

¹⁴Iesu ke uoun tun tena nitampopokohor Iabena Dedeil ke tapokis pe i Galili, doho tamatang toro pang uaninin ka siokor uolo ueliate tatanon. ¹⁵Doh ing-

gono ke menmene ualasira to iuma tonosio umang lotur Ju, doho tamata ka siokor uatakai tatanon.

Iesu ka uelueldein i Nasaret

¹⁶Tar binaka ke la Iesu i Nasaret tar uan geke hua kai toin, doh tar Mareining Pepe Uah, inggono ke haijala iuma tenas umang lotur Ju, e uakeluk tompe tena niguata tar Mareining Pepe Uah, kare la tur kai tar timana tono uelhire God.

¹⁷Doh inggono ka heirin toro bolobol o niligun gero nang Aisaia ger propet, inggono ke luaka tang roon, kare tuparangua tar butur ka boloin pare,

¹⁸“Na Iabena Dedeilir Tamata Noman e uangoul teil totoguo,

teetit ke umatoto peono totoguo tar me uelhire tauete tono Uelhire Uaiaono tasir tamatisisir tiome.

Inggono ke ualatueha totoguo tar me uelhire tauete pare, o tamatisis ra uangoul tar umang uih ra turung uamaluanais,

doho kut ra turung banga poluk, doho tamatisis gera uangoul keip tar niduh, e turung mamaolois, kara uah,

¹⁹doh tar uahire tauete pono tar binaka re ualasira tor Tamata Nomana tena nimalar,

kare uelkarus tosno tamat.” *Aisaia 61.1-2*

²⁰Song ke ligun tapokis Iesu toro bolobol, kare heir tapokis tang roono tar tamatang kalekinale tar umang lotu, kare tabil. Doho tamata uakapa tunusine iuma tar umang lotu ra siokor uakeis uanonono kompe tatanon. ²¹Song ke uakekenono tar mene tasisina pare, “Daan kung longoro manasoum toro uelhire, roono ko kotpokoso manas o man.”

²²^mDoho tamatisine ka longoro tar menenine ke mene pe inggono ka siokor

uairana tun tatanon, kara lutara tar inete uaianine ke menmenegion. Doh gisina ka ueluelmenengua pare, “Inggeig i ueliate pare, inggonene ter tuna Josep. Hape maene re banotono tar mene tauete tar uelhirenine.”

²³Kare kula Iesu tasisina pare, “Inggoum here mu turung kula totoguo tar puhung kulene ra uelaten siounin pare, ‘Dokta, ingga deh pako guata uauia katongo baka uoumuia! Guata to ponane tenang pang uan i Nasaret tar niguata geking longorogiem geko guatguata togia i Kaperneam.’” ²⁴ⁿBo inggo puk gine ru hire tamiuoum toro man, ‘Ahik me propet ra uaiainane tena uan katong.’”

²⁵^o“Roono mana tun, tena binaka Elaija o bureher kuaha nimata liu ka malara me nipoul, tar binakoneit ahik me huana ke dur i Israel toro touono ro krismas, kara tonomor bialok, doha gogo uleik ke kotpokoso tar pang uanene.

²⁶^pKara hik dedempe Elaija pah ka ualatuelain tar la poul me peng Israel, bo ka ualatue kalehe pukulain tar la poul tar kuaha nimata liu tar gime uan, a peng Sarepat tar pang uan i Saidon.

²⁷^qDoho burehentieher toba i Israel tena binaka Elisa ger propet, bo God puk ahik mata uauia me peng Israel. Te Naman puk manasa ger peng Siria ka uaiain.”

²⁸Tar binaka ka siokor longoror tamatisine iuma tenas umang lotur Ju tar puhonene, gisina ka me nimaliana uasa tun. ²⁹Gisina ka tur kai, kara tututupe tauete tatanonane tar uauanilik, kara keip taro tatanono tar lulunar siusan geke tuhainir uan i Nasaret, te mara la baka uahiuakoiono tar urauan. ³⁰Bo inggono puk ke la uuelhobourin tasir manai tamat, kare haijala dede.

^m4:22 Luk 3.23; Jon 6.42 ⁿ4:24 Jon 4.44 ^o4:25 1To 17.1,7

^p4:26 1To 17.8-16 ^q4:27 2To 5.1-14

³¹Kare la uahiuko i Kaperneam tar uauanilik i Galili, doh tar mamang Mareining Pepe Uahener nosir Ju, Iesu e ualasira tasir tamat tono uelhire God. ³²rGisina ka lutarantiehe tena niualasiron, teeit no uelhireono to nitampopokoh.

³³Doh gane iuma tenas umang lotur Ju e uangoulur tamata nihikung liouan, kare kaling ualeikinguaono tang Iesu pare, ³⁴“Th! Iesu ger peng Nasaret! A haua ro marang guata keipia tamiueim, ko lamea tar me binopo tamiueim? Inggo u ate maia, ingga ter tang siokor dedeilir nang God!”

³⁵Bo Iesu puk ke ualatoho tar liouana uasa pare, “Uakenua tar men, karo hiliu tatanon!” Kare baka uahiuanguar liouana tar tamat i uoumuhia tasisinasisir tamat. Kare me tauete liu, ahik mata guata uasa tatanon.

³⁶Gisiner tamata uakapa ka siokor lutarantiehe, kara ueluelkuleis pare, “O meneng haua roono rone? Inggono ke ualatoho keip tena nitampopokoho tasir liouana uasa, kara me tauete liu tatanon.” ³⁷Doho ueluatata tang Iesu ko la ueltebeir toro mamang buturulik.

Iesu ke poul tasir mamang tamat

³⁸Iesu ke hiliu tar umang lotu, kare langua tena uma Saimon. Tar binakene tinana na kuah Saimon e momouhantiehe. Doh gisina ka dangata tang Iesu tar me poul tatanon. ³⁹Temaait Iesu ke la tur tabara tono uaton, kare meneng louara toro mat, karo hiliu ro mata tatanon. Inggon ke tur kaingua kompe, kare kaleuatoro teres nieinisin.

⁴⁰Tar binaka re hu uahiukor pisar, o tamata ka me ueliuiha tasir tamatasine res bureher mamang mata tang Iesu. Kare uaponolaono tar limana tasisina

uakap, kare uauia tasisin. ⁴¹sO burehentieher liouana uasa ka hiliu tasir bureher tamat, kara kula ualeik pare, “Ingga ter tuna God!” Bo Iesu puk ke loulouar, kare ualatoho tasisin, ahik pah ra mene baka poluk, ter hauono gisina ra ate inggono ter Kristo.

⁴²Tar binakeit re kih pehainir uagah, Iesu ke tauete liu. Ke la pe tar butur tabotan, o tamata ka sirsir tatanon, doh gine ka la tupara pesin, kara marang ut tatanon ahik pahe hiliu tasisin. ⁴³Bo inggono puk ke kula pare, “Inggo deh paku mene tauete toro Uelhire Uaia tena Nitoia God toro giniameme ro uan pon, temaene pe ka heirihaio.” ⁴⁴tTemaait, inggono ke mene tauete uapoul poluk toro Uelhire Uaia iuma tonoso umang lotur Ju i Judia.

O Mahar 5

Iesu ke kedanga mo tamatang uakuakeluk

5 ¹A siokor binaka Iesu e tur i tektekena tar kodomo uiluiloh i Gene-saret, doho tamata ra kusukus uiloho tatanono tar ualongoro tono uelhire God, ²inggono ke banga tar torikir bout tar tektekenar kodom, ka hiliu toisir tamatang uekih, ra uahuhu pe tonosio uben. ³Iesu ke panete tar siokor bout a nang Saimon, kare dangata tang Saimon tar bele uain sikoro kompe taro i laur tar bout tar uareing i kot, kare tabila uahiuangua Iesu, kare mene ualasira turuha tar bout tasir tamat.

⁴Tar binaka ke menmene uakapon, kare kulangua tang Saimon pare, “Hua uain taro tar tungun, kara uahiuaign uben mara hua mo ian.”

⁵vBo Saimon puk ke mene hahaua pare, “Ir tamata uleik, inggeim king

^r4:32 Mat 7.28-29 ^s4:41 Mat 8.29; Mak 3.11-12 ^t4:44 Mat 4.23

^u5:1 Mat 13.1-2; Mak 3.9-10 ^v5:5 Jon 21.3-8

kalekinaletiehe tar udeilir boung, doh ahik mating uahua baka me inet, bo teeit puk ko kula manasa pea, inggo u turung baka uahiua tagin.”⁶ Kara guata siranguasin, maeit ka uahuangua tasir burehentieher ian, doh nas ubenesina e lang uakekena tar takih!⁷ Song ka kalkalouokosina toso uanotousisit ra panete teil tar giameher bout tar huaha, kara me poul tasisin, doh gisina ka huaha, kara me ute uauoun tokaha tar toking bout tasir ian, ura marang dudur uadeil pukur toking bout!

⁸ Gine ke banga pe Saimon Pita pare, inggono ke hatup uahiuanguainane i uoum tar kekena Iesu, kare kulangua pare, “Hiliu totoguo, Ir Tamata Noman, ge inggo pe a tamata uasa.”

⁹ Doh inggon, doho uanotono ka siokor lutarantiehe ka hua per ianasis ka kaleisisin.¹⁰ Doh rasina tes Jems me Jon ger toking tuna Sebedi ter toking tamatang uekih tagu tang Saimon.

Song ke kulangua Iesu tang Saimon pare, “Ahik paho sokor, gine daan, ingga ahik paho uekih baka poluk mo ian, bo ingga o turung reih pukume tasir tamata totoguo.”¹¹ Maeit ka la reih kai manasasina tenas toking bout ka me hung pe, kara hiliu tar mamang inetelik, kara uakeluk tang Iesu.

Iesu ke uauia tar tamat a toba

¹² Tar binaka ke la uangoul Iesu tar siokor uan toro uanininanine, kare lamer tamata a uoun uakapar tukununa toro toba. Tar binaka ke bangono tang Iesu, inggono ke hatup, kare uasuge uahiua toro lun i kot, kare dangata tang Iesu pare, “Ir Tamata Noman geto malara, ingga o uadelauana totoguo.”

¹³ Doh Iesu ke huela tar liman, kare tuha tatanon, kare kula pare, “Inggo u malar, o delauana manasa ingga.” Doh

ahik me sikir manasan, karo kapa no tobaon.¹⁴ Doh Iesu ke ualatoho tanono pare, “Ahik paho ueluatata me tamat, bo o la puk manas, karo la ualasiraia tang pater, karo la guata me uahung tar ualasiraia pare, ko kapa rongo toba, ngohina sira ke ualatoho pe Moses mara atesin.”¹⁵ Bo ro ueluatata puk ka ueliatein ke uauia pe Iesu tatanon, doho bureher tamata ka lame tar me ualongoro tena niualasiron mare uauia pono Iesu teres matasin.¹⁶ Bo a bureher binaka puk, Iesu e uoto hiliu tasisin, e la uoto lotu to tar butur belun.

Iesu ke uauia tar tamat a mater tukunun

¹⁷ A siokor binakanit ke ualualasira Iesu, o Parisi, doho tamatang ualualasira tar ualutut, gisina ka la tur toro mamang uaning Galili, dohi Judia, dohi Jerusalem, gisinasin teka me tabila uilohatie, kara me ualongor. Doh na nita-mpopokohor Tamata Noman e uangoul tagu tang Iesu tar uauia tasir momouh.

¹⁸ O gisimeher tamata ka lame, ra huata teil toro rikin e rikin teilir tamat a mater tukunun. Doh gisina ra marang kalela iuma tar um mara la uamokoion i uoumuhia tang Iesu, bo ahik puk me hagar, teeit a uma ke uoun tun tasir tamat.¹⁹ Temaeit ka kaete kai tarosina tar kukunar um, kara tes tar mahar kukunar um. Song ka la uahiua keipikoiono tono rikin matmatoto tunuko i uoum tang Iesu.

²⁰ Tar binaka ke bang paroko Iesu teres nitagorong manasin, inggono ke kula pare, “Kaloug a niguata uasar noumuia ka kusa luar manasaig.”

²¹ O Parisi, doho tamatang ualualasira tar ualutut ra uakekena tar namna-manaehe uanomo pare, “A tamatane e menmene uasa tang God! Ahik me

tamata re banot e kusa luar me niguata uasa te God puk manasampe.”

²² Iesu e ate tar haua ra namna-manaisin, kare dangatangua pare, “Ae maeit rung namnamanoum tar inetin-nanine pare? ²³ Ter haua re malagirig to-toguo tar kul, ‘A niguata uasar noumua ka kusa luar manasaig,’ ue u kula pare, ‘Tentur karo la?’ ²⁴ Inggo u ualasira tamiuom toro mana pare, a Tunar Tamata na nitampopokohane i kot tar kusa luar liu tar niguata uasa.” Kare kulanguaono tar tamatener mater tuku-nuna pare, “Inggo u hire totomua, o tentur, karo kale tonomo rikin, doho la ten-ang um.”

²⁵ Ahik me sikir manasan, kare tentur kaieit i uoumuhia tasisin, kare kale kai tono rikin, kare la tena um, e uatuata kai teil tang God. ²⁶ O mamang tamata uakapa ka siokor lutar, kara uatakai tang God. Gisina ke kale keipisir nisokor, kara kula pare, “Inggeim king banga tar inetin-nine daan a giamehe sioko tun.”

Iesu ke kila tang Libai

²⁷ I muduhia ke karuh baka per puhonene, kare hiliu Iesu tar um, kare la bang huara tar tamatang kale toto tar takis mani ger hangana tang Libai. Inggon e tabil iuma tar buturung kale takis. Kare kula Iesu tatanono pare, “Lame, uakelukumeane totoguo mare nagu tamatang uakuakelukuo totomua.” ²⁸ Libai ke tentur, kare hiliu tena mamang inetelik, kare uakeluk tang Iesu.

²⁹ Kare guatangua Libai toro iru tang Iesu tena um, doho burehentiehe ponor manai tasisiner tamatang kale tar takis, karo gisiamehe ponor gime tamata ka la ponome toro iru roon. ³⁰ ^aBo o gisiamehe pukur Parisi mesir tamatang ualualasira tar ualatut ka me menmene uaburehe tosno tamatang uakuakeluk Iesu, kara

kula pare, “Ae maene rung einioum, karung inum keip tasir tamatang kale toto tar takis, doh gisiner tamata uasa.”

³¹ Kare kulangua Iesu tasisina pare, “O tamata ge ahik paho momouh, gisin ahik pah tera la tar dokta, bo gisiner momouh tera la tar dokta. ³² Ge inggo pe ahik pah ku laha tar me kila tasir tamata uaia, bo ku la pukuha tar me kila tasir tamatang guata tar niguata uasa mara uapalih.”

Iesu ke mene tar binakang ueil

³³ Kara kulanguasina tatanono pare, “No tamatang uakuakeluk Jon ra uoto ueil, kara lotu, doha siokono pono tonosio tamatang uakuakelukur Parisi, bo gisiner tamatang uakuakelukur noumua ra inum, kara ein dedempe.”

³⁴ ^bKare kula Iesu tasisina pare, “Ing-goum ahik pah mu banoto mu uaeuil tagu toso kaluanar bulout ger le timuh tar ueil tar binakang uaha tono timuh ro leon. ³⁵ Bo a binaka puk e turung lame geta turung kale liuinir tamatener le timuh toso kaluan. Song ter binakono ra turung ueil tosin.”

³⁶ Inggon ke hire tasisina toro uelhire uaranga rone pare, “Ahik me tang siokor tamata re banot e kale mo mahar timuh ro mahar gomom, kara kaere tolain toro pensiuon ro hikhiku. Gete guata sirono pare, inggon e turung uatakih uauleik toro mahar gomono timuh. Doho mahar gomono timuh ahik paho uelmatout keip toro pensiuon.

³⁷ Doh ahik me tang siokor tamata re dingiko me timuhur bino i lolono me pensiuonur kapokonar meme ger itung bino. Gete guaton, a bino timuh e turung uatapuaka tar kapokonar meme pensiuon, kare sa. Doha bino e turung tading liu. ³⁸ Ahik pah te paar, a timuhur bino paka dingikoig i lolono me timuhur itung bino. ³⁹ A tamata puk geke inum

manasa tar pensiouner bino, inggon ahik pahe uoto malar tar timuhur bino gere kula peono ter bino pensiouner ter uia.”

O Mahar 6

Nas Mareining Pepe Uahar Ju

6^cTenas Mareining Pepe Uahar Ju, Iesu mesno tamatang uakuakeluk ka lihila tar iomang raes-uit, doh no tamatang uakuakelukono ra katkatego teil tar kukuananar raes-uit, kara uelhaule keip tar limas taninin, kara ein. ^{2d}Doho gisiameher Parisi ka dangata pare, “Ae maene rung katego inggoum tar ualatut ger nikula tane tar Mareining Pepe Uah.”

^{3e}Doh Iesu ke mene hahaua tasisina pare, “Inggoum ahik matung timana toro ueluatat, hape ke guata pe Debit tar binaka ka gogo mesno tamat. ^{4f}Inggono ke la leka tena uma God, kare la ein tar bereit ger niheir a uahung tang God, kare heir pono toso uanoton. A bereitinin a nibuk tane pare, o patere puk tera banoto ra ein tananin.” ⁵Song ke kula poluk Iesu tasisina pare, “A Tunar Tamat ter tamata re uelik tar Mareining Pepe Uah.”

Iesu ke uauia tar bulout ger mater liman

⁶Nar uagiamehenar Mareining Pepe Uah inggono ke la lekala iuma tar umang lotu, kare la ualualasira tasir tamat, doh gane ium e uangoulur bulout ger mater limanener pang mua. ⁷O Parisi doho tamatang ualualasira tar ualatut ra banga uanono kompe tatanon mara tula tolain gete uauiaono tar buloutene tar Mareining Pepe Uah. ⁸Bo Iesu puk e ateng sioun a haua ra namanainisin, kare

kula tar bulout ger mater limana pare, “Tentur! Karo me turane i uoumuhia tasir tamatasine.” Maeit ke tur kaiono, kare la turunguala tasisin.

⁹Kare kulangua Iesu tasisina pare, “U dangatanguao tamiuoum ter haur uia tar guata tar Mareining Pepe Uah ro kula pe nosio ualatutur Ju, tar guata uauia ue tar guata uasa tar uelkaru tena nituar tamata ue tar mamantouo tar tamat.” ¹⁰Inggono ke bangahe uiloho uakapa tun tasisin, kare kulangua tar bulouteit pare, “Uatapadoro tar limoum.” Kare guata siranguaon, doha limanono ke la uia uakapa tun. ¹¹Bo gisina puk ka nimaliana uasa tun, kara uakekena tar uelhalat katongois, hape paka guata pe tang Iesu.

Iesu ke bang kedanga tasir aposoul

¹²A siokor marein Iesu ke hiliu, kare la lotu to tang God tar sisan tar udeilir boung. ¹³Naliuohia inggono ke kila toso tamatang uakuakeluk, kara lame tatanon. Inggono ke kedanga tar siokor hangaul, doha tang torikir tamatasine tasisin, kare kila tasisin, o aposoul.

¹⁴Gisina tes, Saimon geke heirin Iesu tar hangene Pita, doh Andru te tahinon, o gisiamehe tes Jems, Jon, Pilip, Bartolomiu, ¹⁵doh Matiu me Tomas, Jems a tuna Alpius, doh Saimon gera kilain pare, a Selot,[‡] ¹⁶Judas a tuna Jems, doh Judas Iskariot gere turung heir tang Iesu toso uelmatan.

[‡]6:15 “A Selot,” a tamatang tur tane uapopokoho keip toso tamat tar gavamanang Roum.

**Iesu ke ualualasir, kare
uauia tasir tamat**

¹⁷ Iesu ke la uahiua keipiha tasisin, kara me tur tar butur malatahan. Doho bureher tamatang uakuakelukur nanon ra uangoul mesir burehentiehe ponor tamata gera la tur toro uan i Judia, dohi Jerusalem, doh tar pain i teh i Tair, dohi Saidon. ¹⁸ Gisina ka lame tar me ualongoro tatanon, doh mara me uauia ponois res momouh. Gisiner nihikung liouan, ka uauia ponois. ¹⁹ Doho tamata uakapa ka siokor uedanga tar tuha tang Iesu, teene a nitampopokoheit re la tur tatanon e uauia tasisina uakap.

Iesu ke mene tauete toro Uelhire Uaia

²⁰ Iesu ke bangala tosno tamatang uakuakeluk kare kula pare, “Maisiour tiome mu turung uah, ter hauon a Nitoiaene tang God ter nomiuoum.

²¹ ^g Maisiour rung gogene daan, inggoum mu turung uah, ter hauon inggoum mu turung ein uamahmahurusioum.

Maisiourne rung kiring daan, mu turung uah

ter hauon inggoum mu turung uanio.

²² ^h Inggoum mu turung uaha gete tokouasaisir tamata tamiuoum,

kara aha liu tamiuoum, doh ra meneng uelsigal tamiuoum

kara ueluelde tamiuoum, teene rung uakeluk pe inggoum tar Tunar Tamat.

²³ Mu uaha kompe tar binakonene, karung siaksiaka kai keip tar niuah. Ter hauono God e turung heir tar uleikir bulauana tamiuoum i Heuen, te misiana sira kompe, ka guata uasa per tamata sioun tosno propet God.

²⁴ Inggoumene nami bureher inet, mu tagin teil, ter hauon inggoum kung kale manasa uoum tar niuah.

²⁵ Inggoumene remi bureher niein, mu tagin teil, ter hauon inggoum mu turung gog.

Inngo u ueldolomo tun tamiuoumeit rung uanioene daan,

ter hauon inggoum mu turung kiring, karung uangoulung ueldolom.

²⁶ Inngo u ueldolomo tun tamiuoumene ge teka uairanar mamang tamatalik tamiuoum,

te misiana sira kompe ka guata pe ro bung tamamiuoum sioun tasir propet bohoboh.”

Malaelhir tosnomio uelmatan

²⁷ Kare kula Iesu pare, “Bo inggo gine ru hire tamiuoumene rung ualongoro totoguo, malara tosno uelmatan, guata uaia tasisit re tokouasais totomua, ²⁸ guata uaia tasisit ra soul tamiuoum, lotu tang God mare poul tasisine ra guata uasa tamiuoum. ²⁹ Mai re posara tar pararomua, tur uiuir keipila tatanono tar pang giameh. Mai re kale liu tur totomua tonongo hikhikung malahong, uamaluana tatanono gere kale tagu pono inggono tonongo giamehe ro hihikua.

³⁰ Heir me inete tasir mamang tamatalikisit ra dangata inete totomua. Gete me tang sioko ke kale me noumuar inet, ahik paho hire tatanono tar heir tapokis totomua. ³¹ ⁱ Guata tar niguata ro malaragia ra guataig totomua.

³² Geto malara pukua tasir tamatasine ra malara totomua, God ahik pahe turung bulaua totomua tar niguatoneit, ge o tamata pesiner sa ra malara puk tas mais ra malara tasisin. ³³ Geto guata uaia pukua tasir tamatasine ra guata uaia to-

^g6:21 Ker 126.5-6; Ais 61.3; UGO 7.16-17
ⁱ6:31 Mat 7.12

^h6:22 Jon 15.19; 16.2; 1Pi 4.14

tomua, God ahik pahe turung bulaua totomua tar niguatoneit, ge o tamata pesiner sa ra guata sira pon. ³⁴Geto heiria me mani tasisit ra banoto tar heir tapokis totomua, God ahik pahe turung bulaua totomua tar niguatoneit, ge o tamata pesiner sa ra heir tasir tamata uasa mara kale tapokis sira tar mani ge ka heirin.”

³⁵“Mu malaelhir tosnomio uelmatan, karung guata uaia tasisin, karung heir me inete tasisin, kara hik pah mu namana pare, mu turung kale tapokis me inet, song re turung bulaua uaburehentiehe tun God tamiuoum, doh inggoum mu turung kotpokos o bung tuna God ger i ranantieh, ge inggono pe e guata uaia tasir tamata uasa mesir tamata gera tele tang God. ³⁶Ueldolomo tasir tamata ngohina re uelueldolomo pe God ge Tamamiuoum.”

A nikedanga tasir tamat

³⁷j“Ahik paho kedanga tar tamata gete guata me inete mara hikia pah ra kedangaia. Ahik paho ualakouh tar tamata mara hikia pah ra mene uakouhia. Kusa luara liu tar niguata uasa ge ka guataigir tamata totomua mara kusa luara liuigir niguata uasa geko guatagia. ³⁸kHeir tasir gisiameh mare turung heir uaburehentiehe God totomua, kare heir totomua tar bureher ineter uia. Hape ro heir pea tasir gisiameher tamat, God e turung heir sira pono totomua.”

³⁹lIesu ke hire pono tasisina toro uelhire uaranga pare, “A tamata ger kut ahik pahe banot e uoum keip me tamata ger kut pon, gete guatono pare, rasina tokah ura turung sololo uahiuako tar tung. ⁴⁰mA tamatang kale tar niate ahik pahe namana pare, tere i rana uain tena

tang ualualasir. Bo ge pake uakuakapa hihiriono tena niualasirar tang ualasil, song re banotompe e guata sira hape ka ualasila pein, kare turung pe sira tena tang ualualasil.”

⁴¹“Ae maene ro banga tar sikir mongmong tar matana tahim, kara hik paho namana huara tar puhung douk uleik re moko teil tar matoum? ⁴²Gete moko teil me puhung douk tar matoumua, ae maene ro banotong kula tang tahim pare, “Tahig, inggo dehu marang kale liu tar sikir mongmongo gere moko teil tar matoumua.’ Ir tang kokop! Ingga bo pake tero kale liu baka uoum tar puhung doukeit re moko tar matoum maro bang huara uaiaa, song ro kale liu tar sikir mongmongo gere moko teil tar matana tahim.”

O douk kare ter kukuanan

⁴³Kare uelhire uaranga poluk Iesu pare, “Geto tabuara ro douk, roon ahik paho uakotpokoso me kukuanana uasa. Bo ge ahik roono paho tabuar, roon ahik paho uakotpokoso me kukuanana uaia. ⁴⁴A douk ra bang paroko tompeig tar kukuanan. Misiana pare, ahik me tang sioko re banot e la lous tur me kukuanana ro douk fig me doukunitir ueluelhung ue me kukuananar bino me doukunitir sa. ⁴⁵Doha siokonome, a tamata ger uia, e turung mene tauete tar uelhire ger uia gere moko teil penina tar kolounon, ter hauon inggon e namana puk tar inetenitir uia. Doha siokono tar tamata ger sa, e turung mene tauete tar uelhire ger sa gere moko teil penina tar kolonon, ter hauon inggon e namana puk tar inetenitir sa. Ge a tamata pe e mene tauete tar haua re moko tatan.”

A toking tang tuha um

⁴⁶ Doh Iesu ke kula pare, “Geta hikioum pah mu ualongoro totoguo paka hik pah mu kila totoguo pare, ‘Tamata Noman!’ ⁴⁷ Inggo u ualasira tasir mamang tamatalik gera lame, kara me ualongoro totoguo, kara guata uakeluk tar inete ru menegio. ⁴⁸ Gisina ra pe sirangua tar tamata gere tuha tena um, kare koho uailolono tar tung, song ke uaturuko tar um i rana tar palaua hohot. Geto la keipime ro silu toro butuan gero popokoh, karo me puah, a uma ahik pahe matot e gune sikor, ter hauon inggon a nituha uapopokoho tun. ⁴⁹ Bosir mamang tamatalik gera ualongoro totoguo, doh ahik pah ra guata uakeluk tar inete ru menegio, gisina ra pe sirangua tar tamata gere tuha uapono tena um i rana tar kot. Doh ahik paha nituha uapopokohor tengkana me butur popokohon. Doh gero la keipime ro silu toro butuan, karo me puah bise, kare me punga uahiuanguar um, kara mamantouontiehein.”

O Mahar 7

Iesu ke uauia tena tamatang kalekinaler tamata uleikin tasir soldia

7 Tar binaka ke mene uakapa baka pe Iesu tasir tamatasine, kare la lekangua i Kaperneam. ² Doh tar uanion e uangoulur tang siokor tamata uleik tasir tamatang uiliatung i Roum, doh na tamatang kalekinaleon gere malarantiehe tunuion e momouhantiehe tun, kare uahuhutung mata manas. ³ Tar binaka ke longoro koutur tamata uleik tang Iesu, Inggono ke ualatue tasir gisiamer Juisiner mamahoholik tar la dangata tatanono tar lame mare me

uauiaono tena tamatang kalekinaleon. ⁴ Gisina ka la tang Iesu, kara la dangata uapopokoho tun tatanon, kara hire pare, “A tamata uleikionene auia tun, maeit ingga pako poul tatanon. ⁵ Ter hauon inggon e malarantiehe tasir Ju, kare poul tamiueim tar tuha tenami umang lotu.”

A tamata uleik e tagorong mana tang Iesu

⁶ Song ke la tagu Iesu tasisin. Tar binakeit re lang la uahuhut manasa Iesu tar um, kare ualatuer tamata uleik tasir gisiamer ro kaluana tar la kula tang Iesu pare, “Ir Tamata Noman, ahik paho namanantiehe tun tar guata me inet, ter hauon inggo ahik paha tamata uauia tar kaleme totomua tar lame tenag umo. ⁷ Inggo ku namana sira pare, ahik paha uia tar lame totomua, bo o kula kompe me puh mare la uia nag tamatang kalekinaleo. ⁸ Ge inggo pe u uangoul pon i kukulebanga tasir tamata uleik, doh nogo soldiao ra uangoul pon i kukulebang tar nikauekeng totoguo. Doh getu kulo me tang siok pare, ‘O la,’ inggon e la, doh getu kulo tar tang giamehe pare, ‘O lame,’ inggon e lame. Doh getu kulo tenag tamatang kalekinale pare, ‘O guata tar kalekinaleene,’ inggon e la guat.”

⁹ Tar binaka ke longoro Iesu tar puhene, inggono ke lutarantiehe tatanon, kare kauiurila tasir manai tamata gera uakeluk teil tatanon, kare kula pare, “Inggo gine ru hire tamiuoum, Inggo ahik matu tupara me tamat i Israel misiana tar tamatane ge mena popokohontieher nitagorong man.” ¹⁰ Song ka tapokisilar tamatasitir nialatue tar um, kara la tupara tar tamatang kalekinale ke uia manas.

Iesu ke uatua tapokis tar mamanailik

¹¹ Ke karuh bakar sisikinalikir binak, doh Iesu ke la tar uuanilik ra kilain i Nain, doh no tamatang uakuakelukon, doho gisameher manai tamata ka la tagu tatanon. ¹² Gine ke me pokoso pe-meono toro pirikinar uuanilik, o tamata ka huata tauete tar tamat a mat, ter tang siokor bulout puk tang tinan, doh tinanon a kamob a nimata liu. Doho manai tunur tamatang tar uuanilik ra la tagu teil tatanon. ¹³ Tar binaka ke bang huarar Tamata Nomana tar kuah, inggono ke ueldolomo uasa tun tatanon, kare kula tatanono pare, “Ahik paho kir-ing.” ¹⁴ Song ke la taro Iesu, kare la tuhala tena bokisir mat, doh gisit ra huata teil tatanon ka tur, kare kula Iesu pare, “Ir mamanailik,” inggo u kula totomua pare, “Tentur kai!” ¹⁵ A tamataitir mat ka uatua tapokisin, ke tabila kai, kare uakekena tar men, doh Iesu ke heir tapokis tatanono tang tinan.

¹⁶ P Gisina ka siokor lutarantiehe tun, kara sokor, kara uataakai tang God pare. “A uleikir propet ke kotpokoso tagigeig, God ke lame tar me poul tosno tamat.” ¹⁷ Doho ueluatata rone tang Iesu ko la tauete hahai tur i Judia, doh ko la uiloho tar pang uan uakap.

Iesu, doh Jon ger tang uahuhu

¹⁸ No tamatang uakuakeluk Jon ger tang uahuhu ka la hire tar mamang inetelikinine ke guataig Iesu. Maeit Jon ke kila tena tang torikir tamatang uakuakeluk, ¹⁹ kare ualatue tasrasina tar la dangata tang Iesu pare, “Te inggar tamata gero turung lame ue paking uanguangoul me tang giameh.”

²⁰ Tar binaka kura lamer toking tamata tang Iesu, kaura kula pare, “Jon ger tang uahuhu ke ualatue tamiraeim tar me dangata totomua pare, ‘Ingga ter tamata gero turung lame ue paking uanguangoul me tang giameh?’”

²¹ Tar binaka tunoneit Iesu ke uauia tasir burehesis roso mata tar tukunus, o momouh, doh gisis ka hikung liouan, kare uauia tasir bureher kut. ²² Maeit Iesu ke mene hahaua tena toking ualualatue Jon pare, “Mura tapokis, kaura la uahire tang Jon tar haua kura bangain raoum, doh kura longoroin pare, o kut ka bang, o peil ka la uaia, o toba ka delauan, o kamelong ka longor huar, doho mata ka uatua tapokisis, doho tiome ka longoro toro Uelhire Uaia geke uelhire tauetein tasisin. ²³ A niguata uaia e la tar tamata ge ahik pahe matala totoguo, bo e uakeluk dede totoguo.”

²⁴ Tar binaka kura hiliu na toking ualualatue Jon, kare menmene teil Iesu tasir manai tang Jon pare, “Tar binaka kung lalaoum tar butur padenen, a haua kung la marang bangasioum? Here kung la banga tar romo re sasaula pe toro garas? ²⁵ A haua kung la marang bangasioum? Here kung la banga me tamata re hiku teil me hihiku mataia uelhir ger i ranar bulauan? Ahik! O babeir tamata gera hiku tar hihikuninanine ra uangoul tenas umar toia gesir tang mani. ²⁶ Bo a haua kung la bangasioum? Tar la bang tar propet? Te paara noman, bo i ranahia puk tar propet. ²⁷ Gine teon geke bolo uatuha tolain pare, ‘Bang! Inggo u turung heir tenag ualualatue i uoumuhia totomua tar uakalahara tenang lela.’ *Malakai 3.1* ²⁸ Inggo u uamana tun tamiuoum, ahik me tamat ka paho toinane i kot e i rana

7:15 1To 17.23; 2To 4.36 P7:16 Luk 1.68

7:19 Ker 40.7; Mal 3.1; UGO 1.8 7:22 Ais 35.5-6; 61.1; Luk 4.18

7:26 Luk 1.76

uain tang Jon. Bo a tamata puk ger tabo hangana tena Nitoia God, inggon tere i rana uain poluk tang Jon.”

²⁹ Tar binaka ka longoror mamang tamatalik, doho tamatang kale takis tono ueluatata Iesu, ka uah, kara hire tena niguata God a kodkodoho tun, teene ke uahuhu pe Jon tasisin. ³⁰ Bosir Parisi, doho tamatang ualualasira tar ualatut ka ueluelde tar haua ke malael-hirin God tasisina ra guat, ge gisina pe ka de pono mata uahuhu tagu Joh tasisin.

³¹ Kare mene poluk Iesu pare, “Bo getu marang uelhireo tenas niguatar tamatang daan, hingia ro uelhire uaranga paku mene uatuha tolaio? ³² Gisina misiana tasir keketikisitie ra tabil i moren, kara kila ualeik toso uanotous pare, ‘Inggeim king u toro pilul, marung doumioum, bo inggoum puk ahik matung doum, Inggeim king kere tar kerekereng ueldolom, doh inggoum ahik matung kiring.’

³³ Ge tar binaka pe ke lame Jon, inggon ke uoto ueil, doh ahik mata inum tar bino, doh inggoum kung kula pare, ‘Inggon ke hikuinir liouana uasa.’ ³⁴ Doha Tunar Tamata ke lame, kare me ein, doh ke me inum, doh inggoum kung kula pare, ‘Banga tar tamatane, inggono deha uoto ein tunumpe, doha uoto inum tar bino, doh inggon e matakaluana tasir tamatang kale tar takis, doho tamata uasa.’ ³⁵ Doh na niate uaia God e ualasinira a mana tasisit ra uahue, kara uakeluk.”

Iesu ke ueldolomo tar kuaha ger sa na niguat

³⁶ A siokor binak, a tang siokor Parisi a hangana tang Saimon ke kila tang

Iesu tar me ein tagu tatanon, maeit Iesu ke la tena umar Parisi, kare la tabila tar buturing ein. ³⁷ Doha kuaha uasa tar uanono ke longoro tang Iesu ke la ein to pe tena umar Parisi, maeit ke la keipime tar itung amiamuhunitir mataia a nihedongolar amiamuh. ³⁸ Doh gitie re tur pe mer kuah i muduhia tang Iesu, kare kiring tola tar kekenon. Inggon ke uakekene tar uabusa keip tar kekenono tar bulbulunar matan, kare tunaha uakadaka keip tar ulun, song ke nguh tar toking pang kekenon, kare ding tar amiamuh.

³⁹ Tar binaka ke bangar Parisieit geke kila tatanon, kare namana pare, “Geto mana roono pare, a propeitir tamatane, inggono pake ate mai ke tuha tatanon, ge git per kuah a sa.”

⁴⁰ Doh Iesu ke mene tatanon pare, “Saimon, inggo u marang hire totomua tar siokor inet.”

Kare kula Saimon pare, “Hire totoguo tang ualasinir.”

⁴¹ “A tang siokor tamata gere uoto heir tar mani mare kale tapokis me gini-amehe geke poh, inggono ke heir tar mani tar tang torikir tamat, a tang sioko ke heir uamatotoiono tar 100 kina, doha tang giameh ke heir uamatotoiono tar 10 kina. ⁴² Doh rasin ahik pah kura bantong heir uelhir sira tapokis tar mani. Maeit inggono ke hire uaia tun tasrasina tokaha pare, ahik pah ura bulaua tapokis tatanon. Doh hingia tasrasina re turung malarantiehe tun tatanon.”

⁴³ Saimon ke mene hahaua pare, “Inggo u namana sira teeitono geke kale tar 100 kina.”

Doh Iesu ke kula pare, “Ingga ko uaman.” ⁴⁴ Kare kauiurila Iesu tar kuah, kare kula tang Saimon pare, “Ko banga tar kuahene? Inggo ku la lame iuma

†7:29 Luk 3.12 †7:30 Mat 21.32 †7:34 Luk 15.2

‡7:37 Mat 26.7; Mak 14.3; Jon 12.3

tenang uma, doh ingga ahik mato heir totoguo me laur tar uahuhu keip tar kekeig, bo inggono puk ke uabusa keip tar kekeiguo tar bulbulunar matan, doh ke uakadaka keip tar ulun. ⁴⁵Doh ingga ahik mato nguh totoguo, bo tar binaka ku lekameo tar umene, a kua-hene, ahik mata uolong uakenua tar nguh tar kekeiguo. ⁴⁶Doh ingga ahik mato pikur me uaiuai toro luguo, bo inggono ke pikur tar amiamuh tar kekeiguo. ⁴⁷Temaene, Inggou u hire totomua, a kuanene na bureher niguata uasa, bo ke kusa luara liu puk God taninin, maeit inggono ke ualasira tar uleikintieher nimalara totoguo, bo mai ge ahik paha burehe na niguata uasa ka siokor kusa luaraig, inggon e ualasira puk tar sasalikir nimalar.”

⁴⁸Kare kula Iesu tar kuaha pare, “Inggou ku kusa luara liu tenang niguata uasaa.”

⁴⁹O gisiameher tamatisasi ka ein tagu tatanon ra ueluelkule katongois pare, “Maionor tamatane, maeit re kusa luara liuono tenas niguata uasar tamat.”

⁵⁰^xIesu ke kula tar kuaha pare, “Reng nitagorong mana totoguo ke uaudeil to-tomua, o la keip toro hiarou.”

O Mahar 8

O kuaha geke ualakurum tagu tas Iesu

8 Ke karuh baka per puhonene, Iesu ke haijala hahai toro uan menia toro uauanilik tar uelhire tauete toro Uelhire Uaia gero la tur tena Nitoia God. Doho siokor hangaul, doha tang torikir tamatang uakuakeluk ra ualakurum teilimpe tatanon ^{2y}menia tasir gisiameher kuaha pono geke geil liu turis Iesu tasir liouana uasa, kara uauiais

res momouh. Gisina tes Maria gera kila-lain tang Makdala geke geil liu turisir mouitir liouana uasa tatan, ³doh Joana na kuaha Kusa ger tamatang kaueke tena uma Herot, kare Susana, doho burehemp gisiameh. O kuahasine ka poull keip tasisina ter nosir mani katong.

O uelhire uaranga tar tamata geke lebe tar uatunar raes-uit

⁴Doh tar binakon o bureher tamata ra la tur toro burehe ro uan, ka lame tang Iesu mara longoro tatanon, inggono ke ueluatata toro uelhire uaranga rone. ⁵“A tamata ke la tena iom, kare lang leba tar uatunar raes-uit. Git re kurasa pelaono tar uatun, a giniamehe ke duduko tar lel, kara ueihueih uaponor tamata ra la pe tar lel, doho tetiaua ka me ein tar uatun. ⁶Doha giniameher uatun ke dud i rana tar papalauan, doh gine ke tungara kai penin, ginina ke matengua, teene ahik pe me laur. ⁷Doha giniameher uatuna ke pungpungala i uantinanina tar uoho ueluelhung, kare hai tanenganina tar raes-uit, kara hikinguanina pahe banotong hua kai. ⁸Bo a giniamehe pukur uatunar raes-uit ke pungala tar kotan, ke hua kai, kare ua tar bureher kukuanana pare, a 100ir uatunar raes-uit ke kotpokoso tur tar siokon siounur uatunar raes-uit.”

Ke mene uakapa pe Iesu toro uelhire rone, inggono ke kula ualeik pare, “Mai ger to talingana tar longor, e longor.” ⁹Doh no tamatang uakuakeluk Iesu ka dangata tatanono tar uakalahara toro uelhire uaranga rone.

^{10z}Kare kula Iesu pare, “Inggoum ka heirisium tar niateng tar uelhire uaou tena Nitoia God, bo o gisiamehe ra longoro puk getu meno toro uelhire uarang, maeit,

^x7:50 Luk 8.48; 18.42 ^y8:2 Mat 27.55-56; Mak 15.40-41; Luk 23.49

^z8:10 Ais 6.9-10

‘Ra bangasin, bo ahik puk pah ra banotong bang parok, gisina ra longor, bo ahik puk pah ra banotong longor parok.’” *Aisaia 6.9*

¹¹ Iesu ke kula poluk pare, “Gine ter tengkana tun ro uelhire uarang pare. A uatunar raes-uit tono uelhire God. ¹² Gisit tar lel teasina teka longor, doh Satan ke lame, kare me kale liu tur toro uelhire tar koloususin mara hikisina pah ra tagorong man, doh ra uelkarusis. ¹³ Gisit tar butur papalauan teasis ra kale keip toro uelhire tar niuaha tar binaka ra longoro tang roon, bo gisina puk ahik pah ra tagorong mana uapopokoh, kara tagorong mana puk tar sikinar binak, bo tar binakang uedanga puk gisin e punga uahiu res nitagorong man. ¹⁴ Doha uatuna geke pungpungako i uantinana tar uoho ueluelhung, ginina te misiana tar tamatie ke longoro tono uelhire God, bo tar binaka puk ke uangoulionane tar kot inggon e namanantiehe tun puk tar niduh, doh tar inete uaiaane tar koto gere uauaha tatanon. A mamang inetelikinane teke uapekout tane tono uelhire God, maeit ahikingua na nitagorong manono pahe hua kai. ¹⁵ Bo a uatuna geke pungpungako tar kotan te misiana tasir tamatis ka longoro tun nomana tono uelhire God, kara namana uaia tang roon, kara sanga dede tun, kara uatut mara uakot-pokoso tar bureher nguata uaia.”

O tamata gera guata uaia

^{16 a} “Ahik me tamata re ualuh mo lam, kare kokop tane me inet ue e uamokola i kukulebanga toro uat, bo inggon e uatok i rana toro teboul mara me bangasit ra lekame ro luh pe roon. ^{17 b} A huar inete re moko uaou, ginina ra turung uakalaharaig, doha huar inete ra gomo

taneig ra turung ateig ue ra puka uakalaharaig. ^{18 c} Temaene mu namana uaia tunoum hape rung ualongoro pe. Mai ge kae manasain mena inete ra turung heir uanoto polukin mena giniamah, mai ge ahik me nana ue a haua ke namana siragion a nan ra turung kale liu turig tatanon.”

Tinana Iesu, doho bung tahin

¹⁹ Tinana Iesu doho bung tahin ka me marang banga tatanon, bo ahik puk pah ka banotong la uahuhut tatanon, teeit o burehentieher tamata ra uangoul iuma tar um. ²⁰ Doha tang siokor tamata ke hire tatanono pare, “Tinoumua, doho bung tahim gisila ra tur i kalahar, ra marang banga totomua.” ²¹ Bo inggono puk ke mene hahaua pare, “Gisit ra longoro tono uelhire God, kara guata uakeluk tes tinouguo, doho bung tahiguo.”

Iesu ke uahiarouo tar pang rom

²² Doha siokor marein Iesu ke kula tosno tamatang uakuakeluk pare, “Ti la sairkout tar pang giamehenar kodomo uiluiloh.” Maeit gisina ka panete tar bout, kara hua. ²³ Git ra hua pelasin, Iesu ke hohouo manas, doha tukung pang rom ke tentur, kare untiehe tun, kare sasaopoinir bout, kara marang dudurasin.

²⁴ O tamatang uakuakeluk ka sokor, kara la ualagura tang Iesu, ka kula pare, “Ir tamata uleik, inggeig deh ki hutung dudur!”

Kare tentur kaion, kare louara tar rom, doha butuana uleik, kare la kapar rom, kare hiarouo tununguaon. ²⁵ Doh inggon ke dangata tosno tamatang uakuakeluk pare, “Ia kaeig remi nitagorong manoum.”

^a8:16 Mat 5.15; Luk 11.33 ^b8:17 Mat 10.26; Luk 12.2

^c8:18 Mat 25.29; Luk 19.26

Doh gisina ka lutara keip tun tar nisokor, kara ueluedangateis pare, “A tamata hauonene, maeit ke longoror rom, doha butuan tatanon.”

Iesu ke uauia tar tamata nihikung liouan

²⁶ Gisino ke uaulais tar painang Gerasa gere moko tar pang giamehenar kodomo uiluiloh i Galili. ²⁷ Tar binaka ke ueih uahiuako Iesu toro sarang ion, gitir tamata a peng tar uauanilikion a nihikung liouan ke me tupara tatanon. Tar barahar binak a tamatane ahik mata loho tagu me gomono ue e uangoul iuma me um, bo e uangoul puk i lolono tar lebanganitir nosir mat. ²⁸ Tar binaka ke bangono tang Iesu, inggono ke kaling ualeik, doh ke baka uahiuain i hutuna tar kekenon, kare kula ualeikintiehe tun pare, “A haua ro marang guataia to-toguo, Iesu ger tuna God ger i ranantiehe tun? Inggo u dangata tutup tun totomua, ahik paho uauelmahing to-toguo!” ²⁹ Inggon ke kula pare, teeit Iesu ke kula tar liouana uasa e tauete liu tar tamaton. A bureher binak a liouana uasa e hiku tatanon, doho tamata ra uoto uih tane tatanono toro tiein, doh ra tur kaueke tatanon, bo inggono puk e reih uatakout dedempe toro tien, doha liouana uasa ke uoum keip tatanono tar butur belun.

³⁰ Iesu ke dangata tatanon, “Mair hangoumua.”

Kare mene hahauono pare, “Inggeim o manai.” Ter hauon o bureher liouana uasa ka hiku tatanon. ³¹ Doh gisina ra dangdangata uapoul kompe tang Iesu ahik pahe ualatoho tasisina ra la tar butur kitkitupun ger nosir mat menia tasir liouan.

³² Doho bureher hueit ra ein ein teil tar hiuhiuon i huhutunalik. Maeit o liouana uasa ra dangata kompe tang Iesu tar uamaluana tasisina tar la hikula tasir hueit, doh Iesu ke uauia tasisin. ³³ Tar

binaka ka tauete liu tur per liouana uasa tar tamat, kara la hikungua tasir hueit. Doho hueitisina ka ualo uateuele uahiuako tar hiuhiuono tar butur re mokor kodomo uiluiloh, kara la siokor houp i laur.

³⁴ Tar binaka ka bangasit ra kaukaueke tasir hueit tar puhonene, gisina ka ualo liu, doh ka la uahire tar uan, doh tar pang uan uiloh. ³⁵ Doho tamata ka la tar la banga tar haua ke kotpokos, kara lamesina tang Iesu, doh gisina ka ueltupara tar tamata geka tauete liu turisir liouana uasa e tabila uahuhut tar kekena Iesu, inggone hiku teil tar hikhiku, doh na ninamanon a kalahara uaia tun, gisina ka bang, kara sokor. ³⁶ Doho tamatasine ka bang, ka la hire tasir gisiamehe hape ke uauia pe Iesu tar tamata ger nihikung liouan. ³⁷ Doho tamatasine ra uangoul uiloho tar pang uan i Gerasa ka dangata tang Iesu tar hiliu tasisin, teene gisina ka sokoro uasa tun.

Maeit Iesu ke panete tar bout, kare hiliu. ³⁸ Bo a tamata geke tauete liu turinir liouana uasa ke dangata tutupe tang Iesu tar la tagu tatanon, bo Iesu puk ke uelueluata tapokis tatanon, ke kula pare, ³⁹ “Tapokis tenang uan, karo la hire tar mamang inetelik geke guataig God ke poul pe totomua.” Maeit gitir tamata ke hiliu, kare la hire tauete uakapa tun tar uan uleik, hape ke guata pe Iesu tatanon.

A keketik ger mat, doha kuaha ger momouh

⁴⁰ Song ke panete Iesu tar bout, kare sairkout tapokis poluk tar kodomo uiluiloh i Galili, kare me pokoso tar giameher pain, doho bureher tamata ka uaha uangoul tun tatanon, ge gisina pe ka siokor uangoungoul tatanon. ⁴¹ Doha tamata uleik tenas umang lotur Ju ke me pokos, a hangana tang Jairus, inggono

ke la hatup uahiu i uoumuhia tar kekena Iesu, kare dangata totouaha puk tang Iesu tar lame tena umon, ⁴²ge inggono pe a tang siokon siounur tun a kuah, here no siokoro hangaul, doho torik no kris-mas, doh inggon e marang mata manas.

Git re la pela Iesu tena umar tamata uleik, o bureher tamata ra la tagu teil tatanono ra uelueltabar tun. ⁴³Doha tang siokor kuaha geke tutung bakue e la tagu teil pono tasir manai. Inggonor kuaha ke tutung bakue tar puhung barah e banoto toro siokor hangaul, doho torik ro krismas, bo ahik puk me tamata ke matotong uauia tatanon. ⁴⁴Inggono ke haijala sikoroha i muduhia tang Iesu, kare me tuha toro suruna no hikhikuon, doh ahik me manasan no matono ko kap, kare uiangua.

⁴⁵Doh Iesu ke dangata pare, “Maiene ke me tuha totoguo.”

Doho tamatasine ka siokor uolih tatanon, kare kula Pita pare, “Ir Tamata Uleik, o bureher tamata ra kusukus, kara tabtabarala totomua.”

⁴⁶Bo Iesu puk ke kula tapokis pare, “A tamatampe ke me tuha totoguo, inggo u ate, ge a nitampopokoho pe ke hiliu tur totoguo.”

⁴⁷Gitie ke ate pe kuaha pare, Iesu ke ate tatanono ke tuha pe tono hikhikuon, inggono ke sokor, kare poroporo uasa tun, kare la hatup uahiu i hutuna tar kekena Iesu. Doh gane i uoum tasir bureher tamat, inggono ke hire tauete tar tengkana ae maene ke tuhtuhono tatanon. Doh ke hire pono hape ke uia pe, doh no matono ko kapa uateuele tun. ⁴⁸^dSong ke kula Iesu tatanono pare, “Inggar tug, reng nitagorong mana ke uauia totomua, o la keip toro hiarou.”

⁴⁹Gine re mene haraha pe Iesu, a tamata ke la turume tena uma Jairus ger tamata uleik tar umang lotu, kare hire

tang Jarius pare. “A tumua ke mat, ahik paho uabolboloho baka poluk tar tang ualasilir.”

⁵⁰Bo Iesu puk ke longoro tar puhonene, kare kula tang Jairus pare, “Ahik paho sokor, tagorong mana kompe, e turung uiaon.”

⁵¹Tar binaka ke me pokoso Iesu tena uma Jairus, inggon ahik mata uamalua-na me tamata tar leka keipila iuma tatanono tes Pita puk manasampe me Jon, doh Jems, kare tamanar keketik me tinan. ⁵²Doh Iesu ke kula tasir tamata-sis ra kiring, kara ueldolomo pare, “Mu uakenua manasa tar kirkiring, ge inggono pe ahik mata mat, inggon e hohouo kompe.”

⁵³Doho gisina ka uanuanio tatanon, ra ate pe tar kuaheit ke mat. ⁵⁴Bo Iesu puk ke kusa tar limanon, kare kula pare, “Ir keketik, tentur kaiha!” ⁵⁵Doha iabenono ke tapokisime tatanon, kare la tentur kaingua kompe, song ke kula Iesu tasisina ra heir me niein tatanon. ⁵⁶Doh tinanar kuah, doh tamana kura siokor lutar, bo ke ualatur puk Iesu tasisina pare, “Ahik pah mu hire me tang sioko tar hauene ke kotpokos.”

O Mahar 9

Iesu ke heir tar kalekinale tasir aposoul

9 Tar binaka ke me kila toto Iesu tar siokor hangaul doha tang torikir aposoul, Inggono ke heir tar nitampopokoh, kare uatohangana tasisina mara banotong geil tauetesina tasir liouana uasa, kara banotong uauia tar mamang matelik. ²Doh inggono ke ualatur tasisina tar la uelhire tauete tena Nitoia God, kara uauia tasir momouh. ³^eKare kula tasisina pare, “Ahik pah mu kale tagu me inete tar nila, ahik me tukan,

ahik mo tolah, ahik me niein, ahik me mani, ahik me giniamer hihikung lohpalih. ⁴Uangoul puk manasa tar uma gerung la lekaioum e tuka getung hiliuoum tar uanion. ⁵Ge ahik mo tamata ra uauia tamiuoum, titire liu toro uou tar kekeimiu tar binaka rung hiliu tenas uanisina tar ualasira tasisina pare, God e turung uabato tasisin.” ⁶Temaeit gisina ka la hahai toro uan, ka uelhire tauete pe toro Uelhire Uaia, kara uauia tasir tamat.

Herot ahik mata ate maionene Iesu

⁷Tar binakon, Herot ger toia ke longoro manasa tar inetenanine ke guataig Iesu, inggono ke tobouluntiehe tun, ter hauon o gisiamer ra kula sira pare, Jon ka uatua tapokisin ke mata pe, ⁸doho gisiamer ra kula pare, Elaija ke kotpokos, doho gisiamer ponompe tasisina ra kula pare, A tang siokor propeiting sioun ke me tua tapokis.

⁹Bo Herot puk ke kula pare, “Inggo ku ueliu tang Jon toro mat, ke tokout pe nag tamatang uiliatungio toro lunon! Bo mai pukunguaonene ku longoroio ke guata tar inetenanine.” Doh inggon ke uedanga tar marang banga tatanon.

Iesu ke ualaein tasir 5,000ir tamat

¹⁰Tar binaka ka tapokisilar aposoul, gisina ka la hire tang Iesu tar mamang inetelik ka guataig. Doh Iesu ke kila tagungua tasisin, kara la mes pahes tar uan gera kilain i Betsaida, ¹¹bo o manai tamata puk ka longoro kout tang Iesu mesno aposoul ra lang la pe, temaeit ka uakeluk tasisin. Inggono ke uauia tasisina tar lame, kare menmene tasisina tar Nitoia ger nang God, kare uauia tas mais gera momouh. ¹²Git re lang reiu manasa peon, a siokor hangaul, doha

tang torikir aposoul ka lame tang Iesu, kara kula pare, “Uelueluata tasir manai tamatasine mara la toro uauanilik, doh tar pang giamehe mara sir me niein, doh me buturung hohou, ter hauon a buturene ahik me uan.”

¹³Bo Iesu puk ke kula pare, “Mu heir tasisina me niein!”

Kara mene hahauanguasina pare, “Inggeim deh romio tolima puk ro bereit, doha torikir ian, doh ginin ahik pahe matoto ter uia puk manasampe geting laeim, karing la bulua mes nieinir tamatasine.” ¹⁴(Kaelainane tar 5,000ir bulout ra pepe.)

Bo ke kula puk Iesu tosno tamatang uakuakeluk pare, “Uatabila uahiua tasisina tar toto, a tolimar hangaul tar siokor toto.”

¹⁵O tamatang uakuakeluk ka guata sir, kara siokor tabila uahiuar tamat.

¹⁶Kare kale Iesu toro tolima ro bereit, doha torikir ian, kare banga kai taro i Heuen, kare kulang uauia tang God, kare pis taninin, song ke heir taninina tasir tamatang uakuakeluk mara bul tasir tamat. ¹⁷Gisina ka siokor ein uabanoto tun, kara la ur totor tamatang uakuakeluk tar siksikir niein geke mok ke la matoto tar siokor hangaul, doha torikir tohen.

Pita ke kula tang Iesu ter Kristo

¹⁸A siokor binaka Iesu ke lotu me pahen, doh no tamatang uakuakelukon ra uangoul tagu, kare dangatono tasisina pare, “O tamata ra kula maio.”

¹⁹hKara mene hahauasina pare, “O gisiamer ra kula pare, ingga te Jon ger tang uahuhu, o gisiamer ra kula pare, ingga Elaija, doho gisiamer ra kula pare, ingga a tang siokor propeiting sioun ko me tua tapokis.”

²⁰ⁱKare dangatono pare, “Bo inggoum katongene mu kula maio.”

Pita ke mene hahaua pare, “Ingga ter Kristo geke heirihain God.”

²¹Maeit Iesu ke ualatoho uapopokoho tasisina pare, “Ahik pah mu hire me tamata tar puhene. ²²^jKare kula polukiono pare, a Tunar Tamat e turung kale tar bureher uelmahing, kara ueluelder mamahoholik mesir patere uleik, doho tamatang ualasira tar ualatut. Doh inggono ra turung tung pousin, doh tar uatouononor marein inggon e turung tua tapokis tur toro mat.”

²³^kSong ke kulono tasisina pare, “Gete me tamata re marang uakeluk totoguo, inggono pake de tar inete re malaraig, kare huata ualataoun tena korose, kare uakeluk totoguo. ²⁴^lGe a tamata pe gere kapil uanono tena nitua, na nituaon e turung rouo tatanon, bo mai puk gere heir tena nitua re uakeluk pe totoguo, inggon e turung tupara tena nitua. ²⁵Ge a haua per niuia re turung kaleinir tamata gete siokor gono tar mamang inetelikane tar kot, kare la oroho tena nitua ue e uasuasa katongoin? ²⁶^mGete me tamata re matala totoguo, doh tonogo uelhireo, a Tunar Tamat e turung matala pono tatanono tar binaka re la keipime tena uinator, doh tena uinatoro Taman mesir anggelousiner dedeil. ²⁷Inggo gine ru hire tamiuoum toro man, o gisiamehe tasisine ra turane ahik pah ra mat e tuka geta banga baka tena Nitoia God.”

Iesu ke kotpokoso keip tar luh

²⁸Kura karuh bakar tualir marein ke mene baka pe Iesu tar inetenine, inggono ke kila tagu tas Pita me Jon, doh Jems, kara la taro i rana tar siusana tar la lotu.

²⁹Gine re lotu peon, a porenono ke uapalih, doh no hikhikuono ko me uapalih pare, o gaugauilintiehe tun, karo abeab.

³⁰Doha tang torikir tamata tes nu Moses me Elaija ³¹ⁿkura kotpokoso keip tar niuinator, kaura uelueluatata keip tang Iesu gete turung mata to i Jerusalem tar niguata geke uamatotoin God.

³²^oPita doha toking uanotono ka matahouontiehe tun, bo tar binaka puk ka me gulete uaia manasa pesin, gisina ka banga tena niuinatoro Iesu ura tur keip per toking tamata tatanon. ³³Git kura hiliu per toking tamata tang Iesu, Pita ke kula tatanono pare. “Ir Tamat Uleik, auia tunumpe ring uangoul pe inggeimane. Geto malara ingga, inggeim mi turung tuha me touonor taluhane, me sioko me noumua, kare me siokor nang Moses, doh me siokor nang Elaija” (Pita ahik pahe ate uaia tar haua re menmenein.)

³⁴Gitie re menmene peon, karo me ragom tane ro mahar langit tasisin, doh gisina ka sokoro ka leka pelasit toro mahar langit. ³⁵^pKara longoro tar men e la tur toro mahar langit, o kula pare, “Gine ter Tuguo geku kedangain. Longoro tatanon.” ³⁶Tar binaka ko kapa ro men, o tamatang uakuakeluk ka banga puk tang Iesu me pahene manas. Doh gisina ka uamoko tar inetonene tatas katong. Kara hik mata hire tauete me tamata tar puhunine ka bangaig tar binakon.

Iesu ke uauia tar keketik bulout

³⁷Tar giameher marein tar binaka ka la uahiua turuhasina tar siusan, o manai ka me ueltupara tang Iesu. ³⁸Doha tamat e uangoul tagu pono tasir manai ke kila ualeik pare, “Ir Tang Ualasis,

ⁱ9:20 Jon 6.68-69 ^j9:22 Luk 9.44; 18.32-33 ^k9:23 Mat 10.38; Luk 14.27

^l9:24 Mat 10.39; Luk 17.33; Jon 12.25 ^m9:26 Mat 10.33; Luk 12.9

ⁿ9:31 Luk 9.22 ^o9:32 2Pi 1.16-18 ^p9:35 Luk 3.22

Inggo u dangata uapopokohontiehe tun totomua tar la banga baka tar tuguo ger bulout, ge inggono pe ter tang siokon sioun pukur tuguo. ³⁹Doha liouana uasa ke hiku tatanon, kara hik me manasan, kare kaling ualeikion. Ingonor liouana ke uaporoporo tatanon, maeit ke la pungon i kot, kare la peroperer uauan, doha liouan e de tun mata hiliu tatanon, dohe mamantouontiehe kompe tatanon. ⁴⁰Inggo ku dangata uapopokoho tosnomo tamatang uakuakelukia tar ueluelutla tauete liu, bo ahik puk pah ka banot.”

⁴¹Doh Iesu ke mene hahaua tasisina pare, “Inggoum deho tamatang tagtagorong boho tun, remi ninamanoum, doh nami niguat ahik tun paha kodkodoh. A touihar binaka ru turung pepe keipio tamiuoum, song rung la tagorong manoum totoguo? Ueliuime tar tumeitane totoguo.”

⁴²Tar binakene re lamer keketik gitir liouana uasa ke baka uahiuu tatanon i kot, kare la poropor. Bo Iesu puk ke louar bise tar liouana uasa tar hiliu tar keketik, kare hiliuir liouan. Iesu ke uauia tar keketik bulout, kare heirila tatanono tang taman. ⁴³Doho tamata uakapa tun ka lutarantiehe tun ka banga pe tena nitampopokoho uleik God.

Iesu ke hire poluk e turung mat

Tar binakon o tamata uakapa tun ka siokor lutarangua tar mamang inetelik ke guataig Iesu, kare kulono toсно tamatang uakuakeluk pare, ⁴⁴“Ualongoro uaia tun tar puhunine ru hiregio tamiuoum, a Tunar Tamat inggono ra turung ueliuin e la tar limasir tamat.” ⁴⁵“Bo o tamatang uakuakeluk puk ahik mata naman manate a hauonoene ke mene

uatuhaiono tasisin. A puhonene ka uamoko uaouoin tasisin, maeit gisina ra toboul haraha tar tengkana ro uelhire roon, doh gisina ka poroko pono tar dangata tatanon.

Mai re i ranantieh

⁴⁶“Kare kotpokosonguar uelperer i uantinanina tasir tamatang uakuakeluk pare, te maiompe re turung i ranantiehe tasisin. ⁴⁷Doh Iesu e ate teil tar haua ra namanaigisin, kare kilame tar keketik, kare uatur tatanon i tektekena tatan. ⁴⁸“Song ke kula Iesu tasisina pare, “Mai re uaha uangoul tar keketikilikene tar hangouguo, inggon e uaha uangoul pono totoguo, doh mai re uaha uangoul totoguo, inggon e uaha uangoul tar tamata geke heiriha totoguo. Ter hauon a tamata ge ahik paha tohangana uleik i uantinanina tamiuoum uakap, inggono tere uangoul sira pare, ter i ranantiehe tun.”

⁴⁹Doh Jon ke kula tang Iesu pare, “Ir tang ualasil! Inggeim king banga tar tang siokor tamata geke guata keip tar hangoumua, kare geil liu tasir liouana uasa tasir tamat, doh inggeim king kula tane tatanon, ter hauon inggon ahik paha uanotoumiueim.”

⁵⁰“Bo Iesu puk ke kula pare, “Ahik pah mu kula tane, mai ge ahik pahe tur tane tamiuoum, inggono ter uanotoumiuoum.”

O tamatang tar uan i Samaria ka ueluelde tang Iesu

⁵¹Gine re lang uahuhut manasa peinir binaka ra kale tapokis pe taroin Iesu i Heuen, inggono ke la petutupe manasa tar la i Jerusalem. ⁵²Kare ualatue uoum tasir gisiamer tamat, kara la iuma tar uan tar pang uan i Samaria mara kaleu-

^{99:44} Luk 9.22 ^{99:45} Luk 18.34 ^{99:46} Luk 22.24 ^{99:48} Mat 10.40

^{99:50} Mat 12.30; Luk 11.23

atoro uoum tang Iesu re la peme. ⁵³Bo o tamatang tar uan puk ahik mata uauia tatanono tar lame, teene re lang la manasa pe Iesu i Jerusalem.

⁵⁴Tar binaka kura banga Jems me Jon ge na toking tamatang uakuakelukono ka de pesina tang Iesu, kaura kula tatanono pare, “Ir Tamata Noman! Innga o malara tamiraeim mira kila uahiuu mo hue o hiua tur i Heuen, karo ualuh uakapa tasisin.” ⁵⁵Bo Iesu puk ke uagegeme, kare uelkukur tasrasin. ⁵⁶Kara languasina tar giameher uan.

Iesu ke hire tar niguata ra uakelukulain tatanon

⁵⁷Gine ra haijala pelasina tar lel, kare kular tamata tang Iesu pare, “Inngo u turung uakeluk totomua ia ro lihihiaa.”

⁵⁸Kare kula Iesu tatanono pare, “O lo roke nas lebang, doho tetiaua nas niu. Bor Tunar Tamat ahik mena uma uamatoto tun re hohouin, kara hik me butur re uadedeke toro lun.”

⁵⁹Iesu ke kula tar tang giameher bulout pare, “La uakelukumeane totoguo.” Bo inggono puk ke mene hahaua pare, “Tamata Noman! Uamaluana baka totoguo geru la keu baka tang tamoug.”

⁶⁰Doh Iesu ke kula tanono pare, “Uakeluk totoguo, karo uamaluana tas ge ahik mes nitagorong mana ra keu tosnosio mat. Bo ingga puk o la ueliu tauete toro Uelhire Uaia tena Nitoia God.”

⁶¹^wA tang giameher tamata ke me kula tang Iesu pare, “Ir Tamata Noman, inggo u turung uakeluk totomua, bo o uamaluana baka kompe totoguo geru la uahire baka toso tahigulik ru hiliu pe.”

⁶²Doh Iesu ke kula tatanono pare, “Maiompe gere uakekena tar uakeluk totoguo, kare uiliangara tapokis, inggon ahik pahe banotong kalekinale uaia tun tena Nitoia God.”

O Mahar 10

Iesu ke ualutue tosno mouitir hangaulur tamat, doha tang torik

10^xI muduhia tar puhonene, a Tamata Nomana ke uamatoto tasir gime mouitir hangaul, doha tang torikir tamat, kare ualutue tang tang torik tasisina ra uoum tatanono toro mamang uauanilik, kare toro butur re marang lagion. ²^yKare kula tasisina pare, “A niein a burehe tar ueuer, bo o tamatang kalekinale puk o pag. Mu dangata tang tanener iomo te mare ualutuehaono mo tamatang kalekinale tar la kale toto tar niein.” ³^z“Mu la manas! Mu la sirala misiana tar sipsip kalan i uantinanina tasir lo roke. ⁴^aAhik pah mu kale me dukung mani ue me dukung inet ue me giameher toking pang su, doh inggoum ahik pah mu mene uatoro me tang sioko tar lel.

⁵Doh tar binaka rung la lekalaoum me um, inggoum mu kula uakikilanga pare, ‘No uelhiarou God o moko tar umene.’ ⁶Gete me tamatang uelhiarou re pepe, no uelhiarou God o moko uaiala tatanon. Geta hikion, no uelhiarou God o tapokis tamiuoum. ⁷^bMu uangoul iuma tar umoneit ro moko ro hiarou, doh mu ein to, karung inum to ue me hauampe gera heirigisina tamiuoum, inggono ter bulauamiuoum rung kalekinale pe tang God. Inggoum ahik pah mu la uangoul hahai toro um.”

^v9:54 2To 1.9-16 ^w9:61 1To 19.20 ^x10:1 Mak 6.7

^y10:2 Mat 9.37-38; Jon 4.35 ^z10:3 Mat 10.16

^a10:4 Mat 10.7-14; Mak 6.8-11; Luk 9.3-5 ^b10:7 1Ko 9.6-14; 1Ti 5.18

^{8c}“Doh getung laoum me uauanilik, doh gisina ra uaha uangoul tamiuoum, mu ein kompe tar niein gera heirigisina tamiuoum. ⁹Karung uauia tasir momouh ge kaeis tar buturuon, karung hire tasisina pare. ‘Tar Nitoia ger nang God inggono gine manas i hutuna tamiuoum.’ ¹⁰Bo getung laoum me uan, doh ahik pah ra uaha uangoul tamiuoum, mu la turane tar morenar uan, karung kula pare, ^{11d}O uou rone tenami uanioum geko rakut tar tatabalanar kekeimiueim, inggeim mi tunaha liu tapokis polukula tamiuoum, teeit inggeim mi marang uaate tamiuoum pare, na Nitoia God gine manas i hutuna tamiuoum, bo inggoum puk mu ueluelde.’ ^{12e}Inggo gine ru hire tamiuoum pare, ‘Tar binaka re kedanga God tasir tamat, a niuabato tasir tamata tar uanioneit, e turung i rana uain tar niuabato ka guatain tasir tamatang Sodom.’”

O tamatasit halana ta uapalih tenas niguat

¹³Kare kula polukiono pare, “Kuasalikisoumeitir tamatang tar uan i Korasin! Doh kuasalikisoumeitir tamatang tar uan i Betsaida! Ge pakene ka guata toigir nitouonine kung bangagioum i Tair, dohi Saidon, gisina pake sioun tun ka uapalih tenas niguat. Kara hiku tar hikhikung ueldolom, kara sorois tar taun tar ualasira pare, ra ueldolomo tun tar niguata uasa ka guataig. ¹⁴Bo a niduh pukene re turung kedanga keipin God tasir Tair, doho Saidon a kikitilik tanene tamiuoum, ter hauono inggoum kung banga ku guata peo tar nitou, doh inggoum ahik dedempe pah mu ualasira pare, mu ueldolomo tenami niguatar sa.

¹⁵Doh inggoumur tamatang tar uan i Kaperneam, ahik pah mu namana pare, te God re turung kale kai tamiuoum i Heuen, inggon ahik. Inggon e turung baka uahiuako tamiuoum i Hel.”

^{16f}Kare kula poluk Iesu tosno tamatang uakuakeluk pare, “Gete me tamata re longoro tamiuoum, inggon e longoro totoguo, doh gete me tamata re ueluelde tamiuoum, inggon e ueluelde totoguo, doh gete me tamata re ueluelde totoguo, inggon e ueluelde tang God geke ualatueha totoguo.”

O tamatang uakuakeluk ka uah

¹⁷A mouitir hangaul, doha tang torikir tamatang uakuakelukusine ka tapokis keip tar niuah, kara kula pare, “Ir Tamata Noman, o liouana uasa ka longoro tun tamiueim tar binaka king uala-toho keipieim tasisina tar hangoumua.”

^{18g}Doh Iesu ke mene hahaua pare, “Inggo ku banga tang Satan ke punga tur peha i Heuen misiana sira tar kanau. ^{19h}Inggo ku heir tar nitampopokoho tamiuoum marung banoto tar ueih uaponola tasir soi uasa, doho hilang, doh marung la pehuaroum tar mamang nitampopokoholik ger nosir uelmatan, doh ahik me inete re uaelmahing tamiuoum. ²⁰ⁱBo ahik puk pah mu uaha ka longoro per liouana tamiuoum, inggoum mu uaha puk ka bolo peigir hangamiu i Heuen.”

Iesu ke uah

²¹Tar binaka tunionene, Iesu ke uoun tar niuahene re la tur tar Iabena Dedeil, kare kula pare, “Inggo u uatakai toto-mua, Tamoug, ingga ter Tamata Noman i Heuen, dohi kot, teene ko touaouo

^c10:8 1Ko 10.27 ^d10:11 Apo 13.51; 18.6

^e10:12 Uak 19.24-25; Mat 10.15; 11.24

^f10:16 Mat 10.40; Luk 9.48; Jon 5.23 ^g10:18 Jon 12.31; UGO 12.8-9

^h10:19 Ker 91.13; Mak 16.18 ⁱ10:20 Pil 4.3; UGO 3.5

pe ingga tar inetenine tasir tamata gesir tang naman, karo tamatang ate, karo ualasira taninina tasir keketik. Aa! Tamoug, gininanine ter inete uaia re uauaha totomua.”

²²JGine ke lotu uakapa pe Iesu tang God, song ke uakekena tar mene tasir tamata pare, “Tamouguo ke siokor heir tar mamang inetelik totoguo. Ahik me tang sioko re ate hape re baka per Tunon te Tamana puk manasampeono tere ate. Doh ahik me tang sioko re ate hape re baka pe Tamanono ter Tunono puk manasampe, kare tes mais puk geke kedangaisir tunono tesir niualasira uakalahara pon.”

²³Song ke tur uiuirila Iesu toсно tamatang uakuakeluk, kare la mene uaouo pare, “God ke guata uaia tasisit geka banga tar mamang inetelik kung bangagioum. ²⁴Gine ru hire tamiuoum pare, o bureher propet, doho toia ka marang banga tar hauanit rung bangagioum, bo ahik puk mata bang huar, doh ka marang ualongoro tar haua kung longorogioum, bo ahik puk pah ka longoro tagu.”

O uelhire uaranga tar tamata uaia ger peng Samaria

²⁵^kDoha siokor binak, a tang siokor tamatang ate tar ualatutur nosir Ju, ke tur kai, kare marang uedanga tang Iesu. Inggono ke dangata pare, “Ir Tang Ualasir, A haua paku guataio maru bantoto tar kale tar nitua gere moko dedela.”

²⁶Doh Iesu ke mene hahaua tanono pare, “A haua ka boloin tonosio ualatutur Ju? Hape ro naman manate pea tang roon.”

²⁷Kare mene tapokisir tamateit pare, “Malauelhir tar Tamata Nomana ge nang Goda tar koloum uakapa tun, doh tar iabeim uakapa tun,

doh reng nitampopokoho uakapa tun, doh reng ninamana uakapa tun.’

‘Karo malauelhir toso uanotoum misiana ro malara katongo peia.” *Ualatut 6.5; Nas Kalekinaler Pater 19.18*

²⁸^lDoh Iesu ke mene hahaua pare, “Inggono ko mene uakodkodoh. La, karo la guata sira paar, maro turung uangoul dedela ingga.”

²⁹Bo inggono puk e marang uakodkodoho katongoin tar matasir tamat. Temaeitie ke dangatono tang Iesu pare, “Doh maionener uanotouguo.”

³⁰Iesu ke mene hahaua poluk pare, “A tamata ke la uahuako i Jeriko, e la tur i Jerusalem, doh tar binakene re lakoon, kara kusa koutur ueuenaua tatanon, kara laruh liu tena gomomon, kara uiliatung tatanon, kara hiliu tatanono ke mata uapuh.”

³¹“Kare lamer paterener nosir Ju tar siokonor lel, doh tar binakene ke bangono tar tamateit, inggono ke lihila tar pang giameh, ke la siauampe tatanon. ³²Doha tang siokor Libai ke la ponome tar buturuon, kare me bang huara tar tamaton, inggon ke lih ponola tar pang giameh, ke la siaua pono tatanon.”

³³“Bor tamatang Samaria puk ke haijala tar buturuon, kare banga tar tamatono re rikin pe, kare ueldolomo tatanon. ³⁴Inggono ke la uelhirila tatanon, kare la uamoko tar uaiuai, doha bino i rana tena taktakaron, kare uih tane keip taninina tar mahar gomomon. Song ke kihanga tatanono tena donki, kare kalela tatanono tar umang hohou gera bulbulauain, kare la kaueke to tatanon. ³⁵Tar giameher marein inggono ke kale tauete tar torikir mani silva, kare heir tang tanener um, kare kula pare, ‘Kaueke tatanon.’ Doh gete hahauar bulauana tar maniene, inggo u

me turung bulaua uadouw totomua tar binaka ru la tapokisime.”

³⁶Song ke dangata Iesu tar tamatang tar ualatut pare, “Hape ro namana pea? Hingia tasir tang touonosine ke guata sira pare, ter uanotono tar tamateit ka uiliatunginir ueuenau.”

³⁷Kare mene hahauar tamatang tar ualatut pare, “Ter tamata geke uel-dolomo tatanon teke guata uaiia.”

Ke hirengua Iesu tanono pare, “La karo la guata sir.”

Marta, doh Maria

³⁸Iesu mesno tamatang uakuakeluk ra la harahampela tenas nila i Jerusalem, kare la pokosola Iesu tar uan gere uan-goulinir kuah a hangana tang Marta, kare kila ualeikenguaono tang Iesu e lame iuma tena umon. ^{39m}Doh Marta tang tahina kuah a hangana tang Maria geke tabila uahuhut tar kekena Iesu, kare ualongoro tar haua re mene-gion. ⁴⁰Bo Marta puk ke namanantiehe tar nikaleuatoronar niein ginit paka guataig, kare me dangata pare, “Ir Tamata Noman, ahikia paho namana ke hiliu pe tahig kuaho totoguo, karu guato me paheig tar kalekinale? Hire tatanon e me poul totoguo!”

⁴¹Kare kula Iesu tatanono pare, “Marta, Marta, ingga o namnamanantiehe puk, karo hagouo uasa tar mamang inetelik, ⁴²ⁿahik paho namana uaburbureh, namana puk tar siokor ineter uia. Maria teke kedanga tar hauar uia, doh inggon ahik pah ra turung kale liu turin tatanon.”

O Mahar 11

Iesu ke ualasira ra lotu pein God

11 A siokor marein Iesu ke lotu to tar siokor butur. I muduhia ke

lotu uakapa baka peon, kare me kula na tang siokor tamatang uakuakelukono tatanono pare, “Ir Tamata Noman, o ualasira tamiueim pare, hape ring lotu peeim ngohina sira kompe ke ualasira pe Jon tosno tamatang uakuakeluk.” ²Ing-gono ke kula tasisina pare, “Tar binaka rung lotuumeim, mu lotu pare,

‘Tamamiueim, inggeim mi uouongono tar hangoumua. Uamaluana tenang Nitoia e laha.

³Ingga o heiriha tamiueim tar ma-mang mareinilik tar niein ring ein dedegieim.

⁴O kusa luara liu tar niguata uasar nomiueim, ngohina ring kusa luara pe inggeim tas gera guata tar niguata uasa tamiueim.

Ingga dehen to keip tamiueim tar uedang.”

⁵Kare kulanguaono tasisina pare, “Gete me tang sioko tamiuoum e lame me kaluana tatanono tar uantinaninar boung, kare kula pare, ‘Kaloug, heir baka totoguo mo touono ro bereit.

⁶Ge a tang sioko per kalougou ke sabsabalame totoguo, doh inggo ahik uadeil me niein ru heirig tatanon.’

⁷Song re turung mene hahaua kaloumuaetie iuma tar um pare, ‘Ahik paho menmene koutkout totoguo. O pirik o nibel tane manas, doh nogo keketikio inggeim gine manasa tenami uat. Inggo u de tun matu tentur, karu heir totomua me inet.’ ⁸Inggo gine ru hire tamiuoum, inggon ahik pahe turung tentur, kare heir tatanono toro bereit, ge a kaluana pe tatanon, bo teene e dangata totouaha puk peon, maene inggon e tentur uelhir, kare heir uamototo tun re malahir peon.”

⁹“Temaait ru hireo tamiuoum pare, Dangata mara turung heiriono tamiu-

oum. Mu sir marung tuparoum. Mu dok mara puk e ueleheirin ro pirik tamiuoum. ¹⁰Ge o tamata uakapa pe gera dangata ra kale, mai re sir e tupar, mai re dok o pirik o turung takapuk.”

¹¹“Ahik uadeil me bulout tamiuoum re banot e heir me tuna me soi tar binaka re dangata me ian. ¹²Ue gete dangatar tumua mo tagunung ein, ingga o ate ahik paha banoto heir tatanono me hilang.”

¹³“Bo inggoum pukener tamata uasa, mu uoto heir pono tar inete uaia toso bung tumiu, toro mana tun Tamamiuoumenah i Heuen a tamata uaia tun re heir pe tar Iabena Dedeil tasisit ra dangata tatanon.”

Iesu, doh Belsebul

¹⁴A siokor binaka Iesu ke geil tauete liu tar liouana uasa geke uapau tar tamat. Doh gine ke hiliu per liouan, a tamata ger pau ke men, kara lutarar manai. ¹⁵Bo o gisiamhe puk tasisina ka kula pare, “Inggon e guata keip tena nitampopokoho Belsebul ge nas uleikir liouana uasa, maeit re geil tauete liu tasir liouan.” ¹⁶PO gisiamhe ka marang uedanga tatanon, maeit ka dangata me niuaparoko gere la tur i Heuen.

¹⁷Doh Iesu e ate teres ninamanasin, kare kula pare, “A pang uan gere pakpakahais tar toto, kare uelueluiliatunge katongo kompeis, gisina ra turung mamantouois. O matmatame gera ueluel-sae, gisina ra turung uelueltageih. ¹⁸Doh ge pake uiliatung katongoin Satan, hape re banoto pe na nitoiaon e uangoul uabarah. Inggon u kula pare, ter hauon inggoum mu kula pare, inggo ku ueluel-tula tauete liu keip tasir liouana tena nitampopokoho Belsebul. ¹⁹Bo geto mana roono te mai ke heir tar nitampopokoho tosnomio tamatang uakuakelukioum tar

geil liu tasir liouan? Temaene gisinasine tera turung bang kedanga tamiuoum. ²⁰Bo gete ku guata keipio tar kamot li-manana God tar geil tauete liu tasir liouan, inggon e ualasira tamiuoum tena Nitoia God ke la manasame tamiuoum. ²¹Gete tur kauেকে keipir tamata tampopokoho ter nanar um, kare uahekebe uatoro keipin teno baenat inggon e banoto tar kauেকে tena inetenit re matotoig, ²²qe tuka gete me tamata me tampopokohontiehe tun ke me pehuara tatanon, kare laruh liu tena ineteng uiliatungon gere uoto haono toig, kare la uelpakaha keip tena inetono tasir gisiamheh.”

²³rKare kula Iesu pare, “A tamata ge ahik paha uanotouguo, inggon e tur tane totoguo, doh mai ge ahik pahe kale toto taguha totoguo tasir tamat, inggon e uaelueltageih tasisin.”

A liouana geka geil liuin sioun e marang la tapokisime

²⁴Iesu e mene harah, kare kula pare, “Tar binaka re la tauete liu tur per liouana tar tamat, inggon e la uiloho tunnunguala i lolono toro butur padpadenen, e sir me buturung pepe uah, doh ge ahikiono pahe tupar, song re kular liouana pare, ‘Inggon u turung tapokisila tar uma geku hiliu turin.’ ²⁵Tar binakeit re me pokoson, e me tupara tar um a niuadelauan, doha mamang inetelik ka uamoko uamamaroro tunig re moko pe ium. ²⁶Song re la kaleme tar gime mouitir liouana gesir santiehe uain tatanon, kara me siokor lek ium, kara me uangoul. Doh na niuangoulur tamaton e la turung santiehe uain.”

Tasisit ra uaha tun toro man

²⁷sGine re mene pela Iesu tar inetenine, kare kula ualeikir kuahane tasir

^o11:15 Mat 9.34; 10.25 ^p11:16 Mat 12.38 ^q11:22 Kol 2.15

^r11:23 Luk 9.50 ^s11:27 Luk 1.28,42,48

manai pare. “A niguata uaia e la tar kuahene ke poh, kare uahuh totomua.”²⁸ Iesu ke hahaua pare, “Bo a niguata uaiantiehe puk e hahaua uain e la tasisit geka longoro tono uelhire God, kara la guata uakeluk.”

Na uaparoko Jona

²⁹ Gine ra burburehe uain per tamat, Iesu ke kula pare, “A babeir tamatane daan a sa nas niguat, ra dangata me nitou ue me uaparok, bo ahik puk me uaparoko ra turung heirin, tena uaparoko puk manasampe Jona tera heirin.”³⁰ Ge Jona pe ter niuparoko tasir tamat i Ninive ter siokono komper niuparoko re turung guatainir Tunar Tamata tasir babeir tamatang daan.”

³¹ u“ A kuaha toia gere la turume tar pang makoso re hara turuhar pisar, e turung tur kai keip tena binakang kedanga God tasir babeir tamatang daan, kare turung mene uakouh tasisin, ge inggono pe e la tur i rehentiehe tun tar me ualongoro tena ninamana uaia Solomon, doh gine daan a tang sioko gere uleikintiehe uain tang Solomon kaeinane.”³² vO tamatang Ninive ra turung tur kai keip tena binakang kedanga God tasir babeir tamatang daan, kara mene uakouh tasisin, ge gisina pe ka uapalih tenas niguata uasa tar binaka ka longoro tena uelhire Jona, doh gine daan a tang sioko gere i ranantiehe uain tang Jona, kaeinane.”

A luh gere ualuh uakalahra tar tukunun

³³ w“ Ahik me tang sioko re ualuh mo lam, kare uatoko uaou ue e uatoko i kukulebanga me nouh. Bo e uatoko tun tang roon i rana toro teboul mara bang huarasis ra lekame iuma tar

um.”³⁴ A matoumiuoum tero lam tar tukunumiouum. Doh geta uiar matamiuoum, a tukunumiouum uakap e uoun pono tar luh. Bo geta sanin, a tukunumiouum a uoun pono tar kitup.”³⁵ Mu kaeke uaia katongosioum mara hikir luheit re moko keip tamiouum pahe kitupin.”³⁶ Temaene gete uoun uakapa tunur tukunumiouum tar luh, kara hik me paina re kitupin, a tukunumiouum e turung pe sira tar binaka ro bala ro lam tamiouum.”

A tonomor niduh

³⁷ Tar binaka ke mene uakapa Iesu, a Parisi ke dangata tatanono maura me ein tokaha to tena umon, temaeit ke la lekalaon iuma, kare la tabila toro teboul.”³⁸ Bo git pukur Parisi ke bangala tang Iesu ahik pe mata uahuu baka uoum tar limana tar binakang ein, kare lutarangua.”³⁹ Song ke kular Tamata Nomana tatanono pare, “Daan, inggoumur Parisi mu uoto uadelauana tar mudinar kap mer peileit, bo i lolono puk tamiouum, inggoum kung uoun tar niguatang kipal, kara niguatanitir sa.”⁴⁰ Inggoumener tuktukar! O mamang tamatalik ra ate tang God pare, teono teke tuh i kalahar, dohi lolono tar inet.”⁴¹ Temaeit inggoum pakung heir tasir tiome tar haua re moko teil i lolono tar dis mara delauanar mamang inetelik tamiouum.”

⁴² “Mu tagin teil, inggoumeitir Parisi, ge a mamang nieining koboro penit tar iomo re uoto ualingia tar niein, inggoum mu uoto polaka liu tur tar sisiokor hangaul ro mahara tar siokor hangaul, karung heir tang God, bo inggoum puk kung bangang duk tar guata uakokodoho tasir tamat, doh tar malaelhir tang God. Inggoum pakung

^t11:29 Mat 16.4 ^u11:31 1To 10.1-10

^v11:32 Jona 3.5-10

^w11:33 Mak 4.21; Luk 8.16

guata tar puhunine, doh pakung guata pono tar giniamehenar puh.”

⁴³“Mu tagin teil inggoumur Parisi, ter hauon inggoum mu malaelhirintiehe tar tabila toro tabtabila uakosop iuma tar umang lotu, kara mene uaia tosioum tar buturung uabulbulau.”

⁴⁴“Mu tagin teil, ter hauon inggoum misiana sira tar matmat ger bulbulutun, kara nitabung uaanas, kara teler tamata ra la ueih uapono pela.”

⁴⁵Kare mene hahaur tamatang ate tar ualatut tang Iesu pare, “Tang Ualasil, tar binaka ro uelhiremea tar inetenine, ingga ko uelsigala tamiueim.”

⁴⁶Iesu ke mene hahau pare, “Doh inggoumener tamatang ate tar ualatut, mu tagin teil, ter hauon inggoum kung uahuata tasisina tar niduhunitir uleikin-tiehe tun, doh inggoum ahik tun menami sikir nipoul tar uamamahoul tar niduh.”

⁴⁷“Mu tagin teil, ter hauon, inggoum kung tuha tenas lebangang mater propet, doho bung tamas ro tamamiuoum teka tung pous tasisin. ⁴⁸Maeit inggoum tekung ualasilampesioum pare, mu uauia tar haua ka guatais ro bung tamas ro tamamiuoum. Gisina ka tung pous tasir propet, doh inggoum tekung tuha tenas keuisin. ⁴⁹Temaait na niate heiriha mo propet, doh mo ualualatue tasisin, doho gisiamehe tasisina ra turung uiliatung pousis, doho gisiamehe ra turung uauelmahingis.”

⁵⁰“Temaait giner babeir tamatang daan tere turung kusa manasaisir niguatanine ke sa tar deuatingisir propet uakapa geke uiliatung pousis ke la tur peme ke uakekenena per kot, ⁵¹e uakekene tur toro deuatingina Ebol e la tuka toro deuatingina Sekaraia geke uiliatung pous toin i uantinanina toro oltang uahung, doh tena umang

lotu God. Aa! Inngo gine ru hire tun tamiuoum toro man, a babeir tamatang daan tere turung kusa manasaisir mamang niduhuninanine.”

⁵²“Mu tagin teil, inggoumur tamatang ate tar ualatut, ter hauon inggoum kung uoho uanono tar lelung kale tar niate tang God, doh inggoum katong halana tung kale tar niateon, karung tur tane tasir tamata gera marang ate pon.”

⁵³Tar binakeit ke hiliu Iesu, o Parisi, doho tamatang ualasila tar ualatut ka uakekena tar tur tane uapopokoho tun mara dangdangata keipila tenas nidang-gat, ⁵⁴tar marang uakouh me puh gere mene siauaion.

O Mahar 12

Ahik pah mu pe sira tasir Parisi

12 Tar siokonor binak, o burehentieher manai tamata ka uelpokos. Maeit gisina ka ueluelueihe katongois. Doh Iesu ke mene uakikilanga baka uoum toсно tamatang uakuakeluk, ke kula pare, “Mu tagin teil tenas niguatar Parisi ge o tang guata kokopo pesin. ^{2x}A haur inete ger nigomo uaou, ginin e turung moko uakalahar. Doha haur inete re moko uaou, ginina ra turung uakalaharaig. ³A haur rung mene uanomogioum tar kitup, ra turung longoroig tar marein, doha haur rung uelhimuk togioum iuma tar um, ra turung uelhire tauete turig i rana tar um.”

Sokoro puk tang God

⁴“Inngo gine ru hire tamiuoum ro bung kaloug, ahik pah mu sokoro tasisit ra uiliatung pous tar tukunun, dohi muduhia gisin ahik pah ra banotong guata baka poluk me inet. ⁵Bo inggo u turung ualasila tamiuoum tang mai pakung sokorioum. Mu sokoro tang God,

^x12:2 Luk 8.17

ge inggono pe e banot e uiliatung pous tar tukunun, kare bakala tamiuoum i Hel. Aa! Inggo ku hire manasa tamiuoum, sokoro tatanon.”

⁶“A tolimar tetetiaualik ra banoto ra uabulauais tar torikir kina. Kara hikimpe me sioko tasisinar tetetiaualik re malabourin God. ⁷YO mana tunumpe, a ulumioumunit tar lumiu a niaha manas, maeit inggoum ahik pah mu sokor, ge inggono pe mu baka uahahauantiehe tun tasir bureher tetetiaualik.”

Ahik pah mu matale tang Iesu

⁸“Inggo gine ru hire tamiuoum, mair tamata re hire tauete tasir gisiamer tamat pare, ‘Inggo a nang Iesu,’ a Tunar Tamat e turung hirengua tosno anggelou God pare, ‘A tamatane a nouguo.’ ⁹Bo mai puk gere kul, e tele totoguoane i kot, inggo u turung kula to i uoum tar matas no anggelou God pare, u tele tatanon. ¹⁰Doho tamata uakapa tun gera mene uasa tar Tunar Tamat, gisina ra banotong kusa luara liu kompeis. Bo me tang sioko gere mene uasa tar Iabena Dedeil, inggon ahik pah ra banotong kusa luara liuig na niguat uasa.”

¹¹^z“Geta reihilasioum tasir tamata uleikisine tonosio umang lotur Ju ue tasir toia ue tasir tamata uleiking tar gavaman, inggoum ahik pah mu namanantiehe tar huaa rung turung hire taueteig ue tar huaa rung turung kulaig. ¹²Ge a Iabena Dedeil pe e turung ualasila uoum tamiuoum tar binakoneit hape pakung kula peoum.”

O uelhire uaranga tar tamat a tang inet

¹³A tang siokane i uantinana tasir manai tamata ke kula tatanon pare, “Ir

Tang Ualasilir, o hire baka tang tahiguo maira uelpakaha raeim tena inete ra tamamiu.”

¹⁴Bo Iesu puk ke mene hahuaa tatanono pare, “Kaloug, mai ke uamatoto totoguo ter tamatang kedang ue a tamatang pakaha ueleheir i uantinana tamiraoum.” ¹⁵^aSong ke kulono tasisina pare, “Mu tagin teil! Doh mu tur uanon, karung kaueke katongosioum tar niguatang kupal, ge na niuangoul tun per tamat ahik pahe pokoso uaia to puk re burehe pe na inet.”

¹⁶Song ke hireono toro uelhire uaranga tasisina pare, “No mahar kotor tang siokor tamat a tang inet, e tabuara uaia tunur bureher niein tena iom. ¹⁷Doh inggono ke namnamanaehe katongoin pare, ‘A huaa paku guataio? Ge inggo pe ahik menag buturung uamoko toto meg niein.’ ¹⁸Kare kulono pare, ‘Inggo u turung dura uahuaa tonogo umang uamoko toto tar niein, karu turung tuha mo uleikintieh, doh tero umanin teru turung uamoko toto inggo tereg niein, doh nag inete uaia.’ ¹⁹Karu turung kula katongoio pare, ‘Inggo a burehentiehe nag inete uaia ginit re mok e la banotoig tar bureher krismas, e uamalagir tar niuangoul, u ein, karu inum, karu uangoulung uaha kompe.’

²⁰Bo God puk ke hire tatanono pare, ‘Ingga a popouluan! Daana tar boung, ingga o turung mat, doh hapengua tar inete geko kaleuatorogia a noum, maingua re turung kale taninin?’ ²¹^bA puhonene e turung pokoso tang mai gere uamoko toto mena inete, bo ahik puk paha tang inete tar matana God.”

^y12:7 Luk 12.24; Apo 27.34 ^z12:11 Mak 13.11; Luk 21.12-15

^a12:15 1Ti 6.9-10 ^b12:21 Mat 6.19-20

Ahik me namnamanantiehe tar ineteng tar kot

²² Song ke kula Iesu tosono tamatang uakuakeluk pare, “Temaetit ru hireo tamiuoum, ahik pah mu namanantiehe tenami niuangoul, kare tar haua pakung einin, doha haua rung ualohoig tar tukumi. ²³ Ge a niuangoul pe ter inete uleikintiehe tar niein, kara tukununa ter inete uleikintiehe tar gomom. ²⁴ Namanaehe puk tasir tetiau, gisin ahik pah ra leb ue ra ueuere tagu, kara ahik pono menas umang uamoko toto mes niein, bo Godompe re uoto heir tasisina tar niein. Inggoum tesir inete uleikintiehe tasir tetiau. ²⁵ Mai tamiuoum re uoto namanantiehe tar inetenin, kare namana pare, e banot e uangoul keip uabarah tena niuangoulane tar kot? ²⁶ Gine ahik peoum pah mu banoto mu guata tar ineteniner asalik, ae maene rung namanantiehoun tar giameher ineteninane.”

²⁷ “Banga to puk tar purpur re hua pe, ginin ahik pahe kalekinale ue e uakotpokoso tagu me gomono mataia. Inggoume ru hire tamiuoum, Solomon ger toia a tang inete nomanampe, bo ahik puk mena gomono me mataia sira tar purpur. ²⁸ God e ualoho tar garasanine i moren, doh ginin e tua puk daan, bo tar giameher marein ginina ra tokoutig, kara ualuhig. Bo inggoum pukene ahik remi nitagorong mana paha popokoh, inggoum tekung i ranantiehe tun tar purpur, temaene inggoum pakung ate pare, God e turung kauেকে uiaia tun tamiuoum. ²⁹ Ahik pah mu sirsir teil tar inete rung turung einig, kara hik pah mu sirsir teil tar haua rung turung inumig. Ahik pah mu namanantiehe tar inetenin. ³⁰ O tamata gera tele tang God, ra sirsir teil tar inetenin, bo tamamiuoum puk ing-

gon e ate pare, inggoum mu malara tar inetenin. ³¹ Bo inggoum puk mu sir baka uoum tena Nitoiaon, song re heirono tamiuoum tar inetenin.”

A bureher ineter uaia re mok i Heuen

³² “Inggoumur pang sipsipilikene, ahik pah mu sokor, ge Tamamiuoum pe e uaha re marang heir pe tamiuoum tena Nitoia.”

³³ ^c “Mu uabulaua liu tenami inet, karung heir me mani tasir tiome. Tar puhonene inggoum mu uamoko toto tenami inet i Heuen. Karung kale menami tolaha ge ahik pahe turung mout, karung uamoko toto tenami inete uaia i Heuen. Ge i Heuene pe nami inete uaiaoum ahik pahe banot e kap, kara hik me ueuenau re la uahuhut ue me kih re banotong mamantou. ³⁴ Ge ia pe re mokor inete uaiar namiuoum ter buturuono re moko pono remi nimalaelhiroum.”

³⁵ ^d “Mu kaleuato uiaia tanikasoum tar la kalekinale, karung ualuh dede tonomio lam, ³⁶ misiana tasir tamata gera uangoul tenas tamata uleik gete la tapokis turuha toro iru geka guatain toro le. Temaetit gete lameon, kare doko toro pipirik, gisina ra banoto ra puka uateuele toro pirik. ³⁷ Inggoum e turung uia tun tasir tamatasitir tamatang kalekinale gete me ueltuparar tamata uleik ra uakuakeis pesina mangiha re me pokoson. Inggoume ru hire tamiuoum toro man. Inggoum e turung hiku toro hihikung kalekinale, kare kila tasisina ra la tabilala toro teboul, kare turung ualaeiniono tasisin. ³⁸ Inggoum e turung uia tun tasir tamatang kalekinalesine gere me ueltuparais pare, ka kaleuato manas. Gitiempe ge pakene e lameon tar uantininar boung ue tar lulein.”

^{39e}“Bo mu naman manate puk pare, ge pake atensioun tanener uma mangiha uamatoto tun re lamer ueuenau, inggon ahik pahe turung uamaluaana tena uma ra me polakain. ⁴⁰ Mu kaleuatorosium. Ter hauon a Tunar Tamat e turung lame tar binaka ge ahikioum pah mu namana sira pare, e lameon.”

⁴¹ Pita ke dangata pare, “Ir Tamata Noman, o hirhireha ingga toro uelhire uaranga rone tamiueim ue tasir tamata uakap.”

⁴² A Tamata Noman ke mene tapokis pare, “Doh mair tamatang kalekinale ge na ninamana uaia, kara uauaman teono tere uamokoin na tamata uleik e kaueke tosno tamatang kalekinaleono tar heir uamatoto tun tenas binakang einisin? ⁴³ A tamatang kalekinaleonene e banotong uaha tun gete me tuparar tamata uleik re kalekinale pe tar binaka re la tapokisime. ⁴⁴ ^fInggo gine ru hire tun tamiuoum toro man. Inggon e turung heir tatanono tar nikaueke tena mamang inetelik. ⁴⁵ Bo gete kula katon-goinir tamatang kalekinale pare, ‘Nag tamata uleikio ke puhung barah manasain tar lameane.’ Song re uakekene tar halhaluh tasir tamatang kalekinalesiner bulout, doho kuah, kare ein kompe tar niein, kare inum uapopouluanain. ⁴⁶ Doh na tamata uleikir tamatang kalekinale e turung lame tar marein re teleion, doh tar binak ahikiono pahe ate pare, e lameon. Doh na tamata uleikion e turung mamantouo tunungampe tatanon, kara baka liu tagulain tasir tamata gesir mahang longor.”

⁴⁷ ^g“A tamatang kalekinaleoneit ra turung halhaluh uaburehein, teeit re ate teil pe tena nimalara na tamata uleik, kara hik pah ke guata sir.”

⁴⁸“Bo gere tele tena nimalara na tamata uleik, kare guata tar ineter sa, inggono ra halhaluh uamatoto pukin.”

“Mai gera heirin tar bureher inet, inggon ra uahingain tar heir tapokis tar bureher inet. Doh mai gera heirin tar kaueke tar bureher inet, inggono ra dangatain tar kaueke tar burehentiehe tunur inet.”

Ahik mo hiarou, bo a ueltageih puk

⁴⁹“Inggo ku laha tar me ueliu toro hueane i kot, doh ru malarantiehe tun peo, roono o luh manas! ⁵⁰ ^hBo inggo puk paku turung kale baka tar siokor uahuhuene, doh inggo u hagouo uasantiehe tun e tuka getu guata uakapa bak.”

⁵¹“Inggoum kung namana sira pare, ku me keipihao toro hiarouane i kot? Ahik! Inggo ku laha tar uaelueltageih tamiuoum. ⁵² E uakekena turene daan. O matmatame gesir tang tolima ra turung uaelueltagiaheis. O tang touono ra turung uelsae keip tar tang torik, doha tang torik ura uelsae keip tar tang touon. ⁵³ ⁱGisina ra turung uelueltagiah pare, a tamasisin e uelsae keip tar tuna ger bulout, doha tunono ger bulout e uelsae keip tang taman. Doha tinanar kuah e uelsae keip tar tuna ger kuah, doha kuah e uelsae keipompe tang tinan. Doh na kuahar tunon e uelsae keip tang enan, doh enanon e uelsae keip tena kuahar tunon.”

Naman manate a hauene re turung kotpokos

⁵⁴ Iesu ke kula pare tasir manai tamat, “Getung bang huaroum mo mahar langit o tentur kai liu tur tar butur re hukor pisar, inggoum mu kula puk manasa pare, inggon e turung huan, kare la

^e12:39 Mat 24.43-44; 1Te 5.2 ^f12:44 Mat 25.21,23 ^g12:47 Jas 4.17

^h12:50 Mak 10.38-39 ⁱ12:53 Mai 7.6

huanon. ⁵⁵Doh tar binaka re u romong tar pang makoso re hara turuhar pisar, karung kuloum pare, inggon e turung pang pisar, kare la uelsuk nomananguaon. ⁵⁶Inggoum mu ate tun tar mene ualasira tar hauaninanit re kotpokosoha tar kot, doh tar langit. Inggoum o tang kokop! Hopengua, maeit ahikioum pah mu banoto mu mene uakalahara sira tar binakaninene daan.”

Guata keip toro hiarouo tang mai re sa totomua

⁵⁷“Ae maeit ahikia paho kedanga katongoia tar hauar kodkodoh? ⁵⁸Gine ro la keip tokaha manasa pela ingga tar tang tohotola totomua tar tamatang ualongoro tar uelhire, uedanga tar petutup tar ueluauiie keip tatanon, ura la tokaha pela. Gete reihilaono totomua tar tamatang kedang, doha tamatang kedang e ueliuila totomua tenas tamata uleikir polis, kare la bakalar polis totomua tar karabus. ⁵⁹Inggoum gine ru hire tamiuoum, ingga ahik paho turung tauete liu i kalahar e tuka tar binaka ro bulaua keipia tar uadouhinar mani.”

O Mahar 13

Mu uapalih tenami niguata uasa

13 O tamata gera uangoul tar binakono ka me hire tang Iesu tasir Galili geke tung pousis nu Pailat, ra heir pesina tenas uahung tar umang lotu ger dedeil. ^{2j}Doh inggono ke mene hahau tasisina pare, “Inggoum mu namana ka mata per Galilisine gisina teka guata uasantiehe tun tar haua ka guatainir gisiamer Galili, maeit ka kale tar uelmahing? ³Ahik! Inggoum gine ru hire tamiuoum, mu uapalih puk tenami niguata uasa geta hikion, inggoum uakapa tun mu turung mata

pon. ⁴Ue mu namana sira pono tasir siokor hangaul, doha tualir tamata geke hungis ro taua i Siloam, kara mat, gisina teka guata uasantiehe tun tar haua ka guatainir tamatasine i Jerusalem? ⁵Ahik! Inggoum gine ru hire tamiuoum, mu uapalih puk tenami niguata uasa geta hikion, inggoum uakapa tun mu turung mata pon.”

⁶Kare hirenguaono toro uelhire uaranga rone pare, “A tamata no douk o hangana toro fig, roon o nilebe tena iomon, doh inggono ke lame, kare me sir me kukuanana tang roon, ^{7k}doh ahik mata tupar. Song ke hireono tar tamatang kaukeke tar iomo pare, ‘Bang! O uatouonono ro krismas manasa rone daan, doh inggo ku lame tar me banga me kukuanana ro douk fig, doh ahik matu tupara bak. Oboro liu tang roon! Ae maene ro uakapa puk roono tar hihiananar kot?’”

^{8l}“Kare kula na tamatang kalekinaleono pare, ‘Nag tamata uleik, ingga o uamaluana baka poluk tang roono toro krismas rone e tuka getu koho uiloho bako, song ra uamokolaig me ineteng uauia tar kot. ⁹Doh geto ua roono me kukuana toro krismas roeit i uoum, auia! Bo geta hikion, song ra oboro liuin roon.’”

Iesu ke uauia tar kuah o sa ro mudin

¹⁰Tar Mareining Pepe Uah Iesu ke la ualualasira to tar siokor umang lotu ger nosir Ju. ¹¹Doha kuah e uangoul tagu pon, inggono ke hikuinir liouana uasa geke heir toro mata tar tukununon e matoto toro hangaul, doho tual ro krismas, doh inggon o kokolo ro mudin, kara hik pahe banot e tur uakodkodoh. ¹²Tar binaka ke banga Iesu tatanon, inggono ke kilame i uoum, kare kula tanono pare, “Ir kuah, rongo mata ko

uia manas.”¹³ Song ke uaponala Iesu tar limana tatanon, kara hik me sikir manasan, inggono ke tur kai uakokodoh, kare uatakai tang God.

¹⁴^mDoha tamata uleiking tenas umang lotur Ju ke nimalian, teene ke guata uaia pe Iesu tar tamata tar Mareining Pepe Uah, temaeit a tamata uleik ke kula pare, “A tonomong sioun deher mareining kalekinale, temaeitie inggoum mu laha tar mareininin mara me guata uaia-sioum, doh ahik pah tar Mareining Pepe Uah.”

¹⁵ⁿDoha Tamata Noman ke mene hahau tatanono pare, “Inggoum o tang kokop, ge inggoum pe mu uoto guata uaia tosnomio kau ue o donki tar Mareining Pepe Uah, rung luaka liu tur pe tasisina tar buturung sanga uatur, karung la uainum tasisina tar kodom. ¹⁶ Temaeit a kuahene ger tuna Abraham geke uih tane keipin Satan toro hangaul, doho tual ro krismas e banoto ra luaka liuin no mata tar Mareining Pepe Uah.”

¹⁷ Tar binaka ke kulono pare, no uelmatanono ka siokor matalangua, bosir tamata uakapa tun puk ka siokor uahantiehe keip tar mamang niguata uahantiehe tun ke guatagion.

Na Nitoia God ngohinar uatunar mastet, doha is

¹⁸ Kare dangata Iesu pare, “Hape re baka pe na Nitoia God? A hauangua paku uamisiana toio? ¹⁹ Inggono misiana sira tar uatuna ro mastet geke lebeinir tamata tena iom. Ko hua roon, karo kotpokos o douk, doho tetiaua ka la toko tar ranana roon.”

²⁰ Doh Iesu ke dangata poluk pare, “A hauangua poluk ru uamisiana tolaio tena Nitoia God? ²¹ Inggono misiana sira tar is geke uelhouar keipigir kuaha tar

bureher palaua. Ginina ke uauout kai uakapa tun tar palaua.”

O pirik gero kisong

²² Song ke lihila Iesu toro uan ueltebeir, kare toro uan menia toro uauanilik re uualasira pe, re lang la pe i Jerusalem. ²³ Doha tang siokor tamata ke dangata tatanono pare, “Ir Tamata Noman! O gisiamhengua pukur tamata ra turung uelkarusis.”

Kare kulono tasisina pare, ²⁴ “Inggoum ru hire tamiuoum, mu petutupe tar lekala toro pipirik gero kisong, ge o burehentiehe per tamata ra turung uedanga tar lek, bo ahik puk pah ra banotong lek. ²⁵ Gere tentur komper tanener um, kare holoro toro pirik, doh inggoum mu turung tur i kalahar, karung dokdoko toro pirik, karung kula pare, ‘Ir tamata uleik puka toro pirik!’

Bo inggono puk e turung mene hahau pare, ‘Inggou u tele tamiuoum, ia rung la turioum.’ ²⁶ Karung turung kulanguaoum pare, ‘Inggeim king ein, karung inum keip totomua, doh ingga ko uualasira to pono tonomio moreneim.’

²⁷ ^pBo inggono puk e turung mene hahau pare, ‘Inggou u tele tamiuoum, doh ia rung la turioum, mu uareingane to-toguo, inggoum o tamata uasa uakap!’”

²⁸ ^q“Inggoum mu turung ueluelkiringe, karung eit uarororueit tar liuoumiu, getung banga tas Abraham, Aisak, doh Jekop mesir propetisit ka leka tena Nitoia God, bo inggoum pukene ra bakalasioum i kalahar. ²⁹ ^rO tamata ra turung la turume tar paina re hara turuhar pisar, doh tar paina re la hukor pisar, doh tar pang kaisana tar paina re hara turuhar pisar, doh tar pang mua tar paina re hara turuhar pisar, kara la turung ein toro niein uleik

^m13:14 KT 20.9-10; Ual 5.13-14 ⁿ13:15 Luk 14.5 ^o13:25 Mat 25.10-12

^p13:27 Ker 6.8 ^q13:28 Mat 8.11-12 ^r13:29 Ker 107.3

tena Nitoia God. ³⁰Bo o mana tun! O gisimehe gera uadouh tun teasina tera turung uakikilang, doho gisimehe gera uakikilang teasina tera turung uadouh.”

Iesu e ueldolomo tasir tamatang Jerusalem

³¹Tar binakon o gisimeher Parisi ka lame tang Iesu, kara me kula pare, “Hiliu tar uanene, karo lame giamehe siokor uan, ge Herot pe e marang tung pous totomua.”

³²Kare mene hahaua Iesu pare, “Mu la hire tatanoneitir lo roke pare, ‘Inggo u turung geil tauete liu tasir liouana uasa, karu uauia tasir momouh daan, doh roliuo, kare tar uatouononor marein inggo u turung uakapa tenagu kalek-inale.’ ³³Bo inggo puk u la dedem-peene daan, doh roliuo, doh tar giameher marein. Ge ahik pe me propet re banot e mata to i behia i Jerusalem!”

³⁴“Jerusalem, Jerusalem! Ingga ko uiliatung pous tasir propet, doh ingga ko bakbak pous keip tar palaua tasisine ke ualatuehais Godane totomua. A bureher binak inggo ku marang kale toto toso bung tumua misiana tar paolo tinana re auin tane pe toso bung tun i kukulebanga tar toking titiauan, bo inggoum puk kung de! ³⁵Bang! Gine daan God e hiliu tenami umang lotuoum ger dedeil e turung kalilono tok. Inggo gine ru hire tamiuoum, Inggoum ahik pah mu bantong banga tupara baka poluk totoguo e tuka getung la kula bakoum pare, ‘A niguata uايا e la tatanon, ge inggono pe ke laha tar hanganar Tamata Noman.’” *Ker 118.26*

O Mahar 14

Iesu ke la ein to tena umar Parisi

14 A siokor Mareining Pepe Uah, Iesu ke la ein to tena umar Parisi gere uleik tasisinar Parisi. Doh inggono ka uakeis uanono uايا tunin. ²Doh gatie i uoum tatanon e uangoul ponor tamata ger isingir tukunun. ³†Kare dangata Iesu tar Parisi mer tamatang ualualasira tar ualatut pare, “E uauiamper ualatut tar uauia to tar tamata tar Mareining Pepe Uah.” ⁴Bo gisina puk ka uangoul buk-buk ahik pah ra men, temaeit ke kusemeono tar tamaton, kare uauia tatanon, kare kula tatanon e la. ⁵‡Kare dangatono tasisina pare, “Gete me tang sioko tamiuoum re punga uahiuako me tuna ue mena kau tar koue tar Mareining Pepe Uah, inggoum mu turung teuele tar la reih kai liu tur tatanono tar tung.” ⁶Doh gisina ahik mata men.

God e uairana tar tamata gere touahiuain

⁷Tar binaka ke banga Iesu tasir tamatasine ka me tabila kedanga pe tar tabtabilanitir nosir tohangas, kara to ueltadan, inggono ke hire tasisina toro uelhire uaranga rone pare, ⁸‡“Gete kila me tang sioko me kalamiuoum tar la toro nieing toro le, ingga ahik paho la tabila tar tabtabilanitir nosir tohangas, kara to ueltadan geto niuamatoto manasa ro tabtabila roono me tamata me i rana uain sikoro totomua ger nikila pon. ⁹Doh geto la tabila toro tabtabila roon, a tamatane ke guluh toro niein geke kila tokaha tamiraoum e turung lame, kare me kula totomua pare, ‘O heir toro tabtabila roeit tar tamatane.’ Karo turung matala ingga.”

^s13:30 Mat 19.30 ^t14:3 Luk 6.9 ^u14:5 Mat 12.11; Luk 13.15

^v14:8 NU 25.6-7

¹⁰“Bo geta kilaia, kale tar uadouhinar butur, maeit gete lahar tamatane ke kila totomua, inggon e turung kula totomua pare, ‘Kaloug in kai taroanaha tar butur uaiantieh.’ Song ra turung uairanampeia tar binaka ra uangoul tokaha ro uanotoumuasitir nikil. ¹¹ ^wTasir mamang tamata uakapa tun, mai gere uairana katongoin inggono ra turung touahiuain, doh mai gere touahiuu katongoin inggono ra turung uairanain.”

¹² Song ke kula Iesu tar tamateit ke kilame tatanono toro niein pare, “Geto guluha mo niein, ahik paho kila pokoso toso bung kaloum, o bung tahim ue toso tahimulik ue toso uanotoumusitir tang inete geta kila tapokis kalehesina totomua tar hahaua tereng nieina. ¹³ Bo tar binaka gero guata mo niein, kila pokoso tasir tiome, doho sar limas, o peil, karo kut, ¹⁴ ^xsong ra turung guata uaiia tunuia. Gisiner ahik nomana pah ra banotong guata hahaua totomua, bo ingga puk o turung kale bulauana tar binaka ra uatua tapokisir tamatar kodkodoh.”

O uelhire uaranga toro niein uleik

¹⁵ ^yTar binaka ke longoror tang sioko tasisinasit ka tabila keip tang Iesu, inggono ke kula pare, “A niguata uaiia e la tar tamateit re turung ein to toro niein uleik tena Nitoia God.”

¹⁶ Iesu ke mene hahaua pare, “A tang siokor tamata ke kaleuatoro toro niein uleik, kare kila pokosome tasir bureher tamat. ¹⁷ Tar binakon inggono ke ualatue tena tamatang kalekinale, tar la hire tasisitir nikil, kare la kula pare, ‘Mu lame, a mamang inetelikene daan a nikaleuatoro manas.’

¹⁸ Bo gisina tokaha puk ka siokor pepe boho ueltebeir. A tang sioko ke kula pare, ‘Inggo ku nihing bulaua puk toro

mahar kot, doh inggo u la marang bangahe tang roon. Inggo u ueldolomo tun, ahik pahu banot u la.’ ¹⁹ A tang giamehe ke kula pare, ‘Inggo ku nihing bulaua puk tar hangaulur kauang kalekinale, doh inggo u la marang uedanga keip tagin tasisina tar iom. Inggo u ueldolomo tun, ahik pahu banot u la.’ ²⁰ ^zKare kular tang giamehe pare, ‘Inggo ku nihing le puk, temaeit ahik pahu banot u lame.’

²¹ A tamatang kalekinale ke la tapokisime, kare me hire tapokis tena tamata uleik tar haua ka meneigir tamat. Gine ke longoro pe tanener um, inggono ke nimalian, kare ualatoho tena tamatang kalekinale pare, ‘La tauete ualahur i moren, dohi birum toro uan, karo ueliuime tasir tiome, gisiner sar limas, karo peil, doho kut pon.’ ²² A tamatang ualualatue ke la, kare la guat, kare la kula pare tena tamata uleik, ‘A haua ko ualatohoia ka guata manasain, bo a burehe harahamper buturunitir tabotan.’ ²³ Temaeit a tamata uleik ke kula tena tamatang ualualatue pare, ‘La tauete toro lele uleik, doho lele sasalik tar pang uan, karo kila tutupe tasisina tar lame mare turung uoun nag umo. ²⁴ Inggo u hire totomua pare, ahik me tang siokor tamata tasisitir nikila uakikilanga re turung ein tagin me sikir niein toro niein uleik ro nouguo.”

A hagarang uakeluk tang Iesu

²⁵ O manai tamata ra siokor la keip tokahala tang Iesu, kare tur kauiuirion, kare kula tasisina pare, ²⁶ ^a“Gete me tang sioko re marang uakeluk totoguo, na nimalauelhirono totoguo paka i rana uain tena nimalarono tang taman, doh tinan, doh na kuah, doho bung tun, doho bung tatahinalik, doh na niuangoul, bo gete deono tar guata tar niguatonene,

^w14:11 Mat 23.12; Luk 18.14 ^x14:14 Jon 5.29 ^y14:15 Luk 13.29

^z14:20 1Ko 7.33 ^a14:26 Luk 9.23

inggon ahik pahe banotong kotpokoso nag tamatang uakuakelukio. ²⁷Doh mair tamata ge ahik pahe huata tena korose, kare uakeluk totoguo, inggon ahik pahe banotong kotpokoso tagu pare, nagu tamatang uakuakelukio.”

²⁸“Gete me tang sioko tamiuoum re marang tuha me uleikintiehe tunur um, inggon e tabila baka uoum, kare sir uamatoto re turung baka per bulauana mare bangaeha ge pare matoto teil na mani tar uakapa keip. ²⁹Gete tuha pukiono tar tagele nar um, doh ahik pahe banoto tar tuha uakapa tatanon, o tamata uakap gera banga tatanon, ra turung ueltang ualenge tatanon, kara kula pare, ³⁰‘A tamatane ke uakekene tar tuh, doh ahik pah ke banoto tar tuha uakap.’”

³¹“Gete me toia ke uiliauh tar la uiliatungeis mer tang giameher toia. Inggon e tabila baka uoum, kare namanaeha ge para banoto teil no hangaulur taosein no tamatang uiliatung tar uelkoi keip tasir torikir hangaulur taosein no tamatang uiliatungur tang giameher toia. ³²Geta hikiono pahe banoto teil toso hangaulur taosein no tamatang uiliatung tar uelkoi keip tasir torikir hangaulur taosein no tamatang uiliatungur tang giameher toia, inggon e turung ualatue tasir tang uelhiarou tar binaka ra uaireha haraha uelmatana mara banotong uakotpokoso toro hiarou. ³³Te misiana kompe geta hik me tang sioko tamiuoum re kusa luara liu tena mamang inetelik, inggon ahik pahe banoto pare, nagu tamatang uakuakelukio.”

³⁴Iesu ke mene dedempe pare, “A teh auia, bo gete kapar linglinginanin, ahik me hagar mare linglinging tehe baka polukunin. ³⁵Ginin ahik paha uia tar uelhouar keip me ineteng uatabuara tar nieinane tar iom, ginina ra baka tauete liug. Mair to talingana tere longor.”

O Mahar 15

A sipsip geke heil, doha mani niualup

15 Tar binakonene o tamatang kale toto tar maning takis, doho tamatang guata uasa ka siokor uelpoukos uiloho tar ualongoro tatanon, ^{2b}bo o Parisi puk mesir tamatang ualualasira tar ualatut ra ngur kompe pare, “A tamatane e kilauatoro tasir tamatasiner sa nas niguat, kare ein tagu tasisin.”

³Song ke hire Iesu tasisina toro uelhire uaranga rone, ^{4c}“Gete me tang sioko tamiuoum mena 100ir sipsip, kare uahail tar siok, inggon e hiliu tasir 99ir sipsipane tar butur paden, song re la sir uakeluk tar sipsip geke heil e tukampe gete uelutpara baka tatanon. ⁵Doh gete uelutparion, inggon e turung uahantiehe tun, kare uaponola tar huhuatan, ⁶kare haiala ium. Song re turung kilono toso kaluan, doho uanotono tar pepe tokah, kare kula pare, ‘Mu me uaha uelkout totoguo, inggo ku tupara manasa tenag sipsip geke heil.’ ⁷Inggo u hire tamiuoum tar siokonor hagar, a niuah e turung uleikintiehe i Heuen gete me tang siokor tamatang guata uasa e uapalih tena niguata uasa. A niuahon e turung uleikintiehe uain tar niuaheit tasir 99ir tamatar kodkodoho ge ahik pah ra marang uapalih.”

⁸Kare kula poluk Iesu pare, “Gete me kuaha mena hangaulur mani, kare ualup me siok, inggon e uahung toro lam, kare io uadelauana tar um, kare sirsir hamas tun e tuka gete la tupar. ⁹Doh tar binaka re tuparon, inggon e siokor kila toto tokaha toso bung kaluan, doho gisis i hutun, kare kula pare, ‘Mu me uaha keip totoguo. Inggo ku tupara manasa tenag mani geke lup.’ ¹⁰Inggo u hire

^b15:2 Luk 5.30 ^c15:4 Isk 34.11,16; Luk 19.10

tamiuoum pare, tar siokono komper hagar, a niuaha uleik tun tasir anggelousine ra uangoul tang God tar tang siokor tamata gere uapalih tena niguata uasa.”

A keketik bulout geke hiliu tang taman

¹¹ Jesu ke mene poluk pare, “A tang siokor tamat a tang torikir tun a toking bulout. ¹²Doha gitier uakeluk ke kula tara tamas pare, ‘Papa o heir uelpakaha tenang inete tamiraim, karo heir tar hauar nouguo.’ Temaeit ke pakahanguaono tena inet i uantinana tasrasin.”

¹³ “I muduhia, a keketikener uakeluk ke siokor kale tena mamang inetelik, kare la uariehe tar gime pang uan, kare la uakapa ueltebeir to tena mani, re uauaha pe tar nimalara uasang tar tuku-nun. ¹⁴ I muduhia ke uakapa baka peono tena mamang inetelik, kare kotpokosor gogo uleik tar pang uan uiloh. Doh inggono ke uakekena manasa tar malara me nipoul. ¹⁵ Temaeit inggono ke la, kare la kalekinale tar tamatang tar pang uanion, doha tamatono ke ualatie tatanon e la tenas buturur hueit, kare la uakiha tasisin. ¹⁶ Inggono ke gogo uasa tun, doh ke marang ein me niein gere mokomoko re uakiha peono tasir hueit, bo ahik puk mata ein, doh ahik pono me tamata ke heir tatanono me inet.”

¹⁷ “Doh tar binaka ke naman manate tapokision, inggono ke kula pare, ‘O tamatang kalekinalesiner nang tamouguo a burehe res niein e mokomok. Doh inggo gine ru mata tar gog! ¹⁸ Inggono u turung la tapokis tang tamoug, karu la kula tatanono pare, Papa! Inggono ku guata uasa tang God doh totomua. ¹⁹ Inggono ahik baka poluk paha tamata uaia maro banoto ingga o kila

totoguo a tum. Guata sira totoguo nang tamatang kalekinale.”

²⁰ “Temaeit inggono ke tentur kompe, kare la tang taman. Bo tar binaka puk re uairehe harahono tar uan, git tamanono ke bang huarala tatanon, kare uaha keip tun tar niueldolomo tar tun, kare ualola, kare la buaka kai tatanon, kare uaha tun. ²¹ Song ke kular tunono pare, ‘Tamoug, inggo ku guata uasa tang God, doh totomua. Inggono ahik baka poluk paha tamata uaia maro banoto ingga o kila totoguo a tum.”

²² “Bo tamanono puk ke kula tosno tamatang kalekinale pare, ‘Teuel! Keipime toro hikhiku giaat ro mataiantiehe tun, karung me uahiku tatanon. Uamokola tar ring tar kamot limanon, doha su tar kekenon. ²³ Keipime tar kau geke ualaein uauleik siokoin, kara me uiliatung pousin. Ti guata toro niein, kari uah. ²⁴ eGe a keketik peener nouguo ke mat, kare tua tapokis poluk. Inggono ke heil, kara tuparain.’ Song ka uakekenasina tar uah.”

²⁵ “Tar binakon a tunon ger uoum e uangoul tar iom. Inggono ke me la uahuhut tar um, kare longoro tasir tamata ra kerekere pe, kara doum. ²⁶ Maeit inggono ke kila tar tang siokor tamatang kalekinale, kare dangata tatanono pare. ‘A hauela ra guatain?’ ²⁷ Kare mene hahauono pare, ‘Tahimua ke pokos, doh tamoumua ke uiliatung pous tar kau ger kalan. Ter hauono inggono ke me udeil pokos.”

²⁸ “Gitir uoum ke tokouasain, kare de tar lekela ium. Temaeit tamanono ke tauete uelhirila, kare la uamamahoul tatanon. ²⁹ Bo inggono puk ke mene tapokis tang tamana pare, ‘Bang! Ke la pe mer mamang krismas, inggono ku kalkalekinale pukumpe totomua, doh ahik

pahu longlongoro boho tereng nimalara. Doh ingga ahikimpe mato heir baka tagu totoguo me kalanar me maru guata mo nein, karu uauaha keip tagu toso bung kaloug. ³⁰Bo tar binaka puk ke uakapa keipir tumuaene tenang mamang inetelikia tasir kuaha re ura pe, kare inum keip, kare lame, ingga ko uiliatung pous ueleheir tatanono tar kau ger niualaein uauleik siok.”

³¹“Doh tamanono ke kula pare, ‘Inggar tug! Ingga ko uangoul ualataun keip totoguo, doha mamang inetelikir nouguo a noumua. ³²Maeit auia tagigeig tar uah, ge tahimua pe ke mat, kare tua tapokis, doh inggono ke heil, kara uel-tupara tapokisin.”

O Mahar 16

A tamatang kauek ger tang iate

16 Iesu ke hire tosono tamatang uakuakeluk pare, “A tang siokor tamat a tang mani ura uangoul mena tamatang kaueke tena mamang inetelikion. A siokor binak, gitir tamatang kaueke ka tohotolain pare, ke ueluelour tena inete na tamata uleik. ²Maeit ke kila ualekelar tang mani tatanon ium, kare dangata pare, ‘A hauene ku longoro koutuio totomua? O bolo uakalahara tun hape ko guata keip pe tenag ineto. Ter hauon ingga ahik baka poluk paho turung kaueke tenag mamang inetelikio.”

³“Doha tamatang kaueke ke kula katongoin pare, ‘Nag tamata uleikio ke uakapa totoguo tar kalekinale. A haua paku guataio? Inggo ahik paha tampopokoho tar koho tar tung, doh inggo u matala pono tar dangata me nipoul. ⁴Bo inggo u ate manasa tar haua ru guatain, maeit getu kapo tenagu kalekinale, o tamata ra turung kilauatorompela totoguo iuma tonosio um.”

⁵“Temaeit ke kila tang sisioikono tasir tamatasit ka kalkale puk baka tar inet tena tamata uleikion, kare dangata tar uakikilanganar tamata pare, ‘A touiha uamatoto ko kalkale pukusia tenag tamata uleikio?’ ⁶Kare mene hahauaono pare, ‘A 3,200ir lita tar uaiuaianar oliv.’ Song ke kular tamatang kaueke pare, ‘O kaleme tenang bolobol, tabila uahiua ualahur, karo bolome 1,200ir lita tar uaiuaianar oliv.”

⁷“Kare dangatono tar uatang torikina pare, ‘A touiha uamatoto ko kalkale puk bakaisia tenag tamata uleikio?’ Kare mene hahauaono pare. ‘Inggo ku kalkale puk toro 100 ro beik raes-uit.’ Kare hireono tatanono pare, ‘Kale tonongo bolobol, karo bolo puk me tualir hangaul ro beik raes-uit.”

⁸“Doh na tamata uleikiono ke meneng uairana tena tamatang kaueke ger bohoboh, teeit inggono ke guata keip tun tena niate. Inggo u kula pare, ter hauon o tamatang tar kot, gisin o tang iate tun hape ra kalekinale uaia peane i kot, bo no tamata God ahik pah ra ate uaia tun tagu.”

⁹Kare kula Iesu pare, “Inggo u hire totomua. Guata keip tenang mamang inetelikane tar kot tar poul tasir tamata maro matakaluana tasisin, temaeit geta hik manasa ingga menang inete baka poluk, ingga ra turung kilauatoroia i Heuen.”

¹⁰f“Mai kompe ger uauamana tar kaueke uaia tar ineter sasalik, inggon e banoto pono tar kaueke uaia tar bureher inet. Mai kompe ge ahik paha uauamana tar kaueke tar ineter sasalik, inggon ahik pahe banotong kaueke pono tar bureher inet. ¹¹Temaeit ge ahikia pah ko kaueke uaia tar mamang inetelikane i kot, ahik me tamata re banotong dangata totomua o kaueka tar ineter i ra-

nar bulauanane ger man re la turuha i Heuen. ¹²Doh geta hikia mato kaueke uaia menas ineter gisiamah, maingua re turung heir menang ineta.”

¹³g“Ahik me tamata re banot e kalekinale tar tang torikir tamata uleik. Gere guatono paar, inggon e turung tokouasain tar tang siok, kare malara tar tang giameh ue inggon e turung longoro puk tar uakikilanganar tamata uleik, kare de tar uangang torikin. Inggoum ahik pah mu banoto mu kalekinale keip tokaha tang God, doha mani.”

¹⁴O Parisi gera malarantiehe tun tar mani ka longoro tar inetenin, kara meneng uelsigala tang Iesu, ¹⁵h^kkare kulono tasisina pare, “Inggoumene mu uahingo tasir tamata tar namana pare, inggoum o kodkodoho tun tar matasisin, bo God e ate uaia tun tar koloumiuoum, a inete re malarantiehe tunigir tamat, gininanine tere ueluelde tunig God.”

A giameher niualasir

¹⁶i“A ualatur, doh nas nimener propet ka uakelukig ke me tuka tena binaka Jon ger tang uahuhu. Maeit i muduhia tena binaka Jon, o Uelhire Uaia tena Nitoia God ka mene tauete manasain, doho mamang tamatalik ra petutup tar lekala. ¹⁷jGe i rana pe, dohi kot ura banotong rou, bo gane puk tena ualatur God, ahik me sikir nibolbolono re turung rou.”

¹⁸“Ge me tang sioko ke ueluelu liu tena kuah, kare le tar tang giameher kuah, inggono ke guata toro ur, kare guata uasa tena kuah, doha bulout gere le tar kuaha geke le baka uoum, kara hiliuin, inggono ke guata pono toro ur.”

A tamata ger tang mani, doh Lasarus

¹⁹Iesu ke hire pare, “A tang siokor tang mani gere hiku teil toro gomono

tabeliaha mataia tun, inggon e uangoul uaia keip tena bureher inete tar mamang binakalik. ²⁰⁻²¹Doh gaat tono piriking lekon, a niuatabilar tiome a hangana tang Lasarus, inggono na bureher loto ke uiloho uakapa tar tuku-nun, doho lo ka lame, kara me deimdeim tena loton. Doh inggon e marang ein me mokomoko gere puna tar tono tebouling einir tang mani. ²²Tar binaka ke mater tiome, kara huatalar angelou tatanono e la tabil tagu tang Abraham i Heuen. Doh gitir tang mani ke mata pon, kara keuin. ²³Inggono ke la i Hel, dohe uelmahingintiehe tunin. Song ke banga huara tolaono tang Lasarus e uairehentiehe re uangoul tagu pe tang Abraham. ²⁴Song ke kilar tang mani tang Abraham pare, ‘Papa Abraham o uel-dolomo baka totoguo, karo ualatur tang Lasarus tar uabutuko tar lulunar kamot liman i lolono tar kodom, kare me uarigirig tar miouguo. Ter hauon inggo ke uelmahingintiehe tunio toro hue rone.’

²⁵Bo Abraham puk ke mene hahau pare, ‘Inggar tug! O namana huara tapokis tenang niuangoul tar binaka ro tua, ingga ko kale manasa tenang mamang inetelik ger uia, bo Lasarus ke kale tar inetenitir sa, doh daan inggon e uangoul uiaane, bo ingga e uelmahingintiehe tunuia. ²⁶Dohi uantinanina tamiueim, kare tamiuoum e mokor hagar ger uleikintiehe tun, temaeit ahik me tamata re banoto tar lako totomua, doh ahik me tang sioko tamiuoum re banot e laha tamiueim.’

²⁷Song ke mene hahaua polukur tang mani pare, ‘Inggou dangata poluk totomua tamoug pare, ualatur tang Lasarus e la tena uma tamouguo, ²⁸ge a tang tolina per tahiguo ura uangoul

⁸16:13 Mat 6.24 ^h16:15 Mat 23.28; Luk 18.9-14 ⁱ16:16 Mat 11.12-13

^j16:17 Mat 5.18

harah. Hire tatanon e uatagin tasisina tar uaning uelmahingene mara hikisina pah ra lameane tar binaka ra mat.'

²⁹ Abraham ke mene hahau pare, 'Gisina ka ate manasa tono uelhire Moses, doh tasir propet geta malarasina ra turung uakeluk taninin.'

³⁰ Kare kular tang mani pare, 'Ahik! Inggga a tamamiueim uakap. Bo gete me tang sioko ke mata uoum, e la hire tasisina mara longorosina tatanon, song ra uapalih.'

³¹ Kare kula Abraham tatanono pare, 'Geka mahang longorosina toro uelhire tang Moses, doh tasir propet, gisin ahikimpe pah ra turung longoro gete lamer tamata geke mata uoum.'"

O Mahar 17

A niualasir tar niguata uasa

17 Iesu ke kula tosno tamatang uakuakeluk pare, "O mana tun a uedanga tasir tamata mara guata tar niguata uasa, e turung lame. Bo a tamata puk gere uakotpokoso tar niuedanganin e tagin teil, God e turung uauelmahingintiehe tun tar tamaton. ²Gete guatono me tang siokor keketik mare guata tar niguat uasa, auiantiehe tun geta turung uih tane tolain mo palaua uleikintiehe tun toro uekuekon, kara uadudurin i laur. ³kTemaeit mu kaueke uaia katongosioum. Geke guata uasa tahimua, ingga o uelkukur tatanon, doh gete uel-dolomion, kare uapalih tena niguata uasa, ingga o kusa luara liu tena niguata uasaon. ⁴Gete guata uasaono totomua tar mouitir binaka tar siokor marein, kare la tapokisihia totomua tar mouitir binak, kare me kula pare, 'inggo u uel-dolomo tun, karu uapalih.' Inggga o kusa luara liu tena niguata uasaon."

A nitagorong man

⁵O aposoul ka kula tar Tamat Nomanapare, "Uauleik teremi nitagorong maneim!"

⁶Kare mene hahauono pare, "Geta sasalik remi nitagorong manoum misiana sira tar uatunar mastet, inggoum mu banotong kula toro kakariouon rone pare, 'Us kai katongoia, karo la lebeia i laur!' Doh roono ro douk o turung longoro tamiuoum."

A tamatang kalekinale

⁷"Gete me tang sioko tamiuoum mena tamatang kalekinale re tau tar kot ue e kaukaueke tasir sipsip. Inggon ahik pahe kula tena tamatang kalekinale tar binaka re la tapokis tur peha tar iomo pare, 'Languahane, karo tabila uahiu tagu tar binakang ein.' ⁸Bo Inggon e turung kula pare, 'Kaleuatoro tereg nieino, karo sik ueleheir tereg nieinio maru ein, karu inum. I muduhia song ro banotong einia, karo inum.' ⁹Inggon ahik pahe heir me niuaha re uauia tena tamatang kalekinale ke guata uakeluk pe tar haua ka ualatohoin tatanono tar guat. ¹⁰Doh inggono ter siokono kompe tamiuoum tar binaka rung guata uakapa tar mamang inetelik geka hireig tamiuoum mu guat. Inggoum pakung kula pare, 'Inggeim o tamatang kalekinale ueltebeir pukumpe, bo mi guata kompe tar kalekinale ka heirin tamiueim tar guat.'"

A hangaulur toba ka uauiais

¹¹Tar binaka re haijala Iesu i Jerusalem, inggono ke lihila toro tui i uantinanin i Samaria dohi Galili. ¹²Git re lang la manasa peko inggon i koboro tar siokor uan, doha hangaulur tamata gesir toba ka me ueltupar tatanon.

^k17:3 Mat 18.15 ¹17:6 Mat 17.20; 21.21

Gisina ka tur i rehe sikor, ¹³m^kkara kula ualeik pare, “Iesu ingga a tamata uleik o ueldolomo tamiueim!”

¹⁴n^TTar binaka ke banga Iesu tasisin, inggono ke kula pare, “Mu la, karung la ualasira katongosioum tasir pater.”

Doh gine ra la pelasin, gisina ka uia manas. ¹⁵Doha tang sioko tasisina ke banga ke uia pe, kare la tapokisime. Ingon e menene ualeik teil re uatuatakai pe tang God. ¹⁶Inggono ke me baka uahiuanane i kot tar kekena Iesu, kare kulang uauia tun tatanon. Doh inggon a peng Samaria. ¹⁷Doh Iesu ke dangata pare, “Inggo ku uauia tasir hangaulur tamat, iareisir gime lusior tamat? ¹⁸Ahik me tang sioko ke tapokisime tar me heir me uatakai tang God te gine puk manasar peng gime uan.” ¹⁹Kare kula Iesu tatanono pare, “Tur kai karo la. God ke uauia totomua ter hauon ingga ko tagorong man.”

Na Nitoia God e turung laha

²⁰A siokor binak o Parisi ka dangata tang Iesu pare, “Mangihar binaka re turung laha na Nitoia God.”

Doh Iesu ke mene hahaua pare, “Ahik me inete ra turung ualasira uakalahara toin gete laha na Nitoia God. ²¹Ahik me tamata re turung kula pare, inggon ginehiae ue gitiehiae, ter hauon na Nitoia God e mok i uantinana tamiuoum.”

²²Song ke kula poluk Iesu tosno tamatang uakuakeluk pare, “A binak e turung lame, doh inggoum mu turung malahirintiehe tun tar marang banga tena mareinir Tunar Tamat, bo inggoum puk ahik pah mu turung bang luar. ²³o^O tamata ra turung hire tamiuoum pare, ‘A Tunar Tamata gitie ue inggono gine.’ Bo inggoum puk ahik pah mu tagorong

man, karung ualo uakeluk tasisin. ²⁴Ge na marein per Tunar Tamat e turung pe sira tar kanau gere balbala uelkaruse, kare turung uabalo kai i rana tar hagar e la tur tar giameher surun e la tuka tar giameher surun. ²⁵Bo tar uakikilangana puk, a Tunar Tamat e turung kale tur baka uoum me bureher niduh tar bureher inet, doho tamatang daana ra turung ueluelde tatanon.”

²⁶“Na mareinir Tunar Tamat e turung ngohina sira kompe tena marein Noa. ²⁷O tamata ra ein, ra inum, kara uelueleis ke la tukampe tar marein ke la leka pe Noa tena parau. Song ko languaha ro silu uleik, karo binopo tasisina uakap. ²⁸p^PInggono a siokono tena marein Lot. O tamat ra ein, kara inum, kara uabulau, doh ra leb, kara tuha um. ²⁹Bo a marein pukuoneit ke hiliu Lot i Sodom, ko laha ro hue doha palauaniritir ngangaua ke tadura turuha i Heuen, karo me binopo uakapa tasisin. ³⁰Ingon e turung siokono sira kompe tena mareinir Tunar Tamat gete kotpokoso uakalahar.”

³¹q^q“Tar binakon a tamata gere uan-goul i rana tena um, doh na ineton e mok ium, inggon ahik pahe banot e hiuo uelhir baka poluk tar la kale taninin. Doha tamata gere uangoul tar iom, ahik baka poluk pahe la tapokis tena um tar la kale mena inet.”

³²r^r“Mu namana huara tena kuaha Lot. ³³s^SMai gere uedanga tar kusa uanono tena nitua, na nituaono e turung rou. Doh mai gere uamaluana tena nitua ra kale liuin, inggon e turung kale tapokis. ³⁴Inggo gine ru hire tamiuoum tar boun-goneit, a tang torikir tamat ura turung rikin toro sioko ro uat. A tang siok ra turung kalein, kara turung hiliuinir tang

^m17:13 KT 13.45-46 ⁿ17:14 KT 14.2-3; Mat 8.3-4

^o17:23 Mak 13.21; Luk 21.8 ^p17:28 Uak 18.20; 19.25

^q17:31 Mat 24.17-18 ^r17:32 Uak 19.17,26 ^s17:33 Luk 9.24

giameh. ³⁵A tang torikir kuah ura turung uiuir tar sokong kukuanar raes-uit. A tang sioko ra turung kalein, kara turung hiliuinir tang giameh.” ³⁶(-)

³⁷O tamatang uakuakeluk ka longor, kara dangata pare. “Ir Tamata Noman! Ia re pokoso tor puhon.”

Kare mene hahaua Iesu pare, “Me buturumpe gere rikin me tukununar mat ter buturono tera me pepe totor manubasine ra ein pe tasir mat.”

O Mahar 18

O uelhire uaranga tar kuaha nimata liu

18 ^tSong ke hire Iesu tosno tamatang uakuakeluk toro uelhire uaranga mare ualasira tasisina tar lotu keip dede tar nitagorong man, doh ahik pah ra uakenua kout. ²Iesu ke kula pare, “I lolono tar siokor uan e uangoulur tamatang kedang ge ahik pahe sokoro tang God, kara hik pahe namana tagu tasir tamat. ³Doh tar uanion e uangoul ponor kuah a nimata liu. Inggon e uoto lame tar tamatang kedangan, kare me uoto kula pare, ‘O uakodkodoho uaia keip baka totoguo menia tenag uelmatan.’ ⁴⁻⁵Tar uakikilangan, a tamatang kedanga ke ueluelde baka tar poul, bo tar uadouhina puk inggono ke kula katongoin pare, ‘Inggon ahik nomana pahu sokoro tang God, kara hik pono pahu namanantiehe tasir tamat. Bo a kuaha pukener nimata liu e heir dede totoguo tar niduh. Inggon deh paku poul tatanono mare kale tar niuia mara hikiono pahe uamanguh totoguo re la totouaha peme.”

⁶Kare kular Tamata Nomana pare, “Ualongoro ke kula per tamatang kedanga ge ahik paha kodkodoh. Inggono ke heir tar kuaha tar

nikodoho ke malarain. ⁷Ge God pe e uakodkodoho uateuele tun tosno tamata geke uamatotois gera lotu dede tar mamang marein, doh tar boung ra hinggo pe me nikodoho tatanon. ⁸Doh inggo gine ru hire tamiuoum pare, God e turung uakotpokoso uateuele tar nikodkodoho tasisin, bo hape puk gete lahar Tunar Tamatane tar kot, inggon e me tuparampe mo tamata ra tagorong mana tatanon.”

O uelhire uaranga tar Parisi, doha tamatang kale tar takis

⁹O gisiameher tamata ra tagorong mana katongois pare, tesir tamata kodkodohontieh, kara touahiua tasir mamang tamata ueltebeir. Doh Iesu ke hire tasisina toro uelhire uaranga pare, ¹⁰“A tang torikir tamata kura la taro tar umang lotu ger dedeil tar la lotu. A tang siokor Parisi, doha tang giamehe a tamatang kale takis. ¹¹Gitir Parisi ke tur kai, kare lotu uatuha tatana pare, ‘God inggo u kulang uauia tun totomua, teeit inggo ahik pah misiana tasir gisiameher tamata gesir ueuenau, karo tamata uasa, kare gisis ra ura keip tasir le. Doh inggo ahik pono pah ngohina tagu tar tamatang kale takiseitie. ¹²“Inggon u uoto ueil uatorik tar siokor uik, karu uoto heir totomua tar sisisiokor hangaul ro mahar tar mamang inetelik ku kaleig.”

^{13v}“Bo git pukur tamatang kale takis e tur uairehe sikoro kompe. Inggon ahik pahe bang a kai sikor i Heuen, bo ke nun kompe toro uaruaron, kare kula pare, ‘God, o ueldolomoha totoguo, ge inggo pe a tamata uasa.’ ^{14w}Inggon gine ru hire tamiuoum tar binaka re la tapokisir tamatang kale takisene tena um, inggono puk manasampe ter tamata kod-

^t18:1 Kol 4.2; 1Te 5.17 ^u18:12 Ais 58.1-4; Mat 23.23 ^v18:13 Ker 51.1

^w18:14 Mat 23.12

kodoho tar matana God. Ge a tamata pe gere uairana katongoin, inggono ra turung touahiuain, doh mai gere touahiua katongoin, inggono ra turung uairanain.”

Iesu ke guata uaia tasir keketik

¹⁵O tamata ka keip pome tasir guama mesir keketik tang Iesu mare me uaponono tar limana tasisin. Doh tar binaka ka bangar tamatang uakuakeluk pare, kara uakuakur tasisin. ¹⁶Bo Iesu puk ke kilala tasir keketik tatan, kare kula pare, “Ahik pah mu kula tane tasisin, uamaluaana tasir keketik gera lame totoguo, ge na Nitoia pe God a nosir keketik sira pare. ¹⁷^xInggo gine ru hire tamiuoum toro man, a tamata ge ahik pahe kale tena Nitoia God misiana sira tasir keketik, inggon ahik pahe banot e leka tagula.”

A tamata uleik ger tang mani

¹⁸^yA tang siokor tamata uleik ke dangata tang Iesu pare, “Ir Tang Ualasil, ingga a tamata uaia tun. A haua paku guataio tar kale tar nitua gere moko dede.”

¹⁹Kare mene hahaua Iesu pare, “Ae maeit ro kila totoguo a tamata uaia tun? Ahik deh me tamatar uia te God puk manasampe me pahen. ²⁰Ingga o ate tar ualatut e kula pare, ‘Ahik paho ura keip tasir le, ahik paho uiliatung pous, ahik paho uenau, ahik paho boho tola, ueltada tang tamoum, doh tinoum.’” *Kale*

Tapokis 20.12; Ualatut 5.6

²¹Kare kula tapokisir tamata pare, “Tar binaka ru keketikio e me tukene daan, ginina uakapanine ku uakelukumegio.”

²²Tar binaka ke longoro Iesu, kare kula tatanono pare, “Ingga o katupa harahampe tar siokor inet. Uabulaua liu tenang mamang inetelik ge kaeig, karo heir tar mani tasir tiome mare turung burehentiehe me nang inete uaia ingga i Heuen, song ro uakelukumeane totoguo.”

²³Tar binaka ke longorono pare, inggono ke me hagouo uaduh tun, teeit inggono na burehentieher inet.

²⁴Iesu ke banga tatanon, kare kula pare, “A parakukuhuntiehe tun tar tang mani tar lekala tena Nitoia God. ²⁵Bor kamel e banoto tar hikula tar tapokosonar harum, ahik pahe parakukuh sirain tar tang mani gere marang lekala tena Nitoia God.”

²⁶Gisis ka longor, kara dangatangua tang Iesu pare, “Bo maingua ra banotong uelkarusin.”

²⁷Doh Iesu ke mene hahaua pare, “A haua re matoto leuinir tamata tar guat, God e banot e guat.”

²⁸Doh Pita ke kula tatanono pare, “Ualongor! Inggeim king hiliu tenami mamang inetelik, karing me uakeluk totomua.”

²⁹Kare kula tapokis Iesu pare, “Inggo gine ru hire tamiuoum toro man. A tamata gere namana tena Nitoia God, maeit ke hiliu tena uan ue na kuaha ue o bung tahin ue taman ue tinana ue o bung tun, ³⁰inggono e turung kale uaburehentiehe tun tar inetenanine tar binakalachine, kare turung kalengua ponompe tar nituang tar mamang binakalikininit re lame.”

Iesu ke kula poluk pare, e turung mat

³¹^zIesu ke kila toto sioko baka tasir hangaul, doha tang torikir tamatang uakuakeluk, kare me hire tasisina pare, “Ualongor! Inggeig i la taro i Jerusalem,

doha mamang inetelikinit geke bolo uatuhalaigir propet tar Tunar Tamat, ginin e turung kotpokoso tun toro man. ³²aInggono ra turung heirin tar limasir tamata ge ahik paho Ju. Doh gisina ra turung uauanet, kara loulou tatanon, kara kalkalopisin, kara uiliatung pous tatanon, ³³bo tar uatouononor marein puk inggon e turung tua tapokis.”

³⁴bBo gisina puk ahik pah ka naman manate tar tengkanar puhon, teeit a tengkanar puhono ka uaouoin, kara hikinguasina pah ka ate tar haua ke hireion.

Iesu ke uauia tar tamata kut

³⁵Gine re la uahuhut manasa peko Iesu i Jeriko, doha tamat a kut e tabila tar tektekenar lel, kare hinga inet. ³⁶Tar binaka ke longorono tasir manai tamata ka me la pela, kare dangata pare, “A hauene ke kotpokos.”

³⁷Kara hiresina tatanono pare, “Iesu ger peng Nasaret git re haijala tar lel.”

³⁸Kare kula ualeikinguano pare, “Iesu ger tuna Debit o ueldolomo to-toguo!” ³⁹Gisit ra uoum teil ka loulouar, kara kula tatanon e pepe bukuk. Bo inggono puk ke kula ualeikintiehe uain pare, “A tuna Debit, o ueldolomo to-toguo!”

⁴⁰Iesu ke tur, kare hire tasir tamata ra la keipime tatanon. Tar binaka ke la uahuhutumeon, kare dangata Iesu tatanono pare, ⁴¹“Ingga o malara a haua ru guataio totomua.”

Kare kula tapokisone pare, “Tamata Noman, inggo u marang bang!”

⁴²Kare kula Iesu tatanono pare, “O banga puk manas, reng nitagorong mana ke uauia totomua.” ⁴³Ahik me sikir manasan, kare bangar tamataner kut, kare uakelukunga tang Iesu e uatatakai teil

tang God. Tar binaka ka bangar tamata uakapa tar haua ke kotpokos, gisina ka uatakai pono tang God.

O Mahar 19

Sakeus ger tamatang kale tar takis

19 Iesu ke lekala i Jeriko, kare haijala i uantinanina tar uan.

²Doha tamat e uangoul tar uanion a hangana tang Sakeus. Inggono nas uleikir tamatang kale tar takis, doh inggon a tang mani. ³Inggon e marang banga uasa tun maionene Iesu, bo teeit kompe a tamata puhina peon, maeit ahik pahe banot e bang huar, doh teene pon o manai per tamat. ⁴Doh Iesu e lihime tar lelou, temaeit ke ualolaon i uoum, kare la moto toro douk fig mare bang huarala.

⁵Tar binaka ke me la matoto Iesu tang Sakeus, kare tada kai taro i ran, kare kula tatanono pare, “Sakeus o hiuo ualahur puk manasampehaene daan. Inggo u la uangoul tun bakampe daana tenang uma.”

⁶Maeit Sakeus ke longoro kompe, kare hiu, kare me kila keip tang Iesu tar niuah. ⁷cO mamang tamata uakapa ka banga tar puhon, kara uakekena tar ueluelmene pare, “E la tun manasampeono tena umar tamateitir sa.”

⁸dBo Sakeus puk ke tentur kai, kare kula pare, “Bangar Tamata Noman! Inggo gine manasa ru heir tar maharanar mamang inetelikininer noug e la tasir tiome, doh getu boho me tamata me inet. Inggo u turung bulaua uatoueit tapokis tar bulauana ro boh.”

⁹eMaeit ke kula Iesu tatanono pare, “Daan ke laha God tar uelkarus tamiuoum tar umene, teene a tamatane a tuna pono Abraham. ¹⁰fGe a Tuna per Tamat

^a18:32 Luk 9.22,44 ^b18:34 Mak 9.32 ^c19:7 Luk 15.2 ^d19:8 KT 22.1; Aha 5.6-7 ^e19:9 Luk 13.16; Apo 16.31 ^f19:10 Luk 15.4; Jon 3.17; 1Ti 1.15

ke lame tar me sir uelhir, kare uelkarus tasir tamata geka heil sira tasir sipsip.”

O uelhire uaranga tar hangaulur mani

¹¹Tar binaka ra ualongoror tamata tena niualasira Iesu, inggono ke hire tasisina toro uelhire uarang, teene inggono ke uahuhut i Jerusalem, doho tamata ra namana pare, na Nitoia God e turung pokoso puk manasampe. ¹²Kare kula Iesu pare, “A tamata gere la tur toro matina toia ke kaleuatoro tar la tar giameher pang uan gere uairehentieh. Inggono ke haijala mara la ua-toia toin tar pang uanion, song re turung la tapokisime. ¹³Tar binaka ke marang hiliuion, inggono ke kila baka tosno hangaulur tamatang kalekinale, kare heir tasisina tar 20 kina hahai, kare kula tasisina pare, ‘Mu uamoko tar maninine mare poho uabureh, e tuka getu tapokisimeo.’ ¹⁴Bo o tamatan tena uan pukion e tokouasais tatanono temaeit gisina ka ualatué uakeluk tasir tamata ra la uakeluk tatanon, tar la kula pare, ‘Inggeim mi de tar tamatane mata kotpokoso sira pare, nami toiaeim.’”

¹⁵“Bo inggono ka uatoiampein, song ke la tapokis tena uan. Maeit inggono ke kilame tasir tamatang kalekinalesit geka heiris tar mani mare ate a touiha ka uakotpokosoigisin. ¹⁶A uakikilangannar tamata ke lame, kare me kula pare, ‘Ir Tamata Uleik, inggo ku uapoho uanoto tar 200 kina tar mani geko heiria.’ ¹⁷⁸Doh na tamata uleikiono ke mene hahaua pare ‘Nag tamatang kalekinaleo, ingga ko guata uaia tun! Teeit ko kalekinale uaia keip pea tar mani ger sasalik tun, temaeit gine daan inggo u uamatoto totomua ter tamatang kauেকে tar hangaulur uan uleik.’”

¹⁸“Kare la polukuhar uatang torikinar tamatang kalekinale, kare me kula

pare, ‘Ir Tamata Uleik, inggo ku uapoho uanoto tar 100 kina tar mani geko heiria.’ ¹⁹Kare mene hahaua na tamata uleikiono pare, ‘Auia tun! Inggono u uamatoto totomua ter tamatang kauেকে tar tolimar uan uleik.’”

²⁰“Doha tang giameher tamatang kalekinale ke la polukuha, kare me kula pare, ‘Ir Tamata Uleik! Kale tenang maniene, inggo ku gomo uaouo taninina toro mahar gomon, karu uamok. ²¹Inggono ku sokoro totomua, teene a ualasokoro pe ingga. Inggono o uoto kale uahuara puk tar haua re kotpokoso tur tenas kalekinaler gisiamehe geka guataig.’”

²²“Kare kula na tamata uleikiono tatanono pare, ‘Inggono a sa! Inggono u kedanga keip totomua tenang uelhire katong. Inggono a tamatang kalekinale uasa, Inggono ko ate pare, inggo a tamat a ualasokor, karu kale uahuara puk tar haua re kotpokoso tur tenas kalekinaler gisiamehe geka guataig. ²³Ae maeit ahikia mato la uamokola tenag manio tar umang mani maru me kaleo me mani geke poho uahahaua tar binaka getu la tapokisime?’ ²⁴Kare kular toia tasir gisiameher tamatang kalekinale pare, ‘Kale liu tar mani tatanon, kara heirig tar tamatang kalekinale geke uapoho uanoto tar 200 kina.’”

²⁵“Kara kulasina pare, ‘Ahik dehonor tamata uleik, inggono deh ke kale manasa tar 200 kina!’”

²⁶^hKare kular toia pare, “Inggono gine ru hire pare, maisir tamata geka kalekinale keip uaia tenas bureher inet, gisina ra turung heir uaburehe ponois. Bosir tamata ge ahik pah ka kalekinale keip uaia tenas inet ue gete kae manasa uoumig menas inetesin, ginina ra turung siokor kale liuig. ²⁷Bo mu ueliu pukumeane tos nogo uelmatanio geka ueluelde matu

toiao tasisin, kara me uiliatung pouis toisisinane i uoum totaguo.”

²⁸ I muduhia ke mene uakapa baka pe Iesu, kare la uoumungalala i Jerusalem.

Iesu ke kaleuatoro tar lekala i Jerusalem misiana tar toia

²⁹ Git re lang uahuhut manasa pe Iesu i Betpage, dohi Betani geura uahuhut tar siusan gera kilain a Siusanang Oliv, Iesu ke ualatue tena toking uakuakeluk, kare kula pare, ³⁰ “Raoum mura la tar uaneit i uoumuhia, kaura la lekala ium, kaura la tupara tar donki kalan a nisanga uatur. Inggon ahik me tang siokor tamata ke panete baka uoum tatanon. Luaka tatanon, kara keipimeinane. ³¹ Gete me tang sioko re me dangata tamiraoum pare, ‘Ae maeit kura luaka raoum tatanon?’ Mura hire tatanono pare, ‘A Tamata Noman e malara tatanon.’”

³² Maeit rasina kura la, kaura la tupara sira re moko per mamang inetelik ka hire peis. ³³ Gine ura luaka tur pe rasina tar donki. Tanener donki ke dangata tasrasina pare, “Ae maeit ura luaka liu raoum tar donki.”

³⁴ Kaura mene hahaua rasina pare, “A Tamata Noman e malar e kalekinale keip tatanon.” ³⁵ Doh rasina kura me ueliuime tatanono tang Iesu. Kaura baka uaponala tenasira hikhiku i rana toro pinenar donki, kaura poul tar uapanete tang Iesu tar donki.

³⁶ Git ke la manasa peko Iesu, o tamata ka heig tenas hikhiku tar lel. ³⁷ Doh tar binaka ke me la uahuhutiono tar lele gere la uahiuako tar Siusan i Oliv, no tamatang uakuakeluk Iesusitir manai ka siokor uatakai keip tar niuaha uleik, kara kulkula ualeik, teene ka banga pesina tar bureher nitouo geke guataig Iesu.

³⁸ Gisina ra kulkula pare,

“A niguata uaia e la tar toiaene geke laha tar hanganar Tamata Noman! O hiarou o mok i Heuen, doh inggeig i uatakai, kari uoungono tar hangana God ger i ranantiehe tun!” *Ker 118.26*

³⁹ O gisiameher Parisi geke uangoul tagu tasir manai tamata ka kula pare tang Iesu, “Ir Tang Ualasis, ingga o uelkukur tosono tamatang uakuakeluk tar puhene ra kulainisin.” ⁴⁰ Kare mene hahauono tasisina pare, “Inggone ru hire tamiuoum geta uangoul bukukusin, a paluanine tere turung kaling ualeik!”

Iesu ke kiring tasir tamatang Jerusalem

⁴¹ Gine re lang pokoso peko Iesu i Jerusalem, kare banga tar uan uleik, inggono ke kiring e ueldolom, kare kula pare, ⁴² “Ge pake gine mu ate tanikoum daana tar haua re banot e heir toro uelhiarou, bo ka touaouo pukin tar matamiuoum. ⁴³ A binak e turung la tunuha tamiuoum, doh nomio uelmatanioum ra turung turtur uiloho tane tar koto tamiuoum mara hikioum pah mu banotong ualo tauete liu. ⁴⁴ Doh gisina ra turung ueh uatamtamiana to tamiuoum i koto menia toso bung tumiu i koboro tenami uan uleikoum, kara siokor mamantouo tar uan uleikene, teene inggoum ahik matung bang paroko tar binaka ger nang God ke la peha tamiuoum.”

Iesu ke geil liu tur tasir tamata tar umang lotu ger dedeil

⁴⁵ Song ke la lekala Iesu tar umang lotu ger dedeil, kare la geil tauete tasisin ra uabulbulaua to tar inet ium. ⁴⁶ Kare hire tasisina pare, “No uelhire God gero nibol o kula pare, ‘Nag umo a uma ra turung lotu toin.’”

Bo inggoum kung guata sira tar umon a nosir ueuenau.” *Aisaia 56.7; Jeramaia 7.11*

⁴⁷^kDoha mamang mareinilik Iesu e ualualasira to tar umang lotuono ger dedeil. Bo o patere uleik puk, doho tamatang ualualasira tar ualutut mesir gisiamer tamata uleik ka uedanga tar marang uiliatung pous tang Iesu. ⁴⁸Bo ahik puk pah ka tupara me hagar mara guat, teene o tamata ra marang ualongoro uaia tun tar hauanine ke meneig Iesu.

O Mahar 20

Nosio tamata uleikir Ju ka dangata tang Iesu

20 A siokor binakene re ualalasira to pe Iesu tar buturung uelpokosane iuma tar umang lotu ger dedeil, inggono ke la mene tauete toro Uelhire Uaia, doho patere uleik mesir tamatang ualualasira tar ualutut, karo gisiamer ponor mamahoholik ka siokor lame tatanon, ²kara kula tang Iesu pare, “Hire tamiueim tang mai ke uatohangana totomua, doh mai ke heir totomua tar nitampopokoh, maeit ko guata tar inetenine.”

³Kare mene hahauono pare, “Inggo u dangatangua pono tamiuoum tar nidangat, mu hire totoquo, ⁴mai ke heir tar nitampopokoho tang Jon tar uahuhu tasir tamat, God ke heir ue o tamata puk.”

⁵Gisina ka ueluelmene katongois pare, “Hape geti mene hahaeig pare, a nitampopokohor nang Jon e la tur tang God, song re turung dangatono tagigeig pare, ae maeit ahikioum matung tagorong mana tatanon? ⁶Bo geti kula hahaeig pare, a nitampopokohoneit tang Jon e la turume tasir tamat, doho tamata uakapa tun ra turung bakbak pous tagigeig tar palau, ter hauon

gisina ra tagorong mana tun tang Jon a propet.” ⁷Maeit ka kulasina pare tang Iesu. “Inggeim mi tel, ia re la tur na nitampopokoho Jon.”

⁸Kare kula Iesu tasisina pare, “Gine ahik peoum pah mu hire tapokis totoquo, temaeit inggo ahik pono pahu hire tamiuoum, ia re la turur nitampopokohene ru guata keipio tar inetenine.”

O uelhire uaranga tasir tamata gera kaueke tar iomo bino

⁹Inggono ke mene dedempela tar hire tasir tamata toro uelhire uaranga rone pare. “A tang siokor tamata ke lebe tena iomo bino, kare heir baka tasir gisiamer tamata ra kaueke uan-goul, kare hiliu ke la i reh, ke la uan-goul tar puhung barah. ¹⁰Doh tar binaka ke uelmurakar bino, inggono ke ualutue tena tang siokor tamatang kalekinale e la tasir tamatisina ra kauek. Inggono ke malauelhir tasisina ra la heirime tatanono me giniamer kukuanar bino. Bo o tamatang kaueke puk ka halhaluh tatanon, kara uelueltula liu tatanon ahik mata kale bak. ¹¹Inggono ke ualutue poluk tar tang giameh, doh inggono ka la uiliatung ponoin, kara uamatalain, doh ke la tapokis puk ahik mata kale baka me inet. ¹²Doh tanener iomo ke ualutue poluk tar uatang touononar tamat, doh inggono ka uiliatung uadeuatingin, kara baka tauetein.”

¹³Kare la kular tanener lebe bino pare, “A hauangua paku guataio? Inggo u turung ualutue tar tug geru malauelhir-intiehein. Song tera la ueltada to no-manasina tar tuguo.”

¹⁴“Bo tar binaka puk ka bangar tamatang kaueke bino tatanon, gisina ka uelmene katongois pare, ‘Inggonene ter tang sioko re turung kale uahiuu tar

iomo binoene, ti uiliatung pous tatanon, kari kale tena ineton.’¹⁵ Temeait ka baka tauete turusina tatanono tar iomo bino, kara la tung pous tatanon.”

Kare kulangua Iesu pare, “A hauangua re turung guatain tanener lebe bino tasisin? ¹⁶ Inggon e turung lame me uiliatung pous tasir tamatang kaueke tar iomo bino. Kare heir tar iomo bino tasir gisiameh.”

Tar binaka ka longoror tamata ke kula pe Iesu pare, gisina ka kula pare, “God ahik uamaluana tar puhonene e kotpokos!”

¹⁷ Doh Iesu ke banga uakodkodohola tasisin, kare kula pare, “Bo ae maene ka bolo uahiuain roono tono bolobolo God pare?”

‘O palaua geke deinir tamatang tuha toro um

teene ka namana pe o sa roon, karo iinetelik puk, roono ka uiuirin pare, o inete uleik tun.’ *Ker 118.22*

^{18m} Doh mair tamata re turung punga uahiuako toro palaua roon, e turung taptapolaka siksikin.

Doh mair tamata re turung hungin tang roon,

e turung tamtamian.”

¹⁹ Ahik me manasan o tang ualasira tar ualatut, doho patere uleik ka bangaeha me hagar tar uih tang Iesu, ter hauon gisina ka ate ke uelhire peono toro uelhire uaranga rone o lain tasisin, bo gisina puk ka sokoro tasir tamat.

Bulaua tar takis tang Sisa

²⁰ⁿ O tamatang ualualasira tar ualatut, doho patere uleik ka uakeis uanono tang Iesu, kara ualatue tasir gisiameher tamata ra la bangbanga uanomo tang Iesu, kara pepe boho pare, o tamata kodkodoh. Gisina ra marang uakouh tang Iesu gete mene siaua me puh

mara ueliuilasina tatanono tena nitam-popokohor gavamanang Roum. ²¹ Maeit gisina ka dangata tatanono pare, “Ir tang ualafir! Inggeim mi ate ingga o men, karo ualasira tar hauar kodkodoho tang hingiamper tamata ger tohangana ue ahik paha tohangan, karo ualasira tena niguata God toro mana tun. ²² Auiampeono ri heir pe inggeig tar takis tang Sisar ue ahik.”

²³ Iesu ke ate pare, gisina ra marang tutlour tatanon, kare kula tasisina pare, ²⁴ “Ualasira totoguo me mani, karung hire totoguo maiener nipetut tola, doha hangana mai re moko teil.”

Kara mene hahauasina pare, “Sisa!”

²⁵ Kare kula Iesu tasisina pare, “Mu heir tang Sisa tar inete ger nan, doha ineter nang God ra heirimpeig tang God.”

²⁶ Doh gisin ahik pah ka banoto tar mene uakouh tatanono tar haueit ke mene toiono tasir manai. Gisina ka me tabila bolongurungua ka lutara pe tar menenin.

O Sadiusi ka dangata tang Iesu

²⁷ O gisiameher Sadiusi gera tagorong boho tar nitua tapokis tur toro mat, ka lame tang Iesu, kara me dangata pare, ^{28o} “Ir Tang Ualafir, Moses ke bolo uatuha tagigeig pare, ge pake mata liu me tamata mena kuah, bo ahik puk me keketik, a tahinono pake le tar kuaha kamobono mare uakotpokosono mena keketik tahineit ke mat. ²⁹ O mouitir mamahialik ka uangoul. Doh ger uoum ke le tar kuah, kare mat ahik me keketik. ³⁰ A uatang torikin ke le kalehe tar kuahon, kare la mata pon. ³¹ Kare la le polukur uatang touonona tatanon, doha siokono kompe, gisinar mouitir mamahialik ka siokor le tatanon, kara siokor mat. Ahik me tang sioko tasisina ke to tun. ³² Dohi muduhia a kuaha ke la

mata pon. ³³Bo tar binakang tua tapokis puk maingua re turung nana tun tar kua-haon, ge gisina per mouitir mamahialik ka siokor le tatanon.”

³⁴Iesu ke mene hahaua pare, “O tamatang daan ra le, kara ualeis. ³⁵Bosir tamatang gaat i uoumuhia gisis re uairanaís God, kara uatua tapokisis, ahik pah ra turung le ue ra ualeis. ³⁶Doh gisin ahik pah ra banoto ra mata baka poluk, ge gisina pe ngohina tasir angelou, karo bung tuna God, teeit ka uatua tapokis peisisin. ³⁷Bo Moses puk ke ualasira pono tasisit ra mat, kara tua tapokis, inggono ke bolo uahiua hape ke mene tur peha God tatanon i lolono toro hue pare, a Tamata Noman ke kila katongoin pare, ‘Na God Abraham, doh Aisak, doh Jekop.’ ³⁸A Godon ahik pah nas Godor mat. Inggono nas Godor tua. Ge gane pe tatanon, gisin o tua uakap.”

³⁹O gisiameher tamatang ualualasira tar ualatut ka kula tang Iesu pare, “Ir tang ualafir, ingga ko heir uaia tun tar puhung mener uia!” ⁴⁰Doh ahik me tang sioko ke ongolo tun tar dangata poluk tatanono me gisiameher nidangat.

Iesu ke dangata tasisina pare, “Mair tuna Debit”

⁴¹Kare kula Iesu tasisina pare, “Ae maene ra kulasina pare, ‘Inggono e la tur toso bunguna Debit.’ ⁴²Bo Debit ke uakalahara katongoin i lolono tono Bolobolong Ker, ke kula pe pare, ‘A Tamata Noman ke kula tenag Tamata Noman pare, Tabilane tar pang mua totoguo, ⁴³e tuka getu touahiua tosnongo uelmatana i kukulebanga tar kekeimua.’ *Ker 110.1*

⁴⁴Doh gete kila Debit tatanono pare, na Tamata Noman, hape maene re uatuna Debit tatanon.”

O tamatang ualualasira tar ualatut

⁴⁵Tar binaka ra ualongoror tamata tang Iesu, inggono ke hire toso tamatang uakuakeluk pare, ⁴⁶“Mu tagin teil tasir tamatang ualualasira tar ualatut. Gisina ra uaha tar uiloho keip tar gomomonitir barah, kara malara ra meneng ueltada tois toro buturung uabulbulau, kara uoto malara tar tabtabilanitir nasir tamata uleik iuma tenas umang lotur Ju, kare tar tabtabilaniner nosir tohangas ger to ueltadan tar niein uleik. ⁴⁷Gisina ra boh, kara uoto kale uakapa tenas mamang inetelikir kuahar nimata liu, doh ra guata sira pare, o tamata uaia ra kotouo pe tar lotuniner barah mara bangar tamat. O tamata sira pare, ra turung uabatontieheis.”

O Mahar 21

A kuaha nimata liu ke heir tena mani

21 Tar binaka re uangoul Iesu iuma tar umang lotu ger dedeil, kare bangangua tasir tang inete ra uamoko pela tenas mani tar buturung uamoko tar umang lotu. ²Doh inggono ke banga pono tar kuaha nimata liu a tiome ke la uamoko pono pela tena torikir mani. ³Kare kulangua Iesu pare, “Inggono gine ru hire tun toro man, a kuahener tiome, kara nimata liu ke heir uaburehentiehe uain tasisiner tang mani, ⁴o tamata-sine re tototoisir mani, ka heir uabanoto puk. Bo inggonener nimata liu ahik baka poluk mena mani ke la moko ke siokor heir liu pe.”

Iesu ke kula tar umang lotu ger dedeil ra turung durain

⁵Tar binakonene ra ueluatata per gisiameher tamatang uakuakeluk tar umang

lotu ger dedeil pare, “Inggon a niuamatmata hamas tar palauanitir mataia, kara inete pononit ka heirig tar uatakai tang God.” Bo Iesu puk ke kula pare, ⁶“A hauanine rung bangagioumene daan, gaat i uoumuhia, ahik mo sioko ro palaua ro turung toko uaponola mo giameh, a mamang palaua uakapa tununine ra turung siokor baka uahiuai.”

⁷Kara dangatasina tatanono pare, “Ir Tang Ualasis, mangiha re turung pokosor ineteninanine? Doha hauar uaparoko re turung uahire i uoumuhia pare, ginin e kotpokos.”

⁸Kare mene hahauono pare, “Mu tagin teil geta me tutlourousioum. Ge mo burehe pe ra turung lame tar hangouguo, ra me hire pare, ‘Te inggo.’ Doha binaka ke uahuhutin. Ahik pah mu uakeluk tasisin. ⁹Getung longoroum toro uiliatung, kara uelsaeng toro pang uan, ingggoum ahik pah mu sokor. Gini-nanine e kotpokoso uakikilanga manasampe, bo a uadouhinar marein puk ahik pahe turung pokosongua.”

¹⁰Song ke hire poluk Iesu tasisina pare, “O pang uan ra turung ueluiliatungeis, karo nitoia e turung ueluiliatunge katongois. ¹¹Doho nun uleik e turung pokos, doh toro giniamer butur e turung kotpokosor gogo uleik, kara uelmata uleik, dohi ran tar langit e turung pokosor niuaparoko uleik, kara inetenitir ualasokoro tun.”

¹²“Bo tar binaka puk halanar ineteninanine te kotpokos, gisina ra turung kusa tamiuoum, kara uaelmahingisoum, kara ueliuilasoum tonosio umang lotur Ju, kara turung keipilasoum tar umang uih, kara turung ueliuilasoum i uoum tasir toia mesir tamata uleik. Gininanine ra turung guataig tamiuoum, teeit rung

uakeluk pe totoguo. ¹³Inggonene ter binakeit rung turung hireoum tasisina toro Uelhire Uaia. ¹⁴^tMaeit, Inggoum ahik pah mu namanantiehe baka uoum hape rung turung uelturut katongo pesioum tasisin. ¹⁵^uGe inggo pe u turung heir tamiuoum toro uelhire, kara niate mara hik nomio uelmatanion pah ra banotong tur tane ue ra touahiuu toro uelhire geru heirio tamiuoum. ¹⁶^vO bung tinamiuoum ponompesit meso bung tahimiu, karo bung kaloumiu, doho bubungumiu ra turung uelii ponola tamiuoum tosnomio uelmatana mara la uiliatung pousis mo gisiamehe tamiuoum. ¹⁷Doho tamata uakap e turung tokouasais tamiuoum, teene rung uakeluk pe inggoum totoguo. ¹⁸Bo ahik puk me siokor kaming ul re turung takaus liu tur tar lumiuoum, kare rou. ¹⁹Inggoum mu tur uanono marung kaleoum tar nitua gere moko dedela.”

Gisine ahik paho Ju ra turung mamantou i Jerusalem

²⁰“Tar binaka rung bangoum tasir tamatang uiliatung ra tur uiloh i Jerusalem, inggoum mu turung ate pare, a binakang mamantouo tar uan uleik i Jerusalem ke uahuhut manasain. ²¹Temaeit mais ra uangoul i Judia ra ualo liu taro toro siusan, mais ra uangoul i Jerusalem ra hiliu tar uan. Doh gisine ra uangoul i be tar uan ahik pah ra la lekala.”

²²^w“Ge ter binakang uabato peono mara niuabatoonene e uaelmatout tar mamang inetelik geke boloigir propet. ²³A binakoneit e turung binaka uasantiehe tun tasir kuaha balakos, kare tasir kuahasine ra uahuh teil tasir guam! Gea niduh uleik pe e turung pokosane tar kot, ter hauono God e turung

^s21:6 Luk 19.44 ^t21:14 Luk 12.11-12 ^u21:15 Apo 6.10

^v21:16 Mat 10.21-22 ^w21:22 Jer 5.29; 46.10; Hos 9.7

nimalianantiehe tun tasir tamatasin. ²⁴xGisina ra turung uiliatung pous keipis tar baenat, kara turung kaleis ra la uangoul sira tasir karabus toro mamang pang uanilik. Doho tamatasis ahik paho Ju tagu ra turung touahiu i Jerusalem e tuka tar binakeit ke umatotoin God ra la kaueke uatukasin i Jerusalem.”

A inetenit re ualasira tar tunar tamata gete tapokisiha

²⁵yDoh Iesu ke kula poluk pare, “Me niuparok e turung pokoso tar pisar, doh tar bialok, kare tasir pitopit. O tamatang toro mamang pang uanilikane tar koto uakap ra turung toboul, kara turung sokor, kara turung kanuhuntieh, re gutur uauleik per butuana tar laur. ²⁶O tamata ra turung sokorontiehe tun, kara mata uapuh, teene gisina ra ate tar inetenitir ualasokoro re uakekena pe tar kotpokosane tar koto uakap. Teeit God e turung uagune tar mamang ineteliking tar langit. ²⁷zTar binakon, gisina ra turung banga tar Tunar Tamat e la uahiuaha i lolono toro mahar langit, inggon e la keipiha tar nitampopokoh, doh na uinatoro uleik. ²⁸Gete uakekena manasar ineteninane tar kotpokos, inggoum mu siokor tentur kai, doh mu uatada kai tar lumiu, ter hauon a binaka re uelkarus God tamiuoum ke uahuhut manasain!”

A niate ra kale turin toro douk fig

²⁹Iesu ke hire tasisina toro uelhire uaranga pare, “Mu bangala toro douk fig, kara douk uakapalanila. ³⁰Gete uakekenar douk tar uakoup, o tamata uakapa ra ate pare, i muduhia ing-

gon e turung pang pisar. ³¹Doh ter siokono kompe getung bangoum tar inetenin re kotpokoso pe, inggoum mu ate teil tena Nitoia God ke uahuhut manasain. ³²Inngo u hire tun tamiuoum toro mana pare, a tamatang daan halanampe ta mat, doha inetenina ke kotpokoso manas. ³³A mamang inetelik i rana dohi kot e turung rou, bo nogo uelhireo ahik paho turung kapa liu tagu.”

No tamatang uakuakeluk Iesu ra tagin teil

³⁴Doh Iesu ke kula poluk tosono tamatang uakuakeluk pare, “Bo inggoum puk mu tagin teil getung uamalu-anasioum tar einintieh, karung inum uabureh, karung la maluan, karung namanantiehe tar ineteng gane tar kot, ge ginina pe tere uapunga uahiu tamiuoum, kara hikingua pah mu ate tar binaka re la ualutarahar Tamata Norman. ³⁵Ge inggono pe e turung la uaponaha tasir mamang tamatalik gera uangoulane tar koto uakap. ³⁶Uakeis uanono uaia dede tun, doh mu lotu marung banotoum tar uasiaua liu tar hauaninanit re turung kotpokos, doh marung banoto ponoum tar la tur i uoum tar Tunar Tamat.”

³⁷Tar mamang mareinilik Iesu e ualualasira to tasir tamata tar umang lotu ger dedeil, doh tar mamang boungulik inggon e uoto la tauete liu i Jerusalem, e la uoto uangoul tar siusan gera kilain a Siusanang Oliv. ³⁸Bo o tamata puk ra uoto lame tar mamang liliuolik tar me ualongoro to tatanono tar umang lotu ger dedeil.

^x21:24 Ker 79.1; UGO 11.2

^y21:25 Ais 13.10; Isk 32.7; Jol 2.31; UGO 6.12-13

^z21:27 Dan 7.13; Mat 26.64; UGO 1.7

O Mahar 22

Judas ke uauia tar heir tang Iesu tasir uelmatan

22 Gine daan ke uahuhut mana-sainir mareining toro niein uleik, O Bereit Ahik me Is, ra kilain pare, “Leke Liu ro Mat.”^a ²Doho patere uleik mesir tamatang ualualasira tar ualatut ra bangahe me giniamer hagar tar uiliatung pous tang Iesu, ge gisina pe ra sokoro tasir tamat.

³Kare la hikungua Satan tang Judas gera uoto kilain tang Iskariot, inggono ter tang sioko tasisinar siokor hangaul, doha tang torik. ⁴Doh Judas ke la tasir patere uleik mesir tamata uleikisit ra tur kauেকে tar umang lotu ger dedeil, kare la uelhalata keip tasisina me hagar uaia mare turung heirono tang Iesu tasisin. ⁵Gisinasine ka uahantiehe tun, kara uauia tar heir me mani tatanon. ⁶Maeit inggono ke heir tar uauia tasisin, kare sirsir me hagar uaia ge ahik mo manai tamata ra uangoul mare heirono tang Iesu tasisin.

O uadoughina ro niein

⁷^bA mareining toro niein uleik gera kilain, O Bereit Ahik me Is, ke kotpokoso manasa ter binakonene ra tung pousisir tukur sipsip gera ein tois toro niein uleik, Leke Liu ro Mat. ⁸Iesu ke ualatue tas Pita, me Jon, kare kula pare, “Mura la, doh mura la kaleuatoro tar butur ri la ein toeig toro niein uleik gera kilain, Leke Liu ro Mat.”

⁹Kaura dangata rasina pare, “Iar butur ro malaraiia mira la kaleuatoro raeim.”

¹⁰⁻¹¹Inggono ke mene hahaua pare, “Gine ura leka peko raoum tar uan uleik, kaura turung ueltupara tar bulout e huata teil tar nouh kodom. Mura uakelukungua raoum tatanono tar umeit re la lekalaion, kaura kula tang tanener uma pare, ‘A tang ualualasira ke dangata pare, Ia kaein nas tine umar pokoso geru me ein to keipio tosnogo tamatang uakuakeluk toro niein uleik ra kilain, Leke Liu ro Mat?’ ¹²Doh inggon e turung ualasila tamiraoum tar uleikir tine um gere mok i ran, doha mamang inetelik e mokong sioun ter buturuono mura la kaleuatoroin raoum.”

¹³Kaura hiliu rasin, kaura la tupara tar mamang inetelik misiana sirampene ke hire pe Iesu tasrasin. Temaeit rasina kura kaleuatoro toro niein gera kilain, Leke Liu ro Mat.

¹⁴Tar binakene ke kotpokoso manasar binakang ein, Iesu mesno aposoul ka tabila tokoha toro teboul. ¹⁵Kare kulanguaono tasisina pare, “Inggo u malarantiehe tun tar ein keip tamiuoum tar mareining Leke Liu ro Mat, song i muduhia inggo u turung kale uelmahing. ¹⁶Temaeit inggo u hire tamiuoum pare, inggo ahik baka poluk pahu turung ein toro niein roon e tuka gete mana bakar puhono tena Nitoia God.”

¹⁷I muduhia ke kale peono tar kap bino, kare kulang uauia tang God, kare kula pare, “Mu kale tanene, karung uelpakah tatamiu. ¹⁸Ge inggo pe u hire tamiuoum pare, inggo ahik baka poluk pahu turung inum tar kukuananar bino e tuka gete laha na Nitoia God.”

¹⁹Song ke kaleono toro bereit, kare kulang uauia tang God, song ke pis polaka tang roon, kare kula pare, “Gine

^a22:1 O niein uleik o nasir Ju ra kilain, “Leke Liu ro Mat.” Uanamana huara dede tar binaka toro mat o uleik ko leka liu tasir Ju i Isip. O Ju ra kialin, “A Pasova.” Bang toro Bolobolong Kale Tapokis Mahar 12.

^a22:3 Jon 13.2,27 ^b22:7 KT 12.1-27

ter tukunuguo ger niheir uatuha tamiuoum, mu guata pare, tar namana huara totoguo.”²⁰ I muduhia ka ein uakapa baka pesin, inggono ke guata tar siokono komper niguat, inggono ke kale tar kap, kare kula pare, “A kap binoene ter timuhur niuelhote tar deuatingiguo geru uatading uatuhaig tamiuoum.”

²¹ c“Bo a tamata gere turung heir totoguo tasir uelmatan, inggono gine re tabilala tagu tagigeig.”²² Ge a Tunar Tamata pe e turung mata sira hape ke umatoto pe God tatanon, bo kuanalik tunur tamatane re turung tangana tatanono tasir uelmatan.”²³ Kara uakekenasina tar ueluedangata katongois pare, “Maiane tagigeig re banot e guata pare.”

Mai ger i rana uain?

²⁴ dDoh gisina ka uakekene tar ueluelperere katongois pare, te mai tun ra turung bang parokoin pare, ter tohangana uleik.

²⁵ eIesu ke kula tasisina pare, “Nasio toiar gime tamatasine ge ahik paho Ju ra kaueke tosnosio tamat, kara petutupe tasisina mara uakelukis. Doh gisisir toiasis ra kaueke tosnosio tamata ra kila katongois pare, ‘O tamang poul tosnosio tamat.’”²⁶ fBo inggoum puk ahik pah mu pe sira tasisinasitir tohangas, ge a tamata pe ger tohangana uleik pake pe sira tar tamatane ge ahik me hangan. Doha tamata uleik pake pe sira tar tamatener nipoho uadouh. Doha tamata uleik pake pe sira tar tamatang kalekinale.”²⁷ gGe a tamata pe ger to hanagana uleik ra uoto heir toig na niein toro teboul, bo gane, inggo tenami tamatang kalekinaleoum.²⁸ hInggoumene tekung tur uanono tagu

totoguo tar binaka ke kotpokosor niduh geke uedanga totoguo.”²⁹⁻³⁰ hTe misiana kompe ke heir pe tamougou totoguo tar nitoia, maeit inggo u uauiangua pono tamiuoum tar kale tar Nitoiaon, karung la ein, karung la inum to tonogo teboulio tenag Nitoia, doh mu turung tabila toro tabtabilang toia, karung kedanga tasir siokor hangaul, doho torik ro matinang Israel.”

³¹ iKare kula Iesu pare, “Saimon! Saimon! Satan ke dangata tar uedanga totomua misiana geta koun uaguluhigir raes-uit, kara kale liuigir mongmong.”³² jBo inggo puk ku lotu ueleheir totomua mara hik reng nitagorong mana pahe pung. Doh tar binaka ro uapalihia tenang niguat, karo tapokisime totoguo, ingga o me uatampopokoho toso bung tahim.”

³³ kKare mene hahaua Pita pare, “Tamata Noman! Inggo ku uiliauh tar la tagu totomua tar umang uih, karu la mat.”

³⁴ lBo Iesu puk ke mene hahaua pare, “Inggo gine ru hire totomua Pita, tar binaka halanar paolo ta kororo daan, ingga o turung uolih uatouono pare, o tele totoguo.”

³⁵ mKare dangatangua Iesu tasisin, “Tar binaka ku ualatuoe tamiuoum, inggoum ahik pah mu kale teil me dukung mani, doh me tolah ue me giameher su, inggoum kung katupa baka me inete.”

Kara mene hahauasin “Ahik uadeil!”

³⁶ nKare kulono tasisina pare, “Bo gine puk daan gete menami dukung manioum ue me tolaha pon, ra kale taguig, doh geta hikioum menami baenat, uabulaua tenami hikhiku mara bulauain mo baenat.”³⁷ oGe a nibolo peonene tonu uelhire

^c22:21 Ker 41.9; Jon 13.21-22 ^d22:24 Luk 9.46

^e22:25 Mat 20.25-27; Mak 10.42-45 ^f22:26 Mat 23.11; Mak 9.35

^g22:27 Jon 13.12-15 ^h22:29-30 Mat 19.28 ⁱ22:32 Jon 17.15

^j22:35 Luk 9.3; 10.4 ^k22:37 Ais 53.12

God pare, ‘Temaene inggono ra uataguin tasir tamata uasa.’ Doh inggo u hire tamiuoum inggon e turung kotpokoso totoguo. Aa! A hauar nibolo uatuha totoguo gine manasa ke uahuhutin tar kotpokoso pare, o man.”

³⁸O tamatang uakuakeluk ka kula pare, “Bang, Ir Tamata Noman! O torik ro baenat rasine.”

Kare mene hahaua Iesu, “Rasin ura matoto manas.”

Iesu ke la lotu to tar Siusanang Oliv

³⁹Iesu ke la sira poluk re uoto lang sioun pe tar Siusanang Oliv, doh no tamatang uakuakelukono ka uakeluk tatanon. ⁴⁰Tar binaka ka la pokosodin, inggono ke kula tasisina pare, “Mu lotu mara hikioum pah mu punga me niuedang.”

⁴¹Kare la uairehe sikoronguaono tar butureit ra uangoulusin, song ke la hatup uahiu, kare lotu pare, ⁴²“Tamoug geto malara ingga, kale liu tar niduhene totoguo. Bo ahik pukia paho uakeluk tereg nimalaro, o uakelukumpe tereng nimalar.” ⁴³Doha anggeloung Heuene ke pokoso uakalaharain tatanon, kare me uatampopokoho tatanon. ⁴⁴Doh inggono ke hagouo uasa tar niduh, kare lotu uatampopokoho kompela, doha tumaranganono ke sosoro uahiu, ke pe sira tar deuating re simsim uahiu peko tar kot.

⁴⁵Tar binaka ke lotu uakapa peon, kare tentur kai, kare la tapokis tasir tamatang uakuakeluk, inggono ke la tu-para tasisina ra hohou, ke tung pousisir niueldolom. ⁴⁶Kare dangatono tasisina pare, “Ae maeit rung hohououm? Mu tentur, karung lotu mara hikioum pah mu turung punga me niuedang.”

O tamata ka la kusa tang Iesu

⁴⁷Tar binaka re mene haraha Iesu tosno tamatang uakuakeluk, kara me pokosohar manai. Doha tamata gera kila-lain tang Judas ter tang sioko tasisinar hangaul, doha tang torik, inggono tere uoum keip teil tasisin. Inggono ke la taro tang Iesu, kare la nguuh tatanon. ⁴⁸Bo Iesu puk ke dangata tatanono pare, “Ae maeit ro nguha totoguo, karo heir tar Tunar Tamat tasir uelmatan.”

⁴⁹Tar binaka manasene ka la bang paroko pe no tamatang uakuakeluk Iesu tar puh uasa re marang pokoso pe, kara kula pare, “Ir Tamata Noman, e banotono geting uiliatung keipieim tenami baenat.” ⁵⁰Doha tang sioko tasisina ke sebel kout tar talinganener pang mua tena tamatang kalekinaler patere uleik.

⁵¹Bo Iesu puk ke mene hahaua pare, “Mu uakenua! Ke banoto manasar uiliatung.” Kare tuhala Iesu tar talinganeit, kare uauia tatanon. ⁵²Song ke kula Iesu tasir patere uleik, doh noso tamata uleikir tamatang tur kaueke tar umang lotu ger dedeil, karo mamahoholikisine ka la uelhirime tatanono pare, “Mu namanoum pare, u uoum keip teilio mo tamata uasa, maeit kung la keipime tar baenat, doha pus? ⁵³A mamang binakalik inggo u uoto uangoul tagu tamiuoum tar buturung uelpokos iuma tar uamang lotu ger dedeil, doh inggoum ahik pah kung marang kusa totoguo. Bo gine daana puk na nitampopokohor kitup e uoum keip tamiuoum tar guata uasa.”

Pita ke uolih e tele tang Iesu

⁵⁴¹Kara kusenguasina tang Iesu, kara keipilain iuma tena umar pater ge nas uleikir pater. Doh Pita e uakuakeluk teil sikoro kompe tasisin, bo ahik puk pahe la uahuhut. ⁵⁵Tar binaka ka

me pokosoin, o tamata ka uout toro hueng mahirum i uantinana tar buturung uelpokos, kara siokor tabila uiloho tokah, doh Pita ke tabila tagu tasisin. ⁵⁶Kare bangangualar kuahang kalekinale tang Pita re balbala pein ro hue. Inggono ke bangaeha uaia tun tatanon, kare kula pare, “A tamata dehene e uoto uangoul tagu tang Iesu.”

⁵⁷Bo inggono puk ke uolih pare, “Ir kuah, inggo dehu tele tun tatanon.”

⁵⁸I muduhia tar sisikinalikir binak, a tang giameher tamata ke banga tupara poluk tatanon, kare kula pare, “Ingga pono ter tang sioko tasisin.”

Doh Pita ke uolih poluk, “Inggo ahik paha tang sioko tasisinasit.”

⁵⁹Gine ke karuh sikor baka per puhung barah, a tang giameher tamata ke mene uatampopokoho polukume pare, “O manampe a tamatonene te me Iesu ge a peng Galili peon.”

⁶⁰Pita ke mene hahaua pare, “Inggo u tele tun tar hauaeit ro mene uatuhai.” Git re menmene haraha pe Pita, kare kororor paol. ⁶¹Doha Tamata Nomana ke uagegela tang Pita. Song ke namana huara Pita tono uelhire Iesu geke mene uakikilangain tatanono pare, “Tar binaka halanar paolo ta kororo daan, ingga o turung uolih uatouono pare, o tele totoguo.” ⁶²Song ke tauetela Pita i kalahar, kare la kirkiring ualeikintiehe tunungua.

Iesu ke tur i uoum tosnosio mamahoholilikir tamat

⁶³O tamatasine ra tur kaueke tang Iesu ra uauanet, kara halhaluh tatanon. ⁶⁴Gisina ka rokoso tane tar matanon, kara haluh dedempe, kara hire tatanono pare, “Hire sira tar propet, maiene ke haluh totomua.” ⁶⁵Doh gisina ka

menmene tar bureher meneng uelsigala tatanon.

⁶⁶Tar binaka ke harahar pisar, nosio mamahoholikir Ju ka la toto mesir paterere uleik, kare tesir tamatang ualasira tar ualatut, gisina ka la keipiha tang Iesu tar kaunsil. ⁶⁷^mKara dangata tatanono pare, “Ge pare Kristo nomana, ingga o hire tamiueim.” Kare mene hahauangua Iesu, “Getu hireo tamiuoum, inggoum ahik pah mu tagorong mana totoguo. ⁶⁸Doh getu dangato tamiuoum, inggoum ahik pah mu mene hahau. ⁶⁹ⁿBo gine puk daan, a Tunar Tamat e turung tabila tar pang makoso tang God ger uleikintiehe na nitampopokoh.”

⁷⁰Kara siokor dangatasina pare, “Ingga song ter tuna God nomanampe.” Kare mene hahauono pare, “Inggoum kung mene hung nomana te inggo nomanampe.”

⁷¹Kara kulanguasina pare, “Ae maene ri malareig me tang giameher tamata re me mene baka poluk? Ge inggeig pe ki siokor longoro tur manasa tatanono ke mene katongo pe.”

O Mahar 23

Iesu ka keipilain tang Pailat

23 Song ka siokor tenturusin, kara keipila tang Iesu tang Pailat. ²Kara la uakekena tar tohotola tatanono pare, “Inggeim king tupara tar tamatane ke guata tasir tamata mara hik pah ra uakeluk tar ualatutung tar pang uan. Inggon e kula pare, a sa tar bulaua tola tar takis tang Sisar, kare kula pono pare, Inggono te Kristo ger toia.”

³Temaeit ke dangata Pailat tang Iesu pare, “Ingga nas toia nomanar Ju.” Doh Iesu ke mene hahaua pare, “Te paare nomanampeit ro kula pe ingga.”

⁴Song ke uahirela Pailat tasir patere uleik mesir tamata pare, “Inggo ahik matu tupara me tengkana maru kula pare, inggono ke katego tar ualatutung Roum.”

⁵Bo o tamata uleik puk ka mene uapopokoho pare, “Inggono ke uakot-pokoso tar bureher niduh re mene ualasira peane i Judia. Inggono ke uakekena turume i Galili, kare la uakapameane i Jerusalem.”

Iesu ke tur i uoum tang Herot

⁶Tar binaka ke longoro Pailat tar puhonene, kare dangata tasisina tang Iesu ge para peng Galili. ⁷Tar binaka ke ate inggono pare, Iesu e uangoul tar buturuoneit re kaukeke teilin Herot, kare kula tasisina ra keipiono tang Herot, ge inggono pe e uangoul pono tar binakon i Jerusalem.

⁸Tar binaka ke banga Herot tang Iesu inggono ke uahantieh, teeit inggono ke puhung barahin tar marang banga tatanon. Teene inggono ke long-longoro kout tar haua ke guatguatagion, dohe malahir pake banga me nitouo gere uatouoion. ⁹Maeit ke dangatono tang Iesu tar bureher nidangat, bo Iesu puk ahik mata mene tapokis tatanon. ¹⁰Nosio tamata uleikir pater, doho tamatang ualasira tar ualatut ra tur pon, kara mene uatampopokoho tar uasuasa, kara tohotola tang Iesu. ¹¹Song ke guata uamatala tun Herot mesno tamatang uiliatung ka uelsigala pe, kara uauanete tang Iesu. Gisina ka uamokola tatanono toro hikhikung toia gero mataia. Song ka ueliu tapokisilain Iesu tang Pailat. ¹²Ter mareinguaoneit kura me matakaluana tapokis Herot me Pailat, ge sioun pe, rasin a toking uelmatan.

Iesu ka uiliatung pousin

¹³Pailat ke kila toto tasir patere uleik mesnosio mamahoholikir Ju, doho manai tamata pon, ¹⁴inggono ke kula tasisina pare, “Inggoum kung keipime tar tang siokor tamatane totoguo, karung kula pare, ke uoum keip uasaone teres nanamanar tamata mara ueluelde tar gavamanang Roum. Inggo ku heheke tatanono tar binaka rung pepeoumane, doh inggo ahik matu tupara me inete me to tengkana re ualasira pare, inggono ke guata uasa tar hauanit kung tula tolasioum tatanono pare, ke guat. ¹⁵A siokono pono tang Herot, ahik mata kula pare, ke guata uasaon, temaeit ke ueliu tapokisihao tatanono tagigeig. Inggon ahik mata guata me inete mare banotono ra uiliatung pousin. ¹⁶⁻¹⁷Temaeitie, inggo u turung ualatoho pare, ra kalkalopis pukion, song ra uamaluanain e la.”

¹⁸Kara siokor kula ualeikisina pare, “Kale liu tar tamatane, kara uiliatung pousin. Uamaluaana tang Barabas e laha tamiueim.” ¹⁹(Barabas ka uamokoin iuma tar umang uih, ge inggono pe ke uatentur tar nimaliana tar gavamanang Roumene i Jerusalem, doh teeit ke uiliatung pous peono tar tamat.) ²⁰Pailat e marang uamaluaana tang Iesu ra uatauetin, temaeit ke hire polukiono tasir tamata pare, inggon ahik mata guata uasa. ²¹Bo gisis puk ra kula ualeik pukumpela pare, “Tine uakusa tatanono tar korose, tine uakusa tatanono tar korose!”

²²Tar uatouonono manasar binakene ke dangatantiehe Pailat tasisin. “Aeon! Haua tun ke guata uasainir tamatane? Inggo deh ahik matu tupara me inete ke guata uasaiono mara uiliatung pousuion. Temaeit, inggo u turung

kalkalopis puk tatanon, karu uamaluana tatanon e la.”

²³ Bo gisis puk ra kulkula ualeik, kara dangata uapopokoho tang Pailat tar tina uakusa tang Iesu tar korose. Doh nas nikula ualeikisina ke la uapalih tena nimanana Pailat. ²⁴ Temaeit inggono ke guata uakeluk sira manasa tar haua ka kulainisin. ²⁵ Inggono ke uatauete tar tamata ger niualekala iuma tar umang uih, teeit inggono pe ke uatentur tar nimaliana tar gavamanang Roumene i Jerusalem, kare uuliatung pous pono tar tamat. Inggono teka malarainisin, bo Iesu puk teke uauiaiono ra guata sirain hape ra malara pesin.

O tamatang uuliatung ka tine tang Iesu tar korose

²⁶ Gisitir tamatang uuliatung ka uoum keip tang Iesu, kara la. Kara kusa kout tar tamata ra kilain tang Saimon ger peng Sairini. Inggon e lang laha i Jerusalem e la tur tar pang giamehenar pang uan, doho tamatang uuliatung ka uahuata tatanono tar korose ke huatahia i muduhia tang Iesu. ²⁷ O burehentiehe tunur tamatasine ra uakeluk teil tang Iesu menia pono tasir kuahasit ra uel-dolom, kara kiring tatanon. ²⁸ Doh Iesu ke uagegela tasisin, kare kula pare, “Ir kuahang Jerusalem ahik pah mu kiring totoguo, bo mu kiring katongosium, ter hauon a inete uasa e turung kotpokoso tamiuoum, doho bung tumiu. ²⁹ ¶Ge a binaka pe e turung lame, doh inggoum mu turung kula pare, ‘O kuahasiner bouh, kare gisine ahik pah ka poh, kare gisine ahik pah ka uahuh mo keketik, gisina ra turung uah.’ ³⁰ ¶Song ra turung kulan-guasina toro siusana pare, ‘Tadura uahiuahane tamiueim!’ Kara kula pono toro ponponina pare, ‘E me kokop tane tami-

ueim.’ ³¹ Geta guatar tamata tar inete-nine tar binaka ro tua ro douk, a hauangua re turung pokoso tar binaka ro mata roon.”

³² A tang torikir gime tamat, rasina kura guata tar niguata uasa, ka keip tauete taguis tang Iesu mara la tung pous ponois. ³³ Tar binaka manasa ka lamesina tar butur gera kilain pare, “O Lakok,” teka la tine toin Iesu tar korose, kara uakusa kaiain, kare ter toking tamata uasa pon. A tang sioko ke kusehia tena korose tar pang mua tang Iesu, doha tang giamehe ke kusehia tena korose tar pang kais.

³⁴ ¶Doh Iesu ke kula pare, “Tamoug! Kusa luara liu tar niguata uasar nosisin, ge gisina pe ra tele tar haua ra guatain.”

Kara uelpakahanguasina tena hikhikuon, kara ueluelpeikier soldia tar baka uadud mara banga tang mai re turung kale tar mahmahar gomnonitir kahakah.

³⁵ ¶O tamata ra tur, kara uakeis, doh nosio tamata uleikir Ju ka uauanete tatanon. Kara kula pare, “Inggono ke uaudeil tasir gisiamah, auia e la uaudeil katongoion ge pare te inggonompe na Kristo God ger tang siok a nikedang.”

³⁶ ¶O tamatang uuliatung ka me uauanete poluk ponoha tang Iesu. Gisina ka heir tatanono tar bino ueltek. ³⁷ Kara kula pare, “Ge pare nas toia nomanar Ju to-tomua. O uaudeil katongoia.”

³⁸ Gane i ranahia tar korose o nitine uakusa ro uahire o nibolo pare, “Gine Tenas Toiar Ju.”

³⁹ A tang siokor tamata uasa geke kusa ponane ke uelsigala tang Iesu pare, “Ge para Kristo nomana? Inggono pako uaudeil katongoia, kare raeim pon.”

⁴⁰ Bo git pukur tang giameher tamata uasa ke louara tatanon, kare kula pare.

¶23:29 Luk 21.23 ¶23:30 Hos 10.8; UGO 6.16

¶23:34 Ker 22.18; Ais 53.12 ¶23:35 Ker 22.7-8 ¶23:36 Ker 69.21

“Ingga ahik paho sokoro tang God? Ingga o turung mata sira pono tatanon. ⁴¹Inggon auiampe tagiraeig geti ra mat, teeit teregira niguata uasa, bor tamatane, ahik mata guata tagu me inete me sa.” ⁴²Song ke kula pare, “Iesu namana huara totoguo geto la kotpokoso tenang Nitoia.”

⁴³Doh Iesu ke mene hahaua tatanon, “O mana tun inggo gine ru hire toto-mua, daan ingga o turung uangoul tagu totoguo i Paradiso.”

Iesu ke mat

⁴⁴Tar binakoneit na marein uleik, a kityp ke me kokop tane uakapa tun tar pang uan ke la tuka nar moloi. ⁴⁵A pisar ahik mata bal. Doho mahar gomono uleik ro nanar umang lotu ger dedeil ko takih polaka pan torik. ⁴⁶Doh Iesu ke kaling ualeik pare,

“Tamoug, inggo u heir tar iabeig toto-mua.” *Ker 31.5*

Gitie ke kula baka peono pare, kare mat.

⁴⁷Doh nas tamatang uoum keipir tamatang uiliatung ke banga tar hauene ke kotpokos, kare uatakai tang God, kare kula pare, “O mana tun gine ter tamatar kodkodoh.” ⁴⁸Tar binaka ka me siokor uelpokosor manai tamata ra lang banga pe tar mamang inetelikinine ke kotpokos, gisina ka nun tar uaruarous tar ualasira teres niueldolom, kara hiliu. ⁴⁹Doh gisine uakapar uanotono Iesu mesir kuahasit ka uakeluk turume tatanon i Galili, gisina ra uakeis turume i rehe sikoro tar inetenina ke kotpokoso pe.

Iesu ka keuin

⁵⁰⁻⁵¹Tar binakon a tamat a hangana tang Josep a peng Arimatea tar pang uan i Judia, inggon a tamata uaia tun,

kara kodkodoho pon, kare uangoungoul tena Nitoia God. Inggon e uangoungoul teil tagu pono tar kaunsil, bo ahik puk mata uauia teres ninamanasit tar tung pous tang Iesu. ⁵²Inggon ke la tang Pailat, kare la dangata tar kale tar tukununa Iesu. ⁵³Maeit inggon ke kale uahiua tur tar tukununa Iesu tar koro-rose, kare la auih uiloho tar gomono gaugauil, song ka uamokolain i lolono toro lebangang mat gero nikoho tar butur palaua hohot, ahik me tang siokor tamata ka keu taguin tang roon. ⁵⁴Gine daan, a binakang kaleuatoro tar ineteng tar Mareining Pepe Uaha ke uahuhutung kapa manas, ge a Mareining Pepe Uaha pe ke uahuhut manasain tar uakeken.

⁵⁵O gisiamer kuahasis geke hiala uakeluk turume i Galili tang Iesu tera uangoul pon. Gisina ka uakeluk tang Josep, doh tar binaka manasa ka la pokosolasina toro lebang, gisina ka banga hape ka uarikin uahiua per buloutusis tar tukununa Iesu. ⁵⁶^vSong ka la tapokis i Jerusalem, kara la kaleuatoro tar kukuananar busil, doha uaiuainitir muhuia mara la turung tunaha tar tukununa Iesu. Bo gisina puk ka uangoungoul uaha tar Mareining Pepe Uaha tar uakeluk tar ualatut.

O Mahar 24

Iesu ke tua tapokis

24 ^{Naliliuolik tun tar uakikilangar marein tar uikion, o kuaha ka kale tar inete geke kaleuatoroig, ginitir amiamuh, kara la toro lebangang mat. ²Gisina ka bang huara toro palaua ka uatagegele liu pein toro lebangang mat. ³Gine ka leka pekosin ahik mata la tupara tar tukununa Iesu ger Tamata Noman.}

⁴Tar binaka ra namnamanaehe turusin, kaura kotpokoso ualutarar toking tamat, kaura me tur uahuhut tasisin. Ura hiku teil tenasira gomomonitir balobal. ⁵Doho kuaha ka sokor, kara uasuge uahiu tar pores tar kot. Kaura kular toking tamata tasisina pare, “Ae maeit rung lang siroum tar tamata ger tuaane tenas buturur mat?” ⁶WInggon ahik baka poluk pah kaeinane. Inggono ke tua tapokis! Namana huara tar haua ke hireionio tamiuoum tar binaka re uangoul tagu haraha tamiuoum i Galili. ⁷Inggono ke kula pare, ‘A Tunar Tamata ra turung ueliuilain tasir tamata uasa, ra turung tine uakusein tar korose, doh tar uatouononor marein inggon e turung tua tapokis.”

⁸Doh gisitir kuah song ka namana huara tena uelhireon. ⁹Tar binakeit ka la tapokis turumesina toro lebangang mat, gisina ka la hire tar mamang inetelikinanine tasir siokor hangaul, doha tang siok, kare tasir gisiamah. ¹⁰Gisinasiner kuaha tes Maria Makdala, Joana, doh Maria ge tinana Jems, doho gisiamehemper kuah. Gisina teka la hire tasir aposoul. ¹¹Bo gisina puk ahik mata tagorong mana tasir kuah, teeit gisina ra longoro sira tasisina ra meneng popouluan. ¹²Bo Pita puk ke tur kai, kare ualualola toro lebangang mat, kare la uakatela ium, kare banga tar gomono ger niauih uiloho tar tukununa Iesu. A gomomonin e mokong pahene puk. Song ke hiliu Pita, kare namnamanaehe teil tar haua ke kotpokos.

A tang torikir tamata kura ueltupara tang Iesu

¹³Tar siokono komper mareinon, a tang torikir tamat ura lang la tar uan ra kilain i Emaus. Doha uanon e uairehe sira tar siokor hangaul, doha siokor kilo-

mita ra la tur pemein i Jerusalem. ¹⁴Doh rasin ura ueluelmene teil tar mamang inetelikinit ke kotpokos. ¹⁵Gine ura menene teil pe rasin, kaura ueluatata tar puhonene, kare pokoso ualutara Iesu, kare me la tagu tasrasin. ¹⁶Bo God puk ke uaouo tara matas rasina mara hik pah ura bang paroko tatanon.

¹⁷Maeit inggono ke dangata tasrasina pare, “A hau ura uelueluatata teilis raoum gine ura la pela.”

Rasit kura tur uanonongua, doha pores rasina ke ualasila tun tar niueldolom. ¹⁸A tang sioko tasrasin, a hangana tang Kliopas, ke dangatala tatanono pare, “Ingga ko nihing pokosane i Jerusalem, maene ro tele tar inetenine ke kotpokoso to tar uan tar binakene.”

¹⁹Kare dangata Iesu pare, “A inete hauanin.”

Kaura mene hahaua rasina pare, “Bo tar inete ke kotpokoso tang Iesu ger peng Nasaret. Inggono a propet, kara i ranantiehe na nitampopokoho re mene keip pe, kare guata to i uoum tasir tamat, doh tang God, inggono ra uelbang paroko tunin. ²⁰Doho patere uleik mesnogio tamata uleikeig ka ueliuila tatanono mare mat. Doh gisina ka tine uakusa tatanono tar korose. ²¹xBo inggeim king tagorong mana teil tun pare, inggono ter tang sioko gere turung bulaua tapokis tasir Israel. Doh me haua pono re uasasantiehe tagigeig. Inggono a uatouononor marein manasa daan, ke uakekena pemer inetenin. ²²Bo o gisiamehemper pukur kuahasine tamiueim ka me ualutara keip tamiueim tenas ueluatat. Gisina ka haijala toro lebangang mat naliliuolik tun, ²³bo ahik puk mata ueltupara tar tukununa Iesu. Gisina ka la tapokisiha, kara me hire tamiueim pare, gisina ka banga tar toking anggelou, doh

rasina kura kula pare, Iesu inggono ke tua. ²⁴ySong ka la ponomer gisiameher uanotoumieim toro lebangang mat, kara la tupara sira kompeeit ka hire per kuah, bo gisina puk halana ta banga tatanon.”

²⁵Kare kula Iesu tasrasina pare, “Ing-goum deho tuktukara harahampe, ing-goum halanampe tung tagorong mana tar inete geka bolo uahiuagir propet ka mene tauete pe pare, ²⁶zInggonene Kristo, e turung huata tar burehentieher uelmahing, song re turung lekala tena uiniator.” ²⁷aDoh inggono ke mene ualasira tasrasina e uakekena tur pe tang Moses, doho propet uakap, kare mene uakalahara pono hape re kula peninar uelhire ger nang God gere uelhire uatuha katongo tatanon.

²⁸Git ra la uahuhut pesina tar uaneit ra lang lain, Iesu ke guata sira pare, e lang uoum liu tasrasin. ²⁹Bo kura menmene tane hamas puk rasina tatanon, kaura kula pare, “Uangoul tagu tamiraeim gere lang hu manasa per pisar, kare kitup manason.” Song ke la leka tagumpela Iesu tar uangoul tagu tasrasin.

³⁰Tar binakeit ke tabila tagu Iesu tasrasina toro teboul, kare kale toro bereit, kare heir tar uauia tang God, kare pis polaka tang roon, kare uakekena tar heir tasrasin. ³¹Song ke kalahara ramatas rasin, kaura bang paroko tatanon, bo inggono puk ke tabo ualutarain tasrasin.

³²Kaura ueluelmeneis rasina pare, “Inggono ke uatentur tara balagiraeig tar binaka ke memene toanaha tar lel, kare uakalahara tagiraeig tonu uelhire God.” ³³Kura tentur kai kompe rasin, kaura la tapokis manas i Jerusalem. Te kura la uelutpara to rasina tasir aposoulusiner siokor hangaul, doha tang

siok, karo gisiamehesine ra uangoul tagu tasisina ra siokor pepe tokah ³⁴bkara kulkula tasrasina pare, “O mana tun! A Tamata Noman ke tua tapokis, kare kotpokoso to tang Saimon.”

³⁵Song kura hire rasina tar haua ke kotpokoso to tasrasina tar lel, doh hape pono kura bang paroko pe rasina tang Iesu tar binaka ke pis toro bereit.

Iesu ke kotpokoso toсно tamatang uakuakelul

³⁶Tar binakene ra ueluelmene peisisin, Iesu ke me tur i uantinanina tasisin, kare kula pare, “O hiarou o moko tamiuoum.” ³⁷cDoh gisina ka siokor kasian, kara sokor, ka namana sira pare, ka bang huara me iabener tamat, ³⁸kare kula Iesu tasisina pare, “Ae maeit kung kasianoum, karung tortorik ninaman? ³⁹Ge Inngo puk peonene, bangame tar toking limouguo, doha toking kekeiguu. Tuha totoguo, doh mu bang. A iaben ahik tagu me tukunun, doh me hirona sira ngohina rung banga peoum totoguo.”

⁴⁰Tar binaka ke kula uakapa peono pare, kare ualasingua tasisina tar toking liman, doha toking keken. ⁴¹Gisina ka uahantiehe tun, kara lutara ke tua tapokis pe Iesu, bo halana haraha puk ta tagorong man ge paro mana tun roon. Kare dangatono tasisina pare, “Kaeig me ineteng einane tamiuoum.” ⁴²Kara heirisina tatanono toro mahar ian o moh, ⁴³kare kaleono tang roon, kare ein toane ra uangoul pesin.

⁴⁴dInggono ke kula tasisina pare, “Gine ter haua ku hireio tamiuoum tar binaka ru pepe tagu haraha tamiuoum. A mamang inetelik ra me uakotpokosoig a man, teaninanitir nibolo uatuha totoguo tena ualatut Moses, doho propet, kare

y24:24 Jon 20.3-10

z24:26 Luk 9.22

a24:27 Ker 22.1-21; Ais 53

b24:34 1Ko 15.4-5

c24:37 Mat 14.26

d24:44 Luk 9.22

toro bukung kereker.”⁴⁵ Song ke uatakapuk Iesu teres ninamasina mara banotosina tar naman manate tonu uelhire God.⁴⁶ Inggono ke hire tasisina pare, “Gine te hape ka hire pelaion. Kristo e turung kale uelmahing, kare turung tua tapokis tur toro mat tar uatouononor marein.⁴⁷ A hanganono ra turung uelhire tauetein toro mamang pang uan uakapa tun, e uakekena tur i Jerusalem tasir tamata tar uapalih mara kusa luaraig nas niguata uasa.⁴⁸ Inggoum kung siokor banga tar ineteninane.”

⁴⁹“Inggou u turung heiriha tamiuoum tar haua ke ualapagahain Tamoug. Doh inggoum mu uangoul kompeane tar uan

uleik e tuka tar binaka rung kaleoum tena nitampopokoho God gere la tur i Heuen.”

Iesu ka kale tapokis taroin i Heuen

⁵⁰Tar binaka ke uoum keipila Iesu tasisina toro mok i Betani, inggono ke hue kai tar toking liman, kare mene uaia tasisin.⁵¹ Tar binakeit re menmene uaiaono tasisin, kare hiliuon, kare kale kaingua God tatanon i Heuen.⁵² No tamatang uakuakelukono ka uatakai i rana tatanon, kara la tapokis keip tar niuaha uleik i Jerusalem.⁵³ Doh gisinasine ra uangoul ualataono tar umang lotu ger dedeil tar uatakai tang God.

^e24:48 Jon 15.27; Apo 1.8 ^f24:49 Jon 14.16; 15.26; Apo 1.4

Jon

O uelhire uaia ke boloin Jon

O bolobolo tang Jon

Jon inggono te kaluana tun Iesu kare uahuhutuntiehe tun. Toro touono ro krismas Jon ke uangoul tagu tang Iesu. Doh Jon ke banga tena niguata Iesu. Doh ke tagorong manangua tang Iesu a God (Jon 1.1-18). Inggono ke bolo toro Uelhire Uaia mara turung tagorong mana ponor gisiamer tamat (Jon 20.31).

Jon ke banga tar bureher inete uaia uelhirinitier uiantiehe tun ke guataig Iesu (Jon 21.25). Iesu ke guata uaia tasir tamata gesir moumouh (Jon 4.43-54). Iesu ke lala i rana tar laur (Jon 6.14-24). Inggono ke heir tar niein tasir tamat ke siauais tar tolimir taosein (Jon 6.15). Doh Iesu ke me tua tapokos poluk git ke mate baka pe (Jon 20). Jon e mene uakalahara sira tar inetenine ke kotpokoso te misiana sira kompe tar giniameher bukunine toro Uelhir Uaia.

Bo ra mahar inete uleik tun i lolono tonobolobolo Jon ahik pahomenmene tun tagu tang niguata uaia.

A bureher mahar e menmene kalehe puk tena menmene Iesu. Ngohina sira pare, (Jon 13-17) a nibolo uahualala na bounginahia, kare la matenguaon. Jon ke namana tena menmene Iesu pare, auia tun (Jon 3.34). Doh inggeig paki uauia tena menmene Iesu. Geti tagorong mana inggeig tena menmenon, song ri turung uangoul tagueig tang God i Heuen tar mamang binakalik. Bo gete haikieig pahi uakeluk tang Iesu, God e turung heir me uabang manate tagigieg (Jon 3.36).

Iesu ke mate mari la uangoul tagueig tang God i Heuen (Jon 3.16). Temeit inggeig paki siokor hire tauete liu tenagi niguata uasa tang God. Doh temeit inggeig paki kilame tang Iesu i lolono tenagi niuangoul. Song ri turung pokosieig o butuna God (Jon 1.12).

O Mahar 1

O Uelhire gero tua

1 ⁸Tar uakikilanganar binak o moko ro Uelhire, doh roono ro Uelhire o moko tang God, doh roono ro Uelhire te God. ²Doh tar uakikilanganar binak, roon o uangoul tagu tang God. ^{3h}Roono ko uakotpokoso tar mamang inetelik, ge pakene taboin roon, a mamang inetelikinine ahik pahe matot e kotpokos. ⁴ⁱI lolono tatanon e mokor nitua, doh inggonor nitua e luh uakubara tasir tamata uakap. ^{5j}Doh tar kitup, inggonor Luh e luh uakubara tar mamang buturulik. Doha kitup ahik pahe matot e ragom tane tatanon.

^{6k}Doha tang siokor tamata hangana tang Jon, inggono ke ualatuehain God. ⁷Inggono ke laha tar me hire tasir tamata toro mana tar luh, maeit o tamata ra turung longoro tur tatanono tar luh, kara tagorong man. ^{8A}A luh ahik pah te Jon inggono ke la pukuha tar me hire tasir tamata toro mana tar luh. ^{9l}Doha luhonener mana gere luh uakubara tasir tamata uakap, e laha i kot.

¹⁰O Uelhire roono ko uangoulane i kot, doha mamang inetelikane i kot, ko uakotpokosoig roon, bo o tamata pukane i kot, ahik pah ka ate tun tang roon. ¹¹Doh inggono ke laha tasir tamatang tena uan, bo gisina puk ahik mata banga uaia tatanon. ¹²Bo o tamata pukusine

⁸1:1 Jon 17.5; 1Jo 1.1-2; UGO 19.13 ^h1:3 1Ko 8.6; Kol 1.16-17; Hib 1.2

ⁱ1:4 Jon 5.26 ^j1:5 Jon 3.19 ^k1:6 Mat 3.1; Luk 1.13-17,76 ^l1:9 Jon 8.12

ka banga uايا, kara tagorong mana tatanon, inggono ke heir tasisina tar uايا pare, o bung tuna God. ^{13m}Ge gisina pe ro bung tunon ahik pah ka kot-pokoso tar nimalara tasir tamata ue o bung tamas, bo gisina ka pokoso tena nimalara God.

¹⁴ⁿO Uelhire ko pokos a tamat, karo me uangoul tagu tagigeig, inggeim king banga tena uleikir nitampopokohon, a hamhamasalik,[§] kara uauaman. Inggonor nitampopokoho ter nanar keketik bulout ger tang siok geke la tur tang God.

¹⁵Doh Jon ke kula ualeik, kare hire tauete tun toro mana pare, “Inggono, teene geku hireo tamiuoum, a tamata gere lame i mud totoguo inggono ter i rana uainintiehe tun, teeit inggon e uangoulung sioun totoguo.” ¹⁶A hamhamas, kara uauaman, maeit a nitabila uايا e la tur tatanon e laha tagigeig.

^{17o}A ualatut ke heirihag God tang Moses, bo a hamhamas, karo uauaman e la tur tang Iesu Kristo. ^{18p}Ahik me tang sioko ke banga tang God, bo God ger Tuna God ger Keketik Bulout, ger tang siok, inggono tere uangoul uahuhut tang Taman. Inggono teke uaate tagigeig tatanon.

Jon ger tang uahuhu ke hire tasir tamata tang Iesu

¹⁹Gine te Jon ger uauamana ke hire toro mana tasir patere mesir Libai tar binaka ka ualatue mer Ju gera uangoul i Jerusalem tasisin, kara me dangatanguasina pare, “Ingga te mai?” ²⁰Jon ke hire uakodkodoho kompe, kare hire

uakalahara pare, “Inggo ahik pah te Kristo.” ^{21q}Temaeit ka la dangatanguasina pare, “Bo ingga te Elaija ger propeiting sioun? Ue ingga ter propeit?” Kare hire tapokisono pare, “Inggo ahik!”

²²“Ingga o hire tapokis tamiueim me puh maring la hire inggeim tasir tamata geka ualatueme tamiueim, ingga te mai tun ue hape ro kila katongo peia?”

²³Kare hirengua Jon tasisina tar puhung uelhire geke kulain Aisaia ger propeit pare,

“Inggo ter uuanar tang siokor tamata gere kula ualeik tur tar butur padene pare,

‘Uakodkodoho tena leler Tamata Noman.’” *Aisaia 40.3*

²⁴Doho gisiamer Parisi gesir niualatueme ka dangatangua tang Jon pare, ²⁵“Ae maeit ro kula ahik pah Kristo, doh Elaija, doh ahik pono pah ter propeit, bo maeit ro uahuhua tasir tamat?”

²⁶Kare hire tapokis Jon pare, “Inggo u uahuhu keip puk tar kodom, bo i uantinina tamiuoum kaeinir tang siokor tamata mung teleioum. ²⁷Inggono tere turung la uakelukume totoguo. Doh inggo ahik pahu matot u luaka liu tar bungbunguna na suon.” ²⁸A niguatanin ke siokor kotpokoso to i Betani tar pang giamehe nar kodom i Jodan teke uahuhu to Jon tasir tamat.

^{29s}Tar uagiamehenar marein Jon ke banga tang Iesu re la peme tatanon, kare kula pare, “Banga tena Tunar Sipsip God^{**} gere kale liu tar niguata uasaane i kot. ^{30t}Teono, teene geku hireio tamiuoum e turung uakelukume totoguo,

[§]1:14 hamhamas. Tok Pisin “marimari” English “kindness, grace, grasia.”

^{**}1:29 “Na Tunar Sipsip God.” O Ju ra uahung tasir sipsip tang God tar kale liu teres niguata uasa.

^m1:13 Jon 2.11; 3.3-6; 1Pi 1.23 ⁿ1:14 Pil 2.7 ^o1:17 KT 34.28; Roum 6.14

^p1:18 KT 33.20; Jon 6.46; 1Ti 6.16 ^q1:21 Ual 18.15,18; Mat 11.14

^r1:27 Jon 1.15 ^s1:29 Ais 53.6-7; 1Pi 1.18-19 ^t1:30 Jon 1.15

bo inggono puk ter mamahoholik to-
togo, teeit inggon e uangoulung sioun.
³¹ Sioun inggo u tele tatanon, bo ter
puh puk inggo ku me uahuhu keip puk
tar kodomo mara ate umatotor Israel
tatanon.”

³² ^uKare hire tauete Jon pare, “Inggo
ku banga tar Iabena Dedeil ke la turuha
i Heuen ke la siraha misiana tar baluh,
kare me toko tatanon, kare pepe deden-
gua. ³³ Doh tar binakon inggo ahik pah
ku ate tatanon, bo God geke heiriha to-
togo tar me uahuhu keip tar kodom,
inggono teke hire totogo pare, ‘Ingga o
turut banga tar Iabena Dedeil e hiuoha,
kare me toko tar tamat, kare pepe de-
dengua, inggono ter tang sioko re turut
uahuhu keip tar Dedeilir Iaben.’ ³⁴ ^vDoh
inggo ku banga tar inete ke pokoso tun
toro man. Doh inggo gine ru hire tamiu-
oum a buloutene ter Tuna God noman.”

A tang torikir tamata kura uakeluk tang Iesu

³⁵ Doh nar uagiamehener marein
Jon, doh na tang torikir tamatang
uakuakeluk ra pepe poluk tar buturuon.
³⁶ ^wKare banganguaono tang Iesu ke
me siaua pela tasisin, kare kula pare,
“Banga tena Tunar Sipsip God!” ³⁷ Doh
na toking tamatang uakuakeluk Jon
kura longoro ke kula peono pare, kaura
uakelukungua tang Iesu.

³⁸ Kare uiliangarangua Iesu, kare
banga tasrasin ura uakeluk peme
tatanon, kare dangata pare, “A hau ura
siris raoum?” Kaura kula rasina pare.
“Ia ro uangoula, Rabai?” (Tera kila
peinir Tang Ualasilir).

³⁹ “Mura lame maura me banga
raoum.” Doh rasina kura uakeluk
tatanono nar moloi, kaura la

banga tar butur re uangoulon, kara
uelgumgumungua ke la tuka nareiu
bolboloh.

⁴⁰ ^xDoh Andru tahina Saimon Pita ing-
gono ter tang sioko tasrasina gekura
longoro tar haua ke hirein Jon, kaura
uakeluk tang Iesu. ⁴¹ Doh ahik me man-
asan, kare sir Andru tang tahina tang
Saimon, e marang uahire uakikilanga
tatanono pare, “Raeim kira tupara man-
asa tar Mesaia” (tera kila pein Kristo).
Kare keipinguaono Andru tang tahina
tang Iesu.

⁴² ^yKare banga Iesu tatanono, kare
kula pare, “Ingga Saimon ger tuna Jon,
ingga ra kilanguaia tang Sipas” (tera kila
pein Pita).

⁴³ Nar uagiamehenar marein Iesu
ke la i Galili, kare ueltuparangua
tang Pilip, kare kula pare tatanon,
“Uakelukumeane totogo.” ⁴⁴ Pilip te
mes Andru, doh Pita ra uangoul tokaha
tar siokor uan i Betsaida.

⁴⁵ ^zDoh Pilip ke ueltupara tang
Nataniel, kare hire tatanono pare,
“Inggeim king ueltupara manasa tar
tamata geke bolo umatotoin Moses i
lolono tar ualatut, doho propeit pon,
inggono te Iesu ger peng Nasaret ger
tuna Josep.”

⁴⁶ Bo Nataniel puk ke kula tapokis
tang Pilip pare, “A haua here song re tu-
rung pokoso me inete uaia i Nasaret bo?”

Kare kula tapokis Pilip pare, “Lame
maro me banga.”

⁴⁷ Iesu ke banga tang Nataniel ke
me la uahuhut pe tatanon, kare kula
pare, “Banga tar tamatene inggono ter
peng Israel tun, doh inggon ahik paha
bohoboh.”

⁴⁸ Kare dangata Nataniel tang Iesu
pare, “Ae maene ro atea totogo?”

Kare hire tapokis Iesu pare, “Inggo ku banga totomua o pepe i kukulebanga toro momolouina na ro fig.”^{††}

^{49 a}Kare kulangua Nataniel tang Iesu pare, “Ir Tang Ualafir, ingga ter Tuna God. Ingga tenas Toiar Israel!”

⁵⁰Kare kula Iesu tang Nataniel pare, “Ingga ko tagorong mana totoguo, teeit ku hire peo pare, ku banga to totomua toro momolouina ro fig, kare la pokoso Pilip, kare hire totomua totoguo. Doh ingga o turung banga me inet a uleikin-tiehe tar inetonene.”^{51 b}Kare mene ualatumana poluk Iesu pare, “Inggo gine ru hire tun tamioum toro man. Inggoum mung turung bang i Heuen e takapuk. Doh no anggelou God ra turung kaete kai, kara turung hiuoha tar keketik bulout ger Tunar Tamat.”

O Mahar 2

Iesu ke uapalih tar kodomo tar bino

2 Kura karuh bakar torikir marein, kara guatanguain ro le tar siokor uaning Galili ra kilain i Kena. Doh tinana Iesu e uangoul tagu pon. ²Doh Iesu mesno tamatang uakuakeluk ka kila ponois tar me uangoul tagu tar binakene toro le. ³Doh tar binaka ke kapar bino, tinana Iesu ke kula pare tar tun, “Gisin ahik baka poluk mes bino.”

^{4 c}Kare hire tapokis Iesu pare, “Tinoug! Ae maene ko lamea totoguo? Nag binako halana te pokos.”

⁵Kare kula tinanono pare tasir tamatang kalekinale, “Mu guata uakeluk kompe tar inete re hiregionu tamioum.”

⁶Doh tar umon e tokor tonomor nouh palau a itung kodomo, kare tar uabusa

tar inete tar niguatang tasir Ju. Doh tar itung kodomonin a siok e matot e kale tar 100ir lita.

⁷Kare kula Iesu tasir tamatang kalekinale pare, “Mu kale tar nouh palauanine, karung la itu me kodomo.” Doh gisina ka itu uauouu tunungua taninin, ⁸kare kulono tasisina pare, “Ding uapuhina sikoro tar kodomo, karung keip tar tamata geke guluh toro le.” Kara keipinguasina tar kodomo tar tamata geke guluh toro le.

⁹Doh gine ke inum tagin peono taninin, a kodomo ke la uapalih tar bino. Doh inggon ahik pahe ate, ia ka kale turigir bino, bo o tamatang kalekinale puk geke keipime tar kodomo, gisina tera ate. Doha tamata geke guluh toro le ke kila tar buloutene ke le, ¹⁰kare kula pare tatanon, “Tar inete sira pare, o tamata ra uoto bul uakikilanga tar binoniner uia, song i muduhia tar binaka ra inum uapopouluana sikoro manasa peisisin, song re kale tauetono tanininer bino ahik paha uia tun, bo ingga ko patoho tar bino uia tun, song gine daana ko kale taueta taninin.”

¹¹Ingonene ter uakikilanganar uahire ke guatain Iesu. Ingonono ke guata to i Galili tar uan i Kena teke uakalahara toono tena nitampopokoh. Doh no tamatang uakuakelukono ka bang, kara tagorong manangua tatanon.

^{12 d}I muduhia Iesu me tinan, doho bung tahin, doh no tamatang uakuakeluk ka la tar siokor uan i Kaperneam, kara la uangoul sikoro baka tar uanon.

^{††}1:48 o fig. O douk o tur i Israel, o tamat ra ein tar kukuanana roon

^a1:49 Mat 14.33; 16.16; Mak 3.11 ^b1:51 Uak 28.12 ^c2:4 Jon 7.30; 8.20
^d2:12 Mat 4.13

**Iesu ke geil tauete tasir
tamatang uabulbulau iuma
tar umang lotu ger dedeil**

¹³^eTar binaka ko la matotoin ros niein uleikir Ju gera kilain, Leke Liu ro Mat,^{‡‡} Iesu ke la i Jerusalem. ¹⁴Dohi uma tena morener umang lotu ger dedeil, inggono ke la ueltupara tasir tamata ra uabulbulaua tasir kau meisir sipsip, doho baluh. Doho gisimehe ra tabila tar patehe ra uelualialihe tenas mani.^{¶¶} ¹⁵Doh Iesu ke tuha tar kalopis, kare geil tauete keip tasisin, doh nosio sipsip, karo kau iuma tena morener umang lotu ger dedeil, kare ualahur tasisina ra hiliu, kare sarasara ueltebeir tenas manisine ra ueluelualialihe, kare kaba ding tar pateh. ¹⁶Kare kula tasisine ra uabulbulaua tasir baluh pare, “Kale liu tasir inetesineane, ahik pah mung guata tena uma Tamouguo pare, a umang bulbulaua to.”

¹⁷^fDoh no matatang uakuakelukono ka namana tapokisingua tar puhung uelhire geke boloin pare, “Reg uleikir nimalaro tenang uma, inggo u ueltadantiehe tun tenang uma tar kaukeke misiana toro hue gane i lolono toro baloug.”

¹⁸Temaeitie o Ju gesir mahoho ka ualahur tatanono pare, “Ingga o touo tagin me inete maring ate inggeim pare, ingga a tohangoum ko guata pe tar puhonene?”

¹⁹^gDoh Iesu ke hire tapokis pare, “Mu dura tar umang lotuener dedeil, karu

turung uatentur tapokiso tatanono tar touonor marein.” ²⁰Kara hire tapokisir Ju pare, “A umang lotuene dedeil ke kale toro toueit, doho tonomo ro hangaul ro krismas ka tuha pein. Doh ingga o tagorong manampe pare, o uatentur tar umang lotuonener dedeil tar touonor marein puk?” ²¹^hBo Iesu puk ke mene uatuahta tola tar umang lotu ger dedeil tar tukununa katong. ²²ⁱDoh tar binaka ke mate Iesu, kare tua tapokis, no matatang uakuakelukono ka namana tapokis ke hire baka pe Iesu tar puhonene, kara tagorong mana toro bolobol, karo uelhire ke hirein Iesu.

²³^jDoh tar binaka re uangoul haraha Iesu i Jerusalem tar guata toro niein uleik, Leke Liu ro Mat, o bureher tamata ka tagorong mana tatanon, teeit gisina ka banga tar nitouo ke guatagion. ²⁴Bo Iesu puk ahik pah ke uamoko tun tena nitagorong mana tasir tamat, teene inggon e ate uakapa tun tasisin. ²⁵Doh inggon ahik pono pah ke malara me tamat e uelhire ualasira tatanono tasir tamat, teeit inggon e ate tar haua re moko teres ninamanasin.

O Mahar 3

Nikodemus ke me tupara tang Iesu

3^kA tang siokor tamata hangana tang Nikodemus inggono ter tang sioko ponor Parisi, kare ter tang sioko pono tasir mamahoholiking Ju. ²A siokor boung Nikodemus ke la tang Iesu, kare kula pare “Tang Ualasil!” Inggeim mi

^{‡‡}**2:13** O niein uleik o nasir Ju ra kilain, “Leke Liu ro Mat.” O uanamana huara dede tar binaka toro mat o uleik ko leka liu tasir Ju i Isip. O Ju ra kil, a “Pasova.” Timana toro Bolobolong Kale Tapokis Mahar 12.

^{¶¶}**2:14** sipsip, kau, doho baluh, kara mani ra guata kepig a uahung tang God tar umang lotu ger dedeil.

^e**2:13** KT 12.1-27 ^f**2:17** Ker 69.9 ^g**2:19** Mat 26.61; 27.40

^h**2:21** 1Ko 6.19 ⁱ**2:22** Luk 24.6-8; Jon 12.16 ^j**2:23** Jon 7.31

^k**3:1** Jon 7.50; 19.39

ate totomua, ingga ter ualualasir o la tur tang God, teeit ahik me tang sioko re matot e touo me inete misiana ko guata pea. A tamat e guata puk gete uangoul teil God tatanon.

³^lKare kula Iesu pare, “Inggo gine ru hire tun tamiuoum toro man, ahik me tang sioko re matot e bang huara Tena Nitoia God e banoto geta paho baka polukin.”

⁴Kare kula Nikodemus pare, “Bo hape puk tar tamata ger mahoho manas, hape ra poho uagiamehe poluk pein? Ge inggono pe ahik pahe matot e hiku tapokis toro pohpohono tinan. Hape ra la poho uagiamehe poluk peinir tamat?”

⁵^mKare kula tapokis Iesu pare, “Inggo u hire totomua toro man, ahik me tang sioko re matot e leke Tena Nitoia God, e matoto tun gete pohor kodom, doha Iabene tatanon. ⁶ⁿA nituaene tasir tamata ke kotpokoso tur tasir tamat, bo a nituaener nanar Iabene ke kotpokoso tur tar Iabene Dedeil. ⁷Ahik paho lutar getu hireo totomua pare, inggoum ra poho uapoul polukusiuoum. ⁸A rom e u tar butur re malarain. Doh ingga o longoro tar ururungunon, bo ingga puk o tele tar butur re tenkana turur rom ue ia re lauaturkon. Inggono ter siokono puk tasir tamata uakapa geke poho turis tar Iabene Dedeil.”

⁹Kare kula Nikodemus pare, “Hapengua re turung pokoso per inetenin?”

¹⁰Kare kula Iesu pare, “Ingga ter tang ualualasira ra ueltadainir Israel, ingga ahik paho naman manate tar inetenine? ¹¹Inggo u hire totomua toro man. Inggeim mi mene tar inete ring atein, karing hire tar inete king bangain, bo inggoum puk ahik pah kung kale tar haua king hiregieim tamiuoum. ¹²Ing-

goum ahik pah kung tagorong mana tar binaka ku hire uamatoto tamiuoum tar ineteng gane i kot. Hapengua rung tagorong mana peoum getu hire uamatoto tamiuoum tar ineteng Heuen? ¹³Ahik me tang sioko re matotong la i Heuen ter Tunar Tamata puk manasa gere la turuha i Heuen. ¹⁴^oMisiana ke uakuse kai pe Moses tar soi i rana tar puhung douk tar butur padenen, doh ter siokono kompe tar Tunar Tamat ra uakusa kaia ponoin i ran. ¹⁵^pMaeit mair tamata re tagorong mana tatanon, inggon e kale tar nitua gere moko dedengua.”

¹⁶^q“God e malauelhirintiehe tun tasir tamatane i kot, kare heir tar tuna ger keketik bulout a tang siok. Mais uakapa tun ra tagorong mana tatanon, ahik pah ra turung mat, ge a nitua pe e moko dedengua tasisin. ¹⁷^rTeene God ahik pah ke heiriha tar tun tar me kedanga tasir tamatane i kot gera uangoul uasa. Bo God ke heiriha tar tun tar me uelkarus tasisin.”

¹⁸^s“O tamata gera tagorong mana tar tuna God ger keketik bulout, gisin ahik pah ra kedangais pare, ka guata uasa, bo mais ahik pah ra tagorong man, ka kedanga uoumis pare, ka guata uasa, teeit gisin ahik pah ka tagorong mana tar Tuna God ger keketik bulout a tang siok. ¹⁹^tTer tengkana teene, maeit ka kedangaisin; ‘a luh ke hiuoha i kot, bo gisina puk ahik pah ka malara tar luh. Gisina ra malara tar kitup, teeit gisina ka guata tar ineteniner sa.’ ²⁰Mais uakapa tun ka guata tar ineteniner sa, gisin e tokouasais tar luh. Doh ahik pah ra turung la uahuhut tar luh, teene inggonor luh e turung ualasira uakalahara tar mamang niguata uasalik ra guataisisin. ²¹Bo mais

^l3:3 Mat 18.3; 1Pi 1.23 ^m3:5 Isk 36.25-27 ⁿ3:6 Jon 1.13 ^o3:14 Aha 21.9; Jon 8.28; 12.32 ^p3:15 Jon 20.31 ^q3:16 Jon 3.36; 10.28; Roum 5.8; 8.32; 1Jo 4.9-10 ^r3:17 Luk 19.10 ^s3:18 Jon 5.24 ^t3:19 Jon 1.5,9; 8.12

ra uangoulur uauaman, gisina teka lame tar luh, teene a inete geke guataigisin, e ualasira pare, e la tur tang God.”

Iesu me Jon ger tang uahuhu

²²U muduhia tar inetenine Iesu mesno tamatang uakuakeluk ka la tar butur i Judia teka la uangoul sikoro bakasin, kara uahuhu tasir tamat.

²³Doh Jon e uahuhu pono tasir tamat i Ainon a buturuon e uahuhut i Salim, teeit tar buturuon a bureher kodom. Karo bureher tamata ra la uelhir tatanono mare uahuuono tasisin. ²⁴Tar binaka halana Herot te uamoko tang Jon tar karabus. ²⁵Doho gisiamene no tamatang uakuakeluk Jon ka uelperere mer tang siokor Ju tar nigutang tar uahuhur nasir Ju. ²⁶Temaeit gisina ka lame tang Jon, kara me kula pare, “Ir Tang Ualasir! Ingga o namana huara tar tamata, giala totomua tar pang giamehener kodom i Jodan ger tang siok geko menmene umatotoia? Inggon e uahuhu pon, doho tamata uakapa ka siokor hiliu totomua, kara la kompe tatanon.”

²⁷Kare kula tapokis Jon pare, “A tamat e matoto kompe e kale tar haua ke heirin God tatanon. ²⁸Vinggom katongo kung longoro ku hire peo. Inggo ahik pah ter Kristo, bo inggo ka heir uoumuhaio tar me kaleuato tena lelon. ²⁹Ramatang bulout timuh geura le, a bulout tena kuaha manasampe tar kuahon. Doh kaluanonor buloutener le timuh geke me poul tatanon ke tur, kare ualongoro tatanon, kare uahantiehe tun tar binaka ke longoro tar uauanar buloutonener le timuh. Inggon ter siokono kompe inggo u uahantiehe pon. ³⁰A hanganono tere turung i rana, kara hangouguo tera turung uaikotoin.”

A tang sioko geke la tur i Heuen

³¹W“A tang sioko geke la turuha i Heuen, inggono tere i ranantiehe tun tasir tamata uakap. Doh mai ger peng gane i kot, inggono ter nanar kot, kare mene umatoto tar ineteng gane i kot. Bo a tang sioko geke la turuha i Heuen, inggono ter i ranantiehe tasisina uakap. ³²XInggon e hire tar inete ke bangaig, kare longoroig, bo ahik puk me tang sioko ke kale tar inete ke menegion. ³³Bo mai ke sanga dede tar haua ke menegion, inggon e ualasira pare, God a uauaman. ³⁴Gitir tang sioko geke heirihain God e mene tena uelhire God, teene God ke siokor heir uadeil uakapa tun tar Iabenon. ³⁵YGod Tamanon e malaelhirintiehe tun tar Tun, kare heir keip tatanono tar nitampopokoho tar mamang inetelik. ³⁶ZMais ra tagorong mana tar Tuna God, gisina ra kale tar nitua gere moko dedengua, bo mais gera ueluelde tar Tuna God, gisin ahik pah ra turung kale tar nituaono ge na nimaliana pe God e turung moko dedengua tasisin.”

O Mahar 4

Iesu mer kuahang Samaria

4^aO Parisi ka longoro pare, Iesu ke uahuhu tasir bureher tamat, kare guata tasisina pare, no tamatang uakuakeluk kara la burehentiehe uain tasir nang Jon. ²Bo Iesu katong ahik pah ke uahuhu tasir tamat, no tamatang uakuakeluk pukuono teka guat. ³Doh Iesu ke ate pare, o Parisi ka ate kout tatanon, temaeit inggono ke hiliu i Judia, kare la tapokis poluk i Galili. ⁴Bo

^u3:22 Jon 4.1-2 ^v3:28 Mat 11.10; Jon 1.20 ^w3:31 Jon 8.23

^x3:32 Jon 3.11 ^y3:35 Mat 11.27; Jon 5.20 ^z3:36 Jon 3.16-18; 1Jo 5.12

^a4:1 Jon 3.22

tar lele pukene ke uakelukuion, ke lih polakala tar pang uan i Samaria.

^{5b}Dohi Samaria Iesu ke me pokoso tar siokor uan ra kilain i Saikar, inggono tere uahuhut toro mahar kot geke heirin Jekop tar tuna tang Josep. ⁶Doh na koue Jekop e moko tar buturuon. Doh Iesu ke maluana ka la pe tar puhung barah, temaeit inggono ke me tabila uahangua i tektekene tar koue. Doh inggono kaelainane nar mareing uleik, ⁷ter binaka ponono ke lamer kuahang Samaria e lang itu kodom, kare kulan-gua Iesu tatanono pare, “Uouh baka meg kodomong inumo.” ⁸Ter binakonene no tamatang uakuakeluk Iesu ka la bulbulaua niein tar uan.

^{9c}Doh gitir kuahang Samaria ke kula pare, “Inggo ku lutara tun ko dangata pea me kodomong inum, ge ingga pe a peng Ju, doh inggo a kuahang Samaria.” Teene o Ju mesir Samaria ahik pah ra ueldokout tokah.

^{10d}Kare kula tapokis Iesu pare, “Ingga o tele tar haua ke heirin God, karo tele maionene re hinga totomua me kodomong inum. Bo ge pako atea, ingga pake tero hinga totoguo maru heiro totomua tar kodomong tar nitua.”

¹¹Kare kular kuaha pare, “Ir tamata uleik, doh ia ro turung kale tura tar kodom gere heir tar nitua? Ge a koue pe a i lolon, doh ingga ahik menang ineteng itu keip. ^{12e}Ingga ter i ranantiehe tang Jekop ge tubumiueim geke heir tamiueim tar koueene, kare ininum tatanono meso bung tun gesir keketik bulout, karo no kau, karo no sipsip?”

¹³Kare kula Iesu pare, “Mais ra inum tar kodomene, gisina ra turung kamadaka poluk, ^{14f}bo mais ra inum tar

kodom geru turung heirio, gisin ahik pah ra turung kamadaka uapoul poluk.”

¹⁵Kare kular kuaha tatanono pare, “Ir tamata uleik ingga o heir totoguo tar kodomono mara hikinguao pahu kamadaka uapoul, kara hik pono pahu matot u tapokisime tar me itu kodomo poluk.”

¹⁶Kare kula Iesu tatanono pare, “La, karo la kila tenang bulout, kaura tapokisime.”

¹⁷Kare hire tapokisir kuahono pare, “Inggo ahik menagu bulout.”

Kare kula Iesu tatanono pare, “Ingga o uamana tun, ko hire pe pare, ahik menang bulout, ¹⁸bo ingga puk nang tang tolimir bulout, doh tar bulouteit ro kale teilia, inggon ahik pah tenang bulout tuna. Ingga ko hire nomana totoguo toro man.”

¹⁹Kare kular kuahono pare, “Ir tamata uleik, inggo song ku ate, ingga a propet. ^{20g}O bubungumiueim ra uoto lotu to tang God ganah i rana tar sisanene, bo inggoumur Ju mung kula pare, i Jerusalem ter uan ri lotu toeig tang God.”

²¹Kare hire tapokis Iesu pare, “Ingga o tagorong mana totoguo, a binak e turung pokoso tasir tamata pare, ahik pah ra turung lotu to i rana tar sisanene ue i Jerusalem tang God ge Tamagigeig. ^{22h}Inggoumur Samaria ahik pah mung ate uamatoto tang mai rung lotuin, bo inggeimir Ju mi ate uamatoto tang mai ring lotuin. Doh inggeimir Ju mi ate pono hape re uelkarus pe God tasir tamat, ge a puh peono teke la tur tasir Ju. ²³A binak e lame, doha binakono gine ke pokoso manas, doho tamatang lotu nomana ra turung lotu tang Tam-

^b4:5 Uak 33.19; Jos 24.32 ^c4:9 Esr 4.1-5 ^d4:10 Jon 7.37-38; UGO 21.6

^e4:12 Jon 8.53 ^f4:14 Jon 6.35 ^g4:20 Ual 12.5-14; Ker 122.1-5

^h4:22 2To 17.29-41; Ais 2.3; Roum 9.4-5

agigeig tar Iabena Dedeil,^{§§} doh toro man. God e malara tasir tamatasine ra lotu tatanon. ²⁴ⁱGod a iaben, kare mais ra lotu tatanon, gisina ra lotu keip tar Iabena Dedeil, doh toro man.”

²⁵Kare kular kuaha pare, “Inggo u ate tar Mesaia e laha, ra kilain tang Kristo, doh tar binaka re lahaon inggon e turung uakalahara tagigeig tar mamang inetelik.”

²⁶^jKare kula Iesu pare, “Inggo teene ru menmene totomua.”

O tamatang uakuakeluk ka pokoso tapokis poluk tang Iesu

²⁷Iesu ke mene tar puhonene, kara pokoso tapokisingua no tamatang uakuakelukon, kara me lutara ka banga pe tatanono re menmene pe tar kuah, bo ahik puk me tang sioko tasisina ke dangata pare, “A hau ro malarai ue ae maene ro ueluatata keipa tar kuahene?”

²⁸Song ke laonor kuah ke hiliu tena itung kodom, kare langua tar uan. Doh inggonor kuaha ke la hire tasir mama-hoholik pare, ²⁹“Mu lame marung me bangoum tar tamata ke hire totoguo tar mamang inetelikinine ku guatguatagio. Hape rung namana peoum, inggono here ter Kristo?” ³⁰Temaeit gisitir tamata ka hiliu tar uan tar la banga tang Iesu.

³¹Doh tar binakono no tamatang uakuakeluk Iesu ra ualualahur tatanono pare, “Tang Ualafir, ein baka tar niein!”

³²Bo inggono puk ke kula tapokis pare, “Inggo reg nieining ein, ginit ahikioum pah mung ate uamatot.”

³³Temaeit gisit no tamatang uakuakelukono ka ueldangata katongois, “A hau, here me tamata manasa ke heir mena nieinon?”

³⁴^kKare kula Iesu pare tasisin, “Regu nieino te pare, inggo u guata uakeluk tena nimalara God geke heiriha totoguo, karu uakapa baka tena kalekinaleon. ³⁵^lInggoum mung uoto kula pare, ‘A toueit bakar bialok, song ter binakang ueuer.’ Bo inggo gine ru hire tamiuoum, puka tar matamiau, karung bang i koboro ke matoto manasainir binakang ueuer. ³⁶^A tamata geke ueuere tar niein, inggono ka bulauain, kare uamoko toto tar nieining tar nitua gere moko dedengua. Maeit mai ke lebe tar iom, kare mai ke ueuer, rasin ura turung siokor uaha tokaha tar siokonor binak. ³⁷Temaeit roono rone ro uelhire o mana tun pare, a tang sioko re leb, kara tang sioko re ueuer. ³⁸Inggo ku ualatue tamiuoum tar la ueuer, doh inggoum ahik pah kung kalekinale tagu tar iomon. Doh inggoum kung kale niein to puk tenas kalekinaler gisiameh.”

O bureher Samaria ka tagorong man

³⁹O bureher Samaria tar uanonene ka tagorong mana tang Iesu, teeit ke hire per kuaha pare, “Inggono ke hire tauete tar mamang inetelik ku guatguatagio sioun.” ⁴⁰Temaene tar binaka ka lamer Samaria tang Iesu, gisina ka petutup tun tatanono tar uangoul tagu tasisin. Doh inggono ke uangoul tagungua tasisina tar torikir marein.

⁴¹Doho burehengua poluk ka tagorong man, teeit tar inetenine ke menegion. ⁴²^mKara kulanguasina tar kuaha pare, “Inggeim ahik pah king tagorong mana puk ko me hire pea tamiueim, bo inggeim king longoro katongo pono tena uelhireon, karing tagorong man, doh inggeim mi ate

§§4:23 O gisiameher tamata ra uoto bolobol tar puhene “tar Iabena Dedeil” pare, “tar iabeisisin.”

ⁱ4:24 Roum 12.1; 2Ko 3.17; Pil 3.3 ^j4:26 Mak 14.61-62 ^k4:34 Jon 6.38

^l4:35 Luk 10.2 ^m4:42 1Jo 4.14

manasa tar tamatonene ter Tamatang Uaudeil tasir tamata uakapane i kot.”

**Iesu ke uauia tar keketik
bulout a tunar tang siokor
uleiking tar gauaman**

⁴³Kura karuh bakar torikir marein, kare hiliu Iesu ke la i Galili. ⁴⁴“Doh Iesu ke kula baka sioun pare, “A propet ahik pah ra ueltadain tena pang uan katong.” ⁴⁵“Doh tar binaka ke la pokoso Iesu i Galili, o tamata ka uaha uangoul tatanon, teeit gisina ka uangoul tagu pono tar binaka ka guata toin no nieining Leke Liu ro Mat i Jerusalem, kara la banga tar mamang inetelik ke guatagiono toro niein roon.

⁴⁶“Song ke la tapokis Iesu i Galili tar uan i Kena geke uapalih toono tar kodomo tar bino. Dohi Kena a tang siokor uleiking tar gavaman e uangoul, doha tunon a keketik bulout e momouh e uangoul tar uan i Kaperneam. ⁴⁷“Doh tar binaka ke longorono tang Iesu ke la tur pe i Judia tar lame i Galili, inggono ke la tang Iesu, kare ualahur tatanono tar lame i Kaperneam mare me uariana tar tunono ger keketik bulout, teeit a tunon e uahuhutung mat.

⁴⁸“Kare kula Iesu tatanono pare, “Ing-goumur tamat ahik pah mung tagorong mana totoguo ue halana tung banga tar uahire, kara inete ra touoin.”

⁴⁹Kare kular tamatang tar gavaman pare, “Tamata Uleik o lame, tira la gete mater tuguo.”

⁵⁰“Kare kula Iesu pare, “A tumua e turung uia.”

Doh inggonor tamata ke tagorong mana ke hire pe Iesu, kare la. ⁵¹Doh tar binaka re lalaono tar lel, no gisi-ameher ualualatueono ka ueltupara kout tatanon, kara hire pare, “A tumua ger keketik bulout ke uia manas.”

⁵²Kare dangatangaonor tamatang tar gauaman pare, “Mangiha tunur binaka ke uiar tuguo?” Kara hiresina pare, “Nerau tar binaka ke balara sikoror pisar, teke ariana toon.” ⁵³Doh tamanon e ate tar binaka ke balara sikoror pisar, inggono ter binaka tun ke hire Iesu pare, “A tumua e turung uia.” Temaeit inggonor tamat, doho gisiamehesine ra uangoul iuma tar um, ka tagorong manangua tang Iesu.

⁵⁴“Inggonene ter uatorikinar nitouo geke guata toin Iesu i Galili tar binaka ke la turume i Judia.

O Mahar 5

**Iesu ke guata uaia to tar
tamata tar mour i Betsaida**

5 I muduhia Iesu ke la i Jerusalem tar marein uleik tenas lotur Ju. ²Dohi Jerusalem e uahuhut toro pirik, ra kilain Noso Piri-pirik Sipsip, menia pono tar tolimar sungkaka nisanga manas e mokor mour, doh inggono ra kilain pare, toro uelhireng Ju, “i Betsaida.” ³Doh tar buturuon o bureher tamata ra rikin keip teres mate tar sungkakanine i tek-tekene tar mour. O gisiamehe tasisin o kut, o peil, karo gisiameh o ininteil. Gisina ra uanguangoul tar laur gete ua-

ⁿ4:44 Mat 13.57 ^o4:45 Jon 2.23 ^p4:46 Jon 2.1-11 ^q4:47 Mat 8.5-6

^r4:48 Jon 2.18; 1Ko 1.22 ^s4:50 Mat 8.13 ^t4:54 Jon 2.11

monmonih kai.* ⁴(-) ⁵Doha tang siokor tamat e rikin, inggono ke rikin tono mate toro touono ro hangaul, doho tual ro krismas. ⁶Doh Iesu ke banga tar tamaton, kare ate pare, inggono ke rikin tono mate tar puhung barah, kare dangatangua tatanono pare, “Ingga o malar o uia?”

⁷Kare hire tapokisono pare, “Ir tamata uleik ahik me tang sioko re poul totoguo tar hiuako tar mour tar binaka re uamonmonih uakekener kodom. Doho gisiamehe ra lala tane totoguo tar binaka ru marang hiuako tar laur.”

⁸^uKare kula Iesu tatanon, “Tur kai, karo kale tonong rikin, karo la.”

⁹Doh ahik me manasan, inggonor tamata ke uia, kare kale kai tono rikin, kare la. A inetonene ke pokoso to tar Mareining Pepe Uah, ¹⁰^vtemaeit gisisir Ju ka kula tar tamata geke guata uaiain pare, “Daan A Mareining Pepe Uah, doh ahik paha uia tar ualatutur namiueim ro kalkale teil pea tonongo rikin.”

¹¹Bo inggono puk ke kula tapokis pare, “A tamatene ke guata uiaia totoguo, ke kula pare, ‘Kale tonong rikin, karo la.’”

¹²Kara dangatanguasina tatanono pare, “Mair tamatonene ke kula totomua pare, ‘O kale kai tonong rikin, karo la?’”

¹³Bo a tamata pukene ka guata uaiain, ahik pahe ate tang Iesu, teeit o burehe per tamata tar uanon, doh Iesu ke uaelhobourin tasir tamat.

¹⁴I muduhia Iesu ke ueltupara to tar tamatonon tar uamang lotu, kare kula pare tatanon, “Bang, ingga ko uia manas, karo uakenuangua tar guata uapoul tar niguatar sa, maeit a ineteniner sa uasa tun ahik pahe pokoso totomua.” ¹⁵Doh inggonor tamata ke hiliu, kare la hire tasir Ju pare, “A tamata geke guata uiaia totoguo, inggono te Iesu puk.”

¹⁶Temaeit gisinar Ju ra mamangusulungua tang Iesu, teene inggono ke guata to tar inetenin tar Mareining Pepe Uah. ¹⁷Bo Iesu puk ke kula tasisina pare, “Tamouguo e kalekinale dede kom-pela, temaene inggo u kalekinale sira ponompela.” ¹⁸^wDoho Ju ka longoro tar puhonene, kara suruntiehenguais res nimaliana tar tung pous tang Iesu, kara kula pare, “Tar uakikilangan Iesu ke kat-ego tar ualatutung tar Mareining Pepe Uah, doh gine daan inggono ke kula poluk pare, a Tamana tang God, kare guata katongoin pare, e uelmatout tang God.”

Iesu a tohagana tar guata tena kalekinale God

¹⁹^xTemaeit ke la kulangua Iesu tasisina pare, “Inggo gine ru hire tamiuoum toro man, a Tuna God ahik pahe matot e guata me inete me pahen, inggon e guata puk tar huar inete re bangain re guatain Taman, a hua re guatain Tamanon, inggon e la guata sira pon. ²⁰Temaeit, Tamanon e malaelhirintiehe tar Tun, kare ualasira tatanono tar mamang niguatalikir

*5:3 O gisiameher tamatang iate ra namana pare, a giameher puh e moko pono tar puhene. Doha puhon e hire pare, ‘Gisina ra uangangoul tar binaka re monmonih kair kodom. Doh tar binakono na tang siokor anggelou God e hiuako i lolono tar mour, kare uamonmonih kai tar kodom. Doh mair tamata re hiuo uakikilangako tar kodomo tar binakon inggono tere tupara manasa tono mater tamatene o kapa dedengua.’

^u5:8 Mat 9.6 ^v5:10 Neh 13.19; Jer 17.21 ^w5:18 Mat 26.4; Jon 7.1; 10.30

^x5:19 Jon 5.30

nana katong. Doh Inggon e turung ualasira tatanono tar uleikintieher inete tanine. Doh inggoum uakapa mung turung lutarantiehe tun. ²¹Te misiana puk tang Tamanono re uatentur tapokis pe tasir mat, kare heir tasisina tar nitua, te misiana pono tar Tunon e heir tar nitua tang mai re malarain. ²²Y Tamanon ahik pahe kedanga me tang siok, bo ke heir puk tar nitampopokoho tar Tun tere siokor kedang. ²³Z Maeit o tamata uakapa tun ra turung uatakaia tar Tunon misiana ra uoto uatakaia pesina tang Tamanon. Mai ge ahik pahe uatakaia tar Tunon, inggon ahik pono pahe uatakaia tang Tamanono geke heiriha tatanon.”

²⁴a “Inggou u hire tun tamiuoum toro man, mai re longoro tar haua ru hireio, kare tagorong mana tatanonene ke heiriha totoguo, inggono na nitua e moko dengua, doh inggon ahik pah ra turung kedangain pare, ke guata uasa, inggono ke hiliu uoum toro mat, kare kale tar nitua gere moko dede.”

²⁵ “Inggou u hire tun tamiuoum toro man, a binak e turung pokos, doh inggono gine ke pokoso manas, doho tamata geke mate manasa ra turung longoro tar uauanar Tuna God, kare mais ka longoro ra turung kale tar nitua. ²⁶A nitua e la tur tang Tamanono katong, doh inggono ter siokono kompe tar Tunon. Inggono ke heir tar uauia tatanono mare kale teilonono tena nitua katong pon. ²⁷Doh Tamanono ke heir tar nitampopokoho tar Tun ger keketik bulout mare kedanga tenas niuangoulur tamat, teit inggon a Tunar Tamat. ²⁸Ahik pah mung lutara tar puhene, a binak e turung kotpokoso tasir tamatasine ka mat, kare

gisine i lolono tar keu ra turung longoro pono tar uauanon. ²⁹b Kara turung tentur liu tonosio keu. Doh mais ka guata uaiia ra turung tentur tapokis, kara kale tar nitua gere moko dede, bo mais ka guata uasa ra turung tentur tapokis, kara kedangais pare, o tamata uasa.”

Iesu ter Tuna God

³⁰c Kare kula poluk Iesu pare, “Inggou ahik pahu matot u guata me inete teregu ninamana katong. Inggou u uakelulok tar puk tar uelhire, ku kale turig tang Tamoug. Temaene ru kedango tenas niuangoulur tamat, kare nag nikedango a kodkodoh, teit inggo ahik pahu guata katongo tereg nimalar, bo u guata puk tena nimalara Tamoug geke heiriha totoguo. ³¹Getu hire tauete katongo pukuo tenagu kalekinale, kare nagu niuangoul, a inete geru menegio ahik pah ra tagorong manaig pare, a man. ³²Bo a tang giamehe† gine re uangoul, inggono teke hire uamatoto tamiuoum totoguo, doh inggo u ate tar inete geke mene uamatoto tolagionono totoguo, ginin a man.”

³³ “Inggoum kung ualatueme tasir tamata tang Jon, kare hireono tamiuoum toro man. ³⁴Bo inggo katong ahik pahu namana me tamat e me mene ueleheir totoguo. Inggou ku mene puk tar puhonene mara uauelilisioum. ³⁵Doh Jon misiana toro lam gero luh, karo uabalo uakalahar, doh inggoum mung malara puk tar sisikinalikir binaka tar uaha tatanonor luh. ³⁶d Bo nagu uelhire pukuonine ku uelhire taueteig, a i rana uain ter nang Jon. A inetenine ru guatagio ter inetenin ke heirig Tamougou tar guat, ginina tere ualasira pare, Ta-

†5:32 Tar puh pare, ‘a tang giamehe’ Iesu e ueluatata tang God puk.

y5:22 Jon 5.27; Apo 10.42 z5:23 Pil 2.10-11; 1Jo 2.23 a5:24 Jon 3.15-18

b5:29 Dan 12.2; Mat 16.27; Apo 24.15 c5:30 Jon 5.19; 6.38

d5:36 Jon 3.2; 14.11

mouguo ke heiriha totoguo. ³⁷ eDoh Tamouguo geke heiriha totoguo inggono teke uatur uakalahara totoguo. Inggoum ahik pah mung matoto mung longoro tar uauanon ue mung banga tar porenon. ³⁸ Doh na uelhireon ahik pahe matot e moko tamiuoum, teeit inggoum ahik pah mung tagorong mana tar tang sioko geke heirihain God.”

³⁹ f“Inggoum mung timana uaia tun tono uelhire God, teeit inggoum mung namana pare, ginina tere heir tar nitua gere moko dedengua tamiuoum. Doh ginina tere ueluelhire uamatoto teil kompe totoguo. ⁴⁰ Bo inggoum puk ahik pah kung malara tar lame totoguo tar me kale tar nituaon.”

⁴¹ “Inggoum ahik pah ku malara ra uatakair tamata totoguo. ⁴² Bo inggo puk u ate i lolono tar koloumiuoum ahik pah mung malauehir tang God. ⁴³ Inggoum ku la tur tang Tamoug, karu mene tar mamang inetelikir nanon, bo inggoum puk ahik pah kung malara totoguo, bo gete la pukumer tang giameher tamata kare me mene katongoin, inggoum mung malara tun tatanon. ⁴⁴ Inggoum mung malara ra uatakair gisimeher tamata tamiuoum, bo inggoum katongo puk mung de tar uatolaua tar kale me uatakai e la tur tang God ge me pahen. Doh hapengua rung tagorong mana peoum totoguo?”

⁴⁵ “Ahik pah mung namnamana tola pare, u turung hireo tang Tamoug pare, inggoum kung uangoul uasa. A tamata gere turung hire tamiuoum pare, kung uangoul uasa, inggono te Moses. Doh inggono ter tamata rung tagorong mana teilium pare, tere turung poul tamiuoum. ⁴⁶ gDoh ge parung tagorong mana nomanoum tang Moses, inggoum

pakung tagorong mana pono totoguo, teeit inggono ke bolo tar uelhire gere uelhire teil totoguo. ⁴⁷ Bo geta hikioum pah mung tagorong mana tar haua ke boloin Moses, doh getu mene inggo hapengua rung tagorong mana peoum tar haua ku ualasilagio?”

O Mahar 6

Iesu ke ualaein tasir tamata ke siauais tar tolimir taosein

6 I muduhia Iesu ke hua kout tar pang giamehener kodom i Galili, a giameher hanganar kodomon i Taiberias. ² Doho bureher tamata ra uakeluk teil tatanon, teeit gisina ka banga tar nitouo ke guata peon, kare uauia tasisine resi mat. ³ Doh Iesu ke kaete kaia tar ponponin mesno tamatang uakuakeluk, kara la tabila totongua. ⁴ Doh tar binakono ko uahuhut ponoin ro niein uleik tasir Ju, “Leke Liu ro Mat.”[†] ⁵ Doh Iesu ke uatadain, kare banga tasir burehentieher tamata ra uakeluk teil pe tatanon, kare kula pare tang Pilip, “Iangua ri bulaua tureig me niein mare uelmatout tasir tamatasine mara ein?” ⁶ Iesu e marang uatolaua tang Pilip, maene ke dangata tatanono pare, teeit inggon e ate manasa hape re turung guata pe.

⁷ Kare kula Pilip pare, “Tasir tamata uakapa tunusine tar kale mes siksikir niein e matoto leu pono tar 200ir kina tar bulaua me bereit.” ⁸ Doha tang giamehe na tamatang uakuakeluk Iesu, Andru tahina Saimon Pita ke hire tang Iesu pare, ⁹ “A tang siokor keketik kaeinane inggono no tolina ro bebere-tilik ka tuha keipig tar raes-bali, kara

[†]6:4 O niein uleik o nasir Ju ra kilain, “Leke Liu ro Mat.” O uanamana huara dede tar binaka toro mat o uleik ko leka liu tasir Ju i Isip. O Ju ra kil, “o Pasova.” Timana toro Bolobolong Kale Tapokis Mahar 12.

torikir ian, bo e matoto leue puk tasir tamatasine.”

¹⁰Kare kula Iesu tosno tamatang uakuakeluk pare, “Uatabila toto tasir amat.” Doh tar buturuon a gargarasanan, temaeit o tamata uakapa tun ka siokor tabila uahiu i kot. Doh gisina kaelaisane tar tolimar taoseinir bulout.

¹¹Song ke kale Iesu tar bereitinin, kare heir tar niuaha tang God taninin, kare bul taninina tasir tamatasine ra tabil, kare guata sira poluk tar ian. Doh gisina ka siokor uelmatout uaia uakapa tunis teres nimalar. ¹²Ka la mahmahur uakapa manasasin, kare kula Iesu tosno tamatang uakuakeluk pare, “Mu kale toto tar nieininine ke mokomoko mara hik me giniamhe ra ueluelourig.”

¹³Temaeit gisina ka kale toto manasa tar bereit geke tuha keipig tar raes-bali geke mokomok, kara ongo uauoun tar hangaul, kara torikir tohen.

¹⁴Ka banga per tamata ke touo pe Iesu tar inetonene ke kotpokos, kara kulan-gua pare, “Roono mana tun, inggono ter Propeit gere lang laha tar kot!”[¶] ¹⁵^hDoh Iesu e ate tasisinar tamata ra marang uel-hote tar me petutup ualahur tatanono pare, e toia tasisin, temaeit inggono ke hiliu, kare la tar ponponin me pahen.

Iesu ke haiala i rana tar laur

¹⁶Ke reiu manason, kara hiuoko no tamatang uakuakeluk Iesu tar tek-tekenener kodom i Galili. ¹⁷Doh inggono ke reiu kitup manas, kare halanampe Iesu te laha tasisin, kara panetenguasina tar bout, kara la uoum tar pang gi-amehe nar kodom i Kaperneam. ¹⁸Doh ahik me manasan, kare unguar uasul, kare uleik ponor butuanane tar kodom. ¹⁹Doh gisina no tamatang uakuakeluk

Iesu ka hua tar puhung barah sikoro kae-lain tar tolim ue a tonomor kilomita, kara bangangua tang Iesu re haia pe me i rana tar laur, e la uelhirime tar bout. Doh gisina no tamatang uakuakeluk Iesu ka sokorontiehe tun. ²⁰Kare kula Iesu tasisina pare, “Ahik pah mung sokor, inggo dehon!”[¶] ²¹Doh gisina ka uah, kara uapanete tatanono tar bout. Doh ahik me manasan, kare la hungukor bout tar buturene ra lang lasin.

O tamata ka sir uakeluk tang Iesu

²²Nar uagiamehenar marein, o tamatasine ka uangoul tar pang giamehener tektenener kodom, ka ate pare, Iesu ahik pah ke panete tagu tar bout tosno tamatang uakuakeluk, ka hiliuin. Doh gisinar tamata ra ate pono pare, a sioko puk manasamper bout re boko tar buturuon. ²³Bo o gisiameher tamata puk ka hua turuha toro bout i Taiberias, kara me hua babataha tar butur geke ein tor tamata tar bereit geke uahuuigir Tamata Noman. ²⁴Doh tar binaka ka banga bataba manasar tamata tang Iesu mesno tamatang uakuakeluk, gisina ka panete toro bout, kara hua i Kaperneam tar sir tang Iesu.

Iesu tero bereit gero tua

²⁵Tar binaka ka tupara manasar tamata tang Iesu tar pang giamehener kodom, gisina ka dangata tatanono pare, “Tang Ualasir, mangiha ko me pokosaane?”

²⁶Kare hire tapokis Iesu pare, “Inggo gine ru hire tamiuoum toro man, inggoum ahik pah mung sir teil totoguo, teeit kung banga peoum tar inete ku touogio, bo inggoum mung sir teil totoguo, teeit kung ein peoum tar bereit, kare la unga uaha tun remi nimalar.

[¶]6:14 Banga Toro Bolobolong Ualatut 18.15; 18.18

^h6:15 Jon 18.36

²⁷iAhik pah mung kalekinale puk tar nieininine re uoto benge ualahur. Bo mung kalekinale kompe tar nieininine re uoto moko dede, kare heir tar nitua gere moko dedengua. Doh ter Tunar Tamat inggono tere turung heir tamiuoum tar nieininine, teeit God Tamanon ke uamoko tar nitampopokoh i rana tatanon.”

²⁸Doh gisistir tamata ka dangata tang Iesu pare, “A huar giniamer kalekinale pono ring guatagieim re malarraig God?”

²⁹jKare hire tapokis Iesu pare, “Ter kalekinale re malarain God tamiuoum tar guata teene: Tagorong mana tar tang siok geke heirihaion.”

³⁰kTemaait ka dangatanguasinar tamata pare, “A huar inete ro turung touoia, maait ring bangeim, karing tagorong mana totomua? A hua ro turung guataia? ³¹lO bungumiueim ka ein to tar mana^s tar butur padenen ter siokono kompe toro bolobolo ro hire pe pare, ‘Inggono ke heir tasisina tar bereiting Heuen ka ein.’”^{***}

³²Kare kula Iesu pare, “Inggono gine ru hire tun tamiuoum toro man, inggon ahik pah te Moses ke heir tamiuoum tar bereit re la tur i Heuen, inggono te Tamouguo teke heir tamiuoum tar bereit noman gere la tur i Heuen. ³³O sioko ro bereit ke heirin God, teono tere la turuha i Heuen, kare me heir tar nituaane i kot.”

³⁴Kara kulanguar tamata pare, “Tamata Uleik heir toro bereit roono tamiueim tar mamang binakalik.”

³⁵mSong ke kula Iesu pare, “Inggono tero bereit gero heir tar nitua. Mair

tamata re lame totoguo ahik pahe turung gogo tagu, doh mai pono re tagorong mana totoguo ahik pono pahe turung kamadak. ³⁶Bo inggono giane manasa ku hire tanika tamiuoum, inggoum kung banga totoguo, kare halana harahampe tung tagorong man. ³⁷O tamata uakapa gere heirimeis Tamouguo totoguo ra turung lame totoguo. Doh inggono ahik pahu matot u de tang mai re lame totoguo. ³⁸Inggono ku la turuha i Heuen tar me guata tar inete ke malarraig God totoguo tar me guat. Ahik pahu guata tar inete teregu nimalara katong. ³⁹nGinine ter inete ke malarraigir tang sioko geke heiriha totoguo tar me guat. O tamata-sine ke heiris God totoguo ahik pah ra matotong heil tur totoguo, inggono u turung uatua tapokis tasisina tar uadouhinan marein. ⁴⁰Doh mais ka banga tar Tuna God, kara tagorong mana tatanono gisina ra kale tar nitua gere moko dedengua, karu turung uatua tapokiso tasisina tar uadouhinan marein tere malara pe Tamouguo.”

⁴¹Doho Ju ka uakekenengua tar mene ngurungur tang Iesu, kare tokouasais, teeit ke kula peono pare, “Inggono tero bereit geko la turuha i Heuen.” ⁴²oKara kulanguar Ju pare, “Ge inggono peene Iesu a tuna Josep, inggeig pe i ate tang tamanon, doh tinanon. Ae maene re kulono pare, ‘Inggono u la turuha i Heuen?’”

⁴³Kare kula Iesu pare, “Ahik pah mung mene ngurungur katongosioum, ⁴⁴pTamouguo teene ke heiriha totoguo. Ahik me tang sioko re banotong lame totoguo, te gete keip tunumpeme Tamouguo tatanono totoguo, karu turung

§6:31 “mana” a niein ke heirig God sioun tasir Ju tar binak gisina ra uangoul tagu tang Moses tar butur padpaden

**6:31 Bolobolong Kale Tapokis 16.4; Bolobolong Ker 78.24

ⁱ6:27 Jon 6.48-58

^j6:29 1Jo 3.23

^k6:30 Mat 16.1; Jon 2.18

^l6:31 Aha 11.7-9

^m6:35 Jon 4.14

ⁿ6:39 Jon 10.28-29; 17.12

^o6:42 Mat 13.55

^p6:44 Jon 6.65

uatentur tapokiso tatanon e tua tar uadouhinar marein. ⁴⁵qGe sioun pe o propeit ka bolo pare, ‘God e turung ualasira tasir tamata uakap.’†† Mais ra longoro tang God, kara kale niate to tatanon, ra lame totoguo. ⁴⁶rAhik me tang sioko ke banga tang God ter tang sioko puk manasampe gere la tur tatanono teke banga tang Taman.”

⁴⁷s“Inggo gine ru hire tamiuoum toro man, mai re tagorong man, na nituaon e moko dedengua. ⁴⁸tInggo tero bere-iting tar nitua. ⁴⁹O bungumiuoum ka ein to tar mana tar butur padenen, bo gisina puk ka mate dedempe. ⁵⁰Rone tero bereit geko la turuha i Heuen, mair tamata re ein toro bereit roon ahik pahe turung mat. ⁵¹Inggo tero bereit gero tua geko la turuha i Heuen, mai re ein toro bereit roon, inggon e turung tua dedengua. O bereit roono ter tukunuguo geru turung heirin, maeit ra turung kaler tamata uakapane i koto tar nitua.”

⁵²Doh gisinar Ju ke uelsukur balas, kara uakekenengua tar menemene katongois, kara kula pare, “Hapengua re heir katongo peonor tamatene tar tukununa tagigeig mari ein?”

⁵³Kare kula Iesu pare, “Inggo u hire tun tamiuoum toro man, ge ahikioum pah mung ein tar tukununar Tuna God ger Tunar Tamat, karung inum tar deuatinginon, inggoum tar tukunumi ahik me nitua kaein. ⁵⁴Bo mais ra uoto ein tar tukunuguo, kara inum tar deuatingiguo ra turung kale tar nitua gere moko dedengua, karu turung uatentur tapokiso tasisina tar uadouhinar marein. ⁵⁵A tukunuguo ter niein nomana tun, kara deuatingiguo ter inum nomana tun. ⁵⁶Mai re ein tar tukunuguo, kare inum tar deuatingiguo, inggon e uangoul

tokaha keip totoguo, doh inggo u uangoul tokaha keip tatanon. ⁵⁷uTamougou ger tua teke heiriha totoguo, temaeit ru uangoulo te Tamoug, temaeit mai re ein totoguo e turung uangoul pon teeit totoguo. ⁵⁸Inggo ahik pah misiana ro bereit geke einis ro bungumiuoum gisina ka ein, bo ra turung mate kout puk, bo inggo tero bereit gero la turuha i Heuen, mai re ein toro bereit roon e turung tua dedenguampela.”

⁵⁹Iesu ke hire to tar mamang inetelikinine tar binaka ke ualasira to iuma tenas umang lotur Ju i Kaperneam.

O bureher tamata gera uakuakeluk teil tang Iesu ka hiliu tatanon

⁶⁰O bureher tamatasine ra uakuakeluk teil tang Iesu ka longoro tar niualsironin, kara kula pare, “A inetenine ka mene ualasiraig a parakukuh, maingua re longor, kare naman manate tar ualasilanin?”

⁶¹Doh ahik me tamata ke hire tang Iesu, bo inggono ke ate katongo pare, gisina ra mene ngurungur tar puhonene, kare kulangua Iesu tosno tamatang uakuakeluk pare, “A haua ke la duhunguasioum tar niualsironene? ⁶²Doh gete paaron, inggoum e turung duh ponosioum getung banga tar Tunar Tamata ger Tuna God gete tapokis i Heuen tar uan gere la turin. ⁶³A Iabena God tere heir tar nitua, bo na nitampopokohor tamat ahik pah tere heir tar nitua. Bo o uelhire geku hireio tamiuoum roono to iaben, karo tua. ⁶⁴vBo o gisiamehe puk tamiuoum ahik pah ra tagorong man.” (Iesu e ateng sioun manasampe tas mais ahik pah ra tagorong man, kare tang mai ka kouruin tar heir tatanono tasir tamatang uelpus.)

††6:45 bolobolo Aisaia 54.13

q6:45 Ais 54.13 r6:46 Jon 1.18 s6:47 Jon 3.15-16 t6:48 Jon 6.32,58
u6:57 1Jo 3.24 v6:64 Jon 13.11

⁶⁵W Kare kula poluk Iesu pare, “Gine ter tengkana ru hireio tamiuoum, ahik me tang sioko re banotong lame to-toguo, e banoto tun gete heir Tamouguo tatanono totoguo.”

⁶⁶Tar binaka ke mene Iesu tar puhonene, o bureher tamatasine ra uakuakeluk teil tatanono ka de tatanon, kara uanua manasa tar uakeluk tatanon.

⁶⁷Kare dangatangua Iesu tasir hangaul, kara tang torik no tamatang uakuakeluk pare, “Bo inggoum mung marang hiliu pon?”

⁶⁸X Kare kula tapokis Saimon Pita pare, “Tamata Noman maingua ring la uatuhaseim? Ge ingga pe tero kale teil toro uelhire gero heir tar nitua gere moko dedengua. ⁶⁹Inggeim mi tagorong man, karing ate pare, ingga ter tang siokor dedeil ro la tur tang God.”

⁷⁰Kare hire tapokis Iesu pare, “Doh inggo ku kedanga tamiuoum a hangaul, kara tang torik, bo a tang sioko puk tamiuoum nas uleikir liouana uasa!” ⁷¹Iesu e menmene uatuha tola tang Judas ger tuna Saimon Iskariot. Judas inggono ter tang sioko tasir hangaul, kara tang torik no tamatang uakuakeluk Iesu. Inggono tere turung heir tang Iesu pare, e mat.

O Mahar 7

Iesu meso bung tahin

7 ^{YI} muduhia Iesu ke latlateil uiloh i Galili, inggon ahik pah ke marang latlateilila i Judia, teeit o Ju ra marang tung pous tatanon. ²Z Doh nas marein uleiking lotur Ju, ra kilain, “O niein uelik toro umang uamuamoul,” sisikinalik dehe pokos. ³Maieit o bung tahina Iesu ka kula pare tatanon, “Ingga deho

hiliuane, karo la i Judia maieit ra ban-gar tamatasine ra uakuakeluk totomua me inete gero touoia. ⁴A tamata gere malara ra ueliatein ahik pahe matot e touaouo tar inete re guatain, gete ingga ro guatguata tar inetenin ualasira katon-goiaane i koto mara uelateia.” ⁵A Teeit gisis ro bung tahina Iesu ahik pono pah ka tagorong mana tatanon.

⁶Kare kula Iesu toso bung tahina pare, “Nagu binaka tuno^{‡‡} halana te kotpokos. Bo a mamang binakalik puk a namiuoum, ⁷O tamatang gane i kot ahik pahe matot e tokouasa taguis tamiuoum. Gisin e tokouasa pukis totoguo, teeit inggo u uoto hire tauete tar inetenine ra guataigisinar sa. ⁸Bo mung la kompe toro niein uleik roon, bo inggo ahik pahu uolong la tagu toro niein uleik roon, teeit nagu binaka tuno halana te pokos.”

⁹Ke kula baka Iesu tar puhonene, kara hiliu tongua ro bung tahinono tatanon i Galili.

¹⁰Dohi muduhia puk tar binaka ka la bakasit ro bung tahinono toro niein uleik roon, song ke la uakeluk Iesu. Bo ke uahuahoubour teil kompein tasisina toro niein uleik roon.

¹¹Doho Ju ra sir puk teilimpe tang Iesu gane toro niein uleik roon, kara ueldangatampeis pare, “Iareion?” ¹²Doh gane tasir manaiasin o burehe ra ueluelhimukeis, ra kular gisiamehe pare, “Inggono dehe uoto boho tasir tamat.” ¹³Bo ahik puk me tang siokor tamata re ongolo tar mene uakalahara tang Iesu, teeit gisina ra sokoro tasir Ju.

Iesu ke ualasira to toro niein uleik

¹⁴Tar binaka ko la uahuhut sikoro manasalain roono ro niein uleik i uanti-

^{‡‡}7:6 tar puhene, “nagu binaka tuno,” e hire pare, na binaka Iesu tar mate tar korose, halana te matotoin

^w6:65 Jon 6.44 ^x6:68 Mat 16.16 ^y7:1 Jon 5.18 ^z7:2 KT 23.34

^a7:5 Apo 1.14

nanin, Iesu ke la tar umang lotu ger dedeil, kare uakekene tar ualafir.
¹⁵^bDoh gisisir Ju ka lutar, kara kula pare, “Hape maene re atentiehe uaia tunur tamatene, ge inggono pe ahik baka pah ke la me buturung kale niate?”

¹⁶^cKare kula tapokis Iesu pare, “A ualafirane ru ualsiragio ahik paha nouguo katong, bor ualafirane e la tur tang God geke heiriha totoguo.
¹⁷Doh geta kedangar tamata tar haua ra guatain re malarain God, gisina ra turing naman manate tenag ualafiro e la tur tang God, ahik paha nouguo katong.
¹⁸^dDoh mais ra ualafira teres nina-mana katong, gisina ra marang uairana katongo kompeis, bo mai re uoto keip kaia tar hanganar tang siok geke heiriha tatanon, inggon e hire toro man. Doh ahik uadeil mo boho kaein tatanon.
¹⁹^eMoses ke heir tamiuoum tar ualatut, bo ahik puk me tang sioko tamiuoum ke ueltad, kare uakeluk tar ualatutunin. Ae maene mung marang tung pououm totoguo?”

²⁰^fDoh gisisir tamata ka kula tapokis pare, “A liouana uasa ke hiku totomua, bo mai re marang tung pou totomua?”

²¹Kare kula Iesu tasisina pare, “Inggo ku guata tar siokor nitouo, doh inggoum kung siokor lutarantiehe tun.
²²^gBo Moses ke heir tamiuoum tar ualatut tar poko tar kapokous ro bung tumiu gesir keketik bulout. O man Moses ahik pah teke heir tamiuoum, o bungumioum ka uakekene tar puhon. Doh gine daan inggoum mung poko tar kapokousur guam gesir bulout tar Mareining Pepe Uah.
²³^hGeta pokoin ro kapokonor guuamalikener bulout tar Mareining Pepe Uah, inggon a uia mara hik na ualatut Moses

pah ra kategoig. Doh ae maene rung nimalianoum totoguo getu guata uaia tar tukununa uakapa tunur tang siokor tamata tar Mareining Pepe Uah? ²⁴Mu luara tar kedanga hape re baka per inet, bo mung kodoho kompe hape re la kododoho pelar inet.”

O mana tun Iesu ter Kristo noman

²⁵O gisiameher tamata gera uan-goul i Jerusalem ra ueluelkule pare, “Ter tamata dehene gera marang tung pousisir tamat. ²⁶Bo inggono puk gine harahampe re ualafira to tar kakalaharan mara bangar tamata, kara longoro tatanon, doh ahik me tang sioko re kula tane sikoro tatanon. O tamatang uoum keip hera ate uaia manasa pare, inggono here ter Kristo noman. ²⁷ⁱBo inggeig puk i ate, ia re la turur tamatonene, doh gete lahar Kristo ahik me tang sioko re ate ia ke la turon.”

²⁸^jTar binaka re uelhire ualafira Iesu iuma tar umang lotu ger dedeil, inggono ke mene ualeik kirkiring tun, kare kulkula pare, “Inggoum mung ate uaia tun totoguo, doh ia ru la turo. Inggo ahik pah ku laha teregu nimalara katong. Gine ke heiriha totoguo a uauaman, mung teleioum. ²⁹Bo inggo u ate tatanon, teeit inggo u la tur tatanon, doh inggono teke ualatueha totoguo.”

³⁰^kTemaeit ka longoro per tamat, ke mene pe Iesu tar puhon, kara marang tur tane, kara kusa tatanon, bo ahik puk me tang sioko tasisina ke la uahuhut tar baka me pang lim, teeit na binakono halana te matotoin. ³¹Bo o burehe pukur tamata ka tagorong mana tang Iesu, kara kula pare, “Doh hape tar binaka re lahar Kristo, inggon e turing touo me bu-

^b7:15 Mat 13.54; Luk 2.47 ^c7:16 Jon 12.49; 14.10 ^d7:18 Jon 8.50

^e7:19 Apo 7.53; Roum 2.21-24 ^f7:20 Jon 8.48; 10.20

^g7:22 Uak 17.9-13; KT 12.3 ^h7:23 Jon 5.8-10,16 ⁱ7:27 Jon 7.41; 9.29

^j7:28 Mat 11.27; Jon 8.55 ^k7:30 Jon 7.44

rehentieher inete taninine ke guataagir tamatonene?”

O tamatang babata tar umang lotu ger dedeil ka ualatueis tar me kusa tane tang Iesu

³²O Parisi ka longoro tasir bureher tamata ra ueluelhimuke peis tar inetaninane tang Iesu, temaeit gisisir patere uleik, doho Parisi ka hire tasir tamatang babatane tar umang lotu ger dedeil tar kusa tane tang Iesu. ³³Doh Iesu ke kula pare, “Inggou u turung uangoul keip tamiuoum me sisikinalik pukur binak, song ru turung la tapokis tar tang siokene ke ualatueha totoguo. ³⁴1Doh inggoum mung turung sir totoguo, bo ahik puk pah mung turung tupara totoguo, doh ahik pono pah mung matoto mung lame tar buturene ru uangoulio.”

³⁵Doh gisisir Ju ka ueluedangate katongonguais pare, “Doh iangua re turung laono mara hikeig pahi matotong banga tupara tatanon? A hau! E turung la toro uan uleik i Grik tar butur gera uangoul nogio tamateig, kare turung ualasira tasir tamatang Grik? ³⁶A hauanguar tengkana maene ke mene sirono pare, inggoum mung turung sir totoguo, bo ahik puk pah mung turung tupara totoguo, doh ahik pono pah mung matoto mung lame tar buturene ru uangoulio?”

Iesu ke mene tar kodomong tar nitua

³⁷^mNar uadouhinar marein toro niein uleik roon, kare ter marein pono ra ueltadantiehin, Iesu ke tur kai, kare mene ualeik pare, “Uamaluana tang mai re kamadak e lame totoguo mare inu-muon. ³⁸ⁿMai re tagorong mana totoguo, a kodomene re nor gere heir

tar nitua e turung tatading liu tur tar kolonor tamaton, tero hire teil pe ro bolobol.” ³⁹^oIesu e menmene uamatoto tola tar puhonene tar Iabena Dedeil. Doh tar binakonene a Iabena Dedel halana haraha ta heirin, teeit Iesu halana haraha ta uatentur kai keipin tar uinator, bo i muduhia mais ka tagorong mana tang Iesu ra turung kale tar Iabena Dedeil.

O tamata ka tur uelpakaha tar torikir pain

⁴⁰^{PO} tamata ka longoro tar uelhirenina ke mene pe Iesu, doho gisiamehe tasisina ka kulangua pare, “A tamatene, inggono ter Propet noman.”⁴¹^qDoho gisiamehe ka kula pare, “Inggono ter Kristo.”

Bo o gisiamehe puk ra kula harahampe pare, “A Kristo ahik pahe turung la tur i Galili. ⁴²^rNo uelhire God geke boloin o hire teil pare, ‘A Kristo e turung kotpokoso tur toso bunguna Debit ger toia, kara turung poho toin i Betlehem ter uan geke uangoulin Debit.’”⁴³ Temaeit o tamata ka tur uelpakahangua tar torikir pain, teeit gisin a kahakaha res ninaman, ra naman tagin pe tang Iesu. ⁴⁴Doho gisiamehe tasisina ra marang tur tane, kara kusa tatanon e la tar karabus, bo ahik puk me tang sioko tasisina ke la uahuhut tar kusa tane tatanon.

O gisiameher tamatang uoum keip tasir Ju ahik pah ra tagorong man

⁴⁵O tamatang babata tar umang lotu ger dedeil ka tapokisila tasir patere uleik, karo Parisi, kara dangataisina pare, “Ae maene ahikioum pah kung keipime tang Iesu?”

⁷:40 Banga Toro Bolobolong Ualatut 18.15; 18.18

⁷:34 Jon 8.21; 13.36 ^m7:37 KT 23.36; Ais 55.1; Jon 4.14

⁷:38 Ais 58.11 ^o7:39 Jon 16.7; 20.22; Apo 2.4 ^p7:40 Jon 6.14

⁷:41 Jon 1.46 ^r7:42 Ker 89.3-4; Mai 5.2

⁴⁶sKara hire tapokisir tamatang babatane tar umang lotu ger dedeil pare, “A menenine ke menegion a i ranantieh, ahik me tang sioko re matot e mene sira tar ueluelhirenine ke menegion.”

⁴⁷Kara dangatar Parisi pare, “Doh inggono ke uelour pono tamiuoum? ⁴⁸tA tang touihir tamatang uoum keip ue mo Parisi ka tagorong mana tatanon? Ahik me tang siok. ⁴⁹Bo o manaiasine ahik pah ra ate me sisikinalik tena ualatur Moses, God e ate teil manasa tasisin e turung biniris.”

⁵⁰uA tang siokor Parisi Nikodemus geke la banga tang Iesu sioun e uan-goul tagu pono tar toto tamaton, inggono ke hire toso uanotonono pare, ⁵¹“A ualatur nagigeig ahik pahe kedanga tar tamata ke kouh tar binaka halana ta longoroahain, kare halana ta atein a haua ke guatain.”

⁵²vDoh gisit ro uanotonono ka dangata tapokis tatanono pare, “Ge ingga pe a peng Galili pono? Timana toro bolobolo maro atea, ahik pe me propeit re la tur i Galili.” ⁵³Song ka siokor la tapokisir tamata tonoso uan.

O Mahar

A kuaha ka tuparain ke ura keip tar bulout ger le

8 Iesu ke la tar Siusanang Oliv. ²Bo naliliuolik puk inggono ke la tapokis tar umang lotu ger dedeil, doho tamata uakapa tun ka siokor la toto uelhir tatanon, kare tabila uahuono, kare menene ualasila tasisin. ³Doho tamatang ualasila tar ualatur, doho Parisi ka keipime tar kuaha ka tuparain pare, ke uangoul uasa keip tar bulout a le. Doh gisina ka ualahur tatanono tar

tur i uoum tasisinar toto tamat, ⁴kara hiresina tang Iesu pare, “Ir tang ualasil, a kuahene ka tuparain ke ura keip tar bulout, ahik pah tena bulouton. ⁵wDoh tar ualatur nang Moses e kula pare, ‘O kuaha uakapa tun gera guata pare, ra bakbak pousis tar palau.’ Hapengua ro kula pea ring guata peeim?”

⁶Gisina ra dangdangata puk tar marang uelour tang Iesu, maeit ra turung polukusina me puh, re pe siauaion. Bo Iesu puk ke kokolo uahiu, kare uakekene tar bolo keip tar kamot limanane i kot. ⁷xDoh tar binakene ra dangdangata puk pelasina tar puhung dangata tang Iesu, inggono ke tur kai, kare kula tasisina pare, “Mai me tang sioko tamiuoum ge ahik mate guata tagu me niguataniner sa, inggono tere baka uakikilanga me palaua tatanon.” ⁸Song ke kokolo poluk Iesu, kare bolo poluk tar kot.

⁹Doh gisine ka ualongoro tang Iesu ka hiliu tantang sisiokongua o mamahoholik baka uoum song tesir gisiamer tamat. ¹⁰Kara hiliu to tar kuaha tang Iesu e tur i uoum tatanon. Doh Iesu ke tur kai poluk, kare dangata tar kuah, “Ir kuah ia kaeisisin? Ahik me tang sioko ke kedanga totomua ko guata uasa?”

¹¹yKare kular kuaha pare, “Ir tamata uleik ahik me tang siok.”

Song ke kula Iesu tatanono pare, “Inggo ahik pono pahu kedanga totomua pare, ko guata uasa, bo ingga o la, doh ahik paho la guata uasa ue o uangoul uasa baka poluk.”

Iesu tere luh uakubara tar uanene i kot

¹²zIesu ke menmene poluk tasir Parisi, kare kula pare, “Inggo ter luh gere

⁷:46 Mak 1.22 ⁷:48 Jon 12.42 ⁷:50 Jon 3.1-2 ⁷:52 Jon 7.41-42

^w8:5 KT 20.10; Ual 22.22-24 ^x8:7 Ual 17.7 ^y8:11 Jon 5.14

^z8:12 Ais 49.6; Jon 1.4-9; 9.5; 12.46

luh uakubara tar uanene i kot, mai re uakeluk totoguo ahik pahe matot e uan-goul tar kitup, bo inggon e turung kale tar luh gere heir tar nitua.”

¹³ Doho Parisi ka kula tang Iesu pare, “Doh gitie ko mene uamatoto katongo peia pare, ‘Inggga ter tang sioko puk man-asa ro matoto mene tar ineteniner man.’ Bo a haua puk ko menegia ahik paha man!”

¹⁴ ^a Kare kula tapokis Iesu pare, “Aa, inggo ku mene katongo nomanaiō tar ineteninanine, bo ginina puk a man, ge inggo pe u ate ia ru la tur, karu ate ia ru turung la, bo inggoum mung tel, ia ru la turo, kare ia ru turung lao. ¹⁵ ^b Inggoum mung uoto kedanga, ra uoto kedanga peisir tamata uakap, bo inggo ahik pahu kedanga tagu me tang siok. ¹⁶ ^c Bo getu guato tar kedang inggo u kedanga toro man, teeit inggo ahik pah me paheig, Tamouguo geke heiriha totoguo e uangoul tagu totoguo. ¹⁷ ^d Nami ualatutoum e hire teil pare, ‘Getura hirer tang torikir tamata tar siokonor inet, inggoum mung malar, karung uakeluk tar haua kura hireis rasin.’ ¹⁸ ^e Ingggo u uoto mene tauete tenagu kalekinale, kare nagu niguata katong, doh Tamouguo geke heiriha totoguo e uoto poul pono tar hire tauete tar kalekinale, kara niguatar nouguo?”

¹⁹ Kara dangatanguasina pare, “Ia kae pein tamoumua?”

Kare hire tapokis Iesu, “Inggoum mung tele totoguo ue tang Tamouguo, ge pakung ateoum totoguo, inggoum pakung ate pono tang Tamouguo.”

²⁰ ^f Iesu ke mene to tar ineteninanine tar binaka ke menmene ualafir to iuma tar umang lotu ger dedeil e uahuhut tar butur re mokor mani gera bakbakaig tar

uahung, bo ahik puk me tang sioko ke tur, kare kusa tane tatanon, teeit na bi-naka tunono halana te kotpokos.

Inggoum ahik pah mung matoto mung lame tar buturene ru lao

²¹ ^g Iesu ke hire uagiamehe poluk tasir tamata pare, “Ingggo u turung hiliu tamiuoum, doh inggoum mung turung sir totoguo, bo inggoum puk mung turung mat teremi niguata uasa, doh ahik pah mung matoto mung lame tar buturene ru lao.”

²² Temaeit gisisir Ju ka ueldangata katongois pare, “A hau! Iesu here turung tung pou katongoin? Maene ke kula sirono pare, ‘Inggoum ahik pah mung matoto mung la tar buturene ru lao?’”

²³ ^h Kare hire Iesu pare, “Inggoumur tamat o peng tar uanene i kot, bo inggo u la turuha i Heuen, inggoum o peng gane i kot, bo inggo ahik paha peng gane i kot. ²⁴ Temaeit ku hireo tamiuoum pare, ‘Inggoum mung turung mat teremi niguata uasa, kara niuangoul uasa. Inggoum mung turung mat teremi niguata uasa geta hik pah mung tagorong mana totoguo, ge inggo pe teo.’”

²⁵ Doh gisina ka dangata tatanono pare, “Ge ingga pe te mai?”

Kare hire tapokis Iesu tasisina pare, “Ingggo ku hire katongo manasaio tar uakikilangan. ²⁶ Doh inggo nagu bureher mene paku mene uamatotolaig tenami niguata inggoum, bo inggo ku hire puk tasir tamata tar inete ku longoro turig tar tang sioko geke heiriha totoguo, doh inggon e mene toro man.” ²⁷ O tamat ahik pah ka naman manate, ke menmene uamatoto pe Iesu tasisina tang Taman.

²⁸ ⁱ Temaeit Iesu ke kula tasisina pare, “Tar binaka rung uakusa kaioum i ran

^a8:14 Jon 5.31-32; 7.28 ^b8:15 Jon 12.47 ^c8:16 Jon 5.30; 8.29

^d8:17 Ual 19.15 ^e8:18 1Jo 5.9 ^f8:20 Jon 7.30 ^g8:21 Jon 7.34; 13.33

^h8:23 Jon 3.31 ⁱ8:28 Jon 3.14

tar Tunar Tamat, inggoum mung turung ate pare, inggo teo, song mung turung ate ponoum pare, tar inetenanine ru guatagio ahik pah teregu ninamana katong, bo inggo u mene kompe tar inete ke ualatohoig Tamoug totoguo. ²⁹Doha tang siokene ke heiriha totoguo e uangoul keip totoguo, doh inggon ahik pah matot e hiliu totoguo me paheig, teeit inggo u uoto guata tar inetenine re malaragion.”

³⁰Tar binaka ke mene Iesu tar ineteninanine o bureher tamata ka tagorong mana tatanon.

O uelhire gero man o turung luaka liu teres niguata uasar tamat

³¹Temaait Iesu ke hire tasir Ju geka tagorong mana tatanono pare, “Gerung ueltada dedempela inggoum, karung uakeluk tun tar haua ku ualsiragio, inggoum tesir tamatang uakuakeluk tunur nouguo. ³²Song mung turung atengua inggoum toro uelhire gero man, doh roono ro uelhire gero man tero turung uatauete tamiuoum tar karabus, karung uangoulung uah.”

³³^jDoh gisinar Ju ka hire tapokis pare, “Inggeim o bunguna Abraham, ahik me tang sioko tamiueim ka kalein tar karabus, bo ae maene ro kula ra turung uatauetesieim?”

³⁴^kKare kula tapokis Iesu pare, “Inggo u hire tun tamiuoum toro man, o tamata uakapa tun gera uangoul keip tar niguata uasa, gisina ra karabus teil manasa tar niguata uasa. ³⁵A tamatang kalekinale ahik pahe matot e uangoul keip dede tang tanener um, bor tunono tun tera uangoul keip dedein tar mamang binakalik. ³⁶Temaait gete uataueter Tunono tamiuoum, inggoum song rung uangoul uaia tun. ³⁷Inggo

u ate tun tamiuoum ro bunguna Abraham, bo inggoum puk mung marang tung poustotoguo, teeit inggoum ahik pah mung malara tar haua ku ualsiragio. ³⁸Inggo ku hire tamiuoum tar haua ke ualsiraig Tamoug, bo inggoum mung guata tar haua ke hireig tamamiau.”

³⁹^lDoh gisina ka hire tapokis tang Iesu pare, “Inggeim king uatubuna tang Abraham.”

Kare kula Iesu pare, “Ge paro bung tuna nomana Abraham tamiuoum, inggoum pakung guata uakeluk sira tar inetenine ke guatagion. ⁴⁰Inggo ter tamata ku hire tamiuoum toro man geku longoro turin tang God, bo inggoum puk mung marang tung poustotoguo. Abraham ahik pah ke guata sira tagu pare. ⁴¹^mTemaait inggoum here mung guata kompe tar inete ka guataig ro bung tamamiau katong.”

Bo gisina puk ka hire tapokis pare, “Inggeim ahik pah misiana tasir gisiameher keketik ge ahik pah ra ate uamatoto toso tamamiau. Inggeim mi ate a tamamiau tang God. Inggono ter tang sioko manasampe ring ateieim pare, a tamamiau.”

⁴²Kare kula tapokis Iesu tasisina pare, “Ge pare tamamiauoum nomana tang God, inggoum pakung malauelhir pono totoguo, ge inggo pe teru la tur tang God, temaene rung banga tupara inggoum totoguo daan. Inggo ahik pah ku laha teregu nimalara katong. God ke ualatuha totoguo. ⁴³Doh inggoum ahik pah kung naman manate tar haua ku mnenemeio, teeit inggoum ahik pah kung marang longoro uaia tar haua ku mene ualsiragio. ⁴⁴ⁿDoh inggoum tosno bung keketik Satan te tamamiauoum ger tang sa. Inggoum mung marang uakeluk tun tar haua re malaragion. Inggon a tang uelampus manasampe ke uakekene pemer bi-

nak. Inggono no uelmatana toro uauaman, teeit o uauaman ahik paho moko tagu tatanon. Doh binaka re bohon, inggon e ualasira katongo kompein re baka pe, teeit inggon a bohoboh, tamana ro boh. ⁴⁵Bo inggo u uoto hire tamiuoum toro man, temaeit ahikioum pah kung tagorong mana toguo. ⁴⁶“Mai tamiuoum re banot e hire toro mana pare, inggo ku kouh tar niguata uasa? Bo ge pare ku hireo toro man, doh ae maene ahikioum pah mung tagorong mana toguo? ⁴⁷“PA tamata ger nang God ke longoro tar uelhire ke hireig God. Bo inggoum ahik pah kung longoro tar haua ke hireig God, teeit inggoum ahik paho nang God.”

Iesu a i ranantiehe tang Abraham

⁴⁸“O Ju ka dangata tang Iesu pare, “Geting kuleim pare, ingga a peng Samaria, kare hikung liouana uasaia, inggeim ahik pah king kula uaia?”

⁴⁹Kare kula tapokis Iesu pare, “Ahik me liouana uasa kaein totoguo. Inggo u ueltada tang Tamoug, bo inggoum ahik pah kung ueltada totoguo. ⁵⁰Inggo ahik pahu marang uairana katongoio, kara ueltadaio, a tang sioko tere malara pare, ra uairanaio, kara ueltadaio, inggono ter tang kedang. ⁵¹“Doh inggo gine ru hire tun tamiuoum toro man, mai re ueltada, kare uakeluk tun tenagu niualasiro, inggon ahik pahe turung mate tagu, e turung tua dede.”

⁵²O Ju ka kula tang Iesu pare, “Gine daan inggeim song king ate tun toro man, ingga ke hikur liouana uasa! Ge Abraham pe ke mat, karo propeit ka mate pon, doh ingga o kula harahampe pare, ‘Mai re uakeluk, kare ueltada

tenagu niualasiro, inggon ahik pahe turung mat.”

⁵³“Ingga o namana ter i ranantiehe tang Abraham ge tubumiueim? Inggono ke mat, karo propet pono ka mat, hape ro nomana pea, ingga te mai?”

⁵⁴Kare kula tapokis Iesu pare, “Getu uairana katongoio, a uairanon a tabo tengkan. A tang siok geke uairana toguo, inggono te Tamougou, doh inggoum mung kula tatanono pare nami God. ⁵⁵Inggoum ahik pah mung ate uaia tun tatanon, bo inggo u ate tatanon. Ge pakene u kulo pare, u tele tatanon, inggo paka bohoboho misiana tamiuoum. Bo inggo u ate tatanon, karu ueltada tar haua re kulaion. ⁵⁶Tubumioum Abraham ke uahantiehe tun re turung banga pe tar binaka ru lameo, kara heiuung uain ro bala tar binaka ke banga manas.”

⁵⁷O Ju ka longoro, kara kulangua tatanono pare, “Ingga ahik pah ko banga sikoro baka tang Abraham! Ge ingga pe ahik pah rongo hangaul tolina baka rongo kirismas.”

⁵⁸“Kare kula tapokis Iesu pare, “Inggo gine ru hire tun tamiuoum toro man, i uoumuhia tar binaka halana Abraham ta pohoin, inggo u uangoul manas.”^{§§}

⁵⁹Tar binaka ke mene Iesu tar puhon, o tamata ka kale tenas palau, ra marang bakbak pous tatanon, bo Iesu puk ke uahuahoubour ueltebeirin, kare hiliuigua tar umang lotu ger dedeil.

O Mahar 9

Iesu ke guata uaia tar tamat a kut

9 Tar binaka re haijala Iesu, inggono ke banga tar tamat a kutung sioun tar binaka ka pohoin. ²“Doh no tamatang uakuakelukono ka dangata

§§8:58 tar puh pare, “inggo teo,” a hangana God ka boloin sioun tonu uelhire God

°8:46 2Ko 5.21; 1Pi 2.22 P8:47 1Jo 4.6 °8:48 Mak 3.21-22

†8:51 Jon 5.24 §8:58 Jon 1.1 †9:2 Isk 18.20; Luk 13.2,4

tatanon, “Tang Ualasisir mai ke uangoul uasa, kare guata uasa, maene a kutur tamatene tar binaka ka pohoin, inggono katongno ue ter toking tinanon?”

³uKare hire tapokis Iesu pare, “Inggon ahik pah ter tamatene ke guata uasa, doh ahik pono pah ter toking tinanon kura guata uasa, maene ke kuton. A tamatene ke kut mara ualasisira toin na nitampopokoho God tatanon. ⁴Gine daan a marein uaia tun tagigeig tar guata tena kalekinaler tang siokene ke ualatuaha totoguo. A boung e lame tar binak ahik me tang sioko re kalekinale. ⁵vGine ru pepe peoane i kot, inggo ter luh gere luh uakubara tar uanene i kot.”

⁶wI muduhia ke kula pe Iesu pare, kare lou i kot, kare houara tar nilouina tar koto ke la misianangua tar luai, kare tunahanguaono taninina tar matanar tamatener kut. ⁷Song ke hire tar tamatono pare, “La karo la huhu tar koue i Siloam” (A tengkar hangene i Siloam e kula pare, Ualatu). Temaeit gitir tamata ke la huhu, kare tapokisime ke banga uaia manas.

⁸O tamata gesir peng tena uanon, karo gisiameher tamata geka banga tatanono re uoto hinghinga pe tar mani mer inete tasir tamata sioun, ka dangatangua pare, “Inggono ter tamata kompe gianer uoto hing?”

O gisiamehe ka kula pare, “Inggono teon.” Bo gisitir gisiamehe teka kula pare, “Ahik inggono ra banga sira pukin tatanon.”

⁹Doh inggonor tamatono ke mene uahire katongoin pare, “Inggono teene!”

¹⁰Kara dangatanguasina tatanon, “Hape tun maene ko banga ingga?”

¹¹Kare hire tapokisono pare, “A tamat, hangana tang Iesu ke houara tar nilouina tar kot, kare tunaha tar matougou, kare kula totoguo u la huhu

tar koue i Siloam, temaeit inggo ku la, doh ahik me manasana ku huhu uakapa peo, karu banga dede puk manas.”

¹²Kara dangata polukusina tatanono pare, “Ia kaeinir tamatonene?” Kare hire tapokisono pare, “Inggono u telengua.”

O Parisi ka dangdangata haka tar kut geka guata uaia

¹³Song ka keipinguasinar tamata tasir Parisi tar tamata geke kut bak. ¹⁴Doh tar binakonene ke houara Iesu tar nilouina tar kot, kare guata uaia tar matanon, a Mareining Pepe Uah. ¹⁵Temaeitingua ka dangdangata hakar Parisi tar tamatono pare, “Hape tun maene ko banga ingga?”

Kare hireono pare, “Inggono ke kale tar luai, kare tunaha tar matougou, karu la huhuo, kare uala dede puk manasar matoug.”

¹⁶O gisiameher Parisi ka kulangua pare, “A tamatonene ahik pah ke ueltada tar Mareining Pepe Uah, ge inggono pe ahik pahe la tur tang God.” Bo o gisiamehe teka kula pare, “A tamata ger tamata uasa ahik pahe matot e touo me inete sira pare.” Kara la uelpakahanguasina tar torikir pain.

¹⁷xDoh gisinar Parisi ka dangata uagiamehe poluk tar tamatono pare, “A tamateit ke guata uaia tar matoumua, hape ro kila pea tatanon?”

Kare hire tapokisono pare, “Inggono a Propet.”

¹⁸O Ju ka tagorong boho pare, inggono pe teger kut, doh gine daan inggono a bang, temaeit gisina ka kila tar toking tinanon. ¹⁹Kara dangata tasrasina pare, “Ter tumiraoumene geura kulain pare, a kut tar binaka ka pohoin? Doh ae maene re bangonene daan?”

²⁰Doh rasitir toking tinanon kura hire tapokis pare, “Raeim mira ate, inggonene ter tumiraem, doh inggono a

kut ka poho pein. ²¹Bo mira tele puk hape maene ke uiar matanon, kare bang, kaira tele pono mai ke uala tar matanon. Dangata tatanon, inggono deha mahoho manas e matot e mene katong.” ²²Rasitir toking tinanono kura kula puk pare, teeit rasin ura sokoro tasir Ju geka uelhote manasa pesina pare, ge me tang sioko re tagorong mana, kare kula pare, “Iesu ter Kristo,” inggono ra ueluelutula liuin tar umang lotu. ²³Temaene kura kular toking tinanono pare, “Dangata tatanon, inggono deha mahoh e matot e mene katong.”

²⁴Temaait tar giameher binak, gisina ka kila tar tamatonene geke kut bak, kara kula pare tatanon. “Ualapagaha katongoia tang God pare, ingga o turung hire toro man. Inggeim mi ate tar tamaton a tamata uasa.”

²⁵Kare kula tapokisono pare, “Inggo u tel ge para tamata uasaon, bo ter sioko pukur inete ru ateio pare, inggo a kut, doh gine daan inggo a bang.”

²⁶Kara dangatanguasina pare, “A haua ke guataiono totomua? Hape ke guata peono maene ko banga ingga?”

²⁷Kare hire tapokisono pare, “Inggo ku hire manasa tamiuoum, doh inggoum ahik pah kung marang longoro totoguo. Ae maene rung marang ualongoro uapoul polukoum? E baka siron, inggoum herung malara pono no tamatang uakuakelukono tamiuoum.”

²⁸Doh gisina ka uangingio, kara uamuamin tatanono, kara kula pare, “Ingga tena tamatang uakuakelukon, bo inggeim no tamatang uakuakeluk Moses.

²⁹Doh inggeim mi ate God ke menmene tang Moses, doh mi tel ia re la turur tamatonene.”

³⁰Doh gitir tamata ke hire tapokis pare, “Inggo ku lutarantiehe tunungua kung uelhire uagis poluk peoum pare,

mung tele tar tamatene ke guata uaia tar matouguo, karung kula pono pare, mung tel, ia re la turon. ³¹Inggeig i siokor ate pare, God ahik pahe longoro tasir tamata uasa, bo God e longoro tasir tamata gera ueltada tatanono kara guata tar haua re malaraion. ³²Doh ke uakekene pemer kot ahik me tang sioko ka longoro kout bakain mono ueluatata pare, ke guata uaia me tamata ger kut tar binaka pohoin. ³³Ge pakene ahik God pahe heir- iha tar tamatonene, inggono paka hik pahe guata me inet.”

³⁴²Doh gisisir Parisi ka kula tapokis pare, “Ingga ka pohoia, karo bour keip tar niguata uasa. Ingga tero marang ualasira tamiueim!” Kara ueluelutulan- guaisina tatanono tar umang lotu.

O tamata ge ahik pah ra tagorong man gisina misiana tasir kut

³⁵Tar binaka ke longoro Iesu pare, ka ueluelutula peion, inggono ke la uel- tupara tatanon, kare dangata tatanon, “Ingga o tagorong mana tar Tunar Tamat?”

³⁶Kare hire tapokisono pare, “Ir tamata uleik, hire totoguo maionor Tunar Tamat, maeit ru tagorong mana taguo!”

³⁷Iesu ke hirengua tatanono pare, “Ingga ko banga tatanon, doh inggono teener tang sioko re menmene keip toto- muaene daan.”

³⁸Kare kulanguar tamatonono pare, “Tamata Noman, inggo u tagorong man.” Kare hatup uahiuangua i uoum tang Iesu.

³⁹Kare kula Iesu pare, “Inggo ku laha i koto tar me kedang, maeit gisisir kut ra turung bang, kare maisir bang, ra turung kut.”

⁴⁰^aO gisimeher Parisi gera uangoul tagu tang Iesu ka longoro ke kula peono

pare, kara dangatangua tatanono pare, “Ingga o kula tamiueim o kut pon?”

⁴¹Kare hire tapokis Iesu tasisina pare, “Ge paro kut nomanoum, Inggoum paka hik pah mung kouh tar niguata uasa, bo inggoum mung kula harahampe pare, o bang, temaeit inggoum kung kouh.”

O Mahar 10

O uelhire uaranga tar tamatang kaueke tasir sipsip

10 Iesu ke kula pare, “Inggo u hire tun tamiuoum toro man, a tamata ge ahik pahe leka uamato to tur toro pirpirikinar lolol, kare leka kout ueltebeir puk, inggon a ueuenau, kara uoto leka uanomo toro um. ²Bo a tamata gere leke tur tun toro pirik, inggono ter tang kaueke sipsip. ³A tamata gere tur kaueke toro pirik e puka ueleheir tatanono toro piripirik, doho sipsip ra longor paroko tar uauanar tang kaueke gete kilkila tang sisiokono tar hangasisin, kare uoum keip tauete tasisin. ⁴Doh gete siokor uatauete uakapono toсно sipsip, inggon e uoum keipingua tasisin, doh gisina ra uakeluk tatanon, teene gisina ra longor paroko tar alialinginar uuanon. ⁵Doh gisin ahik pah ra matotong uakeluk me tang giamehe siokor tamat, ra turung ualo liu tatanon, teeit gisin ahik pah ra longor paroko tar alialinginar uuanon.”

⁶Iesu ke ueluatata tasisina toro uelhire uaranga roon, bo ahik puk pah ka naman manate tar tengkana ro ueluatata roon.

Iesu ter tang kaueke sipsip

⁷Temaeit Iesu ke hire uapoul poluk pare, “Inggo u hire tun tamiuoum toro man, inggo tero pirik o nasir sipsip. ⁸Bo tamata geke la uakikilanga me totoguo

gisin o ueuenau, karo uoto leke uanomo tar kale tar mamang inetelik, bo gisis pukur sipsip ahik pah ka longoro tasisin. ⁹Inggo tero pirik, doh mair tamata re leke turume totoguo, inggon e turung udeil, kare turung lekleke uelapokise mare sir mena niein uaia. ¹⁰Bor ueuenau e la pukume tar me uenau, kare tung pous, kare mamantou, bo inggo ku lame tar me heir tar nitua mare uoum tunur nitua tasisina uakap.”

¹¹c“Inggo katongo ter tang kaueke uaia tasir sipsip. A tang kaueke tasir sipsip e turung heir katongo tar tukununa tar poul tasir sipsip. ¹²dA tamata gere kalekinale tasir sipsip tar marang mani puk, inggon ahik pah misiana tar tamata gesir nana tun tasisin. Doh gete bangar tamatonene ra bulbulauain tar kaueke tasir sipsip me lo roke gete lame, inggon e turung ualo liu tasir sipsip. Kare me geilgeil ueltebeirir lo roke tasir sipsip, kare ein tasisin. ¹³Doha tamatonene ahik pahe namana tun tar kaueke uaia tasir sipsip, teeit inggono ra bulbulaua pukin tar kaueke tasisin.”

¹⁴“Inggo katongo ter tang kaueke uaia tasir sipsip. Inggo u ate tosnogo sipsip, doh nogo sipsipo ra ate pono totoguo. ¹⁵eTer siokono puk tang Tamouguo re ate pe totoguo, doh inggo pon u ate tang Tamoug. Doh inggo u turung heir katongo tar tukunug tar poul tasir sipsip. ¹⁶fDoh inggo nougo gisiamehe ponor sipsip, bo ahik puk pah ra uangoul teil tar ololene, doh inggo u turung keip ualeke ponome tasisinane. Doh gisina ra turung longor paroko tar uauouguo, kare turung siokongua pukur lolol, kara tang sioko pukur tang kaueke tasir sipsip.”

¹⁷g“Doh Tamouguo e malaelhirintiehe tun totoguo, teeit inggo u heir tar

^b10:8 Jer 23.1-2; Isk 34.2-3

^c10:11 Ker 23.1; UGO 7.17

^d10:12 Apo 20.29

^e10:15 Mat 11.27; 1Jo 3.16

^f10:16 Ais 56.8; Isk 34.23

^g10:17 Pil 2.8-9

tukunug, karu turung kale tapokis poluk tar nitua. ¹⁸Inggo teru matoto teil man-asampe tar heir me uauia tar heir tereg nitua, kare tar kale tapokis tereg nitua-aene totoguo ru turung guata pe. Teke ualatoho pe tamouguo totoguo ru turung guata pe.”

¹⁹O Ju ka longoro poluk tar uel-hirenin, kare la kahakahangua poluk res ninaman. ²⁰O burehe tasisina ka kula pare, “A liouana uasa ke hiku tatanon, kare uapopouluana tatanon. Ae maene rung longoroum tatanon?” ²¹Bo gisisir gisiamehe teka kula pare, “A tamata geke hikur liouana uasa tatanon, ahik pahe matot e mene tar inete sira pare, e matotor liouana uasa e uauia tar tamata ger kut?”

Iesu ka uelueldein

²²Tar binakonene a marein uleiking tar lotu i Jerusalem tar namana tapokis sioun tar binak ka pukain kara uamatotoinir umang lotu ger dedeil pare, na uma God. Doha binakon e uoto pokoso to tar binakang pang rom. ²³Doh Iesu e lihila tar umang lotu ger dedeil e haiala tar paranda, ra kilain pare, “Na Paranda Solomon.” ²⁴Kara la tur uilohonguar Ju tatanon, kara dangata pare, “Mangiha tunur binaka ro hire uakalahara tuna tamiueim pare, ingga te mai tun? Ingga o hire uakalahara tun tamiueim, ge pare te inggar Kristo.”

²⁵Kare hire tapokis Iesu pare, “Inggo ku hire manasa tamiuoum, bo inggoum puk ahik pah kung tagorong man. A nitouo geku guatagio tar hangana Tamoug, e ualasira tamiuoum pare, maio. ²⁶Bo inggoum puk ahik pah mung tagorong man, teeit inggoum ahik pah tesir sipsipir nouguo. ²⁷Nogu sipsipo ra longor paroko tar uauouguo, inggo u ate

tasisin, kare gisina ra uakeluk totoguo. ²⁸^hInggo u heir tasisina tar nitua gere moko dede, doh gisin ahik pah ra mate tagu, kara hik me tang siok re matot e uenaua tur tasisina tar limouguo. ²⁹Tamouguo ke heir tosnogo sipsipo, inggono ter i ranantiehe tar mamang inetelik, doh ahik me tang sioko re matotong uenaua tosnogo sipsipo tar limana Tamoug. ³⁰Doh raeim me Tamoug a tang siok.”

³¹Temaene o Ju ka longoro ke mene peono paar, kara kale poluk tenas palaua tar marang bakpous tang Iesu. ³²Kare kula Iesu tasisina pare, “Inggo ku guata tun tar bureher kalekinale uaiia, hingia me sioko taninina rung marang bakpous uelhirioum totoguo?”

³³ⁱKara hire tapokisir Ju pare, “Inggeim ahik pah mi marang bakpous totomua tar palau, teeit ko guata pea tar kalekinale uaiia, bo inggeim mi marang bakpous totomua, teeit ingga ko uelsigal tang God, karo kula pare, a siokono tatanon, ge ingga pe a tamata puk ahik paha God.”

³⁴^jKare hire tapokis Iesu tasisina pare, “A puh ka boloin tenami ualatutoum, God ke kula pare, ‘Inggoum o god.’ ³⁵Doho bolobolo gero nang God ge ahik paho matotong uapalih, o hire teil pare, maisir tamata gera kale tono uelhire God, ‘Gisina tesir god.’ ³⁶Doh ae maene rung kula inggoum totoguo ku uelsigala tang God. A hau! Teeit ku kula peo pare, ter Tuna God? Inggo ter tang sioko ka kedangaio, kara ualatuheaioane i kot. ³⁷Doh ge ahiko pah ku guata tar inete ke malaraiig Tamouguo tar guat, song ahikoum pah mung tagorong mana totoguo. ³⁸^kBo gete ku guata inggo tar haua ke guataig Tamoug, gitiempe ahik peoum pah mung tagorong mana totoguo, bo

^h10:28 Jon 3.16; 6.39 ⁱ10:33 KT 24.16 ^j10:34 Ker 82.6

^k10:38 Jon 14.10-11

mung tagorong mana kompe tar inete geru guatagio. Song mung turung ateoum, karung naman manate pare, Tamouguo e uangoul tokaha keip totoguo, doh inggo u uangoul tokaha keip tang Tamoug.”

³⁹Doh gisinar Ju ka marang kusa tane poluk tang Iesu, bo inggono puk ke hiliu tasisin.

⁴⁰Song ke la tapokis Iesu, kare la sairkout tar kodom i Jodan tar butur ke uahuhu uakikilanga to Jon tasir tamat, teke la uangoulono tar buturuon, ⁴¹karo bureher tamata ka lame tatanon, kare me kula tatanono pare, “Jon ahik pah ke touo tagu me inet, bo a mamang inetelik puk ke hiregion tagigeig tar tamatene, ginin a mana noman.” ⁴²Doh tar buturuon o bureher tamata ka tagorong mana tang Iesu.

O Mahar 11

Iesu ke la i Judia, song i Jerusalem, karo mamahoholik ra marang tung pous tatanon. (O Mahar 11-12)

Lasarus kaluana Iesu ke mate manas

11¹ tang siokor tamat hangana tang Lasarus e momouh. Inggon e uangoul tar uan uleik i Betani, tar uan re uangoul Maria me tahina kuaha Marta. ²Maria ter kuaha geke ding tar uaiuai amiamuh tar kekener Tamata Noman, kare tuntunaha ueltebeir keip tar uluna taninin. Lasarus ger momouh, inggono te tatahinalik tun tas Maria me Marta. ³Temaeit ramatahina kuaha kura heirila toro uelhire tang Iesu pare, “Tamata Noman! Kaloumua gero malauelhirintiehe tunin e momouh.”

⁴Tar binaka ke me longoro Iesu, kare kulangua pare, “O momouh roon ahik paho uamata tang Lasarus, roon o turung

ualasira tasir tamata mara banga tena uinator o God, karo ualasira uakalahara tar uinatoro ger nanar tuna God.” ⁵Iesu e malauelhirintiehe tun toso matmatatahinalik Marta me tahina kuaha Maria, doh Lasarus. ⁶Bo tar binaka puk ke ate peono pare, Lasarus e momouh, inggono ke uangoul baka poluk tar uaneit re uangoulin tar torikir marein. ⁷Song ke kula Iesu toso tamatang uakuakeluk pare, “Inggeig i la tapokis i Judia tar uan i Betani.”

⁸Doh no tamatang uakuakelukono ka kula pare, “Ahik paha puhung barah tar binaka ka marang bakbak pousur tamatang tar uonono totomua tar palau, doh ingga gine poluk ro uiliauh tar marang tapokis i Judia?”

⁹Kare kula tapokis Iesu pare, “A pisar e pid tur tar liuo e tuka tar reiu. Gete sabalar tamata tar marein, inggon ahik pahe matotong tukain, teeit inggon e kalaharar matana tar luh ger nanar uanenei kot. ¹⁰Bo me tang sioko gere sabala tar boung, inggon e turung tukain, ge ahik pe me luh re poul tatanono tar banga uakubar.” ¹¹Iesu ke mene baka pare, kare la mene tumana poluk, “Kalougigeig Lasarus e hohou, bo inggo puk u la turung ualagur tatanon.”

¹²Doh no tamatang uakuakelukono ka hire tapokis pare, “Tamata Noman, ge pakene e hohou pukuon, inggono pake arian, kare uia.” ¹³No tamatang uakuakeluk Iesu ka namana pare, Iesu ke kula nomana tang Lasarus e hohou noman, bo Iesu ke kula tang Lasarus ke mat.

¹⁴Temaeit Iesu ke la mene uakalaharanga tasisina pare, “Lasarus ke mat. ¹⁵Bo inggo puk ku namana tamiuoum, karu uaha pono pare, inggo ahik pah ku uangoul keip tatanono tar binakon,

¹10:40 Jon 1.28 ^m11:1 Luk 10.38-39

ⁿ11:2 Jon 12.3

^o11:4 Jon 9.3

maeit rung turung tagorong manoum, bo ti la kompe tatanonene daan.”

¹⁶ Doh Tomas gera kilkila ponoin tang Didimas ke kula tasir gisiameher tamatang uakuakeluk pare, “Auia! Inggeig i siokor la uakeluk tar tang ualasira mari la siokor mata keipeig tatanon.”

Iesu ke kula pare, “Inggo ter nitua tapokis, inggo ter nitua.”

¹⁷ Tar binaka ka la pokoso manasa Iesu i Betani, inggono ke longoro kout pare, ke karuh manasar toueitir marein ka keu manasa pein Lasarus. ¹⁸ I Betani e uahuhut i Jerusalem e banoto tar touonor kilomita. ¹⁹ O bureher Ju ka lame tar me uamamahoul tas ramatahina kuaha Marta me Maria re sir peis tara tatahisilik. ²⁰ Doh tar binaka ke longoro Marta pare, Iesu e la manasame, inggono ke tauete tar la ueltupara kout tatanon. Bo Maria teke uangoul uoum ium. ²¹ Marta ke kulangua tang Iesu pare, “Tamata Noman! Ge pakene o uangoul tagua, tatahiguliko paka hik pahe mat. ²² Bo inggo u atempeene daan, God e turung heir tar huar inete ro dangataia tatanon.”

²³ Doh Iesu ke kula pare, “Tatahimulika e turung tentur tapokis, kare tua.”

²⁴ Doh Marta ke kula tapokis pare, “Inggo u ate pare, inggon e turung tua tapokis tar uadouhinar marein menia tasir tamata uakap.”

²⁵ Kare kula poluk Iesu tang Marta pare, “Inggo ter nitua tapokis, doh inggo ter nitua. Mais ka tagorong mana to-toguo, doh ka mate manas, ra turung kale tar nitua. ²⁶ Doho tamata uakapa gera uangoul, kara tagorong mana to-toguo ahik pah ra turung mat. Marta ingga o tagorong mana tar puhonene?”

²⁷ Marta ke hire tapokis pare, “Aa! Tamata Noman! Inggo u tagorong man ingga ter Kristo, a Tuna God geka heirihainane i kot.”

Iesu ke ueldolomo kirkiring tun

²⁸ Marta ke mene baka tar puhonene, kare la tapokisingua tang tahina kuaha tang Maria, kare la menmene hamas tatanono me pahen. Marta ke hire tatanono pare, “A tang ualasira gala, doh inggono ke dangata totomua.” ²⁹ Maria ke longoro kompe ke hire pe tahina kuaha pare, kare tentur kaia uateuteuel, kare la uelhir tang Iesu.

³⁰ Bo Iesu puk halana haraha te me pokoso tar uanonene, e uangoul harahampe tar butur geke la ueltupara to Marta tatanon. ³¹ Doh gisisir Ju gera uanguangoul keip, kara uamamahoul tang Maria ka uakeluk tatanono tar binaka ke tentur uateuelon, kare tauet. Gisina ra naman e lang kiring toono tar keu.

³² Bo Maria e lang la uelhir tang Iesu. Doh tar binaka ke la ueltupara manasa peono tang Iesu, inggono ke la hatup uahiuangua tar kekenon, kare kula pare, “Tamata Noman! Ge pakene o uangoul tagua tatahiguliko pake haik pahe matotong mat.”

³³ Gine ke banga pe Iesu tang Maria pare, ke kiring pe, kare gisisir Ju ka la keipime tatanono ka siokor kiring pon, Iesu ko uelsukuntiehe tun ro balan, kare marang kiringingua pon. ³⁴ Kare dangatanguaono Iesu tasisina pare, “Ia kung keuoum tatanon?” Kara hiresina pare, “Tamata Noman! Lame, me bang.” ³⁵ Iesu ke kiring. ³⁶ Temaet gisisir Ju ka kulangua pare, “Bang! Inggono tena nimalaelhir tatanon a uleik tun.”

³⁷ Bo o gisiamehe puk tasisina ka kula pare, “Inggono ke guata uaia tasisiner

kut, kara banga uايا, bo ae maene ahikiono pahe marang poul tang Lasarus mare haik pahe mat?"

Iesu ke uatua tapokis tang Lasarus

³⁸ Iesu, inggono ke hagou uasantiehe tun poluk, kare la toro lebangang uamokong mat, inggonor keu o lebang, karo palau o uleik tera uauain tanein toro matana ro lebang. ³⁹ Kare kula Iesu pare, "Uain liu toro palau."

Doh Marta ge tatahinalik Lasarus ke hire pare, "Tamata Noman! Gane e turung amuh pikir beng geke karuh manasa per toueitir marein ka keu peion!"

⁴⁰ Doh Iesu ke kula tatanono pare, "Ahiko pah ku hire baka uoum totomua pare, 'Ge paro tagorong mana, ingga o turung banga tena nitampopokoho God?'"

⁴¹ Maeit gisina ka uain liu toro palaua toro lebang, song ke tada kai Iesu i ran, kare kula pare, "Tamoug, inggo u uatakai tun totomua ko me longoro pe totoguo. ⁴² Inggo u ate totomua o uoto longoro totoguo. Bo inggo u mene keip puk tar inetenina tasir tamatasine, maeit gisina ra turung tagorong mana pare, ingga ko heiriha totoguo."

⁴³ I muduhia ke mene baka pe Iesu pare, Kare kula ualeik kirkiring tun i rana pare, "Lasarus, tauet!" ⁴⁴ Doh inggonor mat ke tauet. Doha limanon, doha keken a niauih uiloho tar mahar gomom, karo mahar giameh o niauih uiloho pono toro lunon.*

Kare kula Iesu tasisina pare, "Luaka liu tar gomomonit tatanon, karung uamaluana tatanono gere la."

O tamata uleik ka uelhote tar tung pous tang Iesu

⁴⁵ O bureher Ju geka latagu me tang Maria, ka banga tar haua ke guatain Iesu, gisina ka tagorong mana tatanon.

⁴⁶ Bo o gisiamehe puk tasisina ka la tasir Parisi, kara hire tasisina tar haua ke guatain Iesu. ⁴⁷ Temaeit gisisir Parisi, karo patere uleik ka tabila, kara kila toto tasir mamahoholiking Ju, kara dangata pare, "Hape ri guata pe inggeig? A tamatene ke touo tar bureher inet. ⁴⁸ Geti uamaluaneig tatanono tar guata tar inetenanine, o tamata uakapa tun ra turung tagorong mana tatanon, kara turung langua mer tamatang Roum, kara me kale liu tar umang lotu ger dedeil tagigeig, doh nagi pang uan!"

⁴⁹ A tang siokor tamat a hangana tang Kaiapas, inggono tenas uleikir pater tar binakon, inggono ke kula tasisina pare, "Inggoum ahik pah mung ate me inet! ⁵⁰ Inggoum ahik pah mung bang huara pare, auiantiehe tun tar tang siokor tamata gete mate tasir tamata uakap, kare tar pang uan uakapa geta mamantouoin."

⁵¹ Kaiapas ahik pah ke mene tar nimananonene me pahen, inggono tenas uleikir pater tar binakono ke hirhire uoum teil pe tono uelhire God misianar propet pare, "Iesu e turung mata tar poul tasir tamatang Ju, ⁵² doh ahik pah tasisina pukur Ju, bo inggono ke mata pono tar keip toto tapokis tosno bung keketik God geka taltaliah, kare guata tasisina pare, a tang siok."

⁵³ W Temaeit tar marein kompeon, gisina ka uakekene manasa tar halata tar tung pous tang Iesu. ⁵⁴ Temaeit Iesu ahik manasa pahe la uakalahar tunin i uantinanina tasir Ju, inggono ke hiliu

*11:44 nas niguatar Ju tar binaka ra keu tar tukununar tamat

^t11:45 Jon 7.31 ^u11:46 Luk 16.31 ^v11:52 Jon 10.16 ^w11:53 Jon 5.18

tar buturuon, kare la tar uan e uahuhut tar butur padenene tar uan ra kilain i Epraim, kare uangoul tar buturuono mesno tamatang uakuakeluk.

⁵⁵Binaka ko uahuhut manasain ros nieinir Ju, Leke Liu ro Mat, o bureher tamatang tar pang uanono ka la i Jerusalem tar uadelauana katongois tang God. ⁵⁶Doho tamata ra sir kompe tang Iesu iuma tar umang lotu ger dedeil, kara ueluedangata katongois pare, “Hape rung namana peoum, inggono ke la tagumpeme toro niein uleik rone?” ⁵⁷Bo o patere uleik puk, karo Parisi ka heir manasa tar ualatoho pare, “Gete me tang sioko re ate, ia kare uangoul Iesu, inggon e me hire tasisina, song ra la kusa tanesina tatanon e la tar karabus.”

O Mahar 12

Maria ke ding tar uaiuai amiamuh tar kekene Iesu

12^xA tonomo baka polukur marein, song ra guatain ro niein, “Leke Liu ro Mat,” Iesu ke la i Betani tar butur re uangoul Lasarus (Lasarus tege ke uatua tapokisin Iesu). ²^yDoho niein uleik ka ein tokaha keipinisina tang Iesu nareiu tar buturuon. Doh Marta teke poul tar sik tar niein, doh Lasarus ter tang sioko ponor tamata ke ein keip tang Iesu. ³^zDoh Maria ke keipime iuma tar uaiuai a muhiantiehe tun e tuka koutula i uantinanin, a i ranar bulauan, a nituha keip toro dodoukulik ra kilain o nard. Inggono ke ding tar uaiuaia tar kekene Iesu, kare tuntunaha ueltebeir keip tar uluna taninin. Doha amuhunar uaiuaia ke amuh pirik uakapane iuma tar um.

⁴Doh na tang siokor tamatang uakuakeluk Iesu, Judas Iskariot ter tamata gere turung heir tang Iesu toro mat, ke kula pare, ⁵“Ae maene ahikir uaiuaieit pah ka uabulauain mara heirigir mani tasir tiome?” A uaiuaion a i rana tunumpe. ⁶Bo Judas puk ahik pah ke namana tun tar poul tasir tiome, inggono ke mene puk tar puhonene, teeit inggono a ueuenau, ge inggono pe tere kauেকে tenas manir tamatang uakuakeluk, kare uoto uenaua katongo tapokis taninin.

⁷Iesu ke longoro ke kula peono tar puhonene, kare kula tapokisingua pare, “Uamaluana tar kuahene. Auia tun tatanono tar uamoko tanik tar uaiuai amiamuhene totoguo mare moko tanikono tar marein gera turung keuiu. ⁸^aO tiome ra turung uangoul tagu tamiuoum tar mamang binakalik, bo inggo ahik pahu matot u uangoul tagu tamiuoum tar mamang binakalik.”

O patere uleik ka uelhote tar tung pous tang Lasarus

⁹O manai tamata ka longoro pare, Iesu e pepe i Betani, temaeit gisina ka la tar banga tatanon, doh ahik pah tatanono puk, bo tang Lasarus pono geke uatua tapokisin. ¹⁰Temaeit o patere uleik ka uelhote tar tung pous pono tang Lasarus. ¹¹^bTeeit o bureher Ju ka banga tar inete ke guatain Iesu tang Lasarus, kara hiliuingua tasisin, kara tagorong mana puk manasa tang Iesu.

Iesu ke leka sirala i Jerusalem misiana tar toia

¹²Doh nar uagiamehener marein, o manaiar Jus ka lame i Jerusalem toro nieining Leke Liu ro Mat, ka longoro pare, Iesu e lame i Jerusalem.

^x12:1 Jon 11.1,43

^y12:2 Luk 10.40

^z12:3 Luk 7.37-38

^a12:8 Ual 15.11

^b12:11 Jon 11.45

^{13c}Temaeit gisina ka kale tenas rang deit, kara tauete tar ueltupara to tar lele tatanon, kara kulkula ualeik teil pare, “Uatakai tang God!

God guata uaia tar tang sioko geke laha tar hanganar Tamata Noman!

God guata uaia tenas toiar Israel!” *Ker 118.25-26; Sepanaia 3.15*

¹⁴Iesu ke tupara tar donki, kare tabilala i rana tatanon. Te misiana puk ro uhire teil pe no uelhire God geke boloin sioun pare,

¹⁵“Ahik pah mung sokoror tamatang Jerusalem!

Nami toiaoum, gine re lame, e tabila teil i rana tar kalanar donki.” *Sekaraia 9.9*

^{16d}Doh tar binakonene no tamatang uakuakeluk Iesu ahik pah ka naman manate, bo i muduhia puk binaka ke tentur tapokis pe Iesu, kare heir God tar uinatoro tatanon, song ka namana tapokisisina pare, no uelhire God geke boloin sioun o hire teil tang Iesu, kare tar inetenine ka guataig tatanon.

O tamata ka ueluatata tar inete ke guatain Iesu

¹⁷Doho tamatasine ka uangoul tagu tar binaka ke uatua tapokis Iesu tang Lasarus, kare kula tatanono pare, e tauete liu toro lebangang mat, gisina ka hirhire ueltebeir tar haua ke guatain Iesu. ¹⁸Temaene gisinar manaia ka la uelhir tatanon, teeit gisina ka longoro tar nitouo uleikene ke guataion. ¹⁹Temaeit o Parisi ka ueluelmene ueltebeir katongois, kara kula pare, “Kung banga manasoum! Ahik baka puk me inete re turung kodkodoho tagigeig! Ge o tamata uakapa peane i koto ra uakeluk kompe tatanon!”

O gisiameher tamatang Grik ra marang banga tang Iesu

²⁰O gisiameher tamatang Grik pono geke lame i Jerusalem tar me lotu toro niein uleiking Leke Liu ro Mat. ²¹Gisina ka la uelhir tang Pilip ger peng Betsaida i Galili, kara kula tatanono pare, “Tamata uleik, inggeim mi marang banga tang Iesu.” ²²Pilip ke la hirengua tang Andru, kaura la hire tokahangua tang Iesu.

^{23e}Iesu ke hire tapokisingua tasrasina pare, “A binaka gine ke pokoso manasa tar Tunar Tamat tar kale tar uleikir uinator. ^{24f}Inggo gine ru hire tun tamiuoum toro man, gete haikir uatunar raesuit pah ra uapungain i kot, kare mat, inggon e moko sira kompe pare, a siok, bo gete maton, inggon e turung tunggara, kare turung bour uaburehe tun. ^{25g}Mair tamata re malauelhirintiehe tun tena nitua katongene daan re uangoul pe, na nituaon e turung rouo tatanon, bo mair tamata re tokouasain tena nituaene daan re uangoul pe, inggon e turung kale dedengua tena nitua. ²⁶Mai re kalekinale totoguo inggon e uakeluk totoguo, doh inggono nagu ualualatueo e turung uangoul tagungua tar mamang buturulik ru uangoulo. Doh Tamougouo e turung uatakai tang mai re kalekinale totoguo.

Iesu ke mene tauete katongo tono mat

^{27h}Gine daan inggo u hagou uasa tunumpe. Hapengua ru mene peo? Ue a hau u mene pare, Tamoug! Uaudeil totoguo tar binakene? Bo ahik pukumpe, temaene pe ku la uamatotoha inggo tar binakene, maru me kale uelmahing. ²⁸Tamoug! O heir tar uinatoro tar hangoum!”

^c12:13 Jon 1.49 ^d12:16 Jon 2.22 ^e12:23 Jon 13.31-32; 17.1

^f12:24 1Ko 15.36 ^g12:25 Mat 16.25 ^h12:27 Ker 6.3; 42.5; Mat 26.38

Doha uau ke mene turuha i Heuen pare, “Inggo ku uinatoro manasa tar hangoug, karu turung heir uapoul poluk.”

²⁹Doho manai tamatasine ra uahuhut ka longoro tar uauon, karo gisiamehe ka kulangua pare, inggon a pil. Bo o gisiamehe teka kula pare, “Inggon a anggelou ke menmene tatanon.”

³⁰Bo Iesu puk ke kulangua pare, “O uelhire rone kung longoroium daan, ahik paho poul totogoo roon o poul tamiuoum. ³¹Gine daana ter binaka manasa tar kedanga tasir tamatane i kot, kare gine daana ter binaka pono ra turung baka taueteinir tamatene re uoum keip i kot. ³²ⁱDoh binaka ra uakusa kaiaio i ran ter binakono ru turung reih to-tome inggo tasir tamata uakap.” ³³^jIesu ke mene tar puhonene mare ualasira hape re turung mate pe.

³⁴^kO manai ka kula tapokisingua pare, “Nami ualatuteim e hire teil tang Kristo ahik pahe matotong mate tagu. Doh ae maene ro kula pare, ‘A Tunar Tamata ra turung uakusa kaiain i ran? Maionener Tunar Tamat?’”

³⁵^lSong ke kulangua Iesu pare, “A luh e uangoul tagu puk tamiuoum tar sisikinalikir binak, temaeit la teil keip dedempela tatanon tar binaka ro kale teil tar luh mare haikir kitup pahe matot e ragom tane totomua. Bo mai re la teil tar kitup ahik pahe ate ia re lihihia. ³⁶^mTemaeit mung tagorong mana tar luh tar binaka re moko teil harahono tamiuoum, maeit inggoum tesno tamatar luh.”

O bureher Ju ka tagorong mana tang Iesu

I muduhia ke mene pe Iesu pare, kare haijala uaouonguan tasisin. ³⁷Doh Iesu ke guata to tun tar nitou uleikinine tar matas tunusin, doh ahikimpe pah ra tagorong man. ³⁸Temaeit a haua geke menein Aisaia ger propet ke pokoso nomana tun, ke kula pe pare, “Tamata Noman! Mai re tagorong mana tenami uelhireieim?

Mai ka ualasirain tena nitampopokohor Tamata Noman?” *Aisaia 53.1*

³⁹Temaeit ahik ponosina pah ka tagorong mana tun, teeit Aisaia ke kula pono pare,

⁴⁰“God ke uakut tar matasisin, kare uaboubour teres ninamanasin, maeit a matasisin ahik pahe matotong bang,

kara hik pah ra matotong naman manate, kara la tapokisime totogoo tar uauia tasisin.” *Aisaia 6.10*

⁴¹ⁿAisaia ke mene puk pare, teeit inggono ke banga tena uinatoro Iesu, kare mene uamatoto tatanon.

⁴²^oBo o burehe nomanamper tamata, karo tamata uleiking tasir Ju ka tagorong mana tang Iesu, bo teeit kompe tasir Parisi, gisin ahikingua pah ra marang hire uakalahara pare, ra tagorong mana tatanon. Teeit gisina ra sokoro geta uelueltiu turis tenas umang lotur Ju. ⁴³^pDoh gisinar Ju ra malarantiehe uain tun tar uatakai gere la katongo tapokis tasir tamat, tang gere la tang God.

ⁱ12:32 Jon 3.14 ^j12:33 Jon 19.6 ^k12:34 Ker 110.4; Ais 9.7; Dan 7.14

^l12:35 Jon 8.12 ^m12:36 Epe 5.8 ⁿ12:41 Ais 6.1 ^o12:42 Jon 9.22

^p12:43 Jon 5.44

O uelhire geke mene tauetein Iesu o turung kedanga tenas niguatar tamat

⁴⁴Iesu ke kula ualeik kirkiring tun pare, “Mai ke tagorong mana totoguo ahik pah ko tagorong mana puk totoguo, bo ingga o tagorong mana pono tang maiene ke ualatueha totoguo. ⁴⁵¶Mai ke banga totoguo inggono ke banga pono tang maiene ke heiriha totoguo. ⁴⁶¶Ingggo ku la siraha tar luhane i kot, maeit mai re tagorong mana totoguo ahik pahe uangoul tar kitup. ⁴⁷¶Doh ge me tang sioko ke longoro tenagu uelhireo, doh ahik pah ke ueltad, kare uakeluk taninin, inggo ahik pahu turung kedanga tatanon, teeit inggo ahik pah ku laha tar me kedanga tasir tamatane i kot, bo inggo ku laha tar me uaudeil tasisinane i kot.”

⁴⁸¶“A binaka tar kedang e moko tas mais ka de totoguo, kara de tenagu uelhireo. Doha uelhirenina tere turung kedanga tasisina tar uadouhinar marein. ⁴⁹¶Doha inetenine ku ualasingragio ahik paha nouguo katong. Tamouguo geke heiriha totoguo teke ualatoho totoguo, hape ru mene pe, kare hape ru hire pe. ⁵⁰¶Doh inggo u ate teil pare, a nitua gere moko dedengua e la tur tar ualatohor nang Tamouguo. Temaeit a haua ru menegio ter inetenina ke heirig Tamouguo tar mene tauet.”

O Mahar 13

Iesu ke uahuhu tar kekeis no tamatang uakuakeluk

13 Tar binaka ko uahuhutin ro niein uleik ro nasir Ju, ra kilain, “Leke Liu ro Mat,” Iesu ke ate manasa pare, ke uahuhut manasain na binaka tar hiliuane i kot, kare la tapokis tang Taman.

Inggon e uoto malauelhirintiehe tun tasir tamatasine i koto gesir nanon, kare malauelhirintiehe tun tasisin e la tuka tar uadouhinar nituaane i kot. ²¶Iesu mesno tamatang uakuakeluk ra ein nareiu, doh Satan e hounhoun ualahur manasa tang Judas Iskariot ger tuna Saimon mare heir tang Iesu tasir uelmatan. ³¶Iesu e ate tang Tamana ke heir tatanono tar nitampopokoh a i rana tar mamang inetelik, doh inggono ke la tur tang God, kare la tapokis poluk tang God. ⁴¶Temaeit toro niein nareiu Iesu ke tentur, kare liur liu toro uakikilangana ro hikhiku, kare kale toro uakadak, kare pus tang roon. ⁵¶Song ke itu tar kodomo tar nouh, kare uakekene tar uabusa tar kekeis no tamatang uakuakeluk, kare uakadaka keip toro uakadaka gere pus teilin.

⁶¶Iesu ke lame tang Saimon Pita, kare dangata Pita tatanono pare, “Tamata Noman, ingga o marang uahuhu pono tar kekeiguo?”

⁷¶Doh Iesu ke hire tapokis pare, “Ingga ahik paho naman manate tar haua ru guataioene daan, bo i muduhia puk song ro naman manate ingga.”

⁸¶Kare kula Pita pare, “Ingga ahik tun paho matotong uahuhu tagu tar kekeiguo!”

Kare kula tapokis Iesu pare, “Gete haiko pahu uahuhu tar kekeimua, ingga ahik paho matotong uangoul tabara dede tagu totoguo!”

⁹¶Saimon Pita ke kula tapokisingua pare, “Tamata Noman ahik paho uahuhu puk tar kekeiguo, bo o uahuhu pono tar limouguo, karo luguo pon!”

¹⁰¶Kare kula Iesu pare, “A tamata geke huhu uoum, inggon e uahuhu puk tar keken, ge a tukununa peon a delauan.

¶^{12:45} Jon 14.9 ¶^{12:47} Jon 3.17 ¶^{13:2} Luk 22.3; Jon 13.27

¶^{13:3} Jon 3.35; 16.28 ¶^{13:10} Jon 6.64,70-71; 15.3

Doh inggoum o delauan, bo ahik puk pah inggoum uakap.”

¹¹Ge Iesu pe e ate teil tang mai re turung heir tatanono tasir uelmatan, temaeit ke mene sira pare, “Bo ahik puk pah inggoum uakapar delauan.”

¹²Tar binaka ke uahuhu uakapono tar kekeisisin, inggono ke hiku tapokis tono hikhiku, kare tabila tapokis, kare dangata tasisina pare, “Inggoum kung naman manate tar hauene ku guataio tamiuoum? ¹³Inggoum mung kila totoguo pare, ‘A Tang Ualasilir, kara Tamata Noman,’ doha puhon a kodkodoho tun, teit inggo te paara ru baka pe. ¹⁴vGe pare, nami Tamata Nomanoum totoguo, kare nami Tang Ualasiroum ke uahuhu tar kekeimiuoum, inggoum mung turung uelueluahuhue katongo ponosiuoum tar kekeimiu. ¹⁵wInggo ku guata puk marung banga to inggoum, karung guata sira misiana ku guata peo tamiuoum. ¹⁶xInggo gine ru hire tun tamiuoum toro man, a tamatang kalekinale ahik pah tere i rana tena tang kauek. Doha ualualatue ahik pono pah tere i rana tang mai ke ualatue tatanon. ¹⁷Doh gine daan kung ate peoum tar inetenin, inggoum mung turung kale tar niguata uaia getung guata taninin.”

¹⁸y“Inggo ahik pah ku menmene uamatoto tamiuoum uakap, inggo u ate tas mais ku kedangais. Bo git mare pokoso tunono toro mana ka bolo peiono sioun pare, ‘Mai geira ein tokaha raeim torogo bereito inggono tere turung tar mud totoguo.’ ¹⁹zInggo u hire tanika puk tamiuoum, maeit gete kotpokoso manasar inetonene, inggoum mung turung tagorong mana pare, inggo teo. ²⁰aInggo gine ru hire tun toro man, mai re uaha uangoul me tamata geru heirhaio, ing-

gon e turung uaha uangoul totoguo, doh mai re uaha uangoul totoguo, inggon e turung uaha uangoul pono tang maene ke ualatueha totoguo.”

²¹I muduhia ke mene baka pe Iesu pare, inggono ko uelsuk uasa tun ro balana, kare hire uakalahara puk manasa pare, “Inggo gine ru hire tamiuoum toro man. A tang sioko tamiuoum e turung tangana totoguo tasir uelmatan.”

²²Doh no tamatang uakuakelukono ka ueluelbangeis, teit gisin ahik pah ra ate tang maionene re kulkula uamatotoin Iesu. ²³A tang sioko na tamatang uakuakeluk Iesu gere malaelhirintiehe tunin, inggono tere tabila uahuhut tatanon. ²⁴Saimon Pita ke sarala tatanono tar dangata uaia tang Iesu pare, mai tunumpe re kulkula uamatotoion. ²⁵Temaeit inggonene na tamatang uakuakelukono Iesu ke in uahuhutula tatanon, kare dangata pare, “Tamata Noman maion?”

²⁶Iesu ke hire tapokis pare, “Inggo u turung uahu toro mahar bereit tar kap. Doha tamata geru heirio tang roon, inggono teon.” Maeit Iesu ke kale manasa toro mahar bereit, kare uahu tang roon, kare heir tang Judas Iskariot ger tuna Saimon. ²⁷bDoh ahik me manasana ke kale peono toro mahar bereit, kare hiku manasa Satan tatanon. Kare kula Iesu tatanono pare, “A inete gero marang guataia, ingga o guata uateuel.”

²⁸Bo ahik puk me tang sioko tasisinasine ra ein ke naman manate, ae maene ke kula sira Iesu paara tang Judas. ²⁹Inggono Judas tere uoto kaueke tenas manisin, temaeit o gisiamhe ka namana pare, ke kulono tatanon e la bulaua me ineteng toro niein ue me inete ra me heirig tasir tiome. ³⁰Judas ke kale toro

v13:14 Mat 20.28; Luk 22.27 w13:15 Pil 2.5; Kol 3.13; 1Pi 2.21

x13:16 Mat 10.24 y13:18 Ker 41.9 z13:19 Jon 14.29; 16.4

a13:20 Mat 10.40 b13:27 Jon 13.2

mahar bereit geke heirin Iesu, kare uahi-
auain tasisina. Tar binakonene a boung.

Iesu ke heir tar timuhur ualatut tosno tamatang uakuakeluk

³¹ ^cTar binaka ke hiliu Judas, kare ku-
langua Iesu pare, “Gine daan a Tunar
Tamat e kale manasa tar uleikir uina-
tor, doh God ke kale tur pono tar uleikir
uinatoro tar tun. ³² ^dGete kale tur God
tar uinatoro tatanon, God e turung heir
tar uinatoro tar keketik bulout tatana ka-
tong. God e heir ualahur tun tar uinatoro
tatanon.”

³³ ^eKare kula poluk Iesu pare, “Nogo
keketik, inggo u pepe keip puk tami-
uoum tar sisikinalik tunene daan. Ing-
goum mung turung sir totoguo. Inggo
gine ru hire tamiuoum ku hire uoum pe
tasir Ju, a buturene ru laio inggoum ahik
pah mung matoto mung lame.”

³⁴ ^f“Inggo gine ru heir tamiuoum
tar timuhur ualatut, mung uelmalauel-
hiresioum misiana ru malauelhirintiehe
tun peo tamiuoum, temaeit inggoum
mung uelmalauelhiresioum. ³⁵ Getung
uelmalauelhiresioum o tamata uakapa
tun ra turung atengua pare, inggoum
tosnogo tamatang uakuakeluko.”

Pita e turung uolih boho pare, e tele tang Iesu

³⁶ Saimon Pita ke dangata tang Iesu
pare, “Tamata Noman! Ia ro laa?”

Kare hire tapokis Iesu pare, “Ingga
ahik paho matotong uakelukume gine
daan tar buturene ru laio, bo i muduhia
ingga o turung uakelukume totoguo.”

³⁷ Pita ke dangata poluk pare, “Tamata
Noman, ae maene ahiko pahu matotong
uakeluk totomuaene daan? Inggo u tu-

rung heir katongo tar tukunug tar mata
totomua!”

³⁸ Kare dangata tapokis Iesu pare,
“Ingga o namana sirampe o turung heir
katongo tar tukunum tar mate totoguo?
Inggo gine ru hire totomua toro man,
tar binaka halanar paolo te koror, ingga
o turung uolih uatouono pare, o tele
totoguo.”

O Mahar 14

Iesu tenas leler tamata tar la tang Tamanon

14 Iesu ke hire tosno tamatang
uakuakeluk pare, “Inggoum ahik
pahe pikir balamiu, karung malioh,
mung tagorong mana kompe tang God,
karung tagorong mana pono totoguo.
² Tena uma Tamougou a bureher tina
um, doh inggo gine ru la kaleuatoro
menami butuoum. Inggo pake haik
pahu hire tamiuoum, ge pakene ahikin-
ina paha man. ³ ^gDoh getu kaleuatoro
uakapa manaso tenami butuoum, inggo
u turung tapokisiha, karu me kale tami-
uoum marung me uangoul taguoum to-
toguo tar buturene ru uangoulo. ⁴ Doh
inggoum mung ate, ia ru lao, kare tar lele
re la tar buturuon.”

Iesu ter lel re la tang Taman

⁵ Temaeit Tomas ke la kula pare,
“Tamata Noman! Inggeim ahik pah mi
ate ia ro laa, bo hape puk maring ate
inggeim tar lel?”

⁶ ^hKare hire Iesu tatanono pare, “Inggo
ter lel, o man, kara nitua. Ahik me
tang siokor tamata re matotong la de-
dengua pukume tang Tamougou e ma-
toto gete lih tur tunume totoguo. ⁷ ⁱGe
parung ate uaia nomanoum totoguo,

^c13:31 Jon 12.23 ^d13:32 Jon 17.5 ^e13:33 Jon 7.33-34

^f13:34 Jon 15.12,17; 1Jo 3.23; 2Jo 5 ^g14:3 Jon 12.26

^h14:6 Jon 11.25; Roum 5.1-2 ⁱ14:7 Jon 8.19

inggoum mung turung ate uaia pono tang Tamouguo. Bo gine puk daan inggoum mung ate tatanon, karung banga tatanon.”

⁸Pilip ke dangata tatanono pare, “Tamata Noman uamakaha tamiueim tang Tamoum maring uaheim.”

⁹JKare kula tapokis Iesu pare, “Pilip, inggo ku uangoul keip manasa tamiuoum tar puhung barah, doh ingga halana harahampe to ate, maio? Mair tamata ke banga totoguo, inggono ke banga tang Tamouguo. Bo ae maene ro dangata tar marang banga tatanon? ¹⁰kIngga ahik paho tagorong mana pare, inggo u uangoul teil tang Tamoug, doh Tamouguo e uangoul teil totoguo? A menenine ru uelhiregio ahik paha nouguo katong, bo ginin a nang Tamouguo gere uangoul teil totoguo. ¹¹lMu tagorong mana kompe totoguo. Getu hireo pare, inggo u uangoul teil tang Tamoug, doh Tamouguo e uangoul teil totoguo ue mung tagorong mana kompe gekung banga manasa peoum tar haua ku touogio.”

¹²m“Inggo gine ru hire tun tamiuoum toro man, mai re tagorong mana totoguo, inggon e turung guata pono tar siokonor kalekinalenine ku guatagio ue e matotong guata ponompe me uleik uainir kalekinale taninine, teeit inggo u turung la tang Tamoug. ¹³nDoh inggo u turung guata tar haua rung dangata tolagioum tar hangouguo maeit na uinatoro Tamouguo ra turung banga toin tar tun. ¹⁴Getung dangata tolaoum me inete tar hangouguo, inggo u guat.”

Iesu ke ualapagah e turung heir tar Iabene Dedeil

¹⁵o“Getung malauelhiroum totoguo inggoum mung turung longoro tar haua ku ualatohogio. ¹⁶pDoh inggo u turung dangata tang Tamoug e heir me tang giameher nipoul, mare uangoul tagu tamiuoum tar mamang binakalik. ¹⁷qInggono ter Iabene Dedeil ger uauaman. O tamatang gane i kot ahik pah ra malara tatanon, teeit gisin ahik pah ka bang ue ra ate tatanon. Bo inggoum mung ate tatanon, teeit inggon e uangoul tokaha keip tamiuoum, doh inggon e turung uangoul i lolono tamiuoum. ¹⁸Doh inggo ahik pahu matotong hiliu ueltebeir puk tamiuoum misiana tar legur. Inggo u turung tapokisime tamiuoum. ¹⁹Tar sisikinalik tunur binak, o tamatang gane i kot ahik pah ra matotong banga uapoul totoguo, bo inggoum mung turung banga totoguo a tua, doh inggoum pono mung turung tua. ²⁰rDoh gete pokoso manasar mareinon, inggoum mung turung ate pare, inggo u uangoul teil tang Tamoug, doh inggoum mung uangoul teil totoguo, doh inggo u uangoul teil tamiuoum. ²¹Mai re ate tenagu ualatoho, kare uakeluk taninin, inggono tere malauelhirintiehe tun totoguo. Tamouguo e turung malauelhirintiehe pono tang mai re malauelhirintiehe totoguo, doh inggo u malauelhirintiehe pono tatanon, karu uamakaha katongoio tatanon.”

²²Doh Judas (ahik pah Judas Iskariot) ke dangata pare, “Tamata Noman! Ae maene ro turung uamakaha katongoia tamiueim puk, doh ahik paho ua-

^j14:9 Jon 12.45; Kol 1.15; Hib 1.3 ^k14:10 Jon 12.49 ^l14:11 Jon 10.38

^m14:12 Mak 16.19-20 ⁿ14:13 Mat 7.7; Jon 15.16

^o14:15 Jon 15.10; 1Jo 5.3 ^p14:16 Jon 14.26; 15.26; 16.7

^q14:17 Jon 16.13 ^r14:20 Jon 17.21-23

makaha katongoia tasir tamata uakapa tunane i kot?"

²³Doh Iesu ke kula tapokis pare, "Ge me tamata re malaelhirintiehe tun totoguo, kare longoro tun tenag niualasiro Tamougou e turung malaelhirintiehe pono tatanon, doh raeim mira laha tatanon, kaira me tuha mena mira uma tatanon. ²⁴^sMair tamat ahik pah ke malaelhirintiehe tun totoguo, inggon ahik pah ke longoro tar haua ku ualasi-ragio. A inetenanine ku ualasi-ragio ahik paha nouguo katong, ginin a nang Tamougou geke heiriha totoguo."

²⁵"Inggo u hire puk tamiuoumene daana ru uangoul keip haraha pe. ²⁶Bo a nipoul e la tur tar Iabena Dedeil gere turung heirihain Tamougou tar hangouguo. Inggon e turung ualasi-ragio tamiuoum tar mamang inetelik marung namana dedeoum tar mamang inetelik geku hiregio tamiuoum. ²⁷Doh inggo gine ru hiliu to toro hiarouo tamiuoum, kara uelhiarouonene ru heirio ahik pah misiana tar uelhiarouonine ra uoto guataigir tamata uakapane i kot, temaeit ahik pahe duhur balamiu ue mung sokor."

²⁸^t"Doh inggoum kung longoro manasa ku hire peo tamiuoum, 'Inggo gine manasa ru hiliu, bo u turung tapokis polukumpeme tamiuoum.' Ge parung malaelhirom totoguo, inggoum mung uah, teeit inggo u la tapokis tang Tamoug, ge Inggonon pe a i rana uain totoguo. ²⁹^uDoha inetenin halana te kotpokos, inggo ku hire tanika puk manasa tamiuoum, maeit gete kotpokoso manasar inetonene, inggoum mung turung tagorong man. ³⁰Inggo ahik pahu matotong menmene keip tamiuoum tar puhung barah, teeit a tamata uleik gere kaeke teilane i kot, gine manasa re

lame, inggon ahik mena nitampopokoho me i rana uain totoguo. ³¹Doho tamata uakapa tunane i koto ra turung iatengua pare, inggo u malaelhirintiehe tun tang Tamoug, temaene ru guata sira tunuo tar mamang inetelik ke ualatoho peono totoguo. Gon tur, ti la manas."

O Mahar 15

Iesu ke uelhire uaranga tolain toro uoho to ranan

15 "Inggo tero uoho bino nomana tun, doh Tamougou te tanener iomo bino. ²^vInggon e uoto bura liu tar rananane totoguo ge ahik pahe uoto ua tagu, kare uoto bura uadelauana tar rananane re uoto ua mare bungbunguan."

³"Bo inggoum kung delauana manas, teeit ku heir peo tar ualasi-ragio tamiuoum. ⁴Mu uangoul tabara dede totoguo, doh inggo u turung uangoul tabara pono tamiuoum. A ranan ahik pahe matot e bungbunguana katong, e bungbunguana kompe gete tur teil toro tukunun. Ter siokono kompe, ahik me kukuanana re matotong ua katongo tamiuoum, e matoto getung uangoul tabaroum totoguo."

⁵"Inggo tero uoho bino, doh inggoum ter ranan. Mais ra uangoul tabara totoguo, doh inggo u uangoul tabara tasisin, gisin ra turung bungbunguanantieh. Bo gete taboio gisin ahik pah ra matotong guata me inet. ⁶^wDoh mais ahik pah ra uangoul tabara totoguo, gisina te misianangua tar rananane ra uoto bura liu turig toro tukunun, kare turung makmakoro, kara bakalai-goro hue. ⁷Ge rung uangoul tabara dedeoum totoguo, karung uakeluk tar haua ku ualasi-ragio, inggoum mung banotong dangata me inete ueltebeir rung

^s14:24 Jon 7.16 ^t14:28 Jon 20.17 ^u14:29 Jon 13.19 ^v15:2 Mat 3.10

^w15:6 Mat 7.19; 13.42

malaraig, inggoum ra turung heiri-sioum. ^{8x}Gininanine e ualasira tar uinator nang Tamouguo, teeit ke bunguanantiehe per kukuanana tamiuoum, kare ualasira pono pare, inggoum tosnogo tamatang uakuakeluko.”

⁹“Doh inggo u malaelhirintiehe tun tamiuoum misiana re malaelhirintiehe pe Tamouguo totoguo. Gine daan uangoul keip dedengua tar uelmalaelhirener nouguo. ^{10y}Doh ge pare, kung uakeluk nomanoum tenagu ualatuto, inggoum mung uangoul keip dedengua tar uelmalaelhirener nouguo ter siokono ku uakeluk tun peo tena ualatoho Tamoug, temaeit a uelmalaelhirener nanon e moko dedengua totoguo.”

¹¹“Inggo ku hire tamiuoum mare turung moko tun reg niuaho tamiuoum, kare la unga uaha tun remi niuah. ^{12z}Doh inggo gine ru ualatut tamiuoum; “Uelmalaelhiresioum misiana ru malaelhirintiehe peo tamiuoum.” ^{13a}Doh ter i ranar nimalaelhirintiehe tun tar tamata toso bung uanoton, inggon e heir tar tukununa katongo tasisin. ^{14b}Inggoum teso bung kalouguo getung uakeloukoum tar ualatut geku hiregio tamiuoum. ¹⁵Doh inggo ahik manasa pahu kila uapoul tamiuoum pare, o tamatang kalekinale puk, teeit a tamatang kalekinale ahik pahe ate tar haua re guatain na tang kauek. Temaeit inggo u kilangua tamiuoum pare, o bung kaloug, teeit inggo ku hire luaka uakapa tar mamang inetelik geke hireig Tamoug totoguo. ¹⁶Inggoum ahik pah tekung kedanga totoguo, bo inggo teku kedanga tamiuoum, karu heir tamiuoum tar kalekinale tar la, karung ua me bureher kukuanan. A kukuanana gere

moko dedengua. Song re heir Tamouguo tar mamang inetelik tamiuoum gerung dangata tolaig tar hangouguo. ^{17c}Doh nag ualatuto tamiuoum teene, mung uelmalaelhiresioum.”

Iesu ke ualatut toсно tamatang uakuakeluk

¹⁸“Gete siokor tokouasaisir tamatang gane i kot tamiuoum, inggoum mung namana huarangua kompe pare, gisina ke tokouasa uakikilangais totoguo. ^{19d}Doh ge paro peng koto nomanoum o tamatang gane i kot ra turung malaelhirintiehe tun tamiuoum misiana re malaelhirintiehe peono toso uanoton. Bo inggo ku kedanga liu manasa tamiuoumane i kot. Temaeit inggoum ahik pah ter namiu tatanon. Temaeit puk re tokouasaisir tamatang gane i koto tamiuoum. ^{20e}Mu namana huara kompe ku hire peo tamiuoum. Ahik me tamatang kalekinale re i rana liu tena tang kauek. Geta guata uasar tamata totoguo, gisina ra turung guata uasa pono tamiuoum. Bo geta longorosin, kara uakeluk tar haua ku ualasiragio, gisina ra turung longor, kara uakeluk pono tar niualasirar namiuoum. ²¹Gisina ra turung guata tar hagaraninanine tamiuoum, teeit totoguo, ge gisina pe ra tele tang maiene ke heiriha totoguo. ²²Ge pakene ahiko pah ku me menmene baka uoum tasisin, gisina pake haik pah ra kouh teres niguata uasa. Doh gine daan gisin ahik manasa me lele ra lihin tar touaouo teres niguata uasa. ^{23f}Mai re tokouasain totoguo inggon e tokouasa ponoin tang Tamouguo. ²⁴Ge pakene ahiko pahu me kalekinale kudul i uantinanina tasisina tar inetenine ahik me tang sioko re

^x15:8 Mat 5.16 ^y15:10 Jon 14.15; 1Jo 2.5 ^z15:12 Jon 13.34

^a15:13 Jon 10.11; 1Jo 3.16 ^b15:14 Mat 12.50 ^c15:17 Jon 13.34

^d15:19 Jon 17.14 ^e15:20 Jon 13.16 ^f15:23 Luk 10.16

matot e guat, gisina pake haik pah ra kouh keip teres niguata uasa. Bo gine daan gisina ka bangampe tar inete ku guatagio, kare tokouasa dedempeis tamiraeim me Tamoug. ²⁵Bo ginina ke pokoso puk, maeit a haua geka boloin tenas ualatutusin e pokoso nomana tun. A tabo tengkana tun re tokouasa peisisina totoguo.”

²⁶h“Binaka re lahar nipoul geru heir turuhaio tang Tamoug, inggono ter labena ger uauaman gere la tur tang Tamouguo. Inggon tere me hirhire tauete teil totoguo. ²⁷Doh inggoum mung turung hirhire tauete teil pono tasir tamata totoguo, ge inggoum pe kung uangoul keip tur totoguo tar uakekenen.”

O Mahar

16 “Inggou u malar ahik remi nitagorong manoum pahe punga kout, temaeit ku hireo tamiuoum tar ineteninanine. ²iGe inggoum pe ra turung ueluelutula liu turusiuoum tenas umang lotur Ju, doha binak e turung pokosome tas mais ra tung pous tamiuoum ra turung namana pare, ka poul tang God tar uahung. ³jGisina ra guata tar inetenina tamiuoum, teeit gisina ra tele tang Tamouguo ue totoguo. ⁴Bo inggo u hire tanika puk tamiuoum tar inetenin, maeit gete la matoto manasainir binaka tasisina tar guata tar inetonene, inggoum mung turung naman manatengua kompe tar haua ku hireio tamiuoum. Inggou ahik pah ku marang hire tamiuoum tar ineteninanine tar uakikilangan, teeit inggo ku pepe keip tamiuoum.”

Na kalekinaler Iabena Dedeil

⁵“Inggou gine ru la tapokis manasa tang mai geke heirihia totoguo, ahik me tang sioko tamiuoum re dangat, ‘Ia ru lao?’ ⁶Doh gine daan inggoum mung uangoul keip tar niueldolom. ⁷kBo inggo gine ru hire tun tamiuoum toro man, romio uiaoum getu hiliuo tamiuoum, teeit gete haiko pahu hiliu, inggonor Nipoul ahik pahe matotong laha tamiuoum. Bo getu hiliuo, inggo u la turung heirihia tatanonor Nipoul tamiuoum. ⁸Doh, gete la manasahaon, Inggon e me turung uakouh tasir tamata uakapa tunane i koto teres niguata uasa, kare ualasira uakalahar tar huar ineter kodkodoh, doh tena nikedanga God. ⁹A Iabene Dedeil e uakouh tenas niguata uasasin, teeit gisin ahik pah ra tagorong mana totoguo ger Kristo. ¹⁰Kare ualasira uakalahara pono tar huar ineter kodkodoh, teeit inggo u tapokis tang Tamoug tar uan ge ahikoum pah mung matotong banga uapoul totoguo. ¹¹lDoha Iabene Dedeil e ualasira uakalahara pono tena nikedanga God, teeit a tamatang uoum keipane i koto ka kedanga manasain.”

¹²m“Inggou nagu bureher uelhire ru marang mene baka polukig tamiuoum, bo a burburehentiehe puk tamiuoum tar longorene daan. ¹³Bo gete la pukuhar Iabene ger uauaman, inggono tere me uoum keip tamiuoum toro uauaman. Inggon ahik pahe me mene tena uelhire katong, bo inggon e me mene tauete puk tar haua ke longoroin, kare hire tamiuoum tar inete re turung lame. ¹⁴Doh inggonor Iabena Dedeil e keipiha tar uinatoro totoguo, teeit inggon e kale teil tar haua ku meneio, kare hire tanin-

§15:25 Ker 35.19; 69.4 h15:26 Jon 14.26

i16:2 Mat 24.9; Luk 6.22; Jon 9.22 j16:3 Jon 15.21 k16:7 Jon 14.16

l16:11 Jon 12.31 m16:12 1Ko 3.1-2

ina tamiuoum. ¹⁵A mamang inetelik ger nang Tamouguo a nouguo, temaeitie ku kula siro pare, a Iaben e turung kale tar haua ku meneio, kare hire tananina tamiuoum.”

**A niueldolom e turung lame,
song re lamer niuah**

¹⁶n“Ahik me manasan, kare haik manasoum pah mung banga uapoul totoguo, kare haik me manasan, karung me banga tapokisoum totoguo.”

¹⁷Doh no gisiamer matang uakuakelukono ka ueluedangata katongonguais pare, “A hauanguar tengkana, maeit ke mene Iesu pare? Inggono ke hire tagigeig pare, ‘Ahik me manasan, kare haik manasoum pah mung banga uapoul totoguo, kare haik me manasan, karung me banga tapokisoum totoguo,’ kare kula pono pare, ‘teeit inggo u la tang Tamoug.’ ¹⁸A hauanguar tengkanar puhonene, ‘Ahik me manasan?’ Inggeim ahik pah king naman manate tar haua ke meneion.”

¹⁹Iesu ke ate pare, gisina ra marang dangata tatanono tar puhonene, temaeit ke kulono tasisina pare, “Inggoum mung ueluedangata katongosioum, a haua tunur tengkana, maeit ku meno pare, ‘Ahik me manasan, kare haik manasoum pah mung banga uapoul totoguo, kare haik me manasan, karung me banga tapokisoum totoguo?’ ²⁰Inggono gine ru hire tun tamiuoum toro man. Inggoum mung turung kiring, karung maligom. Bo o tamata uakapa pukane i koto ra turung uahantiehe tun. Inggoum mung turung ueldolom, bo a niueldolomo pukur emiuoum e turung uapalih tar niuah. ²¹Tar binaka re marang pohor kuah, inggono ke pokoso manasa na binaka tar kale uelmahing, bo binaka

puk re poho uakapon, inggon e malabobour tar uelmahing, teeit inggono ke uahantiehe tun ke kotpokoso manasa per keketikane i kot. ²²Inggono ter siokono puk tamiuoum. Gine daan inggoum mung ueldolomo tun. Doh inggo u me turung banga poluk tamiuoum, doh inggoum mung turung uah, ahik me tamata re matot e kale liu teremi niuahoum. ²³oDoh tar mareinonene inggoum ahik pah mung turung dangata uapoul me inete totoguo. Inggo u uamana tun tamiuoum. Tamouguo e turung heir tamiuoum tar haua rung dangata tolagioum tar hangouguo. ²⁴Doh ke tukene daan, inggoum halana tung dangata tola me haua tar hangouguo. Dangat! Marung turung kale inggoum, maeit re la unga uaha tun remi niuaha inggoum.”

**Iesu ke pehuara
manasa tar koto uakap**

²⁵“Inggono ku me mene keip puk tamiuoum tar uelhire uarang. Bo a binak e turung lame, ter binakon inggo ahik pahu turung uelhire uaranga tola me inet, inggo u me turung uelhire luaka tar mamang inetelik tamiuoum tang Tamoug. ²⁶Ter binakono rung dangata tolaoum tar mamang inetelik tar hangouguo tang Tamouguo, inggo ahik pahu kula pare, u dangata ueleheir tamiuoum me inete tang Tamoug. ²⁷pTamouguo katongompe re malaelhir tamiuoum, teeit inggoum mung malaelhiritiehe tun totoguo, karung tagorong mana pare, inggo u la tur tatanon. ²⁸Inggono teru la tur tang Tamoug, karu lahane i kot, doh gine daan inggo u hiliu polukane i kot u la tapokis tang Tamoug.”

²⁹Song gisis no matang uakuakeluk Iesu ka kulangua pare, “Gine daan, ingga song ko mene luaka tun, ahik pah ko uel-

hire uarang. ³⁰Inggeim song king bang paroko ponene daan pare, ingga o ate uakapa tun tar mamang inetelik, doh ingga o uoto hire tauete uakikilanga tar inete re marang dangatainir tamat. Teenina teke guata tamiueim, maeit king tagorong mana pare, ingga o la tur tang God.”

³¹Doh Iesu ke kula tapokisingua tasisina pare, “Song kung tagorong manene daan? ³²Ualongorongua, a binak e lame, doh inggono gine manas, doh inggoum mung turung uelueltageih ueltebeir. Inggoum mung la kakahaha tonomio uan, doh inggoum mung turung hiliu totoguo me paheig. Bo ahik pukumpe pah me paheig, teeit Tamougou e uangoul keip totoguo.

³³Inggo ku hire puk tamiuoum tar ineteninanine, maeit mung turung uangoul keipoum tar uelhiarouor nouguo. Doh gane i kot, inggoum mung turung kale tar uelmahing, bo mung uaongolo kompesioum, karung uah. Ge inggo pe gine ku pehuara manasa tar koto uakap.”

O Mahar 17

Iesu ke lotu tang Taman

17 I muduhia ke mene uakapa baka pe Iesu, inggono ke banga katiatig i Heuen, kare kula pare, “Tamoug a binaka gine manasa ke pokos, uatakaiantiehe tunungua tar hanganar Tum, maeit re turung uatakaiantiehe tunungua ponono tar hangoumua. ²Ge ingga pe ko heir tatanono tar nitampopokohong kauek a i rana liu tasir tamata uakap, maeit re turung heirono tar nitua gere moko dedengua tasir tamatasine ko heirisia tatanon. ³S^sDoha nitua gere moko dedengua, o tamata gera kale tar nituaonene, gisina ra turung ate to-

tomua, ingga ter tang sioko manasamper God noman, karo ate pono tang Iesu Kristo geko heirihai. ⁴tInggo ku heir tar uleik tunur uinatoro totomua gane i kot, ku uakuakapa hihir tun pe tar kalekinale geko hiregia totoguo. ⁵u^uTamoug! Uatakaiantiehe tunungua totoguo i uoum totomua menia tar uinatoro geko uangoul keipimeio totomua binaka halanar kot te pokos.”

⁶“Inggo ku ualasira tun hape ro baka pea tasisine ko heirisia totogouane i kot. Gisin o noumua. Ingga ko heir tasisina totoguo, gisina ka longoro tun, kara uakeluk tenang uelhirea. ⁷Gine daan gisina song ka ate pare, a mamang inetelik geko heirigia totoguo e la tur totomua. ⁸Inggo ku ualasira tasisina tar uelhire geko heirigia totoguo, doh gisina ka kale taninin. Gisina ra ate uaia tun pare, inggo teku la tur nomanaha totomua, kara tagorong mana pono pare, ingga ko heirihia totoguo.”

⁹“Inggo u lotu tasisin. Inggo ahik pahu lotu tasir tamata uakap, bo inggo u lotu puk tasisine ko heirisia totoguo, teeit gisin o noumua. ¹⁰Gisine uakapa tun totoguo o noumua, kare gisis uakapa tun totomua o nouguo, doha hangouguo e turung kale uinatoro to tasisin. ¹¹Doh gine daan inggo u laha totomua, inggo ahik pahu uangoul manasa tunane i kot, bo gisina ra turung uangoul dedeane i kot. Tamamiueim ingga a dedeil. Uaudeil tasisina tar nitampopokohonor hangoum tar hangene ko heiria totoguo, maeit gisina ra la misiana pare, a tang sioko misiana tagiraeigir tang sioko pe. ¹²v^vBinaka ku uangoul keipo tasisin, inggo ku kaueke, karu uaudeil tasisina tar hangene ko heiria totoguo, inggo ku kaueke tun tasisin, bo a tang sioko puk tasisina ka umatotoin

^q16:32 Mat 26.31,56 ^r16:33 Jon 14.27; Roum 5.1; 1Jo 5.4

^s17:3 1Jo 5.20 ^t17:4 Jon 4.34 ^u17:5 Jon 1.1 ^v17:12 Jon 6.39; 13.18

pare, e heil, maeit o bolobol geke boloin o la turung pokoso tun toro man.”

¹³“Inggo gine manasa ru laha toto-mua, bo u lotu tanika baka kompe tar inetenine ru uangoul haraha peane i kot, maeit regu niuaho e la uoun tunungua tar koloususin. ¹⁴Inggo ku heir tasisina tenang uelhira, doho tamatane i koto ke tokouasais tasisin, teeit gisin ahik paho tamatang gane i kot te misiana kompe totoguo ahik pono paha peng gane i kot. ¹⁵wInggo ahik pahu dangata toto-mua tar kale liu tasisinane i kot, bo u lotu kompe mara kapil uaiasisin, kara udeil tar tang sa. ¹⁶Doh gisin ahik paho peng gane i kot ter siokono kompe totoguo ahik pono paha peng gane i kot. ¹⁷Uadedeil tur tanika tasisina toro man tonongo uelhire gero man. ¹⁸xInggo ku heir tasisinane i kot ter siokono kompe ingga ko heir ponoha totoguoane i kot. ¹⁹Doh inggo ku heir katongo manasaio Totomua tar poul tasisina mara heir katongo ponoisina Totomua, maeit gisina ra turung dedeil tun toro man.”

Iesu e lotu tasir tamata uakapa gera turung tagorong mana tatanon

²⁰“Inggo u lotu tosnogo tamatang uakuakeluk, bo ahik pah tasisina puk tas mais ponompe ra turung tagorong mana totoguo tar ualasar nasisin. ²¹Tamoug, inggo u lotu pono mara uangoul sirasin a tang siok misiana ro uangoul teil pea totoguo, doh inggo u uangoul teil toto-mua. Inggo u lotu pono mara uangoul teil tokahasina tagiraeig tokah. Song, ra turung tagorong manar tamatane i koto pare, ingga ko heiriha totoguo.”

²²y“Inggo ku heir tasisina tar siokono komper uinatorene ko heiria totoguo, maeit gisina ra turung uangoul sir a tang sioko misiana tagiraeigir tang sioko pe. ²³Inggo u turung uangoul teil tasisina,

doh ingga o turung uangoul teil totoguo, maeit gisina ra turung pokoso sira tun pare, a tang siok. Song ra turung atenguar tamata uakapa tun pare, ingga ko heiriha totoguo, karo malauelhirintiehe pono tasisina misiana ro malauelhirintiehe pe totoguo.”

²⁴“Tamoug, inggo u malara tasir tamatasine ko heirisia totoguo tar me uangoul tagu tar buturene ru pepeo. Inggo u malara tasisina ra banga tar uinatorene ko heiria totoguo binaka halanar koto te pokos.”

²⁵“Tamoug, ingga ter tang sioko manasamper kodkodoh. O tamatang gane i kot ahik pah ka ate Totomua, bo inggo u ate Totomua, karo tamatasine ra tagorong mana totomua, ra ate pare, ingga teko heiriha totoguo. ²⁶Inggo ku uaate tasisina totomua, karu turung uaatentiehe dedempe, maeit reng ni-malauelhiria totoguo e turung moko tasisin, doh inggo katongo ponompe u turung uangoul teil tasisin.”

O Mahar 18

Iesu ka kusa tanein

18 Binaka ke lotu uakapa pe Iesu, inggono mesno tamatang uakuakeluk ka la, kara la sairkout tar kodom i Kidron. Doh tar pang giameher pain e turur lebe oliv, doh Iesu mesno tamatang uakuakeluk teka la tar lebe olivon. ²Doh Judas gere turung tangana tang Iesu tasir uelmatan, e ate tar buturuon, teeit a bureher binak, Iesu mesno tamatang uakuakeluk ra la uoto pepe tar buturuon. ³Temaait Judas ke la keip ualasila tar buturuono tasir manaiar tamatang uiluiliatungung Roum, karo gisiameher tamatang babata gera uoto tur kaueke tar umang lotu ger dedeil, gisina ka ualatueisir

patere uleik, karo Parisi. Doh gisina ra bita teil tar bit, kara lam, kare nas ineteng uiliatung.

⁴Iesu e ate teil uakapa tun tar haua re turung pokoso tatan, temaeit inggono ke tur uakalaharalain i uoum tasisina, kare dangat, “Maionene rung sirioum?”

⁵Kara hire tapokisisin, “Iesu ger peng Nasaret.”

Kare hire tapokison, “Inggo teene!” Doh Judas gere turung tangana tang Iesu tasir uelmatan e tur keip manasa tasisin. ⁶Doh tar binaka ke hire pe Iesu pare, “Inggo teene,” gisina ka siokor pungang tar mudula i kot. ⁷Kare dangata poluk Iesu tasisin, “Maiono rung sirioum?” Kara hire tapokis polukusin, “Iesu ger peng Nasaret.”

⁸Iesu ke hire tapokis poluk tasisin, “Inggo ku hire manasa tamiuoum, inggo teo. Doh ge parung sir teiloum totoguo, uamaluana tasir tamatasine ra la.” ⁹Inggono ke mene puk pare, maeit a haua geke meneiono sioun e turung pokoso noman. “Tamoug, inggo ahik pahu matot u uaheil me tang sioko tasisine ko heirisia totoguo.”

¹⁰Doh Saimon Pita e uasipa teil toro baenat, kare reih tauete tang roon, kare tokout sebeke tar pang muar talingana na tamatang kalekinaler patere uleik. A hanganonener tamatang kalekinale nu Markus. ¹¹^aKare kula Iesu tang Pita pare, “Uasipa tapokis tonong baenat. Ingga o naman ahiko pahu turung inum tola tar kap gere moko teilur uelmahing geke heirin Tamoug totoguo?”

Iesu ka keipin tang Anas

¹²Song gisisir tamatang uiliatungung Roum, kare noso ualualatouk, karo noso tamatang babatar Ju ka kusa tang Iesu, kara uih tane to tar toking limanon i mud. ¹³Kara keip uakikilangangua

tatanon tang Anas. Inggono tena uarih Kaiapas gere uleik teil tasir patere tar binakon. ¹⁴^bInggono Kaiapas teke heir tar ninamana tasir tamatang Ju pare, auiantiehe tun gete matar tang sioko tasir tamata uakap.

Pita ke uolih, e tele tang Iesu

¹⁵Saimon Pita mer tang giamehe na tamatang uakuakeluk Iesu kura uakeluk tasisin. Gitir tang giameh e ate uaia tunin nas uleikir pater, temaeit ke la leke tagumpeko iuma tena morene nas uleikir pater. ¹⁶Bo Pita teke tur uan-goulane i morene toro pirik. Song gitir tang giamehe gere ate uaia tunin nas uleikir patere ke tapokisila i morene, kare hire tar kuahene re kaukeke toro pirik, song ke keip uasolomeono tang Pita ium. ¹⁷Doha kuahonene toro pirik ke dangata pare tang Pita, “Ingga deh ter tang sioko pono na tamatang uakuakeluk Iesu, bidouh?”

Kare hire tapokis Pita pare, “Ahik! Inggo ahik tagu!”

¹⁸Doha binakon a malahongo ke hui, temaeit gisisir tamatang kalekinale, karo tamatang babata ka uout keip tar kalin-goho toro hue, kara tur uiloho ra mahirum pe, temaeit Pita ke la tur tagu ponola tasisin, e mahirum pon.

Nas uleikir patere ke dangdangata haka tang Iesu

¹⁹Doh git nas uleikir patere uakapa tun ke dangdangata haka tang Iesu toсно tamatang uakuakeluk, kare hape tena niualasiron.

²⁰Kare hire tapokis Iesu pare, “Inggo u uoto menmene to tar matasir tamata uakapa tun tar uanene i kot, doh nagu ualasira uakapa tuno ra uoto guata toig toro umang lotu, kari iuma tar umang lotu ger dedeil tar butur ra siokor uel-

^z18:9 Jon 17.12

^a18:11 Mat 26.39

^b18:14 Jon 11.49-51

gogounur Ju uakapa tun, ahik pah ku mene uaouo me inet i behia. ²¹ Bo ae maene ro dangdangata haka ingga to-toguo? Dangata tasir tamatasine ka longoro tar haua ku ualasingio tasin. Gisina ra ate tar haua ku menmenegio.”

²² Ke mene pe Iesu tar puhonene, kara tang siokor tamatang babata ke posara tar pararonon, kare kula pare, “Ae maene ko mene sira tar puhonene tenas uleikir pater?”

²³ Kare kulangua Iesu tatanono pare, “Ge pare, ku mene inggo me inete me sa, hire tasisine uakapa tun a hauon. Bo ge para manar haua ku menegio, ae maene ko posara to-toguo?”

²⁴ Song ke heirila Anas tatanono tang Kaiapas ge nasi uleikir pater. A niuih tane harahamper toking liman.

Pita ke uolih uagiameh poluk, e tele tang Iesu

²⁵ Pita e mahirum tur harahampe, temaeit o gisiamhe ka dangata poluk tatanono pare, “Ingga deh ter tang sioko pono na tamatang uakuakeluk Iesu, bidouh?”

Bo Pita puk ke la uolihintiehengua pare, “Ahik! Inggo ahik!”

²⁶ Doh na tang siokor ualualatuer uleiking tasir patere uakap e pepe pon. Doha ualualatueonene a tahinalik tar tamata geke tokout sebekin Pitar talingan. Inggono ke kula pare, “Inggo u nana sira ku banga toala to-tomua me Iesu tar lebe oliv?”

²⁷ ^cKare uolih poluk Pita, “Ahik.” Doh ahik me manasana, kare kororor paol.

Iesu ka keipilain tang Pailat

²⁸ Naliliuolik tun Iesu ka keip turin tena uma Kaiapas, kara keipilain tena uma Pailat. Doho Ju ahik pah ka lekela

iuma tar umonene, teeit gisin ahik pah ra marang katego tar ualaturung toro niein uleiking Leke Liu ro Mat, geta hikingua pah ra turung ein. ²⁹ Temaeit Pailat ke tauete uelhir tasisin, kare dangata pare, “A haua kung poluk uelhiruom ke guata uasainir tamatene?”

³⁰ Doh gisina ka hire tapokis pare, “Ge pakene ahikiono paha tamata uasa, inggeim pake haik pah mi keipime tatanono to-tomua.”

³¹ ^dDoh Pailat ke kula tapokis tasisina pare, “Mu me kale tatanono marung la kodohoum tang hingiar ualaturung namiuom ke kategogion.”

Bo gisit pukur Ju ka hire tapokis pare, “Inggeim ahik pah ra tanganasieim tar uamoko me tang siokor tamata toro mat.” ³² ^eGininanine ke kotpokoso puk mare uakalahara tun toro mana tar haua ke menein Iesu, hape re turung mate pe.

³³ Song ke tapokis polukula Pailat ium, kare kila tang Iesu, kare dangata tatanono pare, “Ingga tenas toiar Ju?”

³⁴ Kare kula tapokis Iesu pare, “A noumua katongomper puhung dangatono ue mo gisiamhe ka hire ueleheir to-tomua to-toguo?”

³⁵ ^fKare kula tapokis Pailat pare, “Inggo ahik paha peng Ju? Gisina nongo tamata katonga, kare nos uleikir pater, gisina teka keipimeane to-tomua to-toguo. A hauonene ko guataia?”

³⁶ Kare kula Iesu pare, “Nag nitoiao ahik pah gane tagu i kot. Ge pakene ganeon i kot, nougu tamatang uakuakeluko paka uiliatung tar uelkarus to-toguo mare haik me tamata re kusa ueleheir to-toguo tasir Ju. Bo nag Nitoiao ahik paha peng gane tar uanene i kot.”

³⁷ Temaeit git Pailat ke dangata tatanono pare, “Temaeit ingga a toia?”

^c18:27 Jon 13.38

^d18:31 Jon 19.6-7

^e18:32 Jon 3.14; 12.33

^f18:35 Jon 1.11

Kare kula tapokis poluk Iesu pare, “Ingga teko kila totoguo a toia. Temaene ka pohoio, karu laha i kot, tar me hire tasir tamata uakapa tun toro man, doh mais uakapa tun ra uakeluk toro uelhire gero man, gisina ra longoro totoguo.”

Pailat ke luaka kare uatauete tang Barabas tar umang karabus

³⁸“A huar tengkanana ro man?” Teke dangata pe Pailat. Ke dangata bakono tar puhonene, kare tauete uelhir poluk tasir Ju, kare hire tasisina pare, “Inggo ahik pah ku tupara me siokor inete ke guata usainir tamatene. ³⁹Bo tar uakeluk puk tenami niguata, kara ni-uangoulur namiuoum ru uoto guata peo tar mamang binakalik tena binaka ro niein uleiking Leke Liu ro Mat. Inggo u uoto luaka, karu uatauete tar tang siokor tamata tar karabus teremi nimalaroum. Doh inggoum mung malar u luako, karu uatauete tenas toiar Ju?”

⁴⁰Doh gisina ka siokor kula ualeikintiehe tunungua pare, “Ahik! Ahik pah teon! Inggeim mi malar o luaka, karo uatauete tang Barabas!” Barabas a tang uelpus, kara ueuenau.

O Mahar 19

Pailat ke heir tasisina tang Iesu mara uakusain tar korose

19 Song ke kula Pailat tasir tamatang uiliatung ra keip tang Iesu, kara la kalkalopis[†] tatanon. ²§Doho tamatang uiliatung ka kale toro uoho misiana toro uelhung, kara tuha sira tang roono tono takur toia, kara uamokoin toro luna Iesu, kara ualoho toro mahar gomono tabeliaha tatanon. ³Kara la menmene uelapokisie kompe

pare, “A marein uaia tun nas toiar Ju.” Kara nun tar pararanon.

⁴Doh Pailat ke tauete uelhir poluk tasir Ju, kare kula pare, “Bang inggo gine ru turung keip tauete manasame tang Iesu tamiuoum marung ateoum pare, inggo ahik pah ku tupara me inete ke guata usaion.” ⁵Maeit Iesu ke tauet a niauuh ro luna toro uoho ueluelhung, kare loho teil toro mahar gomono tabeliah, song ke kula Pailat tasisina pare, “Ter tamata teene!”

⁶Tar binaka ka bangar tamata uleiking tasir patere, karo tamatang babata tang Iesu, kara kula ualeikingua pare, “Uakusa kai tatanono tar korose! Uakusa kai tatanono tar korose!”

Bo Pailat puk ke kula tapokis pare, “Mu me kale tatanono marung uakusa kaia katongoum tatanono tar korose, teeit inggo ahik pah ku tupara me inete ke guata usaion.”

⁷Doh gisisir Ju ka hire tapokis pare, “Inggeim nami siokor ualatut e kula teil pare, inggon e mat, teeit inggono ke kula katongoin a tuna God.”

⁸Doh ke longoro pe Pailat tar puhonene, inggono ke la sokorontiehengua. ⁹^hPailat ke leke tapokis poluk iuma tar uma ger nang gauaman, kare dangata tang Iesu, “Ingga, ia ro la tur?” Bo Iesu puk ahik pah ke mene hahaua tatanon. ¹⁰Kare kula Pailat pare, “Ingga ahik paho marang mene hahahaua totoguo? Ingga ahik paho ate pare, inggo pe teru kale teil tar nitampopoko? Inggo u matot u luaka liu totomua, karo tauet, karu matoto pon u kula ra uakusaia i rana tar korose.”

¹¹ⁱIesu ke kula tapokis pare, “Ingga pake haik paho matot o kale uahua

[†]19:1 Nas kalopisir Roum ka tuhain toro let doh tar surun ka uamokoigir sikiskir hain a man

§19:2 Luk 23.11 ^h19:9 Mat 27.12 ⁱ19:11 Jon 10.18; Apo 2.23; Roum 13.1

totoguo ge pakene ahik God pah ke heir totomua tar nitampopokoh, karo kaueke tar mamang inetelik. Temaeit a tamatene ke heir totoguo tar limoumua inggon e kouh tar niguata uasaniner santiehe tun.”

¹²J Doh ke longoro pe Pailat tar puhon, inggono ke marang sir me hagar mara luakain Iesu mare la. Bo gisis pukur Ju ka kula ualeikintiehe tun pare, “A tamata geke guata katongoin pare, a toia, inggon e tokouasain tang Sisa. Geto luaka ingga, karo uatauete tar tamatene, ingga ahik pah kaloum tang Sisa.”

¹³Doh ke longoro pe Pailat ka mene pesina pare, kare keip tauetengua tang Iesu, kare la tabila tonu tabtabilar tang kedang. A buturuono ra kilain pare, o palaua mamadelau. O Ju ra kila tang roono pare, Gabata.

¹⁴Doh inggono ke uahuhut sikoro manasalainir marein uelik tar kaleuatoro toro niein ueliking Leke Liu ro Mat. Doh Pailat ke kula tasir tamata pare, “Bang! Tenami Toia!”

¹⁵Doh gisina ka kula ualeik pare, “Tung pous tatanon! Tung pous tatanon! Uakusa kai tatanono tar korose!”

Kare dangata poluk Pailat tasisina pare, “Inggoum mung malar u uakusa kaio tenami Toiaoum tar korose?”

Doh gisis nosi uleikir patere ka kula tapokis pare, “Inggeim nami tang sioko komper toia Sisa.” ¹⁶Temaeit Pailat ke heir tang Iesu tar limasisina mara uakusasina tatanon i rana tar korose.

Iesu ka uakusain i rana tar korose

Temaeit gisisir tamatang uiliatung tera kaueke teilingua tatanon, ¹⁷Iesu ka uahuata katongoin tena korose, kare hiliu tar uan uleik, kare me pokoso tar butur ra kilain, “Na buturur Lakok.” Doh toro uelhireng Ju ra kilainir butu-

ruon i Golgota. ¹⁸Ter buturuono teka la uakusa kaia toiono tar korose menia tar tang torik ponor tamat, rasina ka uaturunguais nasira korose i uara tek-tekene ter nang Iesu, a nang Iesu ke tur i uantinanin.

¹⁹Doh Pailat ke bolo tar puhung uahire, karo uamokoin i rana tar korose. Ka boloin pare, “Iesu ger peng Nasaret nas toiar Ju.” ²⁰Doha puhung uahireono ka boloin toro uelhireng Ju, Latin, dohi Grik. O bureher Ju ka banga tar puhung uahireonene, teeit a buturuonene ka uakusain Iesu tar korose e uahuhut tar uan uleik.

²¹Temaeit gisis nosi tamata uleikir patereng Ju ka la tang Pailat, karo hire pare, “Ahik paho bolo pare, ‘Nas toiar Ju.’ Bolo pare, ‘A tamatene ke kula pare, inggo nas toiar Ju.’”

²²Doh Pailat ke kula tapokis pare, “A hua geku bolo manasaio uamaluana gere moko sirono ka bolo pein.”

²³Doh tar binaka ka uakusa kaia manasa per tamatang uiliatung tang Iesu tar korose, gisina ka kale tena hikhikuono, karo uelbule katongois taninina tar toueitir pain. A tang siok tang sioko tasisin e kale tonu mahar. Gisina ka kale liu ponu tonu hikhikuono gero barah geka tuha keip pukin toru mahar sioko ro mahar gomono nikaere uatuk i sirun, ahik paho niuauelbabeir tagu.

²⁴^kTemaeit gisisir tamatang uiliatung ka uelkule katongonguais pare, “Inggeig ahik pahi kihkih tang roono me mahmahar, inggeig i ueluelpeikie mari bangeig tang mai re kale tang roon.” Doha puhonene ke pokoso puk mare la hung tuninir puh geka boloin pare, “Gisina ka uelbule katongois tenag hihikuo, karo ueluelpeikie tonogo gomono.” Teka guata siramper tamatang uiliatung paar.

²⁵^lDoh gisine ra tur uahuhut tena korose Iesu, Maria tinana Iesu, tahina kuaha Maria ge na kuaha Klopas, kare Maria ger peng Makdala. ²⁶^mDoh Iesu ke banga tang tinan, kara tamatang uakuakeluk gere malauehirintiehe tunuion ura tur tokaha pe, maeit ke kulanguaono tang tinana pare, “Inggoneit a tumua.” ²⁷ Song ke kula tena tamatang uakuakeluk pare, “Inggoneit te tinoumua.” Doh uakekene turungua tar binakono gitir tamatang uakuakeluk ke keip tena uma tang Maria.

Iesu ke mat

²⁸ⁿIesu ke ate manasa pare, a mamang inetelik ka guatguata hihir tun manasaig, maeit a puh geka boloin sioun e pokos tun toro man. Kare kulangua Iesu pare, “Inngo ku kamadak.” ²⁹^oDoha itung kodom e tok a uoun tar bino ueltek, temaeit o pous ka uahuin taninina, kara uih tolain tar puhung douk ra kilain, o hisop, kara hue kaiatigin tar uauana Iesu. ³⁰ Doh Iesu ke inum tar bino ueltek, kare kula pare, “Ginina ke kapkapa hihir manas.” Song ke kokolo uahiua, kare mat.

Iesu ka soupin ro kapkapana toro bel

³¹^pA mareinonene a mareining kaleuator, doh tar uagiamehener marein a Mareining Pepe Uah. Kare ter marein pono ra maligomo tunin, temaeit gisisir Ju ka de mate kusa uatukur tukunusisina tar korose tar Mareining Pepe Uah, kara dangatanguasina tang Pailat pare, ra haluh goigir kekeisisina mara mata ualahur, kara kale uahiuagir tukunus. ³² Temaeit gisisir tamatang uiliatung ka la, kara haluh go tar kekenener uakiki-

languan, song ka uiuih uelhirila tar tang giameh. ³³ Bo ka me la manasa pemeisina tang Iesu. Gisina ka banga pare, inggono ke mata manas, temaeit gisin ahik pah ka haluh go tagu tar kekenon. ³⁴ Bo a tang sioko pukur tamatang uiliatung ke soup toro bele tar kapkapana Iesu, doh ahik me manasan, kare tit taueter deuating, kara kodom. ³⁵ ^qA tang sioko ke uakeis uanono tun tar mamang inetelikininanine ke hire uakalahara tunungua, doha hau ke hiregion, ginin a man, ginin ka hire taueteig, maeit rung tagorong mana uakapoum. ³⁶ ^rDoha puhonene ke kotpokoso puk mare manar puh geka boloin toro bolobol pare, “Ahik mo sioko ro hironono ra turung kategoin.” ³⁷ ^sKara giameher puh ka boloin pare, “Gisina ra turung banga tar tang sioko geka soupisisin.”

Iesu ka keuin

³⁸ Song ke dangata Josep ger peng Arimatea tang Pailat ge pare matoton e uahue tatanon e kale tar tukununa Iesu. Josep inggono ter tang siokor pono na tamatang uakuakeluk Iesu, bo e uaouo kompein, teeit inggon e sokoro tasir Ju. Pailat ke uahue tatanon, temaeit song ke me kale liu Josep tar tukununa Iesu. ³⁹ ^tDoh Nikodemus inggon te geke me banga baka uoum tang Iesu naboung, inggono teke la tagume tang Josep. Inggon e kale teil tar uaiuaia a amuh uiantiehe tun, ka tuha keipin tar bultanana ro torik ro douk ra kilais o mur, doho alo. Doha niduhunon e matoto tar toueitir hangaulur kilogram. ⁴⁰ Josep me Nikodemus kura kale tar tukununa Iesu, kaura tunaha tatanono tar uaiuai amiamuhuntiehe tun, kaura auih uiloho

^l19:25 Mat 27.55-56 ^m19:26 Jon 13.23 ⁿ19:28 Ker 22.15

^o19:29 Ker 69.21 ^p19:31 Ual 21.22-23 ^q19:35 Jon 21.24 ^r19:36 KT 12.46;

Aha 9.12; Ker 34.20 ^s19:37 Sek 12.10; UGO 1.7 ^t19:39 Jon 3.1-2

tar gomono tatanono misiana ra uoto guata per Ju tar kaleuatoro tar tuku-nunar tamata gera keuin. ⁴¹Doha iom e moko uahuhut tar butur ke mata to Iesu. Dohi kobor tar iomon o moko ro lebangang mat o timuh tun, halana me tang siokor mat ka la uamokoin tar buturuon. ⁴²Doha binakono ke uahuhutuntiehe manasain re uakekene per Mareining Pepe Uah. Temaeit gisina ka keip puk manasala tar tukununa Iesu toro lebangang mata roon, teeit roono tero moko uahuhut.

O Mahar 20

Iesu ke tua tapokis

20 Naliliuolik kitkitup tun a uakiki-langar marein tar uik Maria Makdala ke la tar keu, kare banga toro palaua ka uain liu turin toro matana ro lebang. ²Temaeit inggono ke ualolatas Saimon Pita mer tang giameher tamatang uakuakeluk gere malaelhirintiehe tunin Iesu, kare la hire tasrasina pare, “O tamata ka keip liu tar tuku-nunar Tamata Nomana toro lebangang mat, doh inggeim ahik pah mi ate ia ka uamokosina tatanon.”

³Maeit Pita mer tang giameher tamatang uakuakeluk kura la toro lebanga geka uamokoinir tukununa Iesu. ⁴Rasina kura siokor ualualo tokaha tun, bo git pukur tang giameher tamatang uakuakeluk ke ualualo liu tang Pita, kare la kotpokoso uoum toro lebangang mat. ⁵Inggono ke la kokolo, kare uakatako, kare banga tar gomono geka auih uilohoig tatanon, bo ahik puk pah ke lek. ⁶Song ke me ualo pokoso Saimon Pita, kare me solo dedengua iuma toro lebang, kare banga tar gomono geka auih uilohoig

tatanono re rikin pe. ⁷Kare banga pono toro mahar gomono geka auih uilohoin toro luna Iesu, o rikin sioko tar mahar gomono geka auih uilohoig tatanon, bo roono puk o niligun. ⁸Song gitir tang giameher tamatang uakuakeluk geke la pokoso uakikilanga toro lebangang mat ke solo ponoko, kare bang, kare tagorong man. ⁹uGisina halana harahampe ta naman manate toro bolobol gero hire pare, “Inggon e turung tua tapokis tur toro mat.”[‡] ¹⁰Song kura la tapokis rasinar toking tamatang uakuakeluk ium.

Iesu ke uamakahain tang Maria Makdala

¹¹Maria e kiring tur toro matana ro lebangang mat. Doh gine re kiring peon, inggono ke kokolo, kare uakatako i lolono toro lebang, ¹²kare banga tar tang torikir anggelou ura hiku teil tonosira hikhiku gaugauil ura tabila tar butur geka uarikinir tukununa Iesu. A tang siok e tabila tar butur ke lunganahiaon, kara tang giamehe tar kekenehiaon. ¹³Rasin kura dangata tatanono pare, “Ir kuah! Ae maene ro kiringa?”

Kare hire tapokisono pare, “Teeit gisina ka kale liu tenag Tamata Nomano, doh inggo u telengua tar butur ka uamokosina tatanon.”

¹⁴vSong ke uiliangara tapokisono, kare bangangua tang Iesu re tur pe. Bo ahik puk pah ke bang paroko pare, teonon.

¹⁵Kare dangata Iesu tatanono pare, “Ir kuah! Ae maene ro kiringa? Maionene ro siria?”

Doh Maria ke namana pare, inggono ter tang babata tar iom, maeit ke kula tatanono pare, “Tamata uleik ge pare

[‡]20:9 Bolobolong Ker 16.10

^u20:9 Apo 2.24-32; 1Ko 15.4 ^v20:14 Luk 24.16; Jon 21.4

ko kale liua tatanon, hire totoguo, ia ko uamoka tatanon maru la kaleo tatanon.”

¹⁶Doh Iesu ke kila tatanono pare, “Maria!” Maria ke uiliangara uelhir tatanon, kare meneng Hibru tatanono pare, “Rabonai!” (Tera kila peinir “Tang Ualasir.”)

¹⁷^wKare kula Iesu tatanono pare, “Uakenua manasa tar tuha totoguo, ge halana peo tu la tapokis tang Tamoug, bo o la kompe toso bung tahiguo, karo la hire tasisina pare, inggo u la tapokis manas i rana tang Tamoug ge Tamamiuoum pon, kare nagu God, kare nami God ponoum.”

¹⁸Temaait Maria Makdala ke la hire tasir tamatang uakuakeluk ke banga pe tar Tamata Noman, kare hire tasisina tar puh geke hirein Iesu tatanon.

Iesu ke uamakahain tosno tamatang uakuakeluk

¹⁹Gisisir tamatang uakuakeluk ka sokoro tasir Ju, temaait gisina ka la siokor uelgogoun kompe tar siokor um, kara holoro uanono tun tar pirik. Doh tar uakikilangar marein tar uikiono nareiu Iesu ke me pokos, kare me tur i uantinana tasisina, kare kula pare, “O hiarouo tamiuoum uakapa tun.” ²⁰^xKe mene bakono tar puhonene, song ke uamakaha tar tatabalanar liman, kara kapkapan. Doh gisisir tamatang uakuakeluk ka uahantiehe tun ka banga pe tar Tamata Noman. ²¹Song ke kula uagiamhe poluk Iesu pare, “O hiarouo tamiuoum uakapa tun. Tamouguo ke heiriha totoguo ter siokono kompe inggo u heir ponola tamiuoum.” ²²Song ke ula tar romo tasisin, kare kula pare, “Kale tar Iabene Dedeil. ²³^yGetung kale liu-

oum teres niguata uasar tamat, ginin e hiliu, bo ge ahikioum pah mung kale liu taninina tasisin, ginin ahik pah ke hiliu.”

Iesu ke uamakahain tang Tomas

²⁴Tomas gera kilkila ponoin tang Didimas inggono ter tang sioko pono tasir hangaul, kara tang torik no tamatang uakuakeluk Iesu, inggono taboin ke me pokoso pe Iesu. ²⁵Temaait gisisir gisiamhe no tamatang uakuakeluk Iesu ka hire tatanono ke me pokoso pe pare, “Inggeim king banga tar Tamata Noman.” Bo Tomas puk ke kula pare, “Ahik tun pahu matot u tagorong man, e banoto tun baka getu banga tar potonor loto ka tina peinir tatabalanar limanon, karu uasoloko tar kamot limoug tar butur geke tinain, kare tar kapkapanon.”

²⁶Ke karuh bakar mouitir marein, doh gisis no tamatang uakuakeluk Iesu ra siokor uelgogoun poluk tar umon, doh Tomas e pepe tagu manasa tasisin. A pirik ka holoro uanono tunig, bo Iesu puk ke lekame, kare me tur i uantinana tasisin, kare kula pare, “O hiarouo tamiuoum uakapa tun.” ²⁷Song ke kula tang Tomas pare. “Uasolome tar kamot limoumane, banga tar tatabalanar limouguo, hueme tar limoum toro kapkapouguo. Uanua manasa tar tagorong boh, bo ingga o tagorong man.”

²⁸Tomas ke kulangua tatanono pare, “Nag Tamata Noman, kare nag God!”

²⁹^zSong ke kula Iesu tatanono pare, “Ingga ko tagorong mana, teeit ko banga pe totoguo, a niguata uaia e la tas mais halana ta banga totoguo, kara tagorong man.”

^w20:17 Roum 8.29; Hib 2.11-12 ^x20:20 Jon 16.22; 1Jo 1.1

^y20:23 Mat 16.19 ^z20:29 1Pi 1.8

A tengkana maeit ka boloin ro bolobolo roon

³⁰Iesu ke guata to tar giniamer burehener nitouo tar matas tun no tamatang uakuakeluk, bo inggo puk ahik pah ku siokor bolo uahiua taninina toro bolobolo rone. ³¹^aBo gininer giniamer ku bolo pukugio, maeit rung tagorong manoum pare, Iesu ter Kristo a Tuna God. Doh kung tagorong mana peoum, inggoum kung kalengua tar nitua tar hanganon.

O Mahar 21

Iesu ke uamakahain tasir mouitir tamatang uakuakeluk

21 Iesu ke uamakaha uagiamer polukin tosno tamatang uakuakeluk tar tektekener kodom i Galili. A puhono ke kotpokoso tun pare, ²Saimon Pita, Tomas gera kilkilain tang Didimas, Nataniel ger peng Kena tar pang Galili, kara toking bulout ger toking tuna Sebedi, kara tang torik baka polukur tamatang uakuakeluk.

³^bTar uakikilan, Saimon Pita ke kula pare, “Inggo u la uekih.”

Kara siokor kulasit ro uanotonono pare, “Inggeim mi la tagu totomua.” Temaait gisina ka la siokor huangua tar bout. Bo gisina puk ka uakapa tar deilir boung ahik pah ka uahua baka mo ian.

⁴Doh gine re kih pehainir uagah, Iesu e tur manasane i teh, bo no tamatang uakuakeluk pukuon ahik pah ka ate pare, inggono te Iesu. ⁵Song ke dangatono tasisin, “Ro bung kaloug! Ka hua baka mo ian?”

Kara hire tapokisisin, “Ahik tun!”

⁶Kare hireono tasisin, “Mu baka uahiua tar ubene tar pang muahia tar

bout marung uahuaoum mo sisiokon.” Temaait gisina ka uahiua tar uben, kare puluhis tar reih kai, teeit o burehentiehe per iana ka hua.

⁷^cA tang siokor tamatang uakuakeluk gere malauehirintiehe tunin Iesu ke hire tang Pita pare, “Gine bo ter Tamata Noman.” Bo tar binaka pukuon, Pita ke kale liu tono gomon, doh gine ke longoro pe Pita pare, inggono ter Tamata Noman, inggono ke gomo tapokisin tono gomon, kare siak i laur. ⁸Doh gisisir gisiamer tamatang uakuakeluk ka reih uahung keip tar bout tar ubene ke uoun tasir ian. Gisin ahik pah ra uairehe tun tar papadakan, inggono gane kompela tar gagauilin ngohina pare, a 100ir mita.

⁹Doh tar binaka ka hung manasasin i kot, kara la hiu, gisina ka banga toro hue o kakauer, kare rikin teilir ian, kara bereit. ¹⁰Song ke kula Iesu tasisina pare, “Keipime mo gisiamer ianasit, kung nihing uahuais.” ¹¹^dSaimon Pita ke boun tapokisitig tar bout, kare la reih rurus keip uahunguha tar ubene tasir ian. Inggonor ubene ke uoun tun tasir iana uleik kaelais tar 153ir. Gisin o burehentiehe nomana bo ahik puk pah ka raprapata tar uben.

¹²Kare kula Iesu tasisina pare, “Mu lame, karung me ein.” Doh ahik me tang sioko ke ongolo tar dangata tatanono pare, “Ingga mai?” Teeit gisina ra ate inggono ter Tamata Noman. ¹³Maeit song ke la kale Iesu toro bereit, kare heir tasisina, kare guata sira poluk paara tar ian.

¹⁴^eInggonene ter uatouononor binaka manasa ke uamakaha katongo pein Iesu tosno tamatang uakuakeluk i muduhia ke tentur tapokis pe toro mat.

^a20:31 Jon 3.15; Roum 1.17; 1Jo 5.13 ^b21:3 Luk 5.4-7

^c21:7 Mat 14.29; Jon 13.23 ^d21:11 Luk 5.6 ^e21:14 Jon 20.19,26

Iesu ke menmene tang Pita

¹⁵Tar binaka ka ein uakapa manasin, kare dangata Iesu tang Pita pare, “Saimon Pita, ingga a tuna Jon, ingga o malauelhirintiehe nomanampe totoguo tasisine?”

Kare hire tapokison, “Aa, Tamata Noman, ingga o ate pare, inggo u malauelhirintiehe tun totomua.”

Kare kula Iesu pare, “Ualaein tosnogo tunar sipsipo.”

¹⁶fKare dangata uagiameme poluk Iesu, “Saimon, ingga a tuna Jon, ingga o malauelhirintiehe nomanampe totoguo?”

Inggono ke hire tapokis poluk pare, “Aa, Tamata Noman, ingga o ate pare, inggo u malauelhirintiehe tun totomua.”

Kare kula poluk Iesu, “Kaueke tosnogo sipsipo.”

¹⁷A uatouonono manasa ke dangata poluk Iesu pare, “Saimon, ingga a tuna Jon, ingga o malauelhirintiehe nomanampe totoguo?”

Pita ahik manasa pahe uaha uايا tun, teeit ke dangata uatouono tun pe Iesu tatanono pare, “Ingga o malauelhirintiehe nomanampe totoguo?” Temaeit ke kulangaono tatanono pare, “Tamata Noman, ingga o ate tar mamang inetelik, karo ate pare, inggo u malauelhirintiehe tun totomua.”

Kare kula Iesu tatanono pare, “Ualaein tosnogo sipsipo. ¹⁸Doh inggo gine ru hire tun totomua toro man. Tar binaka ro kalana ingga, ingga o uoto hiku, karo loho katongo, karo sabala ueltebeir tar butur ro malarain, bo tar binaka puk ro mahoho manasa, ingga o turung hue ueleheir tar limoum, kare me tamata sioko re uahiku, kare ualoho ueleheir totomua, kare uoum keip totomua, kare

sabala keip totomua tar buturene ro deia mato la.” ¹⁹gIesu ke mene puk pare, mare ualasira hape re turung mate pe Pita tar uatakai tar hangana God. Song ke kula Iesu tatanono pare, “Uakeluk totoguo.”

Iesu mesno gisiamemer tamatang uakuakeluk

²⁰hPita ke uageg, kare banga tar tang siokor tamatang uakuakeluk gere malauelhirintiehe tunin Iesu, re la uakeluk peme tasrasin. (Doh inggono te geke uain uahuhut ponola toro luna toro uuararono Iesu, kare dangat, “Tamata Noman, maiono re turung tangana totomua tasir uelmatan?”)

²¹Doh ke banga pe Pita tatanon, kare dangata tang Iesu pare, “Tamata Noman, hape tar tamatene?”

²²Iesu ke hire tapokis tang Pita pare, “Ge pakene u malaro inggono pake tua dede e tuka tar binaka ru la tapokisimeo, doh inggon ahik paha ineteng totomua, ingga o uakeluk totoguo.”

²³Temaeit o ueluatata ko haijala ueltebeir tosnno tamatang uakuakeluk Iesu pare, a tamatang uakuakelukonene ahik pahe turung mate tagu. Bo Iesu puk ahik pah ke kula tatanono pare, ahik pahe turung mata tagu, inggono ke kula pare, “Ge pakene u malaro, inggono pake tua dede e tuka tar binaka ru la tapokisimeo, doh inggon ahik paha ineteng totomua.”

²⁴iDoh inggonene ter tang siokor tamatang uakuakeluk ke menmene tar inetenanine, kare ter tang sioko pono ke bolo uahiuu taninin. Doh inggeig i ate pare, a haua ke hiregion, ginina man. ²⁵jBo a burehe nomanamper giniamemer inete ke guataig Iesu ge pakene ra bolo sisisioko uahiuu uakapa tuniginin, inggo u namana siro pare, a mamang buturu-

^f21:16 Apo 20.28 ^g21:19 Mat 16.24-25; 2Pi 1.14 ^h21:20 Jon 13.23-25

ⁱ21:24 Jon 19.35 ^j21:25 Jon 20.30

likane koto pake matoto leue uakapa tar
uamoko tar bolobolonin.

Aposoul Nas kalekinaler Aposoul

O bolobolo rone, ‘Nas Kalekinaler Aposoul’ o mene ualatumana toro Uelhir Uaia ke boloin Luk. Luk teke bolo pono toro bolobolo rone. Toro bolobolo rone, inggeig i banga tar Iabena Dedeil e ualasira tar lele tasir Aosoul, kara mene tauete tono Uelhire Uaia Iesu i Jerusalem dohi Judia, kari Samaria, kare toro mamang buturulikane tar koto uakap (Apo 1.8).

Nas kalekinaler Aposoul o ueluatata tosno tamatang tagorong mana Iesu ke uakikilanga tur pe i Judia, kara la burburehe uainane tar koto uakap. Roon o ualasira pono tena kalekinale Kristo, kare nas niuangoulur tamata gera uakeluk tatanon. Iesu ke uaelmatout sira tun tar ualapagaha geke guata keipin God tasir Israele sioun.

A siokor inete uleik tun ro menemenein ro bolobolo rone tena kalekinaler Iabena Dedeil ge na Iabena God. Tar uakikilangan a Iabena Dedeil ke laha tasir uakuakelukur nang Iesu tar mareining Pentikos. Dohi muduhia, song ke uakodkodohono teres ninamanasin, kare uatampopokoho tasisin.

Toro bolobolo rone, inggeig i banga pono tar bureher barahir menemener nasir aposoul ka mene taueteig tar binaka ra marang mene tauete tono Uelhire Uaia Iesu, doho bureher tamata ka tagorong mana toro uelhire.

O bolobolo tasir aposul e moko teilir ueluatatar nasir aposul, bo a burehentiehe pukur menemener mana te tar inete kura guataig Pita me Poul.

Pita ter tang sioko tasir aposoul geka lala tagu teil tang Iesu. Bo Poul ahik pah

ke lala tagu teil tang Iesu, inggono ke pentampopokohohia tar touahiua tosno tamata Iesu, bo Iesu puk ke kilo tatanon, kare uakotpokoso sira tatanono pare, ter uakikilagana tunungua tar ueliu tauete tono uelhireon.

O Mahar 1

Iesu ke ualapagah e turung heirihha tar Iabena Dedeil

1^kTeopilus, o uakikilangana ro bolobolo geku boloio, o menemene tar mamang inetelik ke guataig Iesu, kara haua ke ualasiraig tar binaka ke uakeken, ²^le tuka ke kale pe taro God tatanon i Heuen. Bo tar binaka puk re uangoul haraha Iesu, inggono ke ualatat tosno aposoul tar niualasira ke heirigir Iabena Dedeil. ³^mI muduhia ke mate peono tar korose, kare tua, inggono ke me ualairain tasisina tar bureher hagar mara tagorong manasina pare, inggono ke tua tapokis. Inggono ke kotpokoso tasisina tar bureher binak i lolono tar toueitir hangaulur marein ke uangoul baka pe, kare mene uakalahara pono tasisina tena Nitoia God.

⁴ⁿTar siokor binak Iesu ke me ein tagu tosno aposoul, kare ualatohongua tasisina pare, “Inggoum ahik pah mu hiliu i Jerusalem, mu pepe uangoul baka tar Iabena Dedeil geku ualapagahaio tamiuoum e turung heirihain God ge tamamiuoum. ⁵^oJon ger tang uahuhu e uahuhu keip tar kodom, bo inggoum ahik pahi reh God e turung uahuhu keip tamiuoum tar Iabena Dedeil.”

Iesu ka kalein i ran

⁶^{pa} siokor binaka gisina ka la toto poluk, kara dangata tang Iesu pare, “Tamata Noman, here ter binakono ro

^k1:1 Luk 1.3 ^l1:2 Mak 16.19; Luk 24.49-51 ^m1:3 Luk 24.36-49; Apo 10.41

ⁿ1:4 Luk 24.49; Jon 14.16-17; Apo 2.33 ^o1:5 Mat 3.11 ^p1:6 Luk 24.21

heiria tamiueimir Israel nami pang uan sioko maring tampopokoho maring turung kaeuke katongosieim tenami pang uan?”

⁷Bo inggono puk ke kula pare tasisin, “Inggon ahik paha ineteng tamiuoum tar marang ate tar marein, doha binaka geke uamatoto keipin God ge tamouguo tena nitampopokoh. ⁸Bo inggoum puk mu turung kale tar nitampopokoho tar binaka re lahar Iabena Dedeil tamiuoum, doh inggoum tosnogo tamatang mene taueoane i Jerusalem, doh tar pang uan i Judia dohi Samaria, kare toro mamang buturulikane tar kot.”

⁹I muduhia ke menemene baka peono tasisina pare, gisina ra uakeis turumpe ke kale kai pe God tatanon, karo uaouo ro mahar langit tatanon.

¹⁰Doh gine ra uakeis uanono pe tarosina tar langit, a toking tamat ura hiku teil tar gomono gaugauil kura me tur tagu tasisin, ¹¹skaura kula pare, “Ir tamatang Galili, ae maene rung turioum, karung uakeis taro i rana tar langit? Iesuene kung bangaoum ka me kale liu taroin i Heuen, inggon e turung la tapokis sira polukuha hope kung banga peoumene daana ke la peon.”

A tamata geke uamatotoin tar palih tang Judas

¹²Song ka tapokisikosin i Jerusalem, ka hiliu tar Siusan i Oliv. A siusan e uairehe sikor i Jerusalem, e matotoin tar siokor kilomita. ¹³Tar binaka ka la pokososin, gisina ka lala uamoto poluk taro i rana tar tine uma gera uoto uanguoulinisin. Gisis ra uangoul tar binakono tes Pita, Jon, Jems, doh Andru, Pilip, doh Tomas, Bartolomiu, doh Matiu, Jems ger tuna Alpius, doh Saimon ger peng tar

toto tamat, ra kilais o Selot, doh Judas ger tuna Jems. ¹⁴Gisina ra uoto siokor la toto tar lotu tokah menia pono tasir gisiameher kuah, doh Maria ge tinana Iesu, doho bung tahin.

¹⁵Tar binakanin, o tamatasine ka tagorong mana tang Iesu ke la matotois tar 120. Pita ke turane i uantinana tasisin, kare kula pare, ¹⁶⁻¹⁷v“Ro bung tahig! Sioununtieh, o uelhire geke uataueiteinir Iabena Dedeil tar uauana Debit, o lain tang Judas geke uoum keip ualasira tasir uelmatan geke la kuse tang Iesu, ko kotpokoso manasa pare, o man. Inggono ter tang sioko pono tar toto tamatene tagigeig, kare kalekinale tagu pono tagigeig.”

¹⁸wInggono ke bulaua keip tar mani geke bulauaig tena niguata uasaono toro mahar kot. Doh tar buturuono teke pungono ko uoum ro lun kare mat, a tuku-nunono ke tapuak, doha kabeleng balanono ke siokor lua tauet. ¹⁹O tamata uakapa tun i Jerusalem ka siokor ate tar puhon, maeit ka uelkilangua tar buturuon i Akeldama. Doh tonosio uelhiresin inggon e kula pare, a butur malatahanang deuating.

²⁰xI lolono toro bolobolong Kereker, Pita ke kula pare, “Pare teka bolo peinir puhon, ‘Na uanion e turung tabotan, ahik me tamata ra turung uamaluanain e turung uangoul tar buturuon.’ Kara bolo ponoin pare, ‘Uamaluanana me tang giameher tamatang uoum keip gere palih tatanon.’”

²¹⁻²²y“Maeit inggon auia tun geti uamatoto palihieig me tamata geke uanguangoul, kare banga tagu tagigeig tar mamang binakalikinine ke latlateil tagu pe Iesu tagigeig, e uakikilanga tur pe tar binaka ke uahuhu pe Jon ger tang

⁹1:7 Mak 13.32 ^r1:8 Mat 28.19; Luk 24.48 ^s1:11 Mat 26.64; Luk 21.27

^t1:12 Luk 24.50-53 ^u1:13 Mat 10.2-4 ^v1:16-17 Ker 41.9

^w1:18 Mat 27.3-8 ^x1:20 Ker 69.25; 109.8 ^y1:21-22 Mak 1.9; 16.19; Jon 15.27

uahuhu tasir tamat e la tuka ka kale liu tur pein Iesu tagigeig, ke la pe i Heuen.”

²³ Maeit gisina ka uatagin tar tang torikir tamat, Josep gera uoto kila ponoin tang Barsabas, gera ueliate ponoin pare, te Jastus, doh nu Matias. ²⁴⁻²⁵ Gisina song ka lotu pare, “Tamata Noman, Innga o ate tar kolous uakapa tunur mamang tamatalik. Ualasila tamiueim, mai tunur kaluasir toking tamata rasine ko umatotoia tar pokoso sira pare, a aposoul, tar kale palih tar hagar ke hiliuin Judas, ke la pe tar uan ke malahirin e la uangoul.”

²⁶ Doh gisina song ka bakbaka uadud tar lot, doha loto ke dudula tang Matias, maeit Matias teke uanotongua poluk tar hangaul doha tang siokor aposoulsis ka uangoul ke hiliu pe Judas.

O Mahar 2

A Iabena Dedeil ke laha nar Pentikos

2²Tar binaka ke pokosor mareining tar Pentikos, gisine ra tagorong mana tang Iesu mesir aposoul ra siokor uangoul toto tar siokor um. ²Ahik me sikir manasan, a alinganar inete ngohina tar romo uleik ke la turuha i Heuen, ke me uauoun tar umene ra uangoulinisin. ³^aGisina ka bang huara toro hue, a inete ngohinar luhuluh, bo ke me lala uelpakah puk, kare me mok i rana tar lus uakapa tunusin. ⁴^bGisina ka siokor uoun tar Iabena Dedeil, inggono ke guatangua tasisina ra mene tar giniamhe siokor uelhire.

⁵ O gisiameher Jung toro giniamhe ro pang uan tar koto uakap ra uangoul pon i Jerusalem, gisis ra uoto lotu pono tang God. ⁶Tar binaka ka longorosina ra uelhire kahakaha pesina tar ginamehe siokor uelhire, gisina ka siokor la toto.

Gisina ka siokor lutara tun, teene ka longoro pesina ra uelhire kahakaha pesina tenas uelhiresin.

⁷ Gisinar gisiameher Ju ka lutar, kara namanaehe, kara kula pare, “Gisina dehesine ra uoto uelhire toro uelhireng Galili. ⁸⁻⁹ Doh maeit ri longoro inggeig ra menesina tonogio uelhire inggeig? Inggeig deho tamatang toro mamang uan, o gisiameh o peng Partia, i Midia, dohi Elam, o gisiameh o peng toro uan i Mesopotemia, dohi Judia, doh tar pang uan i Kapadosia, i Pontus, doh tar pang uan i Esia, ¹⁰⁻¹¹ doh tar uan i Prigia me i Pampilia, o tamatang tar pang uan i Isip, menia tasir tamatang tar uan i Libia gere moko uahuhut tar uan uleik i Sairini. O gisiamehe tagigeig geki pokoso tur i Roum, o Ju, doho tamata geke uapalih pare, o Ju, o gisiameh o peng Krit, doh tar uan i Arebia. Inggeig i siokor longoro ra uelhire tauete pesina tar bureher niguatar nang God tonogio uelhire katongo inggeig.”

¹² Gisina ka lutar, kara toboul, kara ueldangata katongois pare, “Hope re uahuahire per puhonene?”

¹³ O gisiamehengua tasisina ka ueltang ualeng tasisin, kara kula pare, “Here ka inum dehesina me bureher bino.”

Pita ke mene uamaroro tasir tamat

¹⁴ Song ke tentur kai keip Pita tasir gime hangaul, doha tang siokor aposoul, kare mene uauleik tar uamaroro tasisina pare, “Inggoum ro uanotougener Ju, doh maisioumene rung uangoul i Jerusalem, uamaluana geru mene uamaroro inggo tar puhene tamiuoum, ualongoro uaia tun tar haua ru meneio. ¹⁵ O tamata-sine ahik pah ka popoulwana me inum, ngohina kung naman tagin pe inggoum.

²2:1 KT 23.15-21; Ual 16.9-11 ^a2:3 Mat 3.11

^b2:4 Mak 16.17; Apo 4.31; 10.44-46; 19.6

Gine daan aliuo harah, inggono song re 9 kiloko puk. ¹⁶Bo a puhene ke kot-pokosene daan, inggono ke mene tauete ponoin Joel ger propeit sioun, ke kula pe pare,

¹⁷God ke kula pare, ‘Tar uadouhinar marein, inggo u turung uauoun tasir mamang tamatalik tenag Iabena Dedeil.

O bung tamamiuoum, o kuah, doho bulout ra turung mene tauete tonogo uelhireo ngohina tasir propeit.

Doh nomio bulout kalanioum ra turung banga tar inete ngohina tar borborian,

doho mahoho ra turung borboriana tar bureher borborian.

¹⁸Doh tar binakon, Inggo u turung uauoun tenag Iabena Dedeil tosnogo tamatang kalekinale, o bulout doho kuah.

Tar mareininin Inggo u turung dingiha tenag Iabena Dedeil tasisin, doh gisina ra turung mene sira tasir propet.

¹⁹Inggo u turung uatouo tar bureher inet, kara uaparok i Heuen, doh gane i kot,

doh tar binakon a deuating, karo hue doho diku uleik o turung pokos.

²⁰A pisar e turung kitup, doha bialok e turung kubara sira tar deuating,

i muduhia song re kotpokoso na mareinir Tamata Noman ger tampopokoho tun.

²¹Doh mais ra turung kila ualeik tar hanganar Tamata Nomana me nipoul,

gisina tera turung udeil.” *Joel 2.28-32*

²²Doh Pita ke mene ualatumana poluk pare, “Inggoum ro uanotougenger Ju mu ualongoro uaia tun tar puhene. Iesu ger

peng Nasaret, a tamata giamehe sioko tun, doh inggono teke uamatotoin God tar laha tagigeig, ke me ualasira pe tar uaparok, kare guata tar nitou tar ualasira tena nitampopokoho God. Doh inggoum kung siokor ate manas. ²³A tamatonene ke heir sira manasampenhain God tena nimalar, doh na niate, doh inggoum menia tenas nipouler tamata uasa, kung tung pous tatanon, ke me mate pe tar korose. ²⁴Bo God puk ke uatua tapokis tatanon, ke kale liu tur pe tatanono tar uelmahinging mat, teeit o mat o matoto leue tar kuse uanono tatanon. ²⁵Ngohina sira ke mene uatuha pono pe Debit tatanon, ke kula pe pare, ‘Inggo ku bang huara tar Tamata Noman e uangoul uahuhut dede totoguo.

Inggo ahik pahu sokor, karu por, teeit inggon e uangoul tabara totoguo.

²⁶Temaet inggo u uaha tun ru mene pe, doh inggo u turung pepe uangoul sira keip tar nitagorong mana hope ke ualapagah pe God.

²⁷Teeit ingga ahik paho turung uamaluna totoguo u turung mate dede, doh ahik pono paho turung uamaluna tenang tamatang kalekinale ger dedeil,

e benga to tar keu.

²⁸Ingga ko ualasira manasa totoguo teru kale tar nitua gere moko dede.

Ge inggo pe u kale tar niuaha uleik tar uangoul tagu totomua.” *Ker 16.8-11*

²⁹c“Ro bung kaloug, uauia geru uakalahara bako pare, tubugigeig Debit ger mahoho uleik ke mate doh ka keuion, doh na keuion e moko harampe e tuka daan. ³⁰dBo inggono puk a propeit, ke ate baka ke ualapagah katongo pe God tatanono pare, e turung guata me tang siokor bubungunon e tabila palih tono tabtabilon. ³¹eDebit ke ate uoum tar inete re turung pokos, inggono ke mene

tauete tang Kristo e turung tua tapokis. God ahik pahe turung uelsakil tatanon mare mate dede, doh ahikir tukununa pahe turung beng.”

³²“God ke uatua tapokis tang Iesu, doh inggeim uakapene teking siokor banga tun tar matamiu. ³³fIesu ka kale kai taroin i Heuen, kare la tabila tar pang makoso tang God. Doh God ger tamanono ke heir tatanono tar Iabena Dedeil geke ualapagahain pare, e turung heir, doh Iesu teke dingiha tar Iabena Dedeil, doh inggon, teene kung bangaoum, karung longor. ³⁴⁻³⁵gDebit ahik pah teka kale kai taroin i ran, bo teke mene tauete puk pare,

‘A Tamata Nomana ke kula pare tenag Tamata Nomano,

Tabilane tar pang makoshia totoguo e tuka tar binaka ru guato tosnongo uelmatana ra pehuarais,

kara uangoul i kukulebanga tenang nikaueke ingga.” *Ker 110.1*

³⁶h“Temaeit inggoum ro uanoutougener Ju pakung ate uaia tun toro mana pare, God teke guata tang Iesu gekung uiliatung pousisium pare, a Tamata Nomana, doh ter Kristo.”

³⁷Tar binaka ka longoro per tamata tar puhon, gisina ka kanuh, kara uel-dolom, maeit ka kulangua tang Pita mesir gisiamer aposoul pare, “Ro bung tahimieim, me hauangua paking guataiem?”

³⁸Pita ke mene hahaua tasisina pare, “Siokor inggoum uakapa tun mu uapalih tenami niguat, karung uamaluna gering uahuu keipieim tamiuoum tar hangana Iesu geke heirihain God, e me uelkarus toсно tamaton, maeit re kuse luara liu God teremi niguata uasaoum. Marung turung kaleoum tar

Iabena Dedeil. ³⁹iA niualapagahonene e lain tamiuoum uakapa meso bubungumi menia pono tasisis ra uangoul i reh gere turung kila pokosoisir Tamata Nomana ge nagi God inggeig.”

⁴⁰Pita ke meneng uatagin tasisina tar bureher menemen, kare mene uapopokoho tasisina pare, “Uelkarus liu katongosioum tar niguata uasang tar babeir tamatang daan.” ⁴¹jMaeit gisis ka tagorong mana tena menemene Pita, ka siokor uahuhunguais, doh here ka la matotois tar 3,000ir tamata baka poluk ka la uanoto tasisinar tamatang tagorong mana tang Iesu tar binakon.

A nipepe tokahang tasir tamatang tagorong man

⁴²kGisina ra siokor ualongoro uaia tun tenas niualasirar aposoul, kara pepe tokaha pono tar namana huara tapokis toro uadouhina ro ein geke guatain Iesu, kara lotu tokah.

⁴³O tamata uakapa tun i Jerusalem ka uoun tar niueltadang sokoro ra banga pe tasir aposoul ra guata pe tar gini-amehe siokor nitou, kara uaparok. ⁴⁴lO tamatang tagorong mana uakapa tun ra siokor pepe tokah, kara ueluelheirie hamas tunis tenas inet. ⁴⁵Gisina ra uabulaua tenas inet, kara heir tar mani tang hingiar tamata re katupa tar niein ue a inet.

⁴⁶⁻⁴⁷mA mamang mareinilik gisina ra pepe tokaha dedempe tar umang lotu ger dedeil. Gisina ra uoto ein bereit to dedempe tonosio um tar namana huara tono uadouhina ro ein Iesu, kara siokor ein tokah, kara uaha tun, kara uelbuleis teres niein, kara uatakai tang God ra pepe tokaha pe. Doho tamata uakapa tun ka siokor hagouo uaia tasisin. Doha

^f2:33 Apo 5.32; 7.55-56 ^g2:34-35 Ker 110.1 ^h2:36 Apo 5.30-31

ⁱ2:39 Ais 57.19 ^j2:41 Apo 2.47; 4.4 ^k2:42 Apo 20.7 ^l2:44 Apo 4.32-35

^m2:46-47 Apo 6.7; 11.21

Tamata Nomana ke uelkarus tur tasir burehe tenas niguata uasa tar uaburehe dedempe tasisin.

O Mahar 3

Pita ke uauia tar tamat a mater keken

3 Tar siokor binak, nar moloji, tar binakang lotu, Pita me Jon kura lang lotu tar umang lotu ger dedeil. ²Doh a tang siokor tamat a mateng siounur toking kekena tar binaka ka pohoin, ra la uoto uatabilain i uoum toro pirpirikinar umang lotu ger dedeil gera kilain o pirpirik mataia mare hingo mena mani tasir tamata gera lekela iuma tena uma God. ³Doh tar binaka ke bang huarono tas Pita me Jon ura marang leke pela toro pirpirik, inggono ke dangata tasrasina mena mani. ⁴Doh Pita me Jon kura banga uanonon tatanon, kare kula Pita tatanono pare, “Bangameane tamiraeim.”

⁵Maeit inggono ke banga uanonon tasrasin, e naman ura heir rasina me inete tatanon.

⁶Bo Pita puk ke kula pare tatanon, “Inggo ahik menag mani, bo a haua puk gere moko totoguo, inggo u heir totomua. Tar hangana Iesu Kristo ger peng Nasaret, ingga o tentur doho la.”

⁷Doh Pita ke kuse tar limanon, kare reih uatentur tatanon. Ahik me manasan, a ueltumaninar kekenono ke uia, kare tampopokoh. ⁸Kare siaksiaka kai teilion, kare tur katong, kare la, kare la tagula iuma tar umang lotu tasrasin. Inggon e lampela, kare siaksiaka kai teil, kare uatakai tar hangana God. ⁹⁻¹⁰Doho tamata gera uangoul tar binakono ka siokor bang paroko tatanono pare, ter tamata gere uoto tabila toro pirpirik mataia ger uoto hinga mani, doho

tamata ka siokor lutara tar tamatono ke uia pe.

Pita e uelhire tasir tamat iuma tar umang lotu ger dedeil

¹¹Doh tar binaka re kuse teilion tas Pita me Jon, o tamata ka siokor lutara, kara siokor ualola tar la banga tatanon. Rasin ura uangoul tar buturung uangangoul ra kilain, na paranda Solomon. ¹²Tar binaka ke banga Pita tasir tamata ka la toto pe, inggono ke kula tasisina pare, “Ir tamatang Israel, ae maene kung lutaroum? Ae maene rung uakeis uanonoum tamiraeim? Raeim ahik pah kira uauia keip tar tamatene me mira nitampopokoh ue teene kira guata pe raeim tar inete uia gere uauaha tang God, maene ke laon. Ahik! ¹³PNa God Abraham, Aisak doh Jekop, doh nasi God ro bung tamamiuoum ke guata pare, mare uatakai tar tun Iesu gekung ueliuilaoum tang Pailat mara la uiliatung pousin, karung ueluelde ke marang uamaluana pe Pailat tatanon e la. ¹⁴Kung ueluelde tar tamata ger dedeil, kara tamata kodkodoh, bo kung malahir tang Pailat e uamaluana tar tang haluh pous tamata tere lame tamiuoum. ¹⁵Maeit te inggoumumpe tekung uiliatung pous tar tamatang heir tar nitua, bo God puk ke uatua tapokis tatanon. Doh raeim tekira banga tun maene ira mene tauet. ¹⁶A Tamatener rung ateioum, karung banga ke tampopokoho tur per tukununon tar hangana Iesu Kristo ger peng Nasaret, kara nitagorong mana tatanon, temaene ke uia uakapa tunion. Doh inggoum kung siokor banga ke pokoso per puhonene.

¹⁷Ro bung tahig, inggoum mesnomio tamatang uoum keip ahik pah kung ate mai tun Iesu, maene kung guata pare.

¹3:4 Apo 14.9 ²3:6 Apo 4.10; 16.18

³3:13 KT 3.6,15; Luk 23.13-25; Apo 2.23

⁴3:17 Luk 23.34; 1Ti 1.13

¹⁸Bo a haua puk kung guataioum, e me uakeluk sirampe tono uelhire God geke mene taueteinir propeit pare, 'Iesu Kristo ger tamatang uelkarus geke heirihaion e turung kale uelmahing, kare turung mat.' ¹⁹rTemaeit inggoum mu uapalih, karung hiliu tenami niguata uasa, karung tapokisime tang God mare kuse luara liuiono teremi niguata uasaoum mare kotpokosor nihagouo uaia tamiuoum gere la tur tang God. ²⁰Song re turung heirihaono tamiuoum tang Iesu ger tamatang uelkarus geke umatotoion.

²¹Bo inggono puk e uangoul bak i Heuen e tuka tar binaka ke umatotoion God gete uatimuh uakapa baka tar mamang inetelik. Song re turung lahaon, ngohina sira ke ualapagah pe God tasir propeit sioun, maene ka mene tauete tar puhon. ²²sGe Moses pe ke kula pare, 'A Tamata Noman ge nami God inggoum e turung uakotpokoso me propeit ngohina totoguo, e la tur i uantinanina tamiuoum, doh inggoum mu longor, karung uakeluk tar mamang inetelik re kulgionono tamiuoum. God e turung heiriha tatanono tamiuoum ngohina sira ke heir peha totoguo tamiuoum.' ²³'Bo a tamata puk ge ahik pahe longor, kara hik pahe uakeluk tena ualatoho inggon, a tamatono ra turung aha liu turin toso tamat.*¹

²⁴Ge o bureher propeit uakapa tun pe, ke uakikilanga tur pe tang Samuel, ka siokor mene tauete tar inetenine re kotkotpokosolaene daan. ²⁵tInggoum tesu bubungusur propeit. Inggoum terung uangoul teil i lolono tar ualapagah geke guata keipin God toso bung tubumioum. Ke kula pe tang Abraham pare, 'Toso bubungumua, o tamata uakapa tunane tar koto ra

turung guata uaiais.' ²⁶uMaeit God ke heir uakikilangaha tena tamatang kalekinale tamiuoumur Israel mare me guata uaia tamiuoum marung turung tar mud teremi niguata uasa."

O Mahar 4

Pita me Jon ka uamokois tar umang uih

4Gitie ura menmene pe Pita me Jon tasir tamat, o pater, doho tamata uleiking tasir tamatang uiliatung gera kauেকে tar umang lotu ger dedeil, doho Sadiusi ka lame tasrasin. ²Gisina ka nimaliana uasa tun, teene rasina kura mene ualasis, kaura mene tauete pono tang Iesu pare, a tamatang uatua tapokis tasir tamat. ³Rasina ka kuseis, kara uamokois tar umang uih, doh teene ke reiu manasa peon, maene kura uangoul rasina ke la tuka tar giameher marein. ⁴vBo o burehe pukur tamatasine ka longoro toro uelhire roono ka tagorong man. Maeit gisis ka tagorong mana ke la banotois tar 5,000.

⁵Tar uagiamehenar marein o tamatang uoum keip, doho mamahoholiking tasir Ju, karo tamatang ualasis tar ualatut ka la toto i Jerusalem. ⁶Anas ger pater a i rana uain tasir patere uakap e uangoul tagu pon menia tang Kaiapas, doh Jon me Aleksander ger toking tahina Anas menia pono tasir gisimehe ro bung tahinalikion. ⁷Gisina ka heir tar ualatoho pare, ra keipimeis Pita me Jon i uoum tasisin, kara heheke tasrasina pare, "Mai tun ke heir tar nitampopokoho tamiraoum, doha hangana maiene ura guata keipin raoum?"

*3:23 Bolobolong tenas Kalekinaler Pater 23.29

^r3:19 Apo 2.38 ^s3:22 Ual 18.15,18-19 ^t3:25 Uak 22.18

^u3:26 Apo 13.46 ^v4:4 Apo 2.41

⁸Doh Pita ge a uoun pe tar Iabena Dedeil ke kula pare, “Ir tamatang uoum keip, doh nosio mamahoholikir tamat!
⁹Inggoum mu dangdangata tar inete uaia gekira guatain raeim tar tamata ger mater kekena? Mu dangatoum, hope ka guata uaia peion? ¹⁰^wTemaeit inggoumene, doho Ju uakapa pakung ate pare, inggono ter hangana Iesu Kristo ger peng Nasaret gekung uiliatung posuioum, bo ke uatua tapokis pukin God, maeit kung bangoum tar tamatene ke uia, kare tur.

¹¹^xIesu ter tang siok ka uelhirein tono uelhire God pare,
 ‘Inggono ngohina toro palaua geke deinir tamatang tuh,
 bo roono puk tero palaua i rana uain tar ginameher palaua uakapa tun.’” *Ker 118.22*

¹²^y“Ahik baka poluk me tamatane tar koto re banot e uelkarus tagigeig te Iesu puk manasampe geke heirihain tar me uelkarus tagigeig uakap.”

¹³Tar binak ka banga pesina tas Pita me Jon ahik pe mesira nisokor, ge gisina pe ra ate pare, rasin ahik pah kura kale niate to tagu tar sikul, rasin a toking tamata ueltebeir puk. Gisina ka bang paroko pono tasrasina pare, te kura uakuakeluk teil pono tang Iesu.
¹⁴Bo gine puk ka banga pesina tar tamata geke uauaiain re tur tagu pe tasrasin, gisin ahik pah ka mene baka poluk me puh. ¹⁵Temaeit gisina ka ualatoho tasrasina tar hiliu baka tar tine umang kedang. Song ka la tokaha polukusin tar uelkodoh pare, ¹⁶“Me haua paki guataieig tar toking tamata rasine? Inggeig ahik pahi banot i guata me puh ge o tamatang Jerusalem pe ka ueliate tar nitouo uaia kura guatguataig rasin, doh inggeig ahik pahi

banot i uolih. ¹⁷Bo tar tur tane puk tar puhonene mara hikir tamata ueltebeir pah ra ate, inggeig paki mene uapopokoho tasrasina tar uakenua tar mene ualasira baka poluk mo tamata tar hangana Iesu.”

¹⁸^zSong ka kila ualeka polukis rasin, kara la kula tane uapopokohois pare, “Ahik baka poluk pah ura mene tauete ue ura ualasira keip tar hangana Iesu.”

¹⁹^aBo Pita puk me Jon kura kula pare, “Mu namanaehe baka ge para uiaono tar matana God, tamiraeim tar longoro tamiuoum, doh ahik pah God. ²⁰Ge raeim pe ahik pah mira banoto mira uakenua tar mene tauete tar inete kira longoroig doh kira bang.”

²¹I muduhia tar ginameher meneng uasokor ka meneigisin, rasin song ka uamaluanais ura tauet. Gisin ahik pah ka banoto ra namana umatoto hope ra uuelmahing pe tasrasin, teene o tamata ra siokor uatakai manasa tang God, tar haua ka bangaig ke kotpokos. ²²Ge a tamata pe geke uatouoin na niuia ko siaua ponoin no krismas tar toueitir hangaul.

Nasi lotur tamatang tagorong man

²³I muduhia tar binaka ka uamaluanar tamatang uoum keip tasir Ju tas Pita me Jon, rasina kura la tapokis tasir tamatang tagorong man, kaura la uelutata tasisina hope ka kulkula per paterere uleik mesnosio mamahoholikir Ju tasrasin.

²⁴^bTar binaka ka longorosina tar puhonene, gisina ka siokor lotu tokaha tang God, kara kula pare, “Tamata Norman, ingga teko tou i rana dohi kot, menia tar teh, doh tar mamang inetelik re moko keip teil tananin. ²⁵A Iabena Dedeil ke heir tonongo uelhirea tang

^w4:10 Apo 3.6,13-16 ^x4:11 Ker 118.22 ^y4:12 Mat 1.21 ^z4:18 Apo 5.28

^a4:19 Apo 5.29 ^b4:24 KT 20.11; Neh 9.6; Ker 146.6

Debit ge nang tamatang kalekinalea.
Debit ge tamamiueim ke kula pare,
'Ae maene o mamang tamataliking toro
mamang pang uan ra siokor ni-
maliantiehe tun,

kara marang guata tenas inete ger sa, a
tabo tengkan?

²⁶O mamang toiang tar koto uakap ra
tur tar marang uiliatung,

doha tamatang uoum keip tasir tamata
ra la toto tar uelkoi keip tang God
ger Tamata Noman,

kara uelkoi keip pono tar tamat geke
uelpikurin God.” *Ker 2.1-2*

²⁷c“Na menemene Debit ke
kotpokosene daan pare, a mana tun,
temaeit Herot me Pontius Pailat
kura la tokaha keip tasir tamatasit
ahik paho Ju tagu menia pono tasir
tamatang Israel i lolono tar uan uleik i
Jerusalem tar ueluamoke me ninamana
tar uiliatung pous tang Iesu ge nang
tamatang kalekinalea ger dedeil geko
uelpikurin. ²⁸dGisina ra guata uakeluk
puk tar haua ko namana keipia tereng
nitampopokoh, doh reng nimalara pare,
e turung kotpokos. ²⁹eGod ger Tamata
Noman, gine daan ingga o namanaehe
tar uasokoronine ra meneig tamiueim,
karo uaongolo tamiueim nongo
tamatang kalekinalea mara hikieim pah
mi sokoro tar mene tauete tonongo
uelhirea. ³⁰Ingga o hueha tar limoum
tar uauia tasir tamat, karo guata me
nitouo keip tar hangana Iesu ger dedeil
ge nang tamatang kalekinalea.”

³¹Ginempe ka uakapa pesina tar lotu,
a umene ra uangoulinisin ka uagunain,
Doh gisina ka uoun tar Iabena Dedeil,
kara ongolongua ra mene tauete pe tono
uelhire God.

O tamatang tagorong mana ra uelheirie tenas inet

³²fO mamang tamatang tagorong
manalik ke siokor ueluaie tunis, kara
sioko tun res ninaman. Ahik me tang
sioko re kula pare, tena inet a nana
me pahen, bo ra uelheirie puk tun
tenas inet. ³³O aposoul ra mene keip
tar nitampopokoho ra mene tauete
pe tang Iesu ger Tamata Nomana ke
tua tapokis pe, doh God e poul keip
tun tena nimalara tasisin. ³⁴⁻³⁵gGisin
ahik pah ra katupa me inet, teene ge o
tamata pesine nas kot, doh nosio uma
ka uabulaua tananin, kara keipime tar
mani tasir aposoul, doh gisina tera heir
tang mai gere katupa tar inet.

³⁶A tang sioko tasisinar tamatang
tagorong man, a hangana tang Josep,
a peng toro matina tasir Libai, e la
tur i Saiprus, geka uelkilainir aposoul
pare, Banabas (doha puhonene Banabas
e kula pare, “A tamatang uapopokoh
tasir tamat”). ³⁷Inggono teke uabulaua
tono mahar kot, kare heir tar mani tasir
aposoul.

O Mahar 5

Ananaias me Sapira kura boh

5 Bo a tang sioko pukur tamat a
hangana tang Ananaias mena kuah,
a hangana tang Sapira, kura uabulaua
pono tonosira mahar kot. ²hBo Ananaias
puk ke la heir tar giniamehe pukur mani
tasir aposoul, kare uoho dede tar gini-
ameh, kare hire tasisina pare, “Teenina
uakapa puk manasanin.” Doh na kua-
hon e ate teil ponompe ke guata peono
paar, teene rasina kura uelhote tar uoho
uanono tar ginameher mani.

^c4:27 Mat 27.1-2; Luk 23.7-11; Apo 3.13 ^d4:28 Apo 2.23 ^e4:29 Epe 6.19

^f4:32 Apo 2.44 ^g4:34-35 Apo 2.45 ^h5:2 Apo 4.34-35

³iMaeit Pita ke kula pare, “Ananaias! Ingga ko uoun ro baloum tang Satan, maene ro marang boho ingga tar Iabena Dedeil, karo hiliu tar giniamer mani pare, a noum geke bulauaig tonongo mahar koto ingga? ⁴A mahar kotonin a noumua geto marang uabulaua ue ahik paho uabulau. Dohi muduhia geto marang uabulaua tanin, ingga song ro matotong guata ueltebeir tenang mani hope ro malara pe, Ae maene ko nana, karo guata sira pare? Ingga dehe ko boho tang God, ahik pah tamiueim.”

⁵Tar binaka ke longoro pe Ananaias tar puhon, inggono ke mate ualutara puk manasampe. Doho tamata geke longoro tar puhonene ke kotpokoso pe, gisina ke uohoisir nisokoro uleik.

⁶Song ka lamer tamata kalan, kara gomo tar tukununa Ananaias, kara keip tauet, kara la keu.

⁷I muduhia kura karuh baka per touonor aua, na kuahono ke leka ponome ium, e telempe tar puhene ke kotpokos. ⁸Pita ke dangata tatanono pare, “Hire totoguo ter bulauana puk manasampe ro mahar kotonine gekura uabulauais raoum me Ananaias?” Kare kulono pare, “Te paare nomanampe. Ter bulauana nomanampe.”

⁹Maeit ke kula Pita tatanono pare, “hope maene kura uelauaie raoum tar uedanga tena Iabena Dedeil God? Bang! O tamata geke la keu baka uoum tenang bulouta gisine manasa toro pirik, doh gisina ra turung kabe tauete poluk totomua.”

¹⁰Ginempe ke mene uakapa pe Pita, inggono ke mate ualutara pon, kare punga uahua puk manasampeane i uahuhut tar kekena Pita. Song ka lekemmer tamata kalan, kara me banga tatanono re rikin pe, gisina ka uelk-

abe tauete poluk tatanon, kara la keu tabarampein tena bulout.

¹¹Doh gisinar tamatang tagorong mana mesir gisiamehemper tamata geke longoro tar puhono ke kotpokoso pe, ka uoun tar nisokor.

O aposoul ka uauia tasir bureh

¹²jO aposoul ka guata tar bureher nitou, kara niparoko ger giniamerhe sioko tunane tasir tamat. Doho mamang tamatang tagorong mana ra uoto uan-goul tokaha tar tine umane tar umang lotu ger dedeil gera kilain, na paranda Solomon. ¹³O bureher tamata ra uairana tasisin, bo ra sokoro puk tar uatagus tasisin. ¹⁴Bo o gisiamehe puk ponomper tamata mesir kuaha ka tagorong mana tang Iesu ger Tamata Noman, kare uan-oto tagu polukis tasisin.

¹⁵Temaait a puhonene ke guatangua tasir tamata ka keip pokoso tasir tamatasiner momouh, kara me uarikin keipis tar uatane tar lel mare me turung ragom taner momolouinar tukununa Pita gete me lihila tar buturuon.

¹⁶O gisiameher tamatang toro uan ulekinine i tekteken i Jerusalem, ka keip toto ponome tonosio tamatasiner momouh, doh gisitir nihikung liouan, Doh ka me siokor uia pon.

O aposoul ka kale uelmahing

¹⁷Bo a patere ger i rana uain tasir patere uakap meso bung uanoton gesir Sadiusi, gisina ka gehe uasa tun. ¹⁸Maeit gisina ka kuse tasir aposoul, kara uamokois tar karabus ger nasir tamata uakap. ¹⁹kBo naboung puk na anggelour Tamata Nomana ke me puka toro piripirik, kare ueliu tauete tasisin. ²⁰Kare kula pare, “La, karung la iuma tar umang lotu ger dedeil, karung la hire luaka tun tasir tamata tar timuhur nitua.”

²¹ O aposoul ka longoro hape ka kula peis, maeit naliliuolik gisina ka la tar umang lotu ger dedeil, kara la mene ualasira tasir tamat.

Tar binaka ke pokosor patere ger i ran meso bung uanoton, gisina ka kila tar tabila tokahang ueluatata tasir tamatang uoum keip mesir mamahoholikisiner tohangasing tasir Ju. Gisina ka ualatué tasir tamatang kauéke tar la tar karabus mara la ueliuime tasir aposoulane tasisin. ²² Bo gine puk ka la pokoso pesin, gisina ka la mahang sirsir teil tasir aposoul. Maeit gisina ka la tapokis tar buturung tabila tokahang ueluatat, kara la hire pare, ²³ “Inggeim king la tupara tar karabus a niholoro uaiá nomanampe meniampe tasir tamatang tur kauéke ra turumpe tar pirpirik, bo tar binaka puk king puka inggeim, inggeim ahik pah king tupara me tang siokor tamat ium.”

²⁴ Gine ka longoro pesina ka ueluatata peis paar, a tamata uleik tasir soldia tar umang lotu ger dedeil menia tar tamata uleiking tasir patere kura tobouluntiehe tun, kaura namanaehe tar hua tun re uahireinir puhon.

²⁵ Song ke pokoso turumer tang siokor tamata tar umang lotu ger dedeil, kare me kula pare, “Ualongor! O tamata gekung uamokosioum tar uih, gisila ra tur iuma tar umang lotu ger dedeil, kara mene ualasira tasir tamata tang Iesu.”

²⁶ Maeit a tamata uleik tasir tamatang uiliatung mesno uiluiliatung ka la tar umang lotu ger dedeil, kara la ueliuime tasir aposoul tenas tine umar tamata uleik. Bo gisina puk ahik mata uaelmahing tasir aposoul, teene gisina ka sokoro geta bakbak pousur tamata tasisin.

²⁷ Song ka me ueliuilaisir aposoul tasir tamata uleik mare heheker tamata uleik-

ing tasir patere tasisin. ²⁸ A tamata uleiking tasir patere ke kula pare, “Inggeim king ualatoho tane tamiuoum pare, ahik baka poluk pah mu mene ualasira tar hangon, bo inggoum puk kung uauoun tasir tamatang Israel tenami niualasir, karung marang baktula ponola tamiueim pare, teking uiliatung pou pou tatanon.”

²⁹ mKare mene hahauangua Pita mesir gisiaméher aposoul pare, “Inggeim mi uakeluk puk manasampe tono uelhire God, doh ahik pah mono uelhire me tamat. ³⁰ Nas God ro bung tubugigeig geke uatua tapokis tang Iesu gekung uiliatung pousisoum, kung tine uakuse pe tatanono tar korose. ³¹ nGod ke kale kai taro i Heuene tatanon, tar la tabila tena pang makoso God. Inggono ke uatakai tatanon, kare heir tatanon tar hangan, ‘A tunar toia, kara tang uelkarus,’ mare poul tasir Israel mara banotong uapalihisin tenas niguat, kara la tang God, maeit re kuse luara liuono teres niguata uasasin. ³² Inggeimene teking banga tun tar inetenin menia pono tar Iabena Dedeil geke heirihain God tasir tamata geke longoro tatanon.”

³³ Tar binaka ka longoror tamata uleik tar puhon, gisina ka nimaliana uasa tun, kara marang siokor tung pou tasisin. ³⁴ Bo a tang sioko pukur Parisi, a hangana tang Gamaliel, a tamatang ualualasira tar ualatut gera siokor ueltadainir tamata uakap ke tentur kaiane i uantinanina tasir tamata uleik, kare ualatoho pare, ra keip tauete sikoro bakaisir aposoul i kalahara tar sikinar binak. ³⁵ Ka tauete bakar aposoul i kalahar, song ke kulono tasir gisiaméher Parisi pare, “Ro bung uanotoug, bangbanga hamas tun tar huarung marang guatain tasir tamatasine.

³⁶°Ahik pah sioununtieh, ke guata Teudas pare, a tamata uleik, doh here kaelais tar 400ir tamata ka tagorong mana tatanon, kara uakeluk tatanono tar ueluelde tar gavamaning Roum. Inggono ka uiliatung pousin, kara lala uelpakahingua no tamatasis ka uakeluk tatanon, kara hikingua pah ka guata baka me inet. ³⁷I muduhia tatanon, Judas ger peng Galili ke uakotpokoso pono tar puh, tar binakang aha tasir tamat, kare uoum keip tasir tamata tar ueluelde pono tar gavamaning Roum. Inggono ka uiliatung pous ponoin, doh no tamatono ka lala uelpakah pon.”

³⁸“Temaene tar puhene, inggo gine ru ualatut tamiuoum pare, Hiliu! Uamaluana tasisina gera la! Ge para niguatone a nana puk me tamat, inggon e la kapampe. ³⁹Bo ge para nang Godor niguatone, inggoum ahik pah mu bantoto mu tur tane, inggoum mu la ueluparangua pare, mu tur tane tang God.”

⁴⁰°Doh gisinar tamata uleik ka siokor uauia tena menemene Gamaliel. Gisina song ka kila ualeke tapokisila iuma tasir aposoul, kara me halhaluhis toro uohong haluh. Song ka ualatoho tasisina pare, ahik baka poluk pah ra mene tauete baka poluk tar hangana Iesu, kara kula tasisina ra la.

⁴¹°Maeit o aposoul ka hiliu keip tasisina tar niuah, teene God e uaha tun tasisina ka uamatala peis, ka kale uelmahing pe tar hangana Iesu. ⁴²Re la per mamang marein, gisin ahik pah ra uakenua tar mene ualasira toane tar umang lotu ger dedeil, doh ganempe toro mamang umalik ra uatakai pe toro Uelhire Uaia pare, Iesu te Kristo.

O Mahar 6

O mouitir tamatang poul ka uamatotois

6^rTar binakanin, o tamatang tagorong mana ka burehentiehe uain. Doho Jusine ra ate toro uelhireng Grik ka meneneng nimaliana tasir Jusiner peng Israel tun ra uelhire toro uelhireng Hibu, teene o kuaha nimate liuing Grik ahik pah ra uoto kale tagu me nipoul tar mamang binakalik gera buligir niein.

²Maeit o aposoul ka kila toto tasir tamatang tagorong man, song ka kula pare, “Inggon ahik pahe turung kodkodoho tamiueimir aposoul tar hiliu tar mene tauete tonu uelhire God, karing uangoulung bul puk tasir kuaha nimate liu.

³Temaet ro bung tahimiueim! Uamatoto me mouitir tamat i uantinana tatamiu gera ateis pare, ra uoun tun tar Iabena Dedeil, karo tang naman. Inggeim mi turung uamatoto tasisin tar guata tar kalekinalenin. ⁴Karing turung uamoko tun teremi ninamana tar lotu, kare tar kalekinale toro uelhire ro nang God.”

⁵A ninaman taginiono ke uauaha tasisina uakap. Gisina ka uamatoto tang Stiben, inggon a tamatang tagorong mana tun tang God, kare uoun tar Iabena Dedeil. Gisina ka uamatoto pono tang Pilip, Prokorus, Nikanor, Timon, doh Parmenas, kare Nikolas ger peng Antiok, inggono ke uapalih, kare lotu tagu tasir Ju. ⁶Gisinar tamatang tagorong mana uakapa ka uatur tasir niuamatot i uoum tasir aposoul, doh gisina ka siokor uaponala tar limas i rana tasisin, kara heir tenas lotusin.

°5:36 Apo 21.38 °5:40 Apo 4.18 °5:41 Mat 5.10-12; 1Pi 4.13

°6:1 Apo 4.35

^{7s}Doh temaeit no uelhire God, song ko la ueltebeir. Doho tamatang tagorong man i Jerusalem ka burehe uateuele tun, karo burehe ponor patere song ka tagorong mana pono tang Iesu.

Stiben ka kusein

⁸God ke uauoun tun tar nitam-popokoho tang Stiben, kare poul tatanon ke uakotpokoso tar bureher nitou i uantinanina tasir bureher tamat. ⁹Bo o gisiameher tamata ka tur tane tatanon, gisisir Ju tar umang lotur nasir Ju gera kilain nas umang lotur Ju ge ahik paho karabus, ka ueluelperer, o Jung Sairini, doho Aleksandria menia pono tasir tamatang tar pang uan i Silisia, dohi Esia. O tamatasina ka uakekena tar ueluelperere keip tang Stiben, ¹⁰bo ahik puk pah ra banoto tena niate uaiakon gere la tur tar Iabena Dedeil.

¹¹Maeit gisina ka menmene uahoun uanomo tasir gisiameher tamata tar kula pare, “Inggeim king longoro tang Stiben ke menmene uasa pe tang Moses, doh tang God.”

¹²Doh gisina ka uatenturungua tar balasir tamata mesir mamahoholik, karo tamatang ualasira tar ualatut. Gisina ka kuse tang Stiben, kara keipila tatanono tenas kibungur mahohong Ju gera kilais, o Sanhidran. ¹³Gisina ka uamato tasir tamata tar boho tola tatanono pare, “A tamatene ahik tun pahe bantong uakenua tar meneng ueluelde tar buturener dedeil, kare ueluelde pono tar ualatut. ¹⁴Doh inggeim king longoro pono tatanon e kula pare, a tamatene ra kilain tang Iesu e turung mamantouo tar umene, kare uapalih tena niualatut Moses geke uelueluahiueme tagigeig.”

¹⁵Doho tamata gera tabila tar kibungene ra siokor banga uanono kompe tang Stiben, kara banga tang Stiben ke uapalih per poren, ke ngohina tar pore-nar angelou.

O Mahar 7

Na menemene hahaua Stiben tasir Sanhidran

7 Song ke dangatar patere ger i ran tatanono pare, “A menemenenine ra tohtoholaig totomua a manampe?”

²uDoh Stiben ke mene hahaua pare, “Ro bung tahigulik mesnogo mamahoholik, mu ualongoro totoguo! Nagi God inggeig ger tampopokoho tun ke ualasira toin i Mesopotemia tang Abraham ge tamagigeig tar binaka halana te la i Haran. ³Doh God ke kula tatanono pare, ‘Hiliu tenang pang uan, karo tahimulik, doho la toro mahar koto geru turung hireio totomua.’ ⁴vMaeit inggono ke hiliu tonosio mahar kotor Kaldia, kare la uangoul i Haran.”

“I muduhia ke mate pe tamanon, God ke ueliuime tatanono toro mahar koto rone rung uangouluioum daan. ⁵wGod ahik mate heir me sikir koto toro mahar koto roono tatanon pare, o nan. Tar binakon Abraham ahik me tun, bo God puk ke ualapagah tatanono pare, inggono meso bubunguna ra turung kale toro mahar koto roon. ⁶xGod ke menmene tatanono pare, ‘O bubungumua ra la turung uangoul tar pang uan ahik paha nasisin, doh gisina ra turung uakarabusing, kara guata uasais e banoto toro 400 ro krismas. ⁷yBo inggo puk u turung uaelmahing tasir tamata gera uakarabus tasisin, dohi muduhia gisina ra turung hiliu tar uanion, kara me lotu

^s6:7 Apo 2.41; 16.5 ^t6:10 Luk 21.15 ^u7:2 Uak 11.31; 12.1

^v7:4 Uak 11.31–12.5 ^w7:5 Uak 12.7; 15.18; 17.8

^x7:6 Uak 15.13–14; KT 12.40 ^y7:7 KT 3.12

to tar buturene totoguo.⁸ ⁸ Song ke kula God tang Abraham tar poko tar tukunun. A puhono tere uabang paroko tar niualapagah ke guata keipin God tatanon. Doh Abraham ke uakotpokosongua tang Aisak, i muduhia tar tualir marein ka poho peion, inggono ka pokoin. I muduhia Aisak teke uatamanain Jekop, doh Jekop teka uatamanaisir hangaul, doha tang torikir tamat, gisina teso bung tubugigeig.”

⁹ ^a “Gisina ro bung tubugigeig ka nimalianang gehe tang Josep, temaene ka uabulauasina tatanono pare, a karabus tasir Isip. Bo God puk e uangoul tagu tatanon, kare uelkarusungua tatanono tar mamang binaka uasa. ¹⁰ ^b Inggono ke heir tar ninamana uaia, kare uamalagir tang Josep tar kale tur tang Pero ger toiang Isip tar hangana uleik, maeit ke guatangua tatanono tere uoum keip i Isip, kare kaueke tono uma uakaponor toia.”

¹¹ ^c “I muduhia a gogo uleik ke ualo i Isip, dohi Kenan, kare uakotpokosongua tar binaka uasa tasir tamat, maeit o bung tubugigeig ahik tun pah ka banotong tupara me niein. ¹² Tar binaka ke longoro Jekop pare, a raes-uit e mok i Isip, inggono ke ualatie toso bung tubugigeig tar la banga tagin. ¹³ ^d Tar uatorikinar nila tasisin, Josep ke uahire tasisina pare, mai tun, doh Pero ke la ate pono toso tahinalik Josep. ¹⁴ ^e I muduhia tar puhonene, Josep ke ualatie ra la kalein taman menia toso bubungun. Gisin o mouitir hangaul, doho tang tolima uakap. ¹⁵ ^f Maeit Jekop ke la uahiuako i Isip. I muduhia inggono ke mate

to tar uaniono meso bung tubugigeig. ¹⁶ ^g A tukunusisina ka keip tapokisimpeig i Sekem, kara la keuimpeis tar lebang geke bulaua keipiono tar mani, ke bulaua tur toso bung tuna Hamon.”

¹⁷ ^h “I muduhia tar bureher krismas ke la pe, o tamatang Israel ka burehentiehe tun, doh na niualapagah God geke guata keipin tang Abraham ke hutung pokoso manas. ¹⁸ Tar binakanin, a tang giamehe manasar tamata re toia i Isip, doh inggon ahik pah ke ate tagu tang Josep. ¹⁹ ⁱ A toiaono ke tutlour tosnogio tamateig, kare guata uasa pono tasisin. Inggono ke petutupe pono tasisina tar baka tauete toso tususiner nihing poho mara mat.”

²⁰ ^j “Tar binakanin teka poho to ponoin Moses, doh inggon a siokor keketik tun. I lolono tar touonor bialok, a toking tinanon kura kaueke bakampe tatanon. ²¹ ^k Tar binak ka la uamokoion i kalahar, a tuna Pero ger kuaha ke la kale tatanon, kare kaueke uauleik sira pare, a tuna tatanon. ²² Moses ka ualairain tar bureher niateng Isip, doh inggono ke tampopokoho tun tar men, kara na nipiles.”

²³ “Tar binaka ro toueitir hangaul no krismas Moses, inggono ke namana huara tar la ruh kout baka toso tamat. ²⁴ ^l Inggono ke banga tar tang siokor tamatang Isip re uiliatung pe tar tang siokor tamatang Israel, maeit inggono ke la tar poul tatanon, doh inggono ke uelturut tatanon, kare uiliatung pousungua tar peng Isip. ²⁵ Moses ke namana ra bang parokosina pare, God ke heiriha tatanono tar uelkarus tasisin, bo gisina puk ahik.”

§7:7 Bolobolong Uakeken 12.7

⁷:8 Uak 17.9-14; 21.4 ^a7:9 37.11,28; 39.2,21-23 ^b7:10 Uak 41.37-44

^c7:11 Uak 41.54; 42.1-2 ^d7:13 Uak 45.1-4,16 ^e7:14 Uak 45.9-11; 46.27

^f7:15 Uak 46.1-7; 49.33 ^g7:16 Uak 23.2-20; 33.19; Jos 24.32

^h7:17 KT 1.7-8 ⁱ7:19 KT 1.11-22 ^j7:20 KT 2.2 ^k7:21 KT 2.3-10

^l7:24 KT 2.11-15

²⁶“Tar uagiamehenar marein, Moses ke me ueltupar tar toking peng Israel ura uiliatunge peis. Inggono ke uedanga tar poporo tasrasin, kare kula pare, ‘Tang torik! Raoum deh ramamahialik, ae maene re uiliatungeis raoum?’”

²⁷“Bo a tamata pukene re guata uasa tar tang giamehe ke tula bise liu tang Moses, kare kula pare, ‘Mai ke guata totomua pare, tero tamatang uoum keip, karo tamatang kedanga tamiueim?’
²⁸^m“Inggono deh hero marang uiliatung pous sira totoguo ko uiliatung pous pe tar peng Isip nerau?’
²⁹ⁿ“Tar binak ke longorono tar puhon, inggono ke sokoro gete ate Pero, kare ualonguala i Midia. Teke la uangoul sirono pare, a pokos, kare lengua. Inggono ke uakot-pokosongua tar tang torikir tun.”

³⁰^o“I muduhia kura la baka pe ro toueitir hangaul ro krismas, God ke pokoso sira pare, a anggelou tang Moses. Inggono ke pokos i lolono toro luh-luhuna ro hue tar ranana ro douk, o tur tar butur padenen gere moko uahuhut tar siusan i Sainai.
³¹“Tar binaka ke bangon, inggono ke lutara tun, ae maene ahik ro douk paho luh. Gine re la uahuhut pelaono tar la banga uai, inggono ke longoro tar Tamata Nomana re kula pe pare,
³²“Inggono tenas God ro bung tamoumua, na God Abraham, Aisak, doh Jekop.’ Doh Moses ke poroporo tun re sokoro pe, doh ahikingua pahe marang banga uelhir.
³³“Song ke kular Tamata Nomana tatanono pare, ‘Liur liu tenang su ge a butur koto peene ro turia a koto dedeil.
³⁴“Inggono ku banga tun ra guata uasa peis nogo tamat i Isip. Inggono ku longoro tenas nikiringisin, maeit ku la uahiuaha tar me kale tapokis tasisin.

Lameene daan, inggo u turung ualutue totomua tar tapokis i Isip.”

³⁵^p“Doh Stiben ke mene tumana poluk pare, ‘Moses te geka ueluelde turin i Isip, kara kulain pare, ‘Mai ke uamatoto totomua tero uoum keip karo tamatang kedanga tamiueim?’ Bo inggono puk teke ueliuilain God tar uoum keip, kare uelkarus tur tasisin i Isip tar binaka ke kotpokoso sira God tar anggelou i lolono toro luhluhuna ro hue i rana toro douk.
³⁶^q“Moses ke keip tauete liu tur tasisin i Isip. Ke guata to pe tar bureher nitou i Isip, doh tar butur ra kilain, a laur kubkubar, kari lolono toro toueit ro hangaul ro krismas tar butur padenen.”

³⁷^r“A tamatonene Moses, te geke kula tasir Israel pare, ‘God e turung uakot-pokoso me propeit e la tur katongo tamiuoum e turung ngohina totoguo.’
³⁸^s“Moses ke uangoul tokaha tagu tasir Israel toro butur padenen menia pono tar anggelou geke mene to tatanono tar siusan i Sainai, doho bung tubugigeig, doh inggono teke kalkale tar uelhire ger tua mare uelueluahiueme tagigeig.”

³⁹“Bo o bung tubugigeig puk ka de mata longoro tatanon, ka ueluelde tatanon, dohi lolono teres ninamanasin, gisina ra marang tapokis pukumpe i Isip.
⁴⁰^t“Maeit gisina ka kula tang Aron pare, ‘Tuha menami godo inggeim gere turung uoum keip tamiueim, bo Moses geke ueliu tauete tur i Isip tamiueim, inggeim mi tele uamatot, kare hauon.’
⁴¹^u“Doh ter binakanin teka tuha tosina toro kaesa ngohina tar tunar kau. Gisina ka ueliuime tar uahung tang roon, kara guata tokaha toro niein uleik tar uatakai tar haua ka tuha katongoin.”

⁴²“Bo God puk ke nimaliana tasisin, kara hik pah ke namana baka poluk

^m7:28 KT 2.14 ⁿ7:29 KT 2.21-22; 18.3-4 ^o7:30 KT 3.1-10

^p7:35 KT 2.14 ^q7:36 KT 7.3; 14.21; Aha 14.33 ^r7:37 Ual 18.15

^s7:38 KT 19.3 ^t7:40 KT 32.1 ^u7:41 KT 32.2-6

tasisina ra lotu pe tasir pitopit. Gini-nanine e uakeluk tar haua ka boloin i lolono tonosio bolobolor propeit pare, 'Ir tamatang Israel, kung uangoul pe inggoum toro toueit ro hangaul ro kris-mas tar butur paden, inggoum kung heir baka tagu me uahung totoguo?

⁴³ Inggoum kung huathuata teil tena taluh Molek ger god bohoboh menia tar kaesang tar godo pitopit, Refan gekung tuhasioum pare, mu lotu tatanon.

Maeit inggo u turung kale liu tamiuoum, karu turung ueliuila tamiuoum toro mokong tar pang giameh i Babilon." *Amos 5.25-27*

⁴⁴ Doh Stiben ke mene tumana poluk pare, "O bung tamagigeig ra kalkale teilimpeane tar padenena tar taluhung lotu. Inggonor taluh ka tuha uakeluk sirampein, hape ke longoro pe Moses ke ualatoho pe God tatanon. ⁴⁵ ^vGine ka kale baka pesina tar taluhung lotu, Josua ke uoum keip toso bung tamagigeig, ka la keip menia tar taluhung lotu tar binaka ka kalesina tar mahmahar kotong toro pang uan geke geil liuis God. Inggono ke mokane tar koto ke la tuka tena binaka Debit, ⁴⁶ ^wgeke uauaha tang God, kare dangata tang God pare, e tuha mena uma na God Jekop."

⁴⁷ ^x"Bo Solomon puk teke tuha tar umon. ⁴⁸ Bo God puk ger i ranantieh ahik pahe uoto uangoul tagu toro umang lotuniner uleik ger nituhang tamat, ngohina sira ka hire per propeit ke kula pe God pare,

⁴⁹ ^y"I Heuene tonogo tabtabilo, dohi koto tenag buturung uatoko keke inggo.

Hingiangua me nituha uma rung tuhaioum menag umo?

Ia kaein nag umang pepe uaho?

⁵⁰ Ge inggo pe teku tuha tar mamang inetelik." *Aisaia 66.1*

⁵¹ ^zDoh Stiben ke mene tumana poluk pare, "Inggoum deho tamata mahang longor! Inggoum deh halanampe tung uapalih tenami niguat, karung longoro tang God. Inggoum mu ueluelde dedempe tar haua re uedangaigir Iabena Dedeil tar uahire tamiuoum, mu uakeluk sira kompe toso bung tubumiu ka guata uoum pe."

⁵² ^a"O bung tamamiuoum ka ueluelde, kara uaelmahing tasir propeit uakapa tun. Gisina ka uiliatung pous pono tas geke hire tauete tena nipokosor tamata ger kodkodoh. Doh gine daana ke pokoso peon, inggoum kung ueliuila tatanono tar limasir uelmatan, kara tung pousin. ⁵³ Inggoumene teka ualasisir anggelou tar ualatatur nang God, bo ahik puk pah kung uakeluk tananin."

Stiben ka bakbak pousin tar palau

⁵⁴ Tar binak ka longorosina ke mene pe Stiben paar, gisina ka eiteit uelkauiue tar liuous ra nimaliana pe. ⁵⁵ ^bBo Stiben puk ke uoun tar Iabena Dedeil, ke banga kai taro i Heuen, kare bang huara tena nitampopokoho God, doh Iesu e tur tabara tar pang makoso tang God. ⁵⁶ ^cDoh Stiben ke kula pare, "Bang! Inngo u bang huar i Heuene ke takapuk, doha Tunar Tamat e tur tar pang makosohia tang God."

⁵⁷ Maeit gine ka longoro pesina ke kula pe inggono paar, gisina ka siokor kula ualeikintiehe tun, kara takop tane tar talingas. Doh gisina ka siokor tentur, kara siokor ualola, kara kuse tang Stiben. ⁵⁸ Gisina ka keip liu tatanonane

^v7:45 Jos 3.14-17 ^w7:46 2Sa 7.1-16 ^x7:47 1To 6.1-38 ^y7:49 Ais 66.1-2

^z7:51 Ais 63.10 ^a7:52 Mat 23.31 ^b7:55 Ker 110.1 ^c7:56 Kol 3.1

tar uan uleik, kara la bakbak pous tatanono tar palau tar uiliatung pous tatanon. Doh gisis ka bohboho tola tang Stiben ka siokor hiliu to tenas hikhiku tar tang siokor tamata kalan, a hangana tang Sol.

⁵⁹Tar binakene ra bakbak pous pesina tang Stiben, Stiben ke lotu pare, “Iesu nag Tamata Nomano, kale tar iabeiguo.” ⁶⁰^dSong ke hatup uahiu, kare mene pare, “Tamata Noman, ahik paho bak tulala tar niguata uasaene tasisin.” Gine ke mene baka peono pagiar, kare mat.

O Mahar 8

8 Doh Sol tere uangoul tar binakon, inggono ke uauia tun ka uiliatung pous peion.

Sol ke guata uasa tasir tamatang tagorong man

Tar mareinionene ka uiliatung pousin Stiben, gisinar uelmatan ka uakikilanga tar guata uasa tasir tamatang tagorong manasine ra uangoul i Jerusalem.

Maeit o burehe tasisinar tamatang tagorong mana ka lala ueltebeirila tar pang uan i Judia me i Samaria, bosir aposoul puk ahik tagu. ²O gisiameher tamatasine ra uakeluk tena ualatur God ka ueldolomo uasa tun tang Stiben, kara keu baka tatanon. ³^eBo Sol puk ke uakekene manasa tar mamantouo tasir tamatang tagorong man. Inggono ke la hahai toro mamang uma uakap, kare reih tauete tasir kuah, doho bulout, kare ueliu tasisina tar karabus.

Pilip ke la uangoul i Samaria

⁴O tamatang tagorong manasis ka ualualo ueltebeir, gisina ka mene ualasira toro Uelhire Uaia tang hingiamper uan ra lain. ⁵Pilip ke la

uahiuako tar uan uleik i Samaria, kare la uelhire tauete tar hangana Kristo.

⁶Tar binaka ka longoror manai tamata ke mene pe Pilip, kara banga tar bureher nitouo ke guatagion, gisina ka me siokor ualongoro uahuhut tun tatanon. ⁷O bureher tamatasiner nihikung liouana ka kula ualeiking mate ka hiliu per liouana uasa tasisin, doho bureher tamatasiner mater tukunus ka uia. ⁸Maeit tar uan uleik i Samaria, o tamata ka siokor uah.

Saimon ger tang bilih

⁹A tang siokor tamat a hangana tang Saimon, a tang bilih e uoto guata tar bureher bilih tar bureher binakane tar uan uleik, doho tamatang Samaria ka bang, kara namnamana uabureh. Inggono e uoto meneng uasalain pare, a tamata tohangana tun. ¹⁰Doho tamatasiner i rannar hangas, doh gisiner tamata ueltebeir puk ra siokor uairana tun tatanon, kara siokor ualongor, kara kula pare, “A nitampopokoho ger nang God ger tampopokoho tun e moko tar tamatene!”

¹¹Maeit gisina ra uakeluk tatanon, teene gisina ka banga tar bureher giniamehe siokor inete ke guatagion.

¹²Bo tar binaka puk ke mene tauete Pilip toro Uelhire Uaiang tena Nitoia God menia tar hangana Iesu Kristo, gisina ka siokor tagorong man, kara siokor uahuhunguais, o kuahampe, doho bulout. ¹³Saimono pon, ke tagorong man, kara uahuhu ponoin. Doh inggono ke uakuakeluk teilingua pono tang Pilip tang hingiar butur re la, teene ke banga peono tar bureher nitouo ke guataig Pilip, kare lutara uasa tun.

¹⁴Tar binak ka longoror aposoul gera uoto uangoul i Jerusalem pare, o tamatang Samaria ka tagorong mana tonu uelhire God, gisina ka ueliuila tas Pita me Jon tasisin. ¹⁵Tar binaka kura

la pokoso rasin, rasina kura lotu ueleheir tasisin mara kalesin tar Iabena Dedeil. ¹⁶Teene a Iabena Dedeil halana te la uapono taguha tasisin. Gisina ka uahuhu keip pukis tar hangana Iesu ger Tamata Noman. ¹⁷^fSong kura uaponala Pita me Jon tara limas tasisin, song ka kalesina tar Iabena Dedeil.

¹⁸Gine ke banga pe Saimon ka kale pesina tar Iabena Dedeil kura uapono pela Pita me Jon tara limas tasisin, inggono ke hue ueleheir tasrasina tar mani, ¹⁹kare kula pare, “Mura heir pono tar nitampopokohono totoguo mare kale pono me tamata tar Iabena Dedeil getu uaponola inggo tar limoug tatanon.”

²⁰Doh Pita ke kula hahaua tatanono pare, “Ingga ra turung haluh pous keipia tenang mani, teeit ko namana pe ingga ra banotoinir inete geke heirin God ra bulaua keipin tar mani. ²¹Ingga ahik paho banoto kale tagu tar kalek-inaleene, teeit ingga ahik paho uia ro baloum tar matana God. ²²Uapalih tenang niguata uasa, doho lotu tar Tamata Noman. Inggono here turung ueldolomompe totomua tar ninamana uasaeit toro baloumua. ²³Ge inggo pe u banga totomua pare, ko uoun tun tar ninamanang geh, kara niguata uasa e rokok tane tun totomua.”

²⁴Song ke mene hahaua Saimon pare, “Loutu ueleheir totoguo tar Tamata Noman mara hik me inete ko menegia re kotpokoso totoguo.”

²⁵Tar binaka kura mene tauete Pita me Jon tonu uelhirer Tamata Noman, kaura hire tauete pon tar bureher inete ke guataig God, song kura la tapokis poluk Pita me Jon i Jerusalem, kaura menmene tauete teilimpela tonu uelhirer Tamata Nomana toro burehe ro uaning Samaria.

Pilip ke uelhire ualasira toro Uelhire Uaia tar tamatang Itiopia

²⁶Na anggelour Tamata Nomana ke kula tang Pilip pare, “Kale uatoro karo lihila tar pang makos, uakeluk tar leng tar butur padenen gere lih turuko i Jerusalem, e lako i Gasa.” ²⁷Maeit Pilip ke kaleuatoro kare la. Doh gine re lih pekoono tar lelon, inggono ke uel-tupar tar tamatang Itiopia a nialah, inggono a tamata uleik tun tasir tamatang kauেকে tena umang mani Kandas. (Kandas a kuaha toiang Itiopia.) Inggono ke la taro i Jerusalem tar la lotu. ²⁸Inggon e panete teilimpe tena karis, e lang tapokis tena uan, kare menmene uakeluk teil toro bolobol gero nang Aisaia. ²⁹A Iabena Dedeil ke kula tang Pilip pare, “La! Karo la tur uahuhut tar karisenah.”

³⁰Song ke ualo uahuhutula Pilip tar karis, kare la longoro tar tamatonu re menmene uakeluk pe tonu bolobolo Aisaia ger propeit. Kare dangatangua Pilip tatanono pare, “Ingga o naman manatempe tar haueit ro menmene uakelukin?” ³¹Kare kulono pare, “Inggo deh paku ate ge pake mene uakalahara me tamata totoguo.” Song ke uadangata inggono tang Pilip tar me tabila tagu tatanon. ³²Doha puhung bolobolene re menmene uakelukuion e kulkula pare, “Inggono ngohina tar sipsipene ra keipin ra la uiliatung pousin.

Inggon a hamhamasalik ngohina tar tunar sipsipene ra koutigir ulun, doh ahik pah ke mene sikoro bak.

³³Inggono ka uamatala tunin, ahik pe mata kedanga uaiaig na niguat. Inggono ke mat, doh halana me tun, kara kale liu manasainane tar kot.” *Aisaia* 53.7-8

³⁴Gine ke mene uakeluk baka peono toro bolobolo roon, inggonor peng

Itiopia song ke dangata tang Pilip pare, “Hire tun baka totoغو, mai tunene re menmeneinir propeit, inggon e menmene katongoin ue e menmene me tamata siok?”

³⁵ Song ke mene uakalahar Pilip tar puhonene ke menein Aisaia, kare uelhire tauete pono tatanono toro Uelhire Uaia gero menmene tang Iesu.

³⁶ ^gGine ra ualo pelasina tar lel, gisina ka la pokosola tar kodom, kare la kular tamatang Itiopia tang Pilip pare, “Bang! A kodomo gine, a haua re tur tane totoغو, maene ahiko pah ra uahuho?”

³⁷ Doh inggono ke ualatoهو tar karis ra uatokoin. Song kura siokor hiuoko rasina me Pilip tar kodom, kare uahuho Pilip tatanon.

³⁸⁻³⁹ Gine kura hiliu pe rasina tar kodom, na Iabena Dedeilir Tamata Nomana ke me kale liu ualutara kompe tang Pilip, doh inggoneitir tamata uleik ahik pah ke bang huara baka poluk tatanon. Bo gine puk ra ualo pelasina tar karis, inggon e uaha tun, kare uatakai tang God.

⁴⁰ ^hBo Pilip puk ke la pokoso ualutara tar siokor uan uleik ra kilain i Asdot, kare lala ueltebeir toro giniamhe ro uan uleik, kare la mene tauete toro Uelhire Uaia ke la tuk i Sisaria.

O Mahar 9

Sol ke uapalih tena niguat

¹⁻² ⁱTar binakanin i Jerusalem, Sol e mene uasokoro dedempe tar marang mamantou, kare uamate tosno tamatang tagorong manar Tamata Noman. Inggono ke la tar pater ger i ran, tar kale mo bolobolong tonosio umang lotur Ju i Damaskus mare kale me nipoul gete tuparono mo tamata gera uakeluk tena lele Kristo, o bulout ue o kuah, inggon

e marang kuse tasisin, kare la uamoko tasisina tar umang uih i Jerusalem.

³ Maeit Sol ke la i Damaskus, gine re lang uahuho manasa peon, a luh ke balo ualutara turuha tatanon i Heuen. ⁴ Inggono ke punga uahuane i kot, kare longoro tar tamata re kula pe tatanono pare, “Sol! Sol! Ae maene ro guata uasa ingga totoغو?”

⁵ Kare dangata Sol pare, “Ingga pe mai ter Tamata Nomana?”

Kare mene hahuar tamata pare, “Inggo te Iesu, teene ro guatguata uasaia. ⁶ Tentur kaiene daan, karo la leka tar uan uleik, song ra turung hireia tar haua ro la turung guatatin.”

⁷ Doho tamatasine ra la tagu teil tang Sol ka siokor lutara tun, doh ahik pah ka mene me puh, gisina ka longoro ponompe tar tamata ke mene pe, bo ahik puk pah ka bang huara me tamat. ⁸ Sol ke tentur kai turane i kot, bo tar binaka puk ke marang uatauala inggono tar matan, inggon ahik pahe banot e bang huara me inet. Maeit gisina ka kuse tar limanon, kara keipilain i Damaskus. ⁹ Inggono ke kut tar touonor marein, doh ahik pono pahe ein ue e inum me inet.

¹⁰ Tar uan uleik i Damaskus, e uan-goulur tang siokor tamatang tagorong mana tar Tamata Noman, a hangana tang Ananias. A Tamata Nomana ke mene tatanon i lolono tar siokor borborian, ke kula pare, “Ananias!”

Kare mene hahauono pare, “Tamata Noman inggo gine.”

¹¹ Kare kular Tamata Nomana tatanono pare, “La tena uma Judas gere toko tar lele ra kilain, ‘A lele makmakos,’ karo la dangata tar tamata ger peng Tasius ger hangana tang Sol, ge inggono pe e lotu totoغوene daan.

¹² Sol ke borborian, kare banga tar tamat a hangana tang Ananias, ke lame,

kare me uaponola tar limana tatanon mare banga tapokis.”

¹³Kare mene hahaua Ananias pare, “Tamata Noman, inggo deh ku longoro tar bureher ueluatata tar tamatono re uoto uauelmahing pe tosnongo tamata ingga i Jerusalem. ¹⁴Doh gine ke la pe-meonane, inggon e uakeluk tar ualatohong tar pater ger i ran, tar kuse, kare uamoko tar karabus tang mai gere tagorong mana totomua.”

¹⁵^jBo a Tamata Noman puk ke kula tang Ananias pare, “La! A tamatonene ke pokoso sira manasa pare, nag tamatang kalekinaleo, tar ueliu hahai tar hangouguo tasir tamata ge ahik paho Ju mesnosio toia menia pono tasir Israel. ¹⁶^kInggo u turung ualasira tatanono hape re turung baka per niduh re turung kalegionio tar ueliu tauete tar hangouguo.”

¹⁷Maeit ke la Ananias, kare la leke tar umon. Ke la uapono tar limana tang Sol, kare kula pare, “Tahiguo Sol, Iesu ger Tamata Noman geke kotpokoso to totomua tar lele tar binaka ko lang lameaane teke ueliuime totoguoane totomua maro banga tapokisia, karo uoun tar Iabena Dedeil.”

¹⁸⁻¹⁹Ahik me sikir manasan, a inete ngohina tar karongonar ian ke takapeis liu tur tar matana Sol, song ke bang huara tapokis poluk. Inggono ke tentur kai song ka uahuuin. I muduhia ke ein baka peono song ke tampopokoho poluk.

Sol ke mene tauete toro Uelhire Uaia i Damaskus dohi Jerusalem

Sol ke uangoul tagu bakampe tar ginameher marein tasir tamatang tagorong man i Damaskus. ²⁰Ahik paha puhung barah ke uangoul peon, kare

uakikilanga manasa tar mene tauete toro Uelhire Uaia iuma tonosio umang lotur Ju pare, Iesu ter tuna God. ²¹^lO tamata uakapa tunusine ka longoro tatanono ka siokor lutarang toboul tun, kara ueldangateis pare, “A tamata dehene te giane ke mamantouo uasa tun tasir tamatang uakeluk tang Iesu i Jerusalem. Doh inggono teke lame tar me kuse mo tamatane gera tagorong mana tang Iesu, song re ueliuila tar pater ger i ran mara uamokoisisina tar karabus.”

²²^mBo Sol puk ke kotpokoso pare, a tang mene uapopokoho tun. Na niua-bang manateono tang Iesu pare, te Kristo a kalahara tun. Doh gisisir Ju ra uangoul i Damaskus ahik tun pah ka bantong mene hahaua me puh tar touahiuu tatanon.

²³I muduhia ke karuh baka per bureher marein, o gisiameher Ju ka ueluauiiae tar uiliatung pous tang Sol. ²⁴Maeit tar boung, doh tar marein gisina ra tur kaueke tar pipirikinar uan uleik, bo Sol puk ke ate kout teres ninamanasin. ²⁵ⁿA siokor boung no tamatang uakuakelukion ka poul tatanono tar hiliu tar uan uleik, gisina ka uahiua keip tatanono tar tohene uleik e tabila teil, ka uahiukoin tar siokor hagarin tar padoronar uan uleik, song ke lalampe.

²⁶^oTar binaka ke lameon i Jerusalem, inggono ke uedanga tar uataguin tasir tamatang uakuakeluk, bo gisina puk ka siokor sokoro tatanon, kara hik pah ra tagorong mana tatanono pare, inggono ke tamatang tagorong mana pono tang Iesu. ²⁷^pBo Banabas puk ke keip tatanon mare la mene keip tatanono tasir aposoul. Banabas ke hire uaia tasisina hape ke banga pe Sol tar Tamata

^j9:15 Apo 26.2,6; 27.24; Roum 1.5 ^k9:16 2Ko 11.23-28 ^l9:21 Apo 8.3

^m9:22 Apo 18.28 ⁿ9:25 2Ko 11.32-33 ^o9:26 Gal 1.17-19 ^p9:27 1Ko 9.1

Noman, doh hape ke mene per Tamata Noman tatanon, kare ongolo tar mene tauete tar hangana Iesu i Damaskus. ²⁸Maeit song ke uangoul tagu Sol tasisin, kara hik me inete ke uakoutkout tatanono re la teil pe i Jerusalem, kare ongolo tun tar mene tauete to tar hangana Tamata Noman.

²⁹Inggon e uoto uelperere keip tasir Jusine ra ate toro uelhireng Grik, maeit gisina ka uedanga tar uiliatung pous tatanon. ³⁰Tar binaka ka ater tamatang tagorong man tar puhon, gisina ka keip tang Sol tar uan uleik i Sisaria, kara la ueliuila tatanono tar uan uleik i Tasus.

³¹Tar binakaninanine o tamatang tagorong manang toro mamang buturulik i Judia, Galili dohi Samaria ke pokosoisir binaka uaia, kare popokoho tun res nitagorong man, ra ueltada tun tar Tamata Nomanane ra uangoul pe, kara Iabena Dedeil e uatampopokoho pono tasisin, doh gisina ka burehe uain, kara uangoul keip puk tar nisokoro tar Tamata Noman.

Pita ke uauia tang Ainias

³²Pita ke la teil toro mamang buturulik tar pang uanion, inggono ke la uahiu ponoko tar uan uleik i Lida tar la banga tosno tamata God tar uanion. ³³Tar uan uleikion, inggono ke la uel-tupar tar tang siokor tamat a mater tuku-nun, a hangana tang Ainias, inggon ahik pah ke banot e tentur liu tono uat e banoto toro tual ro krismas.

³⁴Pita ke kula pare tatanon, "Ainias, Iesu Kristo e uauia totomua, Tentur kai, karo kaleuatoro tenang ineteng rikin." Ahik me sikir manasan, Ainias ke tentur kai. ³⁵O mamang tamatalikisine ra uangoul i Lida, dohi Saron ka siokor bang, kara siokor tagorong mana tar Tamata Noman.

Pita ke uatua tapokis tang Tabita

³⁶Tar uan uleik i Jopa e uangoulur tang siokor kuahang tagorong man a hangana tang Tabita (toro uelhireng Grik inggono ra kilain Dokas). Inggon e uoto guata uaia tun, kare poul tasir tiome.

³⁷Tar siokor binak, inggono ke momouh, kare mat, inggono ka uahuhu uaiainir tukunun, kara uarikin tar tine um i ran. ³⁸Lida e uahuhut i Jopa, maeit tar binaka ka longoro per tamatang tagorong manang Jopa tang Pita pare, e uangoul i Lida, gisina ka ualatue tar tang torikir tamata tar la kula uapopokoho tang Pita pare, "Ingga o la uateuele tunume!"

³⁹Maeit Pita ke la tagu tasrasin, doh tar binaka ke la pokoson, inggono ka la keip kaein i rana tar tine um. O mamang kuaha nimate liu uakapa tun ka tur uiloho tatanon, kara ualasira tar hikhiku mer gomono geke tuhtuha bakaig Dokas, tar binaka re uangoul tagu haraha tasisin.

⁴⁰Pita ke kula tasisina tar siokor tauete liu tar tine um, kare hatup uahiu, kare lotu, song ke kauiurila tar tuku-nunar mat, kare kula pare, "Tabita! Tentur kai." Inggono ke uatauala tar matan, doh tar binaka ke bang huara inggono tang Pita, Inggono ke tabil. ⁴¹Pita ke huela tar limana tatanon, kare kuse uatentur tatanon. Song ke kila ualeke tapokisilaono tasir tamatang tagorong mana mesir kuaha nimate liu, kare la ualasira tasisina pare Tabita a tua. ⁴²A puhonene ka ueliateinane i Jopa, doho bureher tamata ka tagorong mana tar Tamata Noman.

⁴³I muduhia tar puhon Pita ke uangoul uabarah sikoro bakampe i Jopa, ke uangoul tagu tar tamatang tuha keip tar kapokousur kau tar inet, inggon a hangana tang Saimon.

O Mahar 10

Kornilius ke ualatue ra la kilain Pita

10 Tar uan uleik i Sisaria e uangoulur tang siokor tamat a hangana tang Kornilius, inggono a tamata uleik tasir tamatang uiluiliatung, o uiluiliatung Itali. ²Inggono meso bung tuna doh gisine pono ra uangoul tagu tatanono ra siokor ueltad, kara sokoro tun tang God. Inggon e uoto heir tena bureher mani tasir tiome, kare uoto lotu pono tang God tar giniamer binak.

³Tar siokor binak, kaelainane nar tri kilok namoloi, inggono ke banga tar borborian. Inggono ke banga uaia tun tena angelou God ke laha tatanon, kare me kula pare, “Kornilius!”

⁴Kornilius ke banga uanonong sokoro tatanon, kare kula pare, “A hauonor Tamata Noman?”

Kare kular angelou pare, “God ahik pahe malabobour tenang lotua, kare nang niheir tasir tiome. ⁵Gine daan ingga o ualatue mo tamata tar la i Jopa, tar la kila tapokisime tar tang siokor tamat a hangana tang Saimon Pita.

⁶Inggon e uangoul tagu tang Saimon ger tamatang tuha keip tar inete tar kapokousur kau gere tokouahuhut na um i teh.”

⁷Tar binaka ke hiliuir angelou tang Kornilius, Inggono ke kila tena toking tamatang kalekinale, doh na tamatang uiliatung gere uoto lotu pon gere uoto kaeke tatanon.

⁸Inggono ke siokor hire tun tar mamang inetelik ke kotpokoso tatanon, kare ualatue tasisina tar la i Jopa.

Na niboriana Pita

⁹Kaelainane na marein uleik tar uagiamehenar marein, gine ra lang uahuhut pe no tamata Konilius tar uan uleik i Jopa, Pita ke kaeta kai taro tar kukunar uma mare la lotu.

¹⁰Inggono ke hagouo tar gog, e marang ein me inet, bo gine puk ra kaleuatoro haraha peigir nieining tar moloi, inggono ke banga tar siokor borborian. ¹¹Inggono ke bang i Heuene ke takapuk, kare bangono tar inete ke la uahiuaha i kot. Inggono ngohina paho mahar gomono uleik, o nilolo ro toueitir gon. ¹²I lolono toro mahar gomono roon, ra moko teil uakapa tunur inetesiner tuar pang toueitir pang kekeis menia ponompe tasir paleng gane tar kot, karo tetiaua pon. ¹³Song ke longoro Pita tar uauanar tamata re kula pe tatanono pare, “Pita! Tentur kai doho uiliatung pou karo ein.”

¹⁴^qDoh Pita ke mene hahaua pare, “Tamata Noman! Inggono ahik nomanampe pahu banot, ge inggo pe halanampe tu ein tagu me inet gere hireigir ualatutur nasir Ju pare, ahik paha delauan.”

¹⁵^rKare kula uagiamehe polukur uauanar tamata pare, “Ahik paho kula me inete geke uadelauanain God pare, ahik paha delauan.”

¹⁶A puhono ke kotpokoso uatouon, doh ahik me sikir manasan, o mahar gomono ka kale kai tapokis taroin i Heuen.

¹⁷Tar binaka re namnamanaehe Pita tar haua tun re hirhireinir borborianon, o tamata geke ualatue meis Kornilius ka me tupara manasa tena uma Saimon, kara me turane toro pirik. ¹⁸Gisina ka dangata taro ge pare uangoul Saimon gera kilain Pita tar umon. ¹⁹Gine re

namnamanaehe pe Pita tar borborian, a Iabena Dedeil ke me kula tatanono pare, “Saimon, a tang touonor tamata ra lang sir teil totomua.”²⁰ Maeit ingga o tentur, doho la uahiuako i kot, ge inggo pe ku ueliuime tasisin.”

²¹ Maeit Pita ke huioko, kare la kula tasisina pare, “A tamatene rung sirioum te inggo puk manasampe, a haua tun rung malarasium?”

²² Kara mene hahauasina pare, “A tang siokor tamat a hangana tang Kornilius, ke ualatue me tamiueim, inggon a tamat uleik tasir tamatang uiliatung, doh inggon a tamata uaia, kare sokoro tun tang God. O bureher Ju ra ueltada tun tatanon. Na angelou God ke kula tatanono tar kila totomua mare ualongoro inggono tar haua ro meneia.”

²³ Song ke kila ualeka Pita tasisina tar um, kare kauেকে tasisina tar boungon.

Pita ke la tena uma Kornilius

Tar uagiamehenar marein Pita ke la tagu tasisin, menia pono tasir gisiameher Jusinir tamatang tagorong manang Jopa ka la tagu pon.²⁴ Tar uatorikinar marein inggono ke la pokos i Sisaria. Doh Kornilius e tur uangoulumpe tasisin. Inggon ke kila toto toso bung tahinalik, doho bung kaluana tun.²⁵ Gine ke lang leke pela Pita ium, Kornilius ke la tantane tatanon, kare hatup uahiuane tar kekena Pita tar ueltada tatanon.²⁶ Bo Pita puk ke kuse uatur tatanon, kare kula pare, “Tentur kai, ge inggo pe a tamata puk pon.”

²⁷ Pita ke mene baka tatanon, kare lekala ium, kare la ueltupar tasir bureher tamata ra uangoul toto pe.²⁸ Inggono ke kula pare tasisin.

“Inggoum mu siokor atempe pare, inggeimir Ju ahik pah mi banoto mi uan-

goul tokaha keip tasir tamata ge ahik paho Ju tagu, doh ahik pono pah mi banoto tar la uahuhut tasisin. Bo God puk ke ualasira totoguo pare, ahik pahu banot u kula me tamata pare, ahik paha delauan.²⁹ Maeit gine ka la kila peio, inggo ahikimpe pah ku kulang de bak. Doh inggo u marang dangata bak, ae maene ko ualatue ingga ra la kilaio?”

³⁰⁻³¹ Doh Kornilius ke mene hahaua pare, “A toueitir marein manasa kura karuh, inggo uangoulumpeane tenag um, karu lotu, kaelain tar siokonor binakene daan, nar tiri kilok namoloi. Ahik me sikir manasan, a tang siokor tamat e hiku teil tar hikhiku abeab, ke me turane i uoum totoguo, kare kula pare, ‘Kornilius, God ke longoro tenang lotua, kare namana huara tun tar haua ko heirheirigia tasir tiome.’³² Ualatue me tamat e la kila tang Saimon Pita. Inggon e uangoul tang Saimon ger tang tuha keip tar kapokousur kau gere uangoul uahuhut i teh.’³³ Temaeit inggo ku uateuele tunuio tar ualatue ra la kilaia, doh inggon auia tun ko la pe me ingga. Gine daan, inggeim siokor gine tar matana God tar ualongoro tar haua ke ualatohoigir Tamata Nomana totomua tar me ueluatata tamiueim.”

³⁴ Song ke uakikilanga Pita tar mene pare, “Inggoene daana song ku ate tun toro mana pare, God ahik pahe malara puk tasir gisiameher tamat,³⁵ bo e siokor malara uakapa tun tasir mamang tamatalik toro mamang matin gera sokoro tang God, kara uia nas niguat.³⁶ Inggoum kung ate manasa toro uelhire geke heirihain God tasir tamatang Israel pare, O Uelhire Uaia tar uelhiarou o la tur tang Iesu Kristo, Iesu Kristo ter Tamata Nomana tasir tamata uakapa tun.³⁷ UInggoum kung ate tar

^s10:26 Apo 14.13-15; UGO 19.10 ^l10:34 Ual 10.17; Roum 2.11

^u10:37 Mat 4.12-17

haua ke kotpokoso toro mamang buturulik i Judia, ke uakikilanga tur pe i Galili, i muduhia ke uelhire tauete pe Jon tasir tamata tar uahuhu. ³⁸vInggoum mu ate tang Iesu ger peng Nasaret geke heirin God tar Iabena Dedeil, kara nitampopokoh. Inggoum mu ate hape ke la hahai peono toro mamang buturulik re guata uai pe, kare uauia tasisis re uangoul teilisir liouana uasa, teene God e uangoul tagu tatanon.”

³⁹“Inggeim teking bangbanga tun tar mamang niguatalik ke guatagiono tonosio pang unair Ju, dohi Jerusalem gisina ka uiliatung pous tatanon, kara tine uakuse tatanono tar korose. ⁴⁰Bo God puk ke uatua tapokis tatanono tar uatouononor marein, kare guata tatanono ka banga baka polukin. ⁴¹⁻⁴²wAhik paho tamata uakapa tun ka bang, bo ke uakalahara pukin tamiueimene ke uamatotois God tar uelhire tauete tono uelhireon. Doh inggeimener niuamatoto teking ein karing inum tagu tatanon. I muduhia ke tua tapokis baka peon, inggono ke ualatoho tamiueim tar uelhire tauete tasir tamata pare, inggono teke uamatotoin God tere turung tamatang kedanga tasir tua doho mat. ⁴³xO mamang propeit ka mene tauete pare, o mana tun, o tamata gera tagorong mana tatanon, God e kuse luar keip tar hangana Iesu teres niguata uasasin.”

⁴⁴yGinampe re menmene haraha pe Pita paar, A Iabena Dedeil ke hiuoha tasisis ra ualongoro tatanon. ⁴⁵Bo o Jusiner tamatang tagorong man gera la tagu teil tang Pita ka siokor lutara tun pare, a Iabena Dedeil ka heir ponoin tasisine ahik paho Ju. ⁴⁶zO Jusine ra la tagu teil tang Pita ka longoro tasisina ra uel-

hire pe tar mamang uelhireng toro giniamehe ro uan, kara uatakai tang God.

⁴⁷Song ke kula Pita pare, “Ahik baka poluk me tamata re banot e tur tane tasisina mata uahuhu keipis tar kodom. Gisinatine ka kale pono tar Iabena Dedeil ngohina tagigeig.”

⁴⁸aMaeit inggono ke ualatoho pare, gisina ra uahuhu keipis tar hangana Iesu Kristo. I muduhia ke kapa baka per uahuhu, song ka dangatasina tang Pita tar uangoul tagu baka poluk tasisina me giniamer marein.

O Mahar 11

**Pita ke tapokis i Jerusalem,
kare la ueluatata tar inete ke
guataig tena uma Kornilius**

11 O aposoul mesir tamatang tagorong mana gera uangoul i Judia ka longoro pare, o tamata ge ahik paho Ju ka tagorong mana pono tena uelhire God.

²⁻³bMaeit gine ke la pe taro Pita i Jerusalem, o tamatang tagorong manasiner nipoko ka nimaliana tatanon, kara kula pare, “Ae maene ko la ingga tenas umasit ahik paho nipok ge ahik paho delauan, karo la ein tagu tasisin?”

⁴Maeit Pita ke uakikilanga tar mene uakalahara tasisina tar mamang inetelik hape ke kotpokoso pe. ⁵cInggono ke hire tasisina pare, “Inggo u uangoul tar uan uleik i Jopa, karu lotu, dohi lolono tar borborian, inggo ku banga tar inete ngohina toro mahar gomono ka uahiuu turuhain i Heuen, o nilolo ro toueitir gon. Doh ko hiuo uahuhut tunuha tar buturu uangoulio. ⁶Inggo ku bangala i lolono tang roon, karu banga tasir ineteng tar

^v10:38 Mat 3.16; Luk 4.17-21

^w10:41-42 Luk 24.42-43; Apo 1.8;17.31; 1Pi 4.5 ^x10:43 Ais 53.5-6; Jer 31.34; Apo 2.38 ^y10:44 Apo 11.15; 15.8 ^z10:46 Apo 2.4; 19.6

^a10:48 Apo 19.5 ^b11:2-3 Apo 10.28; Gal 2.12 ^c11:5 Apo 10.9-48

kotosiner pang toueitir pang kekeis, o in-etesiner roke, o pale mesir tetiuang tar hagar. ⁷ Song ku longoro tar tamata re kula pe totoguo pare, ‘Pita! Tentur kai karo uiliatung pous doho ein.’”

⁸“Karu mene hahaua inggo pare, ‘Ahik nomanamper Tamata Noman! Inggo halanamper tu ein tagu me inete ge ahik paha delauan.’”

⁹“Kare mene uagiamehe tur polukuhar tamat i Heuen pare, ‘Ingga ahik paho kula me inete geke uadelauanain God pare, ahik paha delauan.’ ¹⁰A puhonene ke kotpokoso uatouon, song ka reih kai tapokis poluk taroin roon i Heuen. ¹¹Tar siokonor binakon, a tang touonor tamat geke ualatue turumeis i Sisaria ka me pokoso manasa tar umene ru uangoulio. ¹²A Iabena Dedeil ke me hire totoguo pare, ahik pahu namnamana uaburburehe tar la tagu tasisin. Maeit a tang tonomor tamatang tagorong man ka la tagu totoguo, karing la leka tena uma Kornilius. ¹³Inggono ke ueluatata tamiueim hape ke kotpokoso to per angelou tatanon iuma tena um, kare kula pare, ‘Ualatue me tamat e la kila tang Saimon gera kilain Pita. ¹⁴^dInggon e turung ueliuime toro Uelhire Uaia totomua, doh toro uelhire roon, God e turung uelkarus totomua meniampe tasir tamatasine ra uangoul tenang uma.’”

¹⁵e“Ginempe ku uakikilanga pe inggo tar men, a Iabena Dedeil ke la uaponaha tasisin ngohina ke la uoum peha tagigeig tar uakikilangan. ¹⁶^fSong ku la namana huario tar haua ke kulainir Tamata Noman, ke kula pe pare, Jon ke uahuhu keip tar kodom, bo inggoum mu turung uahuhu keip tar Iabena Dedeil. ¹⁷Maeit geke heir God tasisina tar inete ke heir

ponoin tagigeigene ri tagorong mana pe tang Iesu Kristo ger Tamata Noman, doh inggo te hape ru baka pe maru banot u tur tane tena kalekinale God?”

¹⁸^gTar binaka ka longorosina tar puhon, gisin ahik baka poluk menas puhung men. Gisina ka uatakai tang God, kara kula pare, “Auia, God song ke uamaluana pono tasir tamata ge ahik paho Ju ka uapalih, kara kale pono tar nitua.”

O Uelhire Uaia ko lame i Antiok

¹⁹^hO tamatang tagorong mana geke ualualo uelpakah tar niguata uasa ka guataig tasisin i muduhia tar binaka ka uiliatung pous baka pein Stiben, ka lala uatuk i Ponisia, Saiprus, dohi Antiok, ra hirhire teil pono toro Uelhire Uaia tasisin pukur Ju. ²⁰Bo o gisiamehe puk tasisinar tamatang tagorong manasine, o tamatang Saiprus me i Sairini teka uolo la ponoko i Antiok, gisina ka la menmene pono tasir tamata ge ahik paho Ju. Gisina ka ueluatatais toro Uelhire Uaia tang Iesu ger Tamata Noman. ²¹Doha Tamata Noman e poul tun tasisit ka ueliu tauete toro Uelhire Uaia, maeit o bureher tamata ge ahik paho Ju ka tagorong mana pon, kara uakeluk tar Tamata Noman.

²²ⁱO tamatang tagorong manasine i Jerusalem, ka me ate tar puhonene, maeit ka ueliuila tang Banabas i Antiok. ²³Tar binaka ke la pokoso inggon, kare la banga re guata uaia pe God tasir tamat, kare hape re poul pe tasisin, inggono ke uaha tun. Inggono ke mene uapopokoho tasisina tar uakeluk dede tar Tamata Noman. ²⁴Banabas a tamata uaia tun, kare uoun tun tar Iabena Dedeil, doha nitagorong man, maeit o

^d11:14 Apo 16.31 ^e11:15 Apo 2.4 ^f11:16 Apo 1.5

^g11:18 Apo 13.48; 14.27 ^h11:19 Apo 8.1-4 ⁱ11:22 Apo 4.36

bureher tamata ka tagorong mana tar Tamata Noman.

²⁵⁻²⁶^jSong ke la Banabas i Tasius tar la sir tang Sol, doh tar binaka ke la tupara inggono tatanon, inggono ke keipila tatanon i Antiok. Maeit toro udeil ro krismas, Banabas me Sol kura uangoul tokaha keip tasir tamatang tagorong man, kaura mene ualasira tasir bureher tamat. Gane i Antiok, o tamatang tagorong man teka kila uakik-ilangais pare, o tamatang uakuakeluk tang Kristo.

²⁷Tar binakon, o gisiamerher propeit ka laha i Antiok, ra la turuha i Jerusalem. ²⁸^kA tang sioko tasisin a hangana tang Agabus, ke tentur kai, kare mene keip tena nitampopokohor Iabena Dedeil. Inggono ke uatagin pare, “A gogo uleik e turung kotpokoso toro mamang buturulikane tar koto uakap.”

(A puhonene ke kotpokoso tar binaka re toia Klodius ger Sisa i Roum.)

²⁹Maeit o tamatang tagorong mana ka longoro pe tar puhon, ka ueluauiiae tar heir uabanoto tar nipoul hape ra bantoto pe tasir tamatang tagorong mana gera uangoul i Judia. ³⁰¹A puhono gisina ka guat, kara heir tagu tas Banabas me Sol tenas inet, e la tasir mamahoholik i Jerusalem.

O Mahar 12

Herot ke uiliatung pous tang Jems, kare uamoko tang Pita tar umang uih

12 Tar siokonor binakon, Herot ke kale tasir gisiamerher tamatang tagorong mana tar marang guata uasa tasisin. ²Inggono ke ualatoho tena tamata ke la uiliatung pous keip toro baenat tang Jems ge tahina Jon. ³Tar binaka ke bangono pare, o tamata uleiking tasir Ju ka uah, inggono ke namana pono

tar kula mo tamatang uiliatung tar kuse pono tang Pita mare tung pous pono inggono tatanon. A puhonene ke kotpokoso to tar binaka ka uahainir mareining toro ein ra kilain, A Bereit Ahik me Is.

⁴I muduhia ka kuse baka pein Pita, Herot ke uamoko tatanon iuma tar karabus, kare uamoko tasir tantang toueitir tamatang uiliatung tar tur kaeuke tatanon. Herot ke namana pare, e turung kedanga to tatanono gete karuh bakar mareining Leke liu ro Mat.

⁵Maeit Pita ka uoho uanonoin tar karabus, bosir tamatang tagorong mana puk ka lotu uapopokoho dede tang God ra namana pe tatanon.

Na anggelou God ke poul tang Pita tar hiliu tar umang uih

⁶Na bounguhia tar mareinene ka uamatotoin pare, ra kedanga toin Pita, Pita e hohou i uantinanina tar toking tamatang uiliatung, a toking niuelole tokaha keip tang Pita menia tar toking tamatang tur kaeuk ura turumpe toro pирpirik. ⁷Ahik me sikir manas, na anggelour Tamata Nomana ke pokos, doha luh ke balo uakalaharane tar tine tar karabus. Inggono ke haka tar kapkapana Pita, tar ualagura tatanon, kare kula pare, “Tentur uateuel!” Doha tiein ke lup liu tar limana Pita. ⁸Song ke kula polukur anggelou pare, “Hiku tenang gomon, doh nang pang su.” Doh Pita ke guata sirampe, kare kula polukur anggelou tatanono pare, “Gomo uaiuia tonongo mahar gomonong kokop, karo uakelukume totoquo.”

⁹Pita ke uakeluk tauete tatanonane tar karabus, inggon e tele tun hape re la kotpokoso per puhene re guatainir anggelou, inggon e namana pare, e borborian.

¹⁰^mRasina kura siauala tar uakikilang-anar tamatang tur kauek, song a tang giameh, kaura lala toro pirpirik haen gera lilihain tar uan uleik. Roono ko takapuka katong, kaura la tauete rasin. Rasina kura lihila tar siokor buturung la, ahik me sikir manasan a anggelou ke la hiliu tang Pita.

¹¹ Song ke naman manate Pita, kare kula pare, “Inggo song ku ate toro mana pare, Godompe ke heiriha tena anggelou tar me kale liu tur totoguo tang Herot, doh tar ninamana ka namanagir Ju ra turung guataig totoguo.”

¹² Tar binaka ke la namnaman ate pe inggon, inggono ke langua tena uma Maria ge tinana Jon-Mak, a umono tera uoto uangoulur bureher tamat kara siokor lotu tokah. ¹³ Pita ke la gotoro toro piriking kalahar, doha tang siokor kuahang kalekinale a hangana tang Roda ke la uelhirime tar me bang.

¹⁴ Gine ke la longor paroko pe inggono tar uauana Pita, inggono ke uaha tun, kare ualo tapokisila. Inggon ahik mate puka baka toro pirpirik, bo ke hire ualeik puk manasala pare, “Pita gila toro pirpirik!”

¹⁵ Kara kular tamata pare, tatanon, “Ingga ko popouluana?”

Bo gine puka ke peng tampopkoho pe inggono pare, inggono Pita nomanampe, gisina ka kulangua pare, “Ingga deh ko banga puk tena anggelouon.”

¹⁶ Bo Pita puk ke gotoro dedempe toro pirpirik, doh tar binak ka pukasina toro pirpirik, kara banga tatanon, gisina ka lutarang toboul tun. ¹⁷ Pita ke sarang pau tasisin mara hik pah ra men, kare ueluatatangua tasisina hape ke ueliu tauete per Tamata Nomana tatanono tar karabus. Doh inggono ke kula poluk pare, “Hire tang Jems mesir gisiamehero bung tahigigeig tar hauene ke kot-

pokos.” Song ke hiliuono ke la pe tar giameher uan.

¹⁸ⁿ Tar uagiamehenar marein, o tamatang uiliatung ka ueltoboul uasa tun hape maene ke taboin Pita. ¹⁹ I muduhia Herot ke ualatoho pare, ra sirin Pita toro mamang buturulik, bo ahik puk pah ka tuparain. Maeit Herot ke heheke tasir tamatang tur kauek, song ke ualatoho pare, gisina ra uiliatung pousis.

Herot ke mat

I muduhia Herot ke hiliu i Judia, kare la uangoul bak i Sisaria tar sikinar binak.

²⁰ Inggono ke menmeneng nimaliana keip tasir tamatang Tair mesir Saidon tar puhung barah, maeit gisina ka la toto tar uamatoto tonosio tamat tar la mene tang Herot. Gisina ka uamamahoul baka tang Blastus ge na tamata uleikir toia mare poul tasisina tar la uakotpokoso me nipepe tokahang uelhiarou, teeit nasi toking pang uanisina ra uoto kale tur teres niein i Judia.

²¹ Maeit Herot ke uamatoto tar siokor marein, doh tar mareinion, inggono ke hiku tena hikhikung toianiner i ranar bulauan, kare tabila tono tabtabil, kare menmene tasir tamat. ²² O tamata ka siokor uaha tena menemene inggon, kara siokor mene uauleik pare, “Gine deh re menmene ter uauana god, ahik paha tamata puk.”

²³ Ahik me sikir manasan, na anggelou God ke uamomouh uasa tun tatanon, doho sosoilik ka ein tar tukununon, kare mat, teene inggon ahik mate uatakai tar hangana God.

²⁴ PBo o tamatang tagorong mana puk ka la hire tauete toro Uelhire Uaia, song o burehe dedemper tamata ka longor, kara tagorong mana toro uelhire gero la tur tang God.

²⁵qTar binaka kura uakapa Banabas me Sol tenasira kalekinale, rasina kura hiliu i Jerusalem kaura la i Antiok, rasin kura kila tagu pono tang Jon ger hangan giamehe tang Mak.

O Mahar 13

A Iabena Dedeil, doho tamatang tagorong mana ka ualatie tas Banabas me Sol tar kalekinale

13O toto tamatang tagorong man i Antiok ra uangoul tagu ponor gisiamerher propeit mesir gisiamerher tang ualafir, doha hangasisina teenine. Banabas, Simeon ger hangan giamehe tang Niga, doh Lusius ger peng tar uan i Sairini, kare Manain gekura siokor uleik tokaha me Herot ger toia, doha uadouhin Sol. ²rGisina ka siokor lotu tokah, kara ueil, doha Iabena Dedeil ke kula pare, “Inggoum mu uatur sioko manasampe tas Banabas me Sol tar kalekinaleene ku kila uelhirio tasrasin.” ³sMaet gine ka ueil pelasin, gisina ka uaponala tar limas tasrasina song ka lotu, song ka kula tasrasin ura la.

Banabas me Sol kura uelhire tauete toro Uelhire Uaia i Saiprus

⁴A Iabena Dedeil ke keip uahiuako tas Banabas me Sol i Selusia te kura la panete to rasina tar parau, kaura la tar tor i Saiprus. ⁵tTar binaka kura la pokoso rasin i Salamis, rasina kura la mene tauete tono uelhire Godane iuma tonosio umang lotur Ju. Jon-Mak e la tagu teilimpe tasrasina tar poul tasrasin.

⁶Rasina kura la uakapa toro mamang buturulikane tar tor, kaura la pokos i Pafos. Doh tar uanion, rasina kura la uelutpara tar tang siokor tamat a tang bilih, kara propeit bohoboh, inggon a

hangana tang Bar-Iesu. ⁷Inggon e uoto kalekinale pono tang Sergius Paulus ger tang kaueke tar toron. Inggono Sergius a tamatang ate tun, inggono ke ualatie ra la kilais Banabas me Sol, teene inggono ke marang ualongoro tena uelhire God. ⁸Bo Bar-Iesu puk e marang tur tane tas Banabas me Sol, (toro uelhireng Grik inggono ra kilain Elimas) inggon e menene tane tar tamata uleik mare ahik pahe tagorong mana tang Iesu. ⁹Doh Sol ger hangan giamehe tang Poul ger uoun tun tar Iabena Dedeil ke uakeis uanono tang Elimas, kare kula pare, ¹⁰“Inggoda deha tuna Satan, kara uelmatan tar inete ger man! Inggoda ko uoun tar boh, kara tang tutlour keip tar niguata uasa. Inggoda deho uoto uapalih tar inete uaia ger nang God mare la kotpokoso pare, ahik paha man. ¹¹uGine daan a limana God e turung uaelmahing totomua. Inggoda o turung kut, o turung uangoul puk ahik paho turung banga tagu tar balbalanar pisara tar barah sikoror binak.”

Ahik me sikir manasan, inggono ke kut manas ngohina pahe uangoul me kitupun, kare araha ueltebeir tar sir me tamat tar kuse tar limanon mare ualafira tar lel. ¹²Tar binaka ke banga per tamata uleik tar hauene ke kotpokos, inggono ke tagorong man, teene inggono ke kasiana tun na ninamana ke longoro pe tono uelhire God.

Banabas me Sol kura la mene tauete toro Uelhire Uaia tar pang uan i Pisidia

¹³vPoul mes gisis ra la tagu teil tatanon ka hiliu i Pafos, gisina ka panete tar parau ka lala tar uan uleik i Perga gere moko tar pang uan i Pampilia teke la hiliu to Jon-Mak tasisina ke tapokis pe i Jerusalem. ¹⁴Gisina ka la tur i Perga,

q12:25 Apo 11.29-30; 15.37 r13:2 Apo 9.15 s13:3 Apo 6.6

t13:5 Apo 12.12; 15.39 u13:11 Apo 9.8 v13:13 Apo 15.38

kara lala tar uan uleik i Antiok gere moko tar pang uan i Pisidia. Tar Mareining Pepe Uah, gisina ka la leke tar umang lotur nasir Ju, kara la tabil. ¹⁵I muduhia ka mene uakeluk baka peig na ualutut Moses, kare nas bolobolor propeit, o mamahoholiking tar umang lotu ka heiriha toro uelhire tas Poul o kula pare, “Ro bung tahig, gete kaein me tang sioko tamiuoum re marang mene baka tamiueim me meneng poul tar uatampopokoho tamiueim, auia e menempe.”

¹⁶Maeit Poul ke tentur kai, kare hue kai tar limana mara ualongorosin, song ke kulono pare, “Ir tamatang Israel, doh inggoumene ahik paho Ju tagu rung uoto lotu tang God mu ualongoro to-toguo! ¹⁷^wNagi God inggeig ke uamatoto toso bung tamagigeig, doh inggono ke uabour uaburehentiehe tasisin, tar binaka ra uangoulusin i Isip. Inggono ke poul keip tasisina tena nitampopokoh uleik, ke keip tauete tur pe tasisina tar pang uanion.

¹⁸^xKe la uahuhutin toro toueitir hangaul ro krismas ka lih pelasina toro butur padenen, doh God ke uatut re banga pe tenas niguatasin, ahik teilimpesina pah ka uakeluk tun tena nimalaron. ¹⁹^yInggono ke mamantouo toro mouit ro matina tamat gera uangoul i Kenan, kare heir tenas kotosina tosno tamata pare, a nos. ²⁰^zDoha puhono ke kalein toro 450 ro krismas.”

“I muduhia tar puhonene, God ke umatoto tasir tamatang kedang tar uoum keip tosno tamaton, ke la tuka pe tena binaka Samuel ger propeit. ²¹^aTar binaka re uoum keip haraha pe Samuel tasisin, gisina ka malahir menasi toia,

doh God ke heir tasisina tang Sol ger tuna Kis gere la tur toro matina tang Benjamin. Inggono ke uoum keip tasisina toro toueit ro hangaul ro krismas.”

²²^b“I muduhia God ke kale liu tang Sol, kare uatoia palih tang Debit. Inggono ke uahire tanik a tamata haua Debit, kare kula pare, ‘Inggono ku tu-para tang Debit ger tuna Jesi pare, teku malarai. Inggono tere turung guata tar inete geru malaragio e guaton.’”

²³^c“Maeit God ke guata sira hope ke ualapagah pe sioun, ke kula pe pare, toso bubunguna Debit, God e turung uamatoto tar tang siokor tamat gere turung uelkarus tagigeig. Inggono ke ueliuiha tatanon i Israel. Doha tamatono te Iesu. ²⁴^dTar binaka halana Iesu te uakeken tena kalekinale, Jon ger tang uahuhu ke uelhire tauete tasir tamata uakapa tun i Israel tar uapalih tar niuangoul, kara uahuhuis. ²⁵^eGine re langlang uakapa manasa pe Jon tena kalekinale, inggono song ke kula pare, ‘Inggoum mu namana pare, inggo mai? Inggono ahik pah ter tamata geke ualapagahain God tar heiriha. Inggono e turung lampeha i muduhia, inggo ahik pono paha tamata uaia maru banoto tar kale liu tar bungbunguna na suon.’”

²⁶Poul ke mene tumana poluk pare, “Ro uanotougenger peng Israel gesir bubunguna Abraham, doh inggoumene ahik paho Ju, bo mu sokoro puk tang God, no Uelhire Uaiang uelkarus God tasir tamat ka heirihain tagigeig. ²⁷O tamatang Jerusalem mesnosio tamat uleik ahik tun pah ka bang paroko tang Iesu pare, te Kristo. Bo gine puk ka uiliatung pous pesina tatanon, gisina ka uaelmatout sira tun tenas men-

^w13:17 KT 1.7; 6.6; 12.51 ^x13:18 Aha 14.34; Ual 1.31-32

^y13:19 Ual 7.1; Jos 14.1 ^z13:20 Ked 2.16; 1Sa 3.20

^a13:21 1Sa 8.5,19; 10.20-24 ^b13:22 1Sa 13.14; 16.12; Ker 89.20

^c13:23 2Sa 7.12-16 ^d13:24 Mat 3.1-2 ^e13:25 Jon 1.20,27

emener propeit gera uoto mene uakeluk dedeig tar mamang Mareiniliking Pepe Uah. ^{28f}Gisina ahik teilimpe pah ka uel-tupar me tengkana tun mara uiliatung pououion, gisina ka petutupe tang Pailat tar uiliatung pousumpe tatanon.”

^{29g}“Tar binaka ka guata uakeluk uakapa tun pesina tar hauar nibolo uatuha tatanon, gisina ka kale uahiua tur tatanono tar korose, kara la keu tatanon. ³⁰Bo God puk ke uatua tapokis tatanon. ^{31h}O tamatasine gesir tang uakuakeluk, ka la tagu sioun tatanono ke la tur pe tar pang uan i Galili, ke la pe tar uan uleik i Jerusalem. Gisina teka banga tar matas tatanon, ke tua tapokis pe, kara lala tagu teil tatanono tar bureher marein, kara hirhire teil tosnogio tamateig.”

³²“Inggeim mi hirhire teil tamiuoum toro Uelhire Uaia, tar haua ke ualapagahain God toso bung tamagigeig pare, e turung guat, doh inggono ke guata manasa tagigeigene ro bung tuisin. ³³Inggono ke guata tar puhono ke uatua tapokis pe tang Iesu. E uakeluk sirampe ka bolo peion i lolono toro uatorikina ro bolobolong ker. Inggono ka boloin pare, ‘Inggono ter tuguo, daan inggo te Tamoumua manas.’” *Ker 2.7*

³⁴“God ke uatua tapokis tatanon, doh inggon ahik pahe turung mate baka poluk mare la beng, e uakeluk sira ke mene pe God pare,

‘Inggono u turung guata uaia tamiuoum no go tamat ngohina sira ku ualapagah keip pe tang Debit pare, u turung guat.’” *Aisaia 55.3*

³⁵“Maeit Debit ke mene poluk i lolono toro giamehe ro bolobolo pare, ‘Inggono ahik paho turung uamaluanan tang tamata dedeil e turung beng to tar keu.’” *Ker 16.10*

³⁶“Ge tar binaka pe, kare tua Debit, inggono ke guata tun tar inete ke malahirig God tatanon e guat. I muduhia inggono song ke mat, kara keu tagumpein toso bung taman, kare bengar tukunun. ³⁷Bor tamatene ke uatua tapokisin God ahik pah ke beng to tagur tukununa tar keu.”

³⁸“Temaait inggoum ro bung tahig, inggo u malahir pare, pakung ateoum pare, te Iesu puk manas, song re banoto God e kuse luara liu teremi niguata uasaoum. ³⁹ⁱNa ualatut Moses ahik pah tere banot e kuse luar teremi niguata uasaoum, bo tar tagorong mana puk manasampe tang Iesu, song ra kuse luara liuig remi niguata uasaoum. ⁴⁰Temaait inggoum mu kaueke katongosioum mara hik me inetenine ka menezinggir propeit re kotpokoso tamiuoum, ⁴¹ge a propeit pe ke kula pare, ‘Ualongor! Inggoumener tang tagorong boholik mu turung namanaehe baka teil,

karung mat.

Inggoum mu turung lutar, Inggono u turung guata me inete tamiuoum tar binaka rung uangoul harah. Me tamat e turung uakalaharampe tamiuoum tar haua ru turung guataio, bo inggoum puk ahik dedempe pah mu turung tagorong man.’” *Habakuk 1.5*

⁴²Gine ura marang hiliu manasa pe Poul me Banabas tar umang lotu, o tamata ka kula poluk tasrasina tar me turung mene ualasira poluk tar puhpuhuna tasisina tar uagiamehenar Mareining Pepe Uah.

⁴³Tar binaka ka kular tamata uleiking tar umang lotu tasir tamata tar ueluelteageih, o bureher Ju mesir tamatasine ahik paho Ju tagu geke uapalih pukis pare, o Ju, kara lotu dede pono tang

^f13:28 Mat 27.22-23 ^g13:29 Mat 27.59-60 ^h13:31 Apo 1.3,8

ⁱ13:39 Roum 10.4

God, ka uakeluk tas Poul me Banabas. Rasina kura mene uapoul poluk tasisina tar tagorong mana dedempe, ge God pe e malauelhir tasisin, kare kuse luara teres niguata uasasin.

⁴⁴ Maeit tar uagiamehenar Mareining Pepe Uah, o tamata uakapa tunane tar uan uleik ka sokor la toto tar me ualongoro tono uelhirer Tamata Noman. ⁴⁵ Gine ka banga per tamata uleiking tasir Ju ka burehentiehe per tamat, gisina ka gehe tun, kara menmeneng uel-sigala tar haua ke menmeneig Poul.

⁴⁶ jBo Poul me Banabas puk ahik pah kura sokoro tasisin, rasina kura mene hahaua tasisina pare, “God ke ualatoho tamiraeim tar uahire uakikilanga tamiu-oum tar nitua gere moko dede. Doh gine rung de pe inggoum tar kale tar nituaon, raeim mira turung uahire puk manasa tasir tamata ge ahik paho Ju tagu. ⁴⁷ Ge a Tamata Nomana pe ke ualatoho tami-raeim pare, ‘Inggo ku uamatoto totomua pare, tero luh gero uakubara tasir tamatasis ahik paho Ju tagu maro banota o keip tena niuelkarus God tar koto uakap.’” *Aisaia 49.6*

⁴⁸ Tar binak ka longoror tamatasis ahik paho Ju tagu tar puhonene, gisina ka siokor uah, kara siokor uatakai tono uelhirer Tamata Noman. Doho tamata geke uamatotois God tar kale tar nitua gere moko dede, ka siokor tagorong man.

⁴⁹ No uelhirer Tamata Nomana ko la ueltebeir tar pang uanion. ⁵⁰ Bo o Ju puk ka menmeneng ualualahua tasir kuaha tohangas gera lotu dede mesir tamata uleik tar uan uleikiono tar tur tane tas Banabas me Sol. Maeit gisitir tamata ge ahik paho Ju ka petutupe tasir gisiameher tamat tar guata uasa tas Poul me Ba-

nabas, kara uelueltula liu tasrasina tenas uan.

⁵¹ kMaeit rasina kura titire liu tar uoung tar koto tara kekeis tar ualasira pare, gisin ahik mata guata uaia tas-rasin. Rasina kura hiliu, kaura lingua i Aikoniam.

⁵² Bo a Iabena Dedeil puk ke uoung tun tasir tamatang Antiokosine ka tagorong mana tang Iesu, doh gisina ka uaha tun.

O Mahar 14

Poul me Banabas kura la mene tauete to toro Uelhire Uaia i Aikoniam

14 Tar uan uleik i Aikoniam, Poul me Banabas kura guata sira poluk ngohina kura guata uoum pe i Antiok, rasina kura la leke poluk tenas umang lotur Ju. Tar umang lotuon, rasina kura mene uaia tun, maeit o bureher Ju, doh gisis ahik paho Ju tagu ka siokor tagorong mana tono uelhirer Tamata Noman. ² Bo o gisiamehe puk ge ahik mata tagorong mana tagu, gisina ka uatentur tar balasir tamatasine ahik paho Ju tagu, maeit gisina ka uapalih teres ninaman, kare la tokouasanguais tasir tamatang tagorong man.

³ lMaeit Poul me Banabas kura uan-goul bakampe tar bureher marein, doh ura ongolo tun ura mene ualasira pe tono uelhirer Tamata Noman, temaene a Tamata Nomana ke poul tun tasrasina tar uatouo tar bureher nitou, kara ni-paroko uleik mara ater tamata pare, a haua ka menmeneig tang Iesu a man. ⁴ Bo o tamata pukane tar uan uleik ahik pah ra uauia tokah, kara la uelpaka-hangua tar torikir pain, o gisiamehe ka uakeluk tasir Ju, doho gisiamehe ka uakeluk tasrasin ger toking aposoul. ⁵ mKaro gisiameher Ju mesir gisiame-

j13:46 Apo 3.26; 18.6 k13:51 Mat 10.14; Apo 18.6

l14:3 Mak 16.20; Hib 2.4 m14:5 Apo 14.19

her tamatasine ahik paho Ju tagu meni-
ampe tosnosio tamata uleik ka uelhote
uanomo tar guata uasa tas Poul me Ban-
abas, kara marang bakbak pous tasrasin
maura mat. ⁶Bo rasina puk kura ate
kout, kaura ualonguala tar toking uan
uleiking Likonia gera kilais i Listra me
i Debe meniampe toro ginamehe ro uan
gere moko uahuhut tar toking uan uleik
rasin. ⁷Doh toro uaninin, rasina kura la
mene tauete dedempe toro Uelhire Uaia.

Poul me Banabas kura la uangoul i Listra me i Derbe

⁸Tar uan uleik i Listra, Poul ke mene
ualasira to tar siokor butur tasir tamata
toro Uelhire Uaia, doh tar uan uleikion,
a tansiokor tamat a mate turur toking
pang kekena tar binak ka pohoin, kara
hik pahe banotong la katong.

⁹⁻¹⁰Inggon e ualongoro uaia tun re
menmene pe Poul. Doh Poul ke banga
uanono tatanon, kare banga pare, ing-
gonor mater keken e tagorong mana
pare, e banoto ra uauaiain, kare kulangua
tatanono pare, "Tahig! Tentur kai." Doh
gine ke mene pe Poul tatanono paar, ing-
gono ke siaka kai, kare uakekena tar la.

¹¹ⁿGine ka banga per tamata tar haua
ke guatain Poul, gisina ka siokor mene
ualeik pare, toro uelhireng Likonia, "O
godo ka la uahuuaha tagigeig ngohina
tasir tamat!"

¹²Gisina ka uelkilangua tang Banabas
pare, nu Sus, doh Poul ka uelkilain tang
Hermes, teene inggon a tamatang men.
¹³Na umang lotu Sus ge nas godosin e
tokohia i kalahara tar uan uleik, doha
patereng tar umang lotuono ke keip-
imeane toro pirpirikinar uan uleik tasir
kau makana mer kalanguh nirokoso tar
me guata tokaha keip tasir tamata me
uahung e la tas Poul me Banabas.

¹⁴Bo tar binaka puk kura longoro
rasina tar puhon, rasina kura kihkih
tenasira hikhiku, kaura ualo tauetela
tasir tamat, kaura mene ualeik pare,
¹⁵^o"Ro bung kalomiraeim! Ae maene
rung guata inggoum pare? Raeim deha
toking tamata puk pon, ngohina tamiu-
oum. Raeim kira ueliu pukume toro Uel-
hire Uaia, tar lang hire teil tamiuoum
tar hiliu tasir godo bohoboh, ge gisina
pe ahik pah ra banotong poul tamiu-
oum, karung lotu tang God ger tua geke
tou i Heuene, dohi kot, kare touo pono
tar teh meniampe tasir mamang inetelik
gera mok i teh, doh tar kot. ¹⁶^pSioun ing-
gono ke uamaluana tasir tamata uakapa
ra uakeluk teres nimalar, teene inggeig
ahik pah ki ate tatanon. ¹⁷^qBo Inggono
puk ke ualairain tar bureher hagar. Ing-
gono ke ualairain pare, ter God uaia,
re heir tur peha i Heuene tar huan, kare
uakotpokoso pono tar niein. Inggono ke
heir tar bureher niein tagigeig, kare uau-
oun tagigeig tar niuah." ¹⁸Gine kura
mene pe Poul me Banabas tar meneme-
nenin, rasina ke puluhe uadeil pukis tar
tur tane tasisina mata heir tar uahung
tasrasin.

¹⁹^rBo i muduhia puk, o gisiameher
Jung Antiok me i Aikoniam ka lame i
Listra, kara me hounhoun tasir tamata
pare, Poul me Banabas ura bohboho puk
tasisin. Maeit gisina ka bakbak pousun-
gua tang Poul tar palau. Doh gisina
ka namana pare, ke maton, maeit ka
reih tauetela i kalahara tatanono tar uan
uleik. ²⁰Bo o tamatang tagorong mana
puk ka me tur uiloho tatanon, song ke
tentur kaion, kare la tapokis polukula
iuma tar uan uleik. Tar uagiamehenar
marein, rasina me Banabas kura hiliu i
Listra, kaura la i Debe.

ⁿ14:11 Apo 28.6 ^o14:15 Ker 146.6; Apo 10.26 ^p14:16 Apo 17.30

^q14:17 Jer 5.24 ^r14:19 Apo 17.13; 2Ko 11.25

²¹I Debe rasina kura la mene ualasira pono toro Uelhire Uaia, doho bureher tamata ka tagorong man. ²²^sRasina song kura tapokis polukula i Listra me i Ikoniam dohi Antiok tar mene uatampopokoho tasir tamatang tagorong mana tar tur uapopokoho teres nitagorong mana tang Iesu. Rasina kura hire pono tasisina pare, “Inggeig i turung kale tar bureher niduh, song ri banoto tar la leke tena Nitoia God.”

²³Doh rasina kura uamatoto ueleheiringua tasisina tasir mamahoholiking tasir mamang toto tamataliking lotu. Rasina kura lotu, kaura ueil tar uamoko tasisinar mamahoholik tena nikaueke Iesu mara tampopokohosin ge rasina pe ura tagorong mana pare, gisina tera turung uoum keip tasir tamatang tagorong man.

Poul me Banabas kura tapokisila i Antiok tar pang uan i Siria

²⁴I muduhia rasina kura lih tapokisila i Pisidia, kaura la pokos i Pampilia. ²⁵Gine kura mene ualasira baka pe rasina toro Uelhire Uaia i Pega, rasina song kura lihiko i Atalia. ²⁶^tTar uan i Atalia te kura panete tur rasina tar parau tar la tapokis i Antiok gekura la tur rasina sioun, doho tamatang tagorong man tar uaniono teka lotu tang God tar kaueke tasrasin, ge gisina pe teka ualatue tasrasina tar la uelhire tauete toro Uelhire Uaia. Doh rasina kura la uakapa manasa tar kalekinaleon.

²⁷^uTar binaka kura me pokoso Poul me Banabas i Antiok, rasina kura kila toto tasir tamatang lotu. Rasina kura ueluatata tasisina hape ke uamalagir pe God tasisin ahik paho Ju tagu, maene ka tagorong mana pon. ²⁸Rasina kura uan-

goul tagu tasisinar tamatang tagorong mana tar puhung barah.

O Mahar 15

A tabila tokaha tasir toto tamatang lotu ke kotpokos i Jerusalem

15^vI muduhia o gisiameher tamatang Judia ka laha i Antiok, kara me mene ualasira tasir tamatang tagorong man, kara kula pare, “Ge ahikioum pah ra pokoigir kapokoumiu ngohina re kulkula pe na ualatut Moses, God ahik pahe banotong uelkarus tamiuoum.”

²^wDoh Poul me Banabas ahik tun pah kura uaha tar niualasiranin, kaura uelperere keip tasisin. Maeit o toto tamatang lotu ka uauia tar ueliuila tasrasina mesir gisiameher tamatang tagorong man i Jerusalem mara la uelkodoh baka tar puhono mesir aposoul, doho mamahoholik.

³O toto tamatang lotu ka poul tasisina mara la, doh gisina ka lihila tar pang uan i Ponisia me i Samaria, kara uahuahire teilila hape ka tagorong mana per tamata ge ahik paho Ju tagu tang God. Gine ka longoro per tamatang tagorong man, gisina ka siokor uaha tun.

⁴^xTar binak ka la pokososin i Jerusalem, o aposoul mesir mamahoholik, doho toto tamatang lotu ka uaha uangoul tun tasisin, maeit gisina ka ueluatata tasisina hape ke guata pe God tasir tamata ka la ueliu pelasin toro Uelhire Uaia.

⁵Bo o gisiameher tamatang tagorong mana tang Iesu gesir Parisi ka tentur kai, kara kula pare, “O tamata ge ahik paho Ju tagu paka poka bakaisir kapokous, kara uakeluk pono tena ualatut Moses.”

^s14:22 Apo 15.32; 1Te 3.3 ^t14:26 Apo 13.1-2 ^u14:27 Apo 15.4,12

^v15:1 Gal 5.2 ^w15:2 Gal 2.1 ^x15:4 Apo 14.27

⁶Maeit o aposoul mesir mamahoholik ka tabila tokaha tar uakodkodoho tar puhon. ⁷I muduhia ke la per bureher menemen, Pita ke tentur kai, kare mene uakodkodoho tasisina pare, “Ro bung tahig, inggoum kung ate manasa pare, ahik pah sioununtieh God ke uamatoto totoguo i uantinanina tamiuoum, tar la mene ualasira toro Uelhire Uaia tasir tamata ge ahik paho Ju tagu, doh gisina ka tagorong man.

⁸God puk manasa tere ate tar kolousur tamat, inggono teke malahir tasisin, maeit ke heiriha tasisina tar Iabena Dedeil ngohina ke heir uoum pe tagigeig. ⁹Inggon ahik pahe banga sira pare, tasisin o gisiamehe sioko tagigeig. Gine ka tagorong mana pesin, inggono ke uadedeil manasa tar koloususin. ¹⁰^aAe maeit rung marang uedangoum tang God, rung marang uamoko pe tar niduh uleik tasir tamatasine ahik paho Ju tagu? Inggeigene meso bung tamagig ahik pono pah ki banoto tar uangoul keip tar niduhon. ¹¹^bGe inggeig pe paki siokor tagorong mana pare, Iesu ger Tamata Noman e turung siokor uelkarus keip tena nimalar, kare na niueldolomo tasir tamata uakap gera tagorong mana tatanon.”

¹²Song ka siokor tabtabila sikorosin, kara ualongoro tas Poul me Banabas kura ueluatata pe tasisin, hape ke poul pe God tasrasin, maeit kura uatouo tar bureher nitouo tasir tamatasis ahik paho Ju tagu.

¹³^cTar binaka kura ueluatata uakapa pe rasin, Jems ke mene uauleik pare, “Ro bung tahig, mu ualongoro totoguo, ¹⁴Saimon Pita ke ueluatata manasa tagigeig hape ke ualasira pe God tena nimalara tasir tamatasis ahik paho Ju tagu. Doh inggono ter uakikilanganar bi-

naka ke uamatoto inggono tosono tamat i uantinanina tasir tamatasis ahik paho Ju tagu. ¹⁵Doh nosio uelhirer propeit teko uahire ponompe tar puhono ka bolo pein pare,

¹⁶I muduhia tar inetenine, inggo u turung tapokisiha.

Na Nitoia Debit ke ngohina tar taluhene ke tador,

bo inggo puk u me turung tuha uaia tapokis tena nitoiaon.

¹⁷Doho tamata gera uangoul harah, gisina ra turung hingo me nipoul tar Tamata Noman

menia pono tasir tamatasis ahik paho Ju tagu geku uamatotosio pare, nogo tamat.

A puhonene teke meneinir Tamata Noman.

¹⁸Doh gininanine ka ueliate turig sioun.” *Aisaia 45.21; Amos 9.11-12*

¹⁹“Temaieit inggo u namana sira pare, inggeig paka hik pah uamoko me niduh tang mai ge ahik paha Ju tagu, bo ke tagorong mana puk tang God. ²⁰^dBo inggeig paki bolo puk mo bolobolo tasisin, tar uahire tasisina tar toub tar niein ge ahik paha delauan ger niheiring uahung tasir godo bohoboh, kara hik pah ra ura ueltebeir, doh ahik pono pah ra ein tasir inetesisir tua gesir nilolo pousur uekuekous, kara toubungua pono tar deuating. ²¹Ge na ualatut pe Moses ka mene ualasira turig sioun toro mamang uan uleik uakap, kara mene uakeluk ponoigane tonosio mamang umang lotur Ju tar mamang Mareinilikng Pepe Uah.”

Nosio bolobolor mamahoholik ko la tasir tamatasis ahik paho Ju tagu

²²Song ka uamatotor aposoul mesir mamahoholik, doho toto tamatang lotu

^y15:7 Apo 10.1-43 ^z15:8 Apo 10.44; 11.15 ^a15:10 Mat 11.30; Gal 3.10

^b15:11 Gal 2.16; Epe 2.5-8 ^c15:13 Gal 2.9 ^d15:20 KT 34.15-17; NKP 17.10-16

tonosio tamata katong menia tas Poul me Banabas tar la i Antiok. Gisina ka uamatoto tang Judas gera kilain tang Basabas, doh Sailas, rasina ter toking mamahoholik tasir tamatang tagorong man. ²³ Gisina teka keip toro bolobol, o nibolo pare, “O bolobolo rone o la tur tasir aposoul mesir mamahoholik geso bung tahimiuoum. Roon o la tamiuoumur tamata ge ahik paho Ju tagu, bo kung tagorong mana puk, inggoumene rung uangoul i Antiok, Siria dohi Silisia.

A marein uaia tun tamiuoum.

²⁴ Inggeim king me longoro pare, o gisiamehe tamiueim ka lame tamiuoum, kara me mene tar poko tar kapakon, doh inggoum ahik pah kung hagouo uaia. Bo inggeim puk ahik pah teking kula tasisin. ²⁵ Maeit inggeim king ueluauiar tar uamatoto mo tamat tar lame tamiuoum, gisina ra la keip menia ponome tas Poul me Banabas ger toking kalomiuem tun. ²⁶ Rasina ter toking tamata gekura heir tun tara tukunus tar mene tauete tar hangana Iesu Kristo ger Tamata Noman.

²⁷ Temaeit inggeim king ueliuila tas Judas me Sailas maura me hire katongo tun tar hauene king menmeneieim toro bolobol. ²⁸ ^eA labena Dedeil teke heir tar ninamana tamiueim pare, inggoum paka hik pah ra heir baka polukusiuom me giniamerher niduh e uanoto baka poluk tar inetenine ka bolo uahiuai.

²⁹ Inggoum mu toub me niein ge me niheir pare, a uahung tasir godo bohoboh, karung toub pono tar deuating, doh tasir inete gesir tua gesir nilolo pousur uekuekous, karung uakenua pono tar ura ueltebeir. Inggoum mu turung uangoul uaia tun getung uakeluk tun tar puhpuhunin. A uia tun manasa bidouh!”

³⁰ Maeit gisina ka hiliu i Jerusalem, kara la i Antiok. Gisina ka la kila toto

tasir toto tamatang lotu, song ka heir tasisina toro bolobol. ³¹ Gine ka menene uakeluk pesina toro bolobol, o tamatasine ahik paho Ju tagu ka siokor uaha tun ka longoro pe tar menemeneng uatampopokoho tasisin.

³² Judas me Sailas kura menmene uaburehe sikoro tasisina tar uatampopokoho tasisin, teene rasin a toking propeit pon. ³³⁻³⁴ I muduhia ke karuh baka per giniamerher marein, o tamatang tagorong man i Antiok, song ka kula tas Judas me Sailas tar tapokis, rasina ka kulais ura tapokis keip toro hiarou o la tur tasisina tar tapokisila tas ge ka ueliuime tasrasin.

³⁵ Bo Poul puk me Banabas kura uangoul dedempe i Antiok mesir gisiameher tamatang tagorong mana tar mene ualafir, kaura uelhire tauete baka poluk tono uelhirer Tamata Noman.

Poul me Banabas kura la uelpakah

³⁶ Tar siokor binak, Poul ke kula tang Banabas pare, “Raeig deh ira la tapokis uelhir baka poluk toro uan uleik gekira mene ualafir uoumig tono Uelhire Uafiar Tamata Noman, maira bangahe menia pono raeig tasir tamatang tagorong mana hape kara uangoul pe.” ³⁷ ^fDoh Banabas ke malahir pare Jon-Mak pake la tagu tasrasin, ³⁸ ^gbo Poul puk ke kula pare, “Inggono deh ahik paha ninamana uaia tar kila tagu tatanon, ge inggono pe ke hiliu to baka uoum i Pampilia tagiraeig, Inggon ahik pah ke kalekinale ualuluhara tagu.”

³⁹ Maeit rasina kura ueluelperere tar puhon, kaura la uelpakahingua. Banabas ke kila tagumpe tang Jon-Mak, rasina kura la panete tar parau, kaura la i Saiprus. ⁴⁰ Bo Poul puk teke kila tang Sailas, kaura la. O tamatang tagorong manang Antiok ka lotu, kara uamoko

tasrasina tena nikaueker Tamata Noman. ⁴¹ Song ke lihila Poul i Siria, dohi Silisia, kare mene uatampopokoho teres nitagorong manar toto tamatang lotu.

O Mahar 16

Timoti ke la tagu tas Poul me Sailas

16^hPoul ke lame i Debe, song i Listra, doh tar uanion e uan-goulur tang siokor tamat a hangana tang Timoti. Timoti tang tinan a peng Ju, kara kuahang tagorong man, bo tamana pukion a peng Grik. ²ⁱO bureher tamatang tagorong man i Ikoniam me i Listra ra uoto ueltada tun tatanon, kara uoto meneng uairana tun tatanon. ³Poul ke malahir tatanono pare, e la tagu tatanon, maeit ke poko tar kapokona inggon, teene o bureher Ju ra uangoul tar buturuon, doh ra ueliate pare, inggono tang taman a peng Grik. ^{4j}Gine ka la hahai pesina toro uaninin, gisina ka ueliu hahai tar ninamana geke uauia toinir aposoul mesir mamahoholik i Jerusalem mara uakelukur tamat. ⁵Maeit o toto tamatang lotu ka tampopokoho tun tar tagorong man, kara burburehe uain tar mamang marein.

Poul ke banga tar tamatang Masedonia i lolono tar borborian

^{6k}Poul, doh Sailas kura lihila i uantinin tar pang uan i Prigia, dohi Galeisia, rasin ke tur taneisir Iabena Dedeil matura uelhire tauete toro Uelhire Uaia tar pang uan i Esia. ⁷Tar binak ka lala uahuhut pesina tar pang uan i Misia, gisina ka marang uedanga pono tar lala tar pang uan i Bitinia, bo na Iabena puk Iesu ke tur tane tasisina tar la. ⁸Maeit gisina ka lih uagel i Misia, kara lih uahiuako i Troas. ⁹Doh naboung tar

binakon, Poul ke banga tar borboriana tar tamatang Masedonia e uaduadangata pare tatanon, “Ingga o lame i Masedonia, karo me poul tamiueim.”

¹⁰I muduhia ke banga baka pe Poul tar borborianon, inggeim king kaleuatoro puk manasampe, karing la puk manas i Masedonia. Inggeim king naman manate puk manasampe pare, God ke kula tamiueim tar la uelhire tauete toro Uelhire Uaia tasisin.

Lidia ke uapalih tena niguat

¹¹Inggeim king panete tar parau, king hiliu i Troas, karing ualo uakodkodohola i Samotres, doh tar uagiamehenar marein, inggeim king la pokos i Neapolis. ¹²King hiliueim tar uanion, king lih i kot, karing la pokosongua i Pili-pai, a uan geke uatenturinin tamatang Roum, doh tere keiping uan uleik tar pang uan i Masedonia. Doh inggeim king uangoul sikoro baka tar uaniono tar uagiamehenar marein.

¹³Doh tar Mareining Pepe Uah inggeim king tauetela toro pirikinar uan uleik, karing lihila tar siokor kodom, doha buturuon ra uoto la totoinir Ju tar lotu tokah. Inggeim king la tabila uahiu, karing uakekena tar mene tasir kuaha gera uangoul totong sioun tar buturuon. ¹⁴A tang siokor kuaha tasisin, a hangana tang Lidia, inggon e uoto uabulaua tar gomono tabeliah a peng Taiataira, doh inggon e uoto lotu pono tang God. A Tamata Nomana ke uatakapuka toro balanono mare uakelukiono tena menemene Poul. ¹⁵Tar binaka ka uahuhuiono meso bubungunasis ra uangoul tagu tatanon, inggono ke dangatangua tamiueim tar lala tena umon. Inggono ke kula pare tamiueim, “Ge kung banga siroum

^h16:1 Apo 14.6; 2Ti 1.5 ⁱ16:2 Pil 2.19-22 ^j16:4 Apo 15.23-29

^k16:6 Apo 18.23

totoguo pare, a kuahang tagorong mana tar Tamata Noman, inggoum mu me uangoul tagu totoguo tenag um.” Maeit inggono ke petutupe tun tamiueim.

**Poul me Sailas ka
uamokois tar karabus**

¹⁶Maeit a siokor binak inggeim mi lang la tar buturung lotu, doha tang siokor kuaha ger karabus ke ueltupar tamiueim. Inggonor kuah e uangoul teilinir liouan a giamehe siok, maeit inggon e banoto tar hire tauete tar inete ge halana te kotpokos. Inggono ra uoto bulauain tar bureher mani e laig tasir tamatasit ra kauেকে tatanon.

¹⁷¹A kuahono ke uakeluk tas Poul, kare menmene uauleik teil pare, “O tamatasine tosno tamatang kalekinaler God ger i ranantieh. Gisina tera uahuahire teil tamiuoum tar lelung uakeluk mare kale tapokis God tamiuoum!” ¹⁸A kuahono ke guata paara tar bureher marein, doh Poul ke manguha tar longoro re guata peon, maeit ke tur banga uelhir tatanon, kare kula tar liouan a giamehe sioko pare, “Tar hangana Iesu Kristo, inggo u ualatoho totomua o hiliu tatanon!” Maeit tar binakampeon a liouana giamehe sioko ke hiliu tatanon.

¹⁹Tar binaka ka bangar tamatasit ra kauেকে tar kuahono tar puhon, gisina ka ate pare, ahik baka poluk menas hagaring kale mani. Maeit ka kuse tas Poul me Sailas, kara reihila tasrasina tar buturung uabulbulaua to ium tasir tamata uleik tar uan uleik. ²⁰^mGisina ka ueliuila tasrasina tasir tamatang kedangang Roum, kara la hire pare, “A toking tamata rasine a toking peng Ju, doh rasin ura uakotpokoso tar nitabila uasaane tenagi uan uleikieig.

²¹Rasin ura ualasira tar niguata giameher siok ahik paha kodkodoho keip tenagi niguateigane i Roum.”

²²⁻²³ⁿMaeit o bureher tamata ka uanoto tasisinasit ra kauেকে tar kuaha tar marang guata uasa tas Poul me Sailas. Doha tamatang kedanga ka ualatohongua pare, ra kihkihig nasira gomono rasin, kara halhaluhis, song ra uamokois tar karabus, kara ualatohoinir tamatang tur kauেকে tar karabus tar kauেকে uaia tun tasrasin. ²⁴Gine ke longoro pe inggono ka ualatoho pein paar, inggono ke ueliuiguala tas Poul me Sailas tar karabus gere mok i uantinanina tun tasrasin, kare taoun tane tara kekeis rasina tar pang douk.

²⁵Kaelainane nar uantinaninar boung, Poul me Sailas kura lotu, kaura kerekere tar kerekere tang God, kara ualongoromper gisiamer tamatasit karabus tasrasin.

²⁶Ahik me sikir manasan, kare pokosor siokor nun uleik geke uagune uakapangua pe tar umang karabus. Doha pirpirikinar umang karabus ke siokor takapuk, kara mamang tieinilik geka uih taneig tasir karabus ke siokor takaluak. ²⁷^oGiner tamatang tur kauেকে ke me gulete pon, doh gine ke me banga peono tar pirpirik uakapa tun re takapuka pe, inggono ke laruh tauete puk manasampe tono baenat, kare marang uiliatung pous katongoin, teene inggon e namana pare, ka siokor ualo taueter tamatasiner karabus. ²⁸Bo Poul puk ke mene ualeikila pare, “Ahik paho uauelmahing katongoia! Inggeim deh ginempe ring siokor uangoul!”

²⁹Song ke kila uauleikir tamatang tur kauেকে tar umang karabus me tamat e keipime mo lam, doh inggono ke poroporo uasa tun tar nisokor, kare

¹16:17 Mak 1.24 ^m16:20 Mak 13.9 ⁿ16:22-23 2Ko 11.25; 1Te 2.2
^o16:27 Apo 12.18-19

ualo ualekela ium, kare la baka uahiuonane i uahuhut tas Poul me Sailas. ³⁰PInggono song ke ueliu tauete tasrasina, song ke dangata tasrasina pare, “Tang torik! Hape ru guata pe inggo mara uelkarusio?”

³¹Kaura mene hahaua rasina pare, “Tagorong mana tang Iesu ger Tamata Noman mare uelkarusiono totomua meniampe tasisis ra uangoul tagu tenang uma.”

³²Maeit Poul me Sailas song kura mene tauete tono uelhirer Tamata Noman tatanon meniampe tasir tamatisis ra uangoul tagu tena umon. ³³Tar bounгон inggonor tamatang tur kaueke tasir karabus ke kila tas Poul me Sailas, kare la guata uai teresira lotu rasin. Ahik me sikir manasan inggono meso bubungunasis ra uangoul tagu tatanono ka siokor uahuhuis. ³⁴Inggono ke ueliuila tena uma tasrasin, kare la ualaein. Doh inggono meso bubunguna ka siokor uaha ka tagorong mana pe tang God.

³⁵Gine ke la marein manasa peon, o tamatang kedanga ka ualatoho tosno-sio tamatang uiliatung tar la ualatoho tar tamatang tur kaueke tasir karabus, kara la kula pare, “Uamaluana tar toking tamata rasis geura tauet.”

³⁶Maeit a tamatang tur kaueke tasir karabus ke la hire tang Poul pare, “O tang kedanga ka ualatoho pare, ra uataueteis raoum me Sailas. Gine daan raoum mura la keip tar niuah.”

³⁷Bo Poul puk ke kula tasir tamatang uiliatung pare, “Gisina ka halhaluh to tamiraeim tar matasir manai, doh ahik pah ka kedanga to bakais raeim me tabila tokah, kara uamoko tamiraeim tar karabus, ge raeim pe a toking peng gane pon i Roum. Doh gine daan, ae maene ra marang ueluelu uanomo pukusina tamiraeim? Ahik nomanampe! Uamalu-

anampe tasisina gera la katongome, kara me keip tauete katongo tamiraeim.”

³⁸Gisitir tamatang uiliatung ka la uahire tasir tang kedang, tar binaka ka la longorosina pare, Poul me Sailas a toking peng Roum pon, gisina ka siokor lutara tun, kara sokor. ³⁹Maeit gisina ka lame, kara me hire tas Poul me Sailas pare, gisina ra ueldolomo tun ka guata pe pare, kara ueliu tauetengua tasrasin, kara kula pare, tasrasin ura hiliu tar uanuleik.

⁴⁰Maeit gine kura tauete tur pe rasina tar karabus, rasina kura langua tena uma Lidia te kura la ueltupara to rasina tasir gisiamer tamatang tagorong man kaura mene uapopokoho tasisin. I muduhia song kura hiliu rasin.

O Mahar 17

Poul me Sailas kura la uangoul i Tesalonaika

17 Poul me Sailas kura lihila i Amopolis me i Apolonia, kaura la pokosola i Tesalonaika gere toko nasi umang lotur Ju. ²⁻³Poul ke la lekela ium ngohina re uoto guatang sioun pe, dohi lolono tar touonor uik tar mamang Mareining Pepe Uah, inggon ke mene tar uabang manate pare, tang Kristo ke malahir pe God tatanon e turung mat, kare tua tapokis, kare kula pono pare, “Iesuene ru hirhireio tamiuoum inggono ter Kristo.”

⁴O gisiamer Ju ka tagorong man, kara uanotongua tas Poul me Sailas menia tasir bureher tamat ge ahik paho Ju gera uoto lotu tang God, doho burehe ponor kuahasitir tohangas, ⁵bo o gisiamer mamahoholiking tasir Ju puk ka gehe uasa tun, maeit ka kila toto tasir tamata uasaane tar buturung uabulbulau. Gisina ka menmene uahoun tasisin,

kara uakotpokosongua tar nimalianane tar uan uleik. Gisina ka ualola tena uma Jeson, kara Poulaka toro pirik tar sir tas Poul me Sailas mara ueliu tauetelaisane tar matasir manai.

⁶Bo gine puk ka la bataba pesina tas-rasin, gisina ka reihila tang Jeson mesir gisiameher tamatang tagorong manane tasir tamata uleiking tar uan uleik, kara kulkula uauleik teil pare, “O tamata geka uakotpokoso tar niguata uasaane tar koto uakapa tun teesine manasa ka me pokoso daan.⁷ ⁸Doh Jeson teke uauia tasisina tar me uangoul tena umon. Gisina ra guata tar niguat ahik pahe uakeluk tena ualatut Sisa, gisina ra kula pare, a tang giameher toia te Iesu.”

⁸Tar binaka ka longorosina pare, o tamata uakapa tun mesir tamata uleiking tar uan uleik ka siokor ualagoreih keip tar nimaliana uleik. ⁹Gisina song ka kulangua tang Jeson meso bung kaluana tar bulaua tar mani tar puhon. Song ka uamaluamampeis ka la.

Poul me Sailas kura la tar uan uleik i Beria

¹⁰Na boungunar binakon, o tamatang tagorong mana ka ueliuila tas Poul me Sailas i Beria. Gine kura la pokoso pe rasin, rasina kura lala poluk tenasi umang lotur Ju.

¹¹Doho Jung tar uan uleikion o tamata uaiantiehe poluk tasir Jung Tesalonaika, teene gisina ka marang siokor ualongoro tun tar haua ke menmeneig Poul, kara marang timtiman uaia tun tono uelhire God tar mamang mareinilik mara ate tun ge para mana re mene tauete pe Poul. ¹²O bureher Ju ka tagorong man menia ponompe tasir gisiameher kuahasitir tohngas ge ahik paho Ju, doho burehe ponor bulout.

¹³Bo tar binaka puk ka longoror Jung Tesalonaika pare, Poul ke la mene tauete poluk tono Uelhire God i Beria, gisina ka la ponola, kara la hounhoun tasisin, kara uaelueltebeir teres ninamanasin.

¹⁴O tamatang tagorong mana ka ueliu uateuele tunuko tang Poul i teh mare la panete me parau, bo Sailas puk me Timoti kura uangoul uoum i Beria. ¹⁵O tamata geka ueltutueko tang Poul ka la ueliu tang Poul i Atens, gisina ka tapokis keip toro mene tas Sailas me Timoti pare, pakura uakeluk uateuele tunuko tang Poul.

Poul ke mene tauete toro Uelhire Uaia i Atens

¹⁶Gine re pepe uangoul pe Poul tas Timoti me Sailas, inggon ahik pah ke hagouo uaia re banga to pe tar bureher kaesa ter godo bohobohane tar uan uleik i Atens.

¹⁷^rMaeit inggono ke la tenasi umang lotur Ju, kare la uelhalat keip tasir Ju, karo tamatang Grik gera uoto lotu tang God, kare mene to pono tasir tamata uel-tebeirane tar buturung uabulaua to tar inet. ¹⁸Doho pang tamatang iate ra kilais o Epikurian mesir Stoik ka uelperere keip tang Poul. O gisiamehe ka dangata pare, “A haua tun re marang uedangaigir uoto menene? Inggono deh here marang meneng uelturut poluk mo gisiamehe siokor god.” Gisina ra mene paar, teene Poul e menmene ualasira toro Uelhire Uaia tang Iesu, doh tar nitua tapokis.

¹⁹Maeit gisina ka kila tatanon, kara ueliuila tatanono tar butur ra tabila tokahar tamatang kedang gera kilais o Areopagus, kara la kula to tar matasisina pare, “Inggeim deh mi marang ate uaia pono tar hauene ro menmene ualasira teiliala? ²⁰Inggono deh gine ro ueliuime tar ginamehe siokor ninamana teremi nilon-

goreim, doh inggeim mi marang ate uaia hape tun re kulkula penin.”

²¹Doho bureheisir tamatang Atens mesir tamatang toro giniamer pang uan gera uangoul tar uan uleikion ka uakapa tenas binaka tar uangoul puk ra ualongoro pe, kara ueluatata tar timuhur ninamananin.

²²Maeit Poul ke tentur kaiane i uantinana tenas tabila tokahar Areopagus, kare kula pare, “Ir Tamatang Atens, inggo u banga tamiuoum pare, mu tampopokoho tun tenami niguata tar lotu.

²³Gine ku latlateil uiloho pe inggo, inggo ku bangbanga hamas tun tar inetenine rung uoto lotugioum. Inggo ku la ueltupara pono toro oltang uahung e moko teilir nibolobol a nibolo pare, ‘O nanar god geri teleieig.’ Inggoum mu lotu tar god ge ahik pah mu ateioum, doh inggono ter Godene ru hirhireio tamiuoum!”

²⁴s“Inggono ter God geke tuha tar koto uakap meniampe tar mamang inetelikinine re moko tar kot, inggono ter Godong Heuen, doh gane i kot, doh inggon ahik pahe uangoul toro umang lotuniner nituhang tamat. ²⁵Inggon ahik pahe katupa tagu me siokor inet, doh ahik pono pahe malahir tagu me nipoulung tagigeig, ge inggono pe tere heir tasir tamata uakapa tun tar nitua, a romene ri ungaieig, kara mamang inetelik. ²⁶O mamang tamatalikisine ra uangoul tar koto ke uabour turusiono tar tang sioko pukur tamat. Godompe ke umatoto tenas binakasina, doh ia ra uangoul.”

²⁷u“God ke guata pare, mara sirir tamata uakapa tun tatanon ge para tu-para tatanon, bo inggono puk ahikimpe pahe uairehe tagigeigir tang siok tang siok. ²⁸Ge maene pe ri uangoulieig o

tua o tamat te inggon. Ngohina sira ka kula pe nomio tamatang tut kerekere inggoum pare, ‘Inggeig teso bung tunon.’ ²⁹vTemaieit i uangoul sireig pare, o bung tuna God, bo inggeig puk ahik pahi namana sira pare, tang God here ngohinar kaesa ka tuha keipig tar gol mer silva ue a palau.”

³⁰“Sioun o tamat ahik pah ra ate uaia tang God, doh inggono ke bangang duk puk tar puhon. Bo gine daana puk God e malahir tasir tamata uakapa tunane tar koto tar uapalih tenas niguat. ³¹wGe inggono pe ke umatoto manasa tar binaka re turung kedanga keip tar nikodkodoho tasir mamang tamatalikane tar koto uakap. Inggono ke umatoto sioun tun tar tamata gere turung uoum keip tar mareining kedangon. God ke uabang manate tar puhono tasir mamang tamatalik ke kale tapokis tur pe tatanono toro mat.”

³²Tar binak ka longoro pesina pare, Iesu ka uatua tapokisin, o gisiamehe tasisina ka uanio. Bo o gisiamehe puk tasisina ka kula pare, “Inggeim mi marang ualongoro baka poluk tar puhon.”

³³Maeit Poul ke hiliu tasisin. ³⁴Bo o gisiamehe puk tasisina ka tagorong man, kara la tagungua tang Poul. Dionisius ter tang sioko pono tasisin ka tagorong man, inggono ter tang sioko tasir Areopagus, kara tang sioko ponor kuah a hangana tang Damaris menia pono tasir gisiameh.

O Mahar 18

**Poul ke la mene ualasira
toro Uelhire Uaia i Korin**

18 I muduhia Poul ke hiliu i Atens, kare la tar uan uleik i Korin.

^s17:24 1To 8.27; Apo 7.48 ^t17:25 Ker 50.12 ^u17:27 Ker 145.18; Jer 23.23

^v17:29 Ais 40.18-20; 44.10-17; Apo 19.26 ^w17:31 Ker 96.13

^{2x}Tar uan uleikion inggono ke la uel-tupar tar tang siokor peng Ju a hangana tang Akuila, inggono ka poho toin i Pontus. Bo Akuila puk me Prisila, ge na kuahon, kura nihing hiliu tur pukume i Itali, teene Sisa Klodius ke heir tauete tar ualatoho pare, o Ju uakapa tun ra siokor hiliu tar uan uleik i Roum. ^{3y}Doh Poul a tang bung tar taluh, temaene ke lang bangono tasrasin, ge rasina pe a toking tang bung pono toro taluh. Inggono ke la uangoul tagu, kare kalekinale uelk-out tasrasin. ⁴Bo tar mamang Mareining Pepe Uah inggon e menmene tasir Ju mesir tamat ge ahik paho Juane iuma tar umang lotu, kare uelhalata keip pono tasisin mara tagorong mana tang Iesu Kristo.

^{5z}Tar binaka kura la turume Sailas me Timoti i Masedonia, Poul song ahik tun pahe uasaluhe tar mene ualasira toro Uelhire Uaia, inggon e mene tar mamang binakalik tar uakalahara tasir Ju pare, Iesu te Kristo. ^{6a}Bo tar binaka puk ahikir Ju pah ka tagorong man, kara menmene uasa tang Poul, inggono ke titire liu toro uou tena gomom, kare kula pare tasisin, “Ge ahikioum pah mu uapalih tenami niguat, a nisa e moko manasampe tamiuoum katong! Inngo ku uedanga manasa tar haua ka uamatatoin totoguo u guat. Gine daan inggo u la uelhir puk manasa tasir tamatisah ahik paho Ju tagu.”

⁷Poul ke hiliu tenasi umang lotur Ju, kare lala tena uma Titius Jastus, inggon ahik paha Ju, dohe uoto lotu pono tang God, doh na umon e tokouahuhut tenasi umang lotur Ju.

⁸Doh Krispus ger tamata uleik tenas umang lotur Ju. Inggono meso bubungunasis ra uangoul tena umon ka siokor tagorong mana tun tar Tamata Noman menia ponompe tasir bureher tamatang

Korin geke longoro tang Poul, ka siokor tagorong mana pon, kara siokor uahuhuis.

⁹Tar siokor boung, a Tamata Nomana ke menmene tang Poul i lolono tar borborian. Inggono ke kula pare, “Innga ahik paho sokor. O mene dedempe, ahik paho uangoul bukuk. ^{10b}Gane ahik me tamata re banot e uiliatung totomua, ge inggo pe u uangoul tagu totomua, doh inggo nogo burehe ponor tamata ra uangoulane tar uan uleik.”

¹¹Maeit Poul ke uangoul tar uan uleikiono toro sioko ro krismas, kara tonomo baka polukur bialok re mene ualasira pe tasir tamata tonu uelhire God.

¹²Bo tar binaka puk re tamata uleik Galio tar pang uan i Akaia, O Ju uakapang Korin ka siokor uauia tar nimaliana tang Poul, kara ueliuila tatanono tar umang kedang, kara la kula pare, ¹³“A tamatene e menmene uamoho teil tasir tamata tar lelung lotu tang God, a hagarinin ahik pahe uakeluk tenas ualatur Ju.”

¹⁴Ginempere re marang mene hahaua pe Poul, Galio ke kula tasir Ju pare, “Inngo u banotong ualongoro tamiuoum getung menemene inggoum me puh ka tokolekinane tar ualaturung Roum ue me niguata uasantiehe tun ka guatain. ¹⁵Bo gine rung memene puk peoum tar puhpuhung dangat, kara niualasira mer hangan, inggoum mu la uelkodkodoho keip katongosioum tenami niualatur. Inngo ahik pahu banoto teru tamatang kedanga tar niguatanin.”

¹⁶Maeit inggono ke ualatoho tasisina ra keip liuisane tar umang kedang. ¹⁷Gisina song ka tur kauiurila tang Sostenes ger tamata uleik tar umang lotu, kara uiliatung to tatanon i uoum

^x18:2 Roum 16.3 ^y18:3 Apo 20.34 ^z18:5 Apo 17.14-15

^a18:6 Apo 13.46,51; 20.26 ^b18:10 Jos 1.9; Ais 41.10

tar buturung kedang. Bo Galio puk ahik dedempe mate ualasira me haua pake guatain.

Poul ke la tapokisila i Antiok tar pang uan i Siria

¹⁸cPoul ke uangoul tar bureher marein i Korin. Inggono ke marang la, maeit inggono ke hiliu tasir tamatang lotu, inggono ke lako tar uan uleik i Senkria, kare la panete tar parau tar la tar pang uan i Siria. Prisila me Akuila te kura la tagu tatanon. Bo tar binaka puk, kare uangoul harahon i Senkria inggono ke kout tar ulun, teene inggono ke guata keip tang God tar ualapagah. ¹⁹Gisina ka la pokos i Epeses, tar uaniono teke la hiliu to Poul tas Prisila me Akuila. Inggono ke la leke tar umang lotu, kare la mene uakalahara uaia tasir Ju tang Iesu. ²⁰Tar binak ka kulasina tatanon e uangoul tagu baka poluk tasisin, inggono ke de. ²¹Bo gine puk ke marang hiliu peono tasisin, inggono ke ualapagah katongoin tasisina pare, “Gete malahir God inggo u turung tapokis polukume.”

Song ke panete tar parau tar hiliu i Epeses. ²²Tar binaka ke la pokosono tar uan uleik i Sisaria gere moko tar pang uan i Siria, Poul ke hiuo tar parau. Inggono ke la taro i Jerusalem, kare la uamarein uleik tasir tamatang lotu, song ke lala uahuako i Antiok.

²³I muduhia ke uangoul baka peon i Antiok, Poul song ke la tur tar uanion, kare lala hahaila toro mamang uaning toro mamang buturulik tar pang uan i Galesia me i Prigia, tar mene uatampopokoho tasir mamang tamatalik tar tagorong mana dedempe tang Iesu.

Apolos ke mene tauete toro Uelhire Uaia i Epeses

²⁴A tang siokor tamatang Ju, a hangana tang Apolos, a peng tar uan uleik i Aleksandria, ke lame i Epeses. Inggon a tamatang ate, dohe ate uaia tun tono uelhire God. ²⁵Inggon a niualasira uaia tun tena hagarir Tamata Noman, dohe uoto uaha tun tar binaka re mene tauet, kare mene ualasira toro mana tang Iesu. Bo a hagarir uahuhu puk re atein Apolos ter uahuhu geke ualasin Jon ger tang uahuhu. ²⁶Inggon ahik tun pahe sokoro ke uakikilanga pe tar menane tar umang lotu, doh gine kura longoro pe Prisila me Akuila tatanon, rasina kura kilala tatanono tenasira um, kaura poul tatanono mare ate uakodkodoho tena hagarir Tamata Noman.

²⁷Tar binaka ke marang la Apolos tar pang uan i Akaia, o tamatang lotu ka mene uapopokoho tatanon, kara bolo ponola tasir tamatang lotung tar uanion tar turung kauেকে uaia tatanon. Gine ke la pokoso pe inggon, inggono ke la uatampopokoho tasir tamatang lotusis ka tagorong mana keip puk tena nipoulur Tamata Noman.

²⁸dInggono ke uelperere keip tasir Ju i uoum tar matasir manai tar mene ualasira tur tunane toro bolobol tono uelhire God pare, Iesu te Kristo.

O Mahar 19

Poul ke mene tauete toro Uelhire Uaia i Epeses

19^eTar binaka re uangoul Apolos i Korin, Poul ke lala toro lenenit re moko toro beluna ro mokong tar pang uan song ke la pokos i Epeses. Tar uan uleikion inggono ke la ueltupar tasir

tamatang tagorong man, ^{2f}kare la dangata tasisina pare, “Inggoum kung kale pono tar Iabena Dedeil tar binaka kung tagorong mana?”

Gisina ka mene hahaua pare, “Ahik! Inggeim deh ahik uadeilimpe pah king ate tagu me Iabena Dedeil.”

³Maeit Poul ke dangata tasisina pare, “Bo hingiar niuahuhu kung kaleioum?” Kara hiresina pare, “Tero uahuhu geke ualasin Jon.”

^{4g}Kare kula Poul tasisina pare, “Na niuahuhu Jon a uahuhung uapalih tar niguat. Inggono ke kula tasir tamata tar tagorong mana tar tamata gere turung uakelukuha tatanon, inggono te Iesu.”

⁵Gine ka longoro pesina tar puhon, gisina ka siokor uahuhu kepinguais tar hangana Iesu ger Tamata Noman. ^{6h}Tar binaka ke uaponala Poul tar limana tasisin, a Iabena Dedeil ke laha tasisin, doh gisina ka uelhirengua tar ginameher uelhireng toro ginamehe ro uan, kara uelhire sira tasir propeit. ⁷Gisin o siokor hangaul, doha tang torikir bulout uakapangua.

⁸Poul ke la leke tenas umang lotur Ju, doh ahik tun pahe meneng sokoro re mene tauete pe toro Uelhire Uaia ke la matotoin tar touonor bialok, inggono ke uelhalata keip tasir tamat tar uakalahara tena Nitioia God tasisinar Ju.

⁹Bo o burehe pukur Ju ka mahang longor. Gisina ka de mata tagorong man, kara menmene uasa pono tena hagarir Tamata Nomanane i uoum tasir bureher tamat. Maeit Poul ke hiliu tasisin. Inggono ke kila liu tasir tamatang tagorong man, kara la toto tar uelhalata tokahane iuma tena umang kale niate Tiranus tar mamang mareinilik. ¹⁰Inggon e uoto guata paar, doh ke la banoto manasain toro torik ro krismas. Inggono ke guata

pare, mara siokor longoror Ju mesir tamatis ahik paho Ju gera uangoul tar pang uanionene i Esia tono uelhirer Tamata Noman.

O Bung tuna Sikeva ka marang uedanga tar geil liu tasir liouana uasa tasir tamat

¹¹ⁱGod ke guata tang Poul mare guata tar bureher nitouo popokoh. ^{12j}Maeit a mahar gomono gera uarautig tang Poul ka keip ponoig tar uauiia keip tasir momouh, doh res matesin ke la uia, karo liouana uasa ka hiliu pono tasisin ra uangoul teilis.

¹³Bo o gisiamehe pukur Ju ra lalateil pono tar geil liu pono tasir liouana uasaane tasir tamat. Gisina ka uedanga tar mene keip pono tar hangana Iesu ger Tamata Noman tasisin nihikung liouan. Gisina ra uoto kula pare, “Tar hangana Iesu gere uoto mene tauetein Poul, inggo u ualatoho totomua tar hiliu.” ¹⁴Gisis ra uoto guata pagiar tesir mouitir bung tuna Sikeva ger patere uleiking tasir Ju. ¹⁵Bo a siokor binaka puk a liouana uasa ke mene hahaua tasisina pare, “Inggono u ate tang Iesu, karu ate pono tang Poul, bo inggoumene te maisioum?”

¹⁶Maeit a tamatoneit re uangoul teilinir liouana uasa ke pehuara ke uiliatung pe tasisin. Inggono ke uiliatung uasa tun tasisin, gisina ka ueldedeuating uakap, kara ualo tauete turane ium o palapal.

^{17k}Tar binak ka ueliater Ju mesir tamata ge ahik paho Juisine ra uangoul i Epeses tar puhon, a nisokoro uleik tun ke kotpokoso tasisin, kara siokor uatakai tun tar hangana Iesu ger Tamata Noman. ¹⁸O burehe tasisin ka tagorong mana song ka la katongome, kara me siokor uatauete tenas niguata uasa. ¹⁹O

^f19:2 Apo 8.16 ^g19:4 Mat 3.11 ^h19:6 Apo 8.17; 10.44,46

ⁱ19:11 Apo 14.3 ^j19:12 Apo 5.15 ^k19:17 Apo 5.11

gisiamhe geke uoto tuha bilih bak, ka la toto pon, kara siokor ualuh to tar matasir manai tenas bolobolong tuha bilih. A bolobolonin ke la matotoigir bulauana tar 50,000ir silva mani. ²⁰ Maeit no uelhirer Tamata Noman ko kalekinale uapopokohane tasir tamat, kara ueliu ueltebeirinane toro mamang butur.

²¹ I muduhia ke kotpokoso baka per puhpuhunin, Poul ke namana tar la i Jerusalem, ke naman e lihila tar pang uan i Masedonia me i Akaia. Inggono ke kula pare, "I muduhia getu la pokoso baka inggo i Jerusalem, inggo u la turung bangahe pon i Roum."

²² Inggono ke ualatuengua tas Timoti me Irastus ge na toking tamatang poulion tar la i Masedonia, bo inggono ke uangoul sikoro baka tar pang uan i Esia.

O tamatang tuha tasir godoboboho ka nimaliana tang Poul

²³ Tar binakon o gisiamheer tamatane i Epeses ke tokouasais tasisine ra uakeluk tar niualasira gere laig tang Iesu. ²⁴ A tansiokor tamat a hangana tang Demetrius, inggon e uoto tuha keip tar silva toro uumalik ngohina tena umang lotu Artemis. Doh gisis ra uoto kalekinale tatanono ra uoto kale tun tar mani uleik. ²⁵ Doh Demetrius ke kila toto tasisin menia ponompe tasisin ra uoto guata pono tar siokonor kalekinalenin, kara tabila tokah, kare kula inggono pare, "Inggoum mu ate tun pare, inggeig i uoto kale tun tar mani uleik ri uoto uabulaua pe tar inetenin. ²⁶ Doh inggoum kung banga, karung longoro manasa tar haua re guataig Poul. Inggono ke uapalih tun tasir bureher tamat i Epeses, kare gane toro burehe ro butur i Esia! Inggon e

kula pare, 'O godosiner nituhang tamat ahik paho godo noman.' ²⁷ Na nisar menemenenin e banot e uasuasa tenagi hagaring kale manieig menia pono tenagi umang lotueigene ri uoto lotu toin tang Artemis ge nagi godo inggeig menia pono tar hanganon e turung sa pon. Gane i Esia, kare toro mamang pang uan uakap, ra siokor lotu nomana tatanon. Bo no uelhire puk Poul o banot o uasuasa tar hanganon."

²⁸ Gine ka longoro pesina tar puhon. Gisina ka nimaliana uasa tun, kara uakekena tar menmene uauleik pare, "Artemis ge nagi godo inggeigener Epeses ter tampopokoho tun!"

²⁹ Ahik me sikir manasan, o tamata uakapane iuma tar uan uleik ka siokor menmene uauleik. Gisina ka reih tas Gaius me Aristarkus ger toking peng Masedonia geura la tagu teil tang Poul, gisina ka siokor lala tar umang tabila tokah. ³⁰ Poul ke marang uakalaharain tasir tamatasin, bosir tamatang tagorong mana puk ahik pah ka uamaluan tatanon. ³¹ O gisiamhe ponomper tamata uleiking gane tar pang uanion gera matakaluana tang Poul, ka heirime toro uelhire tar kula tane uapopokoho tatanono pare, ahik pahe lala tar umang tabila tokah.

³² Gine o burehe pesin, gisin ahik paha kodkodoho res ninaman. Gisina ke uelueltebeir nas nimene uauleik, doho burehe tasisin ahik pono pah ra ate ae maene ka la tokahala tar buturuon. ³³ Gisinar Ju ka tultula bisela tang Aleksander, kara uaturinane i uoum tasir tamat, doho gisiamhe ra menmene ualeiking ualatoho tatanon. Aleksander ke uedanga tar marang mene uakodkodoho baka tasisin. ³⁴ Bo gine puk ka la ate pesinar tamatang Epeses pare, ing-

¹19:21 Apo 23.11; Roum 1.13 ^m19:23 2Ko 1.8

ⁿ19:29 Apo 20.4; 27.2; Kol 4.10; Plm 24

gon a peng Ju, gisina ke kalenguaisir torikir aua tar menmene uauleik pare, “Artemis ge nagi godo inggeigir Epeses ter tampopokoho tun!”

³⁵ Song ke kula taner tamatang kaueke tar uan uleik tasisina tar turtur sikor, kare kula pare, “Ir tamatang Epeses, o tamata uakapa tun ra ueliate pare, o tamatang tar uan uleikene i Epeses tera kaueke tena umang lotu Artemis ger godo tampopokoho tun meniampe tono kaesaon geko pung uahia turuha i Heuen.

³⁶ Temaene a niateninane ahik me tamata re uolih pare, e tel, inggoum pakung pepe sikoro kompe, kara hik pah mu guata me inet.

³⁷ Inggoum kung ueliuime tasir tamatasineane, bo gisina puk ahik pah ka menmene uasa tenagi godo inggeig, kara hik pono pah ka uenaua tur me inetane tena umang lotuon.

³⁸ Ge pare ka banga Demetrius mes gisis re kalekinale tokahais me puh uasa ka guata uasainisin, gisina paka la tar umang kedang, kara la banga tasir tang kedang mara uakodkodoh.

³⁹ Ge kae ponoin me giameher inete rung marang mene ponoioum, ginina paka uakodkodoho to ponoig tar binakang tabila tokaha tasir tamatane tar uan uleik. ⁴⁰ Inggo u mene tar puhene, teene mo tamata gera banga tar niguata uasaene daan, gisina ra la banga sira pare, a ualagoreih keip tar nimaliana uleikion. Inggeig ahik pahi banot i turung uakalahara uaia tasisinar tamata uleiking Roum tar puhon, teene a tabila tokahene ahik tun me tengkana me uia tun.”

⁴¹ I muduhia ke menmene baka per tamatang kaueke tar uan uleik tar puhon, inggono song ke kula tasir tamata ra la tonosio uan.

O Mahar 20

Poul ke lihila i Masedonia me i Grik

20 Gine ke la kapa baka pe nas menemene uauleikir tamat, Poul song ke kila toto tasir tamatang tagorong mana tar lame tatanon. I muduhia ke mene uatampopokoho baka peono tasisin, inggono song ke heir tar niuaha tar hiliu manasa tasisina tar la i Masedonia.

² Inggono ke lihila tar pang uan i Masedonia, kare la menmene uatampopokoho tasir tamatang tar uanion, kare la pokosonguala tar pang uan i Grik. ³ Inggono ke la uangoulungua tar pang uaniono tar touonor bialok. Inggono ke marang panete tar parau tar marang la i Siria, bo teene o Ju ka uelkule uanomo tar uiliitung pous tatanon, maeit inggono ke namanangua tar la tapokisila i Masedonia. ⁴ Gine ke marang tapokis pe inggon, a tang siokor tamat a hangana tang Sopater ger tuna Pirus a peng tar uan uleik i Beria teke ueltutue tagu tatanono menia pono tas Aristarkus me Sekundus ger toking peng tar uan uleik i Tesalonaika, doh Gaius ger peng Debe, doh Timoti, kare Tikikus me Tropimus ger toking peng tar pang uan i Esia. ⁵ O tamatasinasine ka la uoum, kara la pepe uangoul tamiueim tar uan uleik i Troas. ⁶ Inggeim king panete tur tar parau i Pili-pai i muduhia ko kapa baka pe ro niein uleiking tar bereit ge ahik me is. Kura karuh bakar tolimar marein, song king la ueltupar toeim i Troas tasisin, karing uangoul baka poluk tar mouitir marein.

Poul ke uatua tapokis to tang Iutikus i Troas

⁷ Tar uakikilanganar marein tar uik inggeim king la toto tokaha keip tasir gisiameher tamatang tagorong mana tar

ein tokaha tar bereit tar namana tapokis toro uadouhina ro ein ke guatainir Tamata Noman. Poul ke menmene uabarah tasir tamata ke la tuka nar uantinanar boung, teene inggono ke ate pare e hiliu tar uagiamehenar marein.

⁸A tine umang ranene ring uangoul to-toieim, e luhur bureher luhung uakubar.

⁹Doha tang siokor tamat a mamanalik, a hangana tang Iutikus e tabila uahuhut toro uindou. Gine ke menmene uabarah pela Poul inggono ke hohou. Tar binaka ke la hohouontiehe manasa peon, inggono ke punga uahiuu tur tar puhung tine umon, kara me kale toinane i kot a mate manas. ¹⁰Maeit Poul ke la uahiuako, kare la hatup uahiuane tatanon, kare buaka tatanon, kare kula pare, “Inggoum ahik pah mu sokor, ge inggono pe a tua.”

¹¹Poul song ke tapokis poluk taro i rana tar tine um, song ka la ueluepise toro bereit, song ka ein. Inggono ke menmene tasisina ke la tuka naliuo, song ke hiliu tasisin.

¹²Gisis ro bung tahinalik Iutikus gesir tamatang tagorong mana ka hagouo uaia tun, kara keipila tatanon ium a tua.

Poul ke hiliu i Troas, kare la i Miletus

¹³Inggeim king hiliu tang Poul, karing la panete uoum tar parau, karing la inggeim king la hungungua tar uan uleik i Asos teking la pepe uangoulieim tatanon. Poul ke namana tanika tar nina-manon, teene inggono ke marang lihiko i kot tar lala i Asos. ¹⁴Tar binaka ke la uelupar to peono tamiueim i Asos, inggeim song king la siokor panete poluk tar parau. Song king siokor la tar uan uleik i Mitilini. ¹⁵Tar uagiamehenar marein, inggeim king ualo poluk tar parau, karing la hung tar uan e uahuhut i Kios. Tar

giameher marein inggeim king ualo kout taro i Samos, kare tar uagiamehenar marein, song king la pokoseim i Miletus. ¹⁶Poul inggono ke uamoko tanika manasa tena ninamana tar ualo siau i Epeses mara hik me marein ra la uangoul baka polukig tar pang uan i Esia mare la banoto tar la pokoso uateuel i Jerusalem mare la tuparain tena mareinir Pentikos.

Poul ke kilala tasir mamahoholiking Epeses

¹⁷Tar binaka king la pokoseim i Miletus, Poul ke heirila toro uelhire tasir mamahoholiking Epeses gera uoum keip tasir tamatang tagorong mana tar me ualongoro baka tatanon.

¹⁸PTar binaka ka me pokososin, inggono ke kula pare tasisin, “Inggoum mu ate uaia tun tenag niuangoulio, hope ku uangoul tagu pe tamiuoum e uakik-ilanga tar binaka ku kotpokoso tar pang uanene i Esia. ¹⁹Inggoum mu ate pare, a bureher binak o Ju ra uoto uelhote tar mamantouo totoguo, doh inggo ku uoto kale tun tar bureher niduh, karu uoto kiring tar bureher binak. Bo inggo puk u uoto kale uahiuao, karu kalekinale puk tar Tamata Noman. ²⁰Inggoum mu ate pare, inggo ahik tun pah ku toutouana tar hire tauete me inete tar poul tamiuoum, bo inggo puk ku siokor mene ualasira to tun tamiuoum tar matasir manai, doh gane tonomio uma katongoum.

²¹Inggoum mu ate pare, inggo ahik tun pah ku siokor mene ualasira tun tasir Ju, doho Grik tar uapalih tenas niguat, kara uakeluk tang God, kara siokor tagorong mana tang Iesu Kristo.

²²Doh gine daan, inggo u uakeluk tena nimalarar Iabena Dedeil, inggo u la i Jerusalem, bo ahik puk pahu ate uamatot a hua ra la turung guata toin totoguo tar uanion. ²³QInggoum mu ate

puk pare, toro mamang uan uleik geru lagio, a Iabena Dedeil e uoto uahire uoum totoguo pare, a niduh e turung pokoso totoguo, kara turung uamokoio tar uih. ²⁴rBo inggo puk ahik pahu namanantiehe tenag niuangoul, a inete uleikintiehe ru namanaio, inggo paku uakapa baka uoum tenag kalekinale, a kalekinale geke heirin Iesu ger Tamata Noman, tar uelihu tauete toro Uelhire Uaiang tena hamhamas, kare na nimalaelhir God tagigeig.

²⁵Doh gine daan, inggo u ate pare ahik tun me kalamiuoumene ku menmene ualasingrasio tena Nitoia God re turung banga baka poluk totoguo. ²⁶⁻²⁷Temaait inggo gine ru hire tanika tamiuoum pare, a tang sioko tamiuoum gere punga uahiu tar nitagorong man, inggon ahik paha ineteng totoguo baka poluk, teene inggo ku siokor hire manasa tar inete ke malaelhirig God tamiuoum tar ate. ²⁸sTagin katongosioum, karung kaueke pono tas mai geke heirisir Iabena Dedeil tamiuoum tar kauek. Inggoum mu uangoul sira pare, o tamatang kaueke sip-sipane tosono tamata God geke bulaua keipisiono tar Tun ke mate pe. ²⁹Inggo u ate, i muduhia tar binaka ru hiliu baka pe inggo, o gisiameher tamata ra turung la sirame tasir lo roke tar marang uedanga tar mamantouo tasir sipsip. ³⁰O gisiamehe ponane tamiuoum katong, ra turung tentur kai, kara uiuir toro uelhire gero mana tun, doh mo gisiamehe tamiuoum ra turung uakelukungua tasisin. ³¹uMaeit inggoum mu tagin teil! Namana dede pare, e banoto toro touono ro krismas inggo ahik pah ku uakenua tar menmeneng uatagin tamiuoum uakapa tar mamang marein mer boung, karu kiring-kep pon.”

³²“Gine daan inggo u uamoko tamiuoum tena nikaueke God menia tono uelhiring nimalaelhir keipiono tena niueldolom tamiuoum, gete roono pe tero uatampopokoho tamiuoum marung kale tar inete gere uoto heirigiono tosono tamatasitir dedeil.”

³³v“Tar binaka karu uangoul tagu tamiuoum, inggo ahik pahu uoto mahamaha tagu tenas manir tamat ue menas gomonosin. ³⁴wInggoum mu ate pare, inggo u uoto kalekinale tar uakot-pokoso katongo tar haua ru malahirin menia pono tar haua ra malahirinir tamatasit ka uangoul tagu totoguo. ³⁵Tar mamang kalekinalelik ku guat-guatagio, inggo ku ualasingrasio tamiuoum tar kalekinale uapopokoh mari banoteig i poul tasir tamata ge ahik pahe banot e poul katongois. Inggeig paki namana huara hape ke kula pe Iesu ger Tamata Noman, inggono ke kula pare, ‘A niuaha uleik e turung moko tar tamata gere heir tar inete tar tang giameh, a niuahon e i rana uain tar niuaha gere kaleiono gete namana pukin me pahen.”

³⁶I muduhia ke kula baka peono paar, inggono ke hatup uahiu keip tasisina uakap, kare lotu. ³⁷⁻³⁸Gisina ka uelkoke tatanon, kara kiring, kara nguh tatanon, teene Poul ke hire tasisina pare, gisin ahik pah ra turung bang huara baka poluk tatanon. Gisina song ka ueltutue tatanono tar la panete tar parau.

O Mahar 21

Poul ke la i Jerusalem

21 I muduhia king ueltageih baka pe inggeim mesir mamahoholik, inggeim king la panete tar parau, song ke ualor parau, ke ualo uakod-

^r20:24 Apo 21.13; 2Ti 4.7 ^s20:28 1Ti 4.16; 1Pi 5.2-4

^t20:29 Mat 7.15; Jon 10.12 ^u20:31 1Te 2.11 ^v20:33 1Ko 9.11-12

^w20:34 Apo 18.3; 1Te 2.9

kodohonguala i Kos. Tar uagiamehenar marein, inggeim king la ualola i Rodes. Inggeim song king la ualo tur poluk i Rodes tar la i Patara. ²Doh tar uan i Patara inggeim king la uelutpara tar giameher parau e marang la i Ponisia, karing la panete tatanon, karing lala.

³I muduhia king bang huara baka pe inggeim i Saiprus, inggeim king ualohiala tar pang mua, maeit king la pokos i Siria, karing la hungungua i Tair tar uahiuua baka tar ineteng tar uan uleikion. ⁴^xInggeim king la uelutpara tasir tamatang tagorong mana tar uanion, karing uangoul tagungua tasisina tar mouitir marein.

Doha Iabena Dedeil ke heir tar ninamana tasisina tar kula tane tang Poul mara hik pahe la i Jerusalem

⁵Bo gine puk ke la binaka peon, inggeim king la puk manasampe. Maeit gisisir tamatang tagorong mana mesnosio kuah, doho bung tus ka ueltutue tauete tamiueimane tar uan uleik, karing siokor lako i teh teking la hatup uahieim, karing lotu to bak, karing uelheirie tar niuah, song king ueltageih. ⁶I muduhia king la ueltageih baka pe inggeim, inggeim song king la panete tar parau, kara tapokisisin.

⁷Inggeim king la ualo ualatuman poluk tenami niualo, gine king hiliu pe inggeim i Tair, inggeim king la hungungua i Tolemes, doh tar uanion inggeim king la meneng uaha tun tasir tamatang tagorong man, karing uangoul tagu baka tasisina tar siokor marein. ⁸^yTar uagiamehenar marein, inggeim king hiliu poluk, karing la pokosongua i Sisaria, karing la uangoulungua tena uma Pilip ger tamatang mene tauete toro Uelhire Uaia, inggono ter tang sioko

tasir mouitir tamat gera uoto poul tasir aposoul.

⁹Inggon a tang toueitir tun o kuah kalan harah, halan ta le, doh ra uoto mene tauete tono uelhire God ngohina tasir propeit.

¹⁰^zI muduhia king uangoul manasa pe inggeim tar uaniono tar giniamerher marein, a tang siokor propeit, a hangana tang Agabus ke la uahiuua turuha i Judia. ¹¹^aInggono ke lame tamiueim, kare me kale tono beil Poul, song ke uih katongo tar liman, doha toking pang keken, kare kula pare, “A Iabena Dedeil ke kula pare, “Tera turung guata sira per Jung Jerusalem tang tanena ro beil rone, ra turung uihin, song ra turung ueliuilain tasir tamatasis ahik paho Ju tagu.” ¹²Gine king longoro pe inggeim tar puhon, inggeim mesir tamatang tar uaniono king siokor kula tane uapopokoho tun tang Poul pare, ahik pahe la taro i Jerusalem. ¹³^bSong ke mene hahaua Poul pare, “Ae maene rung kiringioun, karung uaueldolomontiehe tun totoguo? Inggo deh ahik pah ku kaleuatoro pukuio tar la karabus, bo tar la mate tunumpe tar hangana Iesu ger Tamata Noman.” ¹⁴Gine ahik pe inggeim pah king pehuara tar kula tane tatanon, inggeim king la uakenua puk manas, karing kula pare, “Auia! Uakeluk tena nimalarar Tamata Noman.”

¹⁵I muduhia tar puhonene, inggeim song king kaleuator, karing la taro i Jerusalem. ¹⁶O gisiamerher tamatang tagorong manang Sisaria ka la tagu tamiueim, kara la ueliu baka tamiueim tena uma Nason, Nason a peng Saiprus, doh inggono ter tang sioko tasir tamata geka tamatang tagorong mana uakikilang, inggono teking la uangoulieim na um.

^x21:4 Apo 20.23 ^y21:8 Apo 6.5; 8.40 ^z21:10 Apo 11.28

^a21:11 Apo 20.23; 21.33 ^b21:13 Apo 20.24

Poul ke la pokos i Jerusalem

¹⁷Tar binaka king la pokoso inggeim i Jerusalem, o tamatang tagorong mana ka siokor uaha uangoul tun tamiueim.

¹⁸Doh tar uagiamehenar marein, siokor inggeim uakapa mes Poul king siokor la tar la banga tang Jems menia ponompe tasir mamahoholik ra siokor uangoul tagu pon. ¹⁹^cPoul ke la meneng uaha tun tasisina song ke siokor uelueluatata hamas tun hape ke poul pe God tatanono i uantinanina tasir tamatasis ahik paho Ju tagu.

²⁰^dGine ka longoro pesina tar puh-puhunin, gisina ka siokor uatakai tar hangana God. Gisina song ka kula tang Poul pare, “Ingga ko banga manas, a touihar taosein tasir Jusine ka tagorong mana tang Iesu, doh gisina tera uoto tur uapopokoho tar uakeluk tena ualatut Moses. ²¹Gisina ka siokor longoro kout pare, ko mene ualasira pe ingga tasir Juis ra uangoul i uantinanina tasisis ahik paho Ju tagu tar tur kauiur liu tena ualatut Moses, kara hik pono pah ra poka tar kapokous ro bung tus gesir bulout, kara hik pono pah ra uakeluk tar niguatar nosir Ju. ²²Hopengua ri turung guata pe inggeig? Gisina ra turung longoro pare, ingga ko pokos. ²³^eMaeit ingga o uakeluk sira hape ring turung kula pe inggeim. Gane tamiueim ura uangoulur tang toueitir tamata kura nihing ualapagah keip pukis tang God. ²⁴Ingga o kila tasisin, karo uataguaia tar binaka re uadelauanaisisin, karo bulaua ueleheir tasisin mara koutigir ulus. Song ra turung ater tamata uakapa pare, a bohor menenine ra me uelueluatata teilig totomua, kare ingga katongo tero uakeluk ponompe tar ualatut.

²⁵^fDoh tasisine ahik paho Ju tagu, inggeim king bolo manasa tasisina tar uahire tenami ueluauiiae pare, gisina paka hik baka pah ra ein me niein ge me niheiring uahung tasir godo bohoboh, kara toub pono tar deuating, kara hik pono pah ra ein mo inetesisir nilolo pous, kara uakenua pono tar ura ueltebeir.”

²⁶^gTar uagiamehenar marein, Poul ke kila tasir tamatasin, kara siokor uadelauanais. I muduhia song ke laono tar umang lotu ger dedeil tar uahire tang hingiar marein re la karuh toinir puhon, kara guata ponoigir uahung re laig tasisina kahakah.

Poul ka kuse toin ium

²⁷Tar binaka ke la marang karuh manasa per mouitir marein, o gisiameher Jung tar pang uan i Esia ka bang huara uatur to tang Poulane iuma tar umang lotu ger dedeil. Gisina ka menmene uahounungua tasir manai tamat, kara kusengua tatanon, ²⁸kara kula ualeik pare, “Ir tamatang Israel mu me poul tamiueim! Gine ter tamata geke menmene ualasira tasir tamatang toro mamang buturulik pare, tar ueluelde tagigeigir Ju, kare nagi ualatut menia ponompe tenagi umang lotuene. Doh inggono pono teke keip ualeke tasir tamata ge ahik paho Ju ium tar umang lotu mare uasuaa pono tar umene ger dedeil.”

²⁹^hGisina ka kula ualeik paar, teeit gisina ka banga sioun tang Tropimus ger peng Epeses e la tagu teil tang Poul, kara namana pare, Poul ke keip ualek iuma tatanono tar umang lotu ger dedeil. ³⁰O tamata uakapa tunane tar uan uleik ka siokor tenturung nimaliana turane toro mamang buturulikane tar uan uleik,

^c21:19 Apo 15.12 ^d21:20 Apo 15.1,5 ^e21:23 Aha 6.1-20; Apo 18.18

^f21:25 Apo 15.29 ^g21:26 1Ko 9.20 ^h21:29 Apo 20.4

kara siokor ualome, kara me kuse tang Poul. Gisina ka reih liu turane tar umang lotu tatanon, doh ahik me sikir manasan, kare siokor holoro ponor pipirik.³¹ Gine ra ueduedanga pesina tar marang uiliatung pous tatanon, o ueluatata tar puhono ko la pokoso tar tamatang uoum keip tasir tamatang uiliatung Roum pare, o tamatang tar uan uleik ka ueluel-nimaliana ueltebeiris.³² Inggono ke ua-teuele tunin, kare kila tasir gisiamer tamatang uoum keip, karo tamatang uiliatung, kara ualoko tar la banga tasir tamatasin. Gine ka bang huara pesit ra nimaliana tasir uiluiliatung menas tamatang uoum keip, gisina ka uolo uakenua tar uiliatung tang Poul.

³³Git nas tamatang uoum keipir uiluiliatung ke me kuse tatanon, kare ualatoho pare, ra uih taneiono me torikir tiein. Song ke dangatono tasir tamata pare, maionene, doha haua ke guataion?³⁴O gisiamer ra uahire taro tar ginamehe siokor inet, karo gisiamer ra hire tar ginamehe siok, doh gine ahik per tamatang uoum keip pah ke ate uaia mo mana ra kulkula ualeik ueltebeir pesin, inggono ke ualatoho pare, ra keipilain Poul tenas buturing uangangoulur uiluiliatung.

³⁵Tar binaka ke lala matoto pe Poul toro kakaet, res nimalianar tamata ke uleik uain, maeit o uiluiliatung ka uelkabe tatanon.³⁶ⁱO tamata geka uakeluk ra kulkula uauleik teilimpe pare, “Uiliatung pous liu tatanon!”

Poul ke mene baka tasir manai tamat

³⁷Gine ra lang leke keip manasa pelar tamatang uiliatung tang Poul tenas buturing uangangoul, inggono ke dangata tar tamatang uoum keip toro uelhiring Grik pare, “Inggono u banotompe u mene baka totomua?”

Kare kular tamatang uoum keip pare, “Inggono o uelhiring pono toro uelhiring Grik?”

³⁸^jAhikia pah ter peng Isip geke uakekena tar marang uiliatung keip tang gavaman, kare uoum keip tar 4,000ir tamat, kara la tar butbutur padenene sioun sikor?”

³⁹Doh Poul ke mene hahaua pare, “Inggono deha Jung tar uan i Tasius i Silisia, inggono u la tur pono tar uan uleik ger tohangana pon. Uamaluaana geru mene bako tasir tamat.”

⁴⁰Gine ke uamaluaana per tamatang uoum keip tasir uiluiliatung tatanon e mene baka tasir tamat, Poul ke tur kai toro kakaet, kare sarang pau tasir tamat. Gine ka turtur sikoro pesin, inggono ke kula tasisina toro uelhiring Hibru.

O Mahar 22

22 “Ro bung tahig meso bung tamoug, ualongoro baka geru meneng uelturut tagin bakaio.”

²Gine ka longoro pesina ke mene peon tasisina toro uelhiring Hibru gisina ka tur bukuk tun. Song ke kula Poul pare,³^k “Inggono a peng Ju pon, ka poho toio i Tasius tar pang uan i Silisia, bo ku uleik to puk tar uanene i Jerusalem. Inggono ku uangoul i kukulebanga tang Gamaliel, kara ualasilaio tenas ualatur ro bung tamagigeig, doh reg nimalara uleik tun pono tang God ngohina puk pono tamiuoum daan.⁴¹Inggono u uoto mamantouo tasir tamata geka tagorong mana tang Iesu mara mat. Inggono u uoto kuse tasir bulout meniampe tasir kuah, karu la bakala iuma tasisina tar karabus.⁵Gine nasi uleikir patere mesir mama-hoholikisine ra banoto ra hire uelkout pon. Inggono u kale tur pono tar bolobolo tasisina tar la heir i Damaskus toso uan-

ⁱ21:36 Luk 23.18 ^j21:38 Apo 5.36-37

^k22:3 Apo 5.34 ^l22:4 Apo 8.3

otousisin, song ru la, karu la ueliu tapokisine tasinane i Jerusalem mara me uauelmahingisisin.”

⁶“Ke la uahuhutin nar moloï, gine ku lang uahuhut manasa peo i Damaskus, a luh a balontiehe tun ke balo ualutara turuha i Heuen ke me balo uilohane totoguo. ⁷Inggo ku punga uahiu i kot, karu longoro tar uauanar tamata ke kula pe totoguo pare, ‘Sol! Sol! Ae maene ro uauelmahingia totoguo?’”

⁸“Karu dangata inggo pare, ‘Ingga te mai, ter Tamat Nomana?’ Kare kula hahauono pare, ‘Inggo te Iesu ger peng Nasaret, gine ro uauelmahingia.’ ⁹O uanotouguosine ra la tagu teil totoguo ka siokor banga tar luhion, bo ahik puk pah ka naman manate a haua ke meneinir uauanar tamatene ke mēne totoguo.”

¹⁰“Karu dangatanguao pare, ‘A hauangua paku guataio?’ Kare kular Tamata Nomana pare, ‘Tentur kai karo la lekela iuma tar uan uleik i Damaskus. Dohi Damaskus ingga song ra turung siokor hirea tenang kalekinale geka uamatotoig totomua pare, o turung kuat.’”

¹¹“O uanotouguo ka uoum keip ualasira totoguo i Damaskus, teene inggo ke uakutur nitampopokohonor luh. ¹²A tang siokor tamat, a hangana tang Ananias ke lame tar me banga totoguo. Inggon e uoto uakeluk uaia tun tar ualatut, doho Jusine ra uangoul i Damaskus ra siokor ueltada tun tatanon. ¹³Inggono ke me tur tabara totoguo, kare me kula pare, ‘Sol, ge tahiguo, ingga o banga tapokis!’ Ahik me sikir manasan, inggo song ku bang huara tapokis tatanon.”

¹⁴“Song ke kula Ananias pare, ‘Nasi God ro bung tamagigeig ke uamatoto

totomua maro ate tena nimalara inggon maro ate tagu tatanono ger kodkodoho tun, karo turung kalkale tur tun tatanono tar uelhire. ¹⁵Ingga tero turung uelhire tauete tasir mamang tamatalik tar haua ko bangaig, kara haua ko longoroig. ¹⁶Doh gine daan, a haua baka poluk ro uangoulia? Tentur kai gera uahuuia, kila tar hanganar Tamata Noman mare kuse luara tereng niguata uasa ingga.”

¹⁷Doh Poul ke mene tumana poluk pare, ‘Tar binaka ku tapokis peme inggo i Jerusalem, karu me lotu to tar umang lotu ger dedeil, inggo ku me banga tar borborian, ¹⁸^mkaru bang huarangua tar Tamata Nomana ke kula pe totoguo pare, ‘Teuel! Gine daan hiliu puk manasampe i Jerusalem, ge gisina pe ahik pah ra turung uauia geto mene ualasira ingga tasisina totoguo.’”

¹⁹ⁿ“Doh inggo ku mene hahaua tatanono pare, ‘Tamata Noman!’ O tamata dehesine ra ate totoguo ku la hahai pe toro umang lotu, ku uiliatung pe, karu uamoko tasir tamata geka tagorong mana totomua tar karabus. ²⁰^oDoh tar binaka ko tading ro deuatingina Stiben ger tamat e uoto hire tauete totomua, inggo teru tur tagu, karu heir tenag uauia, karu kauেকে tenas gomonosit ka uiliatung pous tatanon!”

²¹^p“Song ke kula polukur Tamata Nomana totoguo pare, ‘La! Inggo u ueliuila totomua i rehe tun tasisis ahik paho Ju tagu.’”

Poul ke hire tasir uiluiatungung Roun pare, a tamatang Roun

²²O tamata ka ualongoro bukuk tang Poul e tuka ke mene peono tasisis ahik paho Ju tagu, song ka nimaliana

poluk. Maeit gisina ka menmene uauleik poluk, kara kula pare, “Uiliatung pous liu tatanon! Inggono de ahik pahe bantoto e uangoul baka polukane tar kot!”

²³Gine ra kulkula ualeik pesin, gisina ra bakbaka kai tenas gomono meroung tar kotane i ran. ²⁴Maeit git nas tamatang ualatoher uiluiliatung ke ualatoho ra keipin Poul tenas buturung uangoungoulusin. Inggono ke ualatoho pare, inggono ra la halhaluhin, kara dangdangatain ae maene ra menmene kulkula ualeikir tamata pare tatanon. ²⁵qGine ra uelkuse uakodkodoho peono mara halhaluhin, Poul ke kula tar tamatang uoum keip tasir uiluiliatung pare, “A kodkodohompeonane tar ualatut tar tamatang Roum ra halhaluhin tar binaka halana ta ateinir haua ke guata uasain?”

²⁶Gine ke longoro per tamatang uoum keip tasir uiluiliatung ke mene pe Poul paar, inggono ke lala tar tamatang ualatoho tasir uiluiliatung, kare la hire tar puhon, kare la dangata pare, “hapengua ro guata pe ingga, ge inggono pe a tamatang Roum?”

²⁷Song ke lalaoneitir tamatang ualatoho tasir uiluiliatung tang Poul, kare la dangata pare, “Hire totoguo, ingga a tamatang Roum?”

Kare mene hahaua Poul pare, “Inggono a peng Roum nomanampe.”

²⁸Song ke kula polukur tamatang ualatoho pare, “Inggono ku bulaua uauleik tun, maene ku kotpokos a tamatang Roum.”

Bo Poul puk ke mene hahaua pare, “Bo inggono puk ka pohoio pare, a tamatang Roum.”

²⁹rDoh gisis ka marang dangdangata baka tatanono tar puhpuhung dangata ka siokor uakenuangua. Gitir tamatang

ualualatoho ke lutara tun ke la ate pe pare, ke uih tane pe tar tiein tang Poul, ge inggono pe a tamatang Roum pon.

Poul ka uaturin i uoum tasir Sanhidran

³⁰Tar uagiamehenar marein, a tamatang ualatoho tasir uiluiliatung e marang ate uaia tun a haua ka bangainir Ju ke guata uasain Poul, maeit inggono ke uamaluana tang Poul, kare kula tasir Sanhidrana uakap gesir uleiking tasir patere mesir mamahoholiking tasir Ju, ra siokor la toto. Song ke ueliuila inggono tang Poul, kare la uaturane i uoum tasin.

O Mahar 23

23 Poul e uakeis uanono kompela tasir Sanhidran, kare kula pare, “Ro bung tahig, inggo ku uakapa manasa tar kalekinaler nang God, doh inggo u ate pare, ku guata uakodkodoho tun ke me tuka pe daan.” ²sDoh gine ke mene pe Poul tar puhon, Ananias ger uleiking tasir patere ke ualatoho tas gera tur uahuhut tang Poul tar posara tar uauanon. ³tSong ke kula Poul tatanono pare, “God e turung posara pono totomua, ge ingga pe a tang guata kokopoia mara namanaia pare, a tamata uaia. Inggono o tabila tar kedanga keip totoguo tar ualatut, bo ingga puk teko kategompe tar ualatut ko ualatoho pe pare, ra posarai!”

⁴Gisis ra tur uahuhut tang Poul ka kula pare, “Inggono o marang uelsigala tun tar tamata uleiking tasir patere ger nang God?”

⁵uKare mene hahaua Poul pare, “Ro bung tahig! Inggono deh ahik pah ku ate pare, inggono tenas uleikir pater, inggo

^q22:25 Apo 16.37 ^r22:29 Apo 16.38

^t23:3 Mat 23.27 ^u23:5 NKT 22.28

^s23:2 Jon 18.22-23

ku guata uasa manas. Ge i lolono pe tono bolobolo God, inggon a nibolo pare, ‘Ahik paho uelsigala tas mai gera uoum keip tosnongo tamata.’”

^{6v}Poul inggono ke ate pare, o gisiamehe tasisina Sadiusi, doho gisiameh o Parisi. Maeit inggono ke mene uakik- ilanganguala tar kaunsil pare, “Ro bung tahig, inggo a Parisi pon, ku uatamana pono tar tamata Parisi. Inggo gine rur i uoum tasir tamatang kedang, teene inggo u tagorong mana pare, o tamat ra mat, kara tua tapokis.”

⁷Gine ke mene pe Poul paar, a uel-sae ke pokosongua i uantinanina tasir Parisi mesir Sadiusi, doh gisina ka pang torikingua. ^{8w}O Sadiusi tera kula pare, ahik me tua tapokis, kare ahik pono mo angelou mer iaben, bosir Parisi tera siokor tagorong mana tar mat, kara tua tapokis menia pono tasir angelou, doh tar iabeisir tamat.

⁹Temaait gisina ra ueluelperere uauleik tun, doho gisiameher Parisi gesir tang ualasira tar ualatut ka tentur kai, kara mene uapopokoho tun, kara kula pare, “Inggeim deh ahik tun pah king tupara me niguata uasa ke guataigir tamatene. Hape gete ke hire me angelou ue me iabene tatanon?”

¹⁰A ueluelperere ke la santiehe uain manas, maene a tamatang ualatoh tasir tamatang uiliatung ke sokoro keip tang Poul geta uiliatung pousin. Maeit inggono ke ualatueko tasir uiluiatung tar la i uantinanin tasir manai, kara la peng tampopokoho tar kale liu tur tasisina tang Poul, kara keip liuilain tenas buturung uangoulur uiluiatung.

^{11x}Tar uagiamehenar boung, a Tamata Nomana ke me tur tabara tang Poul, kare me kula pare, “Peng tampopokoh! Ingga gine ko uelhire

tauete uoum tar hangouguoane i Jerusalem, doh ingga o la turung guata sira polukumpe i Roum.”

A uelhote tar marang uiliatung pous tang Poul

¹²Naliuo tar giameher marein o Ju ka la toto, kara uelhote tar uiliatung pous tang Poul. Gisina ke uelualapagah taneis pare, ahik pah ra ein, kare ahik pah ra inum e la tuka tar binaka ra pehuara bakasina tar uiliatung pous liu tang Poul. ¹³Gisinasit ra uangoul teil i lolono tar uelhoteon ke la banotois tar toueitir hangaul.

¹⁴Gisina ka la tenas uleikir pater, karo mahoh, kara la kula pare, “Inggeim king guata tenami uelualapagah pare, ahik pah mi ein me inet e tuka tar binaka ring uiliatung pous baka tang Poul. ^{15y}Doh gine daan, inggoum mesir tamatang kedanga mu bolo mo bolobol o la tar tamatang ualatoh tasir uiluiatung mare keipimeono tamiuoum tang Poul, mu tut mo boho pare, mu me marang ate uaiia baka me mene kodkodoho tatanon. Doh inggeim tering kaleuatoro tar uiliatung pous tatanono tar binaka halanono te me pokosane.”

¹⁶Bo gine puk ke longoro per tang siokor kabina Poul tar puhung uelhoteonene, inggono ke la lekempe tenas buturung uangoulur tamatang uiliatung, kare la hire tang Poul.

¹⁷Song ke kilangua Poul tar tang siokor tamatang uoum keip tasir uiluiatung, kare la kula pare, “Keip taro tar tamata kalanene tenang tamatang ualatoh, ge inggono pe e marang hire tar inet, inggonompe re ate.”

¹⁸Maeit inggono ke keip tatanono tar tamatang ualatoh. Inggoneitir tamatang uoum keip ke me hire pare, “Poul ger

^v23:6 Apo 26.5 ^w23:8 Mat 22.23 ^x23:11 Apo 27.24; 28.16,23

^y23:15 Apo 25.3

karabus ke ualatue uelhir totoguo, kare me kula totoguo tar keipiha tar tamata kalanene totomua, teene inggon e ate teil tar siokor puh, dohe marang hire totomua.”

¹⁹Gitir tamatang ualatoho ke kuse tar limanar tamateitir kalan, kare rei-hila i tektekena tatan song ke dangata tatanono pare, “A hauonene ro marang hireia totoguo?”

²⁰Kare kula inggono pare, “O Ju ka ueluauiiae pare, ra dangata totomua tar ueliuila tang Poul i uoum tasir Sanhidran roliuo tar boho pare, ra marang dangata uaiia baka tatanon mara ate uaiain.

²¹Ahik paho longoro tasisin, ge gisina pe o toueitir hangaul, ra turung uiliatung kout to tatanono tar lele mare mat. Gisina ka uelualapagah katongois pare, ahik pah ra banoto ra ein ue ra inum e la tuka tar binaka ra uiliatung pouis baka pe tatanon. Gisina ka kaleuatorene daan, bo ra uanguangoul puk manasampe tenang mene hahaua ingga tasisin.”

²²A tamatang ualatoho ke kula tar tamata kalan e la manas, kare kula tane uapopokoho tatanon ahik pahe hire me tamata pare, ke me hire tar puhono tar tamatang ualatoh.

²³Song ke kilonor tamatang ualatoho tena tang torikir tamatang uoum keip, kare ualatoho tasrasina pare, “Kaleuator, kaura kila me torikir hangaulur hangaulur tamatang uiliatung, kare me mouitir hangaulur tamatang ualo tasir hos, kare me torikir hangaulur hangaulur tamatang uiliatung keip tar bel, karung la i Sisaria daan tar 9 kilok tar boung. ²⁴Heir pono tang Poul me torikir hos mara la ueliu uaudeiliono tang Peliks ger gavana.”

²⁵Doh inggono ke bolo toro bolobolo rone.

²⁶“Inggo Klodius Lisias. O bolobolo rone o la tar tamat uleik tang Peliks ger gavana tar gavaman tar pang uanane. A binaka uaiia tun totomua. ²⁷^aA tamatene ka kuseinir Ju, kara marang uiliatung pouis tatanon, bo inggo puk ku keipila tosnogo tamatang uiliatung, karing la uelkarus tatanon, doh inggo ku ueltupar tatanono pare, a tamatang Roum pon. ²⁸^aInggo ku marang ate ae maene ra tohtohotolasina tatanon, maeit inggo ku keipila tatanono tasir Sanhidran. ²⁹Inggo ku la ueltupar pare, nasi tohtohotolasina tatanono ke lain tar nidangatang tenas ualatutusin, bo ahik pukusina pah ka tupara me inete ke guata uasaiono mare banoto ra uiliatung pouis uionone ue ra uamokoin tar karabus. ³⁰^bTar binak ka me hireio tar uelhote uanomong uiliatung pouis tatanon, inggo ku ueliu uateuele tunula tatanono totomua. Inggo ku ualatoho pono tasisin ra tohtohotola tatanono tar la ueliuila tar puhono totomua.”

³¹Maeit o uiliatung ka uakeluk hape ka ualatoho peis. Gisina ka kale tang Poul naboung, kara keip tatanono tar uan ra kilain i Antipatris. ³²Tar uagiamehenar marein, gisina ka uamaluna tasir tamatang ualo tasir hoso teka la keip dede tatanon, bosir bureheis ka tapokis uoum tenas buturung uanguousin. ³³Tar binak ka la pokoso lar tamatang ualo tasir hos i Sisaria, gisina ka la heir toro bolobolo tar gavana, kara ueliu ponola tang Poul tatanon. ³⁴Gitir gavana ke timana toro bolobol, kare dangata pare, hingiar pang uan re la tu-

^a23:27 Apo 21.30-33; 22.25-27 ^a23:28 Apo 22.30

^b23:30 Apo 23.16-23; 24.1-9

rion. Gine ke ate peono pare, a peng tar pang uanionene i Silisia.

³⁵Inggono ke kulangua pare, “Inggo u turung ualongoro uasiokompe tar niduhene totomua geta pokoso bakasis ka tohtohotola totomuaane.” Song ke ualatoho inggono pare, Poul e la turung uangoul tena umang toia Herot, bo ra la turung tur kaueke pukin.

O Mahar 24

Poul ke me tur i uoum tang Peliks ger gavana

24 I muduhia kura karuh baka per tolimar marein, Ananias ge nas uleikir pater, ke lako i Sisaria menia pono tasir gisiamer mamahoholik, kare nas tamatang iate tar ualatur ger hangana tang Tertulus. Gisina ka keipiko tenas uelhire tar gavana, tar marang kedanga tang Poul. ²Tar binaka ka kilalain Poul ium, Tetulus song ke uakekena tar tohtotola tatanonane i uoum tang Peliks pare, “Inggeim king me uaha tun, ko me kaueke pe ingga tamiueim, a niuaha kara niuangoul uaia, ke moko tar puhung barah, doh ingga teko me uakotpokoso pono tar bureher inete uaia tar pang uanene. ³Siokor inggeim uakapa tunane toro mamang buturulik king banga tar kalekinalenin, karing siokor uaha tun. ⁴Bo ahik puk pahe la turung uia tamiueim tar uoho uanono totomua, inggeim mi dangata puk totomua tar ueldolom baka tamiueim, karo ualongoro baka tar hauaring marang meneieim. ⁵Ge Inggeim pe king uelutpara tar tamatene pare, e uoto uakotpokoso tar ueluelnimaliane, e uoto uatentur tar ueluelkoiane i uantinana tasir Ju toro mamang buturulikane tar koto uakap. Inggono ter tamata uleik tar toto tamatang bohoboh ra kilais o

Nasaret. ⁶Kare uedanga pono tar uasuaa tar umang lotu ger dedeilane tar matana God, temaeit king kuse inggeim tatanon. ⁷Bo Lisias puk ger tamatang ualatoho tasir uiluiliatung menia toсно uiluiliatung ka lame, kara me kale liu tur tatanono tamiueim, kare kula tasisis ka tohtohotola tatanono tar me tur i uoum totomua. ⁸Doh ingga geto heheke uauia tun tatanon, ingga o turung atempe toro mana tun tar tamatonon pare, a mamang inetelikinine ra tohtotolaig tatanon a mana uakapa tun.” ⁹O Ju pono ka siokor meneng poul tang Tertulus tar mene uapopokoho tar puhunina pare, a man.

¹⁰Maeit gitir gavana ke dumatala tang Poul mare mene bak. Doh Poul ke la mene hahaua pare, “Inggo u ate uaia tun pare, ingga ko tur sira pare, a tamatang kedanga tasir Ju tar puhung barah, maeit inggo u uaha tun getu meneng ueluturatio. ¹¹Ingga o turung ate uakodkodohompe pare, ahik pah sioun, a siokor hangaul, doha torik pukur marein kura karuh, ku la pe taro inggo i Jerusalem tar lang lotu. ¹²Gisina ra tohtohotola totoguo ahik pah ka uelutpara me siokor binaka totoguo ku uelperere keip me tang siokor tamatane iuma tar umang lotu ger dedeil ue me ueluelnimalianane toro umang lotu ue gane uel-tebeirimpe tar uan uleik. ¹³Doh gisin ahik ponompe pah ra banoto ra hire umatoto tun me puhuhunine ra tohtohotolaigisina totoguo pare, ge para man.”

¹⁴“Bo toro mana tun puk, inggo u hire pare, inggo u lotu pono tenasi God ro bung tamagigeig. Inggo u uakeluk tun tena nimalaron, teene ra kulainisin, a toto tamatang bohoboh. Inggo u tagorong mana tar mamang inetelik gere uauiaigir ualatur, dohe moko pono

tenas bolobolor propeit. ¹⁵eDoh inggo u uangangoul sira pono tasisina tar binaka ra tua tapokisir mamang tamatalik. ¹⁶Maeit inggo u uedanga tun tar uangoul uakodkodohane tar matana God, doh gane tar matasir tamat.”

¹⁷“I muduhia ke tabo baka peioane tar giniamerher krismas, inggo ku tapokisime i Jerusalem tar me heir tosnogo tamata tar niheir mara heir tasir tiome, karu lang guata pono tenag uahung. ¹⁸fInggo ku tur tar marang uakeluk tar haghering uadelauana tar tukunun tar matana God. Tar binak ka bang huara tosina totoguo iuma tar umang lotu, inggo ku delauana manas. Tar binakon ahik pono mo bureher tamata ka uangoul tagu totoguo. Doh ahik pono me ueluelnimalian. ¹⁹Bo gisine puk ka me kuse totoguo, o Jung tar pang uan i Esia ge pake kaeisisinane, gisina pake tera tohotola me inete totoguo. ²⁰Ue gisine ra uangoul tera banoto ra hire uamatoto tar haua ku guata uasaio. Ge pare ka ueltuparasina me inete uasa ku guataio tar binaka ka uaturusina totoguo i uoum tasir Sanhidran. ²¹gInggono here ter puh geku mene uauleikio pare, ‘Inggo u tur i uoum daana totomua, teene ru tagorong mana pe tar mat, kara nitua tapokis.’”

²²hTar binakonene Peliks e ate uaiang sioun tenas nitagorong manar tamat gera uakeluk tar Tamata Noman, maeit inggono ke uain tar tabilon e tuka gete pokoso baka Lisias ger tamatang ualatoho tasir uiluiiatung. Song ke hire tang Poul pare, inggo song ru turung uahire totomua tar ninamana ka kedangain totomua. ²³Inggono ke ualatohongua tar tang siokor tamat tar tur kauেকে tatanon, bo e uamaluana puk ponompe me giniamerher binaka tatanon, kare uamaluana pono toso kaluanono ra me ruh kou-

tumpe tatanon, kara bang a haua re katupagion.

²⁴I muduhia ke karuh baka per giniamerher marein, Peliks me Drusila ge na kuahampeono kura laha. Drusila a kuahang Ju. Ke ualatue ra la kilain Poul, song kura ualongoro rasina tatanon, ke hire pe tar nitagorong mana tang Kristo. ²⁵Gine re hirhire uaia tun pe inggono tasrasina tar niuangoul uakodkodoh, kara nikaueke katong menia tar nikedanga gere turung lame. Peliks ke sokor, kare kula tang Poul pare, “Hiliu bakene daan, gete me binaka uaia poluk kaein, song ru kila polukio totomua!”

²⁶Inggono ke namana pono pare, e marang bulaua uanomo Poul tatanon, temaeit re uoto kilono tatanono tar menene tatanon.

²⁷Kura karuh baka ro torik ro krismas, Porsius Pestus ke palih tang Peliks. Bo teene Peliks e malara ra uahar Ju tatanon, maeit ke uamaluanono tang Poul e uangoul uoum tar karabus.

O Mahar 25

Poul ke malahir tang Sisa tere tabila tar kedanga tatanon

25 A touonor marein kura karuh manasa ke pokoso pe Pestusane tar pang uan i Judia, inggono ke hiliu i Sisaria tar la taro i Jerusalem. ²iDoh nosio uleikir patere mesir mamahoholik-ing tasir Ju ka lame tatanon tar me heir tatanono tenas nitohotola tang Poul.

³jGisina ra malara uateuele ra ueliu tapokisimein Poul i Jerusalem, ge gisina pe ka namana tanika tar turung tur koutkout tatanono tar lele kara uiliiatung pous.

⁴Doh Pestus ke mene hahaua tasisina pare, “Poul deh ke karabus i Sisaria, doh

^e24:15 Jon 5.28-29 ^f24:18 Apo 21.17-28 ^g24:21 Apo 23.6

^h24:22 Apo 23.26 ⁱ25:2 Apo 24.1 ^j25:3 Apo 23.15

inggon ahik pahi reh, karu la uahiu ka-tongoko inggo tar uanion. ⁵Mu turung uamaluana pukumpe mo nomio mama-hoholik gera turung la tagu totoguo mara la heir me nitohotola tatanon ge pare ke guatono me inete uasa.”

⁶I muduhia ke uangoul tagu baka peono tar hangaulur marein tasisin, inggono song ke la uahiuako i Sisaria. Maeit tar uagiamehenar marein inggono ke kula tar tabilang kedanga tang Poul ra tabilain, kare ualatoho inggono tang Poul ra me uaturin i uoum tatanon.

⁷Tar binaka ke me tur pe Poul i uoum tatanon, o Jusine ka la turuha i Jerusalem ka me tur uiloho tatanon, kara tohtohotola tatanono tar bureher niguata uasa. Bo gisina puk ahik pah ka uakalahara baka taninina pare, a man.

⁸Song ke meneng uelturut katongoin Poul pare, “Inggo ahik tun matu guata me siokor inete me saane tenasi ualatur Ju ue gane tar umang lotu ger dedeil, doh gane ponompe tang Sisa.”

⁹Pestus ke marang uakeluk teres nimalarar Ju, maeit ke kula pare tang Poul. “Ingga o uaiampe tar la taro i Jerusalem mare tero la tur toa i uoum totoguo tar ualongoro tar nitohotolanine?”

¹⁰Doh Poul ke mene hahaua pare, “Inggo gine manasa ru tur tar butur ku malahirin e kedanga to Sisar totoguo. Ingga o ate ponompe totoguo ahik pe matu guata me inete me sa tasir Ju. ¹¹Bo geku guato me inete me sa, dohe banoto pare, inggo ra uiliatung pousuio, inggo ahik pahu sokoro tar mat. Bo ge ahikir nitohotolanine ka heir taueteig paha man, ahik ponompe me tamata re banoto e kalaharain tar heir totoguo tasisin. Inggo u malara pare, Sisa re turung kedanga totoguo!”

¹²I muduhia ke ueluatata keip baka pe Pestus mesno tamatang iate, inggono ke

mene uakalahara tang Poul pare, “Ingga ko malahir o la tang Sisa, auia, ingga o turung lampe tang Sisa!”

Pestus ke uahire tang Agripa ger toia tang Poul.

¹³I muduhia ke karuh baka per ginameher marein, Agripa ger toia me tatahinalik, a hangana tang Bernaisi kura me pokos i Sisaria tar lang ualasira tenasira niueltada tang Pestus. ¹⁴Gine kura uangoul manasa pe rasina tar bureher marein tar uanion, Pestus ke ueluatata keip manasa tar niduhene tang Poul. Pestus ke kula pare, “Gane e uangoulur tang siokor tamata ke hiliu toin Peliks tar umang uih. ¹⁵Tar binaka ku la taro inggo i Jerusalem, o tamata uleiking tasir pater, doho mamahoholiking tasir Ju, ka me uahire totoguo tar nitohotola tatanon, kara dangata menia tar marang tung pous tatanon.

¹⁶Inggo ku hire tasisina pare, inggon ahik pah ter niguatang Roum tar heir tang hingiar tamata tar uelmahing tar binaka halana te tur i uoum tasisit ka tohotola tatanon. Kare inggon e banotompe tar uelturut katongoin tar nitohotolanin. ¹⁷Tar binaka ka la tagu mesina totoguoane, inggo ku me uamoko puk manasampe tar puhono tar uagiamehenar marein, karu ualatouk pare, ra keipimein Poul i uoum totoguo.

¹⁸Tar binaka ka tentur kair tamatasit ka tohotola tatanono tar men, gisin ahik pah ka tupara tatanono ke guata uasa me siokor ninamananit ku naman taginigio.

¹⁹Gisina doh ka ueluelperere baka pukumpe mes inggono tar niguatang tenas lotumpe, kare tar tang siokor tamata geke mat, inggon a hangana tang Iesu. Bo Poul puk ke kula pare, ‘A tamatonene Iesu ke tua tapokis.’

²⁰Inggo ku uatoboul, kara hik pah ku naman manate hape maru kale uaia tar

puhon, maeit inggo ku dangata tatanono ge pare malarono tar la i Jerusalem mara la kedanga toig na nitoholaon. ²¹Bo gine puk ke malara peono tang Sisa tere kedanga tar puhon, inggo ku ualatoho puk manasampe ra uamokoiono tar umang uih e tuka tar binaka ru kula inggo ra keipiono tang Sisa.”

²²Song ke kula Agripa tang Pestus pare, “Inggo u marang ualongoro katongo tun baka tatanon.” Kare mene hahau Pestus tatanono pare, “Ingga o turung ualongorongua roliuo tatanon.”

²³Tar uagiamehenar marein, Agripa me Bernaisi kura uatoro uaia tun tara tukunus tenasira gomonong toia, kaura lekeme ium menia pono tasir tamata uleikisisir tohangas, kare gisis ponor tamata uleikane tar uan uleik, ka me siokor lekameane tenas tine umar tamatang uakeis, maeit song ka keip ualekamein Poul tar uakelukumpe tena ualatoho Pestus.

²⁴Song ke kula Pestus pare, “Agripa ger toia, kare inggoumene rung uangoul tagu tamiueim, inggoum mu banga tar tamatene! O mamang Ju uakap ka dangata to totoguo i Jerusalem, kare gane ponompe i Sisaria, gisina ka kulkula ualeik pare, inggon ahik pahe banot e uangoul baka poluk. ²⁵Doh inggo ahik pah ku tupara me puh ke guata uasaion mare banoto pare, ra tung pousin, bo inggono puk ke malara pare, te Sisampe re me kedanga tatanon. Inggo ku namana puk manasa pare, ueliuila tatanon i Roum. ²⁶Bo inggo puk ahik dedempe me puh re kalahara tun maru bolola tang Sisa tar uahire tar puhon. Temaene ku ueliuimeo tatanonane tamiuoum, kare totomua pono Agripa ger toia mare song ra tuparain me inete tar tabilene, song ru bolompe inggo. ²⁷Ge inggo pe u namana pare, inggon ahik paha uia tun tar ueliu

pukula tar tamata ger uih i Roum, doh ahik mata bolobolo uakalahar bakaigir haua ge guata uasaig.”

O Mahar 26

26 Song ke kula Agripa tang Poul pare, “Inggo ku uauia totomua tar mene katongo bak.” Maeit Poul ke sarang pau tar limana song ke uakekena tar meneng uelturutin.

²“Agripa ger toia, inggo u uaha tun ku me tur pe i uoum totomua, inggo u mene tar uelturut katongoio tar nitohotolanine ka tohotolaigir Ju totoguo. ³Doh inggon e la uia tun pare, ge ingga pe o ate uaia tun pono tenas niguatar Ju, kara inetenine king ueluel-nimalianagieim. Temaene, inggo u dangata totomua tar tabtabila sikor, karo ualongoro totoguo.”

⁴“O Ju uakapa tun ra siokor ate tang hingiar niuangoul ku uangoul turumeio tar binak, karu keketik ku uangoul peme tenag pang uan, dohi Jerusalem. ⁵^mGisina ka ueliate tur totoguo sioun, doh geta malarasin ra hire uakalara tenag niuangoulio. Inggo ku uangoul sira pare, a Parisi, o Parisi tera uakeluk tun tena hagarir lotu. ⁶ⁿInggo u tagorong mana teil tena niualapagah God toso bung tamagigeig, temaene ru turio daan i uoum tasir tamatang kedang.

⁷Inggonor ualapagah teene ra uanguangoulin ro hangaul, doho torik ro matinasine, mangiha re kotpokoso pare, o man, ra lotu pe tang God tar boung, doh tar marein.”

“Ir toia, inggono ter nitagorong manon temaene ra toholar Ju totoguo. ⁸Ae maene rung namanoum pare, ahik God pahe banot e uatua tapokis tasir mat?”

⁹“Sioun inggo teku namana pono pare, paku guata me puh tar tur tane tar hangana Iesu ger peng Nasaret. ¹⁰Doh inggo teku guatampe tar kalekinaleon i Jerusalem. Inggo ku kale tena ni-uauia nasi uleikir pater, karu uamoko tasir burehe tar umang uih. Karu uauia tar binaka ra marang tung pousisina tasisin. ¹¹A bureher binak, inggo u la hahai toro umang lotu tar uaelmahing tasisin, karu petutupe tasisina tar hiliu tar Tamata Noman, kara uelhire uasa tatanon. Gine ru nimaliana uasa tun pe inggo tasisin, Temaeit inggo u la toro ginameher pang uan tar maman-touo tasisin.”

**Poul ke ueluatata tar
binaka ke pokoso pare, a
tamatang tagorong man**

¹²Doh Poul ke mene ualatumana poluk pare, “Inggo ku lang la keip poluk i Damaskus tena niuauia nas uleikir pater. ¹³Ir toia, inggono kaelainane namoloi, gine ring la pela inggeim tar lel, inggo ku bang huara tar luh e balo turuha i Heuen, inggon a balontiehe uain poluk tar balbalanar pisar, inggono ke me balo uiloho totoguo, kare gisis ra la tagu teil totoguo. ¹⁴Maeit inggeim king siokor punga uahiu i kot, karu longoro inggo tar uauanar tamat re uelhire pe totoguo toro uelhireng Hibru pare, ‘Sol, Sol! Ae maeit ro uaelmahingia totoguo? Ingga e parakukuh baka pukia tar tur tane tereg nimalaro.”

¹⁵“Karu dangata inggo pare, ‘Tamata uleik! Ingga pe mai?’”

“Kare mene hahauar Tamata Noman pare, ‘Inggo dehe Iesu, teene ro uaelmahingia. ¹⁶Tentur kaiene daan, doho tur keip tar pang kekem. Inggo ku pokoso totomua tar uamatoto toto-

mua pare, a tamatang kalekinale, karo hirhire tauete teil tar haua ko bangaig menia tar haua ru turung ualasingio. ¹⁷Inggo u turung uelkarus liu tur totomua tosnongo tamat menia tosnongo uelmatan, inggo u turung ueliuila totomua tasisin ahik paho Ju tagu. ¹⁸PTar la uatakapuka tar matasisin mara hiliuisina tar kitupun, kara lame tar luh mara hiliu tena nitampopokoho Satan, kara lame tang God. Mara kuse luara liuig res niguata uasasin, song ra turung kale ponosina tar niguata uaiia menia tasisin ra tagorong mana totoguo, kara turung uangoul teil tagu tasisin ku uamatotosio pare, o noug.”

¹⁹“Maeit, Agripa ger toia, inggo ahik pah ku longlongoro boho tar nibangene ku bangain ke la turuha i Heuen. ²⁰Temaeit, inggo ku la mene ualasingia uakikilang i Damaskus, song ku la poluk i Jerusalem meniampe toro mamang buturulik i Judia, karu la pono tasisin ahik paho Ju tagu mara hiliu tenas niguata uasa, kara siokor lame tang God, kara ualasingia tar niguata uaiia mara ateisina pare, ka uapalih.

²¹Ter tengkanene maeit ka kuser Ju totoguo, kara marang tung pous, teeit ku mene ualasingia pe inggo tar puhon. ²²Bo God puk ke poul totoguo, maene ru uangoul harah tar hire tauete dedempe tasir tamata uakapa tar puhpuhunina pare, ginin a man, e uakikilanga tur pe tasir tamata ueltebeir e la tuka pe tasisin tohangas. Inggo ku ualasingia teil pukumpe tar haua ka meneigir propeit mes Moses pare, e turung kot-pokos. ²³QA puhono tere kulkula tang Iesu e turung mat, doh inggono tere turung tua uakikilanga tur poluk toro mat mare me pokoso sira pare, ter luh gere luh uakubara tasir Ju, doh inggon

⁹26:9 Apo 8.3 ^P26:18 Ais 42.16; Epe 2.2; Kol 1.13

⁹26:23 Luk 24.44-47; 1Ko 15.20

e siokono ponompe tasisis ahik paho Ju tagu.”

²⁴Gine re mene pela Poul paar, Pestus ke mene uauleik pare, “Poul ingga deh ko popouluan, ingga deh ko sikul uaburburehe puk. Ingga ko uapopouluana keipia tar niate ululeik puk!”

²⁵Kare kula Poul pare, “Pestus ger tamata uleik, inggo ahik paha popouluan, inggo u mene tun tar huar kodkodoh, kara mana tun. ²⁶Doh ingga Agripa ger toia! Inggo u ongolo tun tar hire totomua pare, teeit ingga o ate pono tar puhpuhunin, ge a puhpuh penin ahik pah ke kotpokos uaou. ²⁷Agripa ger toia! Ingga o tagorong mana pono tasir propeit? Inggo u ate ingga o tagorong mana tasisin.”

²⁸Song ke kula Agripa tang Poul pare, “Ingga o namana sira pare, o banotong guata totoguo maru tamatang tagorong mana tang Kristo tar sikir binakene daan?”

²⁹Doh Poul ke mene hahaua tatanono pare, “Geta puhinar binaka ue a barah, inggo u lotu tang God mara hik pah ingga puk, bo siokor inggoum uakapene rung ualongoro totoguo daan, mu turung siokor pokoso sira totoguo, bo ahik puk pah ra turung uamoko tagusium tar karabus.”

³⁰Maeit gitir toia ke tentur kai menia pono tang Bernaisi ge tatahinalikion, kare Pestus ger gavana, doho gisis pono ra tabila uahuhut tasisina ka tentur kai pon. ³¹Gisina ka tauete liuane tar tine um. Doh gine re ueluelmene teil pelaisisin, gisina ka kula pare, “A Tamata dehetie ahik pah ke guata me inete me sa mare banoto ra uiliatung pousin ue e uangoul tar karabus.”

³²Kare kula Agripa tang Pestus pare, “A tamata dehetie paka uatauetin ge

paka hikiono pahe malarala tang Sisa i Roum tar tabila tar kedanga tatanon.”

O Mahar 27

Poul ke la i Roum

27 Gisina ka ueluauiie pare, inggeim mi la i Itali, Poul mesir gisiameher tamatasisir karabus ka ueliuilais tang Julius, inggono tere uoum keip tasir tamatang uiliatung, doh gisina tera kauেকে tun tang Sisa. ²Inggeim king panete tar parauing tar uan uleik i Adramitium, inggonor parau e marang bokboko hahaila toro biris gere moko toro binabatang tar pang uan i Esia. Gine king panete pe inggeim, a tang siokor tamata a hangana tang Aristarkus a peng Masedonia tar pang uan i Tesalonaika e la tagu teil pono tamiueim.

³Tar uagiamehenar marein, inggeim king la bok i Saidon, doh Julius ke guata uaia tun tang Poul, inggono ke uamaluan tatanono ke la toso bung kaluan mara poulusina tatanono me inete gere malaraiou.

⁴Inggeim king ualo tur poluk tar buturuon, doh king ualo tutupengua tar rom, doh ahikingua pah king banoto tar ualo uakodkodoh, maeit inggeim king ualohiangua tar pang giameh i Saiprus i uantinana tar toro mer pang uan uleik.

⁵Gine king ualo kout pela inggeim tar kasap tar pang uan i Silisia me i Pampilia, inggeim king la hungungua tar uan uleik i Maira tar pang uan i Lisia.

⁶Doh tar uan uleikion gitir tamatang uoum keip tasir uiluiatung ke la uel-tupara tar siokor parauing Aleksandria e marang la i Itali, kare uapanetengua tamiueim.

⁷Inggon ahik paha binaka uaia i laur, maeit inggeim king ualualo hamas tun,

doh ahikingua pah king la uolong pokos i Nidas. Inggeim ahik pah king banoto tar ualo uakodkodoh, inggeim king ualo uaounguala tar tor i Krit gere uahuhut toro tulehun i Salmone. ⁸King ualualo sikorompela tar binabat, karing la pokosola tar uan ra kilain, “A hua ger uia,” inggon e moko uahuhut tar uan uleik i Lasea.

⁹A burehe manasar marein ke karuh, doha rom e ululeik uain dedempe, teeit a binaka uaiang toro parau tar ualo ke siaua manasain, doh nasi marein uleikir Ju tar ueil, ke karu manasa pon, maeit Poul ke uatagin pare tasisin, ¹⁰“Inggoum uakapa tunene, inggo dehu banga sira pare, na niualor parauene ahik pahe turung uia, doh inggon e turung uakot-pokoso tar niduh uleikane tar parau meniampe tar inetenit ra kihanga teilig, kare inggeig menia ponompene ri panete teil.”

¹¹Bo git pukur tamatang uoum keip tasir uiluiliatung ahik pah ke marang longoro tang Poul ke mene pe, bo ke uakeluk puk tena ninamanar tang uakapis tar parau meniampe tang tanener parau. ¹²Gine ahik per buturuono paha uia tar binakang rom, o bureher tamata ka pentampopokoho pare, gisina ra ualo dedempela tar uan uleik i Piniks mare la tupara tois tar binakang pang romo tar uanion. Inggonene a biris e mok tar tor i Krit tar painahia re hukoinir pisar.

A romo uleik ke u

¹³Gine ke uakikilanga per romene re u tur sikoroha tar pang kais re hu pekor pisar, gisine ra ualo teil tar parau ka naman ahikir romo pahe uleik, maeit ka reih kai toro oto nar parau, kara ualo uahuhutuko tar binabatang Krit. ¹⁴Gisin ahik pah ka ualo baka me

puhung barah, kare u manasar romo ngohina re popokoho per solihang, a romene ra kilain pare, “A touabuin,” ke me u bise taro tar parau i uantinaninar laur. ¹⁵A parau ahik tun pah ke banot e ualo tutupe tar rom, maeit inggeim ke uabele uakeluk puk manasampesieim. ¹⁶Gine king siaua pe taro inggeim tar toro gera kilain i Kauda, inggeim ke parakukuh uadeil pukusieim tar reih kai tar boutung panete gera reih teilin. ¹⁷Gisine ra kalekinale tar parau, ka lolo uiloho tar parau tar roup mare popokoh. Gisina ka sokoro gete ulainir parau tar lolouon i Aprika, maeit ka uahiu tapokis toro uatabilang rom mare belbele hamasinir parau.

¹⁸Nar boung a romo ke uleikintieh, doha butuana ke uleikintiehe pon, maeit gine ke liuo peon gisis ra kalekinale tar parau ka uakekena tar bakbaka uahiu manasa tar inete gera kihanga teilig. ¹⁹Tar uatouononor marein, gisina ka baka uahiu manasa tar ineteng tar parau, o iauon, a roup, doha uatabilang rom meniampe tar turun. ²⁰Tar bureher marein, inggeim ahik pah king bang huara tar pisara mesir pitopit, kara rom, dohe popokoho dedempe. Maeit siokor inggeim ahik baka poluk pah mi ate pare, ge paring udeil.

²¹A burehe manasar marein ke karuh, doho tamat ahik pah ra ein me niein, maeit Poul ke turane i uantinanin, kare kula pare, “Ge pakung longoro inggoum ku kula pe inggo pare, ahikieig pahi hiliu i Krit, inggoum pake siauasioum tar binaka uasaene, maene ke rouor inet. ²²Bo gine daan inggo u kula pare, inggoum mu pentampopokoh, teeit siokor inggoum mu turung udeil. A paraua puk manasampe tera turung mamantouoin. ²³Na boung, na anggelou Godener nana totoguo, doh gine ru kalekinaleio, ke

me tur i tektekena totoguo, ²⁴skare me kula pare, ‘Poul! Ahik paho sokor! Ingga o la turung turumpe i uoum tang Sisa, doho tamatasine ra turung siokor udeil keipompe totomua.’ ²⁵Maeit inggoum ahik pah mu sokor, ge inggo pe u tagorong mana tang God pare, a mamang inetelik e la turung pokoso sirampene ka hire peio. ²⁶‘Bo inggeig puk paki uamaluana tar rom e u bisela tar parau me lolouona mari la horo inggeig me tor.”

A parau ke sa

²⁷Kaelainane nar uantinaninar boung tar uahangaul, doha uatoueitinar boung ke u pe rom, gine re u pelasieim tar teheng Adria, o tamatang kalekinale tar parau ka hagouo sira pare, a parau here ke uahuhut i kot. ²⁸Maeit gisina ka uahiuako i laur tar uahireng lolou, doh inggono ke uahire pare, inggon a toueitir hangaul pukur param re tunguna pe. Ahik paha puhung barah ke ualo per parau, gisina ka banga tagin poluk tar uahireng lolou, kara la ate poluk pare, inggon a touonor hangaul puk manasar param re tunguna pe. ²⁹Gisina ka sokoro geta ualoko i rana mo palau, kare tapolakar parau, maeit gisina ka baka uahiuatoro toueit ro otane i mud tar parau, Gisina ka lotu pono mare marein uateuelon. ³⁰Gisiner tamatang kalekinale tar parau ka marang uedanga uanomo tar marang hiliu tar parau, gisina ka pepe boho pare, ra uahiuatoro otane toro uamunar parau, bo gisina ka marang uahiuatoro bout. ³¹Doh Poul ke kula tar tamatang uoum keip tasir uiluiatung mesir uiluiatung pare, “Gera hiliuir tamatasine tar parau, inggoum ahik pah mu banotong udeil.”

³²Maeit gisisir tamatang uiliatung ka tokout tar uoho ger nilolo uakuse tar bout, kare punga uahiuatoro i laur.

³³Gitiempe re langlang liuo pe inggon, Poul ke ualahur tasisina ra ein, inggono ke kula pare, “Tar hangaul, doha toueitir marein gisiane kura karuh, inggoum ahik pah kung hagouo uaia, karung uanogoul puk, ahik pah kung ein me niein. ³⁴Gine daan inggo u kula uapopokoho tamiuoum tar ein baka me siksikir niein. A niein pe tere uatampopokoho tamiuoum. Ge ahik pe me tang sioko tagigeig re turung kale uelmahingene daan.”

³⁵Song ke kaleono tar giniamerher bereit, kare heir tar niuaha tang Godane i uoum tasisin, kare pis toro mahar, kare uakekena tar ein. ³⁶Gisina ka siokor hagouo uaia, kara siokor eingingua. ³⁷Inggeimene ring siokor panete teil tar parau ke la matotoseim tar 276 uakapar tamat. ³⁸Tar binaka ka ein uamatoto baka peisisina teres nimalar, gisina song ka bakbaka uahiuatoro ginamerher raesuit i laur mare mamaolo sikoror parau.

³⁹Gine ke la liuo manasa peon, gisina ahik pah ka bang paroko tar binabat, bo ka bang huara puk tar siokor tamiongon a ioniononan, doh gisina ka kula pare, ra ualo uahoroko tar parau tar buturuon. ⁴⁰Gisina ka siokor tokout liu tar ot, doh tar siokono pukumper binak, gisina ka luaka liu tapokis pono tar uoho geka uih tane bakaig toro habinar parau. Song ka reih kai pono tar uatabilang rom, kara uabangako tar parau i kot. ⁴¹Bo a parau puk ke la horo kout tar lolou. O uamunar parau ko la horo uanon, doh ahik paho banoto tar in uain. Doho uakapisinar parau ko tapolaka siksikin re posposara per butuan.

⁴²O uiluiatung ra marang uiliatung poustasir karabususine tar parau mara hik me tansioko re uaene liu, kare ualo.

⁴³Bor tamatang uoum keip puk tasir uiluiliatung tere marang uaudeil tang Poul tar tur tane mara hikisina pah ra uakeluk teres ninaman. Inggono ke ualatoho baka uoum tas mai gera banoto tar uaen, kara la hung i kot. ⁴⁴Bosir bureheis ra turung uaene uahung keip tar mahmahar douk ue tar mahmaharanar parau. Tar hagarionene, siokor teasina uakapa ka la siokor uaene uahungumpe i kot. Ahik me tang sioko ke mat.

O Mahar 28

Poul e uangoul tar tor i Malta

28 Gine king la siokor pokoso pe ko inggeim i kot, inggeim king siokor udeil, song king la ate pare, inggono ter tor gera kilain i Malta, ²uO tamatang tar toron, ka ualasira tun tar niguata uaiia tamiueim, gisina ka uout toro hue, kara siokor kilala tamiueim, teene re huana peon, kara malahong. ³Poul ke la kale randouk, kare me bakala toro hue, doha soiener sa ke hagouo tar uelsuk, kare hir tauete tur tar randouk, kare eitingua tar limanon. ⁴Tar binaka ka bangar tamatang tar tor re eit teil per soi tar limana Poul, gisina ke uelkule katongois pare, "A tamata dehene a tang haluh, gine ke uaudeil peionane i laur, a ualatut ahik dedempe pahe banot e uamaluana tatanono pare, e tua."

⁵vBo Poul puk ke kiaba bise liu tar soiane tar liman, kare la dudulaono toro hue, kara hikimpe pah ke hagouo sikoro baka mo momouh. ⁶wO tamata ka la namanangua pare, inggon e turung isingir limana ue e turung mate ualutar, bo ahikimpe. Doh gine ka mahang bangbanga teil pesin, doh ahik me puh re pokoso tatanon, gisina ka uapalih teres

ninaman, kara kula puk manasa pare, inggono ter godo noman.

⁷Tar toron o moko ro mahar koto uleik menia toro um, o nanar tang siokor tamata uleiking tang gavaman, a hangana tang Publius. Inggono ke kilala tamiueim tena um. Inggono ke la kaueke uaiia tun tamiueim e banoto tar touonor marein.

⁸Tamanon e momouh rikinimpe toro uat, inggon e uelsukur tukunun, kare kalein ro silele uleik. Poul ke lekala iuma tar la banga tatanon, i muduhia ke lotu baka peon. Inggono song ke uaponola tar limana tatanon, kare uaiia tatanon.

⁹Gine ke kotpokoso baka per puhon, o tamatang tar toro gera momouh ka la ponome, kara me siokor uaiia ponois.

¹⁰Gisina ka siokor ueltada tun tamiueim tar bureher hagar, doh gine ring kaleuatoro manasa pe inggeim tar panete poluk tar parau, gisina ka heir uamatoto tun tamiueim tar inete king malarraig pare, a tinamar tenami nila.

Inggeim king pokos i Roum

¹¹I muduhia tar touonor bialoko king uangoul pe inggeim tar tor i Malta, inggeim king panete tar siokor parau geke la boko uaouo pono tar torono tar pang romo uleik. Inggono a parauing Aleksandria, gane i uoum tar parauion ura tur teil nosira kaesar toking pouh gera hangas tas Kastor me poluks ger toking godong Roum.

¹²Inggeim king la hung bak i Sirakius, karing uangoul baka tar uaniono tar touonor marein. ¹³King ualo tur polukieim tar uanion, karing la hungungua tar uan ra kilain i Regium. Tar uagiamehenar marein, a romene re u turume tar pang makos ke u, maeit tar uatorikinar marein, song king la pokoseim i Puteoli.

¹⁴Tar uanion, inggeim king la uel-tupara tasir tamatang tagorong man, gisina ka kilangua tamiueim, karing la uangoul tagungua tasisina tar mouitir marein. Inggeim song king hiliu tar uanion, king lihila i kot, karing la pokos i Roum.

¹⁵O tamatang tagorong manang Roum ka longoro pare, king la peme inggeim, gisina ka la tantane tola tar lele tamiueim. Gisina ka la tar puhung barah pon, song ka la uelupar tamiueim, gisina ka la uelupara to tamiueim tena buturung uabulbulaua Apius, doh tar uan ra kilain, Touonor Umang Pokos. Poul ke bang huara tasisin, kare uatakai tang God, inggono song ke hagouo uaia pon. ¹⁶Gine king la pokoso pelaeim i Roum, Poul ka uamaluanampein e uangoulung pahen menia tar tang siokor tamatang uuliatung tar tur kauেকে tatanon.

Poul ke la uelhire ualasis i Roum

¹⁷I muduhia ke karuh baka per touonor marein king la pokoso pe inggeim, Poul ke kila toto tasir mama-hoholiking tasir Ju. Gine ka la toto baka pesin, song ke kula Poul tasisina pare, “Ro bung tahig! Inggo ahik pah ku guata me puh tar touahiua tosnogio tamateig ue me inete me sa tar ueluelde tar niguatang tosnogio mahoheig. Inggo ka kuse toio i Jerusalem, kara ueliuimeio tar gavamaning Roum. ¹⁸^xGisina ka heheke totoguo, doh ka marang uamalua-ana totoguo, teene gisin ahik pah ka tupara me inete ku guata uasaio mara matoto ra uuliatung pousuio. ¹⁹^yBo o Ju puk ka ueluelde, maeit inggo ku malahir tar la tang Sisa tere ualongoro tar kedanga totoguo, ahik teilimpe me inete ru bantotoio u tohotola tosnogo tamata katong. ²⁰^zDoh inggono ter tengkana tun maene ku dangata inggo pare, u menmene baka

tamiuoum. Karu marang uaate tamiuoum pare, inggo ru uangoul keip pe tar tiein, teeit ri tagorong mana teil pe inggeigir Israel tang Iesu pare, ter Mesaia.”

²¹Maeit gisina ka mene hahaua tang Poul pare, “Inggeimane ahik pah king kale mo sioko ro bolobol o la turume i Judia tar uahire tamiueim totomua, doh ahik ponompe me tang sioko tasisit ka la turume i Judia ke me ueluatata tamiueim ue ka me menmene uasa toane totomua. ²²^aDoh inggeim tering marang ualongoro tar haua ro marang meneia, ge inggeim pe king longoro tasir bureher tamata ra meneng ueluelde pe tar timuhur nitagorong manene ke kotpokos i Judia.”

²³Gisina ka ueluauiangua tar uel-tupara tapokis tang Poul tar siokor marein, doh tar binaka ka lamesin, gisina ka burehe uain ka la peme tar buturene re uangoul Poul. Ke uakekena tur pe naliuo ke la tukampe nareiu, Poul ke mene uakalahar, kare uelhire tauete pono tasisina tena Nitoia God. Doh inggono ke uelhire tauete tur pono tar hangana Iesuane tena ualatut Moses menia pono tenas bolobolor propeit tang Iesu. ²⁴O gisiamehe tasisina ka tagorong man, doho gisiameh ahik dedempe pah ka tagorong man.

²⁵Gisina ke ueluelperere katongois, kara hilhiliu uatouk manasene re menmeneng uadouhina pela Poul pare, “A Iabena Dedeil ke uahire toro man o la toso bung tamamiuoum tar binaka ke kula pare, tang Aisaia ger propeit, ²⁶‘O la tasir tamatasine, karo la kula pare, Inggoum mu turung longor, bo ahik puk pah mu turung naman manate. Inggoum mu turung bang huar, bo ahik puk pah mu turung bang parok.

^x28:18 Apo 26.31 ^y28:19 Apo 25.11

^z28:20 Apo 26.6-7 ^a28:22 Apo 24.14

²⁷ Ge resi ninamana pesina ahik paha uia,
 gisin ahik tun pah ra banotong longor.
 Doh gisina ka uakut ponois mara hik pah
 ra bang huar.

Ter sa pare, geta banga keipsisina tar
 matas, ra longoro keip tar talingas,
 doh geta naman manate pon, kara tapok-
 isime totoguo, song ru me uauiao
 tasisin.” *Aisaia 6.9-10*

²⁸ Temeait Poul ke mene uadouh pare,
 “Inggoum mu ate manasa tar puh pare,

God e marang uelkarus tasir tamat, na
 niuelkarus God e la tasir tamat ahik paho
 Ju. Gisina ra turung longor.” ²⁹ (-)

³⁰ Toro torik pe ro krismas, Poul ke
 uangoul tar uaniono tar uma re bulauain
 tar mamang bialokolik, kare kilola tena
 uma tas mais gera lang banga tatanon.

³¹ Doh inggon ahik tun pahe sokoro
 sikoro re mene tauete pe tena Nitoia
 God, kare ualasira pono tasir tamata
 tang Iesu Kristo ger Tamata Noman.

Roum

O bolobolo ke boloin Poul tasir tamat i Roum

O bolobolo tasir Roum o moko teil i lolono tar timuhur uelhote toro Baeboul.

O bolobol o nang Poul tasir tamatang tagorong man i Roum. i Roum here ter uleikir uan uleik tar koto uakap. Poul ke bolo toro bolobolo roono toro krismas 57 (I muduhia ke mata baka pe Iesu). Here ke bolono tar binaka ke uangoul i Korin.

O buk tasir Roum o ualasira hape re banotong uelkarus tur pe God tagigeig tar uabang manate teregi niguata uasaieg. Doh roon o ualasira pono hape paki uangoul peeig. A giniamer inete uleik ri banotong ate turueig toro bolobolo roono teenine:

O tamata uakapa ka siokor guata tar niguata uasa tang God.

God e uelkarus tasir tamata gera tagorong mana tatanon.

Inggeig ahik pahi banotong uelkarus katongo keipisieig tar inete haua ki guata uaiain.

Na Iabena Dedeil God e poul tagigeig tar guata tar niguatar uia.

God e ualasira hape paki uangoul peeig.

O Mahar 1

Poul ke hire uakalahara tena kalekinaler aposoul pe

1^bInggo Poul na tamatang kalkalek-inale puk Iesu Kristo ka kilai o aposoul, kara niuamatoto sioko tar mene tauete tono Uelhire Uaia God.

^{2c}God ke ualapagaha to toro Uelhire Uaia rone tasir propet sioun tun i lolono toro buk gero dedeil, ³gero menmene tar tunon Iesu Kristo geke kotpokoso tur toso bunguna Debit ka me uatamata pein, ⁴doh geke uakalaharainir Iabena Dedeil ter tuna God, kara ualasira uakalahara keip toin tena nitampopokoho uleik God, ka uatentur tapokis tur pein toro mat, Iesu Kristo ge nagi Tamata Nomaneig. ^{5d}Inggeig ki kale tur tatanono tar nipoul tar kotpokos o aposoul tar kila tasir bureher tamatar peng gime uan ahik paho Ju tar tagorong mana tang Kristo, kara longor, kara heir tar uiniatoro tar hanganon.

⁶Doh inggoum pono kae teil ponosioum tasisit ka kilais o nang Iesu Kristo. ^{7e}Tamiuoum uakapeit re malaeluahir God i Roum gera kilais pare, no tamaton.

A nimalaeluahir, doh no hiarouo God ge tamagigeig, doha Tamata Noman Iesu Kristo e la tamiuoum.

Poul e marang banga toсно tamata God i Roum

⁸Uakikilangan, tar hangana Iesu Kristo inggo u heir tar niuah ueleheir tang God tamiuoum uakap, teeit remi nitagorong manoum ka ueliatein tar koto uakap. ⁹God geru kalkalekinale keip tunuio tar koloug tar uelhire tauete tono uelhirer tunon, e ate a touihar binaka ru heirio tar namana tamiuoum ^{10f}tenag lotu tar mamang binakalik. U lotu ge pare, kaelain me binakene daan tena nimalara God maru banotong tuparo me lele tar lame tamiuoum.

¹¹Inggo ku marang banga tun tamiuoum maru heir tar inete uaia ke heirinir Iabena Dedeil tar uatampopokoho tamiuoum. ¹²A inetono te pare, inggo u

^b1:1 Apo 9.15 ^c1:2 Roum 16.25-26 ^d1:5 Apo 26.16-18; Gal 2.7-9

^e1:7 Aha 6.25-26 ^f1:10 Apo 19.21; Roum 15.23

marang lame tamiuoum mari uaueltam-popokohesieig teregi nitagorong man.

^{13g}Ro bung uanotoug, inggo u marang uahire tamiuoum pare, inggo ku gune tar me banga tamiuoum, bo a burehe pukur inete ke uapekout e tukene daan. Inggo u marang me kalekinale i uanti-nanina tamiuoum tar kale tur me puh uaia misiana ku guata uoum pe i uanti-nanina tasir gisiameher gime uan.

¹⁴God ke hire uapopokoho totoguo tar hire tauete toro Uelhire Uaia tasir tamata uakap ge ahik paho Ju toro mamang buturulik. Ge paro tamatasina ra ate toro uelhireng Grik, kara niguatang Grik ue ahik, o tamatang iate ue ahik pah ka la tar sikul. A puhunin ahik pah tere hau. Inggo u pentampopokoho tun puk tar uelhire uakalahara toro Uelhire Uaia tasir tamata uakap. ¹⁵Temaeit pono ku malarantiehe tunuo tar me hire tauete toro Uelhire Uaia tamiuoumat i Roum.

^{16h}Ge inggo pe ahik pahu matala keip tono Uelhire Uaia Iesu Kristo, teeit o uelhire tena nitampopokoho God re uelkarus keipin tasir tamata uakapa gera tagorong man, e uakikilanga keip tasir Ju song o gime uan. ¹⁷ⁱGe i lolono pe toro Uelhire Uaia o hire teil hape re uakotpokoso pe God tasir tamata tar kodkodoho keip tatanon te tar haring tagorong manang sioun kompe, uakekene tur tar uakikilanganar binak e la uatuka tar uadouhin. Nghoinar nibolo peono tono uelhire God pare, “O tamatar kodkodoho ra turung uangoul keip tar nitagorong man.”

Na nimaliana God tar niguatar sa

¹⁸Ge na nimaliana pe God e la turuha i Heuen e ualasira hape re nimaliana

pe tar mamang niguata uasa, doha ni-uangoul uasa geka guataigir tamata ka tur tane keip pe toro mana teres mamang niguata uasalik. ^{19j}God ke nimaliana tasisin, teeit a haua ka atein-isina tang God a kalahara katongompe, doh God ke uakalahara tar puhono tasisin. ^{20k}Sioununtiehe tun tar binaka ka touoinir kot, o tamata ka bang huara tar kot, doha langit, doha mamang inetel-likimpenit ke touoig God. Gisina ka banotong banga uaia tun tena niuiaono ger mahang bang, doh na nitampopokoho ger mahang kap, doh God a i rana uain tar mamang inetelik ke touig. Temaeit gisin ahik pah ra banotong uolih ra tele tang God.

^{21l}Ge gisina pe ka atempe tang God, kara hik dedempe pah ka ueltada sira tatanon a God ue ra uatakai tatanon, kara uakekene tar touo teres ninamana hape re baka pe God. Temaeit res nimananasina ke kitkitup, kare toboul. ^{22m}Gisina ra uasalais, kara kula katongois pare, o tamatang iate, bo gisina puk o popouluan. ²³ⁿGisina ka turung tar mud tang God ge paka uatakainisina ger Godung tar mamang binakalik, bo ahik ka uatakai kalehe puk tar kaesa a nipuruh sira tasir tamat ue o tetiau ue o inetesisier tua, o soi ue o pale gesir uoto mat.

²⁴Temaene God ke uamaluaana tasisina tar guata belehu kompela tang hingiar puhur ualamatala re malaragir tukunus, kara uasuasa tar tukunus, ²⁵teeit gisina ka de mata tagorong mana toro mana tang God, bo ka tagorong mana kalehe puk toro boh. Gisina ka lotu tar inetenitie ke touoig God, kara uangoul i kukulebanga

§1:13 Apo 19.21 ^h1:16 Mak 8.38; Apo 13.46; 1Ko 1.18-24

ⁱ1:17 Hab 2.4; Roum 3.21-22 ^j1:19 Apo 14.15-17; 17.24-28

^k1:20 Job 12.7-9; Ker 19.1 ^l1:21 Epe 4.17-18 ^m1:22 Jer 10.14; 1Ko 1.20

ⁿ1:23 Ual 4.15-19; Ker 106.20

taninin, ahik pah tang God geke tou tar mamang inetelik. Teono pe pake teri uatakaiaieg tar mamang binakalik. O man.

²⁶Ter tengkanonene maeit ke uamaluana God tasisina tar guata tar niguata uasantiehe tun, kara ualamatal. O kuaha ka de mata le tasir bulout ger niguatang sioun, kara ueluelkale katongois, ²⁷o kara siokonompe toso bulout, ahik pono pah ka malara ra le toso kuah ger niguatang sioun, bo ka malarantiehe tun ra uelueleis, temaeit gisina ra turung kale tar niduh geka uahingaig ra kale.

²⁸Doh, gitie ahik pesina pah ka bang paroko tang God, inggono ke uamalu-anangua tasisina tar uangoul keip tar ninamana uasa ra banotong namana huarraig, a puh ge ahikisina pah ra banotong kuat. ²⁹Gisina ka uoun tar mamang niguata uasalik, a niuangoul uasa, ra pe, tera gono tar bureher inet, ra uelsae, ra geh, ra tung pous tasir gisiameh, ra ueluelkoi, ra boh, ra marang guata uasa tasir gisiameh, karo uoto ngur. ³⁰Kara uasuasa tar hangasir gisiameh, kare tokouasais tang God, kara mahang kul, kara uakaiais, kara uasalais tesir uiantieh, kara namana tar giniamehemper niguatar sa, kara mahang longoro toso tinas. ³¹Gisin ahik mes ninamana uaia, kara hik pah ra uakeluk tar uelhote, kara hik pah ra ualasira me niguata uaia ue ra ueldolomo tasir gisiameh. ³²Gisina ka atempe re kula pe na ualatut God pare, o tamata gera uangoul tar niuangouluninanine ra mat, bo gisin ahik ka guata dedempe tar niguataninanine, kara uata kai meniangua tas mais ka guata tar niguatanin.

O Mahar 2

God e bang kedanga tasir tamata uakap

2^PTemaeit, inggaene ahik tun me puh maene ro bang kedanga tasir gisiameh, ge tang hingia per puh ro bang kedanga tolaia tasir gisiameh, ingga o uamoko tagu ponolaia. Ter hauon, inggaeit ro uoto bang kedang o uoto guata pono tar hararinin. ²Doh inggeig i ate pare, na nikedanga God re guata pe e guata uapono toro mana tasisit ra uoto guata tar hararinin. ³O namana tang God e turung bang kedang, kare tohotola tasisit ka guata pe tar hararinin, kare bangang duk totomua ko guata pono pe tar hararinin? ⁴Ahik paho bang paroko ke hamhamas peono totomua? Ue ahik paho namana uaduh tar puhono? Ahik paho banga tar niguata uaiaene ke guataiono ke heir pe totomua tar binaka tar uiuiria tenang niguata uasa, kara hik pah ke uolong heir me niduh totomua? Na niguata uaiaono ter tengkana tar uoum keip totomua maro uiuiria.

⁵Bo teeit torongo tuktukara, doh rongo mahang uiuir tenang niguata uasa, ingga misianangua pah ko uamoko toto tar niduh uleik re laig totoum tar marein re kotpokoso na nimaliana God, doh na nikedanga ger kodkodoh. ⁶rGe God pe e turung heir hahaua tasir tamata uakap e lampein tar haua ka guatain. ⁷Tasisit ra tur uanon, kara guata dede tar niguata uaia, inggon e turung heir tar niuangoulung tar mamang binakalik, teeit ra sir pe tar kale tar uiniator, kara ueltad, kara niuangoul gere moko dede tar mamang binakalik. ⁸sBo inggono puk e turung nimaliantiehe tun, kare tu-

rung heir tar niduh uleik tun tasisitir kupal geke de toro man, kara uakeluk tar niguata uasa. ⁹A niduh, kara uelmahing uleik e turung kotpokoso tasir tamata geke guata tar niguata uasa, e uakekene keip tasir Ju song o gime uan. ¹⁰Bo tasisit ka guata tar niguata uaia ra turung heiris tar uiniator, a ueltad, karo hiarou, uakekene keip tasir Ju song o gime uan. ¹¹Ge God pe e bang kedanga tasir tamata uakapa tar siokonor hagar.

¹²Ge God pe e turung mamantouo tasir gime uan ge ahik menas ualatut ger nang God, doh ra guata tar niguata uasa, gitiempe ahik pesina menas ualatut ger nang God. Kare turung kedanga tasir Ju geta guata tar niguata uasa gitiempe nas ualatut pesin ger nang God. ¹³Ge ahik peono paha ineteng longoro puk tar ualatut re uakodkodoho tar tamata tang God. Bo gisis puk ka longor, kara uakeluk tera turung uakalaharais o tamatar kodkodoho tar matana God. ¹⁴tO mana noman geta uakeluk per tamatang gime uan teres ninamana katongo, kara guata tar niguata uaia, gitiempe ahik pesina menas ualatut ger nang God, gisin ra uoto ualampirampe pare, ra ate, ge i lolono pe teres ninamanasin e uahirempe tar huar uia, kara huar sa. ¹⁵Temaene nas niguatasin e ualasila tena ualatut God a nibolo uahiala tasisin, doh res ninamana uaiasin e uahirempe tasisin, hape ra guata pe, dohe hire pono tasisina tar ineter uia ue a ineter sa. ¹⁶A puhuninanine e turung kotpokoso to tar marein re turung bang kedanga keip God tang Iesu Kristo tenas niuangoulur tamata uakap geke guata uaouoig. Tero hire teil pe ro uelhire rone ku meneio.

O Ju ra namana tar ualatut e matotong poul tasisin

¹⁷Inggou nag puhung mene tamiuoumur Juene rung uahinga to tar ualatut e poul tamiuoum. Karung uairanasium re aha to pelasioum tang God. ¹⁸O mana noman, inggoum mung ate a huar re malahirigion, karung iate tar huar uia, kara huar sa, teeit ka ualasila pelasioum tena ualatuton. ¹⁹Inggoum kung ate tunusiuoum pare, mung matotong uoum keip tasir kut, doh inggoum a luh tasisit tar kitup. ²⁰uKarung namana pare, mung matotong ualatut tasisit ahik mes niate, karung ualasila tasir keketik tar niguatar nang God. Teeit inggoum a namiuir ualatut, temaeit mung namanangua pare, mung iate tar mamang inetelik, kara mamang inetelik rung menegioum a man.

²¹vO mana tun, inggoum mung ualasila tasir gisiamer tamat, bo maeit ahikioum pah mung ualasila katongosioum? Inggoum mung hire tasir tamat, "O sa ro uenau." Bo inggoum ahik pah mung uenau? ²²Karung hire "O sa ro ur." Bo inggoum ahik pah mung guata tar puhon? Karung kula pare, "Dehen tung lotu tasir god bohoboh." Bo inggoum ae maene ahik pah mung ueltada tar ineter dedeil? ²³Inggoum mung uakai tunusiuoum rung ate pe tena ualatut God, bo inggoum puk ahik tun pah mung ueltada tang God, rung katego pe tar ualatut. ²⁴wTemaet pe no uelhire God o kula pare tar puhon, "Teoum ter tengkana maene ro kula no uelhire God pare, 'Ka mene uasainir hangana God i uantinanina tasir gime uan.'"

A niguatang poko tar tukunun

²⁵Nas niguatar Ju tar poko tar tukunun e uia to puk geta uakelukigir ualatut. Bo getung katego inggoum tar ualatut, inggoum mung uangoul sira tasir tamatasitier tabung pok, gitiemper nipoko peoum. ²⁶xDoh geta uakelukur gime uan tena ualatut God, God e turung banga keip tasisina tar siokonor hagar tasir Ju gesir nipok. ²⁷Temaeit o gime uan gera uakeluk tar ualatut, karo nitabung pok ra turung uakouh tamiu-oumur Ju, teeit a nibolo uahiua pe nami ualatut, karo nipok, bo inggoum puk o tamatang katego tar ualatut.

²⁸Ge a tamata pe ahik paha Ju teeit a nipoho tur pe toro matina tasir Ju ue teeit ka poko pein. ²⁹yAhik, a Ju tun te giner kodkodoho na niuangoul tar matana God. Doha niguatang pok ahik pahe lain tar poko tar tukunun, bo a uapalihinar niuangoul i lolono tar koloun gere uakotpokosoin na Iabena Dedeil God tar tamat ahik pah tar ualatut. Kara hikir tamata pah ra uatakai tatanon, bo God puk tere uatakai tatanon.

O Mahar 3

God a uauaman

3 Ia re uia tolar tamata geta peng Ju? Ue ia re uia tolar puhonener poko tar tukunun? ²A bureher hagarir uia. Uakik-ilangan no uelhire God o niheir uamato-toha tasir Ju.

³Hape ge paka tagorong bohor gisi-ameher Ju tonu uelhire God? A puhon e uamaluana tang God tar katego tena ualapagah? ⁴zAhik nomanampe! O tamata uakapa tun ra uoto boh, bo God me pahener uauaman. Misiana ro kula teil pe ro uelhire gero nibolo pare, “Ing-

gon e turung uakodkodoho toin tar haua re menein, kare turung pehuara geta tohotolain tar uelhehek.”

⁵Bo gete uakalahara nagi niguata uasaeig re uamana pe God, hapengua ri kula peeig? A saono tang God tar nimalian, kare heir me niduh tagigeig? A puhung dangataninanine e la tar puk tena ninamanar tamat. ⁶Ahik noman! Ge paka hik God paha guata uelmatout, hapengua re bang kedanga peono tar koto uakap? ⁷Me tamat e banotong kula pare, “Gete rogo bohoboho ko uakalahara tonu uauamana God, karo uauleik tena uinatoron, ae maene ra heirio tar niduh a tamatang guata pe tar niguata uasa?” ⁸Gete ko uakeluka tar nimananon, auiangua ponompe tar kula pare, “Geti guata pukulaeig tar niguata uasa ter uiantieh.” O tamata gera kula tar puhung kulononinanine ra turung uakouhis. Bo o gisiamehe puk ra uelsigal, kara tohotola pare, ter puhono ru ualasiraio.

Ahik me tang siokor tamatar kodkodoh

⁹aHapenguaon? Inggeimir Ju tesir tamata uaiantiehe? Ahik nomanampe! Geking ualasira manasa pe inggeim tasir tamata uakapa pare, o Ju ue o gime uan ra siokor uangoulumpe i kukulebanga tena nitampopokohor niguata uasa. ¹⁰Misiana ro kula pe ro uelhire gero nibolo pare,

“Ahik me tamatar kodkodoh,
ahik tun me tatang siokolik!

¹¹Ahik me tamatar naman manate ue e sir tang God.

¹²O tamata uakapa ka siokor turung tar mud tang God,

kara siokor guata tar niguata uasa,
ahik me tang sioko ke guata uaia,

^x2:26 Gal 5.6 ^y2:29 Ual 30.6; Kol 2.11

^z3:4 Ker 51.4

^a3:9 Roum 1.18–2.24; 3.23

ahik tun me tatang siokolik.” *Ker 14.1-3; 53.1-3*

¹³ “Nas menesin a sa tun kenar benge nar keu,

kara uauasisin a bohoboh.”

“A baranganar soi ke sosoro tur tar bilisisin.” *Ker 5.9; 140.3*

¹⁴ “A uauasisina ke uoun tar soul, kara mamangusul tar tang giameh.” *Ker 10.7*

¹⁵ “Gisin o karkarianalik tar tung pous,

¹⁶ Ia ra lasina ra mamantouo tenas niuangoulur gisiameh,

¹⁷ kara tele tar niguatang uelhiarou.” *Aisaia 59.7*

¹⁸ “Ahik tun me nisokoro tang God kaeig tasisin.” *Ker 36.1*

¹⁹ I ranahia tar mamang inetelikinin, inggeig ki banga manasa pare, a ualatut e lain tas mais ka heiris, ge a tengkana pe maeit ka heiriono mara uakelukusin, kara hik pah ra heir menas puh ka guata uasa pe, doh tar keipila tar koto uakapa tena uelheheke God. ²⁰ ^bGe ahik pe me tamata ra banotong uakodkodoho tolain tar matana God ke uakeluk pe tar haua re kulainir ualatut. Ge gitie pe geti ate uaia uaineig tena ualatut God, e la kalahara uainintiehengua ponor puhono tagigeig pare, ahik pe pahi uakeluk tananin.

Hape ri kotpokoso peeig pare, o tamata kodkodoho tar matana God

²¹ Bo gine puk daan, God ke ualasira tar giamehe siokor hagar tar kodkodoho tola tatanon, ahik pah tar uakelukunar ualatut, bo tar hagar ko hire teilin ro bolobolo sioununtieh tang Moses mesir propet tar ualapagah. ²² ^cInggeig ka uakodkodoho keipisieig tang God tar binaka ri tagorong mana tang Iesu Kristo tar kale liu teregi niguata uasaieig.

Doh inggeig uakapa ra siokor uelkarus turusieig tar siokonor hagarion, hingiamper tamata ue a haua ke kalekinalein, ge o tamata uakapa pe o siokono tar matana God.

²³ Ge o tamata uakapa pe ka siokor guata tar niguata uasa, ahik me tang sioko ke kale tar uiniatoror nang God.

²⁴ ^dDoh gitie daan tena hamhamas God geke heirheir pukin inggeig ki kotpokos o kodkodoh. Inggono ke guata keip tar puhono tang Iesu Kristo geke luaka liu teregi niguata uasaieig. ²⁵ God ke heir tatanon a uahung, maeit toro deuatinginon, inggon e turung kotpokos ter tamatang kuse luar teres niguata uasar tamata ra tagorong mana pe tatanon. Inggono ke guata pare, tar ualasira hape ke guata uelmatout pe. God ke guata uaelmatout tun, kara kodkodohonor binak ahik pe pah ke heir me niduh tasisit ka guata tar niguat uasa sioun. ²⁶ Doh inggono ke uaelmatout tun, kare guata uakodkodoho tun tar binakalainine binaka ke uatur uakalahara tasir tamatang guata tar niguata uasa tar kotpokos o kodkodoho tar matanon, teeit ra tagorong mana pesin tang Iesu.

²⁷ Temaeit mai re matotong uasalain? Ahik baka poluk me tamat, a puhonene ke kapa uakapangua. Kara hik pah ke kapa to tar hagarang uakeluk tar ualatut, bo ke kapa to tar hagarang tagorong man. ²⁸ Teeit ki kula manasa pe inggeig pare, ki kodkodoho to kompe tar matana God tar hagarang tagorong man, kara hik pah tar hagarang uakeluk tar ualatut.

²⁹ ^eInggoum mung namana pare, God nas God pukur Ju? Ahikiono pah nas God tagur gime uan? Ahik! Inggono nas God ponor gime uan! ³⁰ ^fA tang siokon sioun pukur God, kara siokon sioun pukur lelung haijala tatanon. Inggon e

^b3:20 *Ker 143.2; Roum 7.7; Gal 2.16* ^c3:22 *Gal 2.16* ^d3:24 *Roum 5.1*

^e3:29 *Roum 10.12* ^f3:30 *Ual 6.4; Gal 3.20*

uakodkodoho tola tasir tamata tatan tar siokon siounumper hagar, tar hagarang tagorong man. Gitiempe geto Jusin ue o gime uan. ³¹Geti uainete uleikeig tar nitagorong man, a ualatut e iinete-likingua? Ahik tun! A nitagorong man e guata tagigeig tar kotpokoso sira re malauehir per ualatut.

O Mahar 4

Na nitagorong mana Abraham

4 Hapengua ri kula pe inggeig tar puh-puh ke ueltparameig Abraham tam-agigeig gere kulkula teil tar puhung dangatene pare, a tamata ra uelkarus toin i lolono tar nitagorong man? ²Geto mana roono ke guata Abraham tar niguata uaia, doh ter niguatonene ke guata tatanon a tamata kodkodoh, auia inggono pake uairana tar hangan. Bo tar matana puk God, inggon ahik pah ke kodkodoho to tar hagarion. ³Ge no bolobolo God pe gero dedeil o kula pare. “Abraham ke tagorong mana tang God, temaeit God ke kila tatanon a tamata kodkodoh.”

⁴A tamata gere tuha tar kalekinale, kara bulauain, gitier bulauanon ahik pah ra kulain a ineteng uauah, ahik, bo a ineteng heir hahaua puk ka tuha peinir kalekinale. ⁵Bor tamata ra kilain a tamata kodkodoh, teit tena nitagorong man, kara hik pah tar kalekinale uaia ke tuhain, bo e tagorong mana tang God, teit re ate pe pare God tere banotong uamoko tasir tamata uasa ra kodkodoho keip tatanon. Ter nitagorong manonene, maeit re kila God tatanon a tamata kodkodoh.

⁶Debit ger toia teke mene tar puhene ke hire sir pe tena niuahar tamata geke kilain God a kodkodoho tar matanon, gi-

tiempe ahik peono pah ke uakeluk uaia tena ualatut God.

⁷“O tamata geke kuse luaraig nas niguata uasa kara malabobourig, gisina tera banotong uah.

⁸A tamata ge ahikir Tamata Nomana pahe toho tagu tola tatanono tena niguata uasa

inggono tere banotong uah.” *Ker 32.1-2*

⁹A niuahonene a nas pukusisir nipoko ue a nas ponosisir tabung pok? Inggeig ki kula pare, “Abraham ke tagorong mana tang God, temaeit God ke kila tatanon a tamatar kodkodoh”. ¹⁰Mangiha ke kotpokosor puhonene? I muduhiaono ka poko baka peono ue i uoumuhia? Ahik dehono pahi muduhia bo i uoumuhia!

¹¹ⁱDoh Abraham ka pokoin, a hagarang uanasa tatanono ke tagorong mana pe tar binaka halana haraha ta pokoin. Temaeit inggono ter tamasir tamata uakap a gera tagorong man, bo ahik puk paho nipoko mare kila pono God tagigeig o tamata kodkodoho pon. ¹²Doh inggon a tamas ponositir nipok, ahik paho nipoko puk bo ka uelhir sira tar nitagorong mana geke uakelukin Abraham i uoumuhia tar binaka halan ta pokoin.

Na ualapagah God ra kale keipin tar nitagorong man

¹³^jInggon ahik pah tar hagarang uakeluk tar ualatut ke kale to Abraham meso bunguna tar ualapagah a tar kale tar koto uakap. Ahik! Abraham ke tagorong mana tang God, kare kilangua God tatanon a tamata kodkodoh. ¹⁴^kGete gisit puk ka uakeluk tar ualatut ra kale tar mamang inetelik ke ualapagahaig God, a niguatang tagorong mana ra uaiinetelik

pukunguain, doh na ualapagaha God a tabo tengkanangua. ¹⁵lGe a ualatut pe, e heir hagar tena nimaliana God, bo iar butur ahik me ualatut, ahikingua pono me katego tar ualatut.

¹⁶mA mamang inetelik e haono to tar nitagorong mana tang God, teeit tena nimalaelhirono menia tena niueldolomo tagigeig, maeit a ualapagaha ra turung kale nomananguain ro bunguna uakapa Abraham, ahik pah gisit puk nas ualatut, bo gisis uakapa pono ka tagorong mana sira tun tang Abraham ge tamagigeig. ¹⁷nO mana tun temaeit ro kula teil no bolobolo God gero dedeil pare, “Inggo ku guata totomua a tamasir burehe ro uan.” A puhono ke kotpokos, teeit Abraham ke tagorong mana tang God gere uoto heir tar nitua tasisit ka mat, kare uelhire tar inetelanit i uoum ahik pah ke mokome sioun.

¹⁸oAbraham e tele hape re turung guata pe God tar ualapagaha ke guatain, bo ke tagorong mana teil tun puk tar inetenin e turung kotpokos. Maeit ke kotpokoson a tamasir burehe ro uan. A siokono ro hire teil pe no uelhire God pare, “O bungumua ra turung burehentiehe sira tun tasir pitopit.” ¹⁹pAbraham ahik pah ke punga sikoro baka na nitagorong man, gitiempe no hangaulur hangaul manasa pe no krismas, doh ke mahohontiehe tun manasa pon, doh Sara ke pipigogolik tun manasa pon, kara bouh tur sioun.

²⁰Bo ahik pukumpe Abraham pah ke tagorong boho sikor na nitagorong manono ke popokoho uain kaleh, doh tar puhonene, ke heiringuaono tar uinatoro tang God. ²¹Inggono ke tagorong manantiehe tun pare, God e banotong guata tar huar inete ke ualapagahain. ²²qDoh teeit tena nitagorong manon,

God ke kilangua tatanon a tamatar kodkodoh.

²³A puhene, “Ka kilain a tamatar kodkodoh.” Ahik pah ka boloin tatanono puk, ²⁴bo tagigeig pon. Inggeig ki tagorong mana tang God geke uatentur tapokis tang Iesu nagi Tamata Nomaneig, inggon e turung namana to teregi nitagorong maneig, kare kila tagigeig o tamata kodkodoh. ²⁵rInggono ka tung pousin, teeit teregi niguata uasaig, kara uatentur tapokisin mare kila tagigeig o tamatar kodkodoh.

O Mahar 5

O hiarouo kara niuah

5 Gine ka uakodkodoho to manasa pesieig tar nitagorong man tar matana God, temaeit o moko keipingua ro hiarou tagigieg menia tang God tang Iesu Kristo ge nagi Tamata Nomaneig. ²Teeit teregi nitagorong maneig, temaeit Kristo ke keip tagigeig tar butur ri kale tar nimalaelhir menia keip tar nipoul gine ri uangoulieig. Kari uahauaha ri tagorong mana teil pe tena uinatoro God. ³sAhik pah tar puh pukuon, bo i uahauaha pono teregi niduh ri ate teil pe pare, a niduh auia tagigeig e poul tagigeig tar kale tar niate hape ri huata bolongur pe tananin.

⁴Gete ki huata bolongureig tar niduh e uakotpokosonguar puhono pare, God e uaha tagigeig, teeit ri tur uapopokoho pe tar niduh re kotpokoso tagigeig, doh inggeig i tagorong mana teil tang God tar poul, kare uelkarus tagigeig. ⁵A nitagorong mana ri uangoul keipisieig ahik pahe uahagouo uasa tagigeig, teeit God ke uakalahara tun manasa tena ni-

^l4:15 Roum 3.20; 5.13 ^m4:16 Gal 3.7 ⁿ4:17 Uak 17.5 ^o4:18 Uak 15.5

^p4:19 Uak 17.17 ^q4:22 Uak 15.6 ^r4:25 Ais 53.4-5 ^s5:3 Jas 1.2-3; 1Pi 1.5-7

malaelhir tagigeig tar Iabena Dedeil geke heirin.

⁶Teeit tar binaka tun ka uamatotoin, binak ahikieig meigi nitampopokoho tar poul katongosieig. Kristo ke mata ueleheir tagigeigir tamatang guata tar niguata uasa. ⁷Ge ahik pe mo bureher tamata ra marang mata ueleheir tar tamata ger kodkodoh, bo ge paka tamata uaia tiehe tun pukuon, song here kaein me tamata re mata ueleheir tatanon. ⁸Bo God ke marang ualasira uakalahara puk terener nimalaelhir tagigeig tar puhonene tar binaka ki guateig tar niguata uasa, Kristo ke mata ueleheir tagigeig.

⁹Gitie ka uakodkodoho keip manasa pesieig toro deuatingina Iesu, inggon e turung uelkarus turungua ponompe tagigeig tena nimaliana God. ¹⁰Ge tar binaka pe ri uelmatan haraheig tatanon, inggeig ka ueliu tapokisisieig tang God tono mater tunon. Doh gine daan inggeig ki kotpokos o bung kaluanon, temaeit inggeig ki banotong ate uaia tunungua pare, tena nitua Iesu inggeig ra turung uelkarus turusieig tena nimaliana God. ¹¹Ahik pah tar puh pukene, bo i uahauhantiehe tun pono tang God tang Iesu Kristo tenagi Tamata Nomaneig geke uakotpokoso tagigeig o bung kaluana God!

Adam ke uakotpokoso toro mat bo Iesu ke uakotpokoso tar nitua

¹²Temaeit a niguata uasa ke kotpokoso tur tar tang siokon siounur tamat, nu Adam, doh na niguata uasaono ke uakotpokoso toro mat. Temaeit ko la uakapangua ro mata tasir tamata uakap, teeit ka siokor guata

pesina tar niguata uasa. ¹³W Tar binaka halanar ualatut ta heirig, a niguata uasa e moko manasampeane tar kot. Bo tar butur puk ahik me ualatut, God ahik pahe uakouh me tamat. ¹⁴Bo tena binaka Adam e tuka tena binaka Moses, o tamata uakapa ka mat, teeit Adam ke katego tena ualatoho God, gitiempe ahik pesina pah ka guata uasa sira tang Adam. Adam misiana paha niparoko tar tang sioko gere turung lame.** ¹⁵Bo rasina puk ahik paha toking siokon. Teeit a inete uaia ke heirheir pukin God ahik paha siokono keip tar puhung siokon siounur niguata uasa ke guatain Adam. O mana noman, o bureher tamata ka mat, teeit ke guata uasa per tang siok, bo na nimalaelhir puk God a i rana uain. Temaeit a inete uaia ke heirheir pukin God e la tasir bureher tamat tena niguata uaiar tang siok, nu Iesu Kristo. ¹⁶Inngo u hire uapoul poluk tar haua ke kotpokos, bo tar giamehe pukur hagar. A inete uaia ke heirin God ahik paha siokono tar niguata ke guatain Adam. Ge tar puhung siokon sioun per niguata uasa ke guatain Adam ke guata tang God e ualakouh tasir tamata uakap, bo inggeig puk nagi inete uaia a niheirheir puk ke uahue pe God e kila tagigeig o kodkodoh, gitiempe ki kouh peig tar bureher niguata uasa. ¹⁷Tena niguata uasa pukur tang siokor tamatonene Adam, ke guata tagigeig ki uangoul i kukulebanga tena nitampopokoho ro mat, bo tasisit puk geka kale tena nimalaelhir God menia tar nipoul, doh na inete uaia ger kodkodoh, ra turung uangoulung uah ka touahiu peinir niguata uasa, doho mat tar tang siokor tamat Iesu Kristo.

**5:14 Pare, na niguat Adam ke la guata uasa tasir tamata uakap, bo i muduhia na niguata Iesu ke la guata uaia tasir tamata uakap

[†]5:8 Jon 3.16; 1Jo 4.10 ^u5:9 Roum 1.18; 2.5; Epe 2.3-5

^v5:12 Uak 3.6; Roum 6.23 ^w5:13 Roum 4.15

^{18x}Temaeit, tena niguata uasansioun pukur tang siokor tamatonene Adam, God ke uakouhungua tagigeigir tamata uakap, te misiana kompe tena niguata kodkodohor tang siokor tamat Kristo, God ke kila tasir tamata gera tagorong mana tang Kristo o tamata kodkodoh, kare heir tar timuhur nitua tasisin. ^{19y}Te misiana kompe tono mahang longoror tang siok, nu Adam, maene o burehe ka kotpokos o tamatang guata tar niguata uasa. Temaeit puk pono tono longlon-goror tang siok, nu Kristo, o burehe ra turung uakodkodohonguais.

²⁰A ualatur ka heirig mare bureher niguata uasa. Bo ia puk re mokor burehentiehe niguata uasa, na nimalauelhir God e la burehentiehe uain. ^{21z}Sioun o tamata uakap ke uoum keipis na nitampopokohor niguata uasa, kare uamata tasisin, bo gine puk daan, na hamhamasa God ke uoum keip kaleh, maeit ke uatur keip tagigeig tang God pare, o kodkodoh, kare uoum keip tagigeig tar niuangoulung tar mamang binakalik tang Iesu Kristo nagi Tamata Nomaneig.

O Mahar 6

Na nitampopokoho ro mat ka uatakoutin

6 Pake hape ri kulangua pe inggeig? Paki guata ualataunumpela tar niguata uasa mare heir uaburehe God tena nimalauelhir keip tena nipoul? ²Ahik dehon! Inggeig ki mata tar niguata uasa, hape maeit ri la uangoul keip baka polukueig tar puhoun? ^{3a}Ue ahik pah mung iate pare, inggeig uakapene ka uahuhu tagusieig tang Iesu Kristo, ka uahuhu tagusieig tono maton? Te misiana kompe ki mata tagu pe inggeig tatanono tar korose.

^{4b}Temaeit tar uahuhu, inggeig ka keu tagusieig tatanon, kari uangoul teil tono maton, maeit misiana ka uatentur tapokis keip pein Iesu Kristo toro mat tar balbalana na nitampopokoho tamagigeig, inggeig i banotongua pon i uangoul tar timuhur niuangoul.

Inggeig i turung tua tagu tang Iesu Kristo

⁵Gitie ki uangoul tagu pe inggeig pare, tono maton, inggeig i turung uiliodout keipingua pono tatanono ke tua tapokis pe. ^{6c}Ahik pahi malabobour tenagi niuangoul ger pensioun ka uakuse keipeig tang Kristo tar korose, maeit a tukunugigeigininer uoum tar niguata uasa ahik baka poluk mena nitampopokoho tar kale uahiuu tagigeig mara hikieig pahi uangoul baka poluk o tamatang kalkalekinale puk tar niguata uasa. ⁷Ge a tamata pe geke mat ka luaka liu tur manasain tena nikaueker niguata uasa. ⁸Gitie ki mata keip pe inggeig tang Kristo, inggeig i tagorong mana pare, i turung uiliodout keip tatanono tena timuhur niuangoul. ⁹Inggeig i ate pare, Kristo ke tentur tapokis tur toro mat, kara hik pahe turung mata uapoul poluk. O mat ahik baka poluk mena nitampopokoho tar kale uahiuu tatanon. ¹⁰O mata ke mateion, ke mata uasiokon siounumpe tar siokor binaka tar niguata uasa, bo daana puk a niuangoul re uangoulion, e uangoul tar balbalana na nitampopokoho God. ^{11d}Temaeit inggoum mung banga katongonguasioum pare, kung mata tar niguata uasa, karung banotong tua to tang God tang Iesu Kristo.

^{12e}Temaeit ahikioum pah mung uamaluana tar niguata uasa e uoum keip tenami niuangouloum, karung longoro tar nimalara uasang tar tuku-

^x5:18 1Ko 15.22 ^y5:19 Ais 53.11 ^z5:21 Roum 6.23 ^a6:3 Gal 3.27

^b6:4 Kol 2.12 ^c6:6 Gal 5.24 ^d6:11 2Ko 5.15; Gal 2.19 ^e6:12 Uak 4.7

nun. ^{13f}Ahik pah mung uamaluana tar maharanar tukunumi a ineteng guata keip tar niguata uasa, bo mung heir-sioum tang God misiana tasisitie ka kale tapokis turis toro mat, kara tua. Karung heir tar maharanar tukunumi tang God pare, a ineteng guata keip tar ineter kodkodoh. ^{14g}Ahik pah mung uamaluana tar niguata uasa nami tamatang uoum keipoum marung longoro inggoum tar hua re malaragion, ge inggoum pe ahik pah mung uangoul i kukulebanga tar ualatut, bo i kukulebanga tena nimalaelhir God, doh na niueldolom.

Inggeig tesir tamatang kalkalekinale puk tar niguatar kodkodoh

¹⁵Hape ri kulangua pe inggeig? I guata tar niguata uasa, teeit ahik pe pahi uangoul i kukulebanga tar ualatut, bo i kukulebanga tena nimalaelhir God, doh na niueldolom? Ahik dehon! ^{16h}O mana tun, inggoum mung iate pare, tar binaka rung tanganasoum tar longoro me tamat, inggoum no tamatang kalkalekinale pukur tamatene kung longoroin, gitiempe geta niguata uasaon gere uakotpokoso toro mat ue o longlongoro gero uakotpokoso tamiuoum o kodkodoho tola tang God. ¹⁷Bo a uatakai puk e la tang God, teeit sioun, gitiempe kung uangoul sira peoum o tamatang kalkalekinale puk tar niguata uasa, bo gine daan inggoum kung malarantiehe tun karung uakeluk uelhir tun puk tena niualasira Kristo ka heirig tamiuoum. ¹⁸Inggoum ka luaka liu tur manasasoum tar niguata uasa, karung kotpokos o tamatang kalkalekinale puk tar niguatar kodkodoh.

¹⁹Inngo u uamisiana tola tena niuangoulur tamata pare, tar tamatang kalkalekinale puk, doh na tamata uleik,

teeit a parakukuh peono tamiuoum tar naman manate tar ineter nang God. Ter siokono sira kompe kung uoto heir peoum tar maharanar tukunumi e kotpokos a tamatang kalkalekinale puk tar tamatang uoum keip uasa, karung guata toro ur, doha mamang niguata uasalik, karung la kotpokosongua o tamata uasantiehe tun. Temaeit gine daan inggoum mung heir sira manasa tar maharanar tukunumi e kotpokos o tamatang kalkalekinale puk tar tamata uleik ger uia mare uakotpokosono tamiuoum tar pilese tar niuangoulur kodkodoho marung kotpokosoum o dedeil.

²⁰Tar binaka kung kalkalekinale pukuoum tar niguata uasa, inggoum ka luaka liu turusoum tena nikaueker kodkodoh. ²¹Tar binakon, a hauanguar bulauana kung kale turugioum tar ineterung matala keipig daan? A inetenin e uakotpokoso puk toro mat. ²²Bo gine puk daan, ka luaka liu manasa pesioum tar niguata uasa, karung kotpokos o tamatang kalkalekinale puk tang God, a bulauana rung kalegioum e poul tamiuoum tar uangoul tar niuangoulur dedeil, kare uakotpokoso tar niuangoulung tar mamang binakalik. ²³ⁱGe a bulauana per niguata uasa tero mat, bo na inete uaia God geke heirheir pukin ter niuangoulung tar mamang binakalik tang Iesu Kristo nagi Tamata Nomaneig.

O Mahar 7

Inggeig ahik baka poluk pahi uangoul teil tena nikaueker ualatut

7 Ro bung uanotoug, inggo u mense tasisit ra ate tar ualatut, Inggoum mung ate pare, a ualatut e la kaeke uatuka puk tar tamat e tuka gete

^f6:13 Roum 12.1 ^g6:14 1Jo 3.6 ^h6:16 Jon 8.34; 2Pi 2.19

ⁱ6:23 Roum 5.12,15

mat. ²Misiana pare, a ualatut e kula pare, gete ler kuah, inggon e uangoul keip tena bulout e tuka gete maton, bo gete mata puk na buloutuon, inggono ka kale liu manasain tena ualatut ro le. ³Doh tar binaka re tua haraha na buloutuon, kare le polukuono me tang giameher bulout, inggono ke guatangua toro ur. Bo gete mata puk na buloutuon song ka luaka liuiono tar ualatut, kara hik pahe guata toro ur tar binaka re le poluk.

⁴JTemaait ro bung uanotoug, inggoum kung mata pono tena nitampopokohor ualatut tar binaka kung mata tagu tang Kristo tar korose, doh gine daan inggoum mung uiliiodout keip tar tamata geke tua tapokis tur toro mat marung banotong uakotpokosoum me kukuanana uaia ter niguata uaianinar nang God. ⁵Sioun tar binaka ki uangouleig i kukulebanga tar nimalara uasang tar tukunugig, a ualatut ke uatentur tar nimalara uasaninanine gere uakotpokoso tar nimalara uasang tar tukunun gere keip pokoso toro mat. ⁶kBo gine puk daan, inggeig ka luaka liu tur manasasieig tar ualatut ki mata keip pe tang Kristo, doh ahik baka poluk pah ra uoho uanonosieig i lolono tena nitampopopokohor ualatut. Gine daan inggeig i kalekinale tun tang God, kara hik pahi uakeluk tar ualatut, bo tar uakeluk tar timuhur hagarir nanar Iabena Dedeil.

Na ualatut God ke ualasira tagigeig a hauar niguata uasa

⁷lTemaait hape ri kulangua pe inggeig? A ualatut a sa? Ahik dehon! A ualatut ahik paha niguata uasa, bor ualatut teke ualasira totoguo tenag niguata uasa tar haua ku guata uasain. Ge paka hikir ualatut pahe kula pare,

“Ingga ahik paho gehe tena ineter tang giameh.” Inggo paka hik pahu ate tenag niguata uasanine tar geh ue tar nimalara uasanine re ouiouane i lolono totoug. ⁸Bo ter ualatutonene ke uatentur tar niguata uasa, kare uakotpokoso tar bureher kahakahar geh totoguo. Ge paka hik me ualatut, a niguata uasa paka hik mena nitampopokoh.

⁹Sioun inggo ku uangoul uaia tar binaka ru tele tar haua re uahingaigir ualatut, bo tar binaka puk ku me ateo tananin, song ke me kaleior nimalara uasang tar tukunug tar gehe tenas ineter gisiamer tamat, temaait rogo mahang longoro tena ualatut God ko aha liuungua totoguo tang God. ¹⁰Ku tupara tun tar ualatutunitie pake tere ueliu totoguo tar leleng tar nitua, bo ke ueliu puk totoguo toro mat. ¹¹mGe a niguata uasa pe ke uelour keip tar ualatut totoguo, kare uiliatung pous puk totoguo. ¹²nTemaait a ualatut a dedeil, doha ualatoh a dedeil, kara kodkodoh, kara uia.

¹³Doh hapenguaon? Ter ualatut ger uia ke aha liu totoguo tang God? Ahik dehon! Bor ualatut ke guata mara bang parokoinir niguata uasa pare, a sa tun. A niguata uasa ke aha liu tur totoguo tang God tena ualatut ger uia, teeit ku mahang longoro peo tananin. Temaait ki ate uaia tur tunungua inggeig tar ualatut pare, a santiehe tun.

¹⁴Inggeig i ate pare, na Iabena Dedeil God teke heir tar ualatutunin, bo inggo a tamata puk pon ahik paha dedeil, ka uabulauaia a tamatang kalkalekinale puk tar niguata uasa. ¹⁵oInggo ahik uadeilimpe pahu naman manate katongoio. Ge u marang guata tun pe tar ineter kodkodoh, bo ahik puk pahu guat. U guata kalehe puk tar inetenitie ahik pahu marang guataig, a inete ru degio.

^j7:4 Roum 6.2,11 ^k7:6 Roum 6.4; 8.2 ^l7:7 KT 20.17; Ual 5.21

^m7:11 Uak 3.13 ⁿ7:12 1Ti 1.8 ^o7:15 Gal 5.17

¹⁶Doh getu guata inggo tar inet ahik pah ku marang guatain inggo misianangua pah ku uauia tar ualatut. ¹⁷Bo ahik puk pah inggo ru guata tar puhon, inggono ter niguata uasaene i lolono totoguo re guata totoguo tar guata tar niguata uasaninanine.

¹⁸Inngo u ate ahik me inete uaia kaeig totoug i lolono tar tukunug. Hingiamper hagar ru marang kauiurio, ahik nomanampe pahu matotong guata katongoio tar guata tar niguatar kodkodoh. U malar, bo ahik puk pahu matot. ¹⁹Getu marang guato tar inete uaia, ahikimpe pahu guat. Doh getu uedango ahik pahu guata tar niguata uasa, u guata belehu kompela. ²⁰Bo getu guata inggo tar haua ru dein matu guat, inggon ahik pah teo tun ru guata tar puhon, bo e guatainir nimalara uasang tar tukunuguonine re moko totoguo.

²¹Temaeit ku tuparangua inggo tar puhon a man. Misiana getu marang guata inggo tar ineter uia, a nimalara uasang tar tukunuguonine e toto uoum tar kotpokos, kare guata totoguo tar guata tar niguata uasa. ²²Ge i lolono pe totoguo u malauelhir tun tena ualatut God. ²³^pBo a giamehe pukur nitampopokoho gine re kalekinale i lolono totoguo, dohe uiliatung keip tereg ninamano. A nitampopokohon e uoumuoum teil tar uiliatung, kare guata totoguo a tamatang kalkalekinale puk tar nimalara uasang tar tukunug i lolono totoug. ²⁴Kuano, a sa nag niuangoul, karu uaueldolomolikio. Mai re turung luaka liu tur totoguo tenag niuangoul uasa mara hik God pahe aha liu totoguo tatan? ²⁵^qUatakai tang God a tengkana te Iesu Kristo nagi Tamata Nomaneig tere turung luaka liu totoguo!

Temaetingua totoguo katong, doh tereg ninamana uakap u kalkalekinale

pukungua tena ualatut God, bo i lolono tar nimalara uasang tar tukunuguo, inggo a tamatang kalkalekinale puk tena nitampopokohor niguata uasa.

O Mahar 8

A niuangoul tar Iabena Dedeil

8 Temaene tar puh ku mene mana-saio, ahik baka poluk me puh ra uakouhin tasisit ra uangoul tokaha keip tang Iesu Kristo. ²Ge tang Kristo pe na nitampopokohor Iaben geke heir tagigeig tar timuhur nitua, ke luaka liu tur pe tagigeig tena nitampopokohor niguata uasa doho mat. ³Ge a haua pe ke matoto leuein na ualatut Moses tar guat, teeit a maluana per tukunugigeigener uoun tar niguata uasa, God ke matotong guat. Inggono ke heiruha tar tuna katongo tar me kotpokos a tamata sira tagigeigener uoto guata tar niguata uasa, bo inggono puk a nimalara uasang tar tukunun ahik pah ke matotong uoum keip tatanon. God ke heiruha tatanono tar me kale uelmahing teregi niguata uasaig. Temaetingua ke tohotola, kare heir uelmahing tatanono misiana pah teke guata tar niguata uasa. ⁴^rMaeit a huar ineter kodkodoho re uahingagair ualatut ra banotong tupara toig tagigeigene ahik pahi uangoul teil tar niuangoulung sioun, bo tena niuangoulur Iaben.

⁵Ge gisis pe ra uakeluk tar nimalara uasang tar tukunun, ra uamoko teres ninamana tar haua re malaragair tukunus. Bo gisis puk ra uakeluk tena nimalarar Iabena Dedeil, ra uamoko teres ninamana tar haua re malarainir Iabena Dedeil. ⁶Gisis re moko res ninamana tar inete re malaragair tukunus e uoum keip res ninamana tatas ra haiala toro mat. Bo gisis ra uamoko teres ninaman tar

Iabena Dedeil, ra uoum keipis tar nitua, karo hiarou. ⁷Ge gisis pe ra uamoko teres ninamana tar inete re malaragir tukunus ra uelmatan tang God. Ge ginina pe ahik tun pahe uakeluk tena ualatut God, ahik tunumpe. ⁸Gisis re uoum keipisir nimalara uasang tar tukunun, ahik tunumpe pah ra banotong uauaha tang God.

⁹Bo inggoum puk ahik tagu pahe uoum keipir nimalara uasang tar tukunun, inggoum e uoum keip teilir Iabena Dedeil, ge pake uangoul teil tamiuoum. Doh gete me tamata tabo teilin na Iabena Kristo, inggon ahik paha nang Kristo. ¹⁰Bo gete uangoul teil Kristo tamiuoum, a iabeimiuoum e tua, teeit God ke kula tamiuoum o kodkodoh, gitiempe gete turung mater tukunumioum tar niguata uasa. ¹¹Gete kare uangoul teilir Iabeneit ke uatentur tapokis tang Iesu tamiuoum, git ke uatentur tapokis tur tang Iesu toro mat, e turung heir pono me nitua tar tukunumioumunit re turung mat tar Iabena re uangoul teil tamiuoum.

¹²Temaene ro bung uanotoug, a kalekinaleon a nagigeig tar uangoul uakeluk sira re malauehir pe na Iabena God, kara hik pah tena nimalara uasar tukunun. ¹³Ge gitie pe getung uangouloum tar nimalara uasang tar tukunun, inggoum mung turung mat, bo getung uakenua keipoum tena nipoulur Iabena Dedeil tar uakeluk tar niguata uasa, kung guata keipig tar tukunumiou, inggoum mung tua. ¹⁴Teeit gisis pe re uoum keipis na Iabena God o bung tuna God.

¹⁵vwGe a Iabena Dedeil pe geke heirin God tamiuoum, ahik pah ke guata tamiuoum o tamatang kalkalekinale puk, kare uasokoro tamiuoum, bo ke ueluarur tamiuoum o bung tuna tun God. Doh

tena nitampopokohor Iaben temaetingua ri kiring taroeig tang God pare “Tamoug! Kuhur tamoug.” ¹⁶xNa Iabena Dedeil God e ueltumana keip tar iabegigeig tar hire toro mana pare, inggeig o bung tuna tun God. ¹⁷Doh gitie o bung tuna God peeig, inggeig tesir tamatang kale uahiuangua tene inete uaia God, uakikilangan, inggeig no tamatang kale uahiuua God, dohi siokor kale uahiuua tokahanguampe mes Kristo geti huata uelkout tena niduhon mari la uangoul tagu tena uinatoron.

A uinatoro uleik e turung kotpokos

¹⁸Inngo u ate teil tar niduhung daan, ahik paha inete uleik tagigeig tar huatala tar banga keip tar uiniatoreit ra turung ualairain tagigeig. ¹⁹A mamang inetelik ke touoig God e uahuahing, kare malarantiehe tun tar bang, kare tagorong mana teil tun tar mareineit i uoum re turung ualaira God mais tun ro bung tun. ²⁰yGe a mamang inetelik pe ke touoig God ke binirig, dohe turung mat, kare beng. Ahik pah tena nimalara katong, bo tena nimalara God geke tengkana tananin, maeit ke guata pare, a mamang inetelik ke touoigion e tagorong mana teil pare, ²¹e turung luaka turig tena binir God. Song re heir tananina tar siokonon uinatoror nas ro bung tuna God, kara uangoul o niluaka liu ahik pah ra turung mat, kara beng.

²²Ge a mamang inetelik pe ke touoig God ke homalame tar uelmahing misianar uelmahingina ro poh e me tukene daan. ²³zAhikiono paha inete pukunine ke touoig God ke hagouo uelmahing, bo inggeig ponene geki kale tena Iabena God ter uakikilanganar ineter uia ke heiriono tagigeig ki hagouo uelmahin-

⁸8:9 1Ko 3.16; 12.3 ¹⁰8:10 Gal 2.20 ¹¹8:13 Gal 6.8; Kol 3.5

¹²8:15 Mak 14.36; 2Ti 1.7 ¹³8:15 Gal 4.5-7; UGO 21.7 ¹⁴8:16 2Ko 1.22

¹⁵8:20 Uak 3.17-19 ¹⁶8:23 2Ko 5.2-4

gane i lolon, ri uanguangoul pe tar binaka re hire tauete God tagigeig pare, o bung tun, kare uatimuh tar tukunugigeig misiana ke ualapagaha pe. ²⁴Ge tar binaka pe ke uelkarus God tagigeig, inggeig ki tagorong mana teil tang God e turung guata tar ineteninane tagigeig. Teeit inggeig i ate pare, gete ke kale manasa me tamata tar haua ke uanguangoulin, ahik baka poluk pahe uanguangoul tar inetonene. ²⁵Bo geti tagorong mana teileig tar haua halan ti kalein, inggeig i uanguangoul hamas, kari iate tun pare, a ineton e turung kotpokosompe.

²⁶Ter siokono komper hagar, a Iabena Dedeil e poul pono tagigeig, teeit inggeig o maluan, kari tele paka haua tun ri lotu uatuhin, bo ter Iabena Dedeilonene re dangata tutup ueleheir keip tagigeig tang God tar nikiring, kara nihagouonitie ahik pah ra matotong ualasira taueteig. ²⁷^aDoh God gere banga hihir tun tar kolougigeig e ate tena nimanar Iabena Dedeil, teeit a Iabena Dedeil e dangata tutup ueleheir toso tamata God, dohe uakeluk to tun tena nimalaron. ²⁸^bDoh inggeig i ate pare, tar mamang inetelik God e uakotpokoso tananin auia tasir tamata gera malaelhir tatanon geke uamatotois pare, o nanon, teeit gisis o to tengkana tatanon. ²⁹^cGe gisit pe re atensiounis God ra turung tagorong man, inggono ke uamatoto tanik tasisina ra turung misiana sira tar tunon. Tar hagarion ter tunono tere uamunangua toso bung tahinasisir burehe toso bung tuna tun God. ³⁰Temaait gisis ke kila uamatotois God, inggono ke kila tasisin, doh tasisinasis ke kila sioun, inggono ke uakodkodoho tola tasir tamata tatan, kare uelpakaha keip tasisina tena uiniator.

Ahik uadeil me inete re banotong tur tane tena nimalaelhir God tagigeig

³¹^dMe haua baka poluk ri banotong kulalaseig tar ineteninane? Gitie re poul pe God tagigeig, kaein me tamata re banotong tur tane tang God tar poul tagigeig? ³²O mana noman, God ahik pah ke ut tar tun tar me kale uelmahing, bo ke heir tatanono tagigeig. Doh gete pagiaron, inggon e turung heirheir pukungua pono tar mamang inetelik tagigeig.

³³^eMai re banotong tohotola tasir tamata geke uamatotois God? Ahik me tamat, ge God pe ke kuse luara manasa tenas niguata uasa no tamat. ³⁴Bo maiono re turung uakouh tagigeig? Iesu Kristo? Ge inggono pe teke mata uelhir tagigeig, kare tua tapokis poluk, dohe tabila tar butur re mokor uleikir ueltad i uahuhut tang God, kare dangata tutup ueleheir taro tagigeig tang God tar poul tagigeig.

³⁵Hingiar puh re banotong pakaha liu tur tagigeig tena nimalaelhir Kristo? A niduh gera heirigir tamata tagigeig? Ue gete parakukur niuangoul ue geta guata uasa mo tamata tagigeig o tamatang tagorong mana pe? Ue gete ualor gog, karo palapal, karo tabotana tun tar mamang inetelik? Ue geti uangoul tar niuangoulur ualakanuh ue a ualaskor? Ue geta uiliatung pousieig? ³⁶Misiana re kula teil per puh pare, tonon uelhire God, "Teeit nongo tamata pea tamiueim, O mat o ueltupar a ualataunungua tamiueim, inggeim ra banga siranguasieim tasir sipsipisitier nikaleuatoro tanik tar tung pous." *Ker 44.22*

^a8:27 Ker 139.1 ^b8:28 Epe 1.11 ^c8:29 Kol 1.18; Hib 1.6

^d8:31 Ker 118.6 ^e8:33 Ais 50.8-9

³⁷A mamang inetelikininanine e pokoso noman, bo inggeig puk i turung pehuar, teeit Kristo, gere malaelhir tagigeig, gine manasa re poul tagigeig.

³⁸⁻³⁹Ge inggo pe u ate tun pare, ahik uadeil me inete re matotong pakaha liu tur tagigeig tena nimalaelhir God tar haua ke guatain Iesu Kristo nagi Tamata Nomaneig tagigeig, o mat ue a nitua, o anggelou ue o liouana uasa, a inete re pokosene daan ue e pokosolaeit i uoum ue me inete tampopokoh, ue me ineteng ran ue tar laur ger tungun ue me inete baka poluk ke touoin God.

O Mahar

Poul e ueldolomo tasir Israel ahik pe pah ra tagorong mana tang Iesu

9 Inggo u mene toro man, inggo e matoto teilio tang Kristo, kara hik pahu boh. Reg ninamanonine re uoum keip teiligir Iabena Dedeil e uahire tar haua ku hiregio a man. ²Inggo reg ni- ueldolomo uleik tun dohe uelmahing dedeinir koloug, ³tosnogo tamat, o tahigulik tar poul tasisin. Inggo u maha ge pakene inggo katongono re birio tang God tenas buturusin, kare aha liu tur to- toguo tang Kristo. ⁴God ke uamatoto tun tasisisir Israel o bung tuna tun, kare ualasira tena uinatoro tasisin, ke uel- hote keip tasisin, kare heir tasisina tena ualatut. Doh gisina teka ualasira tunis tar niguatang lotu, doh ka kale tar in- ete ke ualapagahaig God, ⁵Doh gisina teso bungus tun ro bung tubugigeig nu Abraham, Aisak, doh Jekop, doh Kristo ke tamata pe tere la tur tasisinar Ju. Inggono tenas Godor mamang inetelik, ra uatakaiaian tar mamang binakalik! O man.

⁶Inggo ahik pahu kula pare, no uelhire God ko boh, doh ahik pah ko uakeluk tar ualapagah. Ge ahik per Israel uakapa pah no tamata uakapa God. ⁷^hAhik pah teeit o bunguna pe Abrahamasin, maeit ra siokor kilaisisin o bung tuna Abra- ham. Bo o gisiamehe tun puk tasisina teke bangais God o bung tuna Abraham. No uelhire God o kula pare, “Teso bun- guna Aisakansioun kompe teru turung ahasio pare, o bungumua.” ⁸ⁱPare de- hon, God ahik pahe aha toso bunguna uakapa Abraham gera la tur tar tuku- nunono pare, o bung tun. Bo e banga tasir keketikin tar ualapagah gere ahais pare, o bung tuna Abraham. ⁹^jGe na ualapagah pe God e kula pare, “Tar bi- naka tun ka uamatotoin, inggo u turung tapokisime, doh Sara e turung poho tar keketik bulout.”

¹⁰Ahik pah tar puh pukuon, ge a toking tuna pe Rebeka kura uatamana pono tar tang siok Aisak, a tamagigeig. ¹¹⁻¹²^kBo mare to tengkana tun na nikedang God tar tang siokor keketik bulout geke tar kiloin a nan, God ke hire tang tinas rasina pare, “A uoum e tu- rung kalekinale tar uakeluk.” Inggono ke kula tar puhene tar binaka halana rasina ta pohois, doh halan tura guata me in- ete uaia ue me inete uasa. God ke guata pare, tar ualasira to hape ke kedanga pe tar tang siokor keketik ke namanain, kara hik pah tar haua kura guatain rasin. ¹³^lMisiana ro kula pe no buk God gero dedeil pare, “Inggo u malaelhir tang Jekop, bo Iso u deio.”

¹⁴I kulangua inggeig tang God ahik paha kodkodoh? Ahik dehon! ¹⁵Ge ing- gono pe ke kula pare tang Moses, “Inggo u turung ueldolomo tang mai ru ueldolomoin,

^f9:3 KT 32.32 ^g9:4 KT 4.22; NKP 1-10; Ker 147.19; Roum 15.8; Hib 9.5

^h9:7 Uak 21.12 ⁱ9:8 Gal 4.23 ^j9:9 Uak 18.14 ^k9:11-12 Uak 25.23

^l9:13 Mal 1.2-3

karu guata uaiia tang mai ru marang guata uaiain.” *Kale Tapokis 33.19*

¹⁶ ^mAhik per puhono pahe haono to tena nimalarar tamat ue na nitampopokohor tamat, bo tena niueldolomo God.

¹⁷ ⁿGe no buk God pe gero dedeil o hire teil pare tang Pero, “Inggo teku uatoia totomua tar kaueke tasir tamat, doha tengkana teene, maru ualasira to inggo teregu nitampopokoho totomua, doh mara ueliateinir hangouguo tar koto uakap.” ¹⁸ ^mTemaeit God e ueldolomo tang mai re marang ueldolomoin, kare uamahang uuiir tang mai re marang uamahang uuiirin.

Na nimaliana God doh na niueldolom

¹⁹ ^mBo me kalamiuoum puk e turung kula pare, “Gete pagiaron, hapengua mare tupara God me niguata uasa tar tamat? Mai re banot e tur tane tena nimalara God.”

²⁰ ^oKaloug, bo ingga te mai maro banotong perere tang God? E banotong kular inetener nituha tar tamatang tuha pare, “Ae maene ko tuha ingga totoguo pare?” ²¹ ^pA tamatang tuha tar nouh e banotong kale me kot, doh tena nimalara katongon inggon e banotong tuha me torikir nouh, a siok a matmata hamas tun e lain tar kalekinale uaia, doha gimeh e lain tar kalekinale ueltebeir. Ue ahikir puhonene paha kodkodoh?

²² ^mDoha mana nomanar puh ke guatain God, ke marang ualasira pe tena nimalian, kare marang uaate tena nitampopokoh. Bo inggono puk ke hamhamas tun, kare uatut tena nimaliana tasisit geke uanimaliana tatanon gesir nikaleuatoro tar mamantou. ²³ ^mDoh ke marang uakalahara pono tena uinatoro uleik geke ding tauetein tagigeigene ka ueldolomosieig, inggeigene ke kaleuatorosiona tar kale tena uinatoron. ²⁴ ^mGe

inggeig peene ke kila sioun, ahik paho peng Ju puk bo o gime uan pon.

²⁵ ^mMisiana ke kula peono tang Hosea ger propet,

“Inggo u turung kila tasisit ahik pah nogo tamato pare,

nogo tamat,

karu turung kula pare, u malauelhir tasisit

ahik pah ku malauelhiris sioun.” *Hosea 2.23*

²⁶ ^mDoh,

“E turung pokoso tonguar puhono tar butur tun ka kula toisisina pare,

‘Inggoum ahik pah nogo tamato,’ ra turung kilasioum, ‘O bung tuna God ger tua.’” *Hosea 1.10*

²⁷ ^mBo tasir tamatang Israel puk, Aisaia ger propet ke kula ualeik tar puhene tasisin,

“O mana noman, o tamatang Israel o bu-rehentiehe sira tar iononiko i teh,

bo o papagalik puk ra turung uelkarusis.

²⁸ ^mGe a Tamata Nomana pe e turung mamantou tasir tamatang tar koto uakapa misiana ke kula pe, e uakapa tun hape re malara pe,

kare guata ualahur tun.” *Aisaia 10.22-23*

²⁹ ^mMisiana ke kula uoum pe Aisaia pare.

“Ge pakene ahikir Tamata Nomana ger Tampopokoh

pah ke hiliu baka mo gisiamehe tamiueim,

inggeim paka binbinopo hihir tununguampesieim

misiana tasir Sodom doho Gomora.” *Aisaia 1.9*

O Israel ka tagorong boh

³⁰ ^mHape ri kulangua pe inggeig? O gime uan pe ahik pah ka pentampopokoho tar kotpokos o kodkodoh, bo ka kale puk tar puhon, o kodkodoho tar nitagorong man, ³¹ ^mbosir Israel teka pen-

tampopokoho tun tar uakeluk tar ualatut tar kotpokos o kodkodoh, bo ahik puk pah ka pehuar. ³²qAe maeit ahikisina pah ka matot? Teeit gisina ahik pah ka haono to tar nitagorong man, bo ka haono to tar haua ra guataig. Teeit gisina ka pentampopokoho puk tar uakeluk tar ualatut, ahik pah tar nitagorong man, bo ka tagorong mana puk tar inete uaia ka marang guataig. Temaait gisina ke tukais toro “palaua ueltuk.” ³³rMisiaana ro kula teil pe no uelhire God pare, “Bang, inggo ku uamoko toro palau i Saion gero ueltuka tasir tamat, karo uapunga tasisin.

Doh mai re tagorong mana tatanon ahik pah ra turung uamatalain.” *Aisaia 28.16*

O Mahar 10

10 Ro bung uanotoug, reg nimalaro, doh nag lotuo tang God e la tasir Israel, te mare uelkarus God tasisin. ²Ge inggo pe u iate tun, karu mene tauete tar haua ku bangain tasisin, gisina ka pentampopokoho tun tar uauaha tang God, bo res ninamana pukusin ahik pahe tengkana keip tar ninamanar kodkodoh. ³Gisina pe ahik pah ka bang paroko tena niguata God re uakodkodoho to pela tatan tasir tamat, bo ra marang guata katongois pare, hape ra kotpokoso pe o tamata kodkodoh. Doh ka de mata uakeluk sir tena hagar God. ⁴Ge Kristo pe ke uatuka keip manasa tar ualatut, maeit o tamata uakapa gera tagorong mana ra uakodkodoho tolais tang God.

God e uelkarus tasir tamata uakap gera tagorong mana tang Iesu Kristo ter Tamata Noman

⁵sGe Moses pe ke bolo uahiua hape re kodkodoho to pelar tamata tang God re uakeluk pe tar ualatut. “Mai re uakeluk tena ualatohor ualatut, inggon e turung tua.” ⁶tBor inete tun ro kula teilin no buk God gero dedeil tar kodkodoho tola tang God tar nitagorong man e kula pare, “Ahik paho kula pare, ‘Mai re turung la kai taro i Heuen tar keip uahi-uaha tang Kristo, ⁷ue mai re turung lako tar uaneko i kot? Tar uatentur tapokis tur tang Kristo toro mat.” ⁸A haua re kula teiliono te pare, “No uelhire God o uahuhut totomua, o moko tar bilimua, doh tar koloum.”

O uelhire rone tero uelhirenar nitagorong man gering uelhire tauete teilieim

⁹Geto hire luaka ingga tang Iesu ter Tamata Noman, karo tagorong mana tang God ke uatentur tapokis tur tatanono toro mat, ingga ra turung uelkarusia. ¹⁰Ge tar nitagorong mana per eigigeig tera turung uakodkodoho tonguasieig tang God, teeit ki uelhire luaka pe inggeig, temaait ka uelkarusieig. ¹¹uNo uelhire God o kula pare, “Mai re tagorong mana tatanon ahik pah ra turung uamatalain.” ¹²vGe ahik pe me inete re uagiamehe sioko tasir Ju doho gime uan. Iesu Kristo ger Tamata Noman ter tang sioko komper tamata uleik tagigeig uakap, kare guata uaia uakapa tun tasisit ra kila tatanon. ¹³wNo uelhire God o kula pare, “Ge o tamata uakapa pe gera kila tar hanganar Tamata Noman tera turung uelkarusis.”

⁹9:32 Ais 8.14 ^r9:33 1Pi 2.6 ^s10:5 NKP 18.5 ^t10:6 Ual 30.12-14

^u10:11 Ais 28.16 ^v10:12 Apo 15.9 ^w10:13 Jol 2.32

¹⁴Bo hapengua puk ra kila pesina tar tamata ge ahik pah ka tagorong manain? Doh hape mara tagorong manasina tar tamata ge ahik pah ka longlongoro koutin? Doh hape mara longorosin geta hik me tamata ke la hire tasisin? ¹⁵^xDoh hape ra hire tauete pein ro Uelhire Uaia geta hik me tamata ka ualatuain tar la keip toro uelhire? Misianar nibolo uahiu peono tono bolobolo God gero dedeil pare, “A mataia tunumper kekeisisit ka keipime toro Uelhire Uaia.”

¹⁶^yBo ahik pukuono paho tamata uakapa tun ka uahue tar kale toro Uelhire Uaia. Ge Aisaia pe ke kula pare, “Tamata Noman, mai ke kale, kare tagorong mana tonomio uelhireim?”

¹⁷Temaait a nitagorong man e la tur tar longoro toro uelhire, doho uelhire ra longoro toin geta uelhire tauetein no uelhire Kristo. ¹⁸^zBo inggo puk u dangat, “Ahikisina pah ka longor?” O mana tun, gisina ka longor ge no bolobolo pe God gero dedeil o kula pare,

“A alialinginar uauasisina ke la tauete tar koto uakap, doh nas uelhiresina ke haiala uatuka tar surunar kot.” *Ker 19.4*

¹⁹Inggo u dangata poluk, “Ahikir tamatang Israel pah ka naman manate?” Uakikilangan Moses ke kula pare,

“Inggo u turung guata tamiuoum mung gehe tasir gime uan

gerung namanasioum o tatamatalik puk, o man,

inggo u turung uanimaliana tamiuoum tasir gime uan

gerung namanasioum o tuktukar,” *Ualatur 32.21*

²⁰Aisaia ke kula uapopokoho tun pare, “Inggo ka tuparaisisit ahik pah ka sir totoguo,

inggo ku uakalahara katongoio tasisit ahik pah ka kila totoguo.” *Aisaia 65.1*

²¹Bo tasir Israel, inggono ke kula pare, “Tar udeil per marein ku hue tauete inggo tar toking limoug maru kilauatoro tasir tamatar mahang longor, karo mahang kul.” *Aisaia 65.2*

O Mahar 11

Na niueldolomo God tasir Israel

11 ^aTemaait u dangatanguao pare, ke de manasa God tosono tamata? Ahik dehon! Ge inggo katongo pe ter peng Israel toso bunguna Abraham, doh tar toto tamatar nang Benjamin.

²God ahik pah ke de tosono tamata geke umatoto tanikais. Ahik paho namana huara ro kula teil pe no uelhire God pare, tang Elaija tar binaka ke menemene tang God tasir Israel? Inggono ke kula pare, ³^b“Tamata Noman nongo propetia ka uiliatung pousis, doh nongo olta ka mamantouoin teo puk manasampe teene, ru uangoul, doh inggo ra marang uiliatung pous ponoio.”

⁴^cDoh hape ke kula pe God tatanon?

“Ingga ahik pah me pahem ro uangoul, inggo ku kale liu baka tasir gisimeher tamat, a mouitir taosein ge ahik pah ka hatup uahiua tagu tang Baal ger god bohoboh.”

⁵Temaait gine daana pon o pagangua puk ka umatotois tena hamhamas God.

⁶^dInggono ke namana tasisin, kare uamatoto to tena hamhamas, ahik pah ke namana to tar kalekinale ka tuhainisin. Ge pakene ke namana to inggono tar kalekinale ka tuhaigisin, na hamhamasono paka hik paha man.

⁷Doh hapenguaon? O tamatang Israel ahik pah ka peng tupara baka

^x10:15 Ais 52.7 ^y10:16 Ais 53.1 ^z10:18 Ker 19.4

^a11:1 1Sa 12.22; Ker 94.14; Pil 3.5 ^b11:3 1To 19.10,14 ^c11:4 1To 19.18

^d11:6 Gal 3.18

tar haua ka sirsirin. Ter toto tamatalik puk manasampeoneit ke uamatotois God teka tupar, bosir bureheis ka uatukarais. ⁸ Misiana ro kula pe no uelhire God pare, “God ke uahohouon duk tasisin.

Doh tar binakampemenine, inggono ke uakut tar matasisina mara hik pah ra bang, kare uakamelong tasisina mara hik pah ra longor huar.” *Ualatut 29.4; Aisaia 29.10*

⁹ Debit ke mene tar siokonor inete tar binaka ke kula pare, “Uiuir toroso nieinisin o kotpokos a hangang biana toro lol mara pungasin, kara heiris tar niduh ka uahingaig.

¹⁰ Uakut tar matasisin! Kara hik paho uamaluana ra bangasin. Karo uakokolo keip tasisina teres niduh tar mamang binakalik.” *Ker 69.22-23*

¹¹ ^eU dangatangua polukuo pare, e de dede manasa God tosno tamata? Ahik dehon! Gitie ka guata pesina tar niguata uasa, a niguatang uelkarus ke langua tasir gime uan tar guata tasir Ju mara gehe tasisin, kara malarangua pake tera uelkarusis. ¹² Bo ge teka pouluntiehe tolaisir tamatang gime uan uakapa tenas niguata uasar Israel ka punga pe, a koto uakapa ra turung guata uaia tununguais geta siokor uiliodout tapokisimer Ju uakap.

¹³ Inggo u menmene tamiuoumur gime uan. Gitier aposoul peo ke ualatue peha God totoguo tamiuoumur tamatang gime uan, inggo u hire tasir tamata pare, inggon a kalekinale uleik tun ka heirin totoguo. ¹⁴ Inggo heru banotong guata tosnogo tamata katong ra geh maru banotong uelkarus mo gisiamhe tasisin. ¹⁵ Teeit tar binaka ke turung tar mud God tasir Ju, doha tengkana te gine, inggono ke keip

uahuhut tunungua me tasir gime tamatang tar koto uakap tar tapokis, kara matakaluana tatanon. Hapengua re turung baka per binakon? Gete malar e turung misianangua tasir tamatasitie ka tua tapokis tur toro mat. ¹⁶ Geto dedeil ro mahar uakikilangana ro mahar bereit ka heirin tang God pare, a uahung, o udeilina ro bereit o dedeilingua ponompe, doh geto dedeil ro uana ro douk ra heirin tang God, a ranan a dedeilingua ponompe.

¹⁷ ^fDoh ge teka katego liuig me giniameher ranana ro oliv, doh inggar peng gime uan, a ranana ro oliv roke, ka uahua tumana keipia toro oliv ahik paho roke, inggoumur gime uan misianangua toro oliv roke, bo gine daan inggoum kung uelpakaha keip tar inete ke ualapa-gahaig God tasir Israel. ¹⁸ Temaeit inggoum ahik pah mung uakaiasium ka uatur palih pesioum tar ranan ger nikat-ego liu. Geto guata ingga, namnamana hamas tunungua tar puhene, “O uana ro douk ahik pah tero tur i rana tar ranan, bor ranan e tur uapon i rana toro uana ro douk.”

¹⁹ Ingga hero kulangua pare, “A rananin ka katego liuig tar heir menag hagario.” ²⁰ O mana noman, bo ginina puk ka katego liuig, teeit ka tagorong boho pe, bo ingga o tur keip tar nitagorong man. Dehen to uairanaia, bo pako sokor. ²¹ Ge pakene ahik God pah ke uatur uoum tar ranana tun, paka hik ponompe pahe uatur pono totomua.

²² ^gInggoum mung namnamana hamas tena niguata uaia God, doh na nimaliana tasisit ka de tatanon, bo e guata uaia puk tamiuoumur gime uan, bo inggoum puk mung uaha dede tena niguata uaiaon. Geta hikioum pah mung tagorong mana dede tatanon, inggon e turung katego liu pono tamiuoum. ²³ Doh geta

tagorong mana tapokisir Ju gisina ra turung uahua tumana tapokisilais, ge God pe e banotong uahua tapokis polukula tasisin.

²⁴Gete malara God e kale tur tamiuoum ngohinar ranan, kare uahua tumana totomua toro douk uaia, a malagir tununguampe tang God tar uatur tapokisila toro douk toсно tamata geke katego liu bakais.

Na niueldolomo God a nasir tamata uakap

²⁵Ro bung uanotoug, inggo u malaramung ateoum toro mana tang God mara hikoum pah mung uairana katongosioum, karung kula pare, God e malaelhirintiehe uain tamiueim tasir Ju. O mana noman, God ke uatukar tasir gisiameher Ju. Bo a puh pukuono e lain e tuka tar binaka rung lameoumur gime uan tang Kristo, inggoumeit rung malar.

²⁶Tar hagarionene, o Israel uakapa tun ra turung uelkarusis, misianar nibolo uahiua peono tonou uelhire God pare, "A tamatang uelkarus e turung la tur i Saion.

Inggon e turung uapalih tasir bureher tamatar nang Jekop tar uakenua tenas niguata uasa.

²⁷Doh gine tenag uelhote keipio tasisina tar binaka ru kale liu tenas niguata uasasin." *Jeramaia 31.33-34*

²⁸Misiana ro kula teil pe ro Uelhire Uaia, gisin o uelmatan ter eimuar nibang, bo ke uamatoto pe God tasisin, temaene inggon e poul tamiuoumur gime uan, bo inggon e malaelhir haraha tasisinar Ju, teit tar haua ke ualapagahaiono toso bung tubusisin. ²⁹Ge a inete uaia pe ke heirig God, doh na ualapagah a mahang uapalih. ³⁰Te

misiana kompe kung mahang longoro peoumur gime uan tang God sioun, doh daana kung kale manasoum tar niueldolom ter tengkana rosio mahang longorosin. ³¹Temaeit gisinar Ju ka mahang longoro manasa ponene daan, doh ra turung kale tagungua pono tar niueldolom, teit ke ueldolomo peono tamiuoumur gime uan. ³²Ge God pe ke uataongo tasir tamata uakapa tun, teit torosio mahang longorosin mare ueldolomono tasisina uakapa tun.

³³^hNa nimalaelhir God a uleik menia keip tena niueldolom! Inggon a naman manate tun tar haua ke guataig. Inggeig ahik pahi banotong naman manate tar inete ke guatagion, na nimalaelhirion e matoto leue tagigeig tar naman manate, doh inggeig i matoto leue tar naman manate hape re guata peon. ³⁴ⁱ"Mai re iate tena ninamanar Tamata Noman ue mai ke ualasira tatanon?" ³⁵^j"Ue mai ke heir uakikilanga tatanono me inet mare heir hahauon?" ³⁶^kGe a mamang inetelik pe ke touogion, doha mamang inetelik ke kotpokoso tur tatanon, doha nanon, a uatakai e la tang God tar mamang binakalik. O mana tun.

O Mahar 12

Inggeig i heir tar tukunugig a uahung tang God

12^lTemaene ru mene uapopokoho inggo tamiuoum ro bung uanotoug i lolono tena nimalaelhir God menia keip tena niueldolomo tar heir tar tukunumiua uahungener tua, kara dedeil, dohe uauaha tang God tar uangoulung kalekinale tang God ter lotu tunuonene pakung heirigioum pare, a uahung. ²Kara hik baka poluk pah mung uakeluk tar niguatang gane tar kot, bo

^h11:33 Ais 55.8-9 ⁱ11:34 Ais 40.13; 1Ko 2.16 ^j11:35 Job 41.11

^k11:36 1Ko 8.6 ^l12:1 Roum 6.11,13; 1Pi 2.5

mung uamaluana tena Iabena Dedeil God e uapalih teremi ninamanoum marung pilesoum me timuhur niuangoul. Tar hagarion, inggoum mung turung iate tar haua re malaraiḡ God tamiuoum tar guat, a ineter uia, kara inete re uauaha tatanon.

Hape paka uangoul per tamatang tagorong man

^{3m}Ge tar nimalaelhir pe menia keip tar nipoul geke uamatoto keipin God to-toguo a aposoul, inggo u hire tamiuoum uakapar tang siok tang sioko pare, ahik paho namanaiā a i rana uain, bo o namanaiā tar ninamanar kodkodoh, karo kedanga katongo tolaia hape re baka per nitagorong mana ke heirig God totomua. ⁴ⁿTeeit inggeig a bureher mahmaharana tar tukunugig, doha mahmaharanin a kahakaha na kalekinale. ⁵Ter siokono komper hagar, giner burehe peeig, inggeig a siokon siounur tukununa keip tang Kristo dohi siokor tumana keipisieig pare, a kahakahar maharana tar siokor tukunun.

^{6o}Doh inggeig a kahakahar niate uaia ke heirig God tena nimalaelhir menia keip tena nipoul. Gete ka heiria tar niate tar uelhire tauete sira tasir propet, uelhire tauete keip tar nitagorong man. Ge God pe e mene keip totomua. ⁷Gete ka heiria tar niate uaia tar kalekinale i kukulebanga tasir gisiameh, kalekinale uaia tasisin. Gete ka heiria tar niate uaia tar ualualasir, kalkalekinale hamas uaia tununguampe binaka ro ualasil. ⁸Gete ka heiria tar niate uaia tar mene uapopokoho tasir gisiameh, kale nomana tar kalekinaleon, karo guatang palakat. Doh ge teka heiria tar niate uaia tar pakaha tenang inet, heir keip

tar niuah. Gete ka heiria tar niate uaia, a tamatang uoum keip tasir gisiameh, kalekinale uapopokoho tar uoum keip uaia tasir tamat. Gete ka heiria tar niate uaia tar uamamahoul tasisit ra uel-dolom, guata keip dede tar niuah.

⁹Ahik paho pepe boh o malaelhir tasir gisiameh, malaelhir nomana tasisin. Mu de tar niguata uasa, bo mung kale uanono tun puk tar niguatar uia. ^{10p}Mu uelmalaelhir tunisoum misiana paho matmatatahinalik tun, karung ueltadesioum. ¹¹Ahik pah mung marapula kout, uakeluk dede kompe tar Iabena Dedeil, karung kalekinale tar Tamata Noman.

^{12q}Mu uah, teeit rung pepe uangoul hamas pe tar haua re turung guatain God tamiuoum, karung uanguangoul sikoro tar binaka re pokosor niduh tamiuoum, karung lotu dede. ^{13r}Geta katup no tamata God me inet, inggoum mung poul tar heir tasisina me ineter namiu. Karung tororo keip tasir pokoso me niein, doh me buturing hohou.

^{14s}Dangata tang God tar guata uaia tasisit ra guata uasa tamiuoum, dangata tatanono tar guata uaia, kara hik pahe guata uasa tasisin. ¹⁵Mu uaha tagu tasisit ra uah, karung kiring tagu tasisit ra kiring. ^{16t}Mu kale tar ninamanang namana tasir tamata uakap. Ahik pah mung uairana katongosioum tesir i rana tasir gisiameh, bo mung kale uahiuasoum, karung matakaluana keip tasir tiome. Ahik pah mung namanasoum tesir uiantiehe tasir gisiameh.

¹⁷Ahik pah mung pehahaua tar niguata uasa ka guataig tatamiu. Mu tagin tun, binaka rung guata tar ineter kodkodoho tar matasir manai.

^m12:3 1Ko 12.11; Epe 4.7; Pil 2.3 ⁿ12:4 1Ko 12.12,27

^o12:6 1Ko 12.4-11; 1Pi 4.10-11 ^p12:10 1Pi 1.22 ^q12:12 1Te 5.16-18

^r12:13 Hib 13.2 ^s12:14 Mat 5.44; 1Ko 4.12 ^t12:16 NU 3.7

¹⁸Geta uiaon, peng tampopokoho tar uangoul keip toro hiarouo tasir tamata uakap.

¹⁹Ro bung uanotoug, ahik pah mung pehahaua tasir gisiaméh ge teka guata uasasin tamiuoum, bo mung heir me hagar tena nimaliana God, ge a nibolo peono tono uelhire God pare,

“A pehahaua nar niguata uasa nag kalekinaleo,

Ingo katongo uoumumpe ru turung pehahaua tenas niguata uasasin, karu mamantouo tasisin.” *Ualatur 32.35*

Teke kula per Tamata Noman.

²⁰uBo inggoum mung guata pare,

“Gete gogo nang uelmatana ingga, ualaein tatanon,

gete kamadakon, uainum tatanon,

ge gitie pe geto guata ingga pare, ingga o turung uamatala

mata tununguampe tatanon tar haua ke guatain totomua.” *Nitabila Uaia 25.21-22*

²¹Ahik pah mung uamaluana tar niguata uasa e reih uahiuu tamiuoum, bo mung kale uahiuu keip tar niguata uasa tar niguatar uia.

O Mahar 13

O tamatang tagorong man paka longoro tosnosio tamatang uoum keip

13^vInggoum pakung siokor longoro tun tasir tamatang uoum keip tar gavaman, ge God pe me pahene ke heir tar nitampopokoho tar tamat, kare uatur tasir tamatasina toro hagarinin.

²Temaeit, mai re perer, kare de mata uakeluk tasir tamatang uoum keip, inggono ke perer, kare de mata uakeluk tar haua ke uamokoig God. Gisis ra guata pare, ra uaheir katongois tar poluk.

³wGe o tamatang uoum keip pe ahik pah ra uasokoro tasir tamata gera guata tar kalekinale uaia, bo tasisitir tamata uasa. Temaeit geto malara ingga ahik pah sokor, uakelukungua tar ualatur mara uauahaia. ⁴Ge gisina pe no tamatang kalekinale God tar mene uapopokoho tasir tamata tar uangoul tar niuangoulur uia, kara kodkodoh. Bo geto pesiaua me inet, song a to tengkanono totomua tar sokor, ge gisina pe ka heiris tar nitampopokoho tar kalekinale tar pehahaua tasir tamatang katego tar ualatur. Gisina no tamatang kalekinale God ra guata keip ueleheir tena nimaliana God tasir tamata ra guata uasa. ⁵Temaene, inggoum uakapa tun mung longor, karung ueltada tasir tamatang uoum keip, ahik pah teeit ra turung pehahaua pesin tamiuoum gete kung guata tar niguata uasa ue kung mahang longoro tasisin, bo teeit rung iate katongo pono peoum pare, a puhono ter kodkodoho tamiuoum tar guat.

⁶xTer tengkana pononene maeit rung heiriuoum tar buluanar takis, ge o tamatang uoum keip pe no tamatang kalekinale God, ra heir tenas binaka tar kalekinale tar uoum keip tar gavaman. ⁷Heir tapokis tasir tamata tar haua kung kale puk bakain, karung heir tar mani nar takis tas mais ra hing tananin, karung heir pono tar mani nar giniamehenar takis tas mais nas kalekinale tar hing, karung heir tar ueltada tas mais paka ueltadais, karung uatakai tas mais paka uatakais.

A haur kalekinale ro guatagia

⁸yAhik pah mung uamaluana tar inete kung kale puk bakaig e mok a tabung umat, bo ter siokon siounumper ineter nikale puk baka te tamiuoum

^u12:20 Mat 5.44 ^v13:1 NU 8.15; Tai 3.1 ^w13:3 1Pi 2.13-14

^x13:6 Mat 22.21 ^y13:8 Mat 22.39-40; Jas 2.8

tar uelmalauelhiresioum, ge mai pe re malauelhir tang uanoton, inggono ke uakeluk tar ualatut. ^{9z}Ge a ualatut penine, “Ahik paho uiliatung pous, ahik paho uenau, ahik paho gehe tenas ineter gisiameh.” Doh hingia ponomper ualatut e tumana keip tar siokor ualatutonene. “Malauelhir tang uanotoum misiana ro malauelhir katongo peia.” ^{10a}Geto malauelhiria toso uanotoum, ingga ahikinguampe paho matotong guata uasa tasisin. Temaeit mai re malauehir tasir gisiameh inggono ke uakeluk uakapa tena ualatut God.

^{11b}Karung guata tar puhene, inggoum mung ate hape re katupa per binak, a binak e ualo ualahur. Mu gulet, ge na binaka per Tamata Nomana tar tapokisime ke uahuhutuntiehe uain tar binaka ki tagorong mana uakekeneig. ^{12c}A boung ke uahuhutung kapa manas, temaeit i baka liu manaseig tar niguatang tar kitup, kari kale tar niguatar kodkodoh. ^{13d}Ti pilese sira tasir tamatasitie ra uangoul tar marein. Ahik pahi ura ueltebeir, kari inum tar inum popokoh e tuka gete uilohor lugig, kari la ueltebeiringua tar guata tang hingiar puh ra uoto guatainir tamatang sipak ue i guata keip tar tukunugig me niguata uasani-tier ualamatal, kara hik pahi uelkoi ue i gehe tasir gisiameh. ^{14e}Bo i pilese uakeluk sira tena nipilese Iesu Kristo mara hikieig pahi uauaha tar nimalara uasang tar tukunugig.

O Mahar 14

Ahik paho bang kedanga tar tang giameher tamat

14^fTar tamatetie ahik paha popokoho na nitagorong man, inggoum mung uahue tar kale tatanon, kara hik pah mung uelperere keip tatanono tar haua re namanaion ter uia ue a sa. ^{2g}Misiana pare, gete tagorong mana me tamata pare, auiar ein ueltebeir tar niein, bo a tang giamehe pukur tamatang tagorong mana na torikir ninamana tar inete ke kulaig God ra einig. ^{3h}A tamatener ein ueltebeir ahik pahe bangang uelsigal tar tamatene ahik paha ein ueltebeir. Ge God pe ke uahue manasa tar kale tatanon. ⁴ⁱIngga te mai maro kedanga tena tamatang kalekinaler tang giameher tamat? Na tamata uleikiono tere banotong hire tatanono ge pare, ke guata uaiaono tena kalekinale ue ahik. Doh gitila i uoum, a tamata uleik e turung hire tena tamatang kalekinale pare, inggono ke guata uaia tena kalekinale gitiempe gete ke ein pukuono tar giniamer niein ue ahik. Ge a Tamata Nomana pe a tampopokoho tar poul tatanono tar kalekinale dede tang God.

^{5j}Ter siokono komper hagar, o gisiameher tamata ra namana me siokor marein a dedeil uain tar giameher marein, doho gisiamehe ra namana tar marein uakapa paha siokono kompe. Bo inggoum pukur tang siok tang siok mung namnamana hamas tun, karung ualongoro tar haua re hireig remi ninamana uaiaoum tamiuoum tar guat. ⁶Mair tamata re namana tar siokor

^z13:9 KT 20.13-15,17; Ual 5.17-19,21 ^a13:10 1Ko 13.4-7

^b13:11 Epe 5.14; 1Te 5.6-7 ^c13:12 1Jo 2.8 ^d13:13 Luk 21.34; Epe 5.18

^e13:14 Epe 5.11 ^f14:1 Roum 15.7 ^g14:2 Uak 9.3-4 ^h14:3 Kol 2.16

ⁱ14:4 Mat 7.1; Jas 4.11-12 ^j14:5 Gal 4.10-11

marein pare, a marein uleik tar lotu tang God, inggon e lotu tar mareinon tar uatakai tar Tamata Noman. Ter siokono kompe gete me kalamiuoum e namana pare, auiar mamang nieinilik menia pono tar mahar singsingin, inggon e ein tananin tar uatakai tar Tamata Noman. Teeit ka heir pesina tar uatakai tang God song ka ein.

Doh gete me kalamiuoum e naman a sar ein tar mahar singsingin, doha kahakahar niein, inggono ke malara tanik manasampe pare, mare uatakai tar hanganar Tamata Noman, kare uauaha tang God ke heir pe tar niein. ⁷Ge inggeig pe ri tua pe ahik pahi uauaha katongosieig, misiana ponompe geti mateig ahik pahi mata tereigigir nimalar. ⁸kGine ri tua pelaeig, auia tagigeig tar uatakai tar Tamata Noman tenagi niuangoul, doh geti mateig, auia tagigeig tar uatakai tar Tamata Noman tar binaka ri mat. Temaeit gete hape i mateig ue i tua, inggeig nagi tamata uleik tar Tamata Noman. ⁹Ter tengkana teene Kristo ke mat, kare tua tapokis tur tasisit ka mat, maeit inggono nas Tamata Nomana tokahanguamper mata doho tua.

¹⁰Bo ingga ae maene ro bang kedanga uasa tang uanotoum? Ue ae maene ro banga uahiua ingga tang uanotoum? Namana uanon, inggeigir tang siok tang siok i turung tur kahakah i uoumuhia tono tabtabilang uelhehek God. ¹¹mGe no uelhire God pe o kula pare, "Inggo u hire tun tamiuoum, gine teo per God ger tua teke kula per Tamata Noman, 'o tamata uakapa tun ra turung hatup uahiua totoguo, doho tamata uakapa tun ra turung hire luaka pare, Inggo a God.'" *Aisaia 45.23*

¹²Song ri turung heir uakapa tunungampe inggeigir tang siok tang siok tar haua ki guatain tang God. Inggeig ahik pahi guata toso uanotougig ra pung, kara guata tar niguata uasa ¹³Temaeit inggeig i uakenua manasa tar ueluelkedangasieig, bo i namana uiuir pare, ahik pahi ualor, kari uapunga tar tang giamehe tar niguata uasa.

¹⁴nInggo u mene sira tar tamateitir tohangana tar Tamata Noman Iesu. Inggo u iate tun pare, ahik uadeil me niein re uasa tagigeig tena nibanga God ki ein pe tananin. Bo gete me tamata re tagorong man me inete pare, a sa, song ter saono tatanon. ¹⁵oGete hagouo uasa uanotoumua totomua, teeit tar haua ro einia, ingga ahikingua pah ko pilese sir o malauehir tang uanotoum. Ahik paho mamantouo keip tang uanotoum tar haua ko einin, ge Kristo pe ke mata tatanon. ¹⁶Ahik pah mung uamaluaana tar haua rung bangaig pare, auia ra meneig a sa.

¹⁷Ge na Nitoia pe God ahik paha ineteng banga to tar haua ri einigieig ue ri inumig, bo i uangoul keip tar niuangoulur kodkodoh, karo hiarou, kara niuah geke heirinir Iabena Dedeil tagigeig, ¹⁸teeit a tamata gere kalekinale tar hagarionene God e uaha tun tatanon, doho tamata ra ueltada tatanon. ¹⁹pTemaene i kale manaseig tar inete re uakotpokoso toro hiarou, doh tar uelmene uatampopokohosieig.

²⁰qAhik pah mung mamantouo tena kalekinale God tar haua rung einin. A niein uakapa tun a delauan, bo a sa puk tar tamata tar ein me inete uel-tebeir gere guata tar tang giameh e pung. ²¹Auiantiehe totomua tar toub tar singsingin ue o toub tar inum tar bino ue tar guata me puh gere uapung tang uan-

^k14:8 Gal 2.20 ^l14:10 2Ko 5.10 ^m14:11 Pil 2.10-11 ⁿ14:14 Apo 10.15; Tai 1.15 ^o14:15 1Ko 8.11-13 ^p14:19 Roum 12.18; 15.2 ^q14:20 1Ko 8.13

otoum. ²²Temaeit a haua ro tagorong managia, uamoko tereng ninamana tar inetenin, a ineteng tamiraoum me God. Ge me tamat e guata me inete re atein a kodkodoh, doh na ninamana uaiakon ahik pahe tohotola tatanon, doh inggon ahik pahe matal, inggon e turung uah. ²³Bor tamata ger torik na ninaman, ra tohotolain ke guata tar niguata uasa, teeit tar binaka re ein toubuon, inggon ahik pah ke tagorong mana tun, inggon ke guata uasa, teeit a mamang inetelik ge ahik pahe la tur tar nitagorong man e kotpokos a niguata uasa.

O Mahar 15

Uauaha tasir gisiamah, kara hik paho uauaha katongoia

15 Inggeigener tampopokoho uoum paki poul tar huata uelkout teres niduhusitir maluana harah. Ahik pahi uauaha katongosieig. ²Bo paki siokor uauaha puk toso uanotougig tar guata tar inete tar poul tasisina mara guatasina tar niguatar kodkodoh, kare popokoho res nitagorong man. ³sGe Kristo pe ahik pah ke uauaha katongoin misiana ro kula pe no uelhire God pare, “A uel-sigal geke uelhire uasa tolaig totomua, ke pono totoguo.” ⁴tGe a mamang inetelik pe tono uelhire God ka boloig sioun, ka boloig tar ualasira tagigeig tar tagorong mana teil dohe uatampopokoho tar iabeigigeig ri pepe uan-goul hamas pe tena ualapagaha God.

⁵Inggo u lotu tang God gere uoto heir tar hamhamas, kara nitampopokoh tar heir tamiuoum tar siokonon ninaman e la tur tang Iesu Kristo. ⁶Maeit rung turung uatakai keipinguaoum tar siokon siounur ninaman, kara siokor tengkana

tang God ge tamana nagi Tamata Nomanieig Iesu Kristo.

⁷uDoh gine daan, inggoum pakung uah, karung ueluahesioum misiana ke uahue pe Kristo tar kale tamiuoum mara heirinir uatakai tang God. ⁸vGe inggo pe gine ru hire tamiuoum, Kristo ke me kotpokos a tamatang poul tasir Ju maro mana no uelhire God tar ualasira tar ualapagah geke guatani tasir propet. ⁹wDoho gime uan ra matotong uatakai tang God ke heir pe tena niueldolom. Misiana ro kula teil pe no uelhire God pare,

“Temaeit inggo u turung uatakai tur totomua i uantinana tasir gime uan, inggo u turung ker tar kerekereng uatakai tar hangoumua.” *Ker 18.49*

¹⁰Doh no uelhire God o kula poluk pare, “Inggoumur gime uan mung uaha mesir Ju no tamaton.” *Ualatur 32.43*

¹¹Karo kula poluk pare, “Inggoumur gime uan mung uatakai tar Tamata Noman, doho tamata uakapa ra uatakai tatanon.” *Ker 117.1*

¹²xDoh Aisaia ke kula poluk pare, “A bubunguna Jesi e turung kotpokos, a tamata gere turung uoum keip toro mamang uanilik, o gime uan ra turung tagorong mana teil tatanon.” *Aisaia 11.10*

¹³God tere turung guata tamiuoum tar tagorong mana teil pare, inggoum mung turung kale tar haua ke ualapagahaion, temaeit inggo u dangata tatanono tar uauaha tun tamiuoum, kare heir toro hiarou, gitie rung haono to pe tatanono tar poul tamiuoum. Inggo u lotu tatanon, maeit tena nitampopokohor Iabena God e uatampopokoho tamiuoum tar bangala i uoum tar binaka re turung guata God tar ineteninanit tamiuoum.

^r15:2 1Ko 10.24,33 ^s15:3 Ker 69.9 ^t15:4 2Ti 3.16 ^u15:7 Roum 14.1

^v15:8 Mat 15.24 ^w15:9 Apo 3.25 ^x15:12 UGO 5.5

**Poul e ueluatata hape ke uelhire
tauete pe toro Uelhire Uaia tasir
tamatang toro burehe ro uan**

¹⁴Ro bung uanotoug, inggo katong u iate tun pare, inggoum kung uoun tar niuia, karung iate tar mamang inetelik re malaraiig God, karung banotong uelualasiresioum. ¹⁵Toro bolobolo rone, inggo ku bolo keip tar uelhireniner popokoha tar giniamer puhpuhung mene ku mene uoumig tamiuoum. Inggo ku mene uapopokoh, teeit tar nimalaelhir menia keip tar nipoul ke heirin God totoguo, ¹⁶y tar kotpokoso na tamatang kalekinale Iesu Kristo tar kalekinale tasir gime uan. Inggo u kalekinale sira tasir pater tar uelhire tauete toro Uelhire Uaia gero la tur tang God mara kotpokosor tamatang gime uan pare, a uahungunitie re uauaha tang God tar kale, doh ke guatasiono pare, o nana tun ke heir peha tar Iabena Dedeil tar me uangoul tasisin. ¹⁷Temaait inggo u banotong uaha keip tar kalekinale ru guataig tang God, teeit tar ueliahe re matoto teil peio tang Iesu Kristo. ¹⁸Inggo ahik pahu mene me inete sioko tar kalekinale ke umatotoin Kristo totoguo tar guata tar uoum keip tasir gime uan tar longoro tang God, teeit tar haua ku mene manasagio, doh tar haua ku guataig. ¹⁹Inggo ku guata keip tananin tena nitampopokohor nitou menia tar uaparoko geke heirinir Iabena Dedeil totoguo. Temaait ku la uiloho tur peo i Jerusalem ku la uatuk i Ilirikum, inggo ku uatuatuka hihir tunungua ku uelhire tauete pe toro Uelhire Uaia tang Kristo.

²⁰^zA puh ku uoto marang guata tunuio te tar uelhire tauete toro Uelhire Uaia toro uan ge ahik pah ka lon-

goro tagu tang Kristo, inggo u kalekinale pare, mara hik pahu uakapa keip tar kalekinale ke uakekeneinir tamata sioko misiana tar tamata gere tuha uapono tar uma tar tagir ke uamokoigir tamata siok.

²¹Misiana ro kula teil pe no uelhire God pare,

“O tamata ge ahik pah ka longoro kout tagu tatanon ra turung iate doh gisis ahik pah ka longoro me uelhire tatanon, ra turung naman manate.”

Aisaia 52.15

²²^aA tengkana maene ku otoungo, teeit ku uelhire tauete baka pe toro uananin.

Poul e namana tanik tena nila i Roum

²³Bo gine puk daan, inggo ku kalekinale uiloho uakapa manasa toro uanine, doh teeit ku marang bangantiehe tun peo tamiuoum tar bureher krismas.

²⁴Inggo ku namana tar banga baka tamiuoum tar binaka ru la i Spein. Tar binaka ru lalao, inggo u turung banga kout baka tamiuoum, karu uaha tar uangoul keip baka tamiuoum me sikin, doh inggo u uahingo tamiuoum tar heir totoguo me nipoul tar la uainila i Spein.

²⁵^bBo gine puk daan, inggo u la baka uoum i Jerusalem tar heir tar mani tar poul tasir tamatang tagorong man gesir tiomeala. ²⁶^cGe o tamatang tagorong mana pe i Masedonia, doho tamatang tagorong manang Akaia ka heiring uaha tun ka uelbake pe tenas manir tiome tosno tamata God i Jerusalem.

²⁷^dGisina ka uaha tun tar guata pare, o mana tun gisina nas kalekinale tar poul tasir tamatang tagorong manang Ju. Misianangua pah ka kale tur puk baka tasisin. Ge gitie pe ge teka kale tokahar gime uan tenas inete uaiar Ju geke ualagahaig God, gisina nas kalekinalen-

^y15:16 Roum 1.5; 11.13 ^z15:20 2Ko 10.15-16 ^a15:22 Roum 1.13

^b15:25 1Ko 16.1-4 ^c15:26 Apo 24.17; 1Ko 16.1; 2Ko 8.1; 9.2,12

^d15:27 1Ko 9.11

guampe tar poul tasir tamatang tagorong manang Ju tar uelpakaha keip tenas mani tasisin. ²⁸I muduhia getu uakapa bako tar kalekinaleene, doh ku heir uaia manasa tenas manisin, karu turung langua i Spein, song ru la bangala tamiuoum. ²⁹^eInggo u ate tun pare, getu me pokosomeo tamiuoum, u me pokoso keip tun tar niguata uaia e la tur tang Kristo.

³⁰^fDoh gine daan, inggo u dangata uapopokoho tamiuoum tar hanganar Tamata Noman Iesu Kristo, mung kalekinale tokaha tenag kalekinaleo, karung lotu tang God. Inggoum mung guata paar, teeit tena nimalaelhirir Iabena Dedeil. ³¹Dangata tatanono tar kaueke totoguo tasir Jusila i Judia ra uangoul uiloh i Jerusalem gera ueluelde toro uelhire tang Kristo. Mu dangata pono tatanono tar guata tasir tamatang tagorong man i Jerusalem tar uaha uangoul tar nipoul ru lang heirigio tasisin. ³²Maieit gete pagiarono re malara pe God, inggo u me banotong pokos i Roum, karu uaha tun tar banga tamiuoum, doh maru kale inggo me timuhur nitampopokoho tar binaka ru uangoul tagu tamiuoum.

³³Inggo u lotu tang God gere uoto heir tagigeig toro hiarou tar uangoul tagu tamiuoum uakap. O mana tun.

O Mahar 16

Poul e heir tar niuah tasir bureher tamat

16 Inggo u marang uahire baka tamiuoum tang tatahigulikio Pibi a tamatang kalekinale tar sios i Senkria. ²Inggo u dangata tamiuoum tar tororo tun tatanon, karung ueltada tar binaka re pokosomeono tamiuoum, mung tororo sira kompe tatanono paha uantomiu rung uangoul teil pe tar Tamata

Noman. Mu kaueke keip tatanono ra uoto kaueke peis no tamata God, karung heir tatanono me nipoul gera malara turig tamiuoum ge inggono pe ke poul uauleik tun tasir bureher tamata menia pono totoguo.

³^gMu heir pono tenag niuaha inggo tas Prisila mena bulout Akuila. Rasina kura uoto kalekinale tagu totoguo tena kalekinale Iesu Kristo.

⁴O mana tun, a siokor binaka rasina kura bakais totoguo tar uaudeil totoguo. Ahikiono pah inggo puk ru heir tar niuah, bo noso sios uakapa ponor gime uan ra heir pono tenas niuah. ⁵Mu heir pono tenag niuaha inggo tar sios gere uoto uiliodout tenasira uma rasin.

Heir tenag niuah inggo tang kuhur kaloug Epenetus ger uakikilanganar tamata tar hikume tosno tamata Kristo tar pang uan i Esia. ⁶Mu heir tenag niuah inggo tang Maria geke kalekinale ueleheir tamiuoum. ⁷Mu heir tenag niuaha inggo tas Andronikus me Junias a toking tahigulikio, doh gekura uangoul tagu totoguo tar uih. Rasin a toking tohangas tasir aposoul, doh gera ueltadantiehe tunisir tamatang tagorong man. O mana tun, rasin te kura kotpokoso uakikilang na toking uakuakeluk Iesu Kristo totoguo. ⁸Mu heir tenag niuaha inggo tang Ampilatus geru malaelhirintiehe tunuio i lolono tar niguatar nang Kristo. ⁹Mu heir tenag niuaha inggo tang Urbanus, inggono nagi tamatang kalekinale tokaheig tena kalekinale Iesu Kristo, doh tang kuhur kaloug Stakis.

¹⁰Mu heir tenag niuaha inggo tang Apeles, inggon a tohangana tun tar uakeluk tang Kristo, karung heir pono tenag niuaha inggo tasisin ra uangoul tena uma Aristobulus. ¹¹Mu heir

tenag niuaha inggo tang Herodion a tahigulikio.

Heir tenag niuaha inggo tasisis ra uan-goul tena uma Narsisus gera tagorong mana teil tar Tamata Noman. ¹²Mu heir tenag niuaha inggo tar toking kuaha ra-sine, Tripina me Triposa. Rasina kura kalekinalentiehe tun tar tuha tena kalekinaler Tamata Noman. Inggo u heir ponola tenag niuaha tang Persis ger kuhur kalouguo, inggono ter tang sioko pono ke kalekinalentiehe tar Tamata Noman. ¹³^hMu heir tenag niuaha inggo tang Rupus, inggon a tamatang uakeluk uaia tun tar Tamata Noman, inggo u heir pono tenag niuah a tang tinanon geke uoto guata uaia sira tun totoguo paha tuna tun.

¹⁴Inggo u heir ponola tenag niuaha tas Asinkritus, doh Pegon, doh Hermes, doh Patrobas, doh Hermas, doh tasir tamatang tagorong mana gera uiliodout keip tasisina tar lotu tang God. ¹⁵Mu heir tenag niuaha inggo tas Pilologus me Julia, doh tang Nereius me tatahinalik, doh tang Olimpas, doh toso tamata uakapa God gera uoto uangoul tagu tasisin. ¹⁶ⁱTar binaka rung uiliodoutoum, inggoum mung uaha keip tun toso uanotoumiu tar niuaha, doh tar koloumiu. O sios uakapa tunusine ra uakeluk teil tang Kristo ra heirila tenas niuaha tamiuoum.

A uadouhinar menemen

¹⁷^jRo bung uanotoug, inggo u mene uapopokoho tamiuoum tar tagin tasir tamatasis ra uaueltageih tamiuoum mesir gisiameh. Nas niualasirasin e guata puk tamiuoum tar tur uiuir liu tang Kristo, doh nas uelhiresin

ahik paha siokono keip tar niualasir kung kalegioum. Ahik tun pah mung longlongoro tasisin. ¹⁸^kGe o hai tamata pesin ahik pah ra kalekinale tenagi Tamata Nomaneig Iesu Kristo. Bor ninamana tun ra kalekinale keipinisin tera malara kompe ra uauaha katongois. Gisin o tang menmene uahihiana tun tenas mene tar uelour teres ninamanar tamatasine ahik pah ra ate pare, o hai tamatang ualualasirasin o bohoboh. ¹⁹^lO bureher tamata ka longoro ueluatata toromio longlongoroum toro Uelhire Uaia ter tengkanonene, maeit inggo u uaha tamiuoum. Inggo u uahingo tamiuoum tar naman manate tar huar uia, karung uareing liu tar ineter sa. ²⁰^mSisikinalik, God gere uoto heir tar nitabila uaia, doho hiarouo tagigeig e turung uamaluana tamiuoum tar ueih tane tang Satan i kukulebanga tar kekemiu. Na hamhamas Iesu Kristo nagi Tamata Nomaneig e uangoul tagu tamiuoum.

O gisiameher tamata ka heirila tenas niuah i Roum

²¹ⁿTimoti gere kalekinale tang Kristo, dohe kalekinale keip totoguo ke heir tena niuaha tamiuoum, doh Lusius pon, doh Jeson, doh Sosipater, doho uanotougou pono gesir Ju.

²²Inggo Tertius ter tamatang bolo toro bolobolo rone u heir ponola tenag niuah a tamiuoum.

²³^oGaius geke kauেকে uaia tun totoguo, doh geka uoto uiliodoutinir sios na um, ke heirila tenas niuah. Erastus ger tamatang kauেকে tena manir uan, doh Kuartus ger uanotougigeig ura heir ponola tenasira niuah.

^h16:13 Mak 15.21 ⁱ16:16 1Ko 16.20; 1Pi 5.14 ^j16:17 Mat 7.15; Tai 3.10

^k16:18 Pil 3.19; 2Pi 2.3 ^l16:19 Roum 1.8; 1Ko 14.20 ^m16:20 Uak 3.15

ⁿ16:21 Apo 16.1-2; 19.22; 20.4 ^o16:23 Apo 19.22; 1Ko 1.14

²⁴Na hamhamas Iesu Kristo nagi tamata Nomaneig menia keip tena nipoul e moko tagu tamiuoum.

A lotung uatakai tang God

²⁵P^{Ti} uatakai tar hagana God, ing-gono tere banotong poul tamiuoum, kare uatampopokoho tamiuoum tar uakeluk tang Kristo. Ter puhonene ru uoto heirio tasir tamata tar binaka ru uelhire tauete toro Uelhire Uaia tang Iesu Kristo. Sioun God ke touaouo toro Uelhire Uaia rone

tar puhung barah, bo gine puk daan, ing-gono ke uakalahara to tang roon, ²⁶i lolono tenas bolobolor propet, ka bolo keip pe tena ualatoho God mara siokor tagorong manar gime uan toro mamang buturulik, kara longoro tatanon. ²⁷Inggeig i uatakai tang God ger naman manate me pahen, temaeit tena nipoul Iesu Kristo inggeig i uatakai manasa tar hangana God tar mamang binakalik. O mana tun.

1 Korin

O uakikilana ro bolobolo ke boloin Poul tasir tamat i Korin

O uakikilangana ro bolobolo tasir Korin

Poul ke bolo toro bolobolo barah rone o la tasir tamatang tagorong mana tar uan uleik i Korin. Inggono ke uatentur tar lotu i Korin tar binaka ke uangoul tar uaniono tar siokor hangaul, doha tualir bialok (Apo 18). I muduhia ke hiliu baka peono tar uan uleikion, a inete uasa ke kotpokoso tar lotuon. Maeit Poul ke bolongua toro bolobolo rone tasir tamatang tagorong man i Korin tar poul tasisin.

I Korin a uan uleik tar pang uan i Gris. O tamatang Gris ka uaha tun o tamatang ate pe. Bo Poul puk ke mene uakalahara pare, God e kula teres niater tamat a tuktukar.

Maeit o tamatang tagorong mana paka bang paroko tang Iesu pare, tenas Tamata Nomanasin. Inggono tere kale teil tena niate uaia God, doha tamatang tagorong mana paka longoro dede tatanon (1Ko 1:2).

Poul e marang mene ualasira tasir tamatang tagorong man i Korin hape ra uataakai tokaha pein God. Inggono ke ualasira pono mara uelbuleisisina tar bereit mer bino tar namana huara ke mata pe Iesu (1Ko 11). Ge na Iabena Dedeil pe God e banot e poul tasisina mara kalekinale tokah (1Ko 12; 14). Doha inete uleik ke heirin God ter malauelhir (1Ko 13).

Poul ke mene ualasira pono tar nitua i muduhia toro mat. I muduhia ke mata baka pe Iesu, God ke uatua tapokis tang Iesu, o bureher tamata ka banga tang Iesu ke tua tapokis pe (1Ko 15.1-8). Tar siokonor hagar God e turung

uatua tapokis tagigeig. Ge God pe a tam-popokontiehe liu toro mat (1Ko 15).

I lolono toro bolobolo rone:

A meneng uakalahar 1:1-9

A kalekinale i lolono tar lotu 1:10-4:21

O ura ueltebeir, kara niuangoul toso matamatame 5:1-7:40

O tamatang tagorong man, doh gisis ra tele tang God 8:1-11:1

A nitagorong man, doha lotu 11:2-14:40

A nitua tapokis doho tamatang tagorong man 15:1-58

Nas uahungur tamatang tagorong manang Judia 16:1-4

Na niduh Poul, kara udohinar mennen 16:5-24

O mahar 1

A niuah e la tur tang Poul

1 Inggono Poul ku bolo toro uelhire rone, raeim me Sasten ge uanotougigeig. God ke malara totoquo na aposoul Iesu Kristo.

²Roon o la tasir tamatang lotur nang God tar uan uleik i Korin, geke uadedeilis Iesu Kristo, kara kilais ra uangoul pare, o dedeil menia pono tas mais gera uangoul ueltebeir gera kila tenagi Tamata Nomaneig Iesu Kristo pare, nas Tamata Noman.

³A hamhamas, karo hiarouo tamiuoum uakapa tun e la tur tang God ge tamagigeig me Iesu Kristo ge nagi Tamata Nomaneig.

Poul e heir tar niuaha tang God

⁴Inggono u heir dede tar niuaha tang God, teeit tar burehe tunur nipoul ke heir turigiono tamiuoum tang Iesu Kristo. ⁵Inggoum kung matoto teil tun tar mamang inetelik uaia, teeit kung uangoul tokaha keip pe tang Kristo, nami nimenoum, kara niater eimiuoum

uakapa tun ke i rana tun. ⁶Teeit a haua geking hire tauetegieim tang Kristo ka ate uaia tur tunig tamiuoum. ⁷Temaait ahik baka poluk pah mung katupa me inete uaia re hireinir Iabena Dedeil, mung uangangoul sikoro kompe tenagi Tamata Nomaneig Iesu Kristo gete tur uakalahar. ⁸Inggon e me uatampopokoho tamiuoum e tuka tar uadouhinar binak, maeit tar binaka re la tapokisimeon, inggon ahik pahe me tupara me ineter sa tamiuoum. ⁹God gera tagorong manain, Inggon teke kila tamiuoum tar uangoul tokaha keip tang Iesu Kristo ger tunono ge nagi Tamata Nomaneig.

O tamatang lotu ka uangoul uelpakah

¹⁰sInggo u kula uapopokoho tun tamiuoum ro uanotoug pare, tar hangana nagi Tamata Nomaneig Iesu Kristo, inggoum mung ueluaesioum, maeit ahikioum pah mung ueluepakah ueltebeir. Inggoum e turung moko tokaha uaia tun remi nimalar, kara ninaman. ¹¹Ro uanotoug, o gisiameher tamatang tena uma Kole ka hire totoguo pare, Inggoum mung ueluelkoi. ¹²tA tengkana maeit ku mene sira pare, teeit a tang sioko tamiuoum e kula pare, “Inggo u uakeluk tang Poul.” Ue a tang giameh e kula pare, “Inggo u uakeluk tang Apolos.” Ue a tang giameh e kula pare, “Inggo u uakeluk tang Pita.” Ue a tang giameh e kula pare, “Inggo u uakeluk tang Kristo.”

¹³Iesu ka ueluepakahain? Ue te Poul ke mata tar korose tamiuoum? Ue inggoum ka uahuhu keipisoum tar hangana Poul? ¹⁴uInggo u heir tun tar niuaha tang God pare, ahik tun pah ku uahuhu

me kalamiuoum tes Krispus puk manasampe me Gaius, ¹⁵temaait ahik me tamata re kula pare, ka uahuhu keipin tar hangouguo. ¹⁶vO man, inggo ku uahuhu pono tasir tamatang tena uma Stepanas, dohi muduhia tasisinasine, inggo u telengua, ge pare ku uahuhu baka poluk me tamat. ¹⁷Ge Kristo pe ahik pah ke heiriha totoguo tar me uahuhu tasir tamat. Bo inggo ka heirihaio tar me hire tauete toro Uelhire Uaia tasir tamat, ahik pah tar uelhire gere la tur teres niater tamatang ate mare hikir nitampopokoh geke la tur tang Kristo tar binaka ke mata tar korose pahe kap.

A niate uaia, kara nitampopokohorang God e moko tang Kristo

¹⁸wO tamata gera heil, gisina ra namana pare, o uelhire tang Kristo ke mata pe tar korose, o tuktukar, bo tagigeigene ra uaudeilisieig, a puhung uelhireono ter nitampopokohorang God. ¹⁹Ge a puh pe ka boloiing sioun tonono uelhire God pare,

“Inggo u mamantou teres niate uaiar tamatang ate uaia tun, karu uakapa teres niater tamata tang atentiehe tun.” *Aisaia 29.14*

²⁰xIa kaeisir tamatang ate uaia tun? Ia kaeisir tamatang tar ualatur? Ia kaeisir tamatang sir pokoso tar ninamanene daan? Ahik God pah ke uatuktukara tar niate uaiang gane i kot?

²¹yBo tar niate uaiar nang God, o tamatang gane i kot ahik pah ra banotong ate tang God teresir niate uaia. Temaait inggono ke uah, kare heiriha tonono uelhire gera kilain o tuktukara geka hire tauetein mare uaudeilono tas mais ra tagorong man. ²²O Ju ra malara

^q1:8 1Te 3.13; 5.23 ^r1:9 1Te 5.24; 1Jo 1.3 ^s1:10 Pil 2.2

^t1:12 Apo 18.24-28; 1Ko 3.4 ^u1:14 Apo 18.8; Roum 16.23

^v1:16 1Ko 16.15 ^w1:18 Roum 1.16

^x1:20 Job 12.17; Ais 19.12; 33.18; 44.25 ^y1:21 Mat 11.25

kompe me uaparok e la turuha i Heuen mara tagorong man. O Grik ra sir kompe tar kale ninaman, kara niate uaia. ²³ ^zTemaeit geti hire tauete inggeig pare, Kristo ka uakusein tar korose, o Ju ra de, karo gime uan ra kula pare, roono ro uel-hire o nasir tuktukar.

²⁴ ^aBo sir Ju mesir gime uan geke kilais God, ra ate pare, Kristo inggono ter nitampopokohor nang God, kare ter niate uaiar nang God. ²⁵ ^bBo a hauanine re guataig God gera kilaig a tuktukar, ginina ter niate uaia uleikintiehe tun e hahaua liu teres niate uaia uleikir tamatang gane i kot. Doh na nimaluana God, inggono ter popokohontiehe tun e hahaua liu teres nitampopokohor tamat.

²⁶ ^cRo uanotoug namana huara kompe tar binaka ka kilasium, ahik paho bureher naman manate ra banga per tamat, ahik mo bureher uelpipih, ahik mo bureher i ranantieh. ²⁷ Bo God ke kedanga tar ineteninanine gera kilaig a tuktukar mare uamatala tasir tamatang ate uaia tun. God ke kedanga tar inetenine gera kilaig a maluan mare uamatala tasir tampopokoh. ²⁸ God ke kedanga tar haua ger i kotontiehe tunane i kot, kara inete gera banga uasaigane i kot mare uakeip uahua tunungua tar haua gera uairanaigane i kot. ²⁹ ^dTemaeit ahik me tamata re matot e uasala katongoin tar matana God.

³⁰ ^eTeet God ke guata pare, Inggoum mung uangoul tokaha keip tang Iesu Kristo. Doh tar poul tapokis tagigeig, Iesu Kristo inggono ter niate uaia ke heirin God, e laha tagigeig, inggono ter niuangoul ger kodkodoho tun tang God, kare uadelauan, kare uadedeil tagigeig, kare bulaua tapokis tagigeig. ³¹ Mare pokoso uakalahara tunur puh,

“Mai gere uasalain, inggon e uasalain tar haua ke guatainir Tamata Noman.” *Jeremaia 9.24*

O Mahar 2

2 Ro uanotoug, tar binaka ku me pokoso tamiuoum ku me hire tauete pe tono uelhire God gero ouoou. Inngo ahik pah ku me mene keip me meneniner lingia tun ue me i ranantieher niate uaia. ² Bo inggo ku namana pare, tar binaka ru uangoul keipo tamiuoum, inggo ku malabobour uakapa tun tar mamang ineteliking gane i kot, u namana puk manasampe tang Iesu Kristo ka uakuse pein tar korose. ³ ^fTar binaka ku me pokoso tamiuoum, inggo a maluana tun, ku sokor, karu kanuh tun. ⁴ ^gNagu meno, kara haua ku hire tauetegio tamiuoum, ahik pah ngohinar mene ger nasir tamatang ate ue o tamatang mene uahian. Bo inggo ku mene keip kompe tena nitampopokohor Iabena Dedeil. ⁵ Maeit tena nitampopokoho God tere tengkana tur tun remi nitagorong manoum, ahik pahe la tur teres niate uaiar tamatang gane i kot.

A niate uaia gere la tur tar Iabena Dedeil

⁶ O man inggeim mi mene keip no mana tar niate uaia, kara ninamana uaia tun tas maisir tangtangouo res nitagorong man, bo ahik puk, paha niate uaia ger eisir tamatang gane i kot ue a nitampopokohong gane i kot ge a nitampopokoho penin e uahuhutung kap. ⁷ Inggeim king mene keip tena niate uaia God ger ouoou, a niate uaiaonoka gekeka touaouo bakain. A niate uaiaonoka heir tanika manasampein tena uiniatoro

^z1:23 Roum 9.32; 1Ko 2.14 ^a1:24 Kol 2.3 ^b1:25 2Ko 13.4

^c1:26 Mat 11.25; Jas 2.5 ^d1:29 Epe 2.9 ^e1:30 Jer 23.5-6

^f2:3 Apo 18.9; 2Ko 10.1 ^g2:4 1Te 1.5

uleik tagigeig tar binaka halanar koto te pokos. ⁸Ahik me tang siokor tamata uleikane i koto re naman manate, bo ge pakene ka naman manatesin, gisina paka hik pah ra uakuse tar Tamata Noman i rana tar korose, ge inggono pe a i rana liu tasir tamata uakap. ⁹Ge a puh pe ka bolog sioun tono uelhire God pare, “Ahik me tamata ke bang, ahik me tamata ke longor, ahik me tamata ke naman, tar haua ke kaleuatoroin God tas mais gera malauelhirintiehe tun tatanon.” *Aisaia 64.4; 65.17*

¹⁰Bo God ke uakalahar tur tar Iabena Dedeil tar mamang inetelik. Ge a Iabena Dedeil pe e sir tar mamang inetelikir nang God gitimpe gete moko uaouonin i lolono teil tun. ¹¹Mai re uangoul keip tasir tamat e ate teres ninamanar tamat, doh gete uangoul teil tun na iabener tamatono tatanon. Ter siokono komper hagarion, ahik me tamata re ate tena ninamana God tena Iabena Dedeil puk manasampe God tere ate. ¹²Inggeig ahik pah ki kale tar iabeneng gane i kot, bo inggeig ki kale tar Iabena gere la tur tang God. Maeit ri naman manate inggeig tar haua ke heirheir pukin God tagigeig.

¹³Inggono ter huanine ri menegieig, ahik paha mene geke ualasira keipig tar niate uaiang gane i kot, bo ginin a ni-ualasira gere la tur tar Iabena Dedeil, e hire tauete tar Iabena ger mana ger nanar Iabena Dedeil. ¹⁴Mais ge ahik pah ra uangoul keip tar Iabena Dedeil, ahik pah ra matotong kale me inete uaia gere la tur tena Iabena God, teeit gisina ahikingua pono pah ra naman manate. Ra namana tar inetenin a tuktukar, bo mais gera uangoul keip tar Iabena Dedeil tera matotong naman manate taninin. ¹⁵A tamata ge na Iabena Dedeil, ing-

gon e matotong kedanga tar mamang inetelik. Bo me tamata gere kale teil tar Iabena Dedeil ahik pah ra matotong kedanga taguin.

¹⁶“Mai pe re ate tena ninamanar Tamata Noman, kare banot e ualatut tatanon?” *Aisaia 40.13*

Bo inggeig i kale teil tena ninamana Kristo.

O Mahar 3

Poul me Apolos na toking tamatang kalekinale Kristo

3Ro uanotoug, inggo ahik pahu kila tamiuoum pare, o tamatang tar Iabena Dedeil, bo inggoum misiana haraha tasir tamata gera uakeluk puk tar nimalara uasang tar tukunus, a guama haraha remi nitagorong mana tang Kristo. ^{2h}Inggono ku heir puk tamiuoum tar huh, ahik pah ku heir tamiuoum me niein popokoh, teeit inggoum halana tung matotong ein taninin. Gine pe daan, inggoum halana harahampe tung matot. ³ⁱTeeit inggoum mung uangoul sira harahampe tasir tamata gera uakeluk puk teres nimalara uasang tar tukunus, ge o ueluelgehe pe, karo ueluel-nimalian o moko haraha tamiuoum, ahik me inete re uatur uakalahara tamiuoum pare, kung de manas tar nimalara uasang tar tukunumi. Inggoum mung uangoul sira harahampe tasir tamata gera uakeluk puk teres nimalara uasang tar tukunun. ^{4j}Gete kula me kalamiuoum pare, “Inggo u uakeluk tang Poul,” kare kula me tang giamehe pare, “Inggo u uakeluk tang Apolos,” Inggoum hero tamatang gane harahampe i kot?

^{5k}Maionene Apolos? Maionene Poul? Raeim na toking tamatang kalekinale

^h3:2 Hib 5.12-13; 1Pi 2.2 ⁱ3:3 1Ko 1.10-11 ^j3:4 1Ko 1.12

^k3:5 Apo 18.4,11,27-28

kompe God tekung tagorong mana tur-oum toro Uelhire Uaia. A Tamata Nomanana ke heir kahakaha tenamira kalekinale raeim. ⁶Inggou ku lebe tar uatun, Apolos teke pikpikur uamololo taninin, bo God teke guata, maeit ke tungaranin kare hua. ⁷Temaait ahik me namana tang mai ke lebe ue tang mai ke pikur uamololo tar kodomo te God puk manasampe ke guat, maeit re huar inet. ⁸Ahik me inete re uagiamehe sioko tang mai geke leb, kare tang mai geke pikur uamololo tar kodom, a siokono komper inete kura guatain, doh rasina ra turung bulaua kahakahampeis tar hua kura guatain. ⁹Ge raeim pe na toking tamatang kalekinale God, doh inggoum ter iom, kare na uma God.

¹⁰Tar nipoulur nang God ger hamhamas geke heirin totoguo, inggo te misiana tasir tamatang atentiehe tun tar tuhanar um. Inggo ku uakodkodoho manasa tar uatabil, karu uamalataha manasa tar butur re me toko uaponolainir um, song me tang giamehe kalehe re me tuha tar um. Bo gisina kahakaha puk ra kapil uaia tun hape ra tuha pe. ¹¹^mGe ahik pe me tamata re matotong uapono polukula i rana me uatabila tar butur ger niur uakodkodoho manas. Ge Iesu Kristo pe tero uatabil. ¹²Mai gere tuha uaponola i rana tar buturuono me goul ue me palua ger abeaba ue me palua ger i ranar bulauan ue me inete ueltebeir puk, me douk ue me garasa ger mat ue me usir, ¹³ⁿna kalekinaleon e turung ualasira uakalaharampein, hape re baka peon, binaka re pokosor mareining kedang. Ge a marein peono tere uakalahara taninina tar paden, inggon e pokoso keip toro hue, roono ro hue toro me uedanga tenas kalekinaler tamata ge

para uiampe. ¹⁴Gete popokoho deder haua ke tuhaion, inggon e turung kale tar bulauan. ¹⁵Bo gete luh uakapon, inggon e turung hagou uasa, kare rouo na mamang inetelik, bo ra turung uelkarus pukin, kare udeil misiana tar tamata geke lukup tur toro hue.

Inggoum na umang lotu God

¹⁶^oInggoum ahik pah mung naman manate pare, inggoum uakapa tun tena umang lotu God, kare na Iabena Dedeil God e uangoul teil tamiuoum? ¹⁷Ge me tang sioko re mamantouo tena umang lotu God, God e mamantouo pono tatanon. Ge na umang lotu pe God a dedeil, inggoum tena umang lotu God.

Ahik me uauairana tasir tamat

¹⁸Ahik pah mung bohboho katongsioum. Gete kula me tang sioko tamiuoum pare, e atentiehe uakapa tun tar mamang niate uaialikane i kot, inggono paka tuktukar, song re atentiehe uaia tunon. ¹⁹Ge a niate uaiang gane pe i kot a tuktukara re banga pe God, ge a puh pe ka boloin tono uelhire God sioun pare, "God ke uatara keip tasir tamatang ate uaiantiehe tun,

teres niate uaia katong." *Job 5.13*

²⁰Doho giamehe ka boloin pare,

"A Tamata Noman e ate teres ninamanar tamatang ate uaiantiehe tunane i kot,

a tabo tengkan." *Ker 94.11*

²¹Temaait ahik me tang sioko re uairana me tamat. A mamang inetelikinine a namiuoum, ²²Poul, Apolos, Pita, a kot, a nitua, o mat, kara inetene daan ue gaatala i uoum, ginin a siokor namiuoum uakapa tun. ²³Inggoum uakapa tun o nang Kristo, doh Kristo a nang God.

¹3:8 Mat 16.27; Epe 2.20-22 ^m3:11 Ais 28.16; 1Pi 2.4-6 ⁿ3:13 1Ko 4.5
^o3:16 1Ko 6.19; 2Ko 6.16

O Mahar 4

No aposoul Iesu Kristo

4 Inggoum pakung kale sira kompe tamiueimene pare, no tamatang kalekinale Kristo. God ke umatoto tamiueim tar kauek, karing ualasira tena uelhireono ger ououu. ²P^DDoh tar uapopokoho tun tar puhonene, mai geka umatotoin e kaueke me inet, inggon e kalekinale uaia tun mare pokos a tamata uaia tar matana na tang kauek. ³Inngo ahik pahu namana getung kedangoum tenag kalekinaleo ue mung tabila to-toguo mesir mamahoholik. Inngo katongo ponompe, ahik pahu matotong kedanga katongoio. ⁴Inngo u kalahar, karu naman manate tun tar puhonene, bo ahik pukumper puhonene pahe kulangua pare, inggo ahik pah ku guata uasa me inet. A Tamata Noman tere kedanga totoguo.

⁵Q^Temaeit, inggoum ahik pah mung uolong kedanga tasir tamat e pokoso tun bakar marein ka umatoto tunin. Uanguangoul gete tapokisihar Tamata Noman, inggono tere me uakalahara tar haua re ouo tar kitup, kare me turung uatauete teres nimalaelhirir tamata gere moko tun tar koloun. Ter binakono tere turung heir kahakaha God tar uatakai tasir tamat.

O Korin ka uasalais

⁶R^O uanotoug inggo ku mene keip tar inetenin totoug katong, kare tang Apolos, maeit a haua gekung longoro turugioum tamiraeim, inggoum mung turung ate tar tengkanar puhung men. "Ahik pah mung lalantiehe tar haua geka

bolo uahiuain tono uelhire God." Song ahikinguaoum pah mung uasala me tang sioko toso uanotoumiu ue mung de tar tang giameh. ⁷S^Ge mai pe ke uagiamehe sioko tamiuoum toso uanotoumiu? A haua harahar inete halanoum tung kale? Bo gete kung kale manasoum tar inetenin, ae maene rung uasalasioum pare, ahik pah kung kale tur tar inetenin tang God?

⁸Inggoum kung siokor kale manasa tar haua rung malarai, karung matoto teil tar mamang inetelik uakapa tun. Inggoum kung kotpokos o toia, bo raeim ahik tagu. Inngo u uahantiehe tun kung toia peoum, maeit ring la toia tagueim tamiuoum. ⁹Bo inggo u banga sirangua pare, God ke tur uakalahara tunungua tamiueim no aposoul Kristo i mud ra la uelreireih pemer tamata, misiana tar tamata gera turung uiliatung poum toin tar matasir manai tar buturung uelpokos.†† Inggeim ka uamakahasieim toro mamang buturulik, kare tasir anggelou, kare tasir tamata uakapa tun.

¹⁰Inggeim o tuktukara tun tang Kristo, bo inggoum mung iate tun tang Kristo. Inggeim o maluan, bo inggoum o tampopokoh, inggoum ra ueltada tunusiuoum, bo inggeim ahik pah ra ueltada tagusieim. ¹¹D^Oh ginempela daan, inggeim ra guatguata uasantiehe tunumpesieim, king gog, karing kamadak, ahik momio inum. ¹²U^King kalekinalantiehe tunumpe mes paheimiu. Tar binaka ra menmene uasasieim, inggeim mi heir tapokis kompe tar niguata uaia. Tar binaka ra uauelmahingisieim, inggeim mi uatut kompe taninin. ¹³Tar binaka ra

††**4:9** O uelhire rone o uakalahara hape re pokoso tasir tamata ka pehuarais tar uiliatung, kara tung poum tois tar buturung uelpokos

P^{4:2} Luk 12.42 Q^{4:5} 1Ko 3.8 R^{4:6} Roum 12.3 S^{4:7} Roum 12.6

U^{4:11} 2Ko 11.23-27 U^{4:12} Mat 5.44; 2Te 3.8

boho tolasieim tar inet, inggeim mi hirhire tapokis hamas uaia kompe. Doh gine daan, inggeim misiananguar mongmongonine tar kot, kara muskurumung tar koto uakapa tun.

¹⁴Inggo ahik pah ku bolo tar puhunina tar uamatala tamiuoum, bo inggo misiana paho bung tug tun tamiuoum, maeit ku uatagin tamiuoum tar puhunin. ¹⁵^vO man, inggoum nomi burehentiehe nomanar tamatang ualasira tamiuoum tang Kristo, bo kung uatamana kompe tar tang sioko ge tar hangana Iesu Kristo pe, inggo teku pokoso sira pare, te tamamiuoum tur toro Uelhire Uaia. ¹⁶^wTemaeit inggo u kula uapopokoho tun tamiuoum tar petut sira tun totoguo.

¹⁷^xTer tengkana tunon, maeit ku ualatuemeo tang Timoti tamiuoum, inggo u malaelhirintiehe tun tatanono misiana paha tug tun, inggon e uakeluk uaia tun, kare tagorong mana tun tar Tamata Noman. Inggono tere me uanamana tapokis tamiuoum tar haua ku ualasilragio tasir tamatang tagorong man tar mamang buturulik geku lalagio, kare hape ku uakeluk tun peo tang Iesu Kristo.

¹⁸O gisiamhe tamiuoum ka uakiantiehe tunumpeis, teeit gisina ka naman pare, inggo ahik pahu lame tamiuoum. ¹⁹Bo ahik pahi reh, karu me pokoso tamiuoum gete malarar Tamata Noman. Song ru me turung heheke uaia tunuo hape ra menmene tun pesinasiner kakaialik, kare hingiar nitampopokoh ra kale teiligisin. ²⁰^yGe na Nitoia pe God inggono ter nitampopokoh ahik paha ineteng mene ueltebeir puk. ²¹Te hingiar puh rung malarantieheioum? Hape rung malara peoum? U la keipime tamiuoum

me puhung malit ue u la keipime tar uelmalaelhir, kara hamhamas?

O Mahar 5

Uelueltula liu tasir uraur

5^zO mana noman, inggo ku longoro pare, o uraur o moko tamiuoum. A bulout ke kale katongo tena kuaha taman. A puhon ahik pahe uoto pokoso tagu tasir tamata gera tele tang God. ²Doh inggoum mung uakaia tunusiuom, bo inggoum pakung maligom, karung ueldolom, karung matal. Inggoum pakung uelueltula liu tar tamaton, ahik pahe uangoul tagu tamiuoum.

³^aO man, inggo tabo nomanaiou tamiuoum, bo a iabeiguo puk e uangoul tagu tamiuoum. Gine ahik peo pahu uangoul tagu tamiuoum, inggo ku heir manasa tar uabang manate tar tamatonene ke guata tar puhonene ter siokono kompe ge pakene u uangoul taguo tamiuoum. ⁴Tat binaka rung uangoul toto polukoum tar hangana nagi Tamata Noman eig Iesu, kare uangoul tagu ponor iabeiguo tamiuoum menia pono tena nitampopokohor Iabena nagi Tamat Noman eig, ⁵^buakiha tar tamatonene tang Satan, maeit ra mamantouoinir tuku-nunonener sa, kara uaudeilinir iaben e tuka tena mareinir Tamata Noman.

⁶^cRomio salasalalikioum o sa, inggoum ahik pah mung ate pare, a niguata uasanin, misianar sikir is, gere uadukis kai tar bereit? ⁷^dUadelauana liu tar pensiuonur is, marung uangouloum tar timuhur niuangoul, misiana tar timuhur bereit, ge ahik pah ka uamoko taguig me is. Ge Kristo pe ter sipsiping tonosio niein uleikir Ju ra kilain, Leke Liu ro Mat, inggono ke kale uelmahing

^v4:15 Gal 4.19 ^w4:16 Pil 3.17 ^x4:17 Apo 19.22 ^y4:20 1Ko 2.4

^z5:1 NKP 18.7-8; Ual 22.30 ^a5:3 Kol 2.5 ^b5:5 1Ti 1.20 ^c5:6 Gal 5.9

^d5:7 Ais 53.7; 1Pi 1.19

teregi niguata uasaeig. ^{8e}Temaeit geti guluheig toro nieining Leke Liu ro Mat, inggeig ahik pahi tuha keip me bereit me pensiouner is gere moko teilir niguata uasa, kara uelsae, bo inggeig i tuha tar timuhur bereit ahik me is. Ginina ter bereit delauana tun, karo man.

⁹Inggo ku bolome tamiuom, ku kula tane ahikioum pah mung ueldokout keip tasir tamata gesir uraur. ¹⁰Bo inggo ahik pahu kulkula tasir tamata gera tele tang God gera ura ueltebeir ue gesir kipala ue gesir bohoboho ue ra lotu tasir god bohoboh. Doh getung marang agoutoum tasir tamatasin, inggoum mung hiliu tar uanene i kot. ^{11f}Doha tengkanar puhonene, maeit ku bolo polukumeio tamiuom, teene inggo u marang kula pare, ahik tun pah mung ueldokout keip me uraur gere kula katongoin pare, e tagorong mana tang Kristo ue ger kipala ue gere lotu tasir god bohoboho ue ger uoto uelhire uasa ue ger uoto sipak uasa ue ra uoto boho tasir gisiamer tamat. Ahik pono pah mung matotong ein tokaha keip me niein tasisin.

¹²Inggo ahik pah tenag kalekinale tar uakodkodoho tas mais ra uangoul i behia tagigeig, God e turung kedanga tasisin. Bo inggoum nami kalekinale tar kedanga tas mais gera guata tar niguata ger sa i uantinatin tamiuom. ¹³No uelhire God o kula pare,

“Uelueltula liu tasir tamata uasa gera uangoul tagu tamiuom.” *Ualaut* 13.5; 17.7

O Mahar 6

O tamatang tagorong mana tang Kristo ka ueluelpoluke katongois

6 Inggoumene rung tagorong mana tang Kristo, a sa tunumpe rung

uoto guata pe pare, gete me tang sioko re uelperere keip tang uanoton, inggon e la uolo hirengua tasir tamata-sine i behia gera tagorong boho tang Kristo tera tabila tasrasin, kare leke liu tosono tamata God ge pake tera tabila tasrasin. ^{2g}Inggoum ahik pah mung ate pare, no tamata God pe gesir dedeil tera turung kedanga tasir tamata uakapa tunane i kot? Inggoum ahik pah mung matotong uakodkodoho katongosioum tar inete sira pare, gete pokoso tamiuom, ge inggoum pe tosono tamata God? ³Inggoum ahik pah mung ate pono pare, inggeig pe teri turung kedanga tasir anggelou? Temaeit inggoum mung uakodkodoho uaia nomana tunusioum tar inete sira pare, gere pokoso tamiuom tar nituaene rung uangoul keipin daan. ⁴Temaeit gete kung ueluelkoioum, ae maene rung uoto ueliuoum taninina tasir tamatang kedanga ge ahik pah ra ueltadaisir tamatang tagorong man? ⁵Inggo ku mene tar puhonene u marang uamatala tamiuom. Ahik mo tamatang ate tamioumeit rung tagorong mana tang Kristo tar tabila tar uelhirenin? ⁶Bo inggoum gete kusa sikoroin me tang sioko me puh sira paar, tang uanotono katong e uolo ueliuingua tar puhono tasir tamata ge ahik pah ra tagorong mana tagu tang Kristo.

⁷A puhon e ualasira uakalahara manasa pare, inggoum ka pehuara manasasioum. Ae maene ahikioum pah kung uamaluanasioum ka guata uasa pesioum? Ae maene ahikioum pah kung uamaluanasioum ka uelour pesioum toro boh? ⁸Bo inggoum kung guata uasa, karung uelour toso uanotoumiu.

^{9h}Inggoum ahik pah mung ate pare, o tamatasine i behia gera tagorong boho

^e5:8 Ual 16.3 ^f5:11 2Te 3.6; Tai 3.10

^h6:9 Gal 5.19-21; Epe 5.5; UGO 22.15

^g6:2 UGO 20.4

tang Kristo, gisina ahik menas hagar tagu tar Nitoiar nang God? Ahik pah mung bohboho katongosioum. Mai gere ura ueltebeir puk ue gere lotu tasir godo bohoboh ue gere uangoul uasa keip me kuaha ger le ue me bulout ger le ue a toking bulout ue a toking kuaha geura ueluelkale katongois ue mai gere heir ueltebeir puk tar tuku-nuna tar hagar uasa, ¹⁰ue a ueuenau ue a kupal ue ger uoto sipaka keip tar ninamana uasa ue gere uoto guata tar niguataniner sa tasir gisiameh ue gere uelour tasir tamat. O tamata gera uoto guata dede kompela tar niguatanin, ahik menas hagar tagu tar Nitoiar nang God. ¹¹iSioun o gisiameh tamiuoum ra kale teil tar niguatanin, bo inggoum puk ka uahuhu manasasioum, kara uadedeili-sioum, kara uatur uakalaharasioum, o kodkodoho tun tar hangana nagi Tamata Noman eig Iesu Kristo, kare tena Iabena Dedeil God ger nagigeig.

A tukunugigeig na umar Tamata Noman

¹²jInggoum mung kula pare, “Inggo ka uauiaio tar guata tereg nimalara tar mamang inetelik” Bo a mamang inetelik pukunin, a giniameh ahik pahe guata uaia totomua. “Inggo ka uauiaio tar guata tereg nimalara tar mamang inetelik.” Bo inggo ahik pahu uamaluana uakeluk pukuio tar mamang inetelikin. ¹³kInggoum mung kula pare, a niein e la i lolono toro balanar tamat, karo balanar tamat o kale tar niein, bo God puk e turung mamantouo tasrasina tokah. A tukunugigeig, ahik pah ka heirig, ra ura ueltebeir keip pukig. A tukunugigeig a nanar Tamata No-

man, doh inggonor Tamata Noman e uangoul teil tar tukunugigeig uakapa tun. ¹⁴lNa nitampopokoho God ke uatua tapokis tur tar Tamata Nomana toro mat, kare turung uatua tapokis pono tagigeig. ¹⁵mInggoum ahik pah mung ate pare, a tukunugigeig pe o maharana Kristo? Ue inggo u matot u kale mo maharana Kristo, karu uamokola tar kuaha ger uraur? A puhon a mahang pe uasa tun. ¹⁶nInggoum ahik pah mung ate pare, mai gere uangoul tokaha keip tar kuaha ger uraur, rasin e turung siokongua ra tukunus? Ge no uelhire pe God, geka boloing sioun o hire teil pare, “Ger tang torik, rasin a tang siok.”^{††} ¹⁷oBo mai gere uangoul tokaha keip tar Tamata Noman, inggono nasira siokor Iabena mer Tamata Noman.

¹⁸Ualo liu tar niguataniner sa ra uoto guataigir uraur, a giniameh niguata ger sa e moko puk i morene tar tuku-nunar tamat, bor niguataniner sa ra uoto guataigir uraur e uasusa katongongua tar tukunumioum uakapa tun. ¹⁹Ing-goum ahik pah mung ate pare, a tukunumioum pe na umang lotur Iabena Dedeil, inggonor Iabena Dedeil gekung kale turioum tang God gere uangoul teil i lolono tamiuoum. Ingga ahik pahanoum totoum katong. ²⁰pInggoum a i ranantiehe tunur bulauamui ke bulau tapokis pe God. Temaeit ueltada keip tang God tar tukunumioum.

O Mahar 7

A ualatut tar le

7 Gine ter puhung uahire tapokis tar nidangatar namiuoum ge para uiamper tamata geta hik pahe le. ²Gine

††6:16 Bolobolong Uakeken 2.24

ⁱ6:11 Tai 3.3-7 ^j6:12 1Ko 10.23 ^k6:13 1Te 4.3-5

^l6:14 Roum 8.11; 1Ko 15.20; 2Ko 4.14 ^m6:15 Epe 5.30 ⁿ6:16 Mat 19.5

^o6:17 Jon 17.21-23; Roum 8.9-11 ^p6:20 1Ko 7.23; 1Pi 1.18-19

daana ko pokoso uauleik pe ro uraur, tmaeit auiantiehe tun tasir bulout mesir kuah tar le.

³A bulout e tangana tar tukununa tena kuah, a siokono ponompe tar kuah. ⁴A tukununar kuah e moko tar nikaueken tena bulout ter siokono ponompe tar tukununar bulout e moko tar nikaueken tena kuah. ⁵Ahik me tang sioko tas maisir le re ut tar tukununa tena kuaha ue tena bulout, gete me puh tun kura uelamokois rasin, tar uangoul uaha sikoro bak, kaura heir baka tenasira binaka tar lotu, song ura me uangoul tokaha poluk. Maeit Satan ahik pahe matotong uedanga uasa tasrasin tar binaka geta hik rasina pah ura matotong kaueke uaia katongois. ⁶Ginanine ahik paha ualatoh, inggo u marang meneng poul puk tamiuoum tar puhonene. ⁷Inggo u uahantiehe tun pono geta siokor kamobo sirar bulout totoguo. Bo God ke heir kahakaha tar nipoul tasir tamata uakapa tun. Gisina ka umatoto kahakahampeis tar uangoulung kamobo ue ra le.

⁸Mais ge halana ta le, kare maisir kamob inggo u kula tasisina pare, auia geta uangoul sirampelasina pare, o kamobo misiana totoguo. ⁹Bo geta hikisina pah ra matotong kaueke katongois teres nimalar, gisina ra le, ge auia pe tar le gete mamahanungur nimalaelhir.

¹⁰Doh tamiuoumeitir le, inggo u ualatoh tamiuoum pare; (Ahik pah inggo, bo inggon a Tamata Noman) A kuaha ger le ahik tun pahe matotong hiliu tena bulout. ¹¹Bo gete guatono paar, inggono pake uangoulung kamobo dedengua ue e me uelhiarou tapokis tena bulout. Doha bulout ger le, ahik tun pahe matotong uelueltula liu tena kuah.

¹²Doh tasir bureheis, inggo u kula pare, (inggo katong ahik paha Tamata Noman.) Gete me uanotoumiuoum ke le

me kuah, doh ahik pahe tagorong mana tagu tang Kristo, bo na kuaha pukuon e malarantiehe tun tar uangoul tokaha keip tena bulout, ahik paho uelueltula tatanon. ¹³Doh gete me kuaha tamiuoum ke le me bulout, ahik pahe tagorong mana tang Kristo, bo na bulout pukuon e malarantiehe tun tar uangoul tokaha keip tena kuah, ahik paho uelueltula liu tatanon. ¹⁴Ge a bulout pe ge ahik pahe tagorong mana tang Kristo e turung dedeil tur manasa tena nitagorong mana na kuah. Kara kuaha ge ahik pahe tagorong mana tang Kristo e turung dedeil tur manasa tena nitagorong mana na bulout. Ge o bung tumiuoum peene ahik pah mung tagorong mana tang Kristo paka hik paho dedeil, bo gine daan gisina ka dedeil manas.

¹⁵Bo gete me bulout ue me kuaha ge ahik pahe tagorong mana tagu tang Kristo e marang hiliu tena kuaha ue tena bulout, uamaluana gere guatono tena nimalar. Ge a bulout pe ue a kuaha gere tagorong mana tang Kristo ahik pahe kale taguinir niduh. Ge God pe ke kila tagigeig i uangoul keip toro hiarou.

¹⁶Hape ro ate pear kuaha gete ko poul tenang bulout mare tagorong mana tang Kristo? Hape ro ate pear bulout gete ko poul tenang kuah mare tagorong mana tang Kristo?

Inggeig kahakah i uangoul sirampe ke malara pe God

¹⁷Inggoum kahakaha pakung uangoul sirampe hape ke umatoto per Tamata Noman. Uangoul sira tur dedempe tar uakekenen tar binaka ko tagorong mana tang Kristo. Ginanine tenag mene uakapa tuno ku meneig tasir toto tamatang toro buturung lotu uakapa tun. ¹⁸A bulout geka pokoin ro kapokono tar binaka ke tagorong mana uakekene

tang Kristo. Inggon e uangoul a nipokor kapokon. A bulout ge ahik pah ka pokoin ro kapokono tar binaka ke tagorong mana uakekene tang Kristo, inggon e uangoul a tabung pok. ¹⁹uGe a hagar peonene ra poko peisir bulout ahik me inete re uapoksair baka tang mai ge ahik pah ka pokoin. Ter puhung uleik pakung guataioum teene, ueltada, karung uakeluk tar ualatohor nang God. ²⁰Inggeig kahakaha paki uangoul sira turumpeme tar uakekenen tar binaka ki tagorong mana tang Kristo. ²¹Geta karabusa tar binaka ko tagorong mana uakekene tang Kristo. Ahik paho uamaluana tar puhon e kale uahiua to-tomua, bo gete kaein me binaka re soloia o ualo uakelukungua. ²²vNamana huara kompe pare, ge teka kila toia tar karabus, gine daan ingga ke solo mana-saia tur tar Tamata Noman. Doh gete ke soloia ke kale per Tamata Nomana to-tomua ingga o karabus tang Kristo. ²³Inggoum a i ranantiehe tunur bulauamiu ke bulaua pe God, bo gine daan ingga ahik baka poluk paho pokos a karabus. ²⁴Temaeit, inggoum kahakaha pakung uangoul tokaha keip dedempe tang God tar binaka ka kila uakekenemeisium, karung tagorong mana tang Kristo.

**A puh e la tas maisir kamob,
kare mais halana ta le**

²⁵A puhene e lain tasir kamob, inggo ahik pah ku kale tur me ualatoho tar Tamata Noman tar mene tasisin. Bo tar niueldolomo pukur nanar Tamata Noman, inggono ke uanaman manate tun totoguo tar niate gera ueltadain, karu turung uahireo tamiuoum. ²⁶Doh tar niduhunine re pokoslaene daan, inggo u namana sira pare, Auiantiehe tun to-tomua tar uangoul sira dedempe ro uangoul pe. ²⁷Inggger le ahik paho sir me

hagar maura ueltageih. Inggoumeit ahik pah kung le ahik pah mung le. ²⁸Bo gete ko le ingga, auia ahik pah ko guata uasa. Doh gete me kuaha kamob ke le, auia inggon ahik pah ke guata uasa. Bo mais gera le ginela daan, gisina ra turung huata tar bureher niduh tar niuangoulur nas, temaeit ru marang hire taniko tamiuoum tar ineteninane.

²⁹Ro uanotoug a tengkana maeit ku meno tar puhonene, teeit a binak a puhina uasa tun. Ginela daan, maisir bulout gesir le ra uangoul sira pare, ahik monosio kuah. ³⁰Mais gera kiring, kara ueldolomo gisina ra uangoul sira pare, ahik pah ra kiring, kara ueldolom. Mais gera uaha gisina ra uangoul sira pare, ahik pah ra uah. Mais geka bulbulau me inet, gisina ra uangoul sira pare, a ineter nasisin ahik paha nasisin tun. ³¹wMais geka kalekinale keipime tar ineteng gane i kot, gisina paka uangoul sira pare, ahik pah ra kalekinale keip taninin. Ge gine pelae daan gane i kot e rourouo uain manas.

³²Inggou u malara tamiuoum ahik pah mung namanantieh, kare sirisium tar niuangoulung ginela daan. A bulout kamob e heir kompe tena binaka tar guata tena kalekinaler Tamata Noman, teeit inggon e marang uauaha tar Tamata Noman. ³³Bosir bulout gesir le ra namanantiehe kompe tar niuangoulung gane i kot, kare hape ra uauaha pe tosnosio kuah. ³⁴Temaeit gisina ra lih tar torikir lel. Ter siokono kompe tasir kuaha kamobo ue tasir kuaha gesir dedeil, gisina ra heir kompe tenas binaka tar kalekinale tar Tamata Noman, kare hape ra uadedeil pe tar tukunus, kare tar iabeis. Bosir kuaha gesir le ra namanantiehe kompe tar niuangoulung gane i kot, kare hape ra uauaha pe tosnosio bulout.

³⁵Inggo ku mene kompe tar puhonene tar poul tamiuoum. Inggo ahik pah ku marang tur tane tamiuoum tar le ue u heir me niduh tamiuoum. Bo inggo ku keip kai uain tar nitabilar namiuoum, marung kalekinale tokaha dede uaia kompelaoum tar Tamata Noman, ahik me lala uelpakaha ueltebeir. ³⁶Bo gete me tang siokor bulout re namanang pesiaua sikor, kara hik pahe guata uaia tena kuaha geka uamatotoin, inggono ra uarikin tane tanikain, song gete la matotoin na binakon, kare namana sira pare, e marang le, inggon e guata uakeluk kompe tena nimalar, a puhon ahik paha sa. Inggon e le. ³⁷Bo gete malaron e tur uanono keip nomana tena ninamana pare, ahik pahe le tar kuaha geka uarikin tanein tatanon, kare uakodkodoho katongoin, kare uamoko manasa tena ninamana pare, ahik pahe marang le tar kua-hon inggono ke guata uaia. ³⁸Temaieit mair bulout gere le, inggono ke guata uaia, bo mai ahik pahe marang le inggono teke guata uaia uainintiehe tun.

³⁹^xA kuah e uangoul dedempe tar nikaueken tena bulout tar binaka re tua harah, bo gete mata na bulouton, inggono song re soloin tar le tang mai re malarain geta tamatang tagorong manon. ⁴⁰Bo tar giameher paina puk, auiantiehe tun tatanono tar uangoulung kamob. Inggo u namana sira tar puhonene ku menein e la tur tena labena Dedeil God.

O Mahar 8

A niein gera guata keipig tar uahung tasir god bohoboh

8^yGine ter puhung uahire tapokis tar niein gera guata keipig tar uahung tasir god bohoboh; Inggeig i ate i siokor

matoto teil tar niate. A niate e uakeip kai puk tar tamat, bo a nimalaelhir e poul uaiantiehe tun tar tamat. ²^zA tamata gere namana pare, e ate tar inet, inggon halana te ate. ³Bo a tamata gere malaelhir tang God, inggono tere atein God.

⁴^aTemaieit, tar ein tar niein geka guata keipig tar uahung tasir god bohoboh, inggeig i ate, a god bohoboh ahik tunumpe me hangana tar uanene i kot. Ahik me god baka poluk a tang siokon siounur God. ⁵Gitiempe gete kaeis mo inete gera kulais o god i Heuen ue kaeisane i kot. (O man o bureher god, karo bureher tamata noman.) ⁶^bBo tagigeigene a tang siokon sioun komper God, tamagigeig geke kotpokoso turur mamang inetelik, kare temaieit pono ri uangoul keipeig tar nituaene daan. Inggono gine re uangoul, bo a tang sioko komper Tamata Noman Iesu Kristo teono tere la turur mamang inetelik, doh temaieit pono ri uangoul keipig tar nitua.

⁷Bo ahik puk paho bureher tamata ra ate tar puhonene, o gisiameher tamata ke anga manasais tasir god bohoboh, tar binaka ra einisina tar niein, gisina ra la namnamanangua kompe taninin, ka guata keip peig tar uahung tasir god bohoboh, doh gine daan a nieininin teke uatoboulungua teres ninamanasin tar huar ineter sa ue a huar ineter uia. Doha nieininin teke guata uasangua tasisin ⁸Bor niein ahik pahe matotong keip uahuhut tagu tagigeig tang God. Inggeig ahik pahi matotong sa uasantiehe tun geta hik pahi ein ue ahik pahi uia geti ein. ⁹^cTagin maieit ahikir nipileser noumua ro uangoul pela tereng nimalara katongo pahe uapunga tas mais gera toboul tar huar ineter sa ue a huar ineter uia.

^x7:39 Roum 7.2-3 ^y8:1 Apo 15.29 ^z8:2 Gal 6.3

^a8:4 Ual 4.39; 6.4; Gal 4.8 ^b8:6 Epe 4.5-6 ^c8:9 Roum 14.13-15; Gal 5.13

¹⁰Gete me tang sioko re toboul, kare banga totomuaener naman manate ro ein to pe tenas umang lotur god bohoboho, inggon e ongolongua pono tar la ein taninin. ¹¹^dTemaeit inggonener uanotougigeig gere toboul geke mata ueleheirin Iesu, reng niatea ke maman-touongua tatanon. ¹²Gete ko guata uasa ingga tang uanotoum gere toboul tar hauar ineter sa ue a hauar ineter uia, ingga ko guata uasa pono tang Kristo. ¹³^eTemaeit gete ter nieininina geku einigio ke uapunga tang uanotouguo tar niguata uasa, inggo ahikingua pahu ein baka poluk tar singsingin, maeit ahikiono pahe punga tar niguata uasa.

O Mahar 9

Poul ke tur uanono keip tun tena kalekinale pare, a aposoul

9^fInggo ahik pah ke soloio? Inggo ahik paha aposoul? Inggo halana tu banga tang Iesu ge nagi Tamata Nomanig? Inggoum ahik pah teka banga tosioum tar kalekinaler nouguo tar Tamata Noman? ²^gO gisiamer tamat ahik pah ra banga sira totoguo pare, a aposoul, bo toro mana tun, inggoum tekung kale tar haua ku ualasingragio ge inggoum pe tesir uaparokor nouguo pare, a aposoul.

³Gininanine teru turung tur keipi-gio tas mais gera marang kedanga totoguo. ⁴^hUe ahikiono paha uia tamiueim tar kale tur me niein ue me kodom tar kalekinale king guatain? ⁵Ue ahikiono paha uia tamiueim tar kilkila teil tosnomio kuaha gera tagorong mana misiana tasisitir gisiamer aposoul, kare misiana toso bung tahinar Tamata

Noman doh Pita? ⁶Ue teo puk me Barnabas mira kalekinale tar marang inet? ⁷Mai re kalekinale pare, a tamatang uiliatung, kare bulaua katongoin? Ue mai re lebe mena lebe bino, kara hik pahe ein gete uanin? Ue mai re kaueke no sipsip, kara hik pahe matotong inum me huh gera kale turig tasisin? ⁸Inggo ku mene keip puk tena nitampopokohor tamat? Ahikir ualatut paha siokono taninin. ⁹ⁱGe a ualatut pe ger nang Moses e hire pare, “Ahik paho uih tane tar uauanar kau tar binaka re kalekinale tar pioko liu tar kapokonor raes-uit.” Ter kau ke namanantiehe tunin God? Maeit ke mene tar puhon? ¹⁰^jO manampe, God ke mene uatuha tola tar puhono tagigeig? Te paara noman, a puhon ka bolo uatuha tolain tagigeig, teeit mai re tau, kare mai re ueuer tar niein, inggono ke guata tar kalekinaleon, kare ate teil pare, e turung kale niein to pono tar haua ke tumarangain.

¹¹^kInggeim king uasis tar uatuna uaia ger nanar Iabena tamiuoum. Temaeit inggon ahik paha uia tamiueim tar kale tapokis tur me nipoul tamiuoum? ¹²^lBo gete mo gisiamer ka uahueis tar kale tur me nipoul tamiuoum, inggeim here song ring kale tur me burehe uainir mamang inetelik tamiuoum? Bo inggeim ahik pah mi malar tar hagarion, inggeim mi kalekinale kompe, gitiempe ahik peeim pah mi kale me bulauamiu, maeit ahik me inete re tur tane tono Uelhire Uaia Kristo. ¹³^mInggoum ahik pah mung ate pare, mais ra kalekinale iuma tena umang lotu God, gisina ra kale niein to iuma tar umon? Kare mais ra kalekinale tar butur ra uoto guata toinir uahung,

^d8:11 Roum 14.15,20 ^e8:13 Roum 14.21

^f9:1 Apo 22.17-18; 26.16; 1Ko 15.8-9 ^g9:2 2Ko 3.2-3 ^h9:4 Luk 10.8

ⁱ9:9 Ual 25.4; 1Ti 5.18 ^j9:10 2Ti 2.6 ^k9:11 Roum 15.27

^l9:12 Apo 20.34; 2Ko 11.9 ^m9:13 Ual 18.1-3

gisina ra uoto uelpakaha tar inete gere la tar uahung? ¹⁴(-)

¹⁵Bo inggo puk ahik pah ku uakeluk me sisikinalik tar hagarion, doh ahik pono pah ku bolo tang roon, karu namana pare, mung turung guata ueleheiroum me inete totoguo, inggo u dentiehe tun geta kale liuin me tang siokor tamata tar hauru sala keipio. ¹⁶ⁿDoh tar binaka ru hire taueto toro Uelhire Uaia, inggo ahik pahu banotong uasalaio, bo inggo ka petutup tunio tar hire tauete tang roono ro Uelhire Uaia. A santiehe tun totoguo geta hik pahu hire tauete tang roon.

¹⁷Gete ku kalkalekinale pukuo tar hire tauete toro Uelhire Uaia teregir nimalar, inggo u banot u hinga me bulauoug. Bo inggo u guata pukumpe tar huar nimalara ke heiring God totoguo tar guat.

¹⁸Doh hapengua me bulauouguo? A bulauouguo te gine, tar binaka ru hire taueto toro Uelhire Uaia, inggo u kalkalekinale puk ahik me bulauoug. Doh tar binaka ru hire tauete inggo tang roon ahik pahu uahinga ra heirio me inet.

¹⁹O man, inggo ke soloioene daan, inggo ahik paha nana me tang sioko pukur tamat. Bo inggo ku heir katongoio, a tamatang kalekinale puk tasir tamata uakapa tun maru pehuara mo bureher tamata mara la tang Kristo. ²⁰^oBinaka ru kalekinaleo tasir Ju, inggo u uakeluk tenas niguatasina maru pehuara tasisin. Doh mais ra uangoul i kukulebanga tar ualatut, inggo u la uangoul sira pono tasisin, (bo totoguo katongo puk ahik pahu uangoul tagu i kukulebanga tena nikaueke na ualatut

Moses.) Bo u uangoul sira kompe, maru pehuara tasisin. ²¹Doh tas mais ge hik pah ra uangoul i kukulebanga tar ualatut, inggo u la uangoul sira ponompe tasisin, o man inggo ahik pahe soloio tar ualatut nang God, bo inggo u uangoul i kukulebanga tar nikaueken tar ualatut nang Kristo. Bo u la uangoul sira kompe maru pehuara tasisin.

²²^pDoh tas mais ge ahik paho tang popokoh, inggo u la misiana sira pono tasisin. Inggo u la uakeluk sira tun tar mamang niguatalikir nasisin, maeit gete pokoso me puh, inggo u matotong pehuara mo gisiameh. ²³Inggo u guata kompe tar hagarionene tar tur keip toro Uelhire Uaia mare turung kale keip ponoio tar niguata uaia.

²⁴Inggoum ahik pah mung ate pare, geta marang uedangaisir tamat, mair ualontieh, a tang siokon sioun re pehuar, kare kale tar bulauan. Temaeit ualontiehe tun marung pehuaroum, karung kale me bulauamiu. ²⁵^qO tamata uakapa tun gera pilese tar hauru petutupin tar kale, gisina ra uakeluk uaia tun tar ualatoh. Gisina ra pilese toro mahara roono mara kale toro keuar ge ahik paho moko dede tagu, bo inggeig i guata tar puhono mari kale toro keuar gero moko dede.

²⁶Temaeit inggo ahik pahu ualo sira tar tamata gere ualo togotog. Doh ahik pahu uelkoi sira tar tamata gere nun ueltebeir puk tar hagar. ²⁷^rInggo u uatagala tun tar tukunug mare longoro tunono totoguo, maeit geta uedangaio tar binaka ru hire taueto tono uelhire God tasir gisiameh, inggo ahik pah ra matotong uapungaio me niuedang.

ⁿ9:16 Jer 20.9 ^o9:20 Apo 21.20-26 ^p9:22 2Ko 11.29

^q9:25 Pil 3.14; 2Ti 2.4-5; 4.7-8 ^r9:27 Roum 8.13; 13.14

O Mahar 10

A uatagin tenas ueluatatang siounur Israel

10^sInggo u marang uanamana tapokis puk tamiuoum ro uanotoug tar inete ger man geke pokoso toso bung tubugeig geke uakuakeluk teil tang Moses tar binaka ko kaueke ro mahar langit tasisin, kara talingorosina tang roon, kare tar binaka ka lih polakalasin tar laur ger Kubkubar. ²Gisina uakapa tun ka siokor uahuho tois toro mahar langit, dohi laur pare, no tamatang uakuakelukungua Moses. ³Gisina ka siokor ein tar siokonor nieining tar iaben, ⁴ukara inum tar siokonor inumung tar iaben. Ge gisina pe ka inum tar kodomo geke tading tur toro palaua gero to iaben gere la teil tagu tasisin, doho palaua roon te Kristo. ⁵vBo God puk ahik pah ke uaha tasir burehe tasisin, temaeit inggon ke uamata tasisin kare kaseigir tukunusisin tar butur padenen.

⁶wDoh gine daan, a mamang ineteklikinin tere ualasira tapokis tagigeig mara hik pahi uamoko teregi nimalaelhir tar mamang inetelikininer sa ka guatguatameigisin. ⁷Ahik pah mung lotu tasir god bohoboho misiana tasir gisiamehe tasisin, ge a puh pe ka boloin, tono uelhire God sioun pare, "O tamata ra tabil, kara ein, kara sipak, kara ualagoreih kara doum ra uaha pe tar niein." *Kale Tapokis 32.6*

⁸xInggeig ahik tun pahi guata toro uraur, misiana ka guata per gisiamehe tasisin, a 23,000ir tamat tasisina ka mat tar siokonor binak. ⁹yInggeig ahik tun

pahi uedanga tang Kristo misiana ka guata per gisiameh, kare tung pousunguar soi tasisin. ¹⁰zAhik tun pah mung menmene uasa misiana ka guata per gisiamehe sioun tang Moses, kare tung pousunguar angelou gere keip teil toro mat tasisin. ¹¹Gininaniner inete ke pokos e ualasira tasisin, kara bolo uahiuahig e uatagin tagigeigene ri uangoulene daan re lang kapa pelar binak.

¹²Temaeit gete kung namana siroum kung tur uanono tun, kapil uaia tunusiuoum getung pungoum. ¹³Namana huara kompe ahik me uatolaua uasanine re lame tamiuoum re giamehe sioko tanine re lame tasir tamata uakap, ge God pe a uauaman ahik pahe bangang duk tar uatolaua uasa re lame tamiuoum geta hikoum pah mung matot. Doh gete lamer uatolaua uasa tamiuoum, God e poul tamiuoum me hagar, maeit ahikioum pah mung pesiau.

No nieinir god bohoboh, kare no nieinir Tamata Noman

¹⁴Temaeit, inggoum ro bung kaloug, hiliu tar lotu tasir god bohoboh. ¹⁵Inggo u menmene tamiuoumener tangtangouo remi ninaman. Banga katongosiuoum tar haua ku meneio. ¹⁶aA kapang tar niguata uaia geri heir keipieig tar niuah e uangoul tokaha keip tar deuatingina Kristo, doho bereit geri pisiseig o uangoul tokaha keip tar tukununa Kristo. ¹⁷bTeeit ge o sioko pe ro bereit, bo inggeig puk o bureh i la misiana sira pare, a tang siok, kari siokor ein toro bereit roon. ¹⁸cBanga tola tasir Israel mais gera ein tar inete gera guatain tar uahung, gisina ra uangoul tokaha

^s10:1 KT 13.21-22; 14.22-29 ^t10:3 KT 16.35 ^u10:4 KT 17.6; Aha 20.11

^v10:5 Aha 14.29-30 ^w10:6 Aha 11.4,34; 1Ko 10.11 ^x10:8 Aha 25.1-9

^y10:9 Aha 21.5-6 ^z10:10 Aha 16.41-49 ^a10:16 Mat 26.26-28

^b10:17 Roum 12.5 ^c10:18 KTP 7.6

keip tang God tar butur ra guata toinir uahung.

^{19d}Inggo u menmene pare, a uahung geke guatain tasir god bohoboh a to tengkan? Ue a god bohoboh a to tengkan? Ahik! ^{20e}Bo nas uahungur tamata gera tele tang God a uahungunin ahik pahe la tang God, e la tasir liouana uasa. Ahik pahu malara tamiuoum mung uangoul tokaha keip tasir liouana uasa. ^{21f}Inggoum ahik pah mung matotong inum tola tena kapar Tamata Noman, kare tena kapar liouana uasa. Ahik pah mung matotong ein to tena pateher Tamata Noman, kare tena pateher liouana uasa. ^{22g}Inggeig i marang uagehegehe tar Tamata Noman? Inggeig tesir tampopokohontiehe tatanon?

O tamatang tagorong mana ka guata teres nimalar

^{23h}Inggoum mung kula pare, “Inggo ka uauiaio tar guata tereg nimalara tar mamang inetelik.” Bo a mamang inetelik pukunin a giniamah ahik pahe guata uaiatotomua. “Inggo ka uauiaio tar guata tereg nimalara tar mamang inetelik.” Bo ahik puk paha mamang inetelik re matotong poul me tamat. ²⁴ⁱA tamat ahik pahe sir mena niuia katong, bo e sir kompe torosio uiar gisiamer tamat.

²⁵Ein tar mamang inetelik ra uabulaulaig tar butur gera bulbulaua toigir singsingin, kara hik me dangat ia ka kale turiginin. ^{26j}Ge a niein penine i kot, kara mamang inetelik gere mokane i kot a nanar Tamata Noman.

²⁷Gete mo tamat ahik pah ra tagorong mana tang Kristo ra kila tamiuoum

tar la ein to tonoso umasin, mung la getung malar, karung ein tar haua ra uatoko ueleheirin tamiuoum, ahik pah mung dangat ia ra kale turiginin. ^{28k}Bo gete me tamata re hire tamiuoum pare, “A nieinine ka guataig tar uahung tasir god bohoboh.” Song ahikioum pah mung ein taninin tono uiaene ke hire tamiuoum tar haua re moko tena niateon ia re la turunin. ²⁹Doha niateonene ahik paha emiuoum na niater tang giamehe siokor tamat, ae maene re pemai to puk reg nimalaro tena niater tang giamehe siok? ^{30l}Gete ku heirio tar niuaha tang God tereg niein, ae maene ra meneio geku heir manasa peo tar niuaha tang God taninin?

^{31m}Temaait a haua gero einigia, karo inum ue a haua ro guatagia, uatakai keip dedempe taninina tang God. ³²ⁿAhik pah mung guata uasa tasir Ju ue tasir gime uan ue tosno tamata God. ^{33o}Bo mung guata sira puk misiana ku uauaha tun peo tasir tamata uakapa tun tar mamang hagarilik, ge inggo pe ahik pahu sir katongo torogo uia, bo inggo u sir torosio uiar bureher tamat, maait ra banotong udeilisin.

O Mahar 11

11 ^pPetut sira totoguo misiana ku petut sira tun peo tang Kristo.

Uangoul i kukulebanga tar nikauek

²Inggo u uaha tun tamiuoum, rung namana dede haraha pe totoguo tar mamang inetelik. Karung sanga uanono tun tar ualasira misiana harampe ku heir uain peo taninina tamiuoum.

^d10:19 1Ko 8.4 ^e10:20 Ual 32.17; UGO 9.20 ^f10:21 2Ko 6.15-16

^g10:22 Ual 32.21 ^h10:23 1Ko 6.12 ⁱ10:24 Roum 15.1-2

^j10:26 Ker 24.1; 50.2; 1Ti 4.4 ^k10:28 1Ko 8.7 ^l10:30 1Ti 4.4

^m10:31 Kol 3.17 ⁿ10:32 Roum 14.13 ^o10:33 1Ko 9.20-22 ^p11:1 1Ko 4.16

³Bo inggo u malara mung ate uaia tunoum pare, Kristo tere kaueke tasir bulout, doho bulout tera kaueke tasir kuah, doh God e kaueke tang Kristo. ⁴Doh tasir bulout uakapa tun, mai gere lotu ue gere hire tauete tena uelhire God tar buturung uelpokos, kare taku uaouo toro lun, inggon ahik pahe ueltada tang Kristo. ⁵Doh tasir kuaha uakapa tun, mai gere lotu ue gere hire tauete tonu uelhire God tar buturung uelpokos, doh ahik pahe taku uaouo toro lun, inggon ahik pahe ueltada tena bulout, ahik me inete re uapoksair tatanon, kare tar kuaha ger nikakara ro lun. ⁶Gete me kuah ahik pahe taku uaouo toro lun, inggono paka kout liuigir ulun, bo geta puhono ra matala keipin ro kuah geta kout liuigir ulus ue ra kakara liuigir ulus, inggono pake taku uaouo toro lun. ⁷Bor bulout ahik tagu pahe taku uaouo toro lun, ge inggono pe tera banga toinir porene tar porene God, kare na uiniator God, bor kuah inggono tena uiniator bulout. ⁸Ge a bulout pe ahik pah teka tuha keipin tar kuah, bo git a kuah teka tuha keipin toro maharanar bulout. ⁹Ahik pah ter bulout ka tuhain tar poul tar kuah, bo git a kuaha ka tuhain tar poul tar bulout. ¹⁰Ter tengkanonene, teeit o anggelou ra bang, maeit ra taku ro kuah e ualasira pare, na nikaueker kuah e moko toro lunon.

¹¹Bo tar ueliahe puk tosno tamatar Tamata Noman, a kuah ahik pahe matot e pepe me pahen ge pake taboinir bulout, doha bulout ahik pahe matot e pepe me pahen ge pake taboinir kuah. ¹²Ge a kuaha pe e la tur tar bulout, kare ter siokono ponampe a bulout ke pohoinir kuah. Bor mamang inetelik uakapa tun e la tur tang God.

¹³Dangata katongoia, auiampe tar kuaha gete kale liu tonu taku tar binaka re lotu tang God? ¹⁴Ahikir inetenine ka tou keipig tagigeig pahe uamatala tar bulout gete uaouonanain. ¹⁵Bo inggono pare, gete me kuaha ouonan, inggono ter niueltadar nanon, ge a uluna peononiner barah ka heirig tatanono mare ragom tane toro lunon. ¹⁶Bo gete me tamata re marang uelperere tar puhonene ahik baka poluk me giniamer niguata tamiueim ue tosnosio tamatang tagorong mana God.

No nieinir Tamata Noman

¹⁷Tar ualatutunine ke la uoum, inggo ahik pahu matot u uairana tamiuoum, ge a mamang uelpokosolik per namiuoum a niguata uasa ke hahaua liu tar niguata uaia. ¹⁸Tar uakikilangan, inggo ku longoro pare, tar binaka rung uelpokosoum, a siokor uan a uelsae e mok i uantinanina tamiuoum, doh inggo u tagorong mana sikoro nomanampe taninin. ¹⁹Ahik me uaruara naman e uagiamehe siokongua tamiuoum, kare uakalaharangua mais ke bang paroko tunis God. ²⁰Tar binaka rung uelpokosoum, roon ahik pah tonu nieinir Tamata Noman rung einioum. ²¹Ge tar binakang ein pe o gisiamehe tamiuoum ra uoto ein uoum, ahik pah ra marang pepe uangoul tasir gisiameh, temaeit o gisiamehe ra gog, kara sipakang pahesir gisiamehe tar bureher inum. ²²Inggoum ahik mo nomio um tar ein to? Kare tar inum to? E baka sirono inggoum kung touahiuu manasa tena lotu God, kara hik manasa pah mung ueltada tasir tiome. Mu malar u uairano tamiuoum tar inetenin? Inggon hera hik!

²³Ge inggo pe ku kale tur tar Tamata Noman tar hauanine ru heir uainilagio tamiuoum. Nagi Tamata Nomaneig

^q11:3 Uak 3.16; Epe 5.23 ^r11:7 Uak 1.26-27 ^s11:8 Uak 2.18-23

^t11:18 1Ko 1.10-12

Iesu ke heirin Judas tasir uelmatana naboung. Iesu ke kale toro bereit, ²⁴kare heir tar niuaha tang God, kare pis toro bereit, kare kula pare, “Gine ter tukunuguo a eimiuoum, inggoum mung guata sira pare, tar namana huara to-toguo.” ²⁵^uInggono ke guata sira poluk binaka ka ein uakap, Iesu ke kale tar kap, kare kula pare, a kapene e ualasira tar timuhur uelhote tar deuatingiguo, inggoum mung guata sira pare, tar binaka rung inum keipoum tatanon, inggoum mung namana huara to-toguo. ²⁶Ge a binaka pe rung einioum toro bereit roon, karung inum tola tar kap, inggoum mung tur keip, karung hire tauet, ke mata per Tamata Noman e tuka gete tapokisimeon.

²⁷^vTemaetit, mai ahik pahe ueltada tar binaka re ein toro bereit ue binaka re inum tola tena kapar Tamata Noman, inggono ke kouh tena niguata uasa tar tukunun, kara deuatinginar Tamata Noman. ²⁸A tamat e banga katongo bakain tena nipiles, song re ein tar bereit, kare inum tola tar kap. ²⁹Ge mai pe re ein tar bereit, kare inum tola tar kap, doh ahik pahe naman manate uaia tun tar tukununar Tamata Noman, inggon e uasa katongoin re ein pe, kare inum. ³⁰Temaetingua, o burehe tamiuoum, o manguh, karo momouh, karo gisiamhe tamiuoum ka mat. ³¹Bo geti bang kedanga katongosieig, inggeig ahik pah ra matotong heirisieig me uabang manate.

³²^wTar binaka re heirir Tamata Noman tagigeig me uabang manate, inggeig ra ualatutusiaig, maetit inggeig ahik pah ra mamantouo keipisieig tar pang uanene i kot. ³³Temaetit, tamiuoum ro uanotoug tar binaka rung uelpokosoum tar ein tokah, uanguan-

goul tasir gisiamhe. ³⁴Mai tamiuoum, re gog, inggono pake ein to baka tena um, maetit ahikir uelpokosor namiuoum pahe kedangain God pare, a sa.

Doh tar giniamheher puhunit re mok, inggo u me banga taninin getu tapokisime.

O Mahar 12

A inete ke heirigir Iabena Dedeil

12 Gine daan, ro uanotoug, inggo u malara tamiuoum mung iate uaia tun pare, ahik pah mung kale uasa, karung tuktukara tar inete uaiaene re heirinir Iabena Dedeil. ²^xNamana tapokis kompe tar binaka rung tele harahoum tang God. Inggoum ra uoto uoum keipisoum tar bureher lel tar binaka rung uangouloum i kukulebang tenas nikaueker god bohoboho gesir pau. ³^yTemaetit, inggo gine ru hire tamiuoum, ahik me tamata re mene keip tena Iabena God, kare kula pare, Iesu a sa ue me tamata re kula pare, Iesu a Tamata Noman, e kula kompe gete uangoul teilir Iabena Dedeil tatanon.

⁴^zA bureher kahakahar inete uaia re heirigir Iaben Dedeil, bo a sioko komper Iabena re heir taninin. ⁵A bureher kahakahar kalekinale, bo a tang sioko komper Tamata Nomana ra kalekinaleiginin. ⁶A bureher kahakahar kalekinale ri matotong kalekinalegieig, bo a tang sioko komper God re kalekinale keip taninin tasir tamata uakap.

⁷A Iabena Dedeil e uoto uakalahara katongoin tagigeig uakapa tun tar kahakahar inete uaia tar poul keip tar niuia tasir tamata uakap. ⁸Na Iabena God ke heir kahakaha tar puhung uahire tasir gisiamheher tamat, a uoum tar ninaman, kara niate uaia ter siokono kom-

^u11:25 KT 24.6-8; Hib 8.8-13 ^v11:27 Hib 10.29 ^w11:32 Hib 12.5-6

^x12:2 Hab 2.18-19 ^y12:3 1Jo 4.2-3 ^z12:4 Roum 12.6

per Iabena ke heir pono tasir gisiameher tamata tar puhung uahireng tar ni-ate. ⁹ Doh ter siokono komper Iabenono ke heir tasir gisiamehe tar nitagorong man, doho gisiamehe ka heiris tar nitampopokoho mara uauia tasir tamat tar mamang matelik, ¹⁰ doho gisiamehe ka heiris tar nitampopokoho tar tou tar inet. Doho gisiamehe ka heiris tar hire tauete tono uelhire God ngohina tar propet, doho gisiamehe ka heiris tar niate tar ate parok, ge pare la turur niateono tar Iabena Dedeil ue ahik. Doho gisiamehe ka heiris tar nitampopokoho tar mene tar uelhireng gime uan, doho gisiamehe ka heiris tar hire luaka tar tengkanar puhung menon. ¹¹ ^aGininanine tena kalekinaler tang siok, a siokonor Iaben, kare heir kahakaha taninina tasir tamat terener nimalar.

A siokor tukunun a bureher maharan

¹² ^bA tukunun a siok, bo ka tuha keip pukin tar bureher maharan, doha maharan e la tur kompe tar siokon siounur tukunun ter siokono tang Kristo. ¹³ ^cGe inggeig pe ka siokor uahuhu keipisieig tar siokon siounur Iabena hingiampe ro matina tamat, o Ju, o Grik o tamata gesir o karabus ue gisis ka solois. Inggeig tokah ki inum tar siokon siounur Iaben.

¹⁴ A tukunun, ahik pah ka tuha keip pukin toro sioko ro mahar, ka tuha keipin tar bureher maharan. ¹⁵ Gete kular kekena pare, inggo ahik paha nana tagur tukunun, teeit inggo ahik paha liman. Bo ahik pukumper puhono pahe aha liuingua tatanon, inggonor keken o maharanamper tukunun. ¹⁶ Doh gete kular talingana pare, inggo ahik paha nana tagur tukunun, teeit inggo ahik paha matan. A puhon ahik pahe aha

liuingua tatanon, inggonor talingan o maharanamper tukunun. ¹⁷ Geta matana uakapa komper tukunun. A tukunun ahikingua pahe matotong longor. Doh geta talingana uakapa pukur tukunun, a tukunun ahikingua pahe matotong amuh paroko tagu me inet. ¹⁸ God ke uamoko manasampe tang hingia ro mahara tena butur ke malara pe taninin ia re mok. ¹⁹ Ahik mo mahar sioko taninin mahara ro matoto uakotpokoso me udeilir tukunun. ²⁰ Bo inggonor tukunun a sioko manasampe, bo a burehe pukur maharan.

²¹ A matan ahik pahe matotong kula tar limana pare, “Inggo ahik pahu uahinga to totomua!” Doha liman ahik pahe matotong kula tar kekena pare, “Inggo ahik pahu uahinga to totomua!”

²² A mahmaharanine tar tukunun geri kulagieig a manguh, ginin na kalekinaler uleik tun. ²³ Doha mahara geri uaikotogieig ginina tera ueltada tunig. Doho mahara geri touaousieig roono tera ueltadantiehe tunin. ²⁴ O mahara gero mataiantiehe tun tar tukunun ahik pah ra touaouoin. Bo God ke uauiliod-out tokaha tatanonor tukunun, kare heir tun tar uleikir ueltad tang hingia ro mahara ro i kotontiehe tun. ²⁵ God ke guata tar puhonene, maeit ahikir tukunun pah ra ueluelpakah ueltebeirin. Bo God e malara taninin mahmahar tukununa uakapa tun tar uelkaueke katongoig tar siokonor nikauek. ²⁶ Doh gete mo mahar sioko ko kale uelmahing, a maharana uakapa tun e siokor kale uelmahing keip tang roon. Doh gete mo mahar sioko ka uatakaiain, a maharana uakapa tun ra siokor uatakai keipig tang roon.

²⁷ ^dInggoum uakapa tun ter tukununa Kristo, mung siokor uangoul tokaha teil tar tukununon. ²⁸ ^eDohi uantinana

^a12:11 1Ko 7.7 ^b12:12 1Ko 10.17 ^c12:13 Gal 3.28 ^d12:27 Roum 12.5
^e12:28 Epe 4.11-12

tasir tamatang tagorong man, God ke uamatoto:

uakikilanga tasir aposoul,

song o propet,

song o tamatang ualasil,

song o tamatang touo tar inet,

song tas mais geke heirisir Iabena Dedeil tar nitampopokoho tar uauia tasir momouh,

song tas mais gera uoto poul tasir gisi-ameh, song maisir tang uoum keip,

song tas mais gera mene tar uelhireng gime uan.

²⁹Ahik paho tamata uakapa tunur aposoul, ahik paho tamata uakapa tunur tang ualasil, ahik paho tamata uakapa tun ra matotong touo tar inet.

³⁰Ahik paho tamata uakapa tun ra kale teil tena nitampopokohor Iabena Dedeil tar uauia tar mamang matelik, ahik paho tamata uakapa tun ra mene tar uelhireng gime uan, ahik paho tamata uakapa tun ra matotong hire tauete tar tengkanar ueluatat. ³¹^fBo inggoum mung petutup tar malara me inete uaia me i ranantiehe tun tur tar Iabena Dedeil.

Gine daan Inngo u marang ualasilra uaia tun tamiuoum tar hagar uaiantiehe tun.

O Mahar 13

Na uelmalauelhir uleik tunur nitampopokoho ke heirinir Iabena Dedeil

13Getu meno tar mamang uel-hireng gime uanilik ue u mene sira tasir angelou, doh taboinir nimalauelhir, inggo misiananguar inete gere ualagoreih ueltebeir puk. ²^gDoh getu kale teilo tar nitampopokoho tar hire tauete tono uelhire God misianar propet, karu naman manate tar ineter

ouououor nang God, karu ate tena ni-ateon, doh regu nitagorong mano a uleik tun, u matot u uain tar siusan, bo tabo pukinir nimalauelhir totoguo, inggo misianar inete ger kalilon. ³Doh getu bulo tenag mamang inetelik tasir tiome, karu heir katongo tar tukunug ra ualuhin, bo tabo pukinir nimalauelhir, inggo ahik pahu matotong kale me bulauoug.

⁴A uelmalauelhir a uanguangoul sikor, kara hamhamas. A uelmalauelhir ahik paha gehegeh ue a uoto uasalain ue a uoto uakaian. ⁵A uelmalauelhir ahik pahe uoto uahagouo uasa ue a kupal ue a nimmalian. A uelmalauelhir ahik pahe uoto kale toto tagu tar niguataniner sa. ⁶^hA uelmalauelhir ahik pahe uaha tagu tar niguataniner sa, bo e uaha kompe tar niguataniner man. ⁷ⁱA uelmalauelhir e uoto uakeluk dede tar niguatanin; guata bolongur, tagorong man, tagorong mana teil tar haua re turung pokos i uoum, tur uanon.

⁸A nimalauelhir e la dede, bor nitampopokoho tar hire tauet tono uel-hire God misianar propet, e turung tuka kout. Doha nitampopokoh, kara niate tar mene tar mamang uelhireng gime uanilik e tuka kout pon. Doha niate pon e turung tuka kout. ⁹Ge inggeig pe i ate puk tar sikin, kara sisikinalik pono nas mener propet. ¹⁰Doh gete udeil uakapa tunono re la peme, gininar sikin e turung rou. ¹¹Tar binaka ru keketikio, inggo u mene sira tasir keketik, doh regu ninamano misiana tasir keketik. Bo ku la kalan manasa peo, inggo ku la hiliu manasa tar niguatanin. ¹²Te misiana tagigeig, gine daan inggeig i banga sira misiana geti bangala toro sisira gero hihihou, bo gitila i uoum, inggeig song ri turung banga uaia tun tang God. Gine daan inggo u ate puk tar sikin, bo gitila i uoum inggo song

^f12:31 1Ko 14.1 ^g13:2 Mat 17.20 ^h13:6 Roum 12.9 ⁱ13:7 1Pi 4.8

ru turung atentieh uaia tun misiana re ate uaia pe God totaguo.

^{13j}Ter touonor inete rasine tere turung kalekinale dede; a nitagorong man, kara nitagorong mana teil tar haua re turung pokos i uoum, kara uelmalauelhir. Bo taninina puk a uelmalauelhir ter i rana uain.

O Mahar 14

A nitampopokoh geke heirinir Iabena Dedeil

14^kUakeluk tena niguata uaiar uel-malauelhir, karo malara tar inete uaia ke heirigir Iabena Dedeil, karo malarantiehe tun tar hire tauete tono uelhire God ngohinar propet. ²Ge a tamata pe gere mene tar uelhireng gime uan, inggon ahik pahe menmene me tamata puk, inggon e menmene tang God. Ahik me tamata re naman manate tar haua re menmeneion, ge inggono pe e mene tar ineter ouoou re hireigir Iabena Dedeil. ³Bo mais uakapa tun gera hire tauete tono uelhire God misianar propet, gisina ra uatampopokoho, kara uaongol, kara uamamahoul tasisin. ⁴Ge mai pe gere mene tar uelhireng gime uan e poul katongo kompein. Bo mai gere hire tauete tono uelhire God ngohinar propet e poul tasir tamatang lotu uakapa tun.

⁵Inggo u malara tamiuoum uakapa tun tar mene tar uelhireng gime uan. Bo inggo puk u malara tun tamiuoum uakapa tun tar hire tauete tono uelhire God misianar propet. Ge a tamata pe gere hirehire uoum teil tono uelhire God misianar propet, inggon a i ranantieh tun tar tamata gere mene tar uelhireng gime uan, bo auia kompe gete hire uakalaharono tar menenin mare poul tasir tamat tar lotu.

⁶Ro uanotoug getu lameo tamiuoum, karu me uelhireng gime uan tamiuoum hapengua re poul penina tamiuoum? Ahik pahe matot. Te getu keip tunumeo tar inete timuh ger man ue me giniameher niate ue me giniameher mene ger nang God ue me giniameher ualasira ter ineteninane tere turung poul tun tamiuoum.

⁷Ter siokono kompe tar ineteniner mat gere ueluelbobe ueltebeir puk re kaling pe misiana tar rauoto gera uig, karo gita, hapengua re matotong longor paroko per tamata tang hingia ro kereker ra kerein e matoto tun geta uuelmatoutin ro kalkalingina ro gita re kaling per rauot, song ra longor parokoin. ⁸Doh hape geta hik ro tuil paho kaling ualeik uaia tar uahire me uiliatung maingua re matotong kaleuatoro tanik? ⁹Ter siokono getung menoum tar uelhireng gime uan tasir tamat, bo ra tele puk toro uelhire rone rung mene keipioum. Hapengua ra turung naman manate per tamat tar hauene rung menmeneioum? Inggoum mung menmenengua kompeme tar hagar.

¹⁰O man, gane tar koto uakapa tun, doh ginin auia uakapa tun tasisit gera naman manate taninin. ¹¹Bo geta hikio pahu longor paroko ue u naman manate toro uelhire roon, gine ke mene toro uelhire roon inggon a peng gime uan, raeim mira uelteleis raeim. ¹²Ter siokono tamiuoum mung malara tun pe tar kale tur me inete uaia tun tar Iabena Dedeil. Uedanga tar kale tar nitampopokoh gere heirinir Iabena Dedeil gere turung poul tasir tamatang lotu.

¹³Temaait mai geke heirinir Iabena Dedeil tar nitampopokoho tar mene tar uelhireng gime uan, inggon e lotu mare hire uakalahara tar tengkanar puhung

mene ke menein. ¹⁴Gete ku kotouo tenag lotu toro uelhireng gime uan, a iabeiguo e lotu, bo regu ninamano e tel. ¹⁵Doh hapengua ru guata peo? Inggo u lotu keip tar iabeig, karu lotu keip pono tereg ninaman, karu kere keip tar iabeig, karu kere keip pono tereg ninaman. ¹⁶Gete ke uatakaiar iabeimiuoum tang God rung lotu pe, hapengua re hahaua per tamata tar “o mana tun” geta hik pahe naman manate tar haua kung menegioum? ¹⁷O man, inggoum kung heir tun tar niuaha tang God, bo tasir gisiamhehe pukur tamat, gisin ahik pah ka kale me nipoul.

¹⁸Inggo u heir tun tar niuaha tang God tar nitampopokohene ka heirin totoguo tar mene tar mamang uelhireng gime uanilik, a uleik uain tar namiuoum. ¹⁹Bo tar binakang uangoul tokaha puk, inggo u uelhire uakalahara kompe tar uelhire geru naman manateig tasir tamat ahik pahu marang uelhire me uelhireng gime uan.

²⁰Ro uanotoug ahik pah mung namanang keketik, bo mung uangoul uaia sira kompe tasir keketik tar niguataniner sa, karung kale puk tar ninamanang mahoh. ²¹Ge a puh pe ka boloin tono uelhire God sioun pare,

“Inggo u turung mene tar mamang uelhireng gime uanilik, karu meneng tur keip tar uelhirenin tasir gime uan, bo gisina puk ahik pah ra turung longoro totoguo.” *Aisia 28.11-12*

Teke kula per Tamata Noman.

²²Temaeit a nitampopokohonene tar mene tar mamang uelhireng gime uanilik inggon a uaparokor nasisit ahik pah ra tagorong mana tagu tang God, ahik paha nasisit ra tagorong manang sioun tang God. Doha nitampopokoho tar hire tauete tono uelhire God misianar propet

a uaparokor nasir tamatang tagorong mana tang God, ahik paha nasisit ra tagorong boho tang God. ²³^mTemaeit geta siokor pepe tokahar tamata uakapa tun tar lotu, kara siokor mene tar mamang uelhireng gime uanilik, kara me ueluparame mo tamata ue mais ge ahik pah ra tagorong mana tang God, doh ahik pah ra naman manate, gisin ra turung kula tamiuoum pare, “o popouluan!” ²⁴ⁿBo gete mo gisiamhe ahik pah ra tagorong man ue ahik pah ra naman manate, ra me lame tar binakarung mene uakalahara inggoum tono uelhire God misianar propet. Gisin e turung kakalahara tunungua res niguata uasa. Doha mamang menelik geka longoroigisina ginina tere turung kedanga tasisin. ²⁵Doha mamang inetelik gerououu teres ninamanasina ra turung ate uakapaig, gisina ra turung hatup, kara lotu tang God, kara kula pare, “God gine nomana tun re uangoul keip tamiuoum.”

A uelae tokah e poul tasir tamatang lotu

²⁶^oRo uanotoug hapengua ri guata pe inggeig? Tar binakarung uelpokosoum, a tang siok e pokoso keip tono kereker, a tang giameh e pokoso keip tar ualafir, a tang giameh e pokoso keip tar timuhur uelhirer nana ger nang God, a tang giameh e mene tar uelhireng gime uan, kara tang giameh e mene uakalahara tar tengkanar uelhirenin. Doh ter ninamana uleik tun, tar mamang niguatalikinin; ter poul, kara uatampopokoho tar lotu mare hua. ²⁷Maeit tar binakarung uelpokosoum, doh gete me tang sioko re mene tar uelhireng gime uan, ahik pah me tang torik ue i ranahia tar tang touono ra siokor mene tokah, a tang sioko baka uoum re men. Doh mo gisiamhehe tera mene uakalahara tar tengka-

nar menenin. ²⁸Bo geta hik me tamata re ate tar tengkanar menenin, mai geke mene tauete tar menenin, inggon e tabila bukbuk, kare mene katongo kompein, kare tang God.

²⁹P^Uahue kompe me tang torikir propet ue me tang touon tera men. Kare mo gisiamhe tera turung longor, kara kedanga uaia tun tar mene ka meneigisin. ³⁰Bo gete ke mene taueter uakikilanganar propet mo men, doha tang giamhe ke kale tar mene geka heirin me kaluasisin ra tabil, inggonor uakikilangan pake uakenua tar men, song re mene taueter uatang torikina tar hau ke kalein. ³¹Ge inggoum pe mung hire kahakahampe tar haua ke hirein God tamiuoum. Maeit o tamata uakapa tun ra turung kale niate, kare me nipoul tur tar uelhirenin. ³²A iabene ger nasir propet e moko tenas nikaueke katon-gosin. ³³Ge God pe e de tar ualagoreih ueltebeir ge inggono pe a Godong tar uelhiarou.

A puhonene a puhung mana tun tasir tamatang tagorong man, kare toсно tamata God gesir dedeil. ³⁴Te misiana king ueltupara pe inggeim tenas ualatur Ju e kula pare, “O kuaha uakapa tun, ahik pah ra matotong tur mena kalek-inaler lotu, kara hik pono pah ra matotong uahueis tar mene tagu me inete tar lotu. Gisina ra uangoul i kukulebanga tar nikaueken tar ualatur.” ³⁵Bo gete me inete ra marang ate uaiasisin, gisina ra la turung dangata to uaia tonosio bulout iuma tonosio um. Ge a ualamatala tun pe tar kuaha tar menmene tar binakang lotu.

³⁶Ko uakekene tur nomana no uelhire God tamiuoum? Roono ko la pukume tamiuoum mes pahemiu? ³⁷r^Gete mai re

kulain pare, a propet ue ke kale nitampopokoho to tar Iabena Dedeil, inggono pake bang paroko kompe pare, a inetenine ku bololagio tamiuoum e la tur tena ualatohor Tamata Noman.

³⁸Bo geta hikono pahe bang paroko tar puhon, God ahik pono pahe bang paroko tatanon.

³⁹Temaieit, tamiuoum ro uanotoug, malarantiehe tun tar hirehire uoum teil tonu uelhire God misianar propet, ahik pah mung tur tane tasir tamata gera mene tar uelhireng gime uan. ⁴⁰Bo a mamang inetelik uakapa tun ra guata keipig tar niguatar kodkodoh, kara hagar uaia tun.

O Mahar 15

Na nitua tapokis Iesu Kristo

15 Ro uanotoug, inggo u marang uanamana huara puk tamiuoum toro Uelhire Uaia geku hire taueteio tamiuoum. Inggoum mung kale teil tang roon, karung tur uanono keip tun tang roon. ²Doh roono ro Uelhire Uaia tero uauedeil tamiuoum, getung sanga dedeoum tar uelhire geku hiregio tamiuoum te gete kung tagorong mana pukoum me inetenit ahik paha mana tar kikilangan.

³s^Ge a haua pe ru kaleio, inggo u heir uain taninina tamiuoum. A puhene ter puhung uleik tun; Kristo ke mat tar niguata uasar eigigeig, ro hire teil pe no uelhire God. ⁴t^Inggono ka keuin, kara uatua tapokisin, ke karuh baka per touonor marein, ro hire teil pe no uelhire God. ⁵u^Inggono ke me uamakahain tang Pita, song tasir hangaul kara tang torik. ⁶I muduhia song ke me uamakahaiono tar siokonon binaka tasir bure-

^p14:29 1Te 5.21 ^q14:34 1Ko 11.3; 1Ti 2.12 ^r14:37 1Jo 4.6

^s15:3 Ais 53.5-12 ^t15:4 Mat 12.40; Apo 2.24-32

^u15:5 Mat 28.16-17; Luk 24.34

hener tamatang tagorong man ke siauais tar 500ir tamat. O gisiamehe tasisina ra uangoul harahene daan, karo gisiamehe ka mata manas. ⁷vSong ke me uamakahain tang Jems, song tosono tamatang uakuakeluk uakapa tun. ⁸wDoh inggo ter uadouhina tasisina uakap, ku me banga tagu pono tatanono ngohina tar tamata geka poho koutin tena binak.

⁹xGe inggo pe ter aposoulener tabo hangan, doh inggo ahik tun paha tamata uaia mara kila taguio pare, a aposoul, teeit inggo ku guatguata uasame tosono tamata God. ¹⁰yBo tar nipoulur nang God ger hamhamas ke heirin totoguo, temaeit rung bangoum totoguo daana pare. Doh tar hamhamasonene ke heiriono totoguo ahik me inete ke uapekout tagu. Doh inggo ku kalekinalentiehe uaia uain tasisin, bo ahik puk pah tereg nitampopokoho katong. Inggo ku kalekinale keip kompe tar hamhamasene ke heirin God totoguo. ¹¹Temaeit, ahik me ineter giamehe siok getu hire taueto toro Uelhire Uaia ue gisin. Ter uleik tunur puh teene inggoum kung tagorong mana tun toro Uelhire Uaia king hiregieim tamiuoum.

O tamata gera mat ra turung tua tapokis

¹²Doh gete king hire tauete inggeim pare, Kristo ka uatua tapokis turin toro mat, doh ae maeit ra kular gisiamehe tamiuoum pare, o tamata geka mat ahik pah ra matotong tua tapokis? ¹³Doh geta hikir mat pah ra matotong tua tapokis, Kristo ahikingua pono pah ka uatua tapokis turin toro mat. ¹⁴Doh geta hik Kristo pah ka uatua tapokisin, a huaa geking hire tauetegieim tamiuoum, ginin a tabo tengkanangua, kare

siokonongua pono teremi nitagorong manoum.

¹⁵Doh inggeim mi turung kouhungua pon, king bohboho pe tang God, teeit king hirhire tauete teil pe inggeim pare, inggono ke uatua tapokis tang Kristo. Doh geta hikir tamata pah ra matotong tua tapokis, God ahik pono pah ke uatua tapokis tang Kristo. ¹⁶Doh geta hikir tamata gera mat pah ra matotong uatua tapokisin, Kristo, ahikingua pono pah ka uatua tapokisin. ¹⁷Doh geta hik God pah ke uatua tapokis tang Kristo, remi nitagorong manoum tatanon a tabo tengkanangua, doh remi niguata uasaoum e moko dede. ¹⁸Doh mais geka tagorong mana tang Kristo, doh ka mat, gisina ra turung heilingua. ¹⁹Doh geting tagorong mana teil pukeimene daan ring uangoul pe tang Kristo, inggeim tering la turung tiomentiehe tunungua tasir tamata uakapa tun.

²⁰Bo toro mana tun Kristo ke mat, kare uatua tapokis God tatanon. Ter uakikilanganar kukuanan ka uamunain tas mais geka mat. Doh gisina ra turung tua tapokis pon. ²¹zGe o mata pe ko pokos, teeit tar huaa ke guatainir tamat. Ter siokono kompe a nitua tapokis ke pokoso pon, teeit ke guata uoum per tamat. ²²Ge o tamata uakapa tun pe ra mat, teeit tang Adam, bo tang Kristo, o tamata uakapa tun ra turung tua tapokis. ²³aBo ra uatua tapokis kahakaha kompeis e lampeis hape ra uelture peha. Kristo tera uatua tapokis uakikilangain, song gete lahaon, song tes maisinguar nanon.

²⁴Tar binaka ke mamantouo Kristo tar mamang nitampopokoholikir nanar iaben, kara mamang nitampopokoholiking kauek, kara nitampopokoh, song re pokosor uadouhinar binak, kare heir

^v15:7 Apo 1.3-4 ^w15:8 Apo 9.3-6 ^x15:9 Epe 3.8; 1Ti 1.15

^y15:10 2Ko 11.23 ^z15:21 Roum 5.12 ^a15:23 1Te 4.16; UGO 20.5

tapokis Kristo tena kalekinaler toia tang God ge tamagigeig. ²⁵^bKristo e toia e tuka tar binaka re siokor touahiua uakapa tun tosno uelmatan, kare ueih tane tasisin. ²⁶^cDoha uadouhina tunur uelmatana gera turung mamantouoin tero mat. ²⁷^dGe no uelhire pe God geka bolong sioun o hire teil pare, “Ge God pe ke uamoko tar mamang inetelik i kukulebanga tar nikaueke tatanon.” Doh gine ro hire teil pe roono pare, “Tar mamang inetelik i kukulebanga tar nikaueke tatanon.” Inggon a kalahara tun pare, God ahik pahe matotong kale keipin, ge inggono pe teke uamoko tar mamang inetelik i kukulebanga tar nikaueke tang Kristo. ²⁸Gine ke guata peono tar puhonene tar tun Kristo katongompe re turung uamoko katongoin i kukulebanga tena nikaueke God, maeit e turung kaueke uakapa tunungua God tar mamang inetelik.

²⁹Doh geta hik me nitua tapokis, a hauar tengkana tar uahuhu tasir tamata geke mat? Ae maene ra uahuhuisir tamat geta fikir tamata pah ra matotong tua tapokis? ³⁰^eDoh ae maene ri heir katongo dedempesieig toro mat tar mamang binakalik? ³¹O mat o lame totoguo tar mamang binakalik! Ro uanotoug, inggo u uamana tun, u uasala tunuio, karu uatakai tang Iesu Kristo ge nagi Tamata Nomaneig tar hauanine ke guatagiono tamiuoum. ³²Doh getu uelkoi keipo tasir inete roke i Epeses gera pepe teil tasir tamat, a hauangua ru turung kaleio? Geta fikir mat pah ra matotong uatua tapokisis, o uelhire song o mana tun ro kula pe pare, “Ein uamahmahurusieig, kari sipak geri mata pe inggeig roliuo.”

Aisaia 22.13

³³Ahik pah mung uamaluana ra bohosioum, “Gerung ueldokout keipioum tasir tamata uasa, gisina ra uasuasa tamiuoum o uia pe.” ³⁴Kale tapokis teremi ninamana tar haua rung tagorong manain, karung uanua tar niguataniner sa, inggo ku mene tar puhonene a nimatala uleik tamiuoum, teeit o gisiamehe tamiuoum ra tele harahampe tang God.

A tukunun gera uatua tapokis turin toro mat

³⁵Bo me tamat e turung dangatampe pare, “Hapengua ra tua tapokis per tamata geke mat? Hapengua re turung baka per tukunusisin?” ³⁶^fA tuktukara tunumper puhung dangatono geto lebe ingga me tabtabuarar uatun, ahik pahe matotong tungara dedengua e mata tun bak, song re tungar. ³⁷Doh geto lebe ingga o lebe puk tar uatun, ahik paho lebe toro tukununa roono tun. ³⁸Bo God ke heir tar kukuananar mamang uatunalik ke kedanga manasa pe taninin. ³⁹O mamang inetelik a kahakahar singsingin, o tamat, o katiuo uakapa tun a giameh siok, o tetiau, karo ian.

⁴⁰Doha tukununang Heuen e moko pon, doha tukununang gane i kot. Bo a nimataiana pukur tukununang Heuen a giamehe siokompe tar nimataianar tukununang gane i kot. ⁴¹A pisar a giamehe siokomper nimataian, doha bialok a giamehe siokompe. Doh tasir pitopit a giamehe siokomper mataian. Doh tanininar pitopit a kahakahamper nimataian.

⁴²Ter siokono sira tar nitua tapokis. A tukunugigeig ri uangoul keipin daana tar kot e mat, ra keuin, kare beng, song re turung tua tapokis keip tar timuhur nitua gere la dedengua. ⁴³^gTar binaka ra keuinir tukununon ahik mena uiniator, ⁴⁴

⁴⁴15:43 Toro uelhireng Grik e hire pare, ‘ahik paha ueltadain’

^b15:25 Mat 22.44 ^c15:26 UGO 20.14

^d15:27 Ker 8.6

^e15:30 Roum 8.36 ^f15:36 Jon 12.24

^g15:43 Pil 3.20-21

bo tar binaka re tua tapokison e uoun tun tar uiniator. Tar binaka ra keuinir tukununon a maluan, bo tar binaka re tua tapokison e uoun tar nitampopokoh. ⁴⁴Tar binaka ra keuinir tamat, inggeig i banga puk tar tukununang gane i kot, bo tar binaka re tua tapokison, inggeig i banga tar tukununang Heuen. Ge a tukununang gane pe i kot e mok, doha tukununang Heuen e moko pon.

⁴⁵^hGe no uelhire pe God o hire teil pare, "A uakikilanganar tamatane i kot, Adam, ka tuhain, kare pokos a tua." Song ke pokosor uadouhinar Adam a tamata pon, inggono ter laben gere heir tar nitua. ⁴⁶A tukunun gere la tur i Heuen ahik pah teke pokoso uakikilang a tukunun gere la tur i kot ke pokoso uakikilang song a tukununang Heuen. ⁴⁷A uakikilanganar tamat, Adam ka tuha keipin toro uououng gane i kot, bor tang giameher Adam ke la tur i Heuen.

⁴⁸Maisir peng gane i koto ra misiana sirampe tang mai geke tuha turinane i kot, doh maisir peng Heuen ra misiana sirampe tang mai ger peng Heuen. ⁴⁹Doh gine daan inggeig te misiana tang Adam ger peng gane i kot, bo inggeig puk i turung misiana sira tang Adam ger peng Heuen.

⁵⁰Ro uanotoug, inggo u kulkula pare, a singsingin, doha deuating ahik pahe matotong kale inete to tagu tar Nitoiar nang God, a inete ger beng ahik pahe matotong kale inete to tar inete gere tua dede. ⁵¹ⁱUalongoro uايا tun tar puhung uelhirener ououo ru uakalaharaiu tamiuoum. Ahik pah inggeig uakapa tun ri siokor mat, bo inggeig uakapa tun ra turung uapalihisieig. ⁵²A uapalihon e pokoso geto kaling uadouh manasa ro tuil. Doh geto kaling manasa roon mais

geka mat ra turung tua keip tar timuhur tukunus, doh inggeigener tua ra turung uapalaih ponosieig mari tua dedengua. ⁵³^jA tukunun gere mat e turung uapalihilain tar haua gere la tua dedengua, doha haua gere beng e turung uapalih tar inete gere moko dedengua.

⁵⁴Temaait gete pokoso manasanin, a tukunun gere mat e uapalih tar tukunun gere la tua dedengua, song re la mana tunur puh geke boloin tono uelhire God pare,

"O mat ka pehuarain!" *Aisaia 25.8*

⁵⁵"O mat, ia karein ro binopo ko guataia?"

O mat, ia karein ro uelhungumua gero uelpisir?" *Hosea 13.14*

⁵⁶^kBo ro uelhung gero uelpisir gero nasir mat roono ter niguataniner sa. Doh na nitampopokohor niguata uasa ter ualatut. ⁵⁷Bo a niuaha kompe e la tang God ke heir peha tenagi Tamata Nomanieig Iesu Kristo ke me uoum keip pe tagieig toro binop.

⁵⁸Temaait tamiuoum ro uanotoug mung tur uanono dede, ahik pah mung uahue me inete re ualilio tamiuoum, heir katongo nomana tunusiuoum tena kalekinaler Tamata Noman. Ge inggoum pe mung ate pare, nami kalekinaleiuoum tar Tamata Noman ahik paha tabo tengkan.

O Mahar 16

A mani ka uelbakeig gere la tasir tamat i Jerusalem

16¹Gine daan inggo u marang mene baka tamiuoum tar mani geri uelbakesieig gere la tasir tamatang lotu i Jerusalem. Inggoum pakung guata sira ku ualatoho peo tasir tamatang lotu i Galesia. ²Tar mamang uakikilanganar marein tar uik inggoum kahakah mung

^h15:45 Uak 2.7 ⁱ15:51 Mat 24.31; 1Te 4.15-17 ^j15:53 2Ko 5.4

^k15:56 Roum 7.13 ^l16:1 Roum 15.25-26; 2Ko 8.1-9

uamoko sioko manasampe me giniameher mani gekung kale turig tar haua kung uabulauaig, karung uamoko toto tanik, maeit getu lameo ahik baka poluk me kale hahai. ³Song getu me pokoso, inggo u me heir tar bolobol e uahire teil tar mamang inetelik tar puhonene, inggo u me turung heir tas mais gekung uamatotosioum tar keip taninin menia tenami manioum. ⁴Bo geta uiaono totoguo tar la tagu tasisin inggeim mi siokor la tokah.

A nidangatar nouguo katong

^{5m}Inggo u me turung banga tamiuoum i muduhia getu uakapa baka tar pang uan i Masedonia, ge inggo pe ku kaleuatoro manasa tar la. ⁶ⁿDoh gete hapeon inggo u uangoul keip sikoro baka tamiuoum me sikin ue u uangoul e tuka gete kapar binakang pang rom. Maeit rung pouloum totoguo tenag nila ru lang lain. ⁷Inggo ahik pahu malara tar me tur baka puk tamiuoum, karu tapokis. Bo inggo u malarantiehe tun tar me uangoul keip me puhung barah gete uahuer Tamata Noman. ⁸Bo inggo u uangoul bakane i Epeses e tuka tar Pentikos. ^{9o}Ge gane pe ka uatakapuka tun totoguo tar kalekinale keip tasisin, doho burehe tunur tamata ra malar, karo burehe ponompe ra tur tane totoguo.

^{10p}Doh gete me pokoso Timoti tamiuoum, ahik pah mung uasokoro tatanono tar binaka re uangoul tagu tamiuoum, ge inggono pe e guata tena kalekinaler Tamata Noman misiana totoguo. ^{11q}Temaieit ahik me tamata re banga uasa tatanon. Heirime tatanono totoguo e la keipime toro hiarou mare me pokoso uaia tunono totoguo. Inggo u pepe uangoul tunumpe tatanon e la keipime mo

gisiameher tamata gera tagorong mana tang Kristo.

^{12r}Doh uanotougigeig Apolos, inggo ku kula uapopokoho tun tatanono tar la tagu toso uanotougigeig geta me banga tamiuoum. Bo ahik pukumpe pahe malara tar lame gine daan e la uoumumpeme gete kaein mena binak.

A uadouhinar men

¹³Mu uala dede tar matamiau. Tur uanono keip dede tar nitagorong man misiana tar tamata ger tampopokoh, kara ongongol. ¹⁴Mu uamoko tun tar nimalauelhir tar mamang inetelik rung guataig.

^{15s}Inggoum mung ate tang Stepanas, doh tasir tamatang tena umon? Gisina tesir uakikilangar tamata ka uapalih, kara tagorong mana tang Kristo i Akeia, kara heir katongois tar kalekinale tar poul tosno tamata God, doh inggo u kula uapopokoho tun tamiuoum ro bung kaloug, ¹⁶tar ueltada uaia tun, karung uakeluk tasir tamata gera kalekinale sira pare, kare tas mais gera kalekinale tiehe pono tasisin. ¹⁷Inggo u uaha tun ka me pokoso pe Stepanas, Potunatas, doh Akaikus, teeit gisina teka kale uahiuu manasa tar mamang inetelik ahik peoum pah kung me siokor pokos. ¹⁸Gisina teka me uatampopokoho tar iabeiguo, doh tar iabeimiuoum pon. Bang paroko tun tasir tamata sira pare.

A meneng uadouh keip tar niuah

^{19t}O tamatang lotu uakapa tun tar pang Esia ka heir tenas niuaha tamiuoum. Akuila me Prisila kura heir tenasira niuaha tamiuoum tar Tamata Noman menia tasir tamata gera uoto lotu to tonosio um. ²⁰Doho uanotougigeig

^m16:5 Apo 19.21 ⁿ16:6 Roum 15.24 ^o16:9 Apo 19.8-10; 2Ko 2.12

^p16:10 1Ko 4.17 ^q16:11 1Ti 4.12 ^r16:12 1Ko 3.6 ^s16:15 1Ko 1.16

^t16:19 Apo 18.2,18,26

uakapa tunusine ka heir pono tenas ni-
uaha tamiuoum. Uelbuak katongosioum
i lolono tun tar koloumiu.

²¹Inggo Poul ku bolo katongo tun
tar puhung uelhireng uahananine
tamiuoum.

²²uMai ge ahik pahe malaelhir tar
Tamata Noman uamaluana tatanono

gere birin. Lame! Nagi Tamata
Nomaneig.

²³Na hamhamas nagi Tamata No-
maneig Iesu e moko tamiuoum.

²⁴Reg nimalaelhiro e la tamiuoum
uakapa tun tang Iesu Kristo. O mana tun.

2 Korin

*O uatorikina ro bolobolo ke
boloin Poul tasir Korin*

O uatorikina ro bolobolo tasir Korin

O bolobolo rone o moko teil tar timuhur uelhote. Poul ke bolo toro bolobolo rone ko la tasir tamatang tagorong man i Korin, teene o tamatang ualasira gesir bohoboho ra uangoul tenas lotusin.

Gisina ka menmene uasa tang Poul. Gisina ra kula pare, inggon e uoto uapalih tena ninaman. Gisina ka guata paar, teene Poul ahik mata la ruh kout i Korin.

Gisina ra kula pono tatanono pare, ahik paha aposoul uaia. Poul ahik paha tamatang mene sira tun tasir tang ualasisir bohoboh, doh Poul ahik pono pahe uoto hinga mani tagu tasir tamatang tar lotu.

Poul ke mene uakalahara tasisina maene ahik pah ke ruh kout tasisin. Inggon ke mene uakalahara pon ae maene ke uelkukuruntiehe tun tasir tamatang tagorong man i Korin. Bo inggono puk ke uaha ka hire tauete pesina tenas niguata uasa tang God. Doh gisina ka mata kaluana tapokis tang Poul.

Inggon ahik mena nitampopokoho sira tun tasir tang ualasisir bohoboh. Bo teene inggono ke maluan, kara banga tonguar tamata tena nitampopokoho God tatanon. Inggon ahik mata lame tar me mene katongoin. Inggon ke lame tar me hire tasisina tang Iesu, ge God pe ke uapalih tur tasisina tar uelmatan, kara la matakaluana. Song ke dangata tasisina me niheir keep tar niuia e la tasir

tamatang tagorong mana gesir tiome i Judia.

Tar uadohina tun, inggono ke hirhire hamas tun hape maene ke kopokoso pare, ter aposoul uaia tun. God katongompe ke umatoto tatanono pare, a aposoul. Doh inggono ke kale tar bureher niduh, teene teke mene tauete peono tono uelhire God.

Bo Poul puk ke uaha tar kalekinale tang God pare, teke mene hahaua peono tasisis ka menmene uasa tatanon.

I lolono toro bolobolo rone:

A meneng uakalahar 1:1-11

Poul, kara lotu i Korin 1:12-7:16

Nas uahungur tamatang tagorong man i Judia 8:1-9:15

Na meneng uelturut Poul tena nitampopokoh a aposoul pe 10:1-13:10

A uadohinar menemen 13:11-14

O Mahar 1

Poul ke heir tena niuaha tang God

1 Inggo Poul ku bolo toro uelhire rone, raeim me Timoti ger uanotougigeig. God ke malara totoguo na aposoul Iesu Kristo.

Roono o la tasir tamatar nang God toro buturung lotu tar uan uleik i Korin menia pono tosno tamata God gesir dedeil gera uangoul tar pang uan i Akaia.

²Inggo u lotu tang God ge tamagigeig tar heir tar hamhamas, karo hiarouo tamioum me Iesu Kristo ge nagi Tamata Nomaneig.

God a tang uamamahoul tasir tamata uakap

³Uatakai tang God ger nagigeig a tamana Iesu Kristo ge nagi Tamata Nomaneig. God ge Tamagigeig e uoto uel-dolomo tagigeig, kara tang uamamahoul tagigeig uakapa tun. ⁴Inggon e uoto ua-

mamahoul tagigeig tar mamang niduhulik ri kaleig. Temaeit inggeig pon i matotong uamamahoul tas mais gera kale tar niduh. Inggeig i heir tar siokonor uamamahoul geki kale turin tang God. ⁵W^{Ter} siokono kompe geti kale inggeig me uleikir uelmahing ri kalekinale pe tang Kristo, inggeig i turung kale pono tar uleikir uamamahoul tur tang Kristo. ⁶G^{eting} kale uelmahingieim auia e uamamahoul, kare uaudeil tamiuom geta uamamahoulusieim, inggon e la keipin tamiuom pon, doha puhon e guatangua tamiuom mung uanguangoul sikor, karung uatut tar binaka rung kale pono tar siokonor uelmahing geking kale-sieim. ⁷I^{nggeim} mi tagorong mana teil uapopokoho tun tamiuom, teit inggoum kung kale tar siokonor uelmahing, kara siokonor uamamahoulene ka heirin tamiueim.

⁸X^{Ro} uanotoug inggeim mi malaramung namnamana tapokisium tar niduh, kara uelmahing geking kalegieim tar binaka king kalekinale tar pang uan i Esia. A niduh king kalegieim a uleikintiehe tun. Ahik me hagarung uasiaua taninin. Inggeim king namana puk manasa mi mat. ⁹O^{man}, inggeim king uamoko puk manasa tar siokor ninamana pare, mi mat. Bo a puh pukuonene ke pokos, e ualasira tamiueim, maeit ahikieim pah mi pemaikatongoisieim, bo inggeim mi pemaio tang God, gere uatua tapokis tasir mat. ¹⁰Y^{Inggono} ke uaudeil tur tamiueim tar butur ualasokorontiehe tun. Inggon e turung uaudeil polukumpe tamiueim. Doh inggeim mi tagorong mana teil pare, inggon e turung uaudeil dedempe tamiueim. ¹¹I^{nggoum} mung poul dedempe tar lotu tamiueim, maeit God e turung longoro tar bureher lotu

gere laig tamiueim, song re guata uaiatamiueim. Kare mo burehe ra turung heir tar niuaha tang God ke guata uaiape tamiueim.

Poul ke uapalih tena ninaman

¹²A^{puhene} tering sala keip tunusieim ge remi niate peeim ke hire tauete tun toro mana pare, inggeim king guata uaiatun tasir matatang gane i koto te tamiuom tunumpeono king mene uakalahara pe, karing uamana ngohina ke guata pe God. Inggeim ahik pah king guata tar puhene e la tur tar niate uaiang gane i kot, bo e la tur tena nitampopokoho God. ¹³G^e inggeim pe ahik pah king bolome tamiuom me inete ge ahikieim pah mung matotong bang paroko ue ahik pah mung naman manate. Doh inggo u tagorong mana teil pare, ¹⁴Z^{gete} kung naman manate tur pukuoum me sikina tamiueim, inggoum mung me turung naman manate uakapa tun, song rung turung sala tamiueim. Te misiana kompe inggeim mi turung sala pono tamiuom tar binaka re kotpokoso na marein Iesu nagi Tamata Nomaneig.

¹⁵T^{emaeit} inggo u ate uaiatun tar puhonene, inggo ku kaleuatoro tar me banga uakikilanga tamiuom, maeit rung kale uatorikoum tar niuah. ¹⁶A^{inggo} ku malara pare, u la turung pepe kout baka tamiuom getu la i Masedonia, karu me turung pepe kout polukume getu tapokisime. Song rung turung poul bakoum totoguo tar la i Judia.

¹⁷I^{nggo} ahik pah ku guata belehu puk, kara hik pono pah ku uakeluk teres ninamanar gisiamer tamatang gane i koto gera uauia boho baka puk. ¹⁸B^o toro mana tun God a uauaman, a uelhire geka heirig tamiuom, ahik pah ka

^w1:5 Ker 34.19 ^x1:8 Apo 19.23; 1Ko 15.32 ^y1:10 2Ti 4.18

^z1:14 2Ko 5.12; Pil 2.16 ^a1:16 1Ko 16.5-6

uauia boho baka pukig. ^{19b}Ge a tuna God pe ger bulout Iesu Kristo geking mene taueteieim mes Silas, doh Timoti i uantinanina tamiuoum, inggon ahik pah ke uauia boho baka puk ge inggono pe a uauaman.

^{20c}Ahik me haua geta burehemper ualapagaha ke guataig God, ginin auia uakapa kompe tang Iesu Kristo, doh tang God inggeig i turung kulangua pare, “o mana tun” tar uatakai tang God. ²¹Bo inggono te God katongompe ke uamoko tamiueim, kare tamiuoum pono tar tur uanono keip tang Iesu Kristo. Inggon teke umatoto tagigeig, ^{22d}mari kot-pokoso nanon, kare heir tena labena ger Dedeil tagigeig pare, a uaparok e moko uatuka tar haua geke ualapagahaion e lame.

²³Bo inggo ku kila tang God tar me tur keip totoguo maru hire tun tamiuoum toro man, ae maene ahikio pah ku tapokis i Korin, bo inggo ahik pah ku marang heir poluk me niduh tamiuoum. ^{24e}Inggeim ahik pah king petutup tamiuoum tar tagorong mana tar haua king hiregieim, bo inggeim king kalekinale keip puk tar niuahar eimiuoum. Teeit a nitagorong man, teene re uatur uanono tamiuoum.

O Mahar 2

2^fTemaeit, getu la tapokisimeo tar me banga tamiuoum, inggo ku namana tanika manasa pare, ahik baka poluk pahu me uaueldolomo tamiuoum. ²Doh gete ku uaueldolomo tamiuoum main-gua re turung uaha totoguo? Teoum puk manasampeene ku uaueldolomosio pake turung uauaha totoguo. ³Ter tengkana, maeit ku bolomeo tamiuoum te pare,

tar binaka ru lameo tamiuoum, ahik pah ra me uaueldolomo baka polukuio. Ing-goum pake turung uauaha totoguo. Doh inggo u tagorong mana teil pare, tar binaka ru uaho, inggoum pono mung uah.

^{4g}Tar binaka giane ku bolomeo, inggo ku ueldolomontiehe tun, kare pirik tunumper koloug, karu kiring u malara mung ateoum hape ru malahirintiehe tun peo tamiuoum.

Ueldolomo tapokis, karo kale liu tar niguata uasa

⁵Gete me tang sioko ke uaueldolomontiehe tun me tang giameh inggon ahik pah ke guata totoguo, bo inggono ke siokor uaueldolomontiehe tamiuoum uakap. U kula deho pare, inggo ahik pahu malar e parakukuhuion. ⁶A uelmahing geka heirinir burehe tar tang siok ke matoto manas. ⁷Bo gine puk daan inggoum pakung kale liu tar niguata uasa, karung uamamahoul tatanon, maeit ahikiono pahe kalentieheinir niueldolom. ⁸Temaeit inggo u kula uapopokoho tun tamiuoum tar uamoko poluk teremi nimalauelhir tatanon.

⁹Ter tengkana maeit ku bolomeo tamiuoum, inggo u marang uedanga tamiuoum, karu banga, ge pare kung longorompeoum tar mamang inetelik. ¹⁰Doh getung kale liuoum me niguata uasa me tamat, inggo u kale liu pono tena niguata uasaon. Doha haua geku kale liuio inggo u guata keip tar hangana Kristo tar poul tamiuoum. ^{11h}Inggo ku guata paar maeit, ahik Satan pahe matotong pehuara tur me inete tagigeig. Ge inggeig pe i ate uaua tun tar haua re marang guatagion.

^b1:19 Apo 18.5 ^c1:20 UGO 3.14 ^d1:22 2Ko 5.5; Epe 1.13-14

^e1:24 1Pi 5.3 ^f2:1 1Ko 4.21 ^g2:4 Apo 20.31 ^h2:11 Luk 22.31

Poul ke namanantiehe tang Taitus

¹²i Binaka ku lao i Troas tar hire tauete tonon Uelhire Uaia Kristo, a Tamata Noman ke uatakapuka tun toro pirik totoguo. ¹³j Bo ahik pukumpe pah ku hagou uaa, teeit inggo ahik pah ku uelupara tang Taitus ge kalouguo tun. Temaait ku hiliu pukumpe tasisin, karu la i Masedonia.

¹⁴Bo a niuaha kompe e la tang God gere uoto uoum keip tamiueim toro binopo tar hangana Kristo. God ke guata maring hire tauete ueltebeireim tar niate geking kaleig tasir gisiamhe tar Tamata Noman misiana tar inete ger muhiantiehe tun. ¹⁵Ge inggeim pe misianar amuhunar adua ke heirin Kristo tang God geke ngung ueltebeir tas mais gera udeil, kare tas mais gera heil. ¹⁶k Doh tasisit ra heil inggeim misiana tar amuhunar mat inggono teke uakotpokoso toro mat, bo tasisit ra udeil inggeim misianar amuhunar nitua inggono teke uakotpokoso tar nitua. Temaait, maingua re matotong guata tar kalekinaleon? ¹⁷Inggeim ahik pah mi uabulaua tonon uelhire God misiana ra guata per gisiamheer tamat. Bo tar hangana Kristo puk, inggeim mi hire tauete toro mana tang God. Teeit inggeim mi ate God ke heiriha tamiueim tamiuoum.

O Mahar 3

O tamatang kalekinale tar timuhur uelhote

3¹Inggeim ahik pah mi uakekene poluk tar uairana katongosieim. Ahik pah mi uahinga me bolobolong uahire e la tamiuoum ue e la tur tami-

uoum ngohina tasir gisiamheer tamata gera hinga me puhung uahire. ²m Bo inggoum te misiana pah ter bolobolor namiueim ka bololaig tamiueim mara ateig, kara bangar tamata uakap. ³n Inggoum mung ualasira tun pare, inggoum teka bololaigir uahire gere la tur tang Kristo ginina pe ter nieininar kalekinaler namiueim. Ginin ahik pah ka bolo keipig me inet, bo ginina ka bolo keipig tar Iabena God ger tua, doh ahik pono pah ka bololaig mo mahar palau, bo ginin ka bololaig tar kolounor tamat.

⁴Inggeim mi mene sira ring tagorong mana tun pe tang God, teeit tar haua ke guatain Kristo. ⁵Inggo ahik pahu kula pare, inggeim mi matotong guata tar kalekinaleono mes paheimiu. Inggono te God ke guata tamiueim, maeit ring matotong guata tar kalekinalenine ring guataig. ⁶o God ke uamatoto tamiueim o tamatang kalekinale tena timuhur uelhoteon. Inggonor timuhur uelhote ahik pah ka boloin pare, a ualatut, bo inggon a Iaben, ge a haua pe ka boloin a ualatut e keip teil toro mat, bor Iaben e keip teil tar nitua.

Na uinatoror uelhote

⁷p A ualatut gere keip teil toro mat, ka boloi toro mahar palau. Roono ko la keipiha tena uiniatoro God. Temaait gisisir Israel ahik pah ka matotong banga dede tar porene Moses, teeit inggono ke ragom tane ponoinir balbalanar uiniator, song ke rourouo uainimpela. ⁸Ge a puh peon o mana tun, bo a timuhur uelhotene ke me keip pokoso tar Iaben, inggon a i rana uainintiehe na uiniator. ⁹q A ualatut e poluk tasir tamata teres niguata uasa, kare keip teil pono tar uiniator, bor timuhur uelhote e uakod-

ⁱ2:12 Apo 14.27; 1Ko 16.9 ^j2:13 Apo 20.1 ^k2:16 Luk 2.34; 2Ko 3.5-6 ^l3:1 Apo 18.27; 2Ko 5.12 ^m3:2 1Ko 9.2 ⁿ3:3 KT 24.12; Jer 31.33; Isk 36.26-27
^o3:6 Jer 31.31; Jon 6.63; 1Ko 11.25 ^p3:7 KT 34.29 ^q3:9 Ual 27.26; Roum 1.17

kodoho keip tasir tamata tang God, inggono ter i rana uain na uiniator. ¹⁰A ualatut ger pensioun a uleik na uiniator, bo e me rouo kompe getura me siokor moko tokaha mer uelhote ger timuh, ge a timuhur uelhote pe a i ranantieher na uiniator. ¹¹Doh gete moko puk na uiniator ualatut tar sikinar binak, bo a haua gere turung moko dedengua inggono ter popokoho uainintiehe na uiniator.

¹²Temaait ri ongolonguaeig ri tagorong mana teil pe tar puhonene. ¹³rInggeig ahik pahi pe sira tang Moses geke taku uaouo tar poren, maait ahikir tamatang Israel pah ra matotong banga tar porenono re rourouo uain per balbalanar uinator. ¹⁴Doh gisin ahik pah ka naman manate. Temaait ginempela daan tar binaka ra hire tauetesina tar pensiounur ualatut res ninamanasin ahik pahe kalahar. Te Iesu Kristo puk manasa tere matotong kale liu tar inete gere uaouo teres ninamanasin. ¹⁵O mana tun, ginempela daana geta hire tauetesina tar uelhire geke boloig Moses, res ninamanasin e ouo harahampe, doh gisin ahikimpe pah ra naman manate.

¹⁶sBo gete uiuirir tamat, kare la tapokisime tar Tamata Noman, a haua geke uaouo tena ninamanono ra turung kale liuin. ¹⁷tDoh ginela daan, a Tamata Noman, a Iaben, doh tar mamang buturulik gere mokor Iabenon, o tamata ra uangoul teres nimalar. ¹⁸Doh inggeig uakapa tunene ge ahik pah ka uataku tanesieig mare turung bala tapokisisieig tar balbalanar uinatoror Tamata Noman, inggeig ra uapalihisieig misianangua tatanon, kare misiana tar balbalana uinatoro gere moko dede gere la tur tatanon, ge inggono per Tamata Noman ter Iaben.

O Mahar 4

Hire tauete toro Uelhire Uaia

4 Temaait, tar niueldolomor nang God inggono ke heiringua tamiueim tar kalekinalener uia tun, inggeim ahik pah mi matotong hagouo uasa. ²uInggeim king hiliu sioun tar niguata gere kale teil tar nimatal, kara niguata gere guata keipig toro boh. Inggeim ahik pah king marang uelour me tamat, doh ahik pah king marang to pukula mo nomio boh tono uelhire God. Inggeim king hire tun toro man i uoum tar matana God, doh maisir uauaman ra ate pon.

³Doh ge teka kokop tanein ro Uelhire Uaia rone king hire taueteisieim, roono ka uamoko uaouo kompein tas mais geke heil. ⁴vSatan ger god bohobohong gane i kot ke uakut teres ninamanar tamata ge ahik pah ra tagorong mana tagu, maait ahikisina pah ra matotong bang huara tagu tar luh ger nana ro Uelhire Uaia gere la turur balbalana na uinatoro Kristo, ge inggono pe tera banga toinir porene tar porene God.

⁵A haua gering hire taueteisieim, ahik pah king menmene katongosieim, bo inggeim king hirhire tauete teil tang Iesu Kristo ger Tamata Noman. Inggeim mi uoto hire taueteisieim tamiuoum pare, inggeim teking kalekinale tamiuoum tar hangana Iesu. ⁶wGe God pe ke kula pare, "Uahue tar luh gere bala uamarmarein tar kitup." Doh inggono ke guata tar luh mare bala uamarmarein tar kolougigeig mare heir tar luhung naman manate gere la tur tena balbalana na uinatoro God gere bala tur tar porene Kristo.

^r3:13 KT 34.33 ^s3:16 KT 34.34 ^t3:17 Jon 8.36; Roum 8.2 ^u4:2 2Ko 2.17; 1Te 2.5 ^v4:4 Epe 2.2; Kol 1.15; Hib 1.3 ^w4:6 Uak 1.3; Ais 9.2; 2Ko 3.18

^{7x}Bo inggeim ngohina pah mi kale teil tar luh ger balantiehe tun gere moko teil i lolono tar nouh gere ualasira tar mamang nitampopokoholik ger uia uaintiehe tun gere la tur tang God ahik pahe la tur tamiueim. ^{8y}Inggeim king kale uelmahing tun tar mamang hagarilik, bo ahik pukumpe pah king ueluelteageih ueltebeir ue king uaruara naman ahik pah king uamaluan. ⁹Inggeim ka guatguata uasaseim, bo God puk ahik pah ke hiliu tamiueim. Ka uaelmahing-intiehe tunusieim, bo ahik puk pah king santiehe tun. ^{10z}A mamang buturulik king uiloho pe inggeim, king kale uelmahing dedempe tar tukunumi misiana tang Iesu tar binaka ke mat, maeit na nitua Iesu ra turung banga toin tar tukunumiueim.

^{11a}Ge inggeig peene tera heir dedempe sieig toro mata ri kalekinale pe tang Iesu, maeit re turung pokoso uakalahara tunur nitua ger nang Iesu tar tukunugigeig gininer mat ri uangoul keipig. ¹²Temaeit inggeim mi uangoul uahuhut tun toro mata marung uel-tuparoum tar nitua gere moko dede.

^{13b}Ge a puh pe geka bolo uahi-uain tono uelhire God sioun, ka boloin pare, "Inggo ku tagorong mana, temaeit ku men." Doh tar siokonor nitagorong manene. Inggeim mi mene teeit king tagorong mana pe. ^{14c}Inggeim mi ate tar God geke uatua tapokis tur tenagi Tamata Nomaneig Iesu toro mat, kare turung uatua tapokis pono tamiueim misiana tang Iesu, kare keip tamiueim menia tamiuoum i uoum tena butur. ¹⁵A mamang inetelikinine ka guataig e laig tamiuoum, temaeit a hamhamas ger nang God e la tasir bureher tamata

mara heiringuaig me burehentieher ni-uaha tena uiniator God.

Uangoul keip tar nitagorong man

^{16d}Temaeit inggeim ahik pah mi matotong hagou uasa gitiempe ke saba manasa per tukunumiueim, bo a iabeim-ueim e timuh kompela tar mamang mareinilik. ^{17e}A siksikir niduhunine ahik pahe moko uabarah, bo e poul tapokis puk tamiueim tar kale tar uinatoro ger i ranantiehe tun gere moko dede, inggon a uleik uain tar niduhuninane ring kalegieim. ^{18f}Ge inggeim pe ahik pah mi uakeis uanono tar inete gering bang huarainene daan, bo inggeim mi uakeis uanono tar huar inete ge ahik pah mi matotong bang huarain, ge a inete pe gera bang huarainene daan e moko puk tar sikinar binak, bor inete ge ahik pah ra matotong bang huarain e moko dedengua.

O Mahar 5

5 ⁸Ge inggeig pe i ate, a tukunugigeigene ri uangoul keipinene daan, misiana tar taluh ra turung mamantouoin. Bo inggeig tenagi um e la tur tang God i Heuen gere toko dedengua. Ahik pah ke tuha taguin me tamat. ^{2b}Bo gine puk daan, inggeig ki haha manasa tar tukununonene ri uangoul keipinene daan. I malara puk manasa ra uamoko manasalainir tukununang Heuenane tagigeig. ³Inggeig i malara pon i uangoul keip tar timuhur tukunun ahik pah tar iabene ger tabo tukunun. ⁴Inggeig i talingoro kompe tar taluh tar sikinar binak, kari huata tar niduh, kari haha manasa ri talingoro pe tar taluhonene. Bo inggeig

^x4:7 2Ko 5.1 ^y4:8 2Ko 1.8; 7.5 ^z4:10 1Ko 15.31 ^a4:11 Roum 8.36

^b4:13 Ker 116.10 ^c4:14 1Ko 6.14 ^d4:16 Epe 3.16 ^e4:17 Roum 8.17-18

^f4:18 Kol 1.16 ^g5:1 2Ko 4.7 ^h5:2 Roum 8.23

i malarantiehe tun tar talingoro tar umang Heuen, maeit a haua gere moko puk tar sikin e turung gomo taneinir nitua gere moko dedengua. ⁵God me pahene ke kaleuato tar puhonene tagigeig. Kare heir uoum tagigeig tena labena Dedeil a uaparok tar haua re turung guatagion i uoumuhia.

⁶ⁱTemaeit inggeig i tagorong mana dedempesieig, kari ate uaia tun pare, gine ri uangoul keip haraha pe inggeig tar tukununang gane i kot inggeig i uairehe harahampe tar Tamata Noman. ⁷Temaeit inggeig i uangoul keip dedempe tar nitagorong man ahik pah tar haua ri bang huarainene daan. ⁸^jInggo u kula pare, inggeig song ki tagorong mana tun, kari marang hiliuingua tar tukunugigene ri uangoul keipin, kari la uangoul tokaha keip tar Tamata Noman. ⁹^kTemaeit inggeig i uamoko uapopokoho tun manasampe teregi ninaman tar puhonene mari uua-heig tatanon. Ginempe ri uangoul keip haraha pe inggeig tar tukununang gane i kot ue ki hiliu manasa tar tukununonene. ¹⁰^lGe Iesu pe tere turung kedang tagigeig uakapa tun. Inggeig kahakaha ra turung kedanga turusieig hape ki uangoul peane i kot, ge para uia ue a sa.

Matakaluana tang God

¹¹Inggeim mi ate tar haua ring sokoro uelhirin tar Tamata Noman. Temaeit inggeim king poul tun tasir tamata mara lame tang God. God e ate, inggeim mi uakeluk kompe tena nimalaron, doh inggo u tagorong mana teil inggoum mung ate uaia tun pon. ¹²Inggeim ahik pah mi uasala katongosieim tamiuoum. Bo inggeim king heir tar binaka tami-

uoum, maeit rung uasaloum tamiueim tas mais gera sala puk tar haua ra bangain ahik pah ra sala tar haua re moko tar kolous. ¹³Doh geto popoulueim auia e lain tang God, bo geta kodkodoho remi ninamaneim auia e heir me nipoul uaia tamiuoum. ¹⁴Ge na nimalaelhir pe Kristo, teene ke kaueke tamiueim, teeit inggeim king tagorong mana tun pare, Kristo ke mata ueleheir tagigeig uakapa tun, doh inggeig ki siokor mata pon. ¹⁵^mKristo ke mata ueleheir tagigeig uakapa tun, temaeit mais geka kale tar timuhur nitua ger nanon, gisin ahik manasa pah ra uangoul teres nimalara katong, gisina ra uaha keip manasa tang Kristo geke mata ueleheir tasisin, kara uatua tapokis turin toro mat.

¹⁶Temaeit uakekenene daan, inggeim ahik baka poluk pah mi kedang me tang siokor tamatane i kot hape re baka pe. Bo sioun inggeim king guata tang Iesu Kristo tar puhonene, bo gine puk daan inggeim ahik manasa pah mi guata baka poluk tar puhono tatanon. ¹⁷ⁿGe mai pe re uangoul tokaha keip tang Iesu Kristo, inggono ra uatimuhin. A pensounur niguat, kara niuangoul ke hiliu, kare palihimer niuangoul.

¹⁸^oGinina uakapa tununine e la tur tang God. Doh tena kalekinale Kristo God ke guata toro hiarouo tagigeig, doh tatanono katong. God ke heir tar kalekinale tagigeig tar uahiarouo tasir tamata uakap. ¹⁹^pGod ke heir tamiueim tar meneng uelhiarou uaia tun tasir tamatang gane i koto pare, tur tang Kristo. God e uelhiarou keip tasir tamatang gane i kot ahik pah ke namana teres niguata uasasin geka guataig.

²⁰Temaeit inggeim tering tur keip manasa tang Kristo, ge God pe e uoto

ⁱ5:6 Hib 11.13-16 ^j5:8 Pil 1.23 ^k5:9 Kol 1.10; 1Te 4.1

^l5:10 OUNU 12.14 ^m5:15 Roum 14.7-8 ⁿ5:17 Roum 8.1; Gal 6.15

^o5:18 Roum 5.10 ^p5:19 Roum 3.23-25

heir tunume tar popokohor mene tamiueim, inggeim mi mene uapopokoho tamiuoum ngohina pah te Kristo re menemene tun tamiuoum, “Mu uelhiarou keip tang God.”²¹ ^qKristo ahik mena niguata uasa tagu. Bo God puk ke guata tatanono pare, e siokor huata teregi niguata uasaeig. Maeit tar niuangoul tokahene tagigeig mes Kristo inggeig, song ri uangoul uakodkodoho keip tun tang God.

O Mahar 6

6 Inggeim mi siokor kalekinale keip tokaha tang God, temaeit ring kula uapopokoho tuneim tamiuoum pare, ahik tun pah mung ueluelde puk tar nipoulur nang God ger hamhamas.² Ge Inggono pe ke kula pare, “Tar binaka tun geke uamatotoin, inggo u longoro tamiuoum, kare tar mareining uaudeil, inggo u poul tamiuoum.” *Aisaia 49.8*
Ualongoro uaia tun! Gine daan ter binaka geke uamatoto tunin tar kale tena hamhamas God. Doh gine daan ter marein geke uamatoto tunin tar uaudeil tamiuoum.

A niduh ke lame tang Poul

³ Inggeim ahik tun pah mi malara me tang sioko tamiuoum ra tur tanein tenami kalekinaleeim. Maeit ahik me tang siok ra tupara toin mo boho tamiuoum tenami kalekinaleim.⁴ Bo tar mamang hagarilik puk inggeim king ualasira uakalahara tun pare, no tamatang kalekinale God tar huata tar mamang niduhulik; king kale uelmahing, king hagouong ubau, king toboul hape ring guata pe.⁵ ^rInggeim ka halhaluhusieim, kara bakalasieim tar

karabus. O tamata ka nimaliana tamiueim, ahik pah king tur uaha tar kalekinale, ahik pah king hohou, karing gog.⁶ ^sInggeim no tamatang kalekinale God, king uangoul keip kompeme tar inetenine; a delauana tunur niuangoul, remi ninaman, king uanguangoul sikor, karo hamhamas. King ualasira keip taninina tar labena Dedeil, kare tar uelmaluelhir ger man,⁷ kare tar mener namiueim ger man, kare tar nitampopokohor nang God. A niguataninaniner kodkodohor namiueim, ngohinar ineteng uiliatung e kauek, kare uiliatung keip tamiueim tar mamang hagarilik gere lang mamantouo tamiueim.

⁸ O man, a giniameher binak o tamata ra ueltada tamiueim, doha giniameher binaka gisin ahik pah ra ueltad, a giniameher binaka gisina ra uairana tamiueim, doha giniameher binaka gisina ra uaikoto tamiueim, doha giniameher binaka gisina ra kula tamiueim o bohoboh, bo inggeim o uauaman.⁹ ^tInggeim ra ate uaia tunusieim, bo inggeim puk misiana pah ra telesieim, king tapokis tur toro mat, doh gine harahampe ring uangoul ka halhaluhusieim ahik pah king mat.¹⁰ Inggeim king ueldolom, bo inggeim puk gine ring uaha dedempe, inggeim o tiome, bo inggeim puk king guata tasir tamata ka kale tar bureher inet. Inggeim ahik tun menami inet, bo toro mana tun inggeim nami bureher mamang inetelik.

¹¹ Inggoumur Korin, inggeim king mene luaka tun tar uelhire geking meneig tamiuoum, karing uamoko tun tar nimalaeluahir tamiuoum tar koloumiu.¹² Inggeim ahik pah teking uoho tane tar nimalaeluahir tamiuoum, bo inggono inggoum katongo tekung uoho tane tar nimalaeluahir tamiueim.¹³ ^uDoh inggo gine ru meneng ualatut

^q5:21 Hib 4.15 ^r6:5 2Ko 11.23-27 ^s6:6 1Ti 4.12 ^t6:9 2Ko 4.10

^u6:13 1Ko 4.14

sira manasa tamiuoum paho bung tug tun. Ter puh teene ru marang meneio tamiuoum. Uamoko tun teremi nimalaelhir tamiueim tar koloumiu.

Tagin tasir tamat gera tagorong boho tang God

^{14v}Ahik pah mung ueldokout keip tasir tamata ge ahik pah ra tagorong mana tang Iesu Kristo. Hapengua ura uangoul tokaha per niguata uaia mer niguata ger sa? Hapengua re uangoul tokaha keip per luh tar kitup? ¹⁵Hapengua re la uelua peis Kristo me Satan? Doh hapengua ra uangoul tokaha per tamatang tagorong mana mesir tamata gera tagorong boho tang Kristo? ^{16w}Hingianguar uelhote re turung mok i uantinana tena umang lotu God menia tasir godo bohoboh? Ge inggeig peene ri tagorong mana tang Kristo ter umang lotu ger nang God ger tua, ge God pe ke kula pare, “Inggo u turung uangoul tokaha keip tasisin,

doh inggo tenas turung God manasasin, doh gisina tosnogo turung tamato.”

Isikel 37.27

^{17x}“Tamaeit hiliu tasisin, karung ueltageih.

Teke kula per Tamata Noman, Ahik pah mung tuhtuha me inete ger sa, maru kilauatoro tamiuoum. *Aisaia 51.1; Isikel 20.34*

^{18y}Inggoum a turung tamamiu totoguo, doh inggoum, o turung bung tuguo.

Teke kula per Tamata Nomana ger i ranantiehe tun.” *2 Samuel 7.14; Jera-maia 31.9*

O Mahar 7

7 Ro bung kaloug, inggeig ki kale tur tar ualapagahanine tang God, tamaeit inggeig i uadelauana katongo tar tukunugig, kara iabeigig mare dedeil tun tar mamang niguatalikininer sa, kari kalekinale tokaha kompe mari dedeil uakapa tun, ge inggeig pe i sokoro tang God.

Poul ke uah

²Uamoko tun tar nimalaelhir tar koloumiu tamiueim, inggeim ahik pah mi sa me tamat. Ahik pah king uasuasa keip me tamata me niguata uasa, ahik me tang sioko tamiuoum king uelourieim. ³Inggo ahik pah ku uakouh tamiuoum ku mene pe tar puhonene, ge inggo pe ku hire baka uoum tamiuoum pare, remi nimalaelhireim tamiuoum e moko tun tar koloumiueim maring uangoul tokaha dedempela tamiuoum i la mata keip. ⁴Inggo u tagorong mana teil tun tamiuoum, karu uasala tun tamiuoum. Inggoum kung uauaha tun totoguo. Ginempe ku kale peo tar mamang niduhulik, bo inggo puk u uangoul keip dede tar uleikir niuah.

^{5z}Tar binaka king la pokoseim tar pang uan i Masedonia, inggeim ahik pah king uangoul uaha bak. A niduh pe ke moko uiloho tamiueim a uelperere tar mamang buturulik, king uangoul keip tar nisokor. ⁶Bo God gere uoto uaongolo tas mais gera sokoro teke uaongolo tamiueim tar binaka ke me pokoso Taitus. ⁷Ahik pah ter nipokoso pukener nang Taitus ke me uaongolo tamiueim, bo inggono ter uaongolo pono gekung heirioum tatanon. Inggono ke me hire tamiueim rung marang banga tun peoum to-

^v6:14 Epe 5.11 ^w6:16 NKP 26.12; 1Ko 3.16 ^x6:17 UGO 18.4

^y6:18 Jer 31.9 ^z7:5 2Ko 2.13

toguo, kare hape kung ueldolomontiehe tun peoum, karung tur keip tun tar uelturut tar puhonene ka guatain totoguo. Doh inggoene daan u uahantiehe tun.

^{8a}Doh gete ku uaueldolomo tamiuoum toro uelhire geku heirilain, inggo ahik pah ku uapalih tagu, ge inggo pe u ate a puhonene ke uauelmahing tamiuoum, bo e la pukin tar sikinar binak. ⁹Ginemphe daan inggo u uaha dedempe. Inggo ahik pahu uah, teeit ku uaueldolomo pe tamiuoum, bo inggo u uaha teeit remi niueldolomoum ke uapalih tenami niguatoum, karung turung tar mud tar niguatar sa. Ter niueldolomonina re malarraig God tasir tamata ra kale, maeit ahikieim pah mi uabir tamiuoum.

^{10b}Ge na niueldolomo pe God e poul tagigeig mari uapaliheig tar kolougig, kare nagi niguataniner sa. Inggeig i uaha tun tar niueldolomonene. Bo a niueldolomo ge ahik pahe uapalih tagu teres niguata uasar tamat e keip teil toro mat.

¹¹Banga tar hauanine ke uakotpokosoi-gir niueldolomor nang God tamiuoum; ke guata uaiantiehe tun tamiuoum, ke guata marung ate uaiaoum pare, ahik pe pah kung guata uasa, karung marang uelturut katongo pukusioum, kare uanimaliana tamiuoum, kung sokor, kare sirisious totoguo, karung tur keip tun tar uelturut tar puhonene ka guatain totoguo, karung namanantiehe tun tar heir me uabang manate tang mai ke pesiau. Karung ualasira uaia tun ahik pe pah kung kouh me puh tar ineteninane.

¹²Inggo ku bolo toro uelhire geku heirilain tamiuoum, ahik pah ku bolo tang roon, teeit ka guata per tamata tar niguata uasa ue tang mai geke kale uelmahing, bo inggo ku bolo toro uelhire roon, maeit rung ualasira tooom tar matana God hape rung malarantiehe tun

pe tamiueim. ¹³Ter mamang inetelikinin teke uaongolo tamiueim.

Doh tar tumana tar puhonene king uaongol katongo pesieim, inggeim king uahantiehe tunungua tar binaka king banga tang Taitus re uaha pe. Inggoum uakapa tun kung uahagou uaia tunungua tatanon. ¹⁴Inggo ku uasala tun tamiuoum tang Taitus, doh inggoum ahik pah kung uamatala totoguo, bo ter puh kompeene, a mamang inetelik geking hiregieim tamiuoum a man, maeit a haua geking uasala keipigieim tamiuoum tang Taitus ke pokoso nomana tun. ¹⁵Doh gine daan na nimalaelhirono tamiuoum a popokoho tun tar binaka re namana huarono kung longoro tun peoum tatanon, karung heir tar uleik tunur ueltad, karung me tororo tun tatanon. ¹⁶Inggo u uahantiehe tun, teeit inggo u pemai to puk manasampe tamiuoum.

O Mahar 8

Rosio liliaheirir tamatang tagorong mana tang Iesu Kristo

8^cRo uanotoumieim, inggeim mi malara tamiuoum mung ate tar nipoulur nang God ger hamhamas tun geke heirin tasir tamatang toro buturung lotu tar pang uan i Masedonia. ²Gisina ka kale nomana tar uleikir niduh, kara uelmahing. Gisina ka katupa tun tar mamang inetelik, bo ahik puk pah ka namana tar puhunin ra uangoul keip kompe tar niuaha tar mamang binakalik, kara uahauhantiehe keip tun torosio liliaheir tenas inete tang mai re katup. ³Inggo gine ru hire tauete tun tamiuoum toro man, gisina ra uoto heir uaburehe tunumpe e siauain tar haua geke umatotoin. Ahik me tamata ke kula ueleheir tasisina tar guata tar

puhon, gisina katongompe ka naman. ⁴Gisina ra petutup dedempe tamiueim maring uauia tasisina tar poul tasir tamatang Jerusalem gera tagorong mana tang Kristo. ⁵Doh gisin ahik pah ka uakeluk hape king namana pe inggeim, teeit gisina ra heir uakikilanga katongo dedempeis tar Tamata Noman, song tamiueim tang hingiar hagar re hirein God tasisin.

⁶Temaait inggeim king mene uapopokoho tun tang Taitus geke uakekene tar kalekinaleono toro liliaheir e la tapokisila tamiuoumur Korin tar la kale toto uadouh baka tar mani gekung uelbakeigium. ⁷^dInggoum mung uoumuoum teil tun tar mamang inetelik; tar nitagorong man, tar men, kare popokoho tun remi ninamana tar poul tasir gisiameh, kara nimalaelhirir eimiuoum tamiueim. Ter siokono pon inggo u marang banga tun toromio liliaheiroum tar niguatang tar uelmalauehir e uoumuoum teil pon.

⁸Inggou ahik pah ku ualatoho tamiuoum tar guatangua tar puhon, bo inggo ku mene tar puhono tar ualasira tamiuoum pare, o gisiameher tamata ra malauehirintiehe tun pono tar poul mara bangasium ge para, manamper uelmalauehirir namiuoum. ⁹^eGe inggoum pe mung ate tena niguata nagı Tamata Nomaneig Iesu Kristo a hamhamas tun. Inggon e matoto teil uakapa tun tar mamang inetelik, bo inggono puk ke uatiome katongoin tar poul tamiuoum. Inggono ke uatiomein marung matoto teil tunoum tar mamang inetelik.

¹⁰Gine te hape ku namana peo rung guata peoum. Toro krismas giaat ko la uoum, inggoum tesir uakikilanganar tamata kung guata tar puhonene tar

poul. Inggoum kung malara katongo tar guata tar kalekinaleon. ¹¹Doh gine daan inggoum pakung uakapa baka tar kalekinale gekung uakekenein mare uelmatout keip tun nami niguatoum tar haua rung marang guatain. ¹²^fGete kung uamoko tunuoum teremi nimalara tar marang heir tar inet, ginina ra kaleig, ge ginina pe ra banga toig tar haua ro matoto teil tunugia, ahik pah tar inete gero katupagia.

¹³Inggeim ahik pah mi malara pare, mung heiroum, karung kale me niduh, kare mo gisiameh tera kale me nipoul. Bo inggeim mi malara pare, a puhono pake ualo uelmatout uauia tun. ¹⁴Misianene daan inggoum nami bureh. Heir tar haua gera malaragisin, maeit me binaka gere la burehe kaleheisisin, gisina ra turung heir kalehe tar haua rung malaragium. Song re turung uelmatout uauia tunon. ¹⁵^gGe a puh pe geka boloin tono uelhire God sioun o hire teil pare, "Mais geka kale toto tenas bureher inet ahik me pagopag, doh mais geka kale tar papagalik ka uelmatout uauia tun."

Taitus meso uanoton ka ualatueis tar la i Korin

¹⁶Inggou u heir tun tar uleikir niuaha tang God ke heir pe tang Taitus tar siokonor nimalarene re moko totoغو tamiuoum. ¹⁷Taitus ke uah, kare uauia tar nidangatar namiuueim, teeit inggon e mokong sioun pono na nimalara tar lame tamiuoum.

¹⁸Inggeim king ualatue keipime tang Taitus tar tang giameher uanotougigeig. Inggono ra ueltada uauia tuninir bureher tamatang tagorong mana re uoto la hahaia pe tar hire tauete tono uelhire God tasisin. ¹⁹Inggono teka uam-

^d8:7 1Ko 16.1-2 ^e8:9 Mat 8.20; Pil 2.6-7 ^f8:12 Mak 12.43-44

^g8:15 KT 16.18

atoto ponompeinir bureher tamatang tagorong mana uakapa tun tar la tagu tamiueim tar keip tar uahungene ra uelbakein re la i Jerusalem. A kalekinaleonene ring guataieim e heir tar uleik tunur uinatoro tar Tamata Noman, kare ualasira pare, inggeim mi marang poul noman. ²⁰Inggeim king malara mare siauasieim tar menemene ring kaueke teil pe tar bureher mani. ²¹Temaieit king uedanga tun tar lih me leler kodkodoho tar matanar Tamata Noman mara uaha ponor tamat.

²²Temaieit, inggeim king ualatie tagume tasisina tar tang giameher uanotougigeig, inggono ka uedanga to manasain tar mamang hararilik. Inggon a tamatang poul uaia tun, doh inggono tere turung poul uaiantiehe tun, teeit inggon e tagorong mana teil tun tamiuoum. ²³Taitus, inggono te uanotougou e kalekinale tagu totoguo tar poul tamiuoum. Doh gisisir gisimeher uanotougigeig, gisina tera keip teil tar mener nasir tamatang tagorong mana tar uinatoro tang Kristo. ²⁴^hTemaieit ualasira tun tasisina toro mana teremiuir nimalaelhir. Karung ualasira pono tasisin, ae maene ring uasala keipeim tamiuoum, maieit ra bangar tamatang tagorong mana uakapa tun.

O Mahar 9

Poul toso uanotougig

9ⁱInggo ahik baka poluk pahu uahinga tar bolola tamiuoum tar uahire tar uahung gere la tosno tamata God i Jerusalem. ²Ge inggo pe u ate tar hua re moko tun teremi nimalaroum tar poul tasir gisimeh, doh inggo ku uasala tunumpe tar puhono tamiuoum tasir Masedonia, karu hire tasisina

pare, inggoumener tamatang Akaia rung tagorong mana tang Iesu Kristo kung kaleuato tanik manasa uoum toro kris-mas geko la uoum tar hua rung turung heirig. Doh tar nipiles, kara nitagalar namiuoum tar puhonene ke uiuir tun tasir bureher tamata kara guatangua pon. ³Bo inggo ku ualatie pukume toso uanotougigeig tar me ate uaia tun, ge pare kung kaleuato tanik nomanoum, ge inggo pe ku hire manasa tasisina pare, inggoum kung uelbake tanik manasa ku me uahire peo tamiuoum. Doh inggo u de mata saluhur puhonene geta kulaio a bohoboho ku uasala pe tamiuoum kung guata pe paar. ⁴Maeit geta la tagume mo tamatang Masedonia totoguo, karing me banga pare, inggoum ahik pah kung kaleuato tanik, inggeim ahik pah mi mene baka poluk me puh, inggeim mi matala keip puk manas tamiuoum, ge inggeim pe king tagorong mana teil tun tamiuoum. ⁵Temaieit, inggo ku namana sira pare, auiantiehe tun tar kula uapopokoho toso uanotougigeig tar me banga baka uoum tamiuoum, kara me kaleuato tanik tar mamang inetelik tar uahungener namiuoum, kung ualagahain tar heir. Maeit a uahungonene tere moko tanik manasampe tar binaka ru pokosomeo e ualasira pare, inggoum mung marang heir, ahik pah ka hinga tutupisoum.

Ualasira toromio liliaheir

⁶^jNamana dede tar puhene! A tamata geke lebe tar papagalikir uatun e turung kale tar papagalikir kukuanan. Bo mai gere lebe me bureh, inggon e turung ueuere uabureh. ⁷Inggoum kahakah mung heir katongo tun tar hua rung marang heirin. Ahik pah mung heir tar hua rung dein tar heir ue ka hinga tutupin, maieit puk kung heir. Ge God pe

e malara tar tamata gere heir keip tun tar niuah. ⁸God e matot e heir uaburehentiehe tar haua rung malaragium, song rung turung matoto teil dedeoum tar mamang inetelik rung malarag, kare tototonguasioum, karung bulungua me giniameh tasir gisiameh.

⁹Ge a puh pe ka boloin tono uelhire God sioun pare,

“Inggono ke heir ueltebeir tono liliaheir tasir tiome toro mamang pang uanilik uakapa tunane i kot.

A niguatonener nanonor kodkodoh e la dedengua.” *Ker 112.9*

¹⁰kGe God pe tere heir tar uatuna tar tamatang leb menia toro bereiting ein, inggon tere turung heir pono tamiuoum tar uatuna gerung malarag, kare uatungara taninin, kare ueuer uaburehentiehe tur tenami niguatoum ger kodkodoho.

¹¹God e turung guata uaia tamiuoum, marung matoto teil tun tar mamang inetelik, maeit rung turung liliaheiroum tar mamang haulik gera guluhig. Doh toromio liliaheiroum tar inetenine kung heirig tamiueim gere la tas mais ra katupa tar inet, ra heiringuasina tar niuaha tang God. ¹²A puhonene kung guataioum ahik pah kung bul uelhir puk tosno tamata God tar haua ka katupain, bo a puhonene ke uoun titidiaka pono tar heir tar bureher niuaha re la tang God. ¹³Teeit tar puhonene kung guluhuioum mes paheimiu o tamata ra turung uatakai tang God toromio liliaheiroum. Ge romio liliaheir peoum tasisin, kare tasir gisiameh tero hire uakalahar tun pare, inggoum mung longoro tun tono Uelhire Uaia Iesu Kristo. ¹⁴Gisina ra turung lotu keip tun tar nimalara tar namana tamiuoum, teeit tar uleik tunur hamhamasonener nang God ke ualasinrain tamiuoum.

¹⁵A niuaha e la tang God tono liliaheir ke heirheir puk pe tar inete uaiaonener uiantiehe tun.

O Mahar 10

Poul ke tur keip tun tena kalekinale

10^mInggono Poul, u dangata uapopokoh tun tamiuoum tar hangana Kristo ger hamhamas tun na niguata tar hire toro mana totoguo pare, o gisiameh tamiuoum ra kula totoguo pare, u ongolo puk tar bolome tamiuoum, bo tar me pokoso katongo tun inggo u sokor. ²nInggono u hire uapopokoho tun tamiuoum pare, tar binaka ru me pokoso, inggon ahik pahe turung binaka uaia. Inggo u me uaongolo tunumpeio tas mais gera namana pare, i uakeluk toeig tena nimalarar tukununang gane i kot. ³O mana tun inggeig o peng gane i kot, bo ahik puk pahi uiliatung misiana ra uoto uelkoi per tamat. ⁴oGe nagi ineteng uiliatung pe inggeig a giamehe sioko tun, ahik pah misiana taninine ra uoto uelkoi keipig gane i kot, bo nagi ineteng uiliatung keipeig e la keip tena nitampopokoho God tar mamantou tenas butur popokoho tunusis ge nas uelmatan God. ⁵Inggeig i mamantouo torosio kakaialikisina gero uakeip kai katongo tasisin ge ahik pahe la tur tena ninamana God, kari siokor reih toto teres ninamanasina mara uanua kout, kara uakeluk puk manasa tang Kristo. ⁶Tar binaka rung longoroum, karung uakeluk uaia tun tang Kristo, song ring uinatoro tanikeim tar me poluk tenas niguatar mahang longor.

⁷Inggoum mung bangbanga kompe i morenehia tar inet. Gete me tamata ke ate uaia tunin e uangoul tokaha

^k9:10 Ais 55.10 ^l9:11 2Ko 1.11; 4.15
^o10:4 Epe 6.13-17

^m10:1 1Ko 2.3 ⁿ10:2 1Ko 4.21

keip tang Kristo, inggono pake bang paroko kompe pare, inggeim tering uangoul tokaha keip pono tang Kristo. ⁸PGe a Tamata Nomana pe ke heir totoguo maru kalekinale tar kauেকে tamiuoum, karu uatampopokoho teremi nitagorong manoum, bo ahik puk pahu marang uahiuo teremi nitagorong manoum, ku uasala katongo peio tar sikin ru tur teil pe tar kalekinaleon. Gitiempe getu uasalantieho ahik me inete ru matala keipin. ⁹Inggo u de matu guata sira pare, u uasokoro tamiuoum, ku bolo peme tar uelhirene. ¹⁰Ge o gisiamhe pe tamiuoum ka kula pare, ahik me namana tang Poul, ge inggono pe ke mene tun tar popokohor uelhire ke bolo peme tagigeig, bo tar binaka re uangoul taguono tagigeig, inggon a maluan, doh na menon a tabo tengkan. ¹¹Temaeit o tamatasina paka namana huara kompe pare, a haua geking menegieim tamiuoum king bolo peme, inggeim mi me turung ualasira uakalahara tar nipileser namiu geting me pokoso tun tamiuoum.

¹²Inggeim ahik pah misiana tasir tamata gera marang petut sira puk tamiueim mara ualasira tasir tamat. Inggeim ahik pah mi malara ra banga aha keip tolasiem tasisin. Ge gisina pe ra malara kompe ra uairan, kara banga aha katongois. Gisin ahik tun mes niate.

¹³Bo inggeim ahik pah mi uasala katongosieim tar inete ge taboin tamiueim. Bo inggeim mi uasalasieim tar kalekinaleene ke uamatotoin God tamiueim e la tuka tamiuoum pon. ¹⁴Inggeim ahik pah king lalantiehe tar uasala katongosieim tege pakene ahikieim pah king me pokoso baka uoum tamiuoum. Inggeim pe tesir uakikilangana tun tar me pokoso keip tono uelhire Iesu Kristo tamiuoum. ¹⁵Inggeim ahik

pah mi uoto uasalasieim tar kalekinale geka guatainir gisiamhe siok. Bo inggeim mi tagorong mana teil teremi nitagorong manaoum e ululeik uain dedempe, kare nami kalekinale inggeim tamiuoum e turung uleikintiehe uainguua pon. ¹⁶Maeit ring la turung hire tauete pono inggeim tono Uelhire Uaia Iesu Kristo tar pang uaneit re uahuhut tamiuoum ge halana me tamata te la tagu. Ge inggeim pe ahik pah mi marang uasala katongosieim tar kalekinale geka guata uouminir gisiamheer tamata tar giamheer uan.

¹⁷rGe no uelhire pe God geka boloin sioun, o hire teil pare,
 “Mai gere uasalain,
 e uasalain tar haua ke guatainir Tamata Noman.” *Jeramaia 9.24*

¹⁸sGe ahik peono pah ter tamat re uasala katongoin, ra bang parokoin, bo inggon ter tamata gere uasalainir Tamata Noman.

O Mahar 11

Poul doho aposoul gesir bohoboh

11 Inggo u uahantiehe tun mung marang uahue peoum totoguo tar mene baka me sikina tamiuoum tar meneniner tuktukar. Bo inggoum kung uahue manas. ²Bang! Inggo u gehe tun tamiuoum, doha nighonene a nang God. Inggo u ualapagaha tamiuoum mung le tar tang siokor bulout, inggono te Kristo, maeit ru la turung ueliuo tatanono tamiuoum misiana tasir kuaha komodia gesir dedeil uaia tun. ³uBo inggo u kanuh teil puk gete lilio remi ninamanoum ger kodkodoho tun, kara siokon sioun remi nitagorong mana tang Kristo getung la pe siroum tang Eba ke uelour pe Satan ge inggono pe e aten-

^p10:8 2Ko 13.10 ^q10:13 Roum 12.3

^r11:2 Epe 5.26-27 ^u11:3 Uak 3.4,13

^r10:17 1Ko 1.31

^s10:18 1Ko 4.4

tiehe tunumpe tar uelour. ^{4v}Gete me tamat re me pokoso tamiuoum, kare me hire tauete me giamehe siokor Iesu tang geking hire taueteisieim tamiuoum ue me giamehe siokor Iabena tang gekung kaleioum ue mo giamehe sioko ro Uel-hire Uaia tang geke malarain, mung uaha kompe tar longoro tasisin.

^{5w}Bo inggo puk ahik pahu namana sira ter i kot uain tasisitir “aposoulur i ranantieh.” ^{6x}Gete ahikio paha tang men, bo inggo puk regu niate. Inggeim king uakalahara uaia tun tar puhonene tamiuoum tar mamang hararilik.

^{7y}Hau! Te inggo ku guata uasa, ku uaikoto katongo peio, karu uairana tamiuoum ku hire tauete pe tono uel-hire God ge ahik me bulauan? ^{8z}Inggo ku reih tur tar mani tasir gisiamer toto tamatang tagorong mana toro ginamehe ro buturung lotu maru poul tamiuoum.

⁹Binaka ku uangoul keipio tamiuoum, karu katupa tar inet, Inggo ahik pah ku heir me niduh me tamat, ge o uan-otougou pe geke lih turume i Masedonia teka me heir tar haua ku katupa-gio, doh inggo u turung agout uaia tun getu heir me niduh tamiuoum, karu turung guata uakeluk sira dedenguampe.

¹⁰Inggo u uamana tun, gine ru kale teil tun peo tono uelhire Kristo gero man, ahik tun me tamata ge me peng Akaia re matotong tur tane totoguo ru uasala katongo peio ahik pe me bulauoug. ¹¹Hau! Teeit ahik peo pahu malaelhir tamiuoum? God e ate, inggo u malaelhirintiehe tun tamiuoum.

¹²Doh inggo u guata dedempe tar hauene ru guatain maru tur tane tasir tamata gera uasalais, kara kula pare, ra kalekinale sira pono ring kalekinale pe inggeim. ¹³Gisinar tamatasin tesir aposoul gesir bohoboh ra kalekinale keip

kompe toro boh, kara boho tolais pare, no aposoul Kristo. ¹⁴Inggeig ahik pahi turung lutar tar puhonene gete me uapalih katongoin Satan mare banga sira tar anggelou ger nanar luh. ¹⁵Temaait tar puhonene ahik paha timuh tagigeig. Doh no tamatang kalekinaleono Satan ra matotong petut pono ra kalekinale tar haua ger kodkodoh. Bo tar uadouhina pukur binak, gisina ra turung kale tar uleikir uabang manate tar haua ka guata uasain.

Poul ke uasalain ke kale uelmahing pe

¹⁶Inggo gine ru hire uapoul poluk tamiuoum, ahik me tamata re kula totoguo a tuktukar, bo getung namana siroum paar, auia banga sirampe totoguo tar tuktukar, maeit ru uasala uain baka polukio. ¹⁷Doh gine ru uasala katongo peio, inggo ahik pahu mene sira re mene per Tamata Noman, bo inggo u mene sira tar tuktukar. ¹⁸Doh gine ra sala keip tun per bureher tamata tenas niuangoulung gane i kot, inggo u sala pon.

¹⁹Inggoum o tamatang ate uaia uakapa tun, mung uaha kompe tar uangangoul sikoro keip tasir tuktukar. ²⁰Ge inggoum pe mung malara kompe tar reihime tang mai geke uoto ualatoho tamiuoum ue gere me uakarabus tamiuoum ue ke uelour tamiuoum ue gere petutup katongo pukumein ue tang gere posposara tar lumiuoum. ^{21a}Inggo u matala keip tun tar hire tamiuoum pare, inggeim o soksokoro tar guata tar inetenina tamiuoum.

Bo gete me tamata re ongol, kare uasala katongoin, inggo song ru ongolo pon, karu uasalaio. Inggo ku mene sira tar puhonene tasir tuktukar. ²²Gisina

^v11:4 Gal 1.8-9 ^w11:5 1Ko 15.10; 2Ko 12.11 ^x11:6 1Ko 2.1,13

^y11:7 1Ko 9.18 ^z11:8 2Ko 12.13; Pil 4.15-16 ^a11:21 Pil 3.5

tesir Hibru? Inggono teo pon! Gisina tesir Israel? Inggono teo pon! Gisina teso bubunguna Abraham? Inggono teo pon! ²³^bGisina no tamatang kalekinale Iesu Kristo? (Inggono u meneng tuktukara kompe ku mene pe tar puhonene.) Inggono auia uainintiehe tun tasisin, teeit inggo ku kalekinalentiehe uaia uain tasisin, kara kalkale uapoulio tar karabus, kara kalkalopis uapouluio, ku tapokis tur toro mata tar bureher binak. ²⁴^cA toloma tunur binaka ka kalkalopis per Ju to-toguo u uoto kale tar touono hangaul, kara lusior (39) kalopis tar siokor binak. ²⁵^dA touonor binaka ka halhaluh keipio tar sineir, kara siokor binaka ka bakbak guturuio tar palau, kara touonor binak, ka la uamokoio tar parau ke horo tar lolou, ku uangoul tar siokor boung, kara siokor marein i laur. ²⁶^eA bureher binaka ku sabala uairehe peo, karu kale tar bureher niduh tur tar mamang hararilikinine; toro kodom gere ualo tur tar siusan, tasir ueuenau, tasir tamatang tenag pang uan katong, tasir gime uan, toro uan uleik, toro pang uan, toro butur padenen, i laur, kare toso uanotougigeig gesir bohoboh.

²⁷Inggono ke parakukuh tunumpeio, karu kalekinale kompela ahik pah ku hohouo uaia tar bureher binak, ku gog, karu kamadak, a bureher binak inggono ahik meg niein, karu malahong, karu palapal. ²⁸Doh tar puhung gimehe tanininanine, inggono e duh teil tunumpeio tar mamang binakalik tar namana tasir tamatang tagorong mana toro mamang buturulik. ²⁹Inggono u maluaana tunumpe gete me tang sioko re maluan, karu mahiaua tunungua gete me tang sioko ka uoum keipin tar guata tar niguata uasa.

³⁰Getu marang uasalaio, inggono u turung sala tar inete gere ualasira torogo maluano.

³¹God ge tamanar Tamata Noman Iesu Kristo gera uatakai dedein tar mamang binakalik e ate pare, inggono ahik pahu boh. ³²^fI Damaskus, a tamatang uoum keip gere kalekinale i kukulebanga tena nikaueke Aretas ger toia ke babata uiloho tar uan uleikono mare kusa tane totoguo. ³³Bo inggono puk ka uahiu tauete keipio tar tolah, ka uahiuahiaio tena masolor rom tar padoronar uan uleikon, temaeit puk ku udeilo.

O Mahar 12

Na borboriana Poul, kara uelmahing ke kaleig

12 Inggono u sala dedempe geta hik me inete ru kalein. Inggono u mene tauete dedempe tar borborian, kara uelhire ger ououo geke heirigir Tamata Noman. ²Doh toro hangaul, karo toueit ro krismas geke karuh manas a tang siokor tamatang tagorong mana tang Iesu Kristo ka kale kaiain i ran tar uatouononor Heuen. ³Inggono u ate tar tamaton, bo u tele uamatoto puk, ge pare ke la kai keipimpeono tar tukununa tun ue ke la pukur iaben, God e ate. ⁴Inggono ka keip kaiain i Paradiso, ke longoro tar inete ger ououo, ahik me tamata ra matotong uahuein tar hire tauete tar ineton. ⁵Inggono u turung sala keip tar tamata sira paar, bo ahik puk pahu uasala katongoio u uasala kompeio tar binaka ru maluan. ⁶Doh gete ku marang uasalaio ahik pahu guata siraios tasir tuktukar, ge inggono pe u turung hire tun toro man. Bo ahik puk pahu uasala katongoio, doh ahik pono pahu malara ra kular tamata totoguo auiantiehe uain tun nag niguata

^b11:23 Apo 16.23 ^c11:24 Ual 25.3 ^d11:25 Apo 14.19; 16.22

^e11:26 Apo 9.23; 14.5 ^f11:32 Apo 9.23-25

geta hik bakasina pah ra kale tar haua ku guatagio, karu hiregio tasisin.

⁷Bo inggo ka tur taneio matu uasalantieheio tar ineteniner uleikintiehe ger ououu geke ualasilaig totoguo. Ka heirio tar uleikintiehe tunumper uelmahing tar tukunug. Na angelou Satan ke me heir tar uelmahingonene totoguo. ⁸A touono tunur binaka ku dangata uapopokoho tun peo, karu petutup tun tar Tamata Noman tar uauia tapokis totoguo. ⁹^bBo inggono puk ke hire totoguo pare, “A hamhamasar nouguo tere matotong poul manasa totomua, ge a barangana per nitampopokoho ger nouguo a uelpipih tun tar binaka ro malmaluana.” Temaeit inggo u sala tunungua, karu uaha ra kula peio a maluan, maeit na nitampopokoho Kristo e me moko totoguo. ¹⁰Inggo u uaha tun ra guata peio tar mamang hararilikinin; u malmaluan, ra uelsigalaio, u kale tar uleikir niduh, u kale tar uleikir uelmahing e parakukuhuo tar bureher inete ru kalekinale pe tar hangana Iesu Kristo. Bo u uaha kompe, teeit tar binaka ru maluano, inggo song ru tampopokoh.

Poul e namanantiehe tun tasir Korin

¹¹ⁱInggoum kung guata totoguo, maeit ku pe sira tasir tuktukar. Inggoum pake turung uasala totoguo, ge inggo pe ahik paha i koto tasir aposoul gesir i ranantiehe tun, ginempe ahik peo paha to hangoug tagu. ¹²^jA mamang hararilik gere uatur uakalahara tasir aposoul nomana tun te ginine; a uaparok, a inete timuh re pokos, kara hagarang touo tar inet. Ginina ka guatguata hamas, uamakaha uapoul to tunig tar matamiuoum. ¹³^kInggo ku guata uaia uainintiehe

tun tamiuoum toro giniameher ro buturung lotu. Ahik pah ku heir tagu me niduh tamiuoum misiana ku heir pe toro giniameher ro buturung lotu. Inggo u ueldolomo tun mung kale liu tar niguata uasaonener eiguo tamiuoum.

¹⁴Gine daan inggo u kaleuator, ter uatouonono manasar binakono ru lameo tamiuoum. Doh inggo ahik pahu malar u me heir poluk me niduh tamiuoum. Inggo ahik pahu lang kale menami inetoum, bo inggo u marang kale tamiuoum ngohina pare, o bung tug, ge o keketik pe ahik pah ra matotong patoho me inete ra heirin toso tinas, bosir tinana tera poul tasir keketik. ¹⁵Temaeit inggo u uaha tun tar heir tenag mamang inetelik tar poul tamiuoum. Karu heir katongo ponoio tamiuoum, gitiempe ahik peoum pah mung malauelhir totoguo, inggo u malauelhir dedempe tamiuoum.

¹⁶A puhon a kalahara tun, inggo ahik pah ku heir me niduh tamiuoum, bo o gisiamehe puk tamiuoum ra namana sira pare, ku lang uelour keipio tamiuoum toro boh. ¹⁷Hau! Inggo ku uelour keip tamiuoum tasir tamata geku ualat-umeis tamiuoum? ¹⁸^lInggo ku mene uapopokoho tun tang Taitus tar la tamiuoum, karu heir tar uanotougigeig ke la tagu tatanono ue Taitus ke uelour tamiuoum? Raeim kira guata keip kompe tar siokonor ninamana tar mamang inetelik, kara siokor lel.

¹⁹Inggoum here mung namana pare, mi marang uelturut katongo pukusieim tamiuoum tar binakalaene daan bidouh? Ro bung kaloug tar matana God e ate inggeim king guata kompe tar mamang inetelikinine gere uatampopokoho tamiuoum ring uangoul tokaha keip pe tang Kristo. ²⁰Inggo u sokoro teil tun getu me banga pare, inggoum a giamehe

^g12:7 Job 2.6 ^h12:9 Pil 4.11-13 ⁱ12:11 2Ko 11.5 ^j12:12 Roum 15.19

^k12:13 2Ko 11.9 ^l12:18 2Ko 8.6,16-18

sioko tunur niuangoul tar nimalara ke me moko tereg ninamano. Doh inggoum mung turung bangangua pono totoguo, a giamehe sioko pono tar nimalara ke moko teremi ninamanoum. Inngo u sokoro teil tun gete pokosor puhunine tamiuoum: a uelperer, a ueluelgehe, a ueluelkoi, a uelsae, uelsigala tasir gisiameh, a ueluelngure, o salasalalik, karo bilinggala ueltebeir. ²¹ Inngo u sokoro teil tun getu la uagiamehe polukume tamiuoum ter hauon a God ger nouguo e turung uamatala to tunumpe totoguo i uoum tar matamiuoum. Inngo u turung ueldolomo tun tas mais ka uangoul uasa. Inngo u ueldolom, teeit gisin ahik pah ke uiuir taguis teres niguata uasa, ahik pah ka uapalih tagu torosio uraur, kare tar ineteniner ualamatala ka guataig.

O Mahar 13

A uadouhinar uatagin

13 ⁿGine daan ter uatouonono man-
asar binaka ru me pokoso peo
tamiuoum, namana uanono tun! No uel-
hire God o kula pare, “A mamang inete-
lik gerung marang uatauetegioum tasir
manai ahik pah na ninamana pukur tang
siokor tamat, bor puhono pake me tang
torik ue me tang touonor tamata ra uel-
hote.” ^{§§} ²Inngo ku uatagin manasa tas
mais geka guata uasa, kare tasir gisi-
amehe ponompe tar inetenin tar binaka
giane ku me pokoso tamiuoum tar ua-
torikinar binak, doh inggo gine ru hire
uapoul poluk tamiuoum tabo peio, maeit
getu la uagiamehe polukumeo, ahik
manasa pahu me heir binaka tasisin.

³Inggoum mung marang banga tun
mo mana pare, Kristo e menmene to-
togo. Kristo ahik paha maluana re

kalekinale pe i uantinanina tamiuoum,
inggon a uelpipih tunur barangana na ni-
tampopokoho re uangoul keip pe tami-
uoum. ⁴ O man, inggon a maluana no-
mana ka tung pous pein, kara uakusein
tar korose, bo gine puk daan, inggon e
uangoul keip tar barangana na nitam-
popokoho God, doh inggeim tesir malu-
ana pon, bo mi uangoul tokaha keip puk
tatanon, maeit ring tagala keip tena ni-
tampopokoho God.

⁵ Bang banga hamas katongosioum,
uedang katongosioum, karung banga
ge parung uangoul keipimpeoum tar
nitagorong man. Inggoum ahik pah
mung ate re uangoul tokaha teil pe
Iesu Kristo tamiuoum? Bo gete taboinir
nitagorong mana tamiuoum e baka
sirono pare, inggoum, ahik pah kung
kale uahiua taninin. ⁶ Bo inggo puk, u
tagorong mana teil pare, inggoum mung
turung banga tamiueim pare, king pe-
huar, karing siokor kale uahiua uakapa
tun tar nitagorong manon.

⁷ Bo mi lotu kompe tang God, maeit
ahikioum pah mung guata me niguata-
niner sa. Inggeim ahik pah mi marang
ualasira pare, teeit ka siokor bang
paroko tun pesieim, bo inggeim mi
marang ualasira tamiuoum marung gua-
toun tar ineter kodkodoh. Gitiempe ge
teka namana sirar tamata pare, inggeim
ahik pah ka bang parokosieim. ⁸ Ge
inggeim pe ahik pah mi matotong guata
tar inete gete na uelmatanono tar inete
ger man. ⁹ Inggeim mi uaha dedempe tar
binaka mi maluan, bo inggoum o tam-
popokoh. Ge inggeim pe mi lotu tamiu-
oum marung udeil uaia dede rung uan-
goul pe.

¹⁰ Inngo ku bolo pukume tar uelhiren-
ina tabo peio tamiuoum, maeit getu me

§§13:1 Bolobolong Ualatut 17.6; 19.15

^m12:21 2Ko 13.2 ⁿ13:1 Mat 18.16; 1Ti 5.19 ^o13:4 Pil 2.7-8

^p13:5 1Ko 11.28 ^q13:10 2Ko 10.8

pokoso tamiuoum, inggo ahik pahu me turung heir me uleikir uabang manate tamiuoum tar kalekinaleene ke heirinir Tamata Nomana totoguo tar kaueke tamiuoum, ge inggono pe ke heir totoguo tar kalekinaleono mare uairana tamiuoum ahik pah ra touahiuasioum.

A uadouhinar uelhireng uah

¹¹Gon! Ro uanotoug. Auia manas! Mu uangoul uaia dedempe marung udeiloum, karung guata tun tar hua ku hiregio tamiuoum tar guat.

Ueluaesioum, karung uangoul keip toro hiarou mare turung uangoul tokaha keip Godong tar uelmalauelhir, doha uelhiarou tamiuoum.

¹²Mu uelbuaka keip tar niuaha ger dedeil tun toso uanotoumiu.

¹³No tamata God uakapa tun gesir dedeil ka heir pono tenas niuaha tamiuoum.

Na hamhamas nagi Tamata Nomaneig Iesu Kristo, doh na uelmalauelhir God, kara niuangoul tokaha ger nanar Iabena Dedeil e moko tamiuoum.

Galesia

*O bolobolo ke boloin Poul
tasir tamat i Galesia*

O bolobolo tasir Galesia

O Galesia o bolobolo i lolono tar timuhur uelhote.

O bolobolo tasir Galesia, roon o bolobol Poul ke bolo tana roon. Roon here tero uakikilangana ro bolobolo ke boloin Poul tasir tamatang tagorong man. Tar binakon o bureher tamata ge ahik paho Ju ka kotpokos o tamatang tagorong man. O gisiamer tamata ka kula pare, o tamata geke nihing tagorong man paka kotpokosongua pon o Ju. O tamatasina ka kula pare, o tamata geke nihing tagorong mana paka uakelukungua tar mamang ualatutulikir nasir Ju, doh nas niguat.

Poul e kila tar tamat geke kotpokos a tamatang tagorong man gete tagorong mana tang Iesu Kristo. Iesu ke mata tar kale tar niuabatong tenas niguata uasasin. Gisin ahik pah ra uakeluk tar ualatut, doh nas niguatar Ju.

O bureher tamata daan, ahik pah ra uakeluk tenas niguatar Ju. Bo o tamata pukusina nas niguat, doh res ninamana siok. Bo a niguata puk ahik pahe bantong inete uleik uain tang God. Temaeit o tamatasina paka tagorong mana tang Iesu.

Poul ke bolo pono hape paka uangoul per tamatang tagorong man. Gisina paka ualasira tar uelmaluelhir, kara niuah. Gisina paka uangoul keip toro hiarou. O tamatang tagorong mana pako hamhamas, o liliaheir, karo uia. Doho tamatang tagorong mana paka heir katong tunis tar mamang inete-

lik, pako hamhamas, kara ualasira tar niguatang ualatut (Gal 5.22-23). O tamatang tagorong mana ra guata tar niguatar uia tar uauaha tang God. Bo gisin o tamatang tagorong mana puk teeit ra tagorong mana pe tang Iesu. Temaeit nas niguata uaiasin ahik pah teke guata tasisin o tamatang tagorong man.

I lolono toro bolobolo rone:

A meneng uakalahar 1.1-10

Na nitampopokoho Poul ke aposoul pe 1.11-2.21

No Uelhire Uaia God tena hamhamas 3.1-4.31

Na kalekinaler tamatang tagorong man, doh na niuangoul tar nimalar 5.1-6.10

A uadouhinar menen 6.11-18

O Mahar 1

Poul e heir tar niuaha tasir tamat

1 O bolobolo rone o la tur tang Poul ger aposoul. Ahik me tamata ue mo tamata ka uamatoto totoguo, bo a kilonener noguo e la tur tang Iesu Kristo, doh God Tamagigeig geke uatentur tapokis tur tang Iesu toro mat.

²Inngo meso bung uanotoug gera tagorong mana tang Kristo ra uangoul tagu totoguo, inggeim mi heirila tenami niuaha tamiuoumane toro lotunine re moko tar pang uan i Galesia.

³A hamhamas doho hiarouo tamiuoum o la tur tang God Tamagigeig, doh tar Tamata Noman, Iesu Kristo, ⁴rgeke mata teregi niguata uasaeig tena nimalara God a Tamagigeig mare uelkarus tapokis tur tagigeig tar hagar uasaene daan re moko tar kot. ⁵Temaene ri bantoeig tar uatakai tar hangana God tar mamang binakalik. O mana tun.

¹1:4 Gal 2.20

O sioko puk ro Uelhire Uaia

⁶Inggo ku lutarantiehe tun ke uiuir pesioum, karung hiliu tang God geke kilauatoro tamiuoum tena niueldolomo Kristo, doh inggoum kung uakeluk manasa toro giamehe ro uelhire uaia, ⁷ge ahik tun nomana paho uelhire uaia. Bo inggo ku mene puk pare, teeit o gisiameher tamata ra ualelio teremi ninamanoum, kara marang uapalih toro Uelhire Uaia gero nang Kristo.

⁸Bo gete inggeimon ue me anggeloung Heuen re me uelhire tauete mo Uelhire Uaia ge mo giamehe sioko tang geku heirio tamiuoum, inggonor tamaton ue a anggeloung e turung birin tena nimaliana God, kare sa dedengua. ⁹Inggeim king mene baka uoum sioun, doh gine daan inggo u mene uapoul poluk ge me tang sioko re uelhire tauete tamiuoum mo uelhire uaia, doh roon o giamehe sioko tang roeit kung kaleioum sioun, inggonor tamatono ue a anggeloung e turung birin tena nimaliana God, kare sa dedengua.

¹⁰U Doh hape rung namana peoum? O uelhire rone ku meneio, ku men maru uauaha uaia tasir tamata ue maru uauaha uaia tang God? Getu uauaha pukuo tasir tamat, inggo ahikingua pah na tamatang kalekinale Kristo.

Hape ke me kotpokoso pe Poul a aposoul

¹¹Ro bung uanotoug gera tagorong mana tang Kristo, inggo u malara mung ateoum pare, O Uelhire Uaia geku uelhire taueteio sioun tamiuoum, roon ahik pah ke uakotpokosoin me tamat. ¹²Inggo ahik pah ku kale tur tang roono me tamata ue ka ualasilaio tang roon,

ahik tun! Iesu Kristo katongompe ke ualasila uakalahara tang roono totoguo.

¹³W Doh inggoum kung longoro manasa tenag niuangoulo sioun, ku uakeluk uapopokoho tun pe tenas niguatar Ju tar lotu. Doh hape ku guata uasa tun pe tasir tamatang tagorong mana tang God. Karu uedang a tun tar mamantouu uakapa tasisin. ¹⁴X Inggo ku pen tampopokoho tun tar uakeluk tar mamang hagarilikir nas ro bung tubug. Temaene tar hagaroneku ku guataio, inggo ku uoumuoum keip teilingua tenag babeir tamata tenas lotur Ju.

¹⁵Y Bo tar binaka puk halana tinouguo te poho totoguo, God ke umatoto manasa totoguo. Doh tar hamhamasar nanon inggono ke kila to totoguo tar binaka ke umatotoin tar kotpokoso pare, a nana katongo tunon, ¹⁶kare malar e ualasila tar tuna totoguo maru banotong uelhire tauete tono Uelhire Uaiaono tasir gime uan ge ahik paho Ju. Doh tar binakonene inggo ahik pah ku la dangata uain baka me tamat. ¹⁷Doh ahik pono pah ku la baka uoum i Jerusalem tar la banga tasir tamata geka aposoul uakikilanga totoguo, bo ku la ualahurungua kompe i Arebia, song ku la tapokis i Damaskus.

¹⁸Z Ko karuh baka ro touono ro kris-mas, karu lingua taro inggo i Jerusalem tang Pita tar la kale tur me niate tatanon, karu uangoul keip tatanono tar siokor hangaul, kara tolimar marein. ¹⁹Bo ahik pukuo pah ku banga me tang siokor aposoul, te Jems puk manasa ge tahnar Tamata Noman. ²⁰Toro uelhire rone ru boloio tamiuoum, inggo u uamana to tun tar matana God, inggo ahik pahu boho tamiuoum. ²¹A Song i muduhia ku lao toro uan uleik tar pang Siria, kari Silisia. ²²Bo tar binaka pukuo o toto

^s1:7 Apo 15.1,24 ^t1:8 1Ko 16.22 ^u1:10 1Te 2.4 ^v1:11 Mat 16.17

^w1:13 Apo 8.3 ^x1:14 Apo 22.3 ^y1:15 Ais 49.1; Gal 2.7

^z1:18 Apo 9.26-27 ^a1:21 Apo 9.30

tamata gera tagorong mana tang Kristo i Judia ra tele haraha totoguo. ²³ Gisina ka longlongoro ueluatata kompe totoguo pare, “Ter tamata dehene geke turtur tane bak, kare mamantou sioun tagigeig, bo gine daana puk inggon e uelhire tauete toro Uelhire Uaia tar nitagorong manonene ke mamantou bakaion.” ²⁴ Gisina ka longoro tar inetonene ke guatain God totoguo, kara uatakaingua tang God.

O Mahar 2

O aposoul ka malara tang Poul

2^bKo karuh baka ro siokor hangaul, doho toueit ro krismas, song ku la tapokis polukuo i Jerusalem me nu Barnabas, karu kila pono tang Taitus, karing la tokah. ²Inggo ku tapokis puk, teeit God ke kula totoguo tar la, karu la tabila keip puk tasir tamatang uoum keip tar lotu. Inggo ku marang uahire uanaman manate puk tasisina toro Uelhire Uaia rone ru uoto uelhire tauetein tasir tamatang toro gime uan ge ahik paho Ju. Bo inggo puk ku guata uaouo keip tasir tamatang uoum keipisitir tamata uleik, teeit inggo ku namnamana tar kalekinalenine ku guata manasaig, kare ginine daan gete rou. ³Doh gisina ka uauia, kara hik pah ka petutup tang Taitus ger uanotougou ra pokoinir tukunun ge inggono pe a peng gime uan ahik paha peng Ju.

⁴^cA puhonene ke kotpokos, teeit toso bung uanotougigeig gesir bohoboho geke uatagumeis, tar me banga uanomo tar niguata uaiar nang Iesu ke luaka liu tur peono tagigeig tar karabus tenas niualtutur Ju. Gisina ra marang guata kompe tagigeig o karabus. ⁵Bo inggeim puk ahik tun pah king marang longoro tasisin, teeit inggeim king malara toro

Uelhire Uaia gero man ahik paho uapalih o moko dede tamiuoum.

⁶Bo gisine puk ra uakeipis pare, o tamatang uoum keip, ahik pah ka mene me timuhur uelhire taninine ku menenegio, kare ahik pah ku namana baka tasisina hape ra baka pe. Ge God pe ahik pahe kedanga tar tamata hape re baka pe. ⁷^dDoh gisina ka banga sira pare, God ke heir totoguo tar kalekinale tar uelhire tauete toro Uelhire Uaia tasir gime uan ahik paho Ju te misiana kompe ke heir peono tar kalekinale tang Pita tar uelhire tauete toro Uelhire Uaia tasir Ju. ⁸Ge na nitampopokoho pe God ke guata tang Pita tar kalekinale pare, a aposoul i uantinanina tasir Ju te misiana kompe ke guata pono peono totoguo tar kalekinale a aposoul tasir gime uan ahik paho Ju. ⁹Jems mes Pita, doh Jon tera keip o tamatang uoum keip tar lotu gisina ka bang paroko tar siokor kalekinale uleikonene ke heirin God totoguo, temaeit ka uelkuse pang lima keipinguasina tamiraeim me Barnabas tar ualasira pare, inggeim mi kalekinale tokah. Doh inggeim king ueluauiare pare, raeim me Barnabas teira la kalekinale tasir gime uan ahik paho Ju, bo gisina tera la kalekinale tasir Ju. ¹⁰^eGisina ka dangata pono tamiraeim tar siokor puh pare, “Raeim mira namana dede tar poul tasir tiome gera uangoul teil tenas lotusin?” Doh inggo ku uaha tar kalekinaleon, ge a kalekinale peono ter noguung sioun.

Poul ke uelkukur uakalahara to tang Pita i Antiok

¹¹Tar binaka ke me uangoul tagu Pita totoguo i Antiok, inggo ku uelkukur to tun nomana tatanono tar matasir manai, teeit inggono ke guata tar hagar ahik

^b2:1 Apo 15.2 ^c2:4 Gal 1.7; 5.1,13 ^d2:7 Apo 22.21 ^e2:10 Apo 11.29-30

paha kodkodoho tun. ^{12f}Tar binaka ke pokoso uakekenon, inggon e uoto ein tokaha keip tasir gime uan ge ahik paho Ju gera tagorong mana tang Iesu. Bo tar binaka puk ka pokoso mer Ju geke ualatuemeis Jems, Pita ke uanuangua tar ein tokaha keip tasisin. Teeit inggono ke matal, kare sokoro tasisinar Ju, teeit gisina ra tur uapopokoho keip tar niguatang tar lotu tar poko tasir tamat. ¹³O gisiamehe ponor Ju o uanotumiueim ka uakeluk pono tar puhonene ke guatain Pita, ge gisina pe ra kalekinale kokopo kompe, kare babasingua pono Barnabas tasisin.

¹⁴Gine ku banga peo pare, ahikisin pah ra uakeluk uakokodoho tun toro man toro Uelhire Uaia, karu hire to tunumpe tang Pita tar matasisina pare, “Ingga deh ter peng Ju tun! Bo ingga puk ko uangoul sira tunane paha peng gime uan, ahik pah ko uangoul sir a peng Ju. Hape maene ro marang petutupa tasir gime uan ra uakeluk tenas niguatar Ju?”

A nitagorong man ke uaudeil tasir Ju mesir gime uan

¹⁵“O man inggeig o peng Ju ka poho pesieig ahik paho gime uan gera kulais o guata uasa. ^{16g}Bo mung ate kompe, a tamat ahik pahe kodkodoho tola tang God re uakeluk pe tenas ualatur Ju, bo tar nitagorong mana tang Iesu Kristo. Temaeit inggeig pono ki tagorong mana manasa tang Iesu Kristo, kara nitagorong mana tang Kristo ke uakokodoho tagigeig, doh ahik pah ka kulasieig o kodkodoho ki uakeluk pe tar ualatut. Teeit ge ahik pe me tang sioko ra kulain a kodkodoho re uakeluk pe tar ualatut.”

¹⁷Bo hape geti sireig me hagar mari kokodoho to tang God tar nitagorong mana tang Kristo, kara tuparasieig

pare, o tamatang guata haraha tar niguata uasa te Kristo ke uoum keip tar niguatar sa? Ahik nomanampe! ¹⁸Getu uatentur tapokis polukuo tar niguatang tar ualatut geku mamantouo baka uoumig, inggo u ualasira katon-gonguaio a tamatang katego tar ualatut. ¹⁹Ge inggo pe ku mata tar niguatang tar ualatut maru me tua to tang God. ^{20h}Ge inggo pe ka uakusa keipio i rana tang Kristo tar korose, temaeit inggo paka hik manasa paha tua daan, bor nituaene ru uangoul keipio teke heirin Kristo gere uangoul i lolono totoguo, karu uangoul keip kompe tar nitagorong mana tar Tuna God geke malaelhirin-tehe tun totoguo, kare heir tar tuku-nuna totoguo. ²¹Inggo ahik pah ku turung tar mud tena hamhamas God. Gete me tamata ke uakokodohoinir ualatut, a tabo tengkanangua ke mata pe Kristo.

O Mahar 3

I uakeluk tar ualatut ue a nitagorong man

3 Inggoumur Galesia o popouluana tun. Mai ke uatoboul teremi nimananom. Inggoum ke banga tunur matamiau ka uakusa pein Iesu tar korose. ²Inggo u marang dangatangua baka tamiuoum tar siokor puh pare, “Inggoum kung kale tar Iabene Dedeil tang hingiar lele tun?” Tar leleng tar uakeluk tar ualatut ue tar leleng longor, karung tagorong mana toro Uelhire Uaia? ³Hape maene kung popouluanom? Inggoum kung uakekene keip tenami niuangoul tar Iabene Dedeil. Doh gine daan inggoum mung marang uakapa keip katongo manasa teremiuir nitampopokoh? ⁴Doh hapengua tar mamang hagar uakapa giniane ke kot-pokoso tenami niuangouloum? A tabo

tengkanagua ke kotpokoso pe? Ahik pahu namana sira ginin a to tengkana ke kotpokoso pe.

⁵Inngo u marang dangata poluk tamiuoum pare, “Ke heir God tamiuoum tar Iabene Dedeil, kare guata kudul tun tar nitouo tamiuoum, teeit kung uakeluk peoum tena ualatut Moses?” Ahik nonamanpeon! Inggoum kung tagorong mana toro Uelhire Uaia tang Kristo, temaene ke heir God tena Iabene Dedeil, kare guata tar nitou.

⁶ⁱTe misiana kompe ro hire teil pe no bolobolo God tang Abraham pare, “Inggono ke tagorong mana tang God, maene ke kulangua God tatanono a kodkodoh.” ⁷Ter puhunin pakung naman manategioum o tamata gera tagorong mana toro Uelhire Uaia, gisina teso bung tuna Abraham.

⁸^jSioun no uelhire God ka boloin pare, “O gime uan ge ahik paho Ju ka uakodkodoho tois teres nitagorong man.” Karo Uelhire Uaia o uoum teil tar uelhire tauete tang Abraham pare, “Teeit totomua Abraham Inngo u turung guata uaiangua tasir tamata uakapane i kot.”* ⁹Abraham ke tagorong man, kara heirin tar niguata uaia. Temaeit o tamata uakapa tun gera tagorong mana tang Kristo gisina ra guata uaia ponois, teeit a matatang tagorong mana pe Abraham.

¹⁰^kMais ra uakeluk tun tar ualatut, kara haono to taninin tar uakokodoho tasisin, gisin e turung sir uabiris tang God, ge a puh pe a nibol a nang God pare, “Mais ge ahik pah ra uakeluk uakokodoho tun tar haua ka bolo uahi-uain toro bolobolo tar ualatut, gisin e sir uabiris tang God.” ¹¹^lDoh gine daana song ke kalahara tunuono pare, ahik

baka polukur tamata mena hagarang uakeluk tar ualatut mare kula God tatanon a kodkodoh. Teeit no bolobolo God o hire teil pare, “O tamata gera tagorong man, God e kula tasisin o kodkodoh, kara turung tua.” ¹²^mBo tar uakeluk tun tar ualatut, ahik pahe banotong guata me inete tar nitagorong man tang God, ge no bolobolo God pe o hire teil pare, “Gero malara o sir tar nitua ingga pako uakeluk tunungua tar mamang ualatutulik.” ¹³ⁿBo Kristo ke birin mare uelkarus tagigeig ke bir pesieig tar ualatut, ge o bolobolo pe o hire teil pare, “Maiar tamata gera uakusa kaiain i rana toro douk, inggono teke uabirin God.” ¹⁴Kristo ke guata puk pare, mare heir tagigeig tar niguata uaia geke ualapagahain God tang Abraham. Teoneit ra turung heir tur ponoin tang Iesu Kristo tasir gime uan, temaeit tar nitagorong man inggeig i turung kalengua pono tar Iabene Dedeil geke ualapagahain God e heir tagigeig.

Na ualatut God ahik pahe matot e katego tar ualapagaha geke guataion

¹⁵Ro bung uanotoug gera tagorong mana tang Kristo tar uanaman manate tagigeig tar ualapagah inggo u mene ualasinguala ri uoto uangoul peeig. Getura ualapagahar toking tamata me puh, kaura bolongua tara hangas toro bolobol tar tur tane mara hikir inete gekura ualapagahais rasina pah ra kategoin ue ra uanotoin me giniamer inet. ¹⁶^oSioun God ke ualapagaha tang Abraham mer tun. No bolobolo God ahik paho uahire pare, O bung tun ue o bureher tamat. Ahik! O bolobolo roon o kula pare, A tunono ger tang sioko ter Kristo.

*3:8 Bolobolong Uakeken 18.18; 22.18

ⁱ3:6 Uak 15.6 ^j3:8 Uak 12.3; Roum 4.3,16 ^k3:10 Ual 27.26 ^l3:11 Hab 2.4; Gal 2.16 ^m3:12 NKP 18.5 ⁿ3:13 Ual 21.23; Roum 8.3 ^o3:16 Uak 12.7

¹⁷P^O tengkana nogo uelhireo rone pare, A ualapagaha geke guata keipin God tang Abraham, God ahik pahe banotong katego tatanon. Dohi muduhia toro 430 ro krismas God ke heir tar ualatur nagigeig tang Moses. Doha ualatur ahik pahe banotong katego tar ualapagaha geke heirin God sioun tang Abraham. ¹⁸q^{Ge} me inete ke heirin God tang Abraham gere haono to puk tar uakelukunar ualatur, inggon ahik baka poluk pahe haono to tena ualapagaha God. Bo God puk ke ualapagaha tar inetenin e turung heir tang Abraham.

¹⁹r^{Ae} maene ke heir God tar ualatur? God ke heir mare ualafir a huar niguatar sa. Doh inggono ke malar e mokor ualatur e tuka gete kotpokosor keketik ger tuna Abraham geke heirin God tar ualapagah. Doha ualatur ka heir-ihai tasir anggelou, kara me hire taninina tang Moses ger tamatang heir ualatumana tar uelhireo tasir tamat. ²⁰Bo a tamatang heir ualatumana puk tar uelhireo ra malara pukin geta tang torik ura marang ualapagah, bo geta tang sioko pukur tamata re ualapagah, a tamatang heir ualatumana ahik pah ra malarain. Ge God pe a tang siok.

²¹s^{Ue} hape! A ualatur e tur tanengua tar ualapagah ger nang God? Ahik tun! Gete ke banotong heirin ualatur tar nitua tagigeig ri uakeluk pe tar ualaturin inggeig paki kotpokos o tamata kodkodoho tun tar matana God. ²²Bo no bolobolo God o hire teil pare, O tamata uakapa tun ra uangoul teil tar karabus tar niguata uasa. Temaene ter siokon siounur hagar mari kale inggeig tar inete geke ualapagahain God e heir tagigeig, ter tagorong mana dede kompe tang Iesu Kristo.

²³t^{Sioun} tar binaka halanar nitagorong mana te kotpokos a ualatur ke tur tane tun tagigeig misiana pahi uangoul tar karabus ke la tuka tar binaka re la pokoso uakalahara tunur inete ri tagorong manaieig. ²⁴u^{Temaene} a ualatur teke kauk, kare uoum keip tagigeig ke me tuka ke me pokoso pe Kristo, temaeit gine daan tar nitagorong manar eigigeig tang Kristo inggeig o kodkodohongua tar matana God. ²⁵Bo gine daana ke pokoso manasa pe Kristo geke moko teregi nitagorong maneig. Inggeig ahik manasa pahi uangoul teil tena nikaueker ualatur.

A nitagorong mana ke guata tagigeig o bung tuna God

²⁶v^{Temaet} inggoum uakap o bung tuna God, teeit tar nitagorong manar emiuoum tang Iesu Kristo. ²⁷w^{Ge} inggoum peeit ka uahuhioum tar uangoul tokaha keip tang Kristo misianangua pah ka kalelasioum tena nitua Kristo. ²⁸x^{Temaet} gine daan ahik baka poluk mo kahakahar tamat, ahik paho kula pare, o Ju ue o gime uan ue o karabus ue o tamatasine ra uangoul teres nimalar, o bulout ue o kuah, ge inggoum pe a tang sioko tang Iesu Kristo. ²⁹y^{Ge} paro nang Kristo nomanoum, inggoum teso bunguna pono Abraham, karung turung kalengua pono tar inete geke ualapagahain God tatanon.

O Mahar 4

4 Bo tar mene uakalahara uain baka poluk tar hua geku mene uoumuio. A keketik bulout tere turung kale uahiua kalehe tena mamang inetelik taman, bo tar binaka puk re kalan harahon e uan-

p3:17 KT 12.40 q3:18 Roum 4.14 r3:19 Apo 7.38; Roum 5.20

s3:21 Roum 8.2-4 t3:23 Gal 4.3 u3:24 Roum 10.4 v3:26 Jon 1.12

w3:27 Roum 6.3 x3:28 Roum 10.12 y3:29 Roum 4.13

goul sira pare, a karabus, bo a mamang inetelik puk a nanon. ²Tar binaka re keketikon o mahoho ra kaueke tatanon, doh inggon e longoro tasisin e tuka tar binaka ke uamokoin taman.

^{3z}Te misiana pono tar binaka halaneig ti tagorong mana tang Kristo, inggeig ki uangoul pon i kukulebanga tenas nikaueker liouanang gane i kot. ^{4a}Bo tar binaka puk ke uamatotoin God, Inggono ke heiriha tar tun, ke me pohoinir kuah, kare uangoul teil tena nikaueker ualatut ger nasir Ju. ⁵Tar bulaua tapokis tagigeigir tamata ri uangoul teil pe tena nikaueker ualatut mari kotpoko-seig o bung tuna God. ^{6b}Tar ualasira pare, inggoum o bung tuna God, God ke heiriha tar Iabener tun ke me hiku tar kolougigeig ter iabenonene re kula ualeik pare, “Tamoug.” ⁷Temaene inggoum ahik baka poluk pah kung uangoul sira pare, o karabus, bo o bung tuna God. Doh geto uangoul sira pare a tuna God, inggon e turung heir tar mamang inetelik tamiuoum misiana tar tun.

Poul e namanantiehe tun tasir Galesia

⁸Sioun tar binaka rung tele harahoum tang God, inggoum kung uangoul sira pare, o karabus tasir god bohoboh. ⁹Bo gine daana kung iate manasoum tang God ue paku kula pare, God e ate manasa tamiuoum. Ae maeit rung marang tapokis polukoum, karung kotpokoso sira poluk pare, o karabus tasir liouanang kauekane i kot, gisin o manguh, kara hik mes nitampopokoho tagu. Inggoum mung marang uangoul poluk i kukulebanga tasisin. ^{10c}Inggoum mung namnamana kompe tar uakeluk tar niguatang tenas marein uleiking lotur Ju, doh tar timuhur bialok, doh tar uleikir lotu

toro timuh ro krismas. ¹¹Inggou ku namanantiehe, karu sokoro keip tamiuoum, a sa geta ueluelourig nagu kalekinalo geku guataig tamiuoum.

¹²Inggou u dangata uapopokoho tamiuoum ro uanotoug tar uangoul sira totoguo, ge inggo pe misiana puk tamiuoum. Inggoum ahik pah kung guata uasa totoguo. ¹³Inggoum mung namana huara tar binaka ku me pokoso uakikilango tamiuoum, karu hire tauete uakikilango toro Uelhire Uaia tamiuoum, teit inggo rogo mata tar binakon. ¹⁴Doha puhono ke heir tun kompe tamiuoum tar niduh, bo inggoum puk ahik pah kung de, kara hik pah kung marapul tar kaueke totoguo. Bo kung kaueke uaia tun totoguo misiana pah kung uaha uangoul mena angelou God ue te Iesu Kristo uadeil puk. ¹⁵Inggoum kung uahantiehe tun, a hauonene ke guata tamiuoum? Inggou u banotong kula katongoio pare, “Ge pake matoton, inggoum pakung ue golo tar matamiau, karung heir taninina totoguo.” ¹⁶Ue a hau! Gine daan inggo ku kotpokoso manas a uelmatanangua tamiuoum, teit ku hire tun pe toro mana tamiuoum?

¹⁷Doho gisiamer tamatasinasine ra marang reih pukumpela tamiuoum tar uakeluk tasisin, gisin ahik pah ra namana tun tar poul tamiuoum. Gisina ra malara kompe i ueltageiheig, marung hiliuoum totoguo, karung namana kompe tasisina misiana ka namana pesina tamiuoum. ¹⁸Gine daan auia tun tar namanantiehe tar guata dedempela tar niguata uaianin, kara hik pah tar binaka puk ru uangoul keipo tamiuoum. ¹⁹Ro bung tug! Inggou ke mahingio misianangua re uelmahing peinir kuaha gere poh, doha uelmahingon e la moko uatuka totoguo getung kotpokoso sira

^z4:3 Kol 2.20 ^a4:4 Jon 1.14; Roum 1.3

^b4:6 Roum 8.15-17

^c4:10 Roum 14.5; Kol 2.16

bakoum ngohina tang Kristo. ²⁰Inggo u marang uangoul tokaha keip tunumpe tamiuoum, bo u toboul puk hape ru guata pe maru menmene hamas tokaha keip tun tamiuoum.

O ueluatata ka uelhire uatuha tolain tas Hagar me Sera

²¹Inggo u marang dangatangua baka tas mais gera marang uangoul i kukulebanga tar haua re moko teil tar ualatut ger nasir Ju. Inggoum halan tung longoro, kara hik pah kung naman manate hape re kula per ualatutunin? ²²^dGe a nibolo uahiu peono pare, Abraham a tang torikir tun a toking bulout. A tang sioko ke pohoin Hagar na kuahang karabuson, kara tang giamehe ke pohoin Sara tena kuaha tunon. ²³^eA tunon geke pohoin Hagar ger karabus ke kotpokoso tur tena nimalarar tamat. Bor tunon geke pohoin Sara ge na kuaha tunon ke kotpokos tur tena ualapagah God.

²⁴O ueluatata roon o uelhire uaranga pare, A toking kuaha rasina rasine misiana tar torikir ualapagaha geke uel-hoteis. Hagar te misiana tar ualapagaha geke uelhote toin tar siusan i Sainai, doho bung tunono geke pohois o karabus. ²⁵Doh daana pon, inggono misiana tar uan uleik i Jerusalem. Inggonor Jerusalem e moko sira pare, a kuah a karabus menia keip toso bung tun. ²⁶^fBo Sara teka ualasira uatuha tolain tar giameher Jerusalem gere mok i Heuen, inggono e moko sira pare, ka luaka liu turin tar karabus. Inggono te tinagigeig. ²⁷Ge no bolobolo God pe o kula pare.

“Inggar kuaha ger bouh! Kara hik pah ko poho mo bung tum!

O kula ualeik, karo kiring keip tar niuah,

ge ingga pe ahik pah ko hagouo uaelmahing tar poho me keketik.

Ge a kuaha pe geke uangoulung pahen ra

turing burehe liu ro bung tun tar kuaha gere uangoul keip tena bulout.” *Ai-saia 54.1*

²⁸^gDoh inggoum ro uanotoug, inggoum kung kotpokos o bung tuna God tar ualapagah misiana tang Aisak. ²⁹^hDoh inggeigene geke poho keipisieig tena nitampopokohor Iabene Dedeil, teka uaelmahingisieig ra malara pesit ra uakeluk tar ualatut, te misiana kompe sioun tang Aisak geke pohoin tar nitampopokohonor Iabene Dedeil geke uaelmahingin Ismael ger tuna Hagar.

³⁰Bo hape puk ro hire teil pe no bolobolo God? No bolobolo God o kula pare, “Uelueluata liu tang Hagara mer tun, ge a tuna peon ahik pah ura matotong uelpakaha tar mamang inetelik me Aisak gere matoto teilig ra tamas.” ³¹Temaait ro uanotoug, inggeig ahik paho bung tuna Hagar ger kuaha karabus, bo inggeig o bung tuna Sara ge na kuaha tun Abraham.

O Mahar 5

Uangoul keip puk tang Kristo

5 Kristo ke kale tapokis tagigeig ki uakeluk peme tenas ualatutur Ju. Temaene inggoum mung tur uapopokoh, ahik pah mung tangana baka polukusioum pare, mung kotpokos o karabus, karung uakuakeluk tenas ualatutur Ju. Ge inggeig pe ki uangoul uaia manas.

²Ualongor! Inggo Poul u kula pare, getung tanganoum ra pokoigir kapokomiu, e kula siranguar puhono pare, a haua ke guatain Kristo tamiuoum ahik pahe banot e poul

^d4:22 Uak 16.15; 21.2 ^e4:23 Roum 9.7-9 ^f4:26 Hib 12.22; UGO 21.2,10

^g4:28 Uak 15.4-5; Roum 9.7 ^h4:29 Uak 21.9-10; Jon 8.35

tamiuoum. ³Inggo u kula poluk pare, mais uakapa tun ra tangana ra pokoir kapokous, gisina paka uakeluk uakapa tunungua tenas ualatutur Ju. ⁴Maisioumene rung uedanga tar kotpokos o kokodoh tar matana God tar uakeluk uakapa tunungua tenas ualatutur Ju, inggoum kung aha liu katongosioum tang Kristo, karung uangoul i be tar hamhamasar nang God. ⁵Bo inggeigener tamatang tagorong man i uangoul keip tar ninamana pare, God e turung uauia tagigeigene ri kotpokos o kodkodoh. Tena nitampopokohor Iabene Dedeil, inggeig ki tagorong mana tang God, kari uangoul tatanon, inggon e turung kila tagigeig o kodkodoh. ⁶iGe tar binaka pe ri uangoul tokaha keipeig tang Kristo a niguatang poko tar kapokon ue a tabung pok a toking puh rasin a tabo tengkan. Bor puhung uleik tun te pare, inggeig i tagorong mana tang Kristo, kari malauelhirintiehe tun tasir gisiamer tamat.

⁷Sioun, inggoum kung uakeluk uauia tun tena lele Kristo misiana pah kung ualo uakokodoho tun tar ualualo. Bo mai puk ke tur tane tamiuoum maene ahik baka polukoum pah mung uakeluk toro uelhire gero man? Maiono ke reih liu tamiuoum? ⁸A ninamanoneit ahik pahe la tur tang God, ge gine re uoto kila tamiuoum. ⁹jNamana huara kompe gete me siokor puh ahik paha kodkodoh te misiana kompe tar sikir is gere banotong uauout kai toro bereit. ¹⁰kBo inggo u tagorong mana tar Tamata Nomanana pare, inggoum ahik pah mung kale tar giniamer ninaman. U telen-gua maionene re uoto ualelio teremi ninamanoum, bo auia kompe a tamaton, God e turung uabang manate tatanon.

¹¹Ro bung uanotoug mung namana hape ru uangoul peo? Ge paku hirhire tauete teil haraho tasir tamata ra pokoir kapokous, gisina paka hik pah ra guata uasa totoguo. Bo getu hire taueto pare, Iesu Kristo ke mata tar korose, a puhene paka hik pahe turung uakot-pokoso me niduh. Ae maene ra marang guata uasa harahasina totoguo? ¹²Doho tamatasit ka uahagouo uasa tamiuoum tar poko tar kapokomiu, inggo u malara paka uiangua kompe ge pakene ra poko katongoisisin, kara ualaha katongo ponompeis.

¹³lRo bung uanotoug gera tagorong mana tang Kristo, God ke kila tamiuoum tar uangoul sira pare, inggoum ahik pah kung uangoul i kukulebanga tar ualatut, doh ahik pah mung namana pare, mung uauaha teremi nimalauelhir ger sa. Ahik! Inggoum ahik pah mung namana paar. Doh tar uakeluk tun tar nimalauelhir inggoum mung uelpoulesioum. ¹⁴mGe a ualatut uakapa pe e siokor moko teil uakapa tun tar puhung ualatohonene, “O malauelhir toso uanotoum misiana ro malauelhir katongo peia.” ¹⁵Bo mung tagin teil puk! Getung ueluelkoi katongosioum, karung uiluletung katongosioum, karung mantouongua tenami niuangoul.

Uangoul keip tena niguatar Iabene Dedeil

¹⁶Temaait inggo u kula pare, uamaluana tar Iabene Dedeil e uoum keip tenami niuangouloum, kara hik pah mung turung uakeluk tar nimalarang tar niuangoul uasang gane i kot. ¹⁷nGe a haua pe re malarainir niuangoul uasang gane i kot e tur tane tena nimalarar Iabene Dedeil. Doha haua re malarainir Iabene Dedeil e tur tane tena

¹5:6 1Ko 7.19; Gal 6.15 ²5:9 1Ko 5.6 ³5:10 2Ko 11.15; Gal 1.7

⁴5:13 1Pi 2.16 ⁵5:14 NKP 19.18; Roum 13.9 ⁶5:17 Roum 7.15-23

nimalarar niuangoul uasang gane i kot. Rasin a toking uelmatan, e baka siranguaono pare, inggoum ahik pah mung banotong guata tar haua rung marang guatain. ¹⁸Doh getung uakuakelukoum tar Iabene Dedeil, inggoum ahikingua pah mung uangoul teil tena nikaueker ualatut.

A niuangoul uasang gane i kot

¹⁹oInggoum kung iate manasa tar niguatang tar niuangoul uasang gane i kot, a hagarinina teenine: poulil, uraur, guata tar kinale. ²⁰Doha hagarang lotu tasir god bohoboh, bilih, mamangusul, kara uiliatung, uelkoi, geh, namana puk totoum, kara uatago tar toking pain, ²¹kara uelsae, doha hagarang inum uapopouluan, kara mahang kula ueltebeir, doho ura ueltebeir tar doum, kara guata tar hagar uasa ueltebeir. Doh inggo u uatagin tamiuoum misiana ku uatagin uoum pe sioun, gisis ra uangoul sira pare, gisin ahik pah ra banotong kale uahiua tena Nitoia God.

A kukuananar niguat e la tur tar Iabene Dedeil

²²Bor Iabene Dedeil e uoto uakotpokoso tar hagar pare, a nimalar, a niuah, a uelhiarou, a uanguangoul sikor, a hamhamas, a niguata uaia, a tang namana dede, ²³tang kale uahiua katongoin, uakokodoho katongoia. Ahik me puhung ualatut re kula tane tar niguata uaianinanine.

²⁴pDoh mais gesir nang Kristo, ka tina to manasala tar korose tenas niuangoul uasang gane i kot, menia teres nimalarang gane i kot, doh ginina ke mata manas. ²⁵Ge pari uangoul keip manasaieg tar Iabene Dedeil geke heir taregi nituaeig, inggeig i

uakeluk manasangua kompe tar Iabene Dedeil gere uoum keip tagigeig tar mamang hagarilik. ²⁶qInggeig ahik pah uauairana katongosieig, kara hik pah ueluelualahuasieig, kara hik pah ueluelgehesieig.

O Mahar 6

Inggeig i ueuere tar haua ki lebein

6^rRo uanotoug! Getung iateoum pare, me tang siok e guata tar niguata uasa, inggoumeit re uoum keip teilisir Iabene Dedeil mung poulpoul hamas puk tar tamaton mare uakeluk tapokisono tar leler kodkodoh. Doh mung tagin gete uatalaua Satan tamiuoum, karung punga ponoum tar siokonor niguata uasa. ²sUelpoule teremi niduh, ter hagarone, inggoum mung uakeluk tunungua tena ualatoho Kristo. ³Gete me tamat e namana katongoin pare, a tohangan, bo inggono puk ahik me hangan, inggon e bohoboho katongoin.

⁴A tang siok e uakodkodoho katongoin tena nipiles, song re uauaha katongoin, kara hik pahe kodoho tasir gisiamehe ra guata pe. ⁵tGe inggeig pe i huata kahakaha teregigir niduh.

⁶uMais geka ualasisrais tono uelhire God, gisina paka uelpakaha tar bulaua ueleheir me inete uaia tosnosio tang ualasisra tar poul tasisin.

⁷vAhik pah mung bohoboho katongosioum, karung namanang uelsigala tang God. A haua re lebeigir tamata tere turung ueuere tapokis katongompegiou.

⁸Gete me tang siokor tamat e uakeluk to tar nimalarang tar niuangoul uasang gane i kot, a niguata uasanin e uakotpokoso tar niein uasa ger beng. Bo mais geka heir teres niuaha tar Iabene Dedeil, gisina ra turung ueuere tar ni-

^o5:19 1Ko 6.9-10 ^p5:24 Roum 6.6; Kol 3.5 ^q5:26 Pil 2.3 ^r6:1 Mat 18.15

^s6:2 Roum 15.1 ^t6:5 Roum 14.12 ^u6:6 1Ko 9.11,14 ^v6:7 Roum 8.13

tua gere moko dede e la tur tar Iabene Dedeil. ⁹Temaene inggoum ahik pah mung marapula tar guata tar niguata uaia. Geta hikioum pah mung uanua tar guata tar kalekinalenin, a binaka geke uamatotoin e turung kotpokos, karung turung ueueroum tar inete ger uia. ¹⁰Temaene hingiar binaka re tu-parain tagigeig, inggeig paki guata uaia tasir tamata uakap, teesina tunumpesine ro uanotougigeig gera tagorong mana tang Iesu Kristo.

Na uadouhinar meneng ualatut Poul

¹¹Bangampe re ululeik per nibol-bolononine teku bolo keip tun manasa pe inggo tar pang limoug.

¹²Ualongor! O tamatasine ra peng tampopokoho puk tar poko tar kapokomioum, gisina ra pe kompe mara tohangas tar matasir gisiameher tamat. Teene gisina ra sokoro geta guata uasais geta uakelukung siokor kabele puk tena korose Kristo, kara hik paho nipok. ¹³Bo gisis puk ponor nipok, ahik pah ra uakeluk tun pono tar ualatut, bo ra malara puk tamiuoum tar uatohangas tasisisina ka poko pesioum.

¹⁴Bo inggo ahik pahu banotong uatohangana katongoio ue u uatohangana me tang giameher tamata baka poluk, ahik teru uatohangana kompe tonu mata Iesu Kristo tar korose ge nagi Tamata Nomaneig. Tar puhonene, ke guatain Kristo tar korose, a niguatang tar koto ke mata manasane tereg ninamano, doh inggo misiana pah ku mata to manasa tar korose, doh ahik baka poluk pah banotong uakeluk tar niguatang gane i kot. ¹⁵^wAhik uadeil me inete re u-giamehe sioko ge teka pokoinir tamata ue a tabung pok. Bor inete tun te pare, God ke guata tagigeig i kale tar timuhur niuangoul. ¹⁶God e heir toro bal uaia tasisit uakapa ra uakeluk tar inetenanine, kare guata uaia tasisin. Gisina tesir tamata tunur nang God.

¹⁷^xA uadouhina tun, inggo ahik pahu malara me tamata baka poluk tar heir me niduh totoguo, ge inggo pe e moko teilir potono Iesu Kristo tar tukunug.

¹⁸Ro bung uanotoug, na hamhamas nagi Tamata Nomaneig Iesu Kristo e moko teil tamiuoum. O Mana tun.

Epeses

*O bolobolo ke boloin
Poul tasir tamat i Epeses*

O bolobolo tasir Epeses

A tenkanar ninamana toro bolobolo rone te pare, God e marang uamoko toto tar mamang inetelik tang Kristo ter ineteng Heuene uakapa tununin, doha ineteng tar koto mare te Iesu re turung tamatang kaukengua tar mamang inetelik (Epe 1.10). Doh God e marang uatentur toсно tamata katongo mara uangoul taokaha keip tang Kristo, kara uangoul keip toro hiarou.

O uakikilangana ro mahar i lolono toro bolobol, Poul ke mene tar bureher mene tena niueldolomo God toсно tamata uakapa tun Kristo tar uangoul toto tokah, kara kotpokos a siokon siounur toto tamata tena kalekinale Iesu, God ke kale tapokis tasir tamat, kare heir tar Iabena Dedeil ter uaporokor nanono tasisina pare, inggon e turung guata tar mamang inetelikir uia tasisina misiana ke ualapagaha pe (Epe 1.14). Toro mahar uatorikina ro bolobol Poul e hire tasir tamatang tagorong mana ra uangoul tokaha keip pe tang Kristo, temaeit gisina paka ueluaie tun, kara uakeluk tena niguata God.

Toro bolobolo rone, Poul e uelhire uranga tar ualasira uakalahara tasir tamata pare, gisina ra uangoul tohaka keip tun tang Kristo, doh ka kotpokos a tang siok. Inggon ke kula pare, no tamata God misiana pah ter tukunun, doh Kristo tero lunon (Epe 4.1-16). Doh no tamata God misiana pono paha um doh Kristo tero uakikilangana ro turunar umon (Epe 2.19-22). Doh no tamata

God misiana tar kuah, doh Kristo tena buloutur kuahon (Epe 5.22-32). Toro bolobolo roon, i bang huara uaia tununguaeig tar inete uaia re marang guataig God toсно tamat.

O Mahar

Poul e heir tar niuaha tasir tamat

1^yInggo Poul, tena nimalara God ku kotpokoso na aposoul Iesu Kristo, inggo ku bolo toro bolobolo rone toсно tamata God i Epeses gera tagorong mana dede keip tun tar kolous, kara uangoul tokaha keip tang Iesu Kristo.

²Inggo u lotu tang God tamagigeig, doh Iesu Kristo nagi Tamata Nomaieig tar heir tamiuoum tar hamhamas, doh toro hiarou.

A niuaha uleik e la tur tang Kristo

³Inggeig i uatakai tun tang God ge Tamana Iesu Kristo ge nagi Godeig, teeit o nang Kristo peeig, inggono ke guata uaiaantiehengua tagigeig tar mamang inete uaialiking Heuen tar poul tar iabeigigeig. ⁴aGitiempe halana haraha per koto ta touoin, God ke uamatoto keip tanik manasa tagigeig tang Kristo tar kotpokos o nanon, karo dedeil, ahik me puh ra tohotolain tagigeig tena nibangon. Teeit ter enonor nimalaelhir, ⁵bGod ke namana uakikilanga keip tanik tang Iesu Kristo e turung uelurarur tagigeig o bung tuna tun. Teeit tar puh ke guatain Iesu Kristo tagigeig. God ke guata pare, teeit a puhon e uauaha tatanon, doh na nimalara katongon.

⁶Mari uatakaieig tena uinatoro God tar hamhamas menia tar nipoul, geka heirheir pukig tagigeig, teeit tar haua ke guata keipiono tar Tun tagigeig gere moko tun na nimalaelhirion. ⁷cDoh

^y1:1 Apo 18.19-21; 19.1 ^z1:3 Epe 2.6
^c1:7 Epe 2.7; Kol 1.14

^a1:4 Jon 15.16 ^b1:5 Jon 1.12

teeit ri uangoul tokaha keip pe inggeig tang Kristo, inggono ke bulaua tapokis keipingua tagigeig toro deuatinginar Tun tar kusa luara teregi niguata uasaeig. ⁸Tar hagarionene inggono ke ualasira tagigeig tena hamhamas a uleikintiehe tun, teeit re naman manate tun peono tagigeig, kare ate uaia tun a hauar uia tagigeig tar mamang binakalik.

⁹dGod ke hire manasa tagigeig tar tengkanar puh geke mokmoko uaou ke heir peha tang Kristo, a ninamanono ke namana tanikampeono sioununtiehe tun. ¹⁰eDoha tengkana te gine, maeit tar binaka tun, ka uamatotoin, inggon e turung uamoko toto tar mamang inetelik i kukulebang tena nikauke Kristo, a mamang ineteliking Heuen dohi kot, doh Kristo e turung uangoul ter tamata uleik tar mamang inetelikininanine.

¹¹fGod e uoto uakeluk tena nimalar, doh na ninamana katong, kare guata tar mamang inetelik e kotpokos. Sioununtiehe tun, tena nimalaron, inggono ke uamatoto tagigeig tar uangoul uanono keip tang Kristo, kari kotpokoso no tamata tunuon. ¹²A tengkana maene ke guata God pare, mare inggeimener Ju king tagorong mana teil uakikilanga tang Kristo mi guata tasir tamata mara uatakai tang God, teeit na uiniatoron a i rana uainintiehe tun.

¹³Doh gine daan inggoum kung longoro manasa pon toro mana toro Uelhire Uaia tang God ke uelkarus pe tamiuoum. Doh tar binaka kung tagorong manaoum tang Kristo, inggono ke uamatoto sioko tamiuoum, o nan, kare heir tar Iabena Dedeil ter uaparoko geke ualapagahaiono sioun. ¹⁴gInggeig ki kale manasa tar Iabena Dedeil tero buk geke buk tanein tagigeig, temaene inggeig i ate,

i muduhia inggeig i turung kale pono me giniamer mamang inetelikir uia ke ualapagahaig God tar heir tosno tamat. Inggeig i pepe uangoul tar inetenin tar binaka re bulaua tapokis God tagigeig. Gine ter giameher tengkana maene ri uatakaieig tena uiniatoron.

Na lotu Poul tasir Epeses

¹⁵Ter tengkanonene, maene e uakekene tur tar binaka ku longoro uakekeno teremi nitagorong manoumur popokoho pe tar Tamata Noman, Iesu Kristo, doh teremi nimalauelhiroum tasir tamata uakapar nang God, ¹⁶inggo ahik pah ku peng uanua baka tar uaha tang God tamiuoum, ku uoto lotu dedempe tamiuoum, ¹⁷hkaru uoto dangata tang God tamagigeig ger uleik na uiniator ge na God Iesu Kristo nagI Tamata Noman eig Iesu Kristo, e heir tamiuoum tar Iabena Dedeil gere uanamang manate, kare uakalahara tamiuoum mai tun God marung ate uaia tunoum tatanon. ¹⁸Inggo u lotu pon mare uakalahara God teremi ninamanoum marung banotong bang paroko inggoum tar ineter uia tun geke kila uelhiriono tamiuoum tar kale tar ineteninanine rung tagorong mana teiligioum. Te marung ate uaiaoum tar ineteninanine a i ranantiehe tun geri turung kale uahuasieigene no tamaton.

¹⁹iInggo u lotu pono marung uakekene manasoum tar naman manate tena nitampopokohonono ger uleikintiehe uain tar mamang inetelik gere kalekinale i lolono tagigeigene ri tagorong man. Ter siokono komper nitampopokohonene, ²⁰jke uatentur tur tang Kristo toro mat, kare uatabila tatanono tar pang mua i Heuen.

^d1:9 Roum 16.25 ^e1:10 Kol 1.16,20 ^f1:11 Roum 8.28-29

^g1:14 2Ko 1.22 ^h1:17 Kol 1.9 ⁱ1:19 Kol 1.11

^j1:20 Ker 110.1; 2Ko 13.4; Kol 2.12

²¹^kDoh inggon e uangoul tun i ranahia toro mamang nitampopokoholik tasir iabenesine ue tar nitampopokohon tasir liouana uakapa tun. A hanganon a i rana tar hangasir tamata uleiking daan, doh git ponompela i uoum. ²²^lGod ke uamoko tar mamang inetelik i kukulebanga tar kekena Kristo, kare guata tatanon tero lunar mamang inetelik tar sios, kare uangoul sir o lunar sios. ²³^mDoha sios ter tukununon, inggon a uoun tang Kristo gere uangoul teil toro mamang inetelik, doh tar mamang buturulik.

O Mahar

A nitua i lolono tang Iesu Kristo

2ⁿSioun inggoum, kung uoto uangoul sirame tasir tamatasitier mat, teeit kung mahang longoro pe tang God, karung guata tar niguata uasa. ²^oTar binakon, inggoum kung uakeluk tar mamang niguata uasalikir nanar kot, karung uakeluk tang Satan ger tamata uleiking tasir iabenesine gera uangoul i ran. Inggono ter iabene gere kalekinale i lolono tasir tamata gesir mahang longoro tang God. ³^pO mana noman, inggeig pono ki siokor uangoul sira uakapa pare, ki uakeluk to pe tar nimalara uasan tar tukunun, doh na ninaman. Inggeig ki uangoul teilingua ponompe tena nimaliana God ter siokono sira puk tasir tamata uakap.

⁴⁻⁵^qBo teene kompe tena nimalaelhir God tagigeig a uleik tun ger uoun tar niueldolom, ke uatua keip pe tagigeig tang Kristo gitiempe ki mata baka pe inggeig tar niguata uasa. Tena nimalaelhiron menia tar niueldolom inggeig ka uelka-

rususieig. ⁶^rDoh God ke uatentur keip tapokis tagigeig tang Kristo, kara uatabila tagusieig tang Iesu Kristo tono tabtabil i Heuen. ⁷Inggono ke guata pare, mare gitila i uoum, inggon e ualasira hape re uleik tun pe na nimalaelhir menia tar niueldolom ke guata uaia pe tagigeig tang Kristo.

⁸Ge tena nimalaelhir pe God menia tar niueldolom, inggoum ka uelkarus keipisoum tar nitagorong man. Inggon ahik paha inete kung guata katongosoum. Ahik, inggono ke heirheir pukin God tamiuoum, ⁹ahik paha bulauanar kalekinale kung tuhagioum, temaene ahik me tamata re uasalain. ¹⁰^tGe tang Iesu Kristo pe, God ke guata tagigeig ki kotpokos o timuhur tamat, tar tuha tar kalekinale uaia geke kaleuatoro tanikagion tagigeig tar guat.

Kristo ke uakapa tar niguatang uelmatan, kara torikir pang tamata kura kotpokos a tang siok

¹¹Temaait inggoum mu namana uanonoumeit, kung kotpokoso tur pe tasir gime uan gera kilais, “o tabung pok,” tera kila per Ju gera kila katongois pare, “o nipok.” Gisina ra kula pare, teeit o nipoko pe, bo a puh pukuonener pok ra uoto guata pukinir tamat, dohe uapalih puk tasir tamat i kalaharahia. ¹²^uMu namana uanon, inggoum kung uangoul uairehe tang Kristo, kara aha liu turusoum tasir Israel, doh inggoum o gime uan tar uelhote geke guata keipin God tasir Israel, kara hik me inete uaia kung tagorong mana uatuhain, doh God tabo teilin tenami niuangouloumane tar kot. ¹³^vBo gine puk daana tang Iesu Kristo,

^k1:21 Kol 1.16; 2.10 ^l1:22 Ker 8.6

^m1:23 Roum 12.5; Epe 4.10,15; Kol 1.18 ⁿ2:1 Kol 1.21; 2.13 ^o2:2 Kol 3.7; Tai 3.3 ^p2:3 Kol 3.6 ^q2:4-5 Roum 6.11-13 ^r2:6 Kol 2.12 ^s2:9 1Ko 1.29-31; 2Ti 1.9 ^t2:10 Tai 2.14 ^u2:12 Roum 9.4; Kol 1.21 ^v2:13 Kol 1.20

inggoumene kung uangoul uairehe baka sioun, ka ueliu uahuhut keip manasasioum toro deuatingina Kristo.

¹⁴wGe Kristo katongo pe te nogio hiarouieg, ke uakotpokoso pe toro uelhiarou i uantinana tamiueimir Ju, doh tamiuoumur gime uan, ke kale toto pe tagigeig pare, i kotpokos a tang siok. Inggono ke dura uahua keip tar pantuing uelsae geke uatur pakaha tagigeig, ¹⁵x^ttar tukunun, inggono ke uakapa keipingua tenas ualatur Ju geke aha liu tasir gime uan. A tengkana maene ke guatono pare, mare uakotpokoso tar torikir toto tamat ura kotpokos a tang siok tang Kristo, kare uakotpokosongua toro hiarou. ¹⁶yDoh tar siokon siounur tukununonene, Kristo ke uauiliodout tapokis tar toking toto tamata tang God ke mata pe tar korose, kare umatengua tar niguatang uelsae geke moko sioun. ¹⁷zKristo ke me uelhire tauete toro Uelhire Uaia ro nana ro hiarouo tamiuoumur gime uan gekung uairehe tatanon, doho hiarouo tamiueimir Ju gering uahuhut tang God. ¹⁸Ge i lolono pe tatanon, inggeimir Ju, doh inggoumur tamatang gime uan i siokor banotong la tang God Tamagigeig tar siokon siounur Iabena Dedeil.

Inggeig uakapar tamatang tagorong man teno uma tun God

¹⁹aTemaene inggoum ahik baka poluk paho tamatasitier pokos ue o tamatang gime uan. Ahik! Inggoum o matinar nang God menia keip tasir tamata uakapasitir nang God, doh mu uangoul o matmatame tena umon, ²⁰bkarung kotpokos a maharanar um ger nituha uapon a tagir tasir aposoul, doho propet, doh

Iesu Kristo katkatongo tero uakikilangana ro tagir. ²¹cTeono tere kusa uanono tokaha tar udeilinear um, kare uahua tatanon e kotpokos a uma dedeilir nana Tamata Noman. ²²dDoh tang Kristo, inggoum pono ka tuha tokahalasioum marung la kotpokoso tar butur, re uangoulur Iabena God.

O Mahar

Na kalekinale Poul tasir gime uan ahik paho Ju

3^eTemaet inggo, Poul, u lotu tang God tamiuoum. Inngo u uangoul tar uih teeit tar kalekinale ke heirin Iesu Kristo totoguo tar guata tar uelhire tauete toro Uelhire Uaia tamiuoumur gime uan. ²fInggoum kung longoro manasa ke heir pe God totoguo tar kalekinale uleikene tar uelhire tauete tena nimalaelhir God tamiuoum. ³gTerpuhonene ku uahire baka uoumo i lolono toro bolobolo rone, God katongompe ke uakalahar tar puhener ouiouo totoguo. ⁴Gitie getung timanoum, inggoum mu turung bang paroko hape ru naman manate peo toro uelhire uaouo ro nang Kristo. ⁵Sioun a puhon a tabung uakalahara tasir tamatang tar uakikilangana binak, bo gine puk daan, a Iabena Dedeil ke ualasira uakalahara to tosono tamata God geke umatotois o aposoul, doho propet. ⁶hDoh gine ter puhung uelhire geke ouiou, inggoumur gime uan mu turung kale pono tar mamang inetelik ke ualagahaig God tamiueimir Ju tang Iesu Kristo, karung kotpokoso sira pare, a tang siok doha siokor tukununa keip tamiueimir Ju toro Uelhire Uaia. ⁷iTar nipoulur nang God ger hamhamas

w2:14 1Ko 12.13 x2:15 Kol 2.14 y2:16 Sek 9.10; Kol 1.20,22

z2:17 Ais 57.19 a2:19 Epe 3.6 b2:20 1Ko 3.11 c2:21 1Ko 3.16

d2:22 1Pi 2.5 e3:1 Pil 1.7,13 f3:2 Kol 1.25 g3:3 Epe 1.9-10; Kol 1.26

h3:6 Epe 2.13,16-19 i3:7 Kol 1.25

geke heirheir pukin totoguo doh na nitampopokoh uleik, God ke uamatoto totoguo na tamatang kalekinale tar la uelhire tauete toro Uelhire Uaia.

^{8j}O mana noman, inggo ter uadouhinar tamata toсно tamata uakapa God, bo a kalekinale uleik pukuonene ka heirin totoguo tar uelhire tauete tasir tamatang gime uan tar mamang inete uaialikir nang Kristo. A inetenin a uleik uain, ahikieigir tamata pahi banotong naman manate. ⁹Inggo ka uamatotoio tar uakalahara tasir tamata uakapa hape re kalekinale pe God tena ninaman. God geke touo tar mamang inetelik, kare totouaouome tar ninamanon toro kikelangan.

¹⁰Na ninamanono ter kalekinale ke tuhaiono tena sios, inggon e turung ualasira tasir mamang iaben, doho liouana tampopokohosis i rana pare, na ninamana God auia uain tar mamang hagarilik. ¹¹Sioununtieh tun tar binaka halana God te touo tar kot, inggono ke kaleuatoro manasame tar ninamanon, doh gine daan inggono ke guata to manasa tananin tena kalekinale Iesu Kristo nagi Tamata Nomaneg.

^{12k}Teeit, tang Kristo, doh tar nitagorong mana tatanon, temaeit a takapukanguampe tagigeig tar la tang God menia keip tar niongol, kara hik pahi sokor. ¹³Temaeit ru dangatangua inggo tamiuoum, ahik tun pah mung namnamana uaburburehe tar niduh ru huatagio, ahik, inggoum pakung uah, karung tampopokoh, teeit a puhon e turung poul tamiuoum.

Na lotu Poul tasir Epeses

¹⁴Temaene tar binaka ru namana inggo tar inete uleikionene ke guatain God, inggo u hatup, karu lotu tang ta-

mou, ¹⁵geke touo tasir mamang matina uakapa tun i Heuene dohi kot. ¹⁶Inggo u lotu tang God mare heiriono tena uinatoro uleik ger uoun tar bureher inet, tar uatampopokoho keip tun i lolono tamiuoum tena Iabena Dedeil. ¹⁷Inggo u lotu tang God mare uangoul tun Kristo i lolono tamiuoum rung tagorong mana pe tatanon, doh marung tur uanonum tena nimalaelhir God, ¹⁸marung banotong naman manate menia keip toсно tamata uakapa God, hape re uleik pe na nimalaelhir Kristo, doh hape re barah pe, doh hape re i rana pe, doh hape re uailolono pe ¹⁹na nimalaelhiron gere matoto leue tagigeig tar naman manate, doh inggo u lotu marung kale uahiuatunoum tar mamang niguatalikir nang God.

²⁰⁻²¹Doh tang God gere banotong guat, kare heir uaburehentiehe tun tar mamang inetelik ri dangatageig ue ri namanaig tena nitampopokohon gere kalekinale i uantinanina tagigeig, a uatakai e la tur tar sios e la tang God, doh tang Iesu Kristo tar mamang binakalik. O man.

O Mahar

Inggeigir tamatang tagorong man ter tukununa Kristo

4^mTemaene, inggo Poul u uangoul tar karabus, teene ru uoto guata pe tena kalekinaler Tamata Noman. Inggo u kula uapopokoho tamiuoum tar uangoul keip tar niuangoulur kodkodoho tar nikilene kung kalein. ²ⁿMu kale uahiuasioum tasir gisiameh, karung hamhamas tasisin. Inggoum ahik pah mu nimaliana ualahur tar binaka ra guata uasasina tamiuoum, bo mu uelmalaelhiresioum, karung huata bolongur tar niduh ra

^j3:8 1Ko 15.9-10 ^k3:12 Jon 14.6; Roum 5.2

^l3:17 Jon 14.23; Kol 1.23; 2.7 ^m4:1 Kol 1.10 ⁿ4:2 Kol 3.12-13

heirig tatamiu. ³oPentampopokoho tar kaueke uanono tar puhene ke kale toto per Iabena Dedeil tamiuoum toro hiaroua misiana paho uoho gero rokoso tokaha tamiuoum.

⁴Doh inggeig a siokon sioun pukur tukunun, kara siokor Iaben ter siokono sira kompe ka kila pesioum tar siokor uiniatoreit i uoum. ⁵A tang sioko pukur Tamata Noman, kara siokor nitagorong man, kara siokor uahuu. ⁶pKara tang siokon siounur God Tamagigeig uakap gere i rana tagigeig uakap, dohe kalekinale i uantinanina tagigeig uakap, dohe uangoul i lolono tagigeig uakap. ⁷qBo tagigeig uakapa pukur tang siok tang siok, a inete uaia a niheir pakaha manasa ke uamatoto pe Kristo. ⁸rTemaene re kular puh tono buk God gero dedeil pare, “Tar binaka ke la kai taro inggon i ran, inggono ke uoum keip tasir karabus ka la tagu tatanon,

kare heir tosno tamata tar inete uaia.”†
⁹sA puhene “Ke la kai,” e ualasira tagigeig pare, Kristo ahik pah ke la kai puk. Ahik! Uakikilangan inggono ke la uahuahane i kot. ¹⁰Ter tang siokon siounumpeonene ke la uahuahana, doh teono kompeonene ke la kai, kare ir anahiangua tar mamang inetelik i ran mare ualasira tena nitampopokoho uleik tar mamang inetelik.

¹¹tInggono te geke heir tar inete uaia tasir tamat. Tasir gisiamah, inggono ke heir tar kalekinale tar kotpokoso pare, o aposoul, o propet, o tamatang keip ualatumana toro Uelhire Uaia, o tamatang kaueke tasir tamatang tagorong man, doho tang ualasis, ¹²tar kaleuato tasir toto tamatang tagorong manar nang God tar tuha tar kalekinale tar uatam-

popokoho tasir toto tamatang tagorong man mare huakair tukununa Kristo, ¹³ue tuka geti la uatukeig tar uiliodout tokah tar nitagorong man, doh teregi niate inggeig tar Tuna God, kari namanang mahoh i kotpokoso o udeil sira tang Kristo tar ninaman, kara siokonon niguatar nanon.

¹⁴Temaait inggeig ahik paho keketik baka poluk gere puahpuaha uelapokiseis toro butuan, dohe uu uelapokiseis tar mamang rom misiana tar niualasis ger nasir tamata sis ra marang uelour tagigeig tenas boh gera tutig. ¹⁵vBo paki uelhire keip puk toro man, doha nimalauelhir mari kotpokoso sirangua tang Kristo tar mamang inetelik teono pe tero lunar sios. ¹⁶Tena nikauekon, a tukununa uakap e ueltuman tokaha keip uaia tun. Gitie re kalekinale kahakaha per mahmaharan ter nanar kalekinale, ginin e poul tar giniamaher maharan tar hua, maait re tagalar udeilinear tukunun, kare uoum tar nimalauelhir.

A niuangoulur pensioum kara niuangoulur timuh

¹⁷wTar hanganar Tamata Noman, inggo u kula uapopokoho pare, ahik tun pah mu uangoul sira baka poluk tenas niuangoulur tamata gera tele tang God, kara tukar res ninaman, ¹⁸doho mahang naman manate, kara hik pah ra ate me inet, teeit ra de pesin tar longoro tang God. Temaene nas niuangoulusin e uairehe tununguampe tang God. ¹⁹Gisin ahik mes nihagouong matal, kara uahue katongois tar guata pukom pela tar haua re malauelhirigir nimalara uasan tar tukunun, kara guata tar mamang

†4:8 Bolobolong Ker 68.18

o4:3 Kol 3.14-15 p4:6 1Ko 12.6 q4:7 Roum 12.3,6 r4:8 Ker 68.18

s4:9 Jon 3.13 t4:11 1Ko 12.28 u4:13 Kol 1.28 v4:15 Kol 1.18; 2.19

w4:17 Roum 1.21; 1Pi 1.14

niguatang ura ueltebeir, kara hik pah ra banotong uakenua tar niguata uasanin.

²⁰Bo ahik pukuono pah te pagiare ka ualasira pesioum tang Kristo. ²¹O mana tun, teeit inggoum ka ualasira manasasioum tena niuangoulon, karung ate tar niualasir ger man e la tur tang Kristo. ²²^xInggoum ka ualasirasioum tar kaleliu tenami niuangoulur pensioum geke mamantouoigir nimalara uasan tar tukunum geke uelour tamiuoum. ²³^yInggoum ka ualasirasioum tar Iabena Dedeil tere uapalih tar iabeimiuoum marung uakekenoum tar namana me timuhur hagar, ²⁴^zkarung hiku tar timuhur niuangoulur ger nitou sira tang God tar niuangoulur man, kara kodkodoh, kara dedeil.

²⁵^aTemaene inggoum uakapa mu luara tar boh, karung “uelueme keip pukusioum toro man,”[‡]

ge inggeig pe i siokor uangoul teil tar siokon siounur tukunun.

²⁶^b“Getung nimalianoum, kaueke uanonosioum getung guata tar niguata uasa,”[¶]

ahik pah mu uamaluan tar pisar e hu keip teremi nimalianoum,

²⁷kara hik pah mu heir mena hagar Satan tar lekame.

²⁸A tamata ger ueuenau, e uakenua manasa tar uenau, bo e kalekinale keip manasa tar limana katongo tar tuha tar kalekinale mare heiriono tena inete tasisit ra malara me nipoul.

²⁹^cAhik pah mu mene keip tar meneniner matasa ue mu soul, bo mu mene kompe tar meneniner uia, karung meneng poul tasir tamat mare banotong poul nami menoum tasisit ra longor,

kare uahua teres nitagorong manasin. ³⁰^dKara hik pah mu uaueldolomo tena Iabena Dedeil God, ge inggono pe teke uamatoto tamiuoum o nan, dohe me turung bulaua tapokis uakapa tun tamiuoum tar uadouhinar marein.

³¹^eKale liu manasa tar niguatang mangusul, kara nimalian, kara louar, kara uiliatang, kara mener boh tar marang mamantouo puk tar tang giameh, kara mamang niguata uasalikinitie re mamantou tar tamat. ³²^fBo mu uelguate uaia pukumpesioum, karung ueldolomesioum, karung uelkuse luara teremi niguata uasa misiana tang God ke kusa luara pe teremi niguata uasaoum tang Kristo.

O Mahar

Uangoul tar luh

5^gGitie o bung tuna God peoum gere malauelhirintiehe tunis, mu uedanganga tar uangoul sira tatanon. ²^hKarung uakeluk tar niguatang malauelhir misiana ke malauelhirintiehe tun pe Kristo tagigeig, kare heir katongoin tar poul tagigeig misiana tar uahungeitier muhuia re la uauaha tang God.

³Bo i uantinanina puk tamiuoum, paka hik tun me sikir niguatang ura ueltebeir ue me niguatantier ualamatal ue mu pe mu gono tar bureher inet. Ahik pah mu uamaluan me puh sira pare, ra tohotolain tamiuoum, ge inggoum pe no tamata God gesir dedeil. ⁴Inggoum ahik pah mu ueluatata tar ueluatataniner sa ue mu mene tenas mener popouluan

[‡]4:25 Bolobolo Sekaraia 8.16

[¶]4:26 Bolobolong Ker 4.4

^x4:22 Roum 8.13; Kol 3.9 ^y4:23 Roum 12.2 ^z4:24 Uak 1.26; Kol 3.10

^a4:25 Sek 8.16; Kol 3.8-9 ^b4:26 Ker 4.4; Jas 1.19-20

^c4:29 Kol 4.6 ^d4:30 Ais 63.10; Epe 1.13-14; 1Te 5.19 ^e4:31 Kol 3.8 ^f4:32 Mat 6.14; 18.22-35; Kol 3.12-13 ^g5:1 Mat 5.48 ^h5:2 KT 29.18; Hib 10.10

ue mu uelualeng tar ualengeniner sa. A niguatanin ahik tun paha uia tagigeig tar guat. Ahik, bo pakung heir puk tar ni-uaha tang God ke poul pe tamiuoum. ⁵ⁱGe inggoum pe mu ate, o tamatasitier uoto ur ue ahik paho delauan ue ra pe ra gono tar bureher inet, ahik pah ra banotong lekala tar kale uahiua tar inete uaia tena Nitoia Kristo me God. ^{6j}Ahik pah mu uamaluana mo tamata ra uelour keip tamiuoum tar namana pare, a niguata uasaninanine a iinetilik puk, ge na nimaliana uleik pe God e pono tasisit ra mahang longoro tatanon. ⁷Temaene ahikioum pah mu matakaluana keip tasir hai tamata sira gera guata tar hagarinin.

^{8k}Ge sioun pe nami niuangouloum ke uoun tun tar kitup, bo daan, inggoum kung uoun manasa tar luh e la tur tar Tamata Noman, temaene nami nipile-soum pake ualasira tun. ⁹Ge a luh peeit re moko teil tamiuoum e uakotpokoso puk tar huar uia, doha huar kodkodoh, kara ineter man.

¹⁰Uedanganga sira tar hua re uauaha tar Tamata Noman. ¹¹Ahik pah mu matakaluana keip tasir tamata gera uoto guata tar niguatang tar kitup. A niguatanin a tabo tengkan. Bo mu hire luaka puk tasir tamata pare, a sa per niguatanin. ¹²Ge a ualamatala per mene tar niguata ra guata uaouoinir tamat gesir mahang longor. ^{13l}Bo tar binaka puk re bala uakalaharar luh tananin, a luh e uakalahara tunungua hape re matasa pelanin. ^{14m}Ge ia pe re balahiar luh e ualasira tauete tar mamang inetelik. Temaene re kular puh pare, “Inggar tamata ro hohou, o gulet, o tentur tur tar keu

mare heir Kristo totomua tar luh.”

¹⁵ⁿTemaene kaueke uaia tun hape rung uangoul pe, ahik pah mu uan-goul sira tasir popouluan, bo mu uan-goul sira tasir naman manate, ¹⁶karung guata uaia dede tar mamang inetelik tar binakalanine, ahik pah mu ueluelour tar binaka geke uoun per mareninin tar niguata uasa. ¹⁷Temaeit ahikioum pah mu guatang tuktukar, bo mu naman manate tena nimalarar Tamata Noman.

^{18o}Ahik pah mu sipak tar bino gere uapopouluana, kare uaroke puk tamiuoum. Bo mu uauoun pukusioum tar Iabena Dedeil. ^{19p}Tar binaka rung uelueluatatoum, kale tar uelhire re moko teil toro Bukung Kereker ue tar kerekereng lotu ue tar kerekere geke heir-gir Iabena Dedeil. Mu guata, karung kere keip tar kerekere tar koloumiu tar Tamata Noman. ^{20q}Doh tar mamang binakalik inggoum mu uauaha uaia dede tang God tamagigeig tar mamang inetelik tar hangana nagi Tamata Nomaneig Iesu Kristo.

O kuahar le mesnosio bulout

^{21r}Mu ueltadesioum ge inggoum pe mu ueltada tang Kristo. ^{22s}Inggoumur kuahasisir le, mu ueltada tosnomio bulout misiana rung ueltada pe tar Tamata Noman. ^{23t}Ter hauon, a bulout ter tamatang kaueke tena kuah te misiana puk tang Kristo tero luna per toto tamatang tagorong man ger tuku-nunon. Doh Kristo ter tamatang uelkarus tatanon. ²⁴Temaeit inggoumur kuahar le, mu uangoul i kukulebanga tar nikaueke tosnomio bulout tar mamang inetelik te misiana kompe ra uangoul per

ⁱ5:5 1Ko 6.9-10; Kol 3.5 ^j5:6 Roum 1.18; Kol 2.4,8 ^k5:8 Jon 12.36; Epe 2.13;

Kol 1.13; 1Pi 2.9 ^l5:13 Jon 3.20-21 ^m5:14 Ais 26.19; Roum 13.11

ⁿ5:15 Kol 4.5 ^o5:18 Luk 21.34 ^p5:19 Kol 3.16 ^q5:20 Kol 3.17

^r5:21 1Pi 5.5 ^s5:22 Kol 3.18; 1Pi 3.1 ^t5:23 1Ko 11.3; Epe 1.22

toto tamatang tagorong man i kukulebanga tar nikaueke nang Kristo.

²⁵ ^uDoh tamiuoumur bulout le, mu malauelhirintiehe tun tosnomio kuah misiana tang Kristo re malauelhirintiehe tun pe tosno tamatang tagorong man, kare heir katongo tar tukununa tasir toto tamatang tagotong man ²⁶ ^vkare uadedeil tatanon, ke uahuu keip pe tar kodom, doh tono uelhire. ²⁷ ^wInggono ke guata pare, tar uaturula tar sios tatan mare kotpokosono pare, a mataia tun, ahik me tokotoko ue me mamakit uel-tebeir, bo a delauana tun, kara hik me ineter sa tatan. ²⁸ Ter siokono sir kompe tar hagarionene, o bulout paka malauelhir tosnosio kuah misiana ra malauelhir katongo pe tar tukunus. A bulout gere malauelhir tena kuah, e malauelhir katongoin. ²⁹ Ge ahik pe me tamata re de tar tukunun, bo e malauelhir, kare guata uaia, kare kaueke tatanon misiana tang Kristo re guata uaia pe, kare kaueke tar sios ter tukununon, ³⁰ ge inggeig pe a maharanar tukununon.

³¹ ^xTer tengkanonene ro hire teilin no uelhire God pare, “Temaeit re hiliuir bulout tang tamana doh tinan, kare la uangoul tokaha keip tena kuah doh rasin ura la uangoul sira pare, a tang siok.”[§] ³² ^yA puhung uelhire uaouoninanine a uleik tun, bo inggo u mene ualasira tola tang Kristo mesir tamatang tagorong man. ³³ Bor puhung uelhireon, e lain tamiuoumur bulout kahakah tar malauelhirintiehe tun tosnomio kuah ngohina rung malauelhir katongo pesioum. Doho kuaha uakap paka ueltada tosnosio bulout.

O Mahar

A uelhire ke meneig poull tasir keketik doho tinanan

6 ^zInggoumur keketik, mu longoro tenas uelhire ro tamamiu doho tinamiu geter puh peonor kodkodoho tena nimalauelhirir Tamata Noman. ² ^aUeltada tang tamoum, doh tinoum geter ualatut peono gere moko teilir ualapagah. ³ A ualapagahon e kula pare, “Geto longora tar toking tinoum, nang niuangoula e uia, karo turung uangoul uabarahanguaane tar kot.”^{**}

⁴ ^bDoh inggoumur tamasir keketik, ahik pah mu uualalahua toso bung tumiu, karung uanimaliana tasisin. Ahik, mu ualafir, karung ualatut uaia keip tasisina tar niguatar kodkodoho re malaraigir Tamata Noman.

O tamatang kalkalekinale puk mesnosio tamatang kauek

⁵ ^cDoh tamiuoumur tamatang kalkalekinale puk, mu longoro tosnomio tamata uleik. Karung longoro keip tasisina tar niueltad, kara nisokor, karung kalekinale keip tun toro man misiana rung longoro pe tang Kristo. ⁶ Ahik pah mu longoro puk tasisina tar binaka re mokor matas tamiuoum tar uauaha teres nimalarasin, bo mu longoro sira dede puk pare, o tamatang kalkalekinale puk pe tang Kristo, karung uakeluk tena nimalara God teeit rung malarantiehe tun pe tar guata tena nimalaron. ⁷ Kalekinale keip tar niuaha tar binaka rung tuha tar kalekinale misiana pah mu

§5:31 Bolobolong Uakeken 2.24

**6:3 Bolobolong Kale Tapokis 20.12; Bolobolong Ualatut 5.16

^u5:25 Kol 3.19; 1Pi 3.7 ^v5:26 Tai 3.5 ^w5:27 2Ko 11.2; Kol 1.22

^x5:31 Uak 2.24; Mat 19.5 ^y5:32 UGO 19.7 ^z6:1 Kol 3.20 ^a6:2 Ual 5.16

^b6:4 Ker 78.4; NU 22.6; Kol 3.21 ^c6:5 Kol 3.22-23; Tai 2.9-10; 1Pi 2.18

kalekinale tar Tamata Noman, ahik pah na kalekinaler tamatang gane i kot. ^{8d}Namana uanon, a Tamata Noman e turung heir hahaua pono tasir tamata uakapa tar mamang inete haulikir uia ra guataig, hingiamper tamat, a tamatang kalkalekinale puk ue ahik paha tamatang kalkalekinale puk.

^{9e}Doh inggoumur tamata uleik, mu guata uaia tosnomio tamatang kalkalekinale puk tar siokonor hagar. Ahik pah mu uasokoro tasisin, ge inggoum pe mu ate pare, Inggonenah I heven tenas tamata uleikisin, doha namiuoum pon ginah i Heuen tere uoto bang kedanga tenas niguatar mamang tamat tar siokonor hagar.

Poul e hire hape ra tur tane pein Satan

¹⁰A uadouhin, inggo u marang uakapa keip tenag uelhire pare, mu tur uapopokoho tar Tamata Noman, doh tena nitampopokoho uleikion. ^{11f}Mu kale tar mamang ineteng uiliatungulik geke heirig God marung banotong tur uapopokohoum, karung uasiaua tar mamang niguatang uelour ue a boho gere uoto guata uaouoig Satan. ^{12g}Ge inggeig pe ahik pahi uiliatung keip tasir tamat. Ahik, Inggeig i uiliatung keip tasir iabenesiner tampopokoh, doh tena nitoia Satan, doha mamang nitampopokohon tar kotener kitup, dohi uiliatung keip tasir mamang iabene uasalikisit ra uangoul i ran.

¹³Temaene mu hikuoum tar mamang hikhikung uiliatung geke heirig God marung tanesioum gete kotpokosor binaka uasa, doh tar binaka re kapar uelkoi, inggoum mu tur uanon dedempe. ^{14h}Temaeit, mu tur uanonoum, karung

kaleuato keipisioum toro man misiana toro let ge kung rokok tane keipioum, karung loho tar niguatar kodkodoh, misiana pah nomio hikhiku kapaoum, o ragom tane tar uaruaroumiuoum. ¹⁵ⁱMu kaleuato keipisioum toro hiarouo gero la tur toro Uelhire Uaia misiana paha su tar kekemioum. ¹⁶Doh tar mamang binakalik, tur uanono keip tar nitagorong man, teono ter uatara rung banotong lomoho keipioum tar mamang karkinilik ger niuana keip toro hue gere uamatoig Satan tamiuoum. ^{17j}Mu namanaehe ke uelkarus pe God tamiuoum, doha nimanonono pake moko sira pare, nomio taku kapaoum kung takuin. Doh mu kalkale teil tonu uelhire God misiana toro baenat geke heirinir Iabena Dedeil. ^{18k}Karung lotu keip dede tar Iabena Dedeil tar mamang binakalik tar mamang lotu, doha nidangat. Doh tar binaka rung lotuoum uakeis dede ahik pah mu marapula kout. Karung heir dede menas lotu no tamata uakapa God.

^{19l}Mu poul pono totoguo tar lotu mare hingiar binaka ru uakekeno tar men, God e heir totoguo tar uiar mene ru meneig, karu banotong ongolo tar uelhire tauete toro Uelhire Uaia. O Uelhire Uaia roon te geko ouo bak, bo gine puk daan ko moko uakalahara roon. ^{20m}Ge tero Uelhire Uaia pe roono ru tur keipio, temaene inggo u uangoul tar karabus. Temaeit mu heiroum menag lotuo maru uelhire tauete keipio tar niongol doh hape tun paku guata pe.

Na uadouhinar mene Poul

²¹ⁿTitikus a uanotougigeig tun, doh inggono na tamatang kalekinale uaia tunur Tamata Noman, inggon e turung

^d6:8 2Ko 5.10; Kol 3.24-25 ^e6:9 Roum 2.11; Kol 4.1 ^f6:11 Roum 13.12; 2Ko 10.4 ^g6:12 1Pi 5.8-9 ^h6:14 Ais 11.5; 59.17; 1Te 5.8 ⁱ6:15 Roum 10.15
^j6:17 Hib 4.12 ^k6:18 Luk 18.1; Kol 4.2; 1Te 5.17 ^l6:19 Kol 4.3-4; 2Te 3.1
^m6:20 2Ko 5.20; Plm 9 ⁿ6:21 Apo 20.4; Kol 4.7-8; 2Ti 4.12

uahire tamiuoum tar mamang inetelik marung ate ponoum hape ru uangoul peo, doha hua manasa ru guatain,²² ter tengkanono maeit ru heirimeo tatanono tamiuoum marung ateoum hape ring uangoul pe inggeim, doh mare uatam-popokohono tamiuoum.

²³No hiarouo God, doh na nimalael-hir Iesu Kristo nagi Tamata Nomaneig

menia keip tar nitagorong man e la tami-uoumur uanotoug.

²⁴Na hamhamas God e moko tasir tamata uakapa gera malaelhir tenagi Tamata Nomaneig Iesu Kristo, a nimalaelhir ge ahik pahe banotong kap.

Pilipai

O bolobolo ke heirin Poul tasir tamata gera tagorong mana tang Kristo i Pilipai

O bolobolo tasir Pilipai

Noso bolobolor Pilipai o moko teil i lolono toro Baeboul tar timuhur uel-hote. Poul ke bolo toro bolobolo rone tasir tamatang tagorong man i Pilipai geke uatenturugion (Apo 16.11-40).

Poul e karabus tar binaka ke bolo toro bolobolo rone. Bo ke kalekinale keip uaia pukuono tena binak iuma tar karabus. Inggono ke uahire pono tasir soldia tang Iesu (Pil 1.13). Doh ke uaha teeit o tamata ra ueluatata tang Iesu.

Poul ke mene uapampopokoho tasir tamatang tagorong man i Pilipai tar kalekinale tokah (Pil 1.27). Gisina paka uelmalauehires (Pil 2.1-4). Temaait gisina pake kale uahiuois. Poul ke uahire pono tasisina tonu hamhamas Iesu (Pil 2.5-11). Bo gine puk daan God ke heir tar ueltada uleik tang Iesu.

Poul ke uatagin tasir tamatang tagorong man tasir tamata gera tele tang Iesu (Pil 3.1-4; 3.17-1a). Inggono ke malara tasir tamatang tagorong mana tar tagorong mana dede tang God. Poul katongo ponompe ke marang ate uaia pono tang God (Pil 3.10-11).

Poul ahik pah ke pepe boho pare ke delauana tun uoum (Pil 3.12).

Bo ke ate teil puk pare, God e turung uapalih uakapa tun tagigeig (Pil 3).

Temaait inggeig paki uah (Pil 4.4). Paki guata tar niguatar kodkodoh (Pil 4.8-9).

Doh paki tagorong mana tang God e heir tar inete haua ri malarasieig (Pil 4.10-19).

I lolono toro bolobolo rone:

A meneng uakalahar 1.1-11

Na niuangoul Poul 1.12-26

Resira ninamana Timoti me Epaprodaitus 2.19-30

A uatagin tasir uelmatan, doh a puhur ualabir 3.1-4; 4.9

Poul meso bung kaluanang Pilipai 4.10-20

A uadohinar uelhire 4.21-23

O Mahar 1

Poul e heir tar niuaha tasir tamat

1 ^oInggono, Poul, me Timoti, na tok-ing tamatang kalkalekinale puk Iesu Kristo, raeim kira bolo toro bolobolo rone o lala tamiuoumur tamata uakapar nang Iesu Kristo rung uangoul i Pilipai, menia pono tamiuoumur tamatang kaukauek, doho tamatang kalekinale tasir toto tamatang tagorong man.

²Inggono u dangata tang God tamagigeig mer Tamata Noman, Iesu Kristo ura heir tar hamhamas, karo hiarouo tamiuoum.

Poul e uaha tasir Pilipai, kare lotu tang God mare poul tasisin

³Inggono u uoto heir tar niuaha tang God tar mamang binakalik ru namana huara pe tamiuoum. ⁴Doh tar binaka ru lotu ueleheirio tamiuoum, inggono u uoto lotu keip dede tar niuah, ⁵teene kung poul uaia tun peoum totoguo tar mene tauete toro Uelhire Uaia. Inggoum kung guata paar tar uakikilanganar marein kung tagorong mana pe tang Kristo e me tukene daan. ⁶^pDoh inggono u tagorong mana tun tar puhene pare, God geke uakekene tar guata uaia tun i lolono tamiuoum, e turung guata dedempela e tuka geto la kapa tun roono tar uadouhinar marein re tapokis polukuha Iesu Kristo.

⁷A kodkodoho nomanampe ru namanape peo tamiuoum, teeit ru malaelhirintiehe tun pe tamiuoum, ge inggeig pe i kale tokaha tar nipoulur nang God ger hamhamas, gitiempe ru uangoul peo tar uih ue tar binaka ru uelturut tar tur keip uakalahara toro man tasir uelmatana toro Uelhire Uaia. ⁸Ge God pe e ate hape ru namanantiehe tun peo tar la banga tamiuoum, teeit inggo u malaelhir keip tamiuoum tena nimalaelhir Kristo. ⁹Gine tenag lotuo tamiuoum mare kotpokoso uapopokohontieher niguatang tar uelmalahir tamiuoum tasir gisiamhe rung uangoul pe, doh marung naman manate uaiantiehoun tar huar uia doha huar sa.

¹⁰⁻¹¹Ge inggo pe u malara mu naman manateoum tar huar uiantieh marung uangoul uadedeilisium, karo tabung tohotola e tuka tar binaka re la tapokisiha Iesu Kristo mare na niguata uaia Iesu Kristo gere turung uakotpokosoig e uoun tun tamiuoum mara bangasin, kara uairan, doh ra uatakai tang God.

Na niguata uaia Poul re uangoul pe tar umang uih

¹²Ro bung uanotougene rung tagorong mana tang Kristo, inggo u malara mu ateoum pare, a puhene ke kotpokoso totoguo ahik pah ke tur tane toro Uelhire Uaia, bo ke poul tun toro Uelhire Uaia o ualo uapopokoh. ¹³Inggo u uangoul tar karabus, teene inggo na tamatang kalekinale puk Kristo, doho soldia gera kaukeke tena uma Sisa, doho gisiamhe pon, ra ate teil tar puhonene. ¹⁴Doh gine ka kale peio tar karabus ke uatenturunguar puhon tar balasir bureher tamatang tagorong mana tang Kristo, ka

ongolongua tar hirhire uatampopokoho teil tono Uelhire God.

¹⁵O man, o gisiamhe puk tasisina ka mene tauete tono uelhire Kristo, teene gisina ka geh, kara marang uairana kai liu katongois totoguo, bo o gisiamhe puk tasisin teka lih uaiampe, kara mene tauete toro Uelhire Uaia. ¹⁶Gisit ka lih uaia teka mene tauet, teeit gisina ra malaelhir totoguo gera ate pe tar Tamata Noman ke keipimeane totoguo tar me tur keip toro Uelhire Uaia.

¹⁷Bo o gisiamheer tamata puk ra marang uairana katongo kompeis, ahik mes ninamana uaia tar binaka ra mene tauete toro Uelhire Uaia, bo ra marang tumana puk tar niduhene ru uangoul keipio tar karabus. ¹⁸⁻¹⁹Bo a puhukuonene ahik paha inete uleik. Ter inete uleik tun tono uelhire Kristo ra mene tauete pein tar mamang hagarilik. Hape ka guata pesin, a sa ue a kodkodoh, doh no Uelhire Uaia Kristo ra mene tauete dedempein. Doh ter puhonene re uauaha totoguo. Karu turung uaha dedempela ge inggo pe u ate teil pare, a lotu kung dangatagium, kara nipoul gere la tur tar Iabena Dedeil ger nang Iesu Kristo, e turung poul totoguo maru udeil.

²⁰Temaene inggo u uahuahinga tun, karu tagorong mana teil pare, ahik pahu banotong matal, bo gine daan misiana sioun, inggo u turung ongolo tun ge paru mato ue u tua, a mamang inetelik ru guatagio e turung uatakai tar hangana Kristo. ²¹Ter eiguor ninaman e baka siranguaono pare, getu tuao inggo u uangoul tokaha keip tang Kristo. Doh getu mato, inggo u kale tar inete uaiantiehe tun. ²²Getu tuampelao, inggo u banotong poul mo bureher tamat. Bo hinginguar lele paku lihio? Inggo u telengua. ²³Inggo a torikingua reg ninaman,

^q1:10-11 1Te 5.23

^r1:13 Apo 28.30

^s1:18-19 2Ko 1.11

^t1:21 Gal 2.20

^u1:23 2Ko 5.8

u malahirintieh u la uangoul tagu tang Kristo. A puhono ter uiantieh. ²⁴Bo inggon e la uiantiehe tun tamiuoum getu tua bakala inggo maru banotong poul tamiuoum.

²⁵Temaene, inggo u tagorong manantiehe tun pagiare, nag kalekinaleo e moko harah tar poul tamiuoum tar uapopokoho keip teremi nitagorong manoum, kara niuah. ²⁶Maeit getu me pokoso polukuo tamiuoum, inggoum mu turung uah, teeit Iesu Kristo ke uelii tapokisime totoguoane tamiuoum, doh inggoum mu turung uatakaiantiehe tun tar hangana Iesu Kristo.

Mu uangoul sir o tamata gera tagorong mana tang Kristo

²⁷^vA inete uleik te pare, nami niuangouloum e kodkodoh dohe uakeluk tun tono Uelhire Uaia Kristo mare gete hape u me banotong bango tamiuoum ue u longoro ueluatata puk tamiuoum, inggo u turung ate pare, inggoum mu kusa uanono tar siokon siounur ninamana tar tur uapopokoh, karung siokor uatentur tar niualasirana ro Uelhire Uaia. ²⁸Ahik pah mu sokoro tosnomio uelmatan, mu uaongolo dedempesioum tar mamang binakalik, tar uabang paroko tasisin pare, God e turung mamantouo tasisin, kare uaudeil tamiuoum. ²⁹^wGe God pe ke guata uaia tamiuoum pare, ke uamaluana pe tamiuoum tar tagorong mana tang Kristo, doh ke uamaluana pono tamiuoum tar kale tar niduh tar hanganon, teeit rung tagorong mana peoum tatanon. ³⁰Doha niduh rung uangoul keipigioum daan, a siokono tar niduh ku uangoul keipimegio sioun gekung banga baka uoumugioum, doh gine daan, inggoum mu longoro uelu-

atata totoguo ru uangoul sira haraha pe paar.

O Mahar 2

I petut tena niuangoul Kristo

2¹⁻²Gete ter niuangoul tokaha keip tang Kristo ke uatampopokoho tar balamiuoum, kare uamamahoul tamiuoum tena nimalaelhir, doh getung uangoul tokaha keipoum tar Iabena Dedeil, karung kale tena niueldolom Kristo, inggoum mu uatuktuka hihir tunungua tar niuaha totoguo pare, a siokono pe remi ninaman, kara siokono remi nimalaelhir, kara siokonor iaben, doha siokor ninaman.

³^xAhik pah mu uairana katongosioum tasir gisiameh, kara hik pah mu guata me inet mare uleikir hangamiu. Bo inggoum pakung kale uahiua katongosioum, karung namana sira pare, o gisiameher tamata tesir uiantiehe tamiuoum. ⁴^yInggoumur tang siok tang siok ahik pah mu namanantiehe puk tar haua re uauia tatamiu, bo pakung namanantiehe puk tar haua re uauia tasir gisiameher tamat.

Kristo ke kale uahiua katongoin, doh God ke kale kai tatanon

⁵Inggoum pakung kale me siokonor ninamana misiana tang Iesu Kristo.

⁶^zInggon a siokono sira tang God, bo ahik pukuono pah ke namanang uoho uanono tar hagaring uangoul sira tang God.

⁷^aBo inggono ke kale uahiua katongoin, kare uangoul sir pare, a tamatang kalkalekinale puk, kare kotpokoso sira kompe pare, a tamat.

^v1:27 Epe 4.1; 1Te 2.12 ^w1:29 Apo 16.19-40 ^x2:3 Gal 5.26

^y2:4 1Ko 10.24 ^z2:6 Jon 1.1-2; 17.5 ^a2:7 Jon 1.14; 2Ko 8.9

^{8b}Doho tamata ka banga tatanono pare, a tamata tun. Doh inggono ke kale uahiuia katongoin, ke uakeluk tun pe tena nimalara God e tuka ke mata pe, gitiemie ke mata peono tar korose.

^{9c}Ter tengkanonene maeit ke uairana God tatanono tar mamang inetelik, kare heir tar niueltada tar hanganon e i rana uain tar mamang giniamer hang.

^{10d}God ke guata pare, mara hatup uahiuar tamata uakapa tang Iesu, gisis ra uangoul i Heuen, kara uangoulane tar kot, dohi kukulebanga tar kot.

^{11e}Doho tamata uakapa tun ra turung hire tauete pare, “Iesu Kristo ter Tamata Noman.” Doh tar hagarion, e heir tar uiniator tang God ge tamanon.

Uangoul sira tar luh i uantinanina tasir tamat

¹²Temaieit ro kuhur uanotoug, inggoum kung longoro uaia tun, karung uakeluk dede tun tang God tar binaka ku uangoul keipimeo tamiuoum. Doh gine daana tabo peio, inggoum pakung uakeluk uaia dedempe, karung ueltada keip tun tang God tar nisokor, karung kalekinale uapopokoho tun tar kale tar inete ke uamatotoig God tamiuoum, ke uelkarus pe tamiuoum. ¹³Ge God pe tere kalekinale dede tagumpe tamiuoumur tang siok tang siok, kare uatentur tena nimalara tamiuoum tar guata tar haua re malahirigion.

¹⁴Doh tar mamang inetelik gerung guatagioum, ahik pah mu mene ngurungur, karung ueluelpereresioum, ^{15-16f}mara hikioum pah mu kouh me puh, karung dedeil uakapa tun, ahik me tamata re banotong tohotola tamiuoum me inet misiana paho bung tuna God gera uangoul uakodkodoho tunane

tasir tamata uasa tun i kot. Inggoum mu turung uangoul sira pare, a luh e uamarmarein i uantinanina tar uan uasaener kitkitup i kot tar binaka rung mene tauete toro Uelhire gero tua. Getung guatoum pare, inggo u turung uaha tamiuoum tena marein Kristo, geter tengkana peono tere turung ualasira tasir tamata pare, nag kalekinaleo ahik pah ka ueluelourig.

¹⁷Remi nitagorong manoum tang Kristo, doh nami niguat e ngohina tar uahungetie rung heirin tang God. Gitiemie ge teka uatadingin ro deuatingiguo e la keipin tenami uahungoum gete kotpokoso sirono pare, doh inggo u mata ueleheir tamiuoum, inggo u turung uah, karu turung uaha keip tamiuoum. ^{18g}Ter siokono kompe, inggoum pakung uaha pon, karung uaha keip totoguo.

Timoti me Epaproditus

¹⁹Bo gete malarar Tamata Noman, inggo u tagorong mana teil u turung ualatuela tang Timoti tar la banga baka tamiuoum mare gete tapokisimeon e me banotong uauaha totoguo gete me hire hape rung uangoul peoum. ²⁰Ahik me tamata misiana tang Timoti, inggon e uoto siokono na nihagou, kara na nimanana keip totoguo, doh tar mamang binakalik inggon e uoto namana tar sir me lele tar poul tamiuoum. ^{21h}Inggou u hire tar puhonene, teeit o tamata uakapa ra uoto namana kompe teresi nimalar, doh ahik pah ra namana tena nimalara Kristo.

²²Bo inggoum mu ate manasa tena niguata Timoti e ualasira pare, inggon a uauaman, kare poul totoguo tena kalekinale ro Uelhire Uaia, misiana tar

^b2:8 Hib 5.8; 12.2 ^c2:9 Apo 2.33; Epe 1.20-21; Hib 1.3-4

^d2:10 Roum 14.11 ^e2:11 Roum 10.9

^f2:15-16 Dan 12.3; Pil 1.10; 1Te 2.19 ^g2:18 Pil 3.1; 4.4 ^h2:21 2Ti 4.10

keketiketie re uoto poul tang taman. ²³Temaene ru marang uangoul sikoro bako, u marang ate paroko bak, a haua tunur inet re turung kotpokoso totoguo, song ru turung ualatuela tatanono tamiuoum. ²⁴Doh inggo u tagorong mana teil tun tar Tamata Nomana pare, ahik pahi reh, karu turung la katkatongomeo tar me banga tamiuoum.

Poul ke kul e ualatu tapokis tang Epaproditus tar la i Pilipai

²⁵Inggo ku namana tar ualatu tapokisime tang Epaproditus tamiuoum. Raeim namira siokor kalekinale, kaira guata sir a toking tamatang uiliatung, mira uelturut pe toro Uelhire Uaia. Doh inggon a tamatang keip uelhire pon gekung ualatuemeioum tar me poul totoguo. ²⁶Inggono ke sirintiehe tunin, kare marang banga tamiuoum, doh inggono ke ate pare, inggoum kung longoro toro ueluatat tatanon, ke momouh pe, doh ter puhonene re duh teilin tatanon. ²⁷O mana noman, inggono ke momouh, doh ke uahuhutung mata uadeil puk! Bo God puk ke ueldolomo tapokis tatanon, doh ahik pah tatanono puk, bo totoguo ponompe.

²⁸Temaeit u malarantiehe tunuo tar heir tapokisime tatanono tamiuoum marung me bangoum tatanon, karung uah, doh mara hik pono inggo pahe duhantieheio. ²⁹Temaene inggoum pakung uahantiehe tun tar kale tapokis tang Epaproditus menia keip tar uleikir niuah misiana paha tahigigeig gere tagorong mana tar Tamata Noman. Inggoum pakung ueltadangua tar tamata sira pare, ³⁰teeit inggono ke uahuhutung mata tena kalekinale Kristo, kara hik pahe namanantiehe

tun gete mat, bo ke poul puk totoguo tar kalekinalene, ahikioum pah kung banotong guat.

O Mahar 3

A tamata gere tagorong mana tang Iesu Kristo, inggono ter tamata kodkodoh

3 Ro bung uanotoug, tar uakapa tar puhung uelhirenine, inggo u marang kula sira pare, inggoum mu uaha tar Tamata Noman. Ahik paha sa totoguo tar bolo polukula tamiuoum tar haua ku hiregio sioun tamiuoum, ginin pake terung kapil uaia tunugioum. ²Bo mu tagin puk tasisit ra guata tar hagar uasa misiana tasir lo roke. Gisina ra marang pokpokong mamantouo kompe tar tukunus tar uakeluk tenas niguatar Israel. ³Bo inggeig tesir Israel tun gesir nang God geri lotu keip tar Iabena Dedeil. Kari uataakai tar hangana Iesu Kristo, kara hik pahi namana pare, ka uelkarususieig tar haua ki guata katongoin.

⁴kO mana tun, inggo a bureher tengkana ru banotong tur uapopoko-hoig tar haua ku guata katongoig. Gete kaein me tang giameher tamat e namana pare, a bureher tengkan re banotong tur uapopokohoig tar haua ke guata katongoin, inggo tenag burehentiehe tun! ⁵¹Teeit, inggo a peng Israel, a peng toso bunguna Benjamin. I muduhia tar uat-ualinar marein ka pohoio, kara pokoio. Inggo tar toking tinoug ter toking peng Hibu tun, maeit inggo ter peng Hibu tun pon. Inggo ku uakeluk uakodkodoho tun tar ualatu tenas niguatar Parisi. ⁶^mKaru tampopokoho tun tar guata tar haua ku namanain pare, na kalekinale God, teeit ku petpetutup peo pare, u ma-

ⁱ2:25 Pil 4.18 ^j3:3 Roum 2.29 ^k3:4 Apo 22.3

^l3:5 Luk 1.59; Apo 23.6; 2Ko 11.22 ^m3:6 Apo 8.3

mantouo tasir tamatar nang Iesu Kristo, doh ku uakeluk uaia tun tenas puhung ualatutur Ju, doh gisin ahik pah ka banga me puh uasa hape ku uakeluk peo tar ualatut.

⁷ⁿSioun tar ineteninanine inggo ku namana pare, ginina ter inete uleikintiehe tun totoguo, bo gine daana puk inggo ku banga sira tananin a tabo tengkan, maru kale tang Kristo. ^{8-9o}Bo ahik pah tar inete pukuninanine, inggo u banga sira tar mamang inetelik uakapa tununinene daan a tabo tengkana tun, ahik pahe uelmatout to tar ate tang Iesu Kristo nag Tamata Nomano. Tar ate tang Kristo ter uleikintiehe uain tun, temaeit inggo ku hiliu uakapa manasa tar mamang inetelikininanine, karu banga sira tananina tar mongmong maru banotong ate tun tang Kristo, karu uangoul tokaha keip tun tatanon.

Inggo ahik pahu namana pare, inggo a tamat kodkodoh teeit ku guata katongo peio u uakeluk tar ualatut. Bo ku kotpokos a tamata kodkodoho teeit ku tagorong mana pe tang Kristo. Ge a tamata pe gere tagorong mana tang Kristo, inggono tere kulain God pare, a tamat a kodkodoh. ^{10-11p}Inggo u malara kompe u ate tun tang Kristo, karu ate pono tar nitampopokoho geke uatua tapokis tatanono toro mat, karu marang uangoul tokaha keip tatanono tar uelmahing geke kalegion, karu marang kotpokoso sira tatanono ke mata pe mare turung kedanga God totoguo, kare uatentur tapokis tur totoguo toro mat.

Poul e uoto ualo uapopokoho tar la kale tar ineter uia

^{12q}Inggo ahik pahu kulaio pare, ku pehuara manasa uoum ue ku kotpokoso uoum pare, a tamata kodkodoho tun. Bo inggo u uatolaua dedempela maru kotpokoso sira hape re malara pe Iesu Kristo ke uelkarus pe totoguo pare, a nanono tun. ¹³Ro bung uanotoug, inggo u ate pare, inggo halan tu pehuara tar kale tar niguatanin, bo u uamoko tun puk tar siokon siounur ninaman te tar malabobour liu tar mamang ineteliking sioun, karu namana uapopokoho puk tar haua re turung kotpokos i uoumuhia. ^{14r}Temaeit inggo ku uatolaua kompela maru la uatuka tun maru kale me bulauoug tar nituang ganah i ran gere kilamein God totoguo, teeit ke mata ueleheir pe Iesu Kristo totoguo.

^{15s}Inggeig uakapa tunene geke mahmahoho regi nitagorong mana tang Kristo, pake siokono regi ninaman tar puhonene. Bo ge pare kaeis mo gisiamehe tamiuoum ke giamehe sioko res ninaman, God e turung uakalahar tar puhonene tamiuoum. ¹⁶Bo a niguata uaia pukuniner man, ki kale manasa uoumugieig teri uakeluk dedegieig.

^{17t}Ro bung uanotoug, inggoum pakung petut totoguo, karung banga to tasisit ra uakeluk to hape ring uangoul pe inggeim. ¹⁸Temaene inggo ku hirhire uapoul manasa tamiuoum, doh gine daan inggo u kiring keip tar niueldolom, karu hire uapoul poluk tamiuoum pare, a niuangoul gera uoto guataigir gisiameher tamat e uaelmatanangua tasisina tar tengkan ae maene ke mata Kristo tar korose. ^{19u}Tar uadouhinar marein, gisina ra turung mamantouois,

ⁿ3:7 Mat 13.44-46 ^o3:8-9 Roum 3.21-22 ^p3:10-11 Roum 6.3-5; 8.17

^q3:12 1Ti 6.12,19 ^r3:14 1Ko 9.24 ^s3:15 1Ko 2.6 ^t3:17 1Ko 4.16

^u3:19 Roum 16.18

ge nas godo pesina ter nimalarang tar tukunun. Gisina ra kai kompe tar haua ge pake tera matale keipigisin, kara namana kompe tar ineteng tar kot. ²⁰vBo inggeig tesir tamatang Heuen, i uangougoul tar tamat geke uelkarus tagigeig, inggon ter Tamata Noman Iesu Kristo, gere la turuha i Heuen. ²¹wDoh tena nitampopokohon, inggon e banotong uamoko tar mamang inetelik i kukulebanga tena nikauek, kare turung uapalih tar tukunugigeig gininer mat ri uangoul keipig, kare kotpokoso ngohina tar tukununon ger uoun tar uiniator.

O Mahar 4

4^xTemait inggoum ro bung uanotoug geru malaelhirintiehesio, inggo e sirio tamiuoum. Ge inggoum pe kung uauaha totoguo, doh inggoum tesir bulauana tenag kalekinaleo. Ir uanotoug, inggoum pakung guata dede paar, karung tur uapopokoho tar uangoul keip dedempe tar Tamata Noman.

A ualatut

²Inggo u mene uapopokoho tun tas nu luodia me Sintike mura ueluias raoum ge raoum pe a toking tunar Tamata Noman. ³yDoh inggo u dangata pono to-tomua ger uanotouguo tun tar kalekinaleene, ingga o poul tar toking kuaha rasina rasine, teeit kura kalekinale uaia tokaha tun pe rasina totoguo tar mene tauete toro Uelhire Uaia. Doh Klemen menia keip tosnogo tamatang kalekinaleo, gisina pono ka kalekinale tagu totoguo. A hangas uakapa tunur tamatasinasine e moko teil toro bolobolong tar nitua.

⁴Uaha dede tar Tamata Noman! U kula uapoul polukuo, mu uaha dede. ⁵zInggoum mu hamhamas tasir tamata uakap mara bangasin tar niguata uaiar namiuoum. Ahik pah reh a Tamata Noman gine manasa i hutun.

⁶aAhik pah mu kanuh me inet, bo mu lotu puk, karung dangata tang God tar mamang inetelik gerung katupaig, karung uauaha dede tatanono tar binaka rung lotu. ⁷bGetung guatoum pare, God e turung heir tamiuoum tena niuelhiarou, ahikir tamatang gane i koto pah ra banotong naman manate tar puhon. Song re turung uoho uanonon na niuelhiarouon tar balamiuoum doh remi ninama tar uangoul tokaha keip tang Iesu Kristo.

⁸Doh tar uakapana nagu uelhireo ro uanotoug te pare, tar mamang binakalik inggoum pakung namana tar inete ger man, kara uia, kara kodkodoho tar matana God, kara dedeil, kara mataia, kare tar mamang inetelik gera uoto ueltadaig, kara uatakaig ger uia uakapa tun. ⁹cDoh mu guata keip manasa tar niate kara haua kung longoro turig totoguo menia tar haua ku guatagio, doh God gere heir toro hiarou e turung uangoul tokaha keip tamiuoum.

Poul e uaha tar inete ka heirigir Pilipai

¹⁰Inggo song ku uahantiehe tun tamiuoum teeit song kung namana huara poluk pe inggoum tar kaukeke totoguo, maeit inggo u uahantiehe tun tar Tamata Nomanene daan. Inggo u ate inggoum kung uoto namana huarama totoguo, bo ahik puk me binaka re soloin tamiuoum tar heirime me nipoul. ¹¹Doh inggoum ahik pah mu namana ku meno

^v3:20 Epe 2.6,19 ^w3:21 1Ko 15.28,42-53 ^x4:1 1Te 2.19-20

^y4:3 Luk 10.20 ^z4:5 Hib 10.25; Jas 5.8-9 ^a4:6 Mat 6.25-34; Kol 4.2

^b4:7 Ais 26.3; Jon 14.27; Kol 3.15 ^c4:9 Roum 16.20

tar puhonene, teeit inggo u katupa me inet. Ahik, ge inggo pe ke ate manasaio ru uangoul sira pe pare, gete nag burehemper inet ue a pag, u uaha manasampe ru uangoul pe. ¹²Inggo ke ate manasaio getu uangoul sira pare, a katupa nag inet ue gete nag burehemper inet, inggo ke ate tokahaio tar toking puh rasin, maeit hingiamper niuangoul, karu uangoul uaia dedempe u mahur ue u gog. ¹³^dGe inggo pe u banotong guata keip tar mamang hagarilik tena nitampopokoho Kristo gere uoto heir totoguo tar nitampopokoh. ¹⁴Bo inggoum kung guata uaiantiehe tun kung poul pe, karung huata tokaha totoguo tar niduh geku kaleig.

¹⁵^eDoh inggoumur tamatang Pilipai, mu ate uaia tun pare, tar binaka ku uakekeno tar mene tauete toro Uelhire Uaia, doh tar binaka ku hiliuiio tar pang uan i Masedonia, ahik baka poluk me gimeher lotu ke poul totoguo tar hagar-ing heir me mani ue me ineteng poul totoguo. Ahik, teoum puk manasampe kung guata pare. ¹⁶Doh tar binaka ru uangoulo i Tesalonaika, inggoum kung poulpoul uapoul tun totoguo tar huar inete ku katupain. ¹⁷Inggo ahik pahu mene tar ineteninanine pare, u marang inet, bo inggo u marang banga tang God

e uairana tar bulauamiuoum, teeit tar niguatar namiuoum auiantiehe tun.

¹⁸Inggo ku kale manasampe tar mamang inetelik kung heirigioum totoguo, karu kale uaburehe tar haua ku katu-paig, karu kale uamatoto baka kompeio tar inete gekung heirimegioum tang Epaproditus. A inete misianangua tar uahung ger muhuiar amuhun, ginina tere malara tunig God, kare uah. ¹⁹Doh nag Godo e turung heir tar mamang inetelik rung katupagioum, e la tur tena nitampopokohon, kare na uiniator geka heir turin tang Iesu Kristo. ²⁰A uatakai, kara uiniator e la tang God ge tam-agigeig tar mamang binakalik. O mana tun.

A uadouhinar mener nang Poul

²¹Heir tenag niuaho tasir tamata uakapa tunur nang God gera tagorong mana tang Kristo. Gisine ro uanotougua ka heir pono tenas niuah tamiuoum. ²²No tamata uakapa tun God gera uangoulane, ka heir tenas niuaha tamiuoum teesine tunumpesin ra uoto kalekinale tena uma Sisa.

²³Na hamhamasar Tamata Noman, Iesu Kristo e uangoul tagu tar iabeimiuoum.

Kolosi

*O bolobol o la tasir tamat
tar pang uan i Kolosi*

O bolobolo tasir Kolosi

O bolobolo Kolosi teno bolobolo Poul tasir tamatang tagorong man i Kolosi. Poul halan te la banga uiloh i Kolosi. Bo ke uoto heir dede puk tenas loutusin (Kol 1.3-14).

Poul ke uanamana tasir tamatang tagorong mana tar inete uleik tang Iesu. Iesu a God, doh ke touo tar mamang inetelik. Song ke kotpokos a tamata mare mata ueleheir tagigeig. Temaeit ke mata pe Iesu, God e turung uelkarus tagigeig. Geti kale ualekeig tang Iesu tenagi niuangoul, inggeig i turung matakaluana keipingua tang God (Kol 1.15-23).

Song ke uatagin Poul tasir tamatang tagorong mana tasir gisimeher tamat (Kol 2). O tamatasina ka malara tasir tamatang tagorong mana tar uakeluk tar ualatutun sioun ger nasir Hibu. Doho tamatasina ra kula pare, o tamatang tagorong mana tun paka uakeluk tar mamang ualatutulik. Poul ahik pah ke uauia tar puhon. Inggono ke bolo pare, a ualatutunin a nas pukur tamat e lain tenas niguat (Kol 2.8). O tamatang tagorong mana paka uakeluk tang Kristo, kara hik pah tar niguat. A niguat a uia nomanape, bo ahik puk pahe poul tagigeig tar uangoul tar niuangoulur uia (Kol 2.23).

Poul ke uanamana tasir tamatang tagorong mana hape paka uangoul pe. Gisina paka namana tar ineteng Heven (Kol 3.2), teeit gisin o nang Kristo (Kol 3.3-4). Gisina paka hik pah ra guata tar niguata uasa (Kol 3.5-11). Bo paka malauelhir tasir gisimeher tamat (Kol

3.12-14). Doh gisina paka kalekinale tang God (Kol 3.15-17).

I lolono toro bolobolo rone:

A meneng uakalahar 1.1-8

A mamang inetelik, doh na kelekinale Kristo 1.9-2.19

A niuangoulur timuh tang Kristo 3.20-4.6

A uadohinar menemen 4.7-18

O Mahar 1

Poul e heir tar niuaha tasir tamat

1 Inggo Poul ku bolo toro bolobolo rone, God ke umatoto totoguo na aposoul Iesu Kristo. Raeim me Timoti ger uanotougigeig mira heir tar niuaha tamiuoum uakapa tun.

²Inggo u heirila toro bolobolo rone tamiuoumur tamatang tagorong man gesir dedeil, karo nang God i Kolosi gerung tagorong mana dede tang Kristo.

Inggo u lotu tang God tamagigeig mare heir dede tar hamhamas tamiuoum, kare uakotpokoso toro hiarou.

Poul e lotu, kare heir tar uataakai tang God

^{3f}Inggeim mi uoto heir dede tenami lotuoum, karing heir tar uataakai tang God ge tamana Iesu Kristo nagi Tamata Nomaneig. ⁴Teeit king longoro pe pare, mu tagorong manoum tang Iesu Kristo, doh teremi nimalauelhiroom tosono tamata uakapa tun God. ^{5g}Inggoum kung guata sira pare, teeit inggoum kung bangala i uoum tar niuahan Heuen misiana kung guata uoum pe tar kikilangana kung longoro uakekene pe toro mana toro Uelhire Uaia. ⁶Doh tero Uelhire Uaia kompe roono rone geko lame tamiuoum, ko haijala ueltebeir toro mamang buturulik uakapa tunane i kot. Toro mamang uanilik o tamata

^f1:3 Epe 1.15-16 ^g1:5 Epe 1.13; 1Pi 1.4

ka kotpokos o tamatang tagorong man, kara pilese tar niuangoul re uauaha tang God. Te misiana kompe ko guata pe roon i uantinanina tamiuoum, e uakekene tur tar binaka kung longoro uakekenoum toro uelhire, karung naman manate toro man tena hamhamasa God.

⁷^hInggoum kung iate tur tar inetenin tang Epapras ger kuhur uanotoumiueim tun tar kalekinale, ger tang kalekinale uaia tun tang Kristo tar tur keip tamiueim. ⁸Doh inggono teke hire pono tamiueim teremi nimalaelhiroum geke heirinir Iabena Dedeil.

⁹ⁱInggono ter tengkana maeit e uakekekene tur pe tar marein king longoro uakikilangeim tamiuoum, inggeim ahik pah king uakenua tar heir tenami lotuoum, doh tar dangata tang God tar poul tamiuoum marung iate tar haua re malaragion. Teeit God e turung heir terener niate, doh na ninaman. ¹⁰Doh inggeim king lotu pon marung uakeloum tena nimalaron, karung uauaha tatanono tar mamang hagarilik, doh mare uanaman manateono tamiuoum marung guata uaia dede tar mamang hagarir uaia, kara hagarin poul tasir gisiamah, doh marung hua keip dedeoum tena niate uaia God.

¹¹⁻¹²^jRaeim mira lotu pono mare uatampopokoho dede God tamiuoum, e uatampopokoho keip tamiuoum tena nitampopokoho uleik tun. Marung tur uapopokohoum, karung uatut uaia tun tar mamang niduh, karung uangangoul hamas, karung heiring uaha tar uatakai tang Tamagigeig geke uadelauana tamiuoum marung kale tar mamang inetelik

geke uamatotogion a nas no tamata gera uangoul i Heuen.

Iesu Kristo a tamata uleikintiehe tar mamang inetelik

¹³^kDoh God teke uelkarus liu tur tagigeig tena nitoiar kitup, kare keip ualeka tagigeig tena nitoiar tun ger kuhur tunon. ¹⁴^lTar tunonene, Inggono ke bulaua tapokis keip tagigeig toro deuatinginon, tar kuse luara teregi niguata uasaeig.

¹⁵^mAhik me tamata ke banga tang God, bo tar binaka puk ke me tamatar tunon, inggono ke ualasira tagigeig tang God, hape re baka pe, ge inggono pe te misiana kompe tatanono re baka pe. Inggono ter tuna God ger uoum, kare ter i rana uain tar mamang inetelik ke touoig God. ¹⁶ⁿGe God pe ke touo keip tatanono tar mamang inetelik, a ineteng Heuen dohi kot, a inete gera bang huarraig, kara inete ge ahik pah ra bang huarraig, o toia, o nitoia uakap, o inete tampopokoho uakap ue o tamata tampopokoho uakapa tun. Ge God pe ke uamatoto tatanono tar touo tar mamang inetelik doha mamang inetelik a nanon. ¹⁷^oInggono e uangoulung sioun i uoumuha tun tar mamang inetelik, doh inggono ter tengkanar mamang inetelik, maeit re moko tena butur.

¹⁸^pInggono pe ter uakikilanganar tamata ke tua tapokis tur toro mat, temaeit inggono tero lunar toto tamat gera tagorong mana tatanon mare hahaua liu i ranahia tar mamang inetelik. ¹⁹^qGe God katongo pe ke malaelhir tar tun e siokono sira tun tatanon. ²⁰^qDoh God ke malaelhir e uakotpokoso keip toro hiarou

^h1:7 Kol 4.12; Plm 23 ⁱ1:9 Epe 1.16-17 ^j1:11-12 Epe 1.11,18-19; 3.16

^k1:13 Luk 22.53; Epe 2.2 ^l1:14 Epe 1.7 ^m1:15 Jon 1.18; 2Ko 4.4

ⁿ1:17 Jon 1.1; 8.58 ^o1:18 Apo 26.23; Epe 1.22-23; UGO 1.5

^p1:19 Kol 2.9 ^q1:20 Epe 1.10

toro deuatingina Kristo tar korose i uantinanina tatan, doh tar mamang inetelik, a ineteng tar kot doha ineteng Heuen.

²¹rSioun inggoum kung uangoul uairehe tun tang God, doh remi ninamanoum ke guata tamiuoum kung kotpokosongua no uelmatan God, teene inggoum kung uoto guata dede tar niguatar sa. ²²sBo daana puk, God ke uakotpokoso manasa toro hiarou i uantinanina tatan, doh tamiuoum ke guata pe tar tukununa Kristo ke mata tar korose. God ke guata pare, maeit getung la turoum i uoum tang God tar binakang kedang, inggon e turung banga tamiuoum pare, o delauan ahik me niguata uasa, kara hik me tamata re tohotola tamiuoum me inet. ²³Bo pakung kusa uanono kompe tar nitagorong man, rung tagorong mana teil pe toro Uelhire Uaia gekung longoroin. Ahik pah mu uamaluana uakeluk pukusiuoum. Inggo Poul ku kotpokos na tamatang kalekinale ro Uelhire Uaia roon, doh ku uelhire tauete tasir tamata uakapa tunane tar kot.

Poul ke poul tasir Kolosi

²⁴Gine daan inggo u uaha tar huata ueleheir tar niduh tar poul tamiuoum. Doh inggo u marang poul tosno tamata Kristo ge a tukununa peono ter toto tamat. A uelmahing ku huataigio halan te kap. Doha uelmahing ru huatagio tar tukunug katong u marang uakuakapa hihir tun tena uelmahing Kristo ke kale uelmahing pe tar tukunun tosno tamat. ²⁵tGod katongompe ke umatoto totoguo, karu kotpokos a tamatang kalekinale tosno tamaton. Doh inggo nag

kalekinale tar uelhire tauete tun tar mamang uelhirelikir nang God. ²⁶uInggono ke heiriha totoguo tar me ualasira ter enonor ninaman geke ouiouome sioun tun tar binaka halanar koto te kotpokos. Bo gine puk daana ke uakalahara toono tosno tamat gesir dedeil. ²⁷God e uaha tar hire tosno tamata pare, a inet a uleikir bulauana menia tena nitampopokoho Kristo e la pono tamiuoum. Doha ineteng geke ouiouome, Inggono te Iesu Kristo e uangoul teil tamiuoum. Doh mu turung uangoul tagunguampe tatanon tena uiniator i Heuen.

²⁸Temaeit ia ring laeim, mi uelhire tauete tatanono, karing ualasira keip tasir tamata uakapa tar mamang niate uaialik maring banotong uatur tasir tamata uakap a mahmahoho res nitagorong man tar matana Kristo. ²⁹vTemaeit ru pentampopokoho tunuo, u kalekinale uapopokoho keip tun tar nitampopokoho ke heirigiono totoguo.

O Mahar 2

2 Ge inggo pe u malara mu ateoum hape ku pentampopokoho tun peo tar poul tamiuoum doh tasisit i Laodisia, doh tasisit halana ta banga totoguo. ²⁻³wA tengkana maeit ru guato pare, te mare uatampopokohor puhono tamiuoum uakapa tar nitagorong man, doh mare siokono tokaha remi nimalaelhiron. Doh marung kale tunoum tar mamang inetelik re kotpokoso tar binaka rung naman manate tunoum tonu uelhire God gero ouiou, inggono te Kristo gere moko uaouor mamang niate uaialik mer ninamana uaia.

⁴xInggo u hire tamiuoum tar puhonene mara hik me tamata re

^r1:21 Roum 5.10; Epe 2.12 ^s1:22 Roum 5.10; Epe 5.27 ^t1:25 Epe 3.2,7-8

^u1:26 Roum 16.25-26; Epe 3.5,9 ^v1:29 Epe 3.7,20; Pil 4.13

^w2:2-3 1Ko 1.24,30 ^x2:4 Roum 16.18

banotong uelour tamiuom tar uakeluk tenas niualasirasina gera longoro siraig paha man. ^{5y}O mana noman, inggo taboio tamiuom, bo toro mana tun inggo tar iabeig e uangoul tagu tamiuom, teene ru namana dede pe tamiuom, karu uahantieh, teeit ru me longoro pe hape rung uangoul uiliodout peoum, doh hape re popokoho pe remi nitagorong manoum tang Kristo.

**Mu uangoul sira no tamata God,
kara hik pah mu uakeluk tar
niualasir ger giniamhe siok**

⁶Temaetit git kung kale manasa peoum tang Iesu Kristo tenami Tamata Nomanoum, mu uangoul keip dedengua tatanon, ^{7z}mu tur uapopokoho keip tang Kristo, karung uangoul tokaha keip dede tatanon, doh remi nitagorong manoum e popokoho dede misiana ka ualasira pe-sioum, karung uatakai dede tang God.

⁸Mu tagin, ahik tun pah mu uamaluana me tamat e uelour tamiuom tar uakeluk tenas niualasirasina ger tabo tengkan, kara hik pahe tengkana keip mo man. A niualasiranin a ninamana kompe a niheir uain tur tasir gisiameher tamat, doh ra ualasira tasir tamata tar uakeluk tar ualatoh gere menmene tar ineteng tar kot, kara hik paha nang Kristo. ^{9a}Ge a tukununa pe Kristo a siokono sira tun tang God. ^{10b}Doh inggoum mu uangoul tokaha keip tang Iesu Kristo, temaeit inggoum ahik pah mu katupa me inete tar iabeimiu. Ge inggono pe ter i ranantiehe tasir mamang inetelikir tampopokoh, doho tamata uleik uakap.

^{11c}Tang Iesu Kristo, inggoum pono ka pokoigir kapokoumiu ka kaleliu peigir niguata uasang tar tukunun, bo ahik

puk paho nipoko sira tagu ka poko per tamata tar limas tenas niguatar Ju. ^{12d}Tar binaka ka uahuusiuom, inggoum ka keu keipisioum tang Kristo, doh tar uahuuon inggoum ka uatua keipinguasiuom tatanono tar timuhur niuangoul, teeit rung tagorong mana teil pe tena nitampopokoho uleik God geke uatua tapokis tur tang Kristo toro mat.

^{13e}Sioum inggoum kung uangoul sira tasir tamata geke mata manasa teeit teremi niguata uasaoum, karung uangoul uakeluk tar nimalara uasang tar tukunun, bo God puk ke uatua keip tamiuom tang Kristo. Inggono ke siokor kuse luara tun teregi niguata uasaieg. ^{14f}Inggono ke dura liu tar haua ka bololain, doha haua ka tohotolain tagigeig, kare uakapa keip tongua tananin ke tina to pela tena korose Iesu. ¹⁵Doh tar koroseon, Kristo ke kale liu tenas nitampopokohor iaben, doho inete gesir tampopokoh. Kare uatur uakalahara tasisin, kare uoum keip sira tasisina tasir karabus ke pehuara pe toro mat.

^{16g}Temaene ahikioum pah mu uamaluana me tamat e bang kedanga tar haua rung inumugioum ue rung einig ue tar marein uleik ue tar mareining lotu tar timuhur bialok ue tar Mareining Pepe Uah. ^{17h}A inetenin misiana kompe paha abiabener inete re turung kotpokos i muduhia, bor tengkana tun te Kristo. ¹⁸Ahik pah mu uamaluana mo tamata ra uelour tamiuom tar kale tar inete tang Kristo, ge gisina pe ra uaha ra boho pe pare, ke kale uahuuais, kara lotu tasir angelou, kara kula pare, ka banga tar niborian, bo gisit puk re uairana katongois tar ineteniner tabo tengkan.

¹⁹ⁱDoh gisin ahik pah ra kusa uanono tang Kristo ger tamatang uoum keip

^y2:5 1Ko 5.3 ^z2:7 Epe 3.17 ^a2:9 Jon 1.14,16 ^b2:10 Epe 1.21-22

^c2:11 Roum 2.29 ^d2:12 Roum 6.4 ^e2:13 Epe 2.1,4-5 ^f2:14 Epe 2.14-16; 1Pi 2.24 ^g2:16 Roum 14.1-13 ^h2:17 Hib 8.5 ⁱ2:19 Epe 2.21; 4.16

tagigeig. I kukulebanga tena nikaueke Kristo a tukununa uakapon e moko tokaha keip tar ueltumanan, kare hua sira re malaelhir pe God hape pake hua peon.

Inggoum kung mata keip tang Kristo

²⁰⁻²¹jGitie kung mata keip peoum tang Kristo, gere mene tar ualatoho gere menmene teil tar ineteng tar kot, aeono maene rung uangoul sira harahoum pare, o peng gane i kot? Ae maene rung uakeluk harahoum tar ualatur sira pare, ahik pah mu tuhtuha tar inetene ue ahik pah mu ein tar inetene ue ahik pah mu kale tar inetene? ²²kGe a mamang inetelik pe ninananine e la tur tar inete ger tabo tengkan geta uakuakelukig, gininaniner ualatur doha niualsir e la tur puk tasir tamat. ²³O mana noman a ualaturunin ra banga siraig pare, e turung uatampopokoho tagigeig tar uangoul uaia tun, kari lotu uapopokoh, kari kale uahiuasieig, kare uauelmahing tar tukunugigeig, temaene o gisiameher tamata ra namana tar ualaturunin e uakeluk tar ninaman, kara niate uaia, bo a ualatur pukunin ahik tun pahe banotong poul tagigeig tar kale uahiuu tar nimalara uasang tar tukunun.

O Mahar 3

A ualatur tar uangoul uadedeil

3¹Gitie ke uatua keip pe God tamiuoum tang Kristo, karung uangoul teil tar timuhur niuangoul, temaeit inggoum mu uamoko manasa teremi nimalara tar ineteng Heuen tar butur re tabila Kristo tar pang mua tang God. ²mKarung namana dede tun tar mamang ineteliking

Heuen, ahik pah tar ineteng gane i kot. ³Ge inggoum pe kung mata keip tang Kristo, kare touaouo keip God tar nituaene tamiuoum tang Kristo. ⁴A nitua tunur namiuoum te Kristo, doh gete kotpokosohaon, inggoum mu turung siokor kotpokosongua pon, karung siokor kale tokaha tena uiniatoron.

A niuangoulur pensiou, kara timuhur niuangoul

⁵nTemaeit mu uakapa liu manasoum tar niguata uasang tar tukunumi misiana tar niguatang ur ue a niguatang popotoro tar guata tar niguata uasa, kara nimalara uasa, kara niguatang siokor gono tar mamang inetelik, ge a puh peono te ngohina kompe tar tamata gere lotu tar god bohoboh. ⁶Temaeit tar puhuninanine na nimaliana God e turung pono tasisit ra mahang longoro tatanon. ⁷Sioun inggoum kung uangoul sira pono pare, karung uoto guata pono tar niguatanin.

⁸oBo gine puk daan inggoum mu uakuakapa liu hihir manasa tar niguatanine, a niguatang nimalian ue a niguatang uelmamangusul ue a niguatang bal uasa tar tang giameh, kara hik pah mu uelsigal ue mu soul. ⁹pAhik pah mu ueluelbohesioum gekung uakapa liu manasa peoum tar niuangoulung sioun menia tar niguata uasa. ¹⁰qKarung uangoul tar timuhur niuangoul ger niuatimuh keip tena niate God marung iate uainoum tang Kristo geke touo tar niuangoul timuhene tamiuoum. ¹¹rTemaeit ke uatimuh pe God tamiuoum, ahik baka poluk mo kahakahar tamat, o Ju ue o gime uan, o nipoko ue o tabung

j2:20-21 Gal 4.3,9; 1Ti 4.3 k2:22 Mat 15.9

l3:1 Mak 12.36; 16.19; Epe 1.20 m3:2 Mat 6.33

n3:5 Roum 6.6,11; Epe 4.19; 5.3-6 o3:8 Epe 4.25-29; 5.4

p3:9 Epe 4.22,25 q3:10 Epe 4.24 r3:11 Gal 3.28

pok, o tamatang iate ue o tamat ahik mes niate, o karabus ue o tamat gera uangoul teresir nimalar. Bor tengkana tun te Kristo, doh inggon e uangoul teil i lolono tamiuoum uakap.

^{12s} Temaeit ke umatoto manasa pe God tamiuoum, mu uangoul sira manasa pare, no tamatono gesir dedeil. Doh inggon e malaelhirintiehe tun tamiuoum, temaene mu kaleom tar niguatanine, a niguatang ueldoloum, a niguatang toror, a niguatang kale uahiu, kara niguatang hamhamas kara uanguangoul sikor. ^{13t} Mu ueluelpepe hamasesioum. Doh gete me tamat e tohotola me inete tamiuoum, mu kuse luara tar niguata uasa ka guataig tatamiu misiana ke kuse luara per Tamata Nomana teremi niguata uasaoum. ^{14u} Dohi ranahia tar mamang inetelik ter inete uleik tun ter uelmalaelhir gere kale toto tokaha tamiuoum, kare uauiliodout tamiuoum.

^{15v} Karung uamaluana toro hiarouo gero la tur tang Kristo o uoum keip tar koloumiuoum, ge gitie pe rung uangoul teil peoum i lolono tar siokor tuku-nun, inggoum ra siokor kila totosioum tar uangoul toro hiarou, karung uauaha dede tatanon.

^{16w} Uamaluana tono uelhire Kristo o moko tun tamiuoum tar mamang binakalik maro uoum keip roono tar mamang inetelik rung guatagioum ue rung namanaig, gitie rung uelualasira pesioum tang Kristo, mu ueluatampopokohesioum tar uakeluk tang roon, karung guata uakodkodoho tun. Karung kere keip toro bukung kereker, doha kerekere eng lotu, doha kerekere ger nanar Iabena Dedeil, karung heir tar uatakai tatanon. ^{17x} Doh tar mamang inetelik

rung guatagioum ue rung meneig, mu guata keip tar hangana Iesu ger Tamata Noman, karung heir tar uatakai tang God tamagigeig tang Iesu Kristo.

A ualatur e lain tar binaka ra uakekeneinir timuhur niuangoul

^{18y} Inggoumur kuaha le mu uangoul tar nikaueken tes nomio bulout geter puh peonor uia tasir tamatar nanar Tamata Noman.

^{19z} Doh inggoumur bulout le mu malaelhir tosnomio kuah, karung uanguangoul keip sikoro tasisin, ahik pah mu ueluelnimaliansioum.

^{20a} Inggoumur keketik mu longoro tenas uelhire ro bung tamamiu doho tinamiu ge a puh peon a kodkodoho tar matanar Tamata Noman.

^{21b} Inggoumur tamasir keketik, ahik pah mu ualualahua ue mu louara tasir keketik gete tokouasaisisin, kara malioh, kara dengua mata guata tar puhur uia.

^{22c} Inggoumur tamatang kalkalekinale puk mu uangoul tar nikaueken tes nomio tamata uleik, karung longoro tasisina tar mamang inetelik ra meneig tamiuoum, uedanga tar uauaha dede tasisina tar mamang binakalik, ahik pah tar binaka puk ra uakeisisina tamiuoum, karung longoro keip tar niueltada tasisin, kara nisokoro tar Tamata Noman. ²³ Kalekinale keip tar niuaha tar binaka rung tuha tar kalekinale misiana pah mu kalekinale tar Tamata Noman, ahik pah na kalekinaler tamat. ²⁴ Namana uanon, a Tamata Noman e turung heir hahaua pono tar haua ke kaleuatoroig tosono tamat, ge Kristo pe ter Tamata Nomana rung kalekinaleioum. ^{25d} Bo getung guataoum me ineter sa,

^s3:12 1Pi 2.9 ^t3:13 Epe 4.2,32 ^u3:14 Roum 13.8-10

^v3:15 1Ko 12.27; Epe 4.4; Pil 4.7 ^w3:16 Epe 5.19

^x3:17 1Ko 10.31; Epe 5.20 ^y3:18 Epe 5.22 ^z3:19 Epe 5.25

^a3:20 Epe 6.1 ^b3:21 Epe 6.4 ^c3:22 Epe 6.5-8 ^d3:25 Roum 2.11

inggoum ra turung pehahauasioum tar haa kung guata uasain. Ge God pe e banga kedanga tasir tamata uakapa tar siokonor hagar, ahik me tang sioko re bantong uasiau.

O Mahar 4

4^eInggoumur tamata uleik mu kaueke tosnomio tamatang kalekinale, karung kaueke uaelmatout keip tasisina tar siokonor hagar, ge inggoum pe mu ate pare, nami tamata uleik ponenah i Heuen.

A ualatut

^{2f}Mu gulet karung lotu keip dede teremi nitagorong man, karung banga uaia dede gete pokoso me puh, karung heir dede tar uatakai tang God, ^{3g}karung heir pono menami lotueim mare uakalahara God tar lele tamiueim tar hire tauet, doh maring ueliu taueteeim toro uelhire rone tang Kristo geko ouiouo bakame sioun te roono pe, temaene ku uangoulo tar uih. ⁴Mu lotu maru uelhire uakalahara sira tuno hape ra uelhire tauete pein roon.

^{5h}Mu uakeluk tar ninamana uaia tar binaka rung uangoul keip tasir tamatasitie ahik pah ra tagorong man, karung guata dede tar niguatar kodkodoh tar mamang inetelik. ⁶ⁱTar binaka rung ueluatatoum, uelhire keip tar meneniner uia, karung meneng poul tasir tamat mare banotong poul nami menoum tasisit ra longor marung ate uaia tununguaoum hape rung hire tapokis pe tar tengkanar puhung dangata gera dangataisir tamata uakap.

Na uadouhinar mene Poul

^{7j}Tikikus a uanotougigeig tun doh na tamatang kalekinale uaia tunur Tamata Noman, inggon e turung uahire tamiuoum tar mamang inetelik marung iateoum hape ru uangoul peo. ^{8k}Temaait ru heirimeo tatanono tamiuoum mare la uatampopokohono tamiuoum, kare uaate tamiuoum hape ring uangoul peeim. ^{9l}Inggou u heir ponola tang Onesimus inggon a uanotougigeig tun, kara peng tenami uanoum, rasin ura turung hire tar huar mamang inetelik ke kotpokosane.

^{10m}Aristarkus gere uangoul tagu totoguo tar uih ke heir pono tena niuah, Doh Mak ge na turaka Banabas e heir pono tena niuah. Gete la kotpokosolaon inggoum mu uaha uangoul, karung tororo tatanon misiana ku uahire manasa uoum pelao. ¹¹Josua gera kila ponoin tang Justus, ke heir ponola tena niuah tesir tang touonor Jusinasine gera tagorong man ka kalekinale keip totoguo tena Nitoia God. Doh nas nipoulusina ke uauaha uaia tun totoguo.

¹²ⁿEpapras ger peng tenami uanoum inggono na tamatang kalekinale pono Iesu Kristo, ke heir ponola tena niuaha tamiuoum. Inggou e uoto lotu tar dangata tang God tar uatampopokoho tamiuoum tar tur uapopokoho dede misiana tasir tamatang tagorong manastie ka kale manasa uoum, kara iate uaia tun tar nimalarar mahmahoh ger nang God. ¹³Inggou u hire tun tamiuoum toro man tena kalekinaleon auia tun tamiuoum, doh tasir tamatang Laodisia dohi Herapolis. ¹⁴Luk a uanotoumiueim doh nami

^e4:1 Epe 6.9 ^f4:2 Epe 6.18; Pil 4.6 ^g4:3 Roum 15.30; Epe 6.19

^h4:5 Epe 5.15-16 ⁱ4:6 Epe 4.29; 1Pi 3.15 ^j4:7 Epe 6.21 ^k4:8 Epe 6.22

^l4:9 Plm 10-12 ^m4:10 Apo 12.12; 13.13; 15.37-39; 2Ti 4.11

ⁿ4:12 Kol 1.7; Plm 23-24

doktaeim me Demas ura heirila tenasira niuaha tamiuoum.

¹⁵Heir tenami niuaheim tasir tamatang tagorong man i Laodisia, doh tang Nimpa, doh tar toto tamatang tagorong man gera uoto uangoul toto tena umon. ¹⁶Getung timana uakapoum toro bolobolo rone, karung uelpalihe keip toro bolobolo geku heirilaio tasir Laodisia marung timana kalehoum.

¹⁷°Karung hire tang Akipus pare, “Kaueke uaia, karo uakapa tar kalekinale ka heirin totomua pare, na tamatang kalekinaler Tamata Noman.”

¹⁸°Inggo Poul ku bolo katongola tar heir tar uauaha tamiuoum. *Poul*

Mu namana huara totoguo ru uangoul pe tar uih.

Na hamhamasa God e uangoul tagu tamiuoum.

1 Tesalonaika

*O bolobolo ke heirin Poul tasir
tamata gera tagorong mana tang
Kristo i Tesalonaika*

O uakikilangana ro bolobolo tasir Tesalonaika

Rone o bolobol i lolono toro Baeboul tar timuhur uelhote. Poul ke bolo tang roon o la tasir tamatang tagorong mani Tesalonaika. Inggono ke heir tar uauia tang God teres nitagorong manasin, res uelmalahir, kare teres nitagorong man. Gisina ka tur kauiur liu tasir god bohoboh, kara kalekinale puk tang God.

Gisina ra uangougoul tena nitapokisiha Iesu. Gisin e kusempeisir niduh, kara tagorong mana dedempe tang God. Poul ke kula tasisina tar uauaha keip tang God tenas niuangoul. Gisina paka uangoul uadedeil tunis, kara kalekinalentieh. Doh gisina paka uelmalahire tunis.

Inggono song ke longoro tenas nidan-gatasina tena nitapokisiha Iesu. Inggono ke hire pono tasisin ahik pah ra namanantiehe tasisin ka mat. Ge gisisna pe ahik pahe siauais gete tapokisiha Iesu. Gisina tera turung uelupara uakikilanga poluk tang Iesu tasisine ra uangoul harah.

Na nitapokisiha Iesu e turung ualutar. Temaeit o tamatang tagorong man i Tesalonaika paka kale uatoro tanikais. Gisina paka kalkalekinale buk-buk kompe.

I lolono toro bolobolo rone:

A meneng uakalahar 1.1

A niuaha tar uatakai 1.2-3.13

A mene uakalahara tar nipileseng tar nitagorong man 4.1-12

A meneng ualatut tena nilaha Kristo 4.13-5.11

Uadohinar menemen 5.23-28

O Mahar 1

Poul e heir tar niuaha tasir tamat i Tesalonaika

1 ⁹⁰ bolobolo rone o la tur tas Poul mes nu Sailas doh Timoti.

Roono ka bololain tas mais gera uangougoul teil tar lotu i Tesalonaika gesir nang God ge Tamagigeig me Iesu Kristo ge nagi Tamata Nomaneig, rasin ura heir tar hamhamas, karo hiarouo tamiuoum.

A niuah teres nitagorong manar tamat i Tesalonaika

² Inggeim mi uoto hire tang God pare, mi uaha tun tamiuoum uakapa tun, karing uoto namana tamiuoum tenami lotu.

^{3r} Doh inggeim mi uoto namana tapokis dedempe, karing lotu dede tamiuoum tang God ge Tamagigeig tenami kalekinale uaiaoum geke kotpokoso tur remi nitagorong manoum, kara niguata uaia tun geke kotpokoso tur remi nimalaelhiroum, kare popokoho tun remi ninamana tar uangougoul gete tapokisiha nagi Tamata Nomaneig Iesu Kristo.

⁴ Ro bung uanotoumieim, God e malaelhirintiehe tun tamiuoum. Doh inggeim mi ate uaia tun manasa pare, God ke uamatoto manasa tamiuoum o nan, ^{5s} teeit inggeim king keipime toro Uelhire Uaia tamiuoum, ahik pah ko lame a menemene puk, bo ko la keipime tar nitampopokoh, kara Iabena Dedeil. Inggoum kung bang paroko tun tar uleikir nitagorong manar emiueim, karung banga katongo tun king uangoul keip pemeeim tamiuoum, teeit tar niuia tamiuoum. ^{6t} Inggoum kung babasira

⁹¹:1 Apo 17.1-9

^r1:3 1Ko 13.13; Kol 1.4-6

^s1:5 1Ko 2.4-5

^t1:6 Apo 17.5-9

tamiueim mer Tamata Noman, gitiempe kung kale peoum tar uleikir uelmahing, inggoum kung kale keip kompe toro uelhire tar niuah geke heirinir Iabena Dedeil.

⁷Temaeit inggoum tera bangbanga tonguar tamata uakapa tun gera tagorong mana tang Kristo tar pang uan i Masedonia, kare tar pang Akaia. ⁸No uelhire Tamata Noman ko tauete tur tamiuoum, karo haijala ueltebeir, ahik pah tar pang Masedonia, kare tar pang Akaia puk, bo toro giniamhe ponompe ro pang uan, doh remi nitagorong manoum tang God ka la ueliateig toro mamang buturulik, temaeit inggeim ahik baka poluk me inete ring menein. ⁹Gisina katongomper tamata ka ueluatata tar uleikir niuaha kung heir uoumuoum tamiueim tar binaka king uangoul tokaha keipieim tamiuoum, karung de tasir god bohoboh, kare uiuirisoum tar niguata ger sa ger pensioum, karung uakeluk tang God gere uangoul dede, kara uauaman, ¹⁰karung uanguangoul pono tar tunon gere turung la tapokis turuha i Heuen. Inggono te geke mata bak, kare uatua tapokis God tatanon, inggono te Iesu gere turung uelkarus tur tagigeig tena nimaliana God gere turung lame.

O Mahar 2

Poul ke menmene ke kalekinale pe i Tesalonaika

2Ro bung uanotoumiueim, inggoum kung ate tar binaka king me bangeim tamiuoum pare, tar kalekinaler namiueim ahik pe pah ke saluh. ^{2u}Doh inggoum kung ate tun hape king kale pe inggeim tar niduh, kara uelsigal tosieim i Pilipai, bo God puk ger nagigeig ke poul tun, kare uaongolo tun tamiueim tar uel-

hire tauete uapopokoho tun toro Uelhire Uaia gero nanono tamiuoum, gitiempe o burehe per uelmatan. ³Temaeit inggoum kung banga katongo manasa pare, tar uelhire king guatageim ahik pah king uelhire uagis ue king guata uasa, kara hik pah king uelour tamiuoum.

^{4v}Bo inggeim puk, God katongompe ke bang paroko tar hauene ring guatasieim, kare heir toro Uelhire Uaia rone ring uelhire tauetesieim tamiuoum. Doh inggeim ahik pah king uauaha tasir tamat, bo king uauaha tang God gere uedanga teremi nimalareim. ⁵Doh inggoum pono mu ate pare, inggeim ahik pah king me menmene uahihiana puk tamiuoum. ⁶Kara hik pah king guata uaouo maring gehe tenami inetoum, ge God pe e banot e hire pare, inggeim ahik pah king guata paar. Doh inggeim ahik pah king kalekinale tar uairana katongo tar hangamiu ue tasir gisiamer tamat.

⁷Inggeim no aposoul Kristo tar binaka king uangoul keipieim tamiuoum. Inggeim paking uahinga tamiuoum tar guata me inet, bo king me uanguangoul siokoro keip tun puk tamiuoum misiana tar tinanana re kaueke pe toso bung tun. ⁸Doh inggeim mi malauelhirintiehe tun tamiuoum, maeit king uaha tun tar hire tauete toro Uelhire Uaia tamiuoum. Inggeim ahik pah king heir puk tono Uelhire Uaia God tamiuoum, bo king heir katongo pono tar tukunumi tar poul tamiuoum, teeit kung matakaluana uaia tun peoum tamiueim.

^{9w}Ro bung uanotoumiueim mu namana huara kompe, ahik tun peem momio inum king kalekinale peme i uantinanina tamiuoum, a marein, kara boung mara hik pah mi heir me niduh me tamata tar kaueke tamiueim ring heir tauete pe tono Uelhire Uaia God tamiu-

uom. ¹⁰Inggoum tekung tur keip tamiueim doh God, karung banga tar haua king guatageim ger kodkodoh, kara uia tamiuoumener tamatang tagorong mana tang Kristo. ¹¹^xGe inggoum pe mu ate king guata sira pe me inggeim tamiuoum ngohina tar tamanar tamata re guata keip pe toso bung tun. ¹²King ualatut, karing uamamahoul, karing uoum keip uaia tamiuoum tar uangoul keip tar niuangoul gere malarain God, ge inggono pe e kilame tamiuoum i lolono tena nittoa, marung la tabila keipinguaoum tar balbalana na nitampopokohon i Heuen.

¹³^yDoha giameher tengkana maetie ring heir dedempe inggeim tar niuaha tang God, teeit tar binaka king me keip pokoseim toro Uelhire Uaia gero nang God tamiuoum, inggoum ahik pah kung me kale sira pare, o la tur puk roono tasir tamat. Ahik! Inggoum kung me uaha uangoul, karung kale sira tang roono pah te Godompe ke heir katongo tono uelhire. Doh roono no uelhire God, o kalekinale keip uaia tun tamiuoumene rung tagorong mana tang Kristo.

¹⁴^zRo bung uanotoumiueim, inggoum kung siokonongua tosono toto tamata God i Judia, gera tagorong mana pono tang Iesu Kristo. Inggoum kung kale uelmahing katongo tosnomio tamatang tenami pang uan ter siokono kompe ka kale uelmahing pemer toto tamatasinar nang God tasir Ju, ¹⁵^ageka uiliatung pous tar Tamata Noman Iesu Kristo doho propet, kara geil liu pono tamiueim. Doh gisin e huais tang God, kare tokouasais tasir tamata uakap. ¹⁶Doh gisina ka uedanga tar tur tane tamiueim tar uelhire tasir gime uanisine mara hikisina pah ra uelkarusis. Tar niguatonene ra guatainisin, gisina ra uamoko toto

dedempe tenas niguata uasa, doh na nimaliana God ke kotpokoso manasa tasisin.

Poul e marang la tapokis poluk i Tesalonaika

¹⁷Ro bung uanotoumiueim, ahik paha puhung baraha tar binaka ka ueluel-tula pakaha liu turusieim tamiuoum, doh inggeim mi namana tapokis manasa tamiuoum. O mana noman! A tukunumiueim ke hiliu nomana tamiuoum, bo inggeim puk ahik pah mi malabobour tamiuoum. Doh inggeim mi marang bangantieh tapokis tun poluk tamiuoum, king uedanga tar bureher lel. ¹⁸Doh inggeim mi marang bangantiehe tun, temaeit mi petutupe tun tar haijala tamiuoum. Doh inggo, Poul ku petpetutup uapoul tar la, bo Satan puk e turtur tane tamiueim. ¹⁹^bGe a haua pe ri uanguangoulusieig, regi niuaha ue nagi keuar, ri turung tur keipig i uoum tar uiniator tar binaka re tapokisime nagi Tamata Noman. Inggono teoum! ²⁰Inggoum ter uiniator, kara niuahar namiueim.

O Mahar 3

Poul ke ualatue tang Timoti tar uapopokoho teres nitagorong manar tamat i Tesalonaika

3^cTar binaka king mahang uanguangoul teileim, inggeim king namana pare, auia raeim teira pepeane i Atens, ²^dkaira ualatue puk tang Timoti, mare la uamamahoul tamiuoum, kare uatampopokoho teremi nitagorong manoum. Inggon a uanotoumiraeim dohe uoho dede tena kalekinale God tar uelhire tauete toro Uelhire Uaia gero nang Kristo. ³^eMaeit ahik me tang sioko ra

^x2:11 Apo 20.31 ^y2:13 2Te 2.13 ^z2:14 Apo 17.5

^a2:15 Apo 9.23,29; 13.45,50; 14.2,5,19 ^b2:19 Pil 2.15-16; 4.1; 2Te 1.4

^c3:1 Apo 17.15 ^d3:2 Apo 16.1-3 ^e3:3 2Ti 3.12

uakanuh keipin me niduh gere pokoso tatan. Ge inggoum pe mu ate uaia tun pare, God ke heir uamatoto tagigeig tar kale tar niduhunin. ⁴Doh tar binaka king uangoul keipime inggeim tamiuoum, inggeim king hirhire uapoul tun tamiuoum pare, inggeig ra turung turung tar mudusieig, kare tokouasaisisina tagigeig. Doh inggoum kung banga katong manasa ke pokoso uakakalahara per hagariono tamiuoum.

⁵Doh ter tengkanonene ku mahang uanguangoul teil baka peo, maeit ku ualatué tang Timoti tar la ate paroko teremi nitagorong mana inggoum. Teeit inggo u sokoro teil tun gete uelour Satan tamiuoum, kare la puk nami kalekinaleeim.

Poul ke uaha ke me hire tapokis pe Timoti

⁶fBo Timoti puk, gine ke pokoso tapokis manasa tamiueim ke la tur pe tamiuoum. Inggono ke me pokoso keip toro ueluatat o uia tun tar nitagorong maneitir eimiuoum tang God, kare tar nimalaelhireitir eimiuoum toso bung uanotoumiu. Timoti ke me hire pare, inggoum mu uoto namana dede haraha tamiueim, doh mu marang bangantiehe tun pono tamiueim, te misiana kompe ring marang bangantiehe pono pe inggeim tamiuoum.

⁷Ro bung uanotoumiueim, temaene king me longoro peeim pare, kung tagorong mana uapopokohoum, doh ter puhonene ke uauahantiehengua tamiueim tar tur uapopokoho tar mamang niduhulik king huataig. ⁸Temaene ring uangoulung uahantiehe tun manaseim, getung tur uatampopokoho dedempeoum tar Tamata Noman.

⁹Inggeim ahik pah mi banotong uaelmatout keip tar niuaha ring heirin tang God tamiuoum tar binaka ring lotu, teeit a burehentieher niuaha tekung heirigioum tamiueim. ¹⁰Doh tar mamang binakalik inggeim mi namana dedempe tenami lotu tamiuoum, maring me banga poluk tamiuoum, karing me heir uanoto baka poluk tar haua re katupa harahain teremi nitagorong manoum.

¹¹hDoh inggeim mi lotu tang God Tamagigeig me Iesu nagi Tamata Nomanieig ura kaleuatoro tar lel maring lameeim tamiuoum. ¹²Karing lotu pono tar Tamata Noman e uanoto baka poluk teremi nimalaelhiroum toso uanotoumiu, kare tasir tamata uakap te misiana sira puk, mi malaelhirintiehe tun pe inggeim tamiuoum. ¹³A Tamata Noman e uatampopokoho teremi nitagorong manoum, maeit mu turung uia uakapa tunoum, karung dedeil tun tar matana God ge Tamagigeig tar binaka re la tapokisiha nagi Tamata Nomanieig Iesu Kristo menia toso tamata dedeil. O mana tun.

O Mahar 4

A niuangoul gere uauaha tang God

4 Ro bung uanotoumiueim, tar tu mana sikoro baka poluk, inggeim king ualatut manasa tamiuoum tar niuangoul, kare hape rung la uakeluk tun peoum tena nimalara God, doh inggoum kung uakeluk tun tar niguatanin. Doh gine daan inggeim mi dangat, karing ualatut uapopokoho tun tamiuoum tar hangana Iesu ger Tamata Noman tar guata sira dedempela tar hagarinin. ²Ge inggoum pe kung namana dede tun tar haua geking ualatut keipigieim

tamiuoum tar hangana Iesu ger Tamata Noman.

³iGod e malara pare, inggoum mu uadedeil tar tukunumi uakapa tun, karung tur uagele toro ur. ⁴jInggoumur tan siok tan siok pakung iate hape rung kaueke katongo pe tar tukunumi tar hagarir dedeil, kara hagarung ueltad, ⁵kara hik pah mu babasira tasir tamata gera tele tang God gera ura ueltebeir.

⁶Doh ahik pono pah mu boho ue mu guata tar hagar uasaninanine toso bung uanotougigeig. Ge a Tamata Nomana pe e turung heir tar niduh a popokohontiehe tun tang mai re guata tar hagarininanine. Ge inggeim pe king hire manas, karing uatagin tamiuoum. ⁷kGe God pe ahik pah ke uamatoto tagigeig tar me uakeluk tar niguataniner sa, bo e malar i uangoul uadedeil keip tuneig tar tukunugig. ⁸lTemaene a tamata gere de tar uakeluk tar ualatutuninanine, inggon ahik pahe de puk tar tamat, bo e de tang God gere heir tamiuoum tar Iabena Dedeil.

⁹mAhik baka poluk me uahingang bolo me uahire tamiuoum tar malaueh hir toso uanotoumiu, ge inggoum pe ke ualasira katongois God tar uelmalahiresioum. ¹⁰Doho mana tun inggoum mu malaueh hir noman toso bung uanotoumiu gera uangoul tar pang Masedonia. Bo inggeim puk mi kula uapopokoho tun tamiuoum ro uonotoumiueim tar uatampopokoho dedempe la tar niguatanin.

¹¹nGine pake terung guata peoum, mu uangoungoul sikor, kara hik pah mu mene tenas kalekinaler gisiameh, karung kaueke katongo kompe tenami kalekinale, karung guata katongo sira manasa tar kalekinale, king ualatut pe-

meeim tamiuoum. ¹²Getung guata nomana inggoum tar niguatanin, song ra turung ueltadangua ponor tamata ge ahik pah ra tagorong mana tang God tamiuoum, kara hik pono inggoum pah mu haono to tasir gisiameher tamata tar poul tamiuoum.

A Tamata Noman e turung la tapokisiha tar me kale uiliodout tokaha tagigeig

¹³Ro bung uanotoumiueim, inggeim mi marang uaate uaia tun tamiuoum tar hauar inete re turung pokoso toso uanotougigeig geka mata uoum, maeit ahikioum pah mu ueldolomontiehe tun misiana tasir tamata ge ahik pah ra uangoul keip tar nitagorong mana tar nitua tapokis tasir tamat. ¹⁴oInggeig i tagorong mana pare, Iesu ke mat, kare tua tapokis, temaeit inggeig i tagorong mana teil pare, God e turung keip tapokis tang Iesu tatan menia tasir tamata geka tagorong man, kara mat.

¹⁵pDoh tena menmene katongo tunur Tamata Nomana te pare, inggeigene ri uangoulur tua tar binaka re la tapokisihar Tamata Noman, inggeig ahik pah teri la uoum liu tas mais geka mata uoum. ¹⁶Ge a Tamata Nomana katongo pe e turung la keip turuha i Heuen tar kula ualeik, a uauanar anggelou uleik menia pono tar kalkalingina no tuil God, kare mais geka tagorong mana tang Kristo, doh ka mata uoum ra turung tua tapokis uakikilang, ¹⁷I muduhia inggeigener tua dohi uangoul haraha tar kot ra siokor kale uiliodout tokahasieig i rana tar langit tar la ueltupar to tar Tamata Noman tar hagarin, maeit ri la siokor uangoul tokaha keip dedengua tar Tamata Noman. ¹⁸Temaeit mu

ⁱ4:3 1Te 5.23; 1Pi 1.16 ^j4:4 1Ko 6.13 ^k4:7 Hib 12.14; 1Pi 1.15-16

^l4:8 Luk 10.16; 2Ko 1.22 ^m4:9 Jon 13.34 ⁿ4:11 Epe 4.28

^o4:14 Roum 14.9; 1Ko 15.3-4,12 ^p4:15 1Ko 15.51-52

uelhire uatampopokoh dedepesioum tar uelhireninanine.

O Mahar 5

Kaleuator gete lahar Tamata Noman

5 Ro bung uanotoug, inggeim ahik pah mi banotong uahuahire uapoul tamiuoum tar uahire tar hingiar binak ue hingiar marein re kotpokosor inetenin. ²Ge inggoum pe mu iate uaia tun tena mareinir Tamata Noman gete kotpoko-some, e ualutara tun misiana tar ueuenaua gere leka uanomo tar boung. ³Tar binaka ra kular tamata pare, “Gine daan a binaka uaia tun inggeig i uangoul uaia manasa tar hiarouon.” Doh ahik me manasan, kare la manasamer uelmahing misiana re uoto hagou per kuah gere marang poh. Doh ahik me tamata re matotong uasiaua tar uelmahingonene.

⁴Bo inggoum ro bung uanotoumieim, ahik pah mu uangoul tar kitkitupun, temaeit tar mareinonene ka uamatotoin ahik pahe matot e ualutara tamiuoum misiana tar ueuenaua gere leka uanom. ⁵Ge inggoum uakapa tun pe o bung tunar luh doha marein. Inggeig ahik paho nanar boung doha kitup. ⁶Temaeit inggeig ahik pah misiana tasir gisiamer tamata gera hohouo puk, bo inggeig i kaueke katongosieig, kari uakeis uanono tun tar haua re lame. ⁷Temaeit tas mais gera hohou gisina ra hohou tar boung, kare mais ra sipak, gisina ra sipak tar boung. ⁸Bo gine o nanar marein peeig, inggeig i kapil katongosieig, kari hiku tar nitagorong man, kara nimalaelhir, ter uatarar nagigeig. A nitagorong manene ri uangoul keip-

isieig ngohina pah tero taku o uatara tar lugigeig.

⁹Ge God pe ahik pah ke uamototo tagigeig tar me kale uelmahing tar nimalianar enon, bo ke uamototo tagigeig, maeit re uelkarusur Tamata Nomana tagigeig Iesu Kristo. ¹⁰UInggono ke mata ueleheir tagigeig, gitiempe geto tuang ue ki mata manas, inggeig i la turung uangoul tokaha keip tatanon tar binaka re lame. ¹¹Temaeit mu ueluaongolesioum, karung uelpoulesioum, misiana rung uoto guata peene daan.

Na uadouhinar meneng ualatut Poul

¹²Gine daan ro bung uanotoumieim, inggeim mi dangata tamiuoum tar ueltada tasisit ra kalekinalentiehe tun i uantinanina tamiuoum, ge gisina pe ra uoum keip, kara kauek, kara ualatut tamiuoum tar niguatar nang Kristo. ¹³Ualasila tun tasisina tar uleik tunur ueltad, karung malaelhir tasisin, teeit tar kalekinalene ra guataisisin. Karung uanguangoul sikor.

¹⁴Ro bung uanotoumieim, inggeim mi dangata uapopokoho tun tamiuoum tar uatagin tasisit ra marapul, karung uaongolo tas mais ra sokor, karung poul tas mais gesir malmaluan. Doh mu uanguangoul sikoro keip tasir tamata uakap.

¹⁵Wanga uanono tun pare, ahik me tang sioko tamiuoum re la lul tar niguataniner sa tar pehahua tar puh geke guatain, bo mu ueluauia dedeisoum, karung uatolaua tar guata uaia dede tasir gisiamer tamata pon.

¹⁶XUangoul keip kompe tar niuaha tar mamang binakalik. ¹⁷Karung lotu dede tar mamang binakalik. ¹⁸YTar mamang inetelik, heir dedempe tar niuaha tang

⁹5:2 Mat 24.42-43; 2Pi 3.10; UGO 3.3 ¹5:3 Mat 24.39; Luk 21.34-35

⁵5:5 Roum 13.12 ¹5:8 Ais 59.17; Epe 6.14,17

^u5:10 Roum 14.8-9; 1Te 4.14 ^v5:14 2Te 3.6,11

^w5:15 Roum 12.17; 1Pi 3.9 ^x5:16 Pil 4.4 ^y5:18 Epe 5.20

God ter puh peonene re uahuahingain God tamiuoumener nang Iesu Kristo tar guat.

¹⁹ ^zKara hik pah mu lomoho tar Iabena Dedeil. ²⁰ Kara hik pah mu ueluelde tar uelhire re la tur tar Iabena Dedeil. ²¹ ^aDoh inggoum mu uatolaua baka tar mamang inetelik ka kulaig, karung kale uanono tar huar uia. ²² Tur gele liu tar kahakahar mamang niguatalikininer sa.

Na uadouhinar uelhire Poul

²³ ^bInngo u dangata tang God ger tang uahiarou, e uadedeil tamiuoum tar mamang hagarilik, kare kaueke tar iabeimiuoum, doh remi ninaman, kara tukunumi e delauana uatuka gete la

tapokisime nagi Tamata Nomaneig Iesu Kristo. ²⁴ God teke kila tamiuoum, inggon a uauaman tere turung guatampe tar ineteninanine.

²⁵ ^cRo bung uanotoumiueim, mu lotu pono tang God tamiueim.

²⁶ Tar binaka rung ueltuparoum toso uonotoumiu gera tagorong mana tang Kristo, mu ueluahesioum.

²⁷ Inngo u kula uapopokoho keip tamiuoum tar hanganar Tamata Noman pare, mu timana ueleheir toro bolobol rone toso bung uanotoumiu uakap gera tagorong mana tang Kristo.

²⁸ Doh na hamhamasa nagi Tamata Nomaneig Iesu Kristo e uangoul teil tamiuoum uakapa tun.

2 Tesalonaika

*No uatorikina ro bolobolo
Poul tasir tamat i Tesalonaika*

O uatorikina ro bolobolo tasir Tesalonaika

Rone o bolobol i loloo toro Baeboul tar timuhur uelhote. Roono ke boloin Poul o la tasir tamatang tagorong man i Tesalonaika, i muduhia kompe tonu uakikilangaro bolobolo inggono tasisin.

O tamat ahik pah ra guata uaia tasir tamatang tagorong mana tar uanon. Maeit Poul ke hire tasisina tar uamoko teres nitagorong mana tang God. Ge tar binaka pe re tapokisiha Iesu, God e turung heir me uabang manate tasisisir tamata uasa.

Inggon e turung uabato pono tasir tamata uakapa ge ahik pah ka uauia tar kale tonu Uelhire Uaia Iesu. O gisiameher tamatang tagorong manang Tesalonaika ra namana pare, ke tapokis manasaha Iesu.

Poul ke kula pare, o tamata gesir sa nas niuangoul tera kotpokoso baka uoum. Gisina tera turung ueluelde tang Iesu. Maeit inggoumener tamatang tagorong mana mung tagorong mana kompe tang God getung kale tar niduh.

O gisiameher tamatang tagorong mana ra namana pare, Iesu ke uahuhutin tar pokos. Maeit gisina ra de tar kalekinale. Bo Poul puk ke hire tasisina pare, inggono katongo ke kalekinalentieh i Tesalonaika. Doh gisina paka kalekinale pon.

I lolono toro bolobolo rone:

A uelhire uakalahar 1.1-2

Uatakai tang God kara uairan 1.3-12

A meneng ualatut tena nilaha Iesu 2.1-17

A meneng uakalahara tar nipileseng tar nitagorong man 3.1-16

A uadouhinar menemen 3.17-18

O Mahar 1

Poul e heir tar niuaha tasir tamat i Tesalonaika

1 O bolobolo rone o la tur tang Poul mes nu Sailas, doh Timoti.

Roono ka bololain tas mais gera uanougoul teil tar toto tamat i Tesalonaika gesir nang God ge Tamagigeig me Iesu Kristo nagi Tamata Nomaneig.

^{2d}Inggeim mi dangata tang God ge Tamagigeig me Iesu Kristo ge nagi Tamata Nomaneig ura heir tar hamhamas, karo hiarouo tamiuoum.

A uelhire uapopokoh tar binakang huata tar niduh

³Ro bung uanotoumiueim, inggeim paking heir tun tar niuaha uleik tang God, teeit remi nitagorong mana inggoum e in kai uateuele tun, karung uelmalauehiresioum. ^{4e}Temaait ring uoto la hahai pe inggeim toro buturunine ra uangoul no toto tamata God, inggeim mi uoto uairana tun tamiuoum tasisin. Inggeim mi guata tar puhonene, teeit tar binaka ka heirir tamata tamiuoum tar uelmahing, kara niduh inggoum ahik pah kung uamaluan, bo kung tagorong mana dedempela tang God.

Na nikedanga God auia tun

⁵Doh inggoum kung kale tur nomana tar niduh, kara uelmahing tasir tamat, bo ginina puk e ualasira tar nikedangar nang God a kodkodoho tun, kare inggoum ra turung aha to ponolasioum i lolono tena Nitoia God kung kale pe tar niduhunine, kara uelmahing. ^{6f}God e guata tar ineter kodkodoh, inggon e

^d1:2 Roum 1.7 ^e1:4 2Ko 7.4; 1Te 2.19 ^f1:6 Roum 12.19

turung heir tar niduh, kara uelmahing tas mais geka guata tar hagarinine tamiuoum. ^{7g}Kare turung uakapa liu tar niduhonene re moko tamiuoum, doh inggon e turung uaongolo tamiuoum, kare tamiueim pon. Doh inggon e turung guata to tar binaka re tur uakalaharain Iesu Kristo menia tosno angelou gesir tampopokoh, kara la keipiha toro luh-luhuna ro hue. ^{8h}Doh inggon e me turung heir tun tar uleikir uelmahing tas mais ra de tang God, kara hik pah ka uakeluk tonu Uelhire Uaia nagi Tamata Nomaneig, Iesu Kristo. ⁹ⁱDoh gisina ra turung heiris tar uelmahing uleikintiehe tun, ger mahang kap, kara turung tur taneis tar lame tar Tamata Noman, kara hik pah ra matotong banga tar bal-balan na nitampopokohon. ^{10j}Tar binakene re lahaion, inggono ra me turung uatakai turin tosno tamata dedeil, kara lutarantiehe tununguar tamata gera tagorong mana tatanon. Doh inggoum pono mu turung uaha keip tasisin, teeit kung tagorong mana tun pe tonu uelhire God geking mene taueteieim tamiuoum.

^{11k}Temaene ring uoto lotu dede inggeim tang God ger nagigeig, tar bang kedanga tenami niguata uaiaoum marung kaleoum tar niuangoulur kodkodoh geke kila uelhiriono tamiuoum tar la uangoul. Karing dangata pon mare tena nitampopokohon e uauoum tun teremi nimalaroum, kare nami niguata uaia rung guata keipig tar nitagorong man. ¹²Inggeim mi lotu maeit ra turung uatakai turinir hanganar Tamata Noman Iesu tamiuoum. Doh inggoum mu turung kale pono tar uatakai. Ginin ka guataig teeit tena hamhamasa menia tena nimalaelhir nagi Godeig, doh tar Tamata Noman Iesu Kristo.

O Mahar 2

A tamata uasa e turung pokos

2 Tar binaka re tapokisime nagi Tamata Nomaneig Iesu Kristo, inggeim mi marang hire tamiuoum tar hire toso bung uanotoumiu, hope ri me uiliodout tokaha pe inggeig tar uangoul keip tatanon. ²Ahik tun pah mu tagorong mana tasisit ra kula pare, na mareinir Tamata Noman ke kotpokoso manas. Gitiempe ge teka kulasina ka longoro mo uelhire o la tur tang God ue o bolobol o la tur tamiueim, ahik tun pah mu uolong porongua, karung namanantieh. ³¹Ahik tun pah mu uamaluana me tamat e boho tamiuoum.

Ge a marein peon ahik pahe turung kotpokos e tuka tar binaka geta turung tar mudur tamata tang God, kare kotpokoso uakalahara tun ponor tamata uasa gere uoto uelsigala tena ualatur God. Doha puhonene tere pokoso baka uoum. ^{4m}Doh inggonor tamata uasa e turung uairana katongoin, kare uelmatan tar mamang inetelik ra uoto lotuigir tamata pare, nas god, song re lek iuma tena umang lotu God ger dedeil, kare kula katongoin ter God. ⁵Inggoum kung malabobour tar binaka ku uangoul taguo tamiuoum, karu hire tamiuoum tar inetenine? ⁶Doh inggoum mu ate tar huar inete re tur tane tar tamatonene daan, maeit ahikiono pahe uolong kotpokoso uakalahara tun mare pokoso tunumeono tar binaka ke uamatotoin God.

⁷Ge na nitampopokoho per tamata uasa gine manasa re kalkalekinale uaou, bo a siokor inete puk e turtur tane sikoro harahene daan, e turung tur tane dedempela e tuka geta la kale

^g1:7 1Te 3.13 ^h1:8 Ais 66.15 ⁱ1:9 Ais 2.10 ^j1:10 Kol 3.4

^k1:11 Kol 1.9; 1Te 1.2-3 ^l2:3 1Ti 4.1; 1Jo 2.18; 4.3 ^m2:4 Isk 28.2; Dan 11.36

liuion. ⁸ⁿDoh gete tur uakalahara manasar tamata uasa, Iesu ger Tamata Noman e turung tung pous keip tatanono tar romo nar uauan, kare uasuasa hihir keip tun tatanono tar balbalana na nitampopokoh gete la tapokisihaon.

^{9o}Na nilamer tamata uasa e turung la keipime tena nitampopokoho Satan, kare touo tar bureher kahakahar nitou, kara uaparoko ger boh, kare touo tar inetenine ri toboulugieig, ¹⁰kare turung ualasira tar mamang inete uasalikinine re uelour tas mais geka uasais, teene gisina ra de, kara hik pah ra malauelhir toro man, ge pake tero uelkarus tasin. ¹¹⁻¹²A puh e turung pokoso pare, mais ge ahik pah ka tagorong mana toro man, God e turung ualelio tun teres ninamanasin mara turung tagorong mana tar bohonin, kara uahauaha kompe tar niguataniner sa, gisina ra turung ualakouhunguais.

Tur uanono keip tereng nitagorong man

^{13p}Bo inggoum ro uanotoumieim gere malauelhirintiehe tunisir Tamata Noman, inggeim mi heir dedempe tar niuaha tang God tamiuoum, teeit tar uakekenener binaka God ke uamatoto manasa tamiuoum pare, mu turung udeil tena nitampopokohor Iabena Dedeil doh teremi nitagorong mana toro man. ¹⁴Inggono ke kila tur tamiuoum toro Uelhire Uaia geking hiresieim tamiuoum, maeit mu turung uelpakahaoum tar balbalana na nitampopokoho nagi Tamata Nomanieig Iesu Kristo.

¹⁵Temaeit inggoum ro uanotoumieim, mu tur uanono keip dede tar haua king ualasiragieim tamiuoum i lolono tenami boloboleim ue tar haua king mene ualasira tunugieim tamiuoum.

¹⁶Inggou u dangata tenagi Tamata Nomanieig Iesu Kristo, doh God ge Tamagieig gere malauelhirintiehe tun tagieig, doh tar nipoul menia tar hamhamasar nanon e uaongolo tagieig, kare heir tar niuangoul uaia gere moko dede. ¹⁷Doh tar uatampopokoho tamiuoum tar mamang niguatalikir uia, kara uelhireniner uia.

O Mahar 3

Dangata tang God me lotu mare poul tamiueim

3 Ro uanotoumieim, a uadouhinar men, inggo u dangata tamiuoum tar poul tamiueim tar lotu maeit ro la uakapa tun no uelhirer Tamata Nomana toro mamang buturulik mara ueltada uaia tunin misiana kung ueltada pe inggoum. ²Mu lotu pon, maeit re uelkarus God tamiueim tasir tamata uasa, kare tar tamata uasantiehe tun, ge o gisiamehe pe ahik pah ra tagorong mana toro Uelhire Uaia.

³Bor Tamata Noman a uauaman e turung uatampopokoh, kare kapil tamiuoum tar tang sa. ^{4q}Inggeim king tagorong mana tun tar Tamata Nomana pare, inggoum kung guat, karung turung guata dedempela tar haua king ualatohogieim. ⁵Inggou u dangata pono tar Tamata Noman mare uanaman manate uaia tun tamiuoum tar nimalauelhirir nang God, kare umatoto tamiuoum marung me tur uapopokoho misiana ke guata pe Kristo.

Tagin dehen tung manguh

^{6r}Ro uanotoumieim, inggeim mi ualatoho tun tamiuoum tar hanganar Tamata Noman Iesu Kristo tar uareing tasir tamat gesir manguh, kara hik pah

ra uakeluk tar ualatut gekung kale turugioum tamiueim. ⁷sGe inggoum pe mu ate uaia tun pare, hape pakung petut pe tar niguatar namiueim. Inggeim ahik pah king manguh tar binaka king uangoul keip tamiuoum. ⁸tInggeim ahik pah king ein teres nieinir gisiameh a tabung bulau. Bo inggeim ahik tun momio inum ring kalekinale pe tar marein, kara boung mara hik me niduh re pono me tang sioko tamiuoum. ⁹uInggeim king banotong dangata tamiuoum me nipoul, bo king de puk, king pe pare, marung petutoum tamiueim tar uakeluk tar niguata uaiar namiueim. ¹⁰Ge tar binaka pe king uangoul keipimeeim tamiuoum, inggeim king hire baka tar puhung ualatutene, ahik pah mu uahue me tamata gere de mate kalekinale tar ein me niein.

¹¹vInggeim king mene tar puhene, teeit inggeim king longoro pare, o gisiamehe tamiuoum o manguh, ahik pah ra kalekinale tagu, gisin o keipkeip uelhirelik, kara uapekout tenas kalekinaler gisiameh. ¹²wDoh tar hangana nagi Tamata Nomaneg, inggeim mi ualatoho tun, karing uatagin tasir tamata tar puhonene mara uangoul uakodkodoh, kara kalekinale, kara bulaua katongo teres niein.

¹³xDoh inggoumeitir gisiamehe ro bung uanotoumiueim ahik pah mu manguha tar uangoul uaia, karung guata uakodkodoho uaia dedempela.

¹⁴Gete kaein me tang sioko ahik pahe uakeluk tar ualatohonine ka bolo uahiuag toro bolobolo rone, banga uanono tun tatanon, ahik pah mu ueldokout keip tatanon mare bang paroko katongoiono pare, ke guata uasa pe, kare matalangua. ¹⁵yBo ahik pukuoum pah mu guata sira tatanono tasir uelmatan, guata sira kompe paha tahimiu tatanon, karung ualatut.

A uadouhinar uelhire

¹⁶Inggo u dangata tar Tamata Nomanakatang ger tang uelhiarou, heir mo hiarouo tamiuoum tar mamang binakalik, doh tar mamang hagarilik. A Tamata Noman e uangoul tagu tamiuoum uakap.

¹⁷Inggo Poul ku bolo katongo tun toro bolobolong tar niuaha rone tar limoug teru uoto bolo peo tenag mamang bolobololik te mara bang paroko tunigir bolobolo ku bologio.

¹⁸Na hamhamasa nagi Tamata Nomaneg Iesu Kristo e moko tamiuoum uakapa tun.

1 Timoti

O uakikilangana ro bolobolo ke boloin Poul tang Timoti

O uakikilangana ro bolobolo tang Timoti

Rone tero uakikilanganaro bolobolo ke boloin Poul tang Timoti i lolono toro Baeboul tar timuhur uelhote.

Timoti inggon a tang siokor tamat a kalan, doh inggon a tamatang tagorong man e la tur tar uan i Listra tar pang uan i Galesia. Tinanon ra la tur ro bungun i Judia. Doh tamanon ra la tur ro bungun i Grik. Poul ke kale tang Timoti ke la uiloho tagu tatanono tar guata tena kalekinale God Apo 16.1-3. Inggon e baka sira pare, Timoti ke kotpokoso sira pare, a tamatang uoum keip tar lotu.

I muduhia Timoti ke kotpokoso sir a tamatang uoum keip tar lotu gere moko tar uan i Epeses. Kare bolola Poul toro pas rone tang Timoti.

Uakikilangar inete ro menmenein ro bolobolo rone te pare, Timoti pake tagin teil geta guata uasa mo gisiameher tamat, kara uasuasa teres nitagorong manar tamat. O tamata sira pare, gisin a giniamhe sioko tun res ninaman, kara ualasira pare, a inetenine tar koto ginin ahik paha uiantiehe tun, doha tamata gere marang kale tar nitua ger mana tun, inggono pake ueil bak, kare haik pahe le (4.3).

A uatorikinar inete uleik ro uelhirein ro bolobolo rone ter niguata uaianine re banot e kauেকে uatoro uaia tar lotu, doh na kalekialer sios. O bolobolo roon o uelhire tauete uakalahara pono tang mai umatoto tunur tamata sira pare, re banot e kotpokoso sir a tamatang kauék, kara tamatang kalekinale tar sios.

O uadohina ro uelhire toro bolobolo rone, o uelhire tang Timoti pake uangoul sira pare, na tamatang kalekinale uaia tun Iesu Kristo, doh pake guata uaia kahakaha tar niguata uaia tasir kahakahar toto tamatasiner bulout, doho kuaha tar sios.

I lolono toro bolobolo rone:

A meneneng uakalahar 1.1-2

A ualatut e lain tar sios, doh no tamatang uoum keip 1.3-3.16

A ualatut tang Timoti tena kalekinale 4.1-6.21

O Mahar 1

Poul e heir tar niuaha tang Timoti

1 Inggo Poul, ge na aposoul Iesu Kristo, ka umatoto turuio tar kalekinaleene tar ualatohor nang God gere uoto uauedil tagigeig me Iesu Kristo geri tagorong mana teilisieig.

²Timoti, ingga misianahampe paha tuguo tun gitier siokono pe regira nitagorong man.

God ge Tamagigeig me Iesu Kristo ura heir tar nimalaelhir keip tar niuel-dolom, kaura uahiarouo tamiuoum.

Poul ke uaongolo tang Timoti mare tur tane uapopokoho tar niualasira ger boh

³Tar binaka ku lao i Masedonia, inggo ku kula uapopokoho tun totomua tar uangoul i Epeses, karo kula tane tasir gisiameher tang ualasira gera to pukula tenas giniamheher mene ra ualasira pe.

⁴^aHire tasisin, ahik pah ra uakapa puk tenas binaka tar namnamanantiehe tar tengkanar kiukiu, kara uakenua tar rer ge ginina pe e uoto uamenemene puk tasisin, kara niguatanin ahik pahe matotong poul tenas niuangoulusina tar tagorong mana tang God. ⁵A tengkana

maeit a ualatohonene ter uelmalauehir gere la tur tun tar kolono uaia ger delauan, kara niate tar hauar ineter uia doha sa, kara nitagorong man ger uia tun.

⁶Bo o gisiamehe pukur tang ualasira ka lih sioko tar puhonene, kara mene kompe tar uelhireniner tabo tengkan. ⁷Gisina ra malara kompe ra kilais o matatang ualualasira tena ualatut Moses. Gisina ra namana katongois pare, ra mene uapopokoho uaia tun tar ualatut, bo gisina puk ra tele tar haua ra menmenein. ⁸^bBo inggeig i ate a ualatutunin auia geta uakeluk uaia tunig. ⁹Kari ate pono pare, a ualatu-tunin ahik pah ka guata uatuhaig a nasir tamata ger kodkodoho nas niguat, bo ginin a nasir tamata ge ahik pah ra longor, kara uakeluk tananin. Doh a nasisit re tokouasais tang God, kare mais gera de tono uelhireon, kare mais geka tung pous toso tinas doho tamas, kare maisir tang tung pous tamat. ¹⁰A ualatutunin a nas ponor uraur, kare maisir toking bulout ue a toking kuaha geura ueluelkale katongois, kare tas gera uabulaua tasir karabus, kare maisir bohoboh, kare maisir tang boho tola tasir gisiameher tamat, kare mais ponomper tamata gera guata tang hingiar hagar ger sa gere ualasira sioko tar niualasira ger kodkodoh, ¹¹gere la tur tar uinatoro na ro Uelhire Uaia geke uaponoin God totoguo tar hire tauet.

Poul ke uatakai tun tang God ke ueldolomo pe tatanon

¹²^cInggo u uaha tun tang Iesu Kristo ge nagi Tamata Nomaneig, teeit ke uamatoto peono totoguo tar kalekinaleene, kare heir totoguo tar nitampopokoh, doh ke tagorong mana teil tun pare, inggo u

matotong guata tena kalekinaleon. ¹³^dO man! Sioun inggo ter tang sioko nomana ku menmene uasa tang God, kara mamantou, karu uoto uiliatung tosono tamaton, bo Inggono puk ke ueldolomo totoguo, teeit inggo ahik pah ku ate tar inetene ru guatain, kare ahik meg nitagorong mana tang Kristo. ¹⁴A uleikintiehe tunur nimalauehir keip tar niueldolom e la tur tenagi Tamata Nomaneig ka heir manasain totoguo menia pono tar nitagorong man, kara uelmalahir gere moko tang Iesu Kristo.

¹⁵^eA puhung kulene ter puhung mana tun, kara tagorong manain, Iesu Kristo ke laha i koto tar me uelkarus tasir tamata uasa, doh inggo ter tang siokor tamata uasantiehe tun tasisin. ¹⁶Bo maeit puk ka ueldolomoio, teeit Iesu Kristo e malara tasir tamata ra bang, kara ate pare, inggon a hamhamasalik tun na niguata tasir tamata uasa. Temaeit ke guatono totoguo tar puhene mara banga tor tamat, kara tagorong mana pono tatanon, kara kale tar nitua gere moko dedengua. ¹⁷Inggono ter Kristo gere toia dedengua, ahik pahe matotong mata tagu. Inggeig ahik pahi matotong bang huara tatanon, ge inggono pe ter God nomana tun. Temaeit inggeig i ueltada dede, kari uatakai tatanono tar mamang binakalik. O mana tun!

Timoti o uatampopokohia tar uiliatung tar niguata ger sa

¹⁸Er tug Timoti! Gine tenag ualatoho ru heirin totomua. Namana dedempe toro uelhire geka meneinir propet sioun tar haua re turung pokoso totomua. Uakeluk uaia tun tar meneninanine maro uiliatung uaia ingga tar tur keip toro Uelhire Uaia gero man, ¹⁹karo sanga dede tereng nitagorong mana

^b1:8 Roum 7.12,16 ^c1:12 Apo 9.15; 1Ko 15.9-10; Gal 1.15-16

^d1:13 Apo 8.3; 9.1-5 ^e1:15 Luk 19.10

tang Iesu, kara niate tar huar uia doha sa. Ge o gisiamehe per tamata ka ueluelde taninin, kara mamantouo teres nitagorong man misianangua tar parau gere horo kout tar lolou. ^{20f}Himeneus me Aleksanda ter tang torik tasisin teku uamoko uoumusio tar limana Satan mara uanamang manateis mare haik pah ra menmene uasa uapoul tang God.

O Mahar 2

A ualatut tar lotu

2 Inggo u kula uapopokoho tun to-tomua tar guata uakikilanga baka uoum menas lotur tamata uakapa tun. A puhung dangata ro dangataia tang God te pare, dangata tena niueldolomon e laha tasisin, karo heir tar niuah e la tatanon. ²Karo guata pono menas lotur toia, kare mais ponompe ra uoum keip toro kalekinale uleik mari uangoul keip kompe inggeig toro hiarou, kari pepe bukbuk, kara kodkodoho nagi niuangoul tar matana God, kari uangoul uadedeil. ³Doha niguatanin auia tun, e uauaha tang God ger tang uelkarus tagigeig. ⁴Ge inggono pe e malara tasir tamata uakapa tun ra siokor udeil, kara ate uaia tun toro uelhire gero man. ⁵Ge a tang sioko puk per God, kara tang siokor tamatang tur i uantinana tang God, doh tasir tamata tar hire uain tar uelhire, inggono te Iesu Kristo, ^{6g}geke heir katongoin tar bulaua tapokis tasir tamata uakap, ka ueluatat tauete tunin tena binaka tun. ^{7h}Doh ter tengkanono temaene ka uamatotoio pare, a tamatang hire tauete tar uelhire, kara aposoul tar ualasira tasir gime uan ge ahik paho Ju tar nitagorong

man, doh toro uelhire gero man. Inggo u uamana tun ahik pahu boh!

⁸Temaene iar butur rung uelpokosoum, inggo u malara tasir bulout ra lotu keip tar limas a dedeil ra hue kai pe tang God, kare haik me nimalian, kare me uelpereir. ⁹ⁱDoh inggo u malara pono tasir kuaha ra kaleuatoro uaiais, ra hiku, kara loho tar ineteniner uia tar matasir manai, kare haik pah ra uamatmate hamas tar ulus ue ra uamoko teil tar ineteniner abeabe iauiaueler mataiantiehe tun ue ra kukuete me kabononiner abeab re uamatmate hamas tun ue a hikhiku ger i rana uainir bulauan. ^{10j}Bor niguata uaia a niuamatoto tun tasir kuah gera kula pare, ra lotu tang God.

¹¹Gisinar kuaha paka uangoul bukbuk, kara kale uahiu katongois. ^{12k}Inggo ahik pahu uahue tasisina ra mene ualasira ue ra i rana tasir bulout. Gisina paka uanguangoul sikoro kompe. ^{13l}Ge God pe ke tuha uakikilanga tang Adam a bulout song a kuah Eva. ^{14m}Doh Adam ahik pah teka bohoin. Inggono ter kuaha teke bohoin Satan, kare kategongua tena ualatut God. ¹⁵Bo o kuaha puk ra turung uauedeil tois tar binaka ra poh geta tagorong mana dede tang Kristo, kara malauelhir tasir gisiameh, kara dedeil, kara uakodkodoho katongois.

O Mahar 3

O tamatang uoum keip tar lotu

3 ⁿA puhung menenine a puhung mana tun, tang mai re malarantiehe tun tar kauek, kare uoum keip tar kalekinaleniner nanar lotu, a kalekinaleon

^f1:20 1Ko 5.5; 2Ti 4.14-15 ^g2:6 Roum 3.29-30; Gal 1.4

^h2:7 Apo 9.15; Gal 2.7-8; 2Ti 1.11 ⁱ2:9 1Pi 3.3-5 ^j2:10 1Ti 5.10

^k2:12 1Ko 14.34 ^l2:13 Uak 2.7,21-22; 1Ko 11.8-9

^m2:14 2Ko 11.3; Gal 3.1-6 ⁿ3:1 Apo 20.28

auia tun, kara uoto ueltadantiehe tunin. ²Ge a tamata pe gere malar a tang uoum keip, inggono paka tamata uaia. Ahikir tamata pah ra uoto mene tatanon, kare na tang siokon siounur kuah, kare haik paha uoto sipak, kare kaueke uaia katongoin, kara uoto ueltada tunin, kare uoto kilauatoro dede tasir pokos, kara tang ualasira uaia tun. ³Doh ahik pono pahe uoto inumuntiehe tar inumunitier popokoh, doh ahik paha uoto nimaliana ualahur, bo a uangangoul sikoro puk, doh ahik paha uoto nimalian, kare haik paha uaha mani. ⁴Kare uoto kaueke uaia dede tasir tamatang tena um, kare uelhire uatabila uaia dede tun toso bung tun mara longlongor, kara ueltada uaia tun tatanon. ⁵Ge a tamata pe ge ahik pahe kaueke uaia tasir tamatang tena uma katong, hapengua re banotong kaueke uaia peono toso toto tamata God?

⁶Doh inggonor tamatang uoum keip ahik pah song re hiku pukume tar lotu mare haikiono pahe uakaiain ka uamatoto pein tar timuhur kalekinaleon, kare kalengua tar siokonor uabang manate geka heir uoumin tang Satan. ⁷^PDoh inggonor tamatonon ra ueliate uaia tuninir tamata ge ahik pah ra tagorong mana tang Kristo pare, a tamata uaia, doh mare haik Satan pahe matotong uelour tatanon. Kare kaleono me nimal.

O tamatang poul tar kalekinale tar lotu ra uakeluk tar hagar uaia

⁸Te misiana ponompe tasir tamatang poul tar kalekinale tar lotu. Gisina o tamata uaia pono ra ueltadantiehe ponoisir tamata uakap, kare haik paho uoto inumuntiehe tar inum popokoh, kare haik pah ra uelour tar kale tenas manir tamat. ⁹Gisina paka kale uanono keip toro uelhire gero man

gera tagorong manain tar niate pare, ka guata uakodkodoh. ¹⁰Gisina paka uedanga bakais ge para guata uaiasin, song ra banotong guata tar kalekinaleon.

¹¹^QMisiana ponompe tosnosio kuahasin, nas niguatasin paka uia, kara ueltadais, ahik paho uoto ngur, kara uaateis tar kaueke katongois, kara guata keip toro mana tar mamang inetelik ra guatain.

¹²A tamatang poul tar lotu, inggono mena tang siokon siounur kuah, kare uoto guata uaia toso bung tun, doh tasir tamata gera uangoul tena umon. ¹³Mais ka guata uaia tun tar kalekinaleon, o tamata uakapa tun ra turung ueltadantiehe tunungua tasisin, doh ahik pah ra matal tar hire tauete teres nitagorong mana tang Jesu Kristo.

God ke uamakaha tar niualasira ger man

¹⁴Inggo u tagorong mana teil tun pare, ahik pahi reh, karu me pokoso totomua. Bo inggo ku bolo uoum pukumpeme tar puhuninanine totomua, ¹⁵maeit getu otoungo tar lame, ingga o atensioun manasa hape ra uakeluk per tamat, kare hape ra ueltada pe toso toto tamata God, ge o toto tamata pe gera tagorong mana tang God ger tua, gisina tero tur doh tesir tengkanana ro uelhire gero man.

¹⁶^rAhik me dangata tar puhonene, a parakukuh tar uakalahara tar nitagorong manar eigigeig:

Inggono ke kotpokoso sir tagigeigir tamat,

doha Iabene ke ualasira uakalahara pare, inggon a kodkodoh.

O angelou ka bang,

doh no ueluatatono ka hire tauetein toro mamang pang uanilikane i kot.

^o3:2 Tai 1.6-9 ^p3:7 2Ko 8.21 ^q3:11 Tai 2.3

^r3:16 Mak 16.19; Jon 1.14; Kol 1.23

O tamatang gane i koto ka tagorong mana tatanon.
Inggono ka keip kaiain i rana tar uaning uinator.

O Mahar 4

A uatagin tang Timoti

4 Bor Iabene Dedeil ke hire uakalahara tun pare, i muduhia o gisiamer tamata ra, turung tar mud toro uelhire gero man, kara uakeluk tar iabene ger bohoboh, kara uakeluk tar ualasira ger sa gera hireisir liouana uasa. ² Temaeit a nualasira gere la tur tasir tamata gesir tang uelhire kokop, karo bohoboh, ge gisina pe ahik pah ra banotong ate a huar ineter uia ue a sa, gisina ngohinar kapokononiner mat.

³ Gisina ka kula tane tasir tamat, ahik pah ra le, kara kula tane pono tasisina ra toub tar giniamer niein. Bo God ke tuha tar mamang nieinilik auia tas mais gera tagorong man, kara ate toro uelhire gero man tar ein tananin, kara heir tenas niuaha tang God. ⁴ Ge a mamang inetelik pe geke touoig God auia uakap. Inggeig ahik pahi ueluelde tananin, bo i kale keip kompe tananin tar niuah. ⁵ Teeit ginin a niuadedeil tur manasa toro uelhire gero nang God doha lotu.

A ualasira uaia tasir tamatang poul tar lotu

⁶ Gete ko heir nomana tar ualatoninanine toso uanoutougigeigisine ra tagorong mana tang Kristo, Timoti, ingga song tena tamatang kalekinale uaia tunumpe Iesu Kristo, ka uaein tunuia toro uauamana tar tagorong man, karo uakeluk uaia tun tar nualasira ger kodkodoh. ⁷ Ahik paho uakapa to puk tenang binaka tar ualongoro tar

kiukiu, doha uelhire ueltebeir ger tabo tengkan. Bo ingga o heirintiehe kompe tenang binak mare ate uaia tunuia tar hua na nimalara God, karo uakeluk. ⁸ Ge a inete pe gere uoto uatagala puk tar tukununar tamat, auiampe, bo ahik puk pahe la dede tagu, bor uatagalang tar iaben ter uaiantieh, ge teka ualapa-gaha to pelain pare, e la tokahain tar nituaene ri uangoul keipisieigene daan menia tar nitua gere la moko dedela. ⁹ A puhonene ku nihing mene pukuio o mana tun. O tamata paka siokor uauia kompe tar uakeluk, kara tagorong man. ¹⁰ Inggeig ki petutup tun, kari kalekinalentieh, teeit ki siokor uamoko tun pe inggeig teregi nitagorong mana tang God ger tua gere uoto uauideil tasir tamata uakap, teesine tunumpesina ra tagorong mana tatanon.

¹¹ Ualatoho karo ualasira uakalahara tun tar inetenin tasisin. ¹² Ahik paho uamaluana tasir tamata ra banga sira totomua pare, a tatamatalik puk, teeit a kalana pea, bo o uangoul siro mara banga tor tamatang tagorong mana tang Iesu tenang nipilesa tar hua ko ualasinga tasisin, hape ro uangoul pe, kare hape tereng nitagorong man, kare tereng nimalauelhir tasir gisiamer, kare tenang niuangoul ger delauan. ¹³ Doh getu otoung sikoro tar lame, ingga o banga dedempe tonu Uelhire Uaia God karo uelhire ualasira tasisin.

¹⁴ Ahik paho malabobour tar hua geke heirheir pukin God totomua tar uauasir propet tar binaka ka uaponor mamahoholiking tar lotu tar limas totomua. ¹⁵ Lihing siokor paina baka tar puhonene, kalkale hihir tun tananin, maeit ra siokor banga tor tamata uakapa tun tar hua ko guatagia. ¹⁶ Kaueke uaia tun tenang niuangoul, kara hua ko

^s4:3 Uak 9.3; Roum 14.6; 1Ko 10.30-31
^v4:12 Tai 2.15 ^w4:14 2Ti 1.6

^t4:7 1Ti 1.4 ^u4:10 1Ti 2.3-4

ualasiraig, uakeluk uakodkodoho dede taninin. Geto uakeluk uaia tuna, God e uaudeil totomua, doh tas mais pono ka lorigoro totomua.

O Mahar 5

A giniameher ualatut

5 Ahik paho louara ue o perere me mamahoholiking tar lotu, memene hamas kompe misiana paha tamoum tatanon, karo guata sira tasir bulout kalan o bung tahim, karo guata sira tasir kuaha mahoh o bung tinoum.

²Tasir kuaha kalan, ingga o guata sir o bung tatahimulik, karo namana uaia tun tasisin.

³Bang parok, karung kaueke tasir kamobo geke mata nosio bulout gera katupantiehe tun tar inet, kara uoto uangoul mes paheis. ⁴Bo me kamobo ge kaeis ro bung tun ue kaeis mo bung tubun, gisina paka guata baka uoum tena kalekinaler Tamata Noman i lolono toso bung tahisilik banbanoto tun, a bulauana ka kaueke pemesina tasisin, teeit a puhonene tere uauaha tun tang God.

⁵Bor kamobo geke mata na bulout, doh ahik tun me tamata re banga uatoro tatanon, inggono pake tagorong mana teil tang God, kare lotu dede tar marein, mer boung tar dangata tang God me nipoul. ⁶Bor kamobo geke mata na bulout, kare uakeluk kompe tena nimalaelhir, inggon a matar iaben, gitiemper tua peon. ⁷Heir tar ualatutunine tasir tamat, maeit ahik me tang siokor tamata ra tohotolain me pahene me inet.

⁸Bo mai ge ahik pahe banga uatoro toso tahinalik, teesine tunumpesina ra uangoul tokahasina tar siokor um, inggono ke uolih tar nitagorong manener eigigeig, kare santiehengua tas mais ahik pah ra tagorong mana tagu.

⁹Bolo uahiua kompe tar hangasir kuaha nimata liu ge resi tonomor hangaulur krismas ge ahik pah ka kalkale hahaiia mo bulout, ¹⁰kara ueliatein na niguat, auia, kare uoto kaueke uaia toso bung tun, kare uoto kilauatoro dede tasir gime uan gera pokos, kare uoto uaha uangoul tasir tamata gera tagorong mana tang Kristo, kare uoto poul tar guata tar uelhiarou tasir tamata gera pepe keip tar niduh, kare uoto heir katongo ponoin tar guata tar kalekinaleniner uia.

¹¹Ahik paho bolo uahiua tagu tar hangasir kuaha kamob gesir kalan, teeit gete pokoso res nimalaelirisina tar marang le poluk, gisina ra turung tar mudungua tang Kristo. ¹²Teeit gisina ra turung kedang uasanguais geta katago tar ualapagaha geke guata keipin tasisina sioun. ¹³^xA giomeher puh, gisina ra uakapa to kompe tenas binaka ra la hahaiia pe toro um, kara ngur tasir gisiameher tamat, kara uoto uapekout tenas kalekinale, karo tang memene tane tenas ueluatatar gisiameher tamat, karo keipkeip uelhire. ¹⁴^yTemaeit ru malaro tasir kuaha kamobo gesir kalana ra le mara poho poluk mo keketik mara kaueke katongo polukis tenas um, maeit ahikisina pahe kusais me puh gera menein nosio uelmatan. ¹⁵Ge o gisiamehe uoum pe tasisina ka turung tar mud tang Kristo, kara uakeluk tang Satan.

¹⁶Bo me kuaha gere tagorong mana tang Kristo, doh kaeis mo tahinalik mo kamob, inggono pake kaueke tasisin, maeit ahikisine ra kaukaueke teil tar lotu pahe ponois me niduh tar kaueke tasisin. Bo a lotu e banotong poul puk tasir kuaha kamob gera uangoul mes paheis, kara katupa tar inet.

¹⁷O tamatang uoum keip tar lotu geka kalekinale uaia tun, paka ueltadantiehe tunis, kara bulaua uaiais, teesine tunumpesina ka kalekinalentiehe tun tar hire tauete, kara ualasira tono uelhire God. ¹⁸^zGe o bolobolo pe o hire teil pare, “Ahik paho sanga tane tar uauanar kau tar ein tar binaka re reihreih teil tar sokong raes-uit tar binaka re pioko liu tar kapokononin,” karo kula teil pono pare, “A tamatang kalekinale ra bulauain.”

¹⁹^aAhik paho uolong uakalahara me puh gere kusain me tamatang uoum keip tar lotu, e banoto tun geto longor toa me tang torik ue me tang touono ra hire. ²⁰^bLoulouara to tunumpe tar matasir manai tang mai ra tuparain ke guata uasa, maeit ra turung tagininguar gisiamehe geta guata sira ponois.

²¹Inngo u kula uapopokoho tun to-tomua tar matana God me Iesu Kristo doh tasir angelou dedeil i Heuen, tar uakeluk tun tar ualatohonine. Ahik paho lihing siokor pain, karo uamokontiehe puk tenang niuaha me tang siokor tamat.

²²Ahik paho uolong tuha toro lunar tamata geke tanganain tena kalekinale God, doh ahik paho uatagulaia teres niguata uasar gisiameh. Kaueke uaia katongoia maro uangoula, a delauan.

²³Ahik paho inum kodomo puk, bo ingga o inum keip ponompe me sikir bino mare poul tar tukunumua torongo mat.

²⁴Namana dede, a niguata uasa ger eisir gisiameher tamat e uoto kalahara uakikilang, doh ginin e la uoto kotpokoso uakikilangangua tar buturung kedang, bo o gisiameh e uoto ouo baka teil res niguata uasa, song re la kalahar i muduhia. ²⁵Ter siokono kompe tar niguata ger uia e pokoso uakalahara uaia

tun, doha giniameher niguata uaia ahik pah ra turung ateing, bo e turung kala-harampe i muduhia.

O Mahar 6

A giniameher ualatut poluk

6^cO tamatang tagorong mana ueltadantiehe tun tosnosio tang kaupek, maeit ahikir hangana God pah ra memene uasain, kara haua geki ualasingieig. ²^dGeta tamatang tagorong mana pono nang tamatang kauka tang Kristo, ingga ahik paho namana pare, a uanotoum tatanon, kara hikingua paho ueltada tatanon. Innga o kalekinalentiehempes, ge ingga pe o poul toso bung uanotoum, gisin o tamatang tagorong mana tang Kristo, doho malauelhir pono tasisin. Gininanine ter inete ro ualasingia, karo mene uapopokoho tun tasisin.

A niualasira ger boh, doho uaha mani

³^eGete me tang sioko re ualasira me giniamehe siokor niualasir, doh ahik pono pahe uauia tar uakeluk tono uelhire Iesu Kristo ger Tamata Noman, doh tar niuangoulur uia ger nang God, ⁴a tamaton e uakai kompein, ahik me inete re atein, kare marang uelperer, kare marang uelkoi tar tengkanar puhung uelhire. Gininanine e uakotpokosongua tar ueluelgehe, kara ueluelkoi, kara ngur tasir gisiameh, kara uelsae. ⁵^fGisinar tamatasin ra uoto uakotpokoso kompe tar nitabila uasa, kara uelperer, ahik pah ra banoto ra ate a hauar uia ue a hauar sa, doh ahik pah ra ate tagu toro man. Gisin ra namana ra uauaha tang God, kara ueltada tatanon mara kale menas bureher inet.

^z5:18 Ual 25.4; Mat 10.10; 1Ko 9.9 ^a5:19 2Ko 13.1 ^b5:20 Epe 5.11

^c6:1 Epe 6.5 ^d6:2 Plm 16 ^e6:3 Gal 1.6-9 ^f6:5 2Ti 3.8; 4.4; Tai 1.14

^{6g}Bo tar uauaha tang God, doh tar ueltada tatanon, e uatang inete tun tagigeig geti unga uaha tun tar haua ki kaleig. ^{7h}Ge inggeig pe ahik pahi kale teil me inete ki pokoso peane i kot, doh ahik pono pahi matotong kale teil me inete geti mat. ⁸Inggeig i turung uaha gete megi niein, kare nagi gomon, teen-inanine tere uauaha tagigeig. ⁹Bo gisis ra malara menas bureher mani ra turung punga tar uatalaua ger sa, kare kusa is tar ninamananiner sa, kara nimalara uasa gere reih uahua tasisin, kare uasua tunungua tasisin. ¹⁰ⁱGe o uaha mani pe tere tengkana tur dedemper mamang niguata uasalik. O gisiamehe ra malaelirintiehe tun tar puhon, kara turung tar mud tar nitagorong man, kara huata teilingua tar bureher niduh.

Poul ke uatagin tang Timoti

^{11j}Bo ingga Timoti a tamat a nang God, ualo liu tar niguataniner sa, karo uakeluk uaia tun tar niguataniner kodkodoh. Doho uakeluk tena nimalahir God, doha nitagorong man, malaelahir, huata tar niduh, karo uanguangoul sikor. ^{12k}Uiliatung uapopokoho tar uiliatung ger uaia tar haua ri tagorong mana teilisieig, karo uoho uanono tar nitua gere moko dede geke heirin God totomua tar binaka ko hire luaka to tuna tar matasir manai toro man. ^{13l}Inggo u kula uapopokoho to tunumpe totomua tar matana God geke heir tar nitua tar mamang inetelik, doh tar matana Iesu Kristo geke hire luaka tun toro mana tang Pontius Pailat. ¹⁴Inggo u kula uapopokoho tun totomua tar uakeluk uelhir uaia tar ualatohonin, maeit ahikia pahe kusaia ue ra tohotolaia me puh e tuka gete tapokisime Iesu Kristo,

^{15m}gere turung heirihain God tar binaka geke umatotoin. Uata kai tatanon ger tang Kaueke ahik me tang giameh, kare nas Toiar toia uakap, kare nas Tamata Nomanar tamata uakap. ¹⁶Inggono te me pahene manasampe ahik pahe matotong mata tagu, inggon e pepe tar luh ger balantiehe tun, ahik me tang siokor tamata re matotong la uahuhut, doh ahik me tamata ke bang ue e banotong banga tatanon. Ueltada dede tatanon, ge inggono pe a toia uleikane i kot, kare na nitampopokoho gere moko dede. O mana tun.

¹⁷ⁿTimoti, ingga o kula uapopokoho tun tas mais nas burehentieher maniene daana i kot, gisin ahik pah ra kai, kara tagorong mana teil tar mani ge ginina pe e uoto kap, bo gisin paka uamoko kompe teres nitagorong mana tang God gere matoto teil tun, kare heir tagigeig tar mamang inetelik ri malaraig mare uauaha tagigeig. ¹⁸Ualatoho tun tasisina tar guata tar hagarininer uaia, kara guata tar burehentiehe tunur ineter uaia, kara turung liliaheir, kara uauia tar bul tenas mamang inetelik tang mai re katup. ^{19o}Doh tar hagarionene, gisina ra turung patoho tar inete ger i rana uainir bu-lauan, ngohina tar tengkanar niuangoul i uoumuha, kara kale uanono dede tar nitua nomana tun.

Na uadouhinar uelhire Poul tang Timoti

²⁰Timoti kaueke uaia tun tar haua ke heirin God totomua. Tur gele liu dede tar menemenenine re la tur i kot ger tabo tengkan, kara hik pahe ueltada tang God, doh tar uelperere tar inete-nine ra kilaig pare, a niate uleik, bo ahik puk paha man. ^{21p}Ge o gisiamehe

^{8g:6} Pil 4.11-12; ^{1Ti} 4.8; Hib 13.5 ^{h6:7} Job 1.21 ^{i6:10} Epe 5.5

^{j6:11} 2Ti 2.22 ^{k6:12} 1Ko 9.25-26; ^{2Ti} 4.7 ^{l6:13} Jon 18.36-37 ^{m6:15} UGO 17.14 ^{n6:17} Luk 12.20-21 ^{o6:19} Mat 6.20 ^{p6:21} 1Ti 1.6; 2Ti 2.18

pe ka uakeluk tananin, kara hiliu tar
nitagorong mana tang Kristo.

A hamhamasar nang God e moko tami-
uoum uakapa tun.

2 Timoti

*O uatorikina ro bolobolo ke
boloin Poul tang Timoti*

O uatorikina ro bolobolo tang Timoti

O uatorikinaro bolobolo geke boloin Poul tang Timoti o mok i lolono toro Baeboul tar timuhur uelhote. Poul ke bolo to toro bolobolo roon iuma tar karabus. Ge Timoti pe tena tang siokor uakuakeluk pono Poul. Inggono ke kaukaueke tar lotu. Poul ke malar e la ruh kout tatanon. Timoti ke kanuh, maeit Poul ke hire tatanono pare, e turung kale tar bureher niduh ngohina tar soldia, a tamatang ualualo ue a tamatang leb.

Inggono ke uatagin tang Timoti mara hik pahe namana dede me uelpereir gere uahagouo uasa tatanon. Timoti pono ke de tar guata me niguatanitir sa. Doh inggono paka tang ualasira uaia, kara hamhamas.

Poul ke uatagin pono pare, a inet e turung sa uain kompela. O tang ualasira gesir bohoboho ra turung uoumuoum keip uasa tasir tamata ge ahik paha popokoho res nitagorong mana toro man. Timoti pake mene ualasira puk toro mana gere moko teil toro Baeboul.

Poul ke ate pare, ke uahuhutin tar mat. Inggono ke uanamana huara tang Timoti tena nitagorong mana katong, kare na niduh. Bo Poul puk e ate pare, God e turung la bulaua to tatanon i Heven.

I lolono toro bolobolo rone:

A meneng uakalahar 1.1-2

A uatakai, kara uakalahar 1.3-2.13

A meneng ualatur, kara uatagin 2.14-4.5

Na niuangoul Poul 4.6-18

A uadohinar menemen. 4.19-22

O Mahar 1

Poul e heir tar niuaha tang Timoti

1 Inggono Poul ku kotpokoso na aposoul Iesu Kristo tena nimalara God mari kaleeig tar nitua geke ualapagahain God, kari uangoul tokaha keip tang Iesu Kristo.

²Timoti ingga misiana pah ter kuhur tuguo tun, a siokono pe regira nitagorong mana tang Iesu Kristo, a hamhamasa menia tar niueldolom, doho hiarou o moko totomua gere la tur tang God ge Tamagigeig me Iesu Kristo ge nagi Tamata Nomaneig.

A meneng uangolo tar uangoul uakodkodoho tun

³Inggono u heir tun tar niuaha tang God geku kalekinale keip tunuio na niate, inggono ku guata uakodkodoh misiana ka guata pe ro bubungug sioun, ru lotu dede pe tatanono totomua tar boung doh tar marein. ⁴Inggono u uoto namana tapokis tar binaka ko kiringa, karu marang bangantiehe tunumpe totomua maru me uoun tun tar niuah.

⁵Inggono u uoto namana tapokis tar nitagorong manar eimua a mana tun, ge ingga pe ko kale uahiuua uaia tun tena nitagorong mana Iuneis ger tinoumua, doh tang Lois ge tubumua ge kuah. Inggono u tagorong mana teil tun, ingga ko kale uahiuua uaia tun. ⁶Temaeit inggono u kula uapopokoho dedempe totomua tar uatua dedempe tar haua geke heirheir pukin God totomua tar binaka ku lotuo, karu uapono tar limoug i rana totomua. ⁷Ge a Iabene Dedeil pe geke heirin God tagigeig ahik pahe uasokoro tagigeig,

^q1:2 Apo 16.1; 1Ti 1.2 ^r1:3 Apo 23.1

^s1:5 Apo 16.1 ^t1:6 1Ti 4.14

^u1:7 Roum 8.15

bo ke uauoun tun tagigeig tar nitampopokoh, kara nimalaelhir, doh mari kaueke katongosieig. ⁸Temaeit ingga haik paho sokoro tar hire tauete ueleheir tar Tamata Noman, doh ahik paho matala ka uamoko peio tar karabus ru kalekinale pe tatanon. Bo ingga o uinatoro uaia tanika kompeia tar huata tar niduh misiana totoguo. God e turung heir totomua tar nitampopokoho maro huata tar niduh gero kaleig.

⁹vInggono ke uaudeil tagigeig, kare kila no tamata tagigeig. Inggeig ahik pah ki guata me inete, maeit ke guatono pare, bo git a to tengkan, a nimalaelhir menia tar hamhamas a nanono katong. A nimalaelhir menia tar hamhamasonene ka heir turin tang Iesu Kristo tagigeig, ke uakekene pemer binak. ¹⁰wBo gine puk daan, inggono ke pokoso uakalahara tun tagigeig ke pokoso pe nagi tang uaudeil Iesu Kristo, ke uakapa pe tar nitampopokoho na ro mat, kare ualasira uakalahara to tar nitua gere moko dengua toro Uelhire Uaia. ¹¹xDoh toro Uelhire Uaia rone, God ke uamatoto totoguo a aposoul tar hire tauet, karu ualasira toro Uelhire Uaia roon.

¹²Doh ter tengkana kompeon, maeit ku huato tar niduh tar inetenine. Doh gine daan inggo ahik pahu matal, teeit inggo u ate tang maiene ru tagorong manain. Doh inggo u ate uaia tun, inggono na nitampopokoho e uaudeil totoguo e tuka tar binaka re tapokisime Kristo, ro hire teil pe ro Uelhire Uaia geke uaponoiono totoguo.

¹³Kale uanono tar uelhire ger mana tun geku hiregio totomua maro uakelukua, karo kale uanono dede tar nitagorong man, doha nimalaelhir ger nagigeig mes Iesu Kristo. ¹⁴yKaueke uaia tar inete uaiaeit ka heirin

totomua, kaueke keip tatanono tar nitampopokohonor Iabena Dedeil gere uangoul teil tagigeig.

¹⁵Ingga o ate o tamata uakapa tun gera tagorong mana tang Kristo tar pang Esia ka hiliu totoguo menia ponompetas Pigelus me Hermogenes. ¹⁶Inggo u lotu tar Tamata Noman e heir tar niueldolom tasir tamatang tena uma Onesiporus, teeit inggon e poul uaia totoguo, doh ahik pahe matala ka uamoko peio tar karabus. ¹⁷Doh tar binaka ke me pokoson i Roum, inggono ke me tang sir uelhir tun totoguo e tuka ke tupara pe. ¹⁸Tamata Noman o uahue tatanono mare tupara tar niueldolom ger noumua tar mareining kedang. Timoti, ingga o ate uaia tun ke poul uaia tun peono totomua tar mamang hagarilik tar binaka ru pepeo i Epeses.

O Mahar 2

Kalekinale keip tar nitagorong man tang Iesu Kristo

2 Timoti ger tuguo, ingga o uatampopokoho tun tar nimalaelhir menia tar niueldolom geke heirin Iesu Kristo. ²Kale tar ualatut geko longoro turugia totoguo ku menmene to tun pe tar matasir bureher tamat, karo heir tasir tamata gesir uauaman mara turung ualasira uain tasir gisiameh.

³zHuata pono tar niduhene tamiueim misiana tar tamatang uiluiliatung ger uia tun ger nang Iesu Kristo. ⁴A tamata gere kalekinale nomana tun te pare, a tamatang uiluiliatung, kare uauaha tena tamatang ualualatouk, inggon ahik pahe uaelhoubour teilin tasir tamata ueltebeir puk. ⁵aTer siokono kompe tar tamatang ualo gera ueluelpeikie tar ualualo, ahik pahe matot e kale mena in-

^v1:9 Epe 2.8-9; Tai 3.5 ^w1:10 Hib 2.14

^x1:11 1Ti 2.7

^y1:14 1Ti 6.20

^z2:3 2Ti 1.8 ^a2:5 2Ti 4.8

ete ke to pe i mud toso uanoton, e banoto tun gete uakeluk tar ualatut. ^{6b}Tanener iom, pake ter uakikilanganar tamata tar kale tar niening uamun. ⁷Namana tar inetenine ku menegio, ge a tamata Noman pe e turung uanaman manate to-tomua tar mamang inetelik.

^{8c}Namana huara dedempe tang Iesu Kristo geke tua tapokis tur toro mata geke kotpokoso tur toro matina tang Debit ger toia tero hire teil pe ro Uelhire Uaia rone ru hirhire tauete teilio. ^{9d}Doh tero Uelhire Uaia roono rone ku hirhire tauete teilio, temaeit ku huato tar uleikir niduh, kara uih taneio misiana tar tamatener mamantou. Bo no uelhire puk God ahik pah ka uih tanein. ¹⁰Temaeit inggo u siokor huata tar niduh tar mamang inetelik tas maisir tamata geke kedangais God, maeit re turung uaudeil pono Iesu Kirsto tasisin, kara kale tar uinatoro gere moko dedengua.

^{11e}Rone tero uelhire tun gero man. Geti mata keipeig tatanon, inggeig i tua keip tatanon. ^{12f}Geti huateig tar niduh, inggeig i turung siokor uoum keip tokaha mes Iesu Kristo. Geti uoliheig tatanon, inggon e turung uolih pono tagigeig. ^{13g}Geta hikieig pahi tagorong man, inggon e uangoul keip dedempe tar nitagorong man, teeit inggon ahik pahe banot e boho katongoin.

Ter tamata ke bang parokoin God tena kalekinale

^{14h}Timoti uanamana dedempe tar inetenine tosnongo tamat, uatagin tasisina tang God mara hikisina pah ra uelperere

tar men. Ginin ahik pahe guata uaia tasisin, bo e uasuasa kompe teres nitagorong manasit ra longoro taninin. ¹⁵ⁱTur uatampopokoho tar heir katon-goia tang God pare, ter tang sioko ka bang parokoia ter tamatang kalekinale tun, ahik pah ko matal, ko ualasira uakodkodoho tun pe toro uelhire gero man. ^{16j}Tur uagele liu dede tar mene gere uasuasa tar hangana God, ge ginina pe e uoum keip uasantiehengua kompe tasir tamat mara uairehe tang God. ^{17k}A menenin e hailala ueltebeir misiana tar pang kubar gere uabueir tar singsing-inar tamat. A tang torikir tamata ke kale uoumis tar puhonene, Himeneus me Piletus, ¹⁸Rasina kura lih sioko manasa tar lel gere hire toro man. Rasina kura kula pare, a nitua tapokis ke la manasain na binak, doh rasina kura mamantoungua teres nitagorong manar gisi-ameher tamat.

^{19l}Bo God ke uahohoto tun tar tengkana roon, ahik paho matotong uagun. Doh roono ka boloin tar puhunine, "A tamata Noman e ate tas maisir nan, doh mais uakapa tun ra hire tauete tar hanganar Tamata Noman ra hiliu tar niguataniner sa."

²⁰I uma tar uma uleik, a dis uakapa tun a kahakah, ahik pah ka tuha keip pukig tar goul ue a silva, bo a gini-ameh a douk doha giniameh a nouh. Doh taninin a giniameh a nituha uamatoto tun tar haua ra guata keipin, doha gini-ameh e laig tar inete ueltebeir. ²¹Ge me tamata re uadelauana liu katongo turin tar niguata uasanine, inggono te misianar dis ger nituha uamatoto tun tena kalekinale, teeit inggono ka uadedeil manasain, e matoto tunin, e uanguan-

^b2:6 1Ko 9.7 ^c2:8 Roum 1.3; 1Ko 15.4 ^d2:9 Epe 3.1,13; Pil 1.12-14

^e2:11 2Ko 4.11 ^f2:12 Mat 10.33 ^g2:13 Roum 3.3-4; Tai 1.2

^h2:14 1Ti 6.4; Tai 3.9 ⁱ2:15 1Ti 4.6 ^j2:16 1Ti 4.7 ^k2:17 1Ti 1.20

^l2:19 Aha 16.5; Ais 52.11; Jon 10.14; 1Ko 8.3

goul puk manasa tar Tamata Noman tar kalekinale keip tar mamang niguata ualikininer uia tun.

^{22m}Bo ingga, o ualo liu tar niguataniner sa gera guatguataigir kalan, uakeluk kompe tar niguataniner kodkodoh, a nitagorong man, uelmalauehir, karo hiarou menia tas mais gera kila keip tar Tamata Noman tar kolous a delauan.

²³ⁿTur uagele dede tar meneniner nasir tuktukar, kara uelperere ger tabo tengkan, ge ingga pe o ate ginin e uakotpokoso kompe tar nimalian. ²⁴Na tamatang kalekinaler Tamata Noman ahik paha uoto perer, e uaha tasir tamata uakapa tun, kara tang ualasira uaia tun, kara uangangoul sikor. ²⁵Doh mais ra ueluelde tar ualasira gere ualasiragion, inggono pake matakaluana tasisin, kare ualualatut hamas tun tasisina tar nitagorong manene ri tagorong mana teilisieig mare heir binaka sikoro baka poluk God tasisina ra uapalih pe tenas niguat mara lame, kara ate toro man. ²⁶Doh mare turung kodkodoho tapokis poluk res ninaman, kara lukup liu tur tono lolo Satan geke reih tasisina, kare guata tasisina ra uakeluk tena nimalaron.

O Mahar 3

A uadouhinar binak

3^oTimoti o ate kompe pare, a binak e turung sa tar uadouhinar marein. ²O tamata ra turung malauelhir katongo kompeis, kara uaha tar mani, ra uasala katongois, ra uakaiaais, ra uoto uelsigal, ahik pah ra longoro toso tamas meso tinas, kara hik pah ra mene tar niuah, kara ahik me ueltada tang God. ³Gane tasir tamat e turung taboinir nimalauel-

hir, ahik me niueldolom, kara uoto boho tola tasir gisiameh, kara hik pah ra uakodkodoho katongois, kara uoto nimalian, kara uoto uiliatung, kara hik pah ra uaha tar niguataniner uia. ⁴O tamata ra turung uelour toso bung kaluas, ra bilinggala ueltebeir kompe, ra uasalais, kara malauelhirintiehe tun tar haua re uauaha puk tar tukununar tamat, ahik pah ra malauelhirintiehe tagu tang God. O man! Gisina ra namana ra sanga uanono tun tar niguata tar ^{5p}Uakeluk tang God, bo gisina puk ra uolih tena nitalampopokohon. Mu agout uaia tun tasir tamata sira pare.

⁶O gisiamer tamatang ualualasira gesir bohoboho ra uoto la katongo kompe toro giniamer ro um, kara uoum keip tasir kuaha gesir uangoul uasa ra namnamanantiehe puk pe teres niguata uasa ger pensioun, kara reihime tar mamang nimalauelhirilikir sa. ⁷Gisinar kuaha ra uedangantiehe nomanampe tar kale me niate, bo ahik puk pah ra naman manate toro man. ^{8q}Te misiana tas Janes me Jambres, rasina kura tur tane tang Moses, gisinar tamatasina ra tur tane pono toro man ahik pah ra namana uaia, kare punga res nitagorong man. ⁹Bo a inete pukunine ka guataigisin e turung punga kout, teeit o tamata uakapa tun ra turung bang huara tun toroso popouluanasin, ter puhonene ke pokoso uoum tas tang torik.

Na uadouhinar ualut Poul tang Timoti

¹⁰Bo ingga o ate uaia tun tar haua ku ualasiragio totomua, o ate hape ku uangoul pemeo, karo ate tar haua ru marang guataio, o ate tar nitagorong manar eiguo, kare hape ku uangangoul sikoro tun peo. A nimalauelhirir eiguo,

kare hape ku huata pe tar niduh, ¹¹rka guata uasaio karu kale uelmahing. A huar inete ke pokoso totoguo i Antiok, kari Ikoniam dohi Listra, a niduh geke heirig totoguo. Inggo ku kale uelmahing tananin, bo a Tamata Nomana puk ke uelkarus totoguo. ¹²sO mana noman, o tamata gera marang uangoul keip uaia tun tang Iesu Kristo, gisina ra turung guata uasasis. ¹³Doho tamata uasa, karo bohoboh, gisina ra turung sa, kara santiehe tunungua, ra uelour tasir gisiameh, kara uelour katongo ponois.

¹⁴Bo ingga Timoti, o tur uanono keip dedempe tar haua ko atein, karo tagorong mana tunin, teeit ingga ko tagorong mana tun, karo ate uaia tun tas mais ka ualasira totomua tananin. ¹⁵Namana dede kompe toro bolobolo gero dedeil geko ate turuia tar binaka ro keketik, gero heir totomua tar niate uaia, karo uoum keip totomua torongo udeil gere la tur tar nitagorong mana tang Iesu. ¹⁶Na mamang bolobololik God teke uakotpokosompeig God ter uiantiehe tun tar ualasira tar inete ger man, karo lolouara tas mais ra guata uasa, karo uakodkodoho tar haua ka pesiauain, karo ualaisra tar ualatutunar niuangoul uaia. ¹⁷Temaeit a tamata gere kalekinale keip tang God, inggon e turung uinatoro uaia tunin tena mamang kalekinalelik ger uaia tun.

O Mahar 4

Timoti o uatampopokoho tunuia tar hire tauete toro Uelhire Uaia

4 I uoum tang God me Iesu Kristo gere turung kedanga tasir tamata uakapa tun, gisine ka mat doh gisiner

tua, rasina teura tur keip getu heiro tar ualatutunine tar nipokos, kara Nitoiar nang Iesu Kristo, inggo u uatagin totomua tar puhunine. ²Hire tauete tono uelhire God, kaleuatoro tanik dede gete na binaka roono ue ahik pah na binak, uakodkodoho uaia dede, loulouar, karo ualatut, uualasira hamas tun, karo ualatoho uaia dede.

³uGe a binaka pe e turung pokoso pare, o tamat ahik pah ra turung longoro tar niualasirar kodkodoho gere la tur tang Kristo. Gisina ra marang longoro me giniamhe siokor niualasira gera malauelhir tunig. Temaeit gisina ra turung la toto, kara ruh mo bureher tang ualasira tar ualasira tasisin hape ra malara pe. ⁴Kara turung tar mud tar ualongoro toro man, ra ualongoro kompe tar kiukiu.

⁵Bo ingga pako kauেকে uaia tunuia tar mamang inetelik re pokosome, gitiempe geto kale uelmahinga. Guata kompe tenang kalekinale tar hire tauete toro Uelhire Uaia. Siokor hire tauete tar mamang hagarilik tenang kalekinale.

⁶vGe inggo pe teka ding tauete uoumio misiana tar inum gera guatain tar uahung. Doh nag binako tar hiliu tar nituang gane i kot, ke pokoso manas. ⁷wInggo teku uiliatung uaia tun tar hauene ri tagorong mana teilisieig, ku uakapa tar ueluelpeikie, karu sanga dede tar nitagorong mana tang Kristo. ⁸xDoh inggo ka uamoko tanik manasainir bulauoug ger uiantieh gere turung heirinir Tamata Nomana ger kodkodoho na nikedanga totoguo tar marening kedang, doh ahik pah totoguo puk, bo tas mais ponompe gera marang banga tatanono gete pokoso tapokis.

Na uadouhinar ueluelhire Poul tang Timoti

⁹Timoti uedanga tar petutup tar la ualahurume totoguo, ¹⁰yge Demas pe ke malauehirintiehe kompe tar ineteng gane i kot, ke turung tar mud totoguo, kare la i Tesalonaika. Doh Kresens ke la i Galesia, kare Taitus ke la i Dalmatia. ¹¹Luk me pahene manasampe re uangoul tagu totoguo. Geto lamea kila tagu me tang Mak, kaura siokor la tokahame, teeit inggon e uoto poul uaiantiehe tun totoguo tar kalekinaleene.

¹²Inggo ku ualatu tang Tikikus e la i Epeses. ¹³^zTimoti geto lamea, kale tagume tonogo hikhikuo gero baraha uatuk i kot, roono ku hiliu toio tang Karpus i Troas. Kale ponome tar buk, te gi-aata tunumpe roono ro nituha keip tar kapokonor sipsip.

¹⁴^aAleksanda ger tang tuha keip tar inete tar haen, ke guata uasantiehe tunumpe totoguo. A Tamata Noman e turung suala tapokis tar niguataniner nanon. ¹⁵Ingga o tagin tatanon, ge inggono pe ke turtur tane tar inetenine ki menegieig.

¹⁶Tar uakikilangana tunur binak ka hehekeio, ahik me tang sioko ke tur

keip totoguo, siokor teesina uakapa tun ka hiliu totoguo. Doh inggo u dangata tang God mara hikisina pah ra polukis tar puhonene. ¹⁷Bor Tamata Noman ke poul, kare uatampopokoho tun totoguo tar hire tauete uakapa tun tenag uelhire tasir gime uan gera uangoul i Roum mara longoro ka uelkarus tapokis tur peio toro mat. ¹⁸A Tamata Noman e turung uelkarus totoguo tar mamang niguata uasalik, kare uaudeil, kare keip totoguo tena Nitoia i Heuen. Uatakai tatanono tar mamang binakalik. O mana tun.

A menmeneng uadouhin

¹⁹^bTimoti heir tar niuahar nouguo tas Prisila me Akuila doh tasir tamatang tena uma Onesiporus. ²⁰^cErastus e uangoul i Korin, doh inggo ku hiliu to tang Tropimus i Miletus e momouh.

²¹La ualahur sikorome gete ur pang rom, kare na binakar malahong. Ibulus mes Pudens, Linus, doh Klaudia menia pono toso bung uanotougigeig ka heir tenas niuaha totomua.

²²A Tamata Noman e uangoul tagu tar Iabeimua, na hamhamasa God e moko tamiuoum uakapa tun.

^y4:10 Apo 15.37-39; 2Ko 8.23; Kol 4.14 ^z4:13 Apo 20.6

^a4:14 Ais 59.18; Roum 2.6 ^b4:19 Apo 18.2; 2Ti 1.16-17

^c4:20 Apo 19.22; 20.4; Roum 16.23

Taitus

O Mahar 1

O bolobolo ke boloin Poul tang Taitus

O bolobolo tang Taitus

Poul ke bolo la toro buk Taitus tang kaluan a hangana tang Taitus.

Taitus e kalekinale tar tor, ra kilain i Krit. I Krit o bureher tamatang tagorong man, bo o tamatang tagorong mana pukusin ahik monosio tamatang uoum keip. Temaeit ke hire Poul tang Taitus tar umatoto mo tamatang uoum kep toro uan kahakah. Bo Taitus puk pake bangbanga hamas tun tar binaka re umatoto tasir tamatang uoum keipisin. O kahakahar tamatang uoum keip pako tamata uaia, o liliaheir, o dedeil, karo uauaman. Doho tamatang uoum keip paka ualasira uakodkodoho tonu uelhire God (Tai 1.5-9).

A puhonene a kalekinale uleik tun. O gisiamer tamata ka uedangang reh tasir gisiamer tamtang tagorong mana tar uakeluk tenas niguatasin. O tamatainasine ka pepe boho tar ate tang God. Bo nas nipelese pukusina ke ualasira pare, gisin ka boho tang God (Tai 1.10-16).

I lolono toro bolobolo rone:

A meneng uakalahar. 1.1-4

Noso tamata uleikir tamatang tagorong man. 1.5-16

A kahakahar kalekinale tasir kahakahar toto tamat i lolono tar sios. 2.1-15

A puhpuh paka hiliuig, kara uatagin. 3.1-11

A meneng uadouhin. 3.12-15

Poul e heir tar niuaha tang Taitus

1 Inggo Poul na tamatang kalkalekinale puk God doh na aposoul Iesu Kristo, ka umatotoio tar la uatampopokoho teres nitagorong manar tamata geke umatotosion o nan, doh tar ualasira tasisina tar ate toro man mara uakeluk tena niguata God. ^{2d}Doh tar ualasira tasisina tar niate mara tagorong mana teil tar niuangoul gere moko dede tar mamang binakalik geke meneng ualapaghain God tagigeig tar binaka halanar koto ta tuhain. Doh Inggon ahik pahe banotong boh.

³Doh tar binaka tun ke umatotoin God, inggono ke uakalahara tonu uelhire. Doh inggo ku uelhire tauete tang roono tasir tamata uakap. Godompe nagi Tamatang uelkaruseig ke ualatoho totoguo tar guata ueleheir tena kalekinaleon.

^{4e}Inggo ku bolola totomua Taitus, ge ingga pe misiana paha tuguo tun toro man, a siokono tun pe regira nitagorong man.

A hamhamasa doho hiarou o la tur tang God tamagigeig doh Iesu Kristo nagi Tamatang uelkaruseig.

A kalekinaler nang Taitus tar tor i Krit.

⁵A tengkana maene ku hiliu to inggo totomua tar tor i Krit, te maro uakokodoho ingga tar haua ku hiliu luakagio, karo umatoto mo tamatang uoum keip tar lotu toro mamang uanilik misiana ku ualatoho peo sioun totomua. ^{6f}A tamata ge pake uoum keip tar lotu ter tamata ger kodkodoho na nipiles tar matasir tamata mara hik me tamata

^d1:2 Kol 1.27 ^e1:4 Roum 1.7; 2Ko 8.23; Gal 2.3 ^f1:6 1Ti 3.2-7; 2Ti 2.24-26

re banotong tohotola tatanono ke guata uasa me inet. Inggono paka buloutetie na tang siokon siounur kuah, doho bung tun ra tagorong mana tang Kristo, kara hik ro bung tuna pah ra banotong bangais pare, o roke, karo mahang kul, karo mahang longoro toso tinas. ⁷Teeit a tamatang uoum keip tar lotu inggon e guata tena kalekinale God, temaene inggono paka tamata kodkodoho tun, kara hik pah ra banotong bangain me niguata uasa tatan. Kara hik pahe uairanain, kara hik paha uoto nimaliana ualahur, kara hik paha uoto inum uapopouluanain. Inggono paka hik paha tamatasitie gesir uoto uiliatung tasir gisiameher tamat, kara hik pahe uoto boh mare reih tur tar mani tasir tamat. ⁸Bo inggono paka tamatasitier guata uaia, a tang kilauatoro tasir gisiameh, kare uoto malara tar mamang niguata uaialik, kare uakeluk tar ninamana uaia uelhir. Inggono paka kodkodoho na niuangoul, kara hik paha guata ueltebeir. Inggono paka uauaman, kara delauana na niuangoul tar matana God. Doh inggon e banotong uakodkodoho katongoin tena nimalar doh na nipiles. ⁹Inggono pake sanga dede tun toro Uelhire Uaia geka ualasinain tatanon, mare banotong mene uapopokohono tar poul tasir gisiameher tamata tar niualasira ger man, kare ualasinain tasisit ra tur tane tar niualasira uaia tar puh ka pesiauain.

¹⁰^gInggono u kula sira pare, ge o burehe per tamata tar tor i Krit ra tur tane tar niualasira ger man, gisina ra uoto mene tar bureher mene ueltebeir, kara bohboho teres ninamanar tamat. O bureheis tasisiner ualualasira tesir Ju gera tagorong mana tar hagarang poko tar kapokon. ¹¹^hGisina paka tur taneis ge tenas niualasira uasa pesinanit ke uatu-

rung tar mud manasa tasir tamat, doho matmatame uakapa pono tar tagorong mana toro man. O ualualasirasin ra pe kompe ra kale tenami manioum tar hagarang uenau. ¹²Sioun nas tang siokor propetesin i Krit ke kula pare, "O tamatang Krit uakapa tun o bohoboh, karo tamata uasa tun misiana tasir inetesitier roke, gisina ra uoto namana puk tar einintieh, kara marapula ueltebeir puk."

¹³ⁱO uelhire rone o man. Temaene ingga pako louar bise uapopokoho tun tasisin mara uakodkodoho uaia tun teres nitagorong mana tang God. ¹⁴^jKara hik pah ra longlongoro tenas kiukiuir Ju, doh tenas mamang ualatutur tamata geka turung tar mud toro uelhire gero man.

¹⁵Tasisitier delauanar kolous a mamang inetelik a delauan, bo tasisit pukur sa, kara hik paho tamatang tagorong man, ahik uadeil me ineter delauan, ge res ninamana pesin, doh res niate tar haur uia ue a sa, a sa uakapa tunungua.

¹⁶^kO tamatasinasine ra kula ra ate tang God, bo gisina puk ra uolih teilis tatanon ra banga to peis nas niuangoul. Gisin o santiehe tun, karo mahang longor, kara hik tun pah ra banotong guata me inete uaia.

O Mahar 2

A niualasira ger kodkodoh

2 Taitus, tar binaka ro ualasinain tasir tamatang tagorong man, a uelhirer noumua pake uelmatout keip tar niualasira ger kodkodoh. ²Hire tasir mamahoholik ra kaueke katongois, doh paka namana uakodkodoh kompe tar niguata ra guatain, kara uakeluk pukumpe tar ninamanar uia uel-

^g1:10 1Ti 4.7 ^h1:11 2Ti 3.5-6; 1Pi 5.2 ⁱ1:13 2Ti 4.2 ^j1:14 1Ti 4.7
^k1:16 1Jo 1.6; 2.4

hir mara ueltadais. Doh paka uangoul uakokodoho tar nitagorong man, kara nimalaelhir, kara huata tar mamang niduhulik.

³Ter siokono sira kompe, ingga o ualasira pono tasir kuaha mamahoholik tar lih tar leler kodkodoh, kara hik pah ra uelhire uasa me tamat, kara hik pah ra malarantiehe tar bino, bo gisina paka guata ualasira puk tar hagarir uia. ⁴Mara ualasisrasina tasir kuaha kalan tar malahir tun tosnosio bulout doho bung tus. ⁵^mKara guata ualasinguaa pono tasir kuaha kalana tar kauেকে uanono tenas niuangoul, a delauan, kara kauেকে uaia tun tonoso um, kara ueldolomo tun tasir gisiameh, kara longlongoro tun tosnosio bulout, gisina paka pilese sira pare, mara hikir tamatasit ra uoto turung tar mud pah ra uelsigala tonu uelhire God.

⁶Ter siokono kompe, ingga pako ualasira pono tasir bulout kalana tar kauেকে katongois. ⁷ⁿDoh tar mamang inetelik ro guatagia, ingga pake tero guata ualasira tasisina tar niguatar uia. Tar binaka ro ualasira, ualasira toro man ahik paho boh, kara hik paho tang ualeng, ⁸^okaro mene uakodkodoho tun mara hik nang uelhirea pah ra banotong uelsigalaig, doh mara matalasisir uelmatan, teene ahik pe menas puh uasa ra banotong tohotolain tagigeig.

⁹^pDoh tasisiner tamatang kalkalekinale puk, ingga pako kula uapopokoho tasisina tar uangoul i kukulebanga tosnosio tang kauেক tar mamang inetelik, kara uauaha tasisin, kara hik pah ra perer, ¹⁰kara hik pah ra uenaua tur tasisin, bo ra ualasira tun tosnosio tang kauেক pare, o uauaman doh nosio tang kauেকে sin ra tagorong

mana tasisin, mare tar mamang hagarilik, gisina ra banotong guata tar niualasirar nang God ger ualakar ge nagi Tamatang uelkaruseig.

¹¹Ge God pe ke ualasira tar hagar tasir tamata uakapa pare, ra uelkarus turis tar niguata uasa. ¹²^qGe na hamhamasa pe God menia tar nipoul ke ualasira tagigeig tar uakenua tar nipilese uasang gane i kot, kare ualasira tagigeig tar kauেকে katongosieig, kari lih tar leler kodkodohor nang God tar niuangoulung daan. ¹³Kari uangoungoul tar marein geri tagorong mana teilin tena nitapokis Iesu, doha nibalbalana na nitampopokoho nagi Godeig ger uleik doh nagi Tamatang uelkarus Iesu Kristo, ¹⁴^rgeke heir katongoin tar bulaua tapokis tur tagigeig tar mamang niguata uasalik doh tar uadelauana tasir tamat mari uangoul sira tuneig pare, o delauana tun, kari uangoul sira pare, o nana tunumpeon, kari malarantiehe tun tar guata tar mamang niguata ualialik. ¹⁵^sTer mamang inetelikininanine pako ualasinguaa, ualatut, karo louara uapopokoho sira pare, a tamatang uoum keip. Temaeit ahikia paho uamaluaana me tamat e kula pare, nang uelhirea a inetelik puk.

O Mahar 3

Guata tar niguatar uia

3^tTaitus, o uanamana dede tasir tamatang tagorong mana ra longoro tasir tamatang uoum keip doho tamata uleikin tar gavaman, kara uakeluk tenas mamang ualatoholikisin, kara kaleuatoro tanikais tar guata me inete me hauamper uia. ²Kara hik pah ra uelsigal me tamat, kara uangoul keip toro

¹2:3 1Ti 3.11 ^m2:5 Epe 5.22 ⁿ2:7 1Ti 4.12 ^o2:8 1Pi 2.15 ^p2:9 1Ti 6.1

^q2:12 1Jo 2.16 ^r2:14 KT 19.5; Ual 7.6; Isk 37.23; Gal 1.4; 1Pi 2.9

^s2:15 1Ti 4.12 ^t3:1 Roum 13.1-7; 1Pi 2.13-14

hiarou, kara ualasira tun tar niguatang kale uahiu, kara niuangoulur hamhamas tar mamang nipileselik ra guataigisina tasir tamata uakap.

^{3u}Sioun, inggeig ki uangoul sira pon o popouluan, karo mahang kul, ka uelouruseig, kari uangoul sir o tamatang kalkalekinale puk i kukulebanga tar mamang niguata uasalik, kari guata puk tar haua re malarainir tukunugig. Nagi niuangouleig ke uoun tar niguata uasa, kari gehe pono tasir gisiameher tamat. Kare uelueltokouasasieig.

⁴Bo tar binaka puk ke uakotpokoso uakalaharain na niguata uaia, doh na nimalahir God ge nagi Tamatang uelkaruseig, ^{5v}inggon ahik pah ke uelkarus tagigeig ke banga to pe tar niguata uaia ki guatageig, ahik! Bo teeit tena niueldolomon, maeit ke uelkarusono tagigeig. Kare heir tar Iabena Dedeil geke uahuhu liu teregi niguata uasaeig, kare heir tagigeig tar timuhur nitua. ^{6w}Inggon te geke heirheir pukuion, kare heir uakapaha tatanono tagigeig i lolono tang Iesu Kristo ge nagi Tamatang uelkaruseig. ⁷Inggon ke guata pare, maeit tena nimalaelhiron menia tar niueldolom, inggeig i banotong uangoul uakodkodoho keip tola tang God, kari turung kale uahiu tar niuangoulung tar mamang binakalikene ri uanguangoulin. ⁸A puhuninanine a mana uakapa tun. Doh inggo u malar o mene uapopokoho ingga tar inetenin mara kalekinale uapopokoho tunusit ra tagorong mana tang God tar guata tar niguatar uaia. A niualasiraninanine auia, kara inete uleik, dohe banotong poul tasir tamata uakap.

^{9x}Bo o tur gele liu dede pukua tar meneniner nosir tuktukar, kara uelperer, doha uelrer, doha uelkoi tar tengkanar puhung ualatut, ge ahik penina pahe banotong poul me tamat, kara tabo tengkan. ^{10y}Gete kaein me tamat e marang uataltaliaha tar lotu, ingga o uatagin uatorik puk tatanon, i muduhia ingga o agout tatanon. ¹¹Ge ingga pe o ate, a tamatono ke hiliu manasa tar lel, doh ke kotpokos a tamatang guata tar niguata uasa. Doh na niguata uasa katongon e ualasira tatanono ke guata uasa pe.

A uadouhinar uelhire

^{12z}Inggo u turung ualatue me, mera kaluas Artemas me Tikikus totomua, doh gere me pokoso mera kaluas rasin, karo uatolaua ualahurungua ingga tar me uelutpara to totoguo i Nikapolis, ge inggo pe ku namanang marang la uangoul tar buturuono tar binak malahong. ^{13a}Guata tar mamang inetelik ro banotong guataig tar poul tang Senas ger tamatang tabila tar uelhire doh Apolos tenasira nila. Banga pare, ra heiris rasina tar mamang inetelik ura malarai. ^{14b}Ge nogio tamata pe inggeig paka kale tar niate tar guata tar kalekinale uaia mara kale tar huar inete ra katupaig, kara hik pah ra uanguangoulung kadaua puk.

¹⁵O tamata uakapasine ra heir tenas niuaha totomua. Doh ingga o heir pono tenami niuاهيم tasir tamatasit ra tagorong mana tang Kristo mara malara tamiueim.

Na hamhamasa God e uangoul tagu tamiuoum uakap.

^u3:3 1Ko 6.9-11; Epe 2.1-2; 5.8 ^v3:5 2Ti 1.9; Hib 10.22 ^w3:6 Apo 2.17-18

^x3:9 2Ti 2.14,16 ^y3:10 Mat 18.15-17 ^z3:12 Epe 6.21-22; Kol 4.7-8

^a3:13 Apo 18.24; 1Ko 3.5-6 ^b3:14 Epe 4.28

Pilimon

O bolbobolo ke boloin Poul tang Pilimon

Pilimon

O bolobolo rone ke boloin Poul tang Pilimon, roon o puhina tun roon o moko teil tar timuhur ualatut.

Poul ke bolola tar giniamer uelhireng uaongol tang Pilimon. Song ke heir Poul tar popokoho tunur mene tang Pilimon e laig tang Onesimus. Inggono ke ualo liu tang Pilimon. I muduhia song ke tagorong manono tang Kristo. Inggono ke poul tang Poul. Bo e uangoul haraha kompe tena nikaueke Pilimon, teit inggono Onesimus a karabus.

O Mahar 1

Poul e heir tar niuaha tang Pilimon

1 Inggono Poul ku bolo toro bolobolo rone, inggo u uangoul tar karabus teit ku hirhire tauete teil pe tono Uelhire Uaia Iesu Kristo. Roon o la tur pono tang uanotougeig Timoti.

Roono ka heirilain totomua Pilimon gero uoto kalekinale tokaha keip tamiueim, kara kaloumieim. ²cKaro la pono tang Apia ge tatahimiulikieim, kare tang Arkipus ge na tamatang uiliatungur korose, kare tas maisir tamata gera uiliodout tenang uma Pilimon.

³God ge tamagigeig me Iesu Kristo ge nagi Tamata Nomanieig ura heir tar hamhamas, karo hiarouo tamiuoum.

Na niguata uaia Pilimon ke uauaha tang Poul

⁴Inggono u heir dedempe tar niuaha tang God ru uoto lotu pe totomua Pilimon, ⁵teit ru longoro dede pe pare, ingga o tagorong mana teil tun tang Iesu

ger Tamata Noman, karo malauelhirintiehe tun tosno tamata God. ⁶Inggono a liliaheir teit ro tagorong mana pe. Doh inggo u lotu tang God maro uamoko pona torongo liliaheir tar kalekinale maeit geto guata nomana, ingga song ro naman manate uakapa tunungua tar mamang niguata uaialik ri matotong guatageig tang Kristo. ⁷dInggono katongo ku kale tur tun tar uleikir niuaha, kara uamamahoul tar malauelhirir eimua tahig. Nang guata uaia ingga e la dede ke uatagala tunungua tar kolous no tamata God.

Poul ke dangata tang Pilimon tar inet

⁸Temaieit ru dangata uapopokoho tuno totomua tereng nimalara katongo tun, inggo u dangata keip tar puhono tar hangana Kristo teit a ineton a kokodoho tun totomua tar guat, ⁹bo teit kompe tar nimalauelhirene tagiraieig, temaieit ru dangato totomua. Temaieit kale sira tar puhonene pare a puhung uadangata puk e la tur tang Poul ge kaloumua, ke mahoho manas e uangoulene daana tar karabus re kalekinale pe tang Kristo.

¹⁰eInggono u malara tun pare, ingga o la ualasira tun tar niguataniner uia tang Onesimus. Inggono u namanantiehe sira tunumpe tatanono paha tug tun, teit inggono teke tagorong mana tur tar kalekinalener noguo ru uangoul pe tar karabus. ¹¹Sioun Onesimus ahik nomana pahe poul uaia totomua, bo gine daan inggono song ter tamatang poul tun tagiraieig tokah. ¹²Inggono u heir keip tapokisime tatanono totomua tar koloug tun.

¹³Inggono ku marang ut tunumpe tatanonane ru uangoul pe tar karabus mare kale bakono tenang buturua tar poul totoguo tar hire tauete toro Uelhire Uaia. ¹⁴Bo ahik puk pah ku

marang guat, ahik pe pah ku kale tur baka me puh totomua. Doh inggo ahik pahu malar o poul pukua tatanon, teeit ka petutupeia tar guat, bo ingga o guata tun geto malar. ¹⁵ Onesimus ahik pah ke hiliu totomua tar puhung barah, bor puhono here ke kotpokoso maro kale tapokis polukua tatanono mare uangoul dede keipiono totomua. ¹⁶ ^fDoh gine daan inggon ahik paha karabus puk, bo inggon a uanotougeig manas, te totoguo tunumpeon, doh totomua inggon a karabus bo i ranahia puk tar tamata ger karabus, kara uanotoumua pon.

¹⁷ Temaeit gete ko kale sira totoguo pare, a kaloum tun, kilauatoro tapokis tatanono misiana ro uoto guata pe totoguo getu me pokoso totomua. ¹⁸ Gete ke guata uasaono totomua me puh ue ke uenau me ineter noumua, uapalih tar hanganon, karo uaturula tar hangouguo tar inetenin. ¹⁹ Inggo Poul ku bolo katongo tun tar puhung uelhireene. Inggo katongo uoumumpe ru turung uamata taninin. Doh inggo ahik pahu marang mene pare, ingga ko kalkale tur puk pono tereng nitua katongo totoguo. Bo ahik pukuo pahu marang mene tar puhon.

²⁰ Tahig ualongoro tar hanganar Tamata Noman inggo u marang dangata totomua tar guata tar puhonene maro uauaha keipa totoguo tang Iesu Kristo. ²¹ Gine ru bolo pelao toro bolobolo rone totomua, inggo u ate pare, ingga o turung uakeluk tenag puhung uelhireo. Inggo u ate tar niguata ro turung guataia tang Onesimus, e turung i ranantiehe liu tar niguatene ru dangataio totomua tar guat.

²² ^gDoh inggo nag puhung mene baka poluk. Inggo u tagorong mana teil pare, God e turung longoro tenang lotua, kare uamaluana totoguo tar tapokisime totomua. Temaeit ingga pako kaleuatoro me siokor tina um maru me hohouo.

O uanotono Poul ka heir tenas niuah

²³ ^hEpapras ge raeim mira uangoul tokaha tar karabus tar hangana Iesu Kristo e heir tena niuaha totomua. ²⁴ ⁱDoho uanotouguo pon gera uoto kalekinale tokaha keip totoguo, Mak mes Aristarkus, doh Demas, doh Luk, gisina ka heir pono tenas niuah totomua.

²⁵ Inggo u lotu tang God e heiriha tena hamhamas nagi Tamata Nomaneig Iesu Kristo e me uangoul tagu tar iabeimua.

Hibru

O bolobol o la tasir Hibru

Noso bolobolor Hibru

O buk Hibru o moko tar timuhur uelhote.

O buk Hibru o ualasira tar bureher inete tang Iesu. Inggeig ahik pahi ate tang mai ke bolo toro bolobolo roon. O gisiamehe ra namana tang Poul teke bolo tang roon.

O buk Hibru o inete uliek tun ge o ualasira pe roono tar bureher niualasir i lolono toro Baeboul. Roon o ualasira tagigeig tang Iesu ahik paha anggelo (Hib 1). Iesu a God. Bo Iesu puk ke me tamat. Iesu nagi patereig (Hib 5 doh mahar 9). Doh Iesu ter Patere uايا tun (Hib 7.25-28) i lolono tar pensiuunur uelhote, o patere ra uiliatung pous tasir inetesiner tua mare luaka liu God tasir tamat. Bo Iesu ke me mata katkatongo tar kale uelmahing teregi niguata uasaeig. God ke uahue toro duatingina Iesu tono maton (Hib 9). Temaeit God e turung kusa luara teregi niguata uasaeig tar binaka ri tagorong mana tang Iesu.

I lolonno toro Baeboul tar pensiuunur uelhote, o burehe ka tagorong mana tang God (Hib 11). Gisina ka tagorong man, e turung heiriha God tang Iesu. Temaeit gisin ahik pah ka sokor, gitiempe ka ueltupara pemesina tar bureher niduh. Temaeit inggeig pono paki tagorong mana tang God tar binaka ri ueltupara tar niduh (Hib 12.1-2).

O Mahar 1

No Uelhire God ke mene keipin tar tun ger keketik bulout

1 Sioununtiehe tun God ke mene keip toso bungugigeig tasir propet tar bureher binak, kare tar mamang hagarilik. ^{2j}Bo tar binaka pukulanine daan, God ke mene keip tar tun ger keketik bulout tono uelhire tagigeig. God ke ualapa-gaha tar tun tere kale uahua tar mamang inetelik. Tatanon, God ke touo keip tatanono tar mamang inetelik i ran dohi kot. ^{3k}Inggono tere ualasira tar balbalana na uinatoro God, doh inggono teke kale uakapa tun hape re baka pe God, kare kale toto tokaha tar mamang inetelik tono uelhire popokoh. Binaka ke uadelauana baka peono teregi niguata uasaeig, kare la tabilangua tar pang mua tang God ger tampopokohontiehe tun i Heuen.

^{4l}Temaeit inggono ter i rana kai uainintiehe tasir angelou ter siokono kompe tar hanga ke heirin God tatanon a irana kai uainintiehe tar hangasisin. ^{5m}Ge God pe ahik pah ke kula pare, me tang siokor angelou,

“Ingga a tuguo, daana ku kotpokoso inggo a tamoumua.” *Ker 2.7*

Doh ahik pono pah ke kula me angelou pare,

“Inggo u turung kotpokos a tamanon, doh inggon e turung kotpokos a Tuguo.”

2 Samuel 7.14

⁶ⁿDoh tar binaka tun ke marang heirihaono tar tun ger uoum ger bulout i kot, inggono ke kula pare,

“Inggoum, no angelou uakapa tun God, mu lotu tatanon.” *Ualatut 32.43*

^{7o}Kare kula pare tosono angelou,

^j1:2 Jon 1.3 ^k1:3 Jon 14.9; Kol 1.20; Hib 8.1 ^l1:4 Pil 2.9

^m1:5 1OUTT 17.13; Ap0 13.33 ⁿ1:6 Roum 8.29 ^o1:7 Ker 104.4

“God e guata sira tasir angelou misiana tar rom, doh tosno tamatang kalekinale o nituha keip toro luhluhuna ro hue.” *Ker 104.4*

⁸Bor Tunono teke kulaiono pare, “Ingga a God, nongo tabtabilang toiaa o turung moko dedela tar mamang binakalik,

Ingga o kauেকে keip tosnongo tamata tenang nitoia tar niguatar kodkodoh.

⁹Ingga o malauelhir tar niguatar uia, karo de tar niguatar sa.

Temaene, God ge nang Goda, ke uelpikur keip totomua tar uaiuiaing uah,

a hagarang ueltad a uleik uain tar niua-heit ke heiriono toso uanotoumua.” *Ker 45.6-7*

¹⁰God ke kula pono pare,

“Tar uakikilanganar binak, ingga teko touo tar tagirinar kot, doh tar limoum katong, ingga ko tou i ran.

¹¹Rasin ura turung rou, bo ingga o turung uangoul dede, rasin ura turung pensioum, kaura mout sira toro gomono pensioum.

¹²Ingga o turung ligun sira tasrasina toro kokop,

doh rasin ura turung uapalih.

Bo ingga puk o turung uangoul sira kompela pare tar mamang binakalik, ahik paho palih tagu.” *Ker 102.25*

¹³Doh God ahik pah ke kula sira tagu me angelou misiana ke kula pe tar Tun,

“Tabilane tar pang mua totoغوو, e tuka getu touahua inggo tosnongo uelmatana ra uangoul i kukulebanga totomua.” *Ker 110.1*

¹⁴PO hauanguasinar angelou? Gisin o iaben gera kalekinale tang God, doh no ualualatueon tar poul tasisit ra uelkarusis.

O Mahar 2

Mu tagin gete reih liuisioum toro man

2 Temaene inggeig i longlongoro hamas tun toro mana geki longorosieig geta reih liuisieig tang God. ²QO uelhire geka heir turuhain tasir angelou toso bungugigeig ko ualasira pare, o man, doh gisis ahik pah ka uakeluk tang roon, kara mahang longor, ka kale tar uelmahing ka uahingaig. ³rHopengua ri uareing peeig geti bangang duk tar uelkarusonener uleik? Ge a uelkarus peonene ke uelhire tauete uakikilangainir Tamata Noman, song ka heirihain tasisit ka longoro tatanon, ke mene pe tar me heir ualatumana tagigeig. ⁴sGod ke ualasira to pono tono uelhirer Tamata Noman pare, o man ke guata pe tar uaparok, a nitou, kara giniamehemper niguatar popokoh, kare pakaha tena inete uaiar Iabena Dedeil tasir tamat e pakaha tompe terener nimalar.

Iesu ger Tuna God ka uatamatain

⁵Ge God pe ahik pah ke uamoko tasir angelou ra me kauেকে tar timuhur koteit re turung lame ri menmeneieig. ⁶Bo misiana ro kula teil pe no uelhire God,

“O hua tuneimir tamat, maeit ro uanamnamantieha tamiueim?

Doho hua tuneimir tunar tamat, maeit ro kauেকে uaia ingga tamiueim?

⁷Tar sikinan siounur binak ingga ko guata tamiueim o i koto uain tasir angelou,

^p1:14 Ker 34.7; 91.11

^q2:2 Gal 3.19

^r2:3 Hib 10.29; 12.25

^s2:4 Mak 16.20; 1Ko 12.4,11

karo uataku toro keuaranar uiniator, kara uleikir ueltada tamiueim.

⁸ Ingga ko heir tamiueim tar kauেকে tar mamang inetelik.” *Ker 8.4*

Gine ri kula peeig, “A mamang inetelik,” e kulanguar puhono pare, ahik uadeil me inete ka aha liuin tar uangoul i kukulebanga tamiueim. Bo halana pukeig ti banga tar mamang inetelik re mok i kukulebanga tagigeig, ⁹bo inggeig puk i banga tang Iesu geke uaikoto sikoro bakin tasir angelou, maeit tena nipoul God ger hamhamas, inggono ke mata ueleheir tasir tamata uakap i kot. Doh gine daan inggeig i banga tatanono pare, ka uatakuin toro keuaranar uiniator, kara uleikir ueltad, teeit ke kale uelmahing peono toro mata tagigeig.

¹⁰ Doh auia nomananguampeono tang God geke touo tar mamang inetelik tena uiniatoro katong, doh geke touo turigir mamang inetelik, e keip ualeka toso bung tun tar butur re uangoul. Tena uelmahing Iesu, God ke guatangua tatanon a tamatang uoum keip uaia mare uelkarusono tasisin.

¹¹ Doh gine daan Iesu ke uadelauana tasir tamata tenas niguata uasa, doh inggono mes gisis ka uadelauanais a tang sioko tamas. Temaene Iesu ahik pahe matala tar kila tasisina pare, o bung tahin i lolono tena niuangoul God.

¹² Inggono ke kula pare tang God, “Inggo u turung hire toso bung tahig tar hua ko guatagia. *Ker 22.22*

Inggo u turung uatakai to totomua tar matasisir bureher tamatang tagorong man.”

¹³ Kare kula poluk pare, “Inggo u tagorong mana teil tatanon.” Kare kula poluk pare, “Inggo gine manasa mesir keketik geke heiris God totoquo.”

¹⁴ wGine o keketik pesitie re menameis Iesu gisina tesir tamata kompe, Iesu ke me tamata pe, ke kotpokoso sira tasisin. Inggono ke guata pare, maeit tonono maton, inggon e banotong kale liu uakapa tun tena nitampopokoho Satan gere kale teil tena nitampopokoho ro mat. ¹⁵ Doh tar hagarionene, inggon e banotong luaka liu tasisit ka uangoul dede tar karabus, teeit ra sokoro pesina toro mat. ¹⁶ Ge a puh pe a mana pare, inggon ahik pahe kotpokoso sira tasir angelou tar me poul tasir angelou, bo ke kotpokoso tun a tamat, tar me poul tosono tamata Abraham.

¹⁷ Temaait tun pe ka me uakotpokoso sir tunuiono toso bung tahin tar mamang hagarilik, mare kotpokoson a Patere Uleik ger uelueldolom, kara tamata ra tagorong mana uakapa tunin tena kalekinale God, doh mare me guatono tar uahung tar kale liu tenas niguata uasar tamat. ¹⁸ Doh gine daan, inggon e banotong poul tasisit ra uedangais, ge inggono katongo pe ka uedangain, kare kale uelmahingime toro mahara roon.

O Mahar 3

Iesu a i rana uain tang Moses

3 ^xTemaait ro bung uanotoug gesir dedeil, inggoumeit ke kila ponois God i Heuen, mu uamoko tun teremi ninamana tang Iesu geke heirihain God a tamatang keip uelhire tagigeig, doha Patere Uleik geri hire taueteieig teregi nitagorong man. ² God ke uamatoto tatanon, doh inggono ke kalekinale uaia tun tang God, te misiana kompe tang Moses ke kalekinale uaia keip tun pe tar mamang inetelik tena uma God tosono tamata Godosin. ³ Iesu ra ueltadantiehe uainin tang Moses, te misiana kompe tar

^t2:9 Pil 2.8-9 ^u2:11 Mat 25.40 ^v2:13 Ais 8.17-18

^w2:14 1Jo 3.8; UGO 12.10 ^x3:1 Aha 12.7; Hib 4.14; 7.26

tamatang tuha tar um ra ueltadantiehe uainin tar uma katong. ⁴Ge o uma uakapa pe, o nituhang tamat. Bo God puk teke tuhampe tar mamang inetelik.

⁵Y Moses ke kalekinale uaia sir tun no-manampe a tamatang kalekinale toso tamata God, doh na kalekinaleon ke ualasira uakalahara tun tar ineter man gere turung uakalaharaig God gitila i uoum. ⁶Bo gitie pukur tuna God pe Kristo, inggono teke i rana uainingua toso tamata God. Doh inggeigener tamatang tagorong man, inggeig tena umon geti uaongolompelasieig, kari uoho uanono tar inete ri tagorong mana teilin tang Kristo. ⁷Z Temaeit mu namana dedeoum ke kula per Iabena Dedeil pare, “Daana getung longoroum tar uauouguo,

⁸a ahik pah mu mahang longor misiana ka guata uoumper Israel tar binaka ka uanimaliana, kara uedanga to totoguo tar butur paden.

⁹Ter buturuono ka uedangantiehe to tun ro bungumiuoum totoguo, kara uedanga tereguor hamhamas, gitiempe ka banga pesina tenag nitouo toro toueitir hangaul ro krismas.

¹⁰Temaeit inggo ku nimalianantiehe tun tasir Israelesinasit

ka uangoulume tar binakon, karu kulo pare,

‘Gisin ra uoto pe puk ra la teil tereisir nimalar,

kara hik pah ka naman manate ter noguor hagar.’

¹¹b Temaeit ku nimaliana inggo, karu uaman i rana pare,

‘Ahik tunusin pah ra turung lekala tenag buturung pepe uaho.’”††

¹²Ro bung uanotoug, mu tagin, karung kaueke uanono tar koloumiu tar niguata uasa, doh tar tagorong boh gere reih liu penin tamiuoum tang God ger tua. ¹³Bo mu uelmene uatampopokoho dedempe-sioum tar mamang mareinilik, sikina re moko haraha per binak mara hik me kalamiuoum re uelourinir niguata uasa, kare la mahang longor. ¹⁴Ge gitie pe geti uoho uanoneig tar nitagorong man e tuka tar uadouhinar binak, kari tagorong mana uapopokoho tun tang God misiana ki uakekene pe, inggeig i turung uel-pakah tagungua tar huar nang Kristo. ¹⁵c Gine te hape ko kula pe no uelhire God,

“Daana getung longoroum tar uauouguo,

ahik pah mu mahang longor,

misiana ka guata uoumper Israel tar binaka ka uanimaliana

kara uedanga to totoguo tar butur paden.” Ker 95.7

¹⁶d Bo mais ka longoro tar uauana God, kara uanimaliana tatanon? Tesir tamata dehesin geke uoum tauete keip turis Moses i Isip. ¹⁷e Doh mais ke nimalianais God toro toueit ro hangaul ro krismas? Ahikiono pah teisis geka guata tar niguata uasa geke mata rikin tor tukunus tar butur paden? ¹⁸Ge mais pesina ke ualapagahais God pare, ahik tun pah ra turung lekala tenag buturung pepe uaho? Gisina teesis ka tagorong boho tatanon. ¹⁹Temaeit inggeig i naman manate uaia tunungua tasisin ahik pe pah ka banotong la uangoul toro mahar koto roon, teeitimpe ka tagorong boho pesin.

††3:11 Bolobolong Ker 95.7

y3:5 Aha 12.7; Ual 18.15-19 z3:7 Ker 95.7-11 a3:8 KT 17.7; Aha 20.2-5

b3:11 Aha 14.21-23 c3:15 Hib 3.7-8 d3:16 Aha 14.1-35 e3:17 1Ko 10.10

O Mahar 4

A buturung pepe uah geke ualapagahain God tosno tamat

4 Temaeit gine re moko pe na ualapagah God, tar lekala tena buturung pepe uahon, ti tagin gete punga kout me kalagigeig. ²Ge inggeig pe ki longoro manasa pono toro Uelhire Uaia geke uelhire tautein tagigeig, te misiana kompe ka longoro pesina tang roon. Bo o uelhire puk ka longoroinisin ahik pah ko banotong poul tasisin, teeit gisin ahik pah ka tagorong mana tar haua ka longoroig. ³fGe inggeig peene ri tagorong man teri banotong lekela tena buturung pepe uahon. Doh tasisit ahik pah ka tagorong man, God ke kula pare,

“Temaait ku nimaliana inggo, karu uamana to i ran pare,

‘Ahik tunusina pah ra turung lekela tenag buturung pepe uaho.’” *Ker 95.11*

God ke hire paar, gitiempe a nikaleuatoro tanik manasa pe mer pepe uahon tar binaka ke touono tar koto uakap. ⁴gInggeig i ate a nikaleuatoron, ge a puh pe e moko teil tono uelhire God e hire sira tar mouitinar marein pare, “God ke tuha uakapa tena kalekinale, kare pepe uaha tar uamouitinar marein.” ⁵hDoh tar giameher puh God ke kula pare tasisin, “Gisin ahik tun pah ra turung lekela tenag buturung pepe uaho.” ⁶Temaait mo gisiamehengua komper tamata geke uahueis God tera lekela tena uaning pepe uahon. Bo gisisir gisiameha geke longoro toro uelhire uaia geke hire tautein tasisina sioun, ahik pah ka banotong lekela tar buturung pepe uah, teeit torosio mahang

longorosin. ⁷iTemaait God ke uamoko sioko poluk tar siokor marein gere kilaiono, “Daan.” I muduhia ke la baka per puhung barah, inggono ke mene keip toha tang Debit misiana re mokon sioun per puh:

“Daana getung longoroum tar uauouguo,

ahik pah mu mahang longor.” *Ker 95.7-8*

⁸jGe gitie pe ge pake uoum keip Josua tasir Israel tar buturung pepe uah, God paka hik pahe mene baka poluk me Mareining Pepe Uaha sioko kaein i muduhia. ⁹Temaaitingua a Mareining Pepe Uah kae harahampein, e uangangoul tosno tamata God. ¹⁰kGe mai pe re lekela tena buturung pepe uaha God, e pepe uahangua pono tena kalekinale, te misiana kompe ke pepe uaha pe God ter nanar kalekinale. ¹¹Temaait inggeig i pentampopokoho manasa tar lekala tar pepe uahoneit mara hik me tang sioko re pung misiana tasir Israel geke pung, teeit torosio tagtagorong bohulik.

¹²lGe no uelhire pe God, roon o tua, karo tampopokoh, roono o manantiehe liu toro baenat gero uaraman, karo hiku tun i lolono teregi ninamaneig, doha iabegig, doha ueltumanan, kara gagonar hirougigeig. Roon o uakalahara teregi ninamaneig, doh regi nimalareig gere moko uailolono tun. ¹³Ge tar mamang inetelik pe geke touoig, ahik uadeil tun me inete re banotong ouo tang God. A mamang inetelik e padeneneig, kare moko tar kalaharan tar matanon. Teono teri la turung hiresieig tar mamang inetelik ki guataig.

Kristo ter paterer uleikir nagigeig

¹⁴mTemaait gitie nagi Patere Uleik peeig tang Iesu ger tuna God geke la

^f4:3 Hib 3.11 ^g4:4 Uak 2.2 ^h4:5 Ker 95.11 ⁱ4:7 Ker 95.7-8

^j4:8 Ual 31.7; Jos 22.4 ^k4:10 Hib 4.4 ^l4:12 Epe 6.17; UGO 1.16; 19.13-15

^m4:14 Hib 3.1; 10.23

kai i Heuen, ti uoho uanono dede tar inete ri tagorong manaig. ¹⁵Ge inggeig pe nagî Patere Uleik ger tang bang parok, kara tang ueldolom tagigeigir tamatang guata pe tar niguata uasa. Teeit nagî Patere Uleikeig ka uedangain tar mamang hagarilik misiana tagigeig, bo ahik pukuono mena niguata uasa tagu. ¹⁶nTemaeit inggeig i uaongolosieig, kari la uahuhutula tono tabtabila God tar buturung kale to tena hamhamasa God mari kaleig tar niueldolom menia tar nimalaelhirir nanon tar poul tagigeig tar binaka ri malar.

O Mahar 5

5 Ge o patere uleik uakapa pe ra uoto uamatoto turis tasir tamat, kara uamatoto ueleheiris tar kalekinale tang God, tar heir tenas ineter tamata ka heirig e laig tar uahungunar niguata uasa. ²Teeit a maluana pono peono tar bureher hagar, inggon e banotong guatguata hamasangua tasir tamata gera tel, doh tasisit ka pesiaua tar guata uaia. ³oTemaenengua re guatono tar uahung tar kale liu katongo terener niguata uasa, doh nas niguata uasa ponor tamat. ⁴pAhik me tamata re banotong kale katongo tar ueltadanar kalekinaleonene, bo God katongompe tere kila tatanon misiana kompe ka kila uoumpain Aron sioun.**

⁵Ter siokono kompe, Kristo ahik pah ke uamatoto katongoin mare kale tar ueltad tar kotpokos a Patere Uleik. Bo ke kila katongompein God pare, “Ingga a tuguo. Daana ku kotpokoso inggo a Tamoumua.” *Ker 2.7*

⁶qKare kula poluk tar giameher butur pare, “Ingga o turung patere dede tar mamang binakalik,

misiana sira tang Melkisedek.” *Ker 110.4*

⁷rTar binaka ke uangoul Iesuane i kot inggono ke kirkiring uauleik keip tena lotu, kare dangata tutup tang God gere banotong uelkarus tur tatanono toro mat. God ke longor, teeit a tang longoro keip tun peono tar ueltada tang God. ⁸Temaeit gitier tuna God pe Iesu ke ate tur toro longlongoro tar niduh ke huatameig. ⁹Doh gitie ke longoro peon, kare uakuakeluk hihir tun tena nimalara God, ke kotpokosongua ter tengkanar uelkarus gere moko dede tar mamang binakalik tasir tamata gera longoro tatanon. ¹⁰Temaeit God ke uatur uakalahara tatanon a Patere Uleik misiana sira tang Melkisedek.

Ahik pah mu marapula kout tar tagorong mana tang Kristo

¹¹Inggo a bureher ninamana ru marang meneig tar puhonene, bo a parakukuh puk tar uakalahara tamiuoum, teeit inggoum o mahang iate. ¹²sInggoum kung ate manasa tang Iesu tar puhung barah, doh pakung ualasira manasa tasir gisiameh. Bo inggoum puk, mu uahingo harahampe me tamata tar ualasira baka poluk tamiuoum tar inete uleik uelhir gere uoto ate uakekenigir tamata tono uelhire God. Inggoum misiana tasir guamasitie ra huh puk tar huh, kara hik pah ra banotong ein tar niein pompomot. ¹³Ge gisine pe ra inum tar huh misiana haraha tasir guam, doh ahik pah ka naman manate tar nialasirar kodkodoh. ¹⁴A niein

**5:4 5.4 Bolobolong Kalekinaler Pater 16.6, 11-14; 9.7

ⁿ4:16 Hib 10.19 ^o5:3 NKP 9.7; 16.6 ^p5:4 KT 28.1 ^q5:6 Hib 6.20; 7.1

^r5:7 Mat 26.36-46; Pil 2.6-8 ^s5:12 1Ko 3.1-3

pompomot a eisisitir mahmahohououm res ninaman geke ate uoumis, kara banotong bang paroko tar huar uia ue a sa.

O Mahar 6

Tagin getung punga kout

6 Temaeit inggeig i hiliu manasa tar uakikilanganar niualasir tang Kristo geke ualasira uakikilangaig tagigeig, kari la uain manasala i kotpokos a mahmahoho regi nitagorong man. Inggeig i uanua manasa tar uelueltapokise tar niualasir ki kale manasa uoumig, ahik pahi ualasira baka poluk tar haging uiuir liu tar niguata gere haijala toro mat, doh tar tagorong mana tang God. ²Doha niualasir tar uahuhu, doh tar tuha uapono keip tar limana tasir tamat, kara lotu keipis, doh tar nitua tapokis tur toro mat, doh tena nikedanga God tasir tamat e la dedein tar mamang binakalik. ³Inggeig i la uain manas, ge teri turung guata manasa pe inggeig gete uahue God.

⁴Gea mahang pe tunungua peono tasisit ka kalahara uoum tar luhur nang God, doh ka hagouo paroko tar inete uaia ke heir turuhagion i Heuen, doh ka kale pono tar labena Dedeil, ⁵doh ka hagouo paroko hape ro uia to pela no uelhire God doh na nitampopokohor binakeit re turung lame. ⁶A parakukuh tununguampe tasir tamatasina tar uiuir tapokis polukula tang God gete ka uatuka koutusina tar tagorong mana tatanon. Ahik tun! Teesina tera tina to polukula tang Iesu tar korose, kara uamatala toin tar matasir manai.

⁷A bureher binaka re uoto durar huan, doha kot e uoto inum tananin, doh gete hua uaia tur me niein tar kotonin tar

poul tasisit ka leba tar iom, God e turung guata uaianguampe toro mahar koto roon. ⁸Bo gete tungara tur me uoho ueluelhung, doh me garasa uasa uelhir puk, o mahar koto roon o sangua ponompe, ahik pahi reh, kare ueluelde God toro mahar koto roon, o sa, karo turung luh uakapa tununguampe.

⁹Ro bung uanotoug, gitie ring mene pe inggeim pagiare, inggeim ahik pah mi tagorong mana teil pare, mu uoto guatoum tar puhunin. Ahik, inggeim mi ate teil tun pare, inggoum mu uoto guata tar nipileser uiantiehe gere uahire tamiuoum o niuelkarus. ¹⁰vGe God pe a tang kedanga uelmatout. Inggon ahik pahe banotong malabobour hape kung kalekinale pemeoum tatanon, doh hape kung ualasira peoum teremi nimalaelhir tatanon, kung kaueke pe tosno tamaton misianeit rung guata haraha pe.

¹¹Inggeim mi malarantiehe tun tamiuoumur tang siok tang siok, tar petutup tar uelmalaelhir dedempesioum e tuka gete kapa nami niuangoul, marung ate tunoum tar hua kung tagorong mana teilig e turung kotpokoso noman. ¹²Karahik pah mi malara mu marapuloum, bo mu uakeluk sira tasisit ra turung kale tar hua ke ualapagahaig God, teeit ka uanguangoul hamas pe, kara tagorong man.

A hua re ualapagahaig God e kotpokoso noman

¹³Sioun tar binaka ke ualapagah God tang Abraham, inggono ke uaman i ran tar guata tar hua ke ualapagahaig. Gitie ahik pe me tamatar i rana uain tatanon, inggono ke uamana katongo toin. ¹⁴Inggono ke kula pare, "Inggo u turung guata uaia nomana tun totomua,

⁶6:6 Mat 10.22; Hib 10.26-27; 1Jo 5.16

^v6:10 Hib 10.32-34

^u6:8 Uak 3.17-18; Mat 13.7,22

karu turung uabour mo bungumua mara burehentieh.” *Uakeken 22.16-17*

¹⁵ Abraham ke uangougoul hamas, song ke kale tar haua ke ualapagahain God.

¹⁶ Tar binaka ra ualapagahar tamat, gisina ra uamana tola tar tamatetier i rana uain tasisin, a puhung uamanon e uapopokoho tenas uelhiresin, kare tur tane tar uelperer. ¹⁷ Temaeit God ke uamana katongo tolain mare uakalahara uaia tun tasisit ra turung kale uahiua tar haua ke ualapagahaion, kara hik pahe turung uapalih tena ninaman.

¹⁸ Inggon ke heir tokaha tena ualapagah, doh na puhung uaman ter toking puh rasina rasine ahik pah ura banotong uapalih, teeit a mahang pe tun pe tang God tar boh. Temaeit inggeigene ri ualo uelhir keip tatanono tar niongolo tar kauek, i banotong kusa uanono tar inete ri tagorong mana teilin ka uamoko umatotoin tagigeig.

¹⁹ ^xA nitagorong manon, gine ri kale teilieig misiana pah no otor iabeigigeig. E tur uanon, doha popokoh, dohe hikula toro mahar gomono gero kusa uaouo tar butur ger dedeilintieh iuma tar umang lotu ger dedeil. ²⁰ Iesu ke leka manasa uoumula tar buturuon, e la manasain tar poul tagigeig. Doh inggeig ke kotpokoso manasa nagi patere uleikeig tar mamang binakalik misiana sira tang Melkisedek.

O Mahar 7

Mai tunuonene Melkisedek?

7 ^yInggonene Melkisedek tenas toiar uan uleik i Salem, doh na patere pono God ger i ranantieh. Tar binaka re lang tapokis manasa Abraham tena uan, i muduhia ke uoumuoum teil pe tar uiliatung tasir tang toueitir toia, Melkisedek ke ueltupara kout tatanon,

kare lotu tang God tar heir tar nita-mpopokoho tatanon. ² Song ke pakaha Abraham tar mamang inetelik ke kale turig tar uiliatung, kare heir tar sisi-siokor hangaul ro mahar tar inete tang Melkisedek. (A tengkanar hangonene “Melkisedek” e kula pare, “A Toia ger Kodkodoh.” Doh gitie nas toia pono per Salemon, hanganon e kulangua pono pare, “Na toia ro hiarou.”) ³ Ahik uadeil me puh re uahire teil ge para to tinanon ue a to taman ue mo bungun. Kara hik mena marein ke uakekene pe ue mena uadouhinar marein tena niuangoul. Inggon misiana tar Tuna God, e uangoul dede sir a patereng tar mamang binakalik.

⁴ Ingga o bang parokonguampe hape re i rana peon, ge Abraham pe ge tubugigeig ke heir tatanono tar sisi-siokor hangaul ro mahar tar mamang inetelik ke kale turig tar uiliatung. ⁵ Doh gisis ro bunguna Libai gesir niuamato to tar uoho tenas kalekinaler pater, a ualatut e kula tasisina tar kale tur tar sisi-siokor hangaul ro mahar tar mamang inetelik tasir tamat, gitiempe o tahisilik pesina tasisin, kara tamas tokah tang Abraham. ⁶ Bor tamatene, Melkisedek, ahik tagu pahe uangoul teil toso bunguna Libai, doh ke kale tur tar sisi-siokor hangaul ro mahar tar mamang inetelik tang Abraham, kare lotu tang God tar uatampopokoh, dohe guata uaia tar tamatener niuamatoto tar ualapagah. ⁷ Inggeig i ate tun pare, a tamata ger i kot, e guata uaiainir tamata ger i rana uain.

⁸ O patere ra kale tar sisi-siokor hangaul ro mahar tar mamang inetelik, gitiempe o tamata puk pono pesin gera uangoul baka puk, kara turung mat. Bo Melkisedek geke heirin Abraham ro mahara tar mamang inetelik, e uangoul

dede kompela misiana ro kula pe no uelhire God. ⁹ Inggeig i banotong kulangua tang Libai pare, inggono ke kale tar mahar mamang inetelik, kare heir turungua ponompela tar binaka ke heir Abraham toro mahara tar mamang inetelik tang Melkisedek, ¹⁰ ge tar binaka pe ke uelupar Melkisedek tang Abraham, Libai e uangoul teil haraha tar tukununa Abraham gere turung uatubunuion.

¹¹ Ge pakene ke kalkalekinale hihirtun nas kalekinaler patereng Libai doh Aron, e uakeluk to tena nimalara God, geter nas tun per ualatut, paka hik baka poluk mo kahakahar pater ra kotpokos. Bo ae maene ke malara God me tamat e la tur tang Melkisedek, kara hik pah me tamata re la tur tang Aron?^f

¹² Ge tar binaka pe re uapalih nas niguatar pater me uapalih tar ualatut kae ponin. ¹³ Ge a tamata peene ri meneneieig e uangoul teil toro matina siok, doh ahik ro tahinalik pah ra banotong kalekinale to i rana toro olta. ¹⁴ ^aA puhon a kalahara tenagi Tamata Nomaneig ke la tur pe toro matina tang Juda, doh toro matina roon, Moses ahik pah ke mene me puh tasisin e lain tasir pater.

Melkisedek a niuamisiana to tang Kristo

¹⁵ A puh uakapaninanine a kalahara uainingua, teeit a tang giameher patere ke kotpokosoh manasha misiana tang Melkisedek. ¹⁶ Inggon ahik pah ka uapaterere keipin menas ualatohor tamat ue me ualatut, bo ka uapaterere keip turin tena nitampopokoh, doh na niuangoul gere moko dede tar mamang binakalik. ¹⁷ ^bGe no uelhire pe God o kula pare,

“Ingga o turung patere dede tar mamang binakalik,

misiana sira tang Melkisedek.” *Ker 110.4*

¹⁸ Na ualatut Moses ka uamoko liu manasaig, teeit ginin ahik mena nitampopokoh, kara hik mena kalekinale. ¹⁹ ^cA ualatutunin ahik pah ke banotong uauauia hihir tasir tamat. Bo daan inggeig ki tampopokoh, ri tur uanono keip pe tar nitagorong manar uia uain gere ueliu uahuhut tagigeig tang God.

²⁰ Tar mene ualatumana tar puhonene, God ke uaman i rana tar binaka ke uapaterere tang Kristo. Tar binaka ka uapaterere meisir gisiamah, ahik uadeil me ualapagah tagu. ²¹ ^dBo Iesu ke kotpokos a patere tar haging ualapagaha tar binaka ke kula God tatanono pare,

“A Tamata Nomana ke uaman i ran.

Ahik pahe turung uapalih tena ninaman. Ingga o patere dede tar mamang binakalik.” *Ker 110.4*

²² ^eA puh ke uagiamehe sioko tar ualapagahene ra menmenein, e ualasira tagigeig tang Iesu ter tamatar uiantiehe tar kaukeke tar uelhoteonener uia.

²³ A giameher puh re uagiamehe sioko tar pensiounur uelhote, doha timuhur uelhote, tesir patere gera uangoul teil tar pensiounur uelhote, o bureh. Tar binaka re mater tang siokor pater teke tuka na kalekinaleon, kara tang giameh e turung kale palih tena hagarion. ²⁴ Bo Iesu teeit re uangoul dede pela, inggon e uangoul dedengampe a patereng tar mamang binakalik. ²⁵ ^fTemaeit daan, doh tar mamang binakalikimpe, inggon e banotong uelkarus turungampe tatan tasisit uakapa tun ra lame tang God tur tar hangan Iesu, teeit re uangoul dede

^f7:11 7.11 Aron a tubuna Libai

^a7:14 Ais 11.1; Mat 2.6; UGO 5.5 ^b7:17 Hib 5.6 ^c7:19 Hib 10.22; Jas 4.8

^d7:21 Hib 5.6 ^e7:22 Hib 8.6; 12.24 ^f7:25 Roum 8.34

peono tar dangata ueleheir tang God tasisin.

²⁶Inggono ter paterer uleik ri uahingaieig, teeit inggon a dedeil, kara hik pah ke guata uasa me inet, doh inggon a niuatur liu sioko tasir tamatang guata tar niguata uasa, ka uairana uainin tar mamang ineteliking Heuen. ²⁷⁸Inggon ahik pah misiana tasir gisiameher paterere geka heirheir tar uahung tar mamang mareinilik, ra uakikilanga keip teresir niguata uasa, song res niguata uasar tamat. Kristo ke heir tena uahung tar siokon siounur binak e la manasain tar mamang binakalik tar binaka ke heir katongoin a uahung. ²⁸Ge na ualatut pe Moses e uamatoto tasir paterere uleik ge ahik paho deldelauana hihir uakapa tun, bor ualapagah puk geke lame i muduhia tena ualatut Moses, ke uamatoto tar tuna God ger delauan uakapa tun tar mamang binakalik.

O Mahar 8

Iesu tenagi Patere Uleikeig tar timuhur uelhote

8 Ter tengkana tunur puh ru marang meneio te gine, inggeig nagi Patere Uleik e tabila tar pang mua tono tabtabilar toia o nang God ger i ranantiehe tun. ²Nagi Patere Uleikeig e kalekinale to tun tar butur dedeilon tar taluhung lotu ger man geke tuhainir Tamata Noman, ahik pah ke tuhain me tamat.

³O paterere uleik uakap o niuamatoto tar heir tar inete uaia gera heirinir tamat a uahung, karo inetesiesier tua tang God. Temaeit nagi Patere Uleikeig pake heir pono me inet e lain pare, na uahungon. ⁴Bo ge pake uangoulon i kot, inggono paka hik tun paha pater, ge o paterere uoum pesis ra heir tar uahung re

uahingo pe nas ualatutur Ju. ⁵^hA kalekinale ra tuhainisin gitier paterere pe, a niuamisiana to puk tar haua re mok i Heuen. Ter siokono kompe tena binaka Moses, tar binaka ke marang tuha manasono tar taluhung uelhote, God ke kula uapopokoho tatanono pare, “Namana uanono tar guata sira tun tar mamang inetelik misiana ko banga to pe ka ualatoto to peia i rana tar siusan i Sainai.”

⁶ⁱBo gine puk daan, Iesu ka heir manasain tena kalekinaler pater ger i ranantiehe uain tar nasisin, te misiana kompe tar uelhote ger uiantieh, teeit re tengkana tur pe tar inete uaientieh ger niualapagah.

⁷Ge pakene ahik me inete ke sa sikoro tar uakikilanganar uelhote, paka hik baka poluk me giameher uelhote ra uahingain. ⁸^jBo God ke banga tar ineter sa tasir tamat, temaeit ke kula pare, “Bang! A marein gine manasa re lame teke kula per Tamata Noman geru turung guata keipio tar timuhur uelhote tasir tamatang Israel doho Juda.

⁹Inggon ahik pahe turung siokono sira tar uelhote geku guata keipio toso bungususina tar binaka

ku kusa inggo tar limasisin, karu uoum keip tauete tun tasisin i Isip. Gisin ahik pah ka uangoul uaia keip tar uelhoter noguo, temaeit ku bangan dukuo tasisin, teke kula per Tamata Noman.

¹⁰Gine ter uelhote, geru turung guata keipio tasir tamatang Israel i muduhia tar mareinene, teke kula per Tamata Noman.

Inggono u turung uamokola tenag ualatut teres ninamanasin,

⁸7:27 Hib 5.3 ^h8:5 KT 25.40; Kol 2.17; Hib 9.23 ⁱ8:6 Hib 7.22

^j8:8 Jer 31.31-34

karu bolo uahiuala tananin tar koloususin.

Inggo nas turung Godosin, doh gisina ra turung kotpokoso nogo tamato.

¹¹Doh ahik baka poluk me tamata ra uahingain tar ualasira tang uanotono tar Tamata Noman,

teet o tamata uakapa ra turung siokor ate totoguo, e

uakekene keip tasir tatamatalik, e la uatuka tasir tamatar tohangas.

¹²Ge inggo pe u turung kusa luara teres niguata uasasin,

kara hik pahu turung namana huara baka poluk tananin.” *Jeramaia 31.31*

¹³Gine ra kilang timuh peinir uelho-teene, God ke uapensioun tar uakikilangan. Doha huar inete geke pensioun, kara hik mena kalekinale, ahik pahi rehe, kare turung rou.

O Mahar 9

Na ualatohor lotu tar uelhote ger pensioun

9^kGaat tar uakikilanganar uelhote i uantinanina tang God, doho Israel, a to ualatutun hape tar hagarang lotu, doha buturung lotu to ponompe a ni-tuhan tamat. ²I lolono tar taluh, a ni-uatine kout tar torikir tine um. Giner uakikilangan ra kilain a Butur Dedeil. Tar buturuon o toko ro lam doha patehe na ro bereit gero niuadedeil. ³^lIumahia tero kusa ro mahar gomono obot, dohi muduhia tero mahar gomono roon ter tine umeit ra kilain a Butur Dedeilintiehe tun. ⁴^mTar buturuon o moko ro olta ra uoto ualuh toigir adua,^{§§} doha bokisinar uelhote e tok a niuahail tane

§§9:4 A ‘insens’ a muhung adua

keip uakapa tar goul. I lolono tar boki-sion e moko teilir nouh a goul uakap a niongolar bereit geke heirig God tasir Is-rael ra kilaig “a mana,” doh no tukana pono Aron geko tiuan, karo tokino mahar palau gero tokino nibololar ualatut.

⁵ⁿI ranahia tar bokis ura turur toking angelou, e toking goul uakap, ura uahire e uangoul God tar buturuon, a ra titiauas rasin e uamomolouina uahiuako tar matanar bokis, a buturuon ra kale liu toigir niguata uasa. Bo gine puk daan, ahik me binakang uahuahire hihir tar mamang inetelikininanine.

⁶^oTar binaka ka uamokoigir mamang inetelik pagiare. O patere ra lekela tar uakikilanganar tine um tar mamang binakalik tar guata tenas lotu. ⁷^pBo ter patere puk manasampe ger uleik, tere lekela tar uatorikinar tinetier dedeilintiehe tun tar siokon siounumper binak i lolono toro sioko ro krismas. Inggon e kale keip tagu dede tar deuating gere la heirigion a uahung tang God e lain tatan, doh teres niguata uasar tamata ge ka pesiauaig. ⁸A Iabena Dedeil e ualasira to tar mamang inetelik ka uamoko uelhir peig pare, tar binaka re toko hara-har uakikilanganar tine um, a lelung lekela tar Butur Dedeilintieh halan ta puka ueleheirin tagigeig.

⁹^qA mamang inetelikininanine a ni-ualasira to puk, e uahire me tagigeig tar ineteng daan. E kula sirar puhono pare, a inete uaia, doha uahung ra heirigir tamata tang God, ahik pahe banotong uadelauana tar koloususit ra la lotu.

¹⁰Doh gitie ra guata keip puk pesina tar niein, doha inum, doha giniamememper hagarang uadelauan, gininanine a siokor ualatutung gane i kalaharahia

^k9:1 KT 25.23–26.30 ^l9:3 KT 26.31-33

^m9:4 KT 16.33; 25.10-16; 30.1-6; Aha 17.8-11; Ual 10.3-5 ⁿ9:5 KT 25.18-22

^o9:6 Aha 18.2-6 ^p9:7 NKP 16.2-34 ^q9:9 Hib 10.1-2

puk tar tukununar tamat gera uakeluk pukig e tuka tar binaka re guata God tena timuhur niuangoul.

A deuatingina Kristo ter uiantieh

¹¹ Temeait Kristo ke la manasaha, inggono ter Patere Uleik geke keip pokoso tar ineter uia tagigeig gere moko manasa daan. Inggono ke leke tar taluh i Heuen ger uleik, kara uiantiehe uain tena taluh Moses, ahik paha nituhang tamat, kara hik paho maharang gane i kot. ¹² Tar binaka ke haijala Kristo tar taluhon, ke leke uasiokon siounumpela tar Butur Dedeilintiehe tun e la manasainir siokor binakono tar mamang binakalik. Inggono ahik pah ke kale me deuatinginar meme ue me kau kalan tar heir tar uahung, bo ke kale tar deuatingina katongo mare uelkarus keip tagigeig tar mamang binakalik.

¹³ ^rA deuatingisir meme, doho kau makan, doha taunar kau tinana ra kirkirasaig tasir tamata ge ahik paho delauan, ginin e uadelauan puk tar tukunusisin tena nibangar ualatut. ¹⁴ ^sDoh gitier mana per puhene, namana ah ter nitampopokoh uleikintiehe ter deuatingina Kristo tar uadelauana tar kolougigeig, mari kalekinaleig tang God ger tua. Ge tena nitampopokoho per Iabena Dedeil gere moko dede tar mamang binakalik, Kristo ke heir katongoin a uahungeitier delauana tun tang God.

¹⁵ Temeait Kristo teke kaleuatoro tar timuhur uelhote mara kalesit ke kilais God tar niguata uaian tar mamang binakalik geke ualapagahain God. A puhonene e banotongua ra guatain, teeit tono mata Kristo mare bulaua tapokis tasir tamata tenas niguata uasa

ka guataig tar binaka ra uangoul harah i kukulebananga tar uakikilanganar uelhote.

¹⁶ Toro mana tun, binaka ra guatainir uelhote sira pare, misianangua geta boloin ro mahar pepang kale uahiu tena ineter tamat gere mat. Ter hauon, a tamatene re bolo toro pepa e marang uahire teil mais ra turung kale uahiu tena inetono tar binaka re mat. ¹⁷ Ge o pepa pe o tabo tengkan tar binaka re tua harahar tamat, o la kalekinale uapopokoho to puk i muduhia gete mata bakar tamat.

¹⁸ Temeait ke tampopokohor uakikilanganar uelhote, teeit puk ka uatampopokoho keip peig tar deuating. ¹⁹ ^tA uakikilanganar inete ke guatain Moses, ke uahire baka uoum tasir tamata tar mamang ualatutulik ka bolo uahiu-uaig. Song ke kale tar deuatingisir kau makan, doho meme, kare uelhouar keip tar kodom, kare kirasa hahai i rana toro bukung tar ualatut, doho tamata uakap. Inggono ke kirkirasa keip tar rando-doukulik ra kilain o hisop, a niauih tar puhung uoho kubkubar.* ²⁰ Song ke kula pare, "Gine ter deuatinginar uelhote ke guata keipin God tamiuoum tar uakeluk." ²¹ ^uKare guata poluk tar siokono komper hagar, ke kirasa hahai poluk tar deuating tar taluh ger dedeil, doh tar mamang inetelik ra uoto lotu keipig. ²² ^vToro mana tun re hire teil per ualatut, a mamang inetelik ke uahutung siokor delauana uadeil puk manas, ka uadelauana keipeig tar deuating. Geta hik mo deuating ro tading, ahik ponompe God pahe kusa luara tenas niguata uasar tamat.

*9:19 A puhung uohene a nituha keip tar ulunar sipsip

^r9:13 NKP 16.15-16; Aha 19.9,17-19; Hib 10.4 ^s9:14 1Pi 1.18-19

^t9:19 KT 24.6-8 ^u9:21 NKP 8.15,19 ^v9:22 NKP 17.11

A deuatingina Kristo e kale liu tar niguata uasa

²³W^wTemaeit a taluhung gane tar kot, doha mamang inetelik re moko teil tatanon, a nibanga to puk tar ineteng Heuen, kara uadelauana keipig tar deuatingisir inetesisir tua. Bor ineteng Heuene tun ra uadelauana keipig tar uahung ger uiantiehe uain tar deuatingisir inetesisir tua.

²⁴Ge Kristo pe ahik pah ke lekala tar Butur Dedeil ke tuhain me tamat ger nipetut sira tatanoneit tun. Bo ke leke tunumpela i Heuen tar butur re uangoul God, tar kale tenagi hagareig.

²⁵Nas patere uleikir Ju e leke keipila tar deuatingisir inetesisir tua tar Butur Dedeilintiehe tar mamang krismasilik. Bo Kristo ke leke pela ahik pah ke heirheir uapoul taguin a uahung.

²⁶x^xGe pake te pagiaron, inggono pake matmate uapoul tur ke uakekene peme kot. Bo ahik puk, inggono ke la uasiokon siounumpeha e la manasainir siokor binakono tar mamang binakalik tar binakene re me uelmatout tunur mamang inetelik, tar kale liu keip tena nitampopokohor niguata uasa tagigeig tar uahung ke guata keipin tono mat.

²⁷God ke uamoko uamatoto tasir tamata uakap ra mata uasiokon sioun puk, dohi muduhia e kedangono tasisin.

²⁸Te misiana kompe, Kristo ka heirin a uahung tar siokon sioun pukur binaka tar kale liu tenas niguata uasar bureher tamat. Inggon e turung tapokis polukuha ahik pah tar me kale liu tar niguata uasa, bo tar me uelkarus tasisit ra uangangoul uahingo tatanon.

O Mahar 10

Kristo ke heir uasiokon siounin a uahung e lain tar mamang binakalik

10 A niguatar pensioun tena ualatur Moses ngohina paha niualasira to puk tar ineter uia re turung lame, ahik pah ter inete tun. A uahung ka guataig tar niguatar pensioun ka guatguata uapoulig tar mamang krismas, bo ahik puk pah ke banotong guata me puh tar uadelauana hihir tun tasisit ra lame tar lotu. ²Ge pako delauana nomanar tamatasit ra me lotu tang God tenas niguata uasa, paka hik baka poluk pah ra matala keip tenas niguata uasa, doh pake tuka manasar guata tar mamang uahungulik.

³Bo tar uahungionene ra uoto guatain tar mamang krismas e uoto uanamana tapokis puk tasir tamata teres niguata uasa. ⁴y^yGe ahik per deuatingisir kau mesir meme pahe banotong kale liu tar niguata uasa. ⁵Temaeit tar binaka ke uahuhutung la manasaha Kristoane tar kot, inggono ke kula tang God pare,

“Inggah ahik paho malaras tasir inetesisir tua ra heiris a uahung, doha ineter niheirheir puk.

Bo ko kaleuatoro tanika puk totogou tar me kale tar tukunug.

⁶Inggah ahik paho uaha tasir inetesisir tua gesir niualuh uaududeil toro olta ue tar uahung gere kale liu tar niguata uasa.”

⁷“Song ku kulo pare, ‘Nagu God, bang! Inggog gine, ku laha tar me tuha tar haua ko malauehira

teka bolo sira peio toro buk.” *Ker 40.6-8*

⁸Uakikilangan, Kristo ke kula pare, “Inggah ahik paho malar, kara hik paho uaha tar uahung gera guata keipig tasir inetesisir tuar niualuh to toro olta, doha

uahungung tar kale liu tar niguata uasa.” (Gitiempe ra heir peigir uahung re kula pe na ualatut Moses.) ⁹Song ke kula pare, “Nagu God, bang! Inngo gine, ku laha tar me tuha tar haua ko malaelhiria.” Temaeit God ke uakapa liu tar uahung ger pensiou, kare uamoko palihila tena uahung Kristo. ¹⁰^zTeeit Iesu Kristo ke guata tar haua ke malaelhirin God. Temaeitingua ka siokor uadedeil turusieig tar niguata uasa tar uahung geke guata keipiono tar tukunur tar siokon siounur binak e lain tar mamang binakalik.

¹¹^aI lolono tar pensiouur uelhote, o patere uakapa ra uoto tur i uoum toro olta tar mamang mareinilik ra uoto heir pe tar siokonor uahung gera heirheir uapoulin, kara hik pahe uoto kale liu baka tar niguata uasa. ¹²Bo Kristo puk, ke heir tar siokon siounur uahung tar niguata uasa mare lainir siokor binakono tar mamang binakalik, song ke la tabila tar pang mua tang God. ¹³^bTar buturuon inggon e uanguangoul e tuka geta touahiuais no uelmatanon i kukulebanga tar kekenon. ¹⁴Tar siokon siounumper uahungon, inggono ke uadelauana hihir tunungua tasir tamatasit re uadedeilis.

¹⁵A Iabena Dedeil ke hire pono tagigeig tar puhene, uakikilangan inggono ke kula pare,

¹⁶^c“Gine ter uelhote geru turung guata keipio tasir tamatang Israel, i muduhia tar binakene teke kula per Tamata Noman.

Inngo u turung uamokola tenag ualatut tar koloususin.

Karu turung bolo uahiuala tananina teres ninamanasin.” *Jeramaia 31.33*

¹⁷“Doh nas niguata uasasin, doha mamang niguatalikinitier sa ka guataigisin, inggo ahik pahu turung namana huara baka poluk.” *Jeramaia 31.34*

¹⁸Doh geta nikuse luara manasanin, ahik baka poluk me puh ra uahingain tar guata me uahungunar niguata uasa.

Ti la uahuhut tang God

¹⁹^dTemaeit, ro bung uanotoug, inggeig i banotong uaongolosieig, kari lekela tar Butur Dedeilintiehe tun i Heuen, teeit toro deuatingina Iesu. ²⁰^eTono maton, Iesu ke puk ueleheir tagigeig tar leler timuh gere heir tar nitua. A lelone e haijala toro mahar gomom tar tine um ger dedeilitiehe tun.

²¹Doh gitie nagi Patere Uleik peeig gere uoum keip tosno tamata God, ²²^finggeig i me uaongolosieig tar la uahuhut keip tar kolougig tang God, doha nitagorong manar uleik. A kolougigeig a nikirasa liu tar niguata uasaniner ualamatala tun toro deuatingina Iesu, doha tukunugigeig a niuahuhu tar kodom ger delauana tun.

²³Inggeig i kale uanono tar haua ri tagorong mana teilin geri uelhire tauetein, ahik pahi uaruara naman, ge God pe e uamana tena ualapagah. ²⁴Namana me hagar ri banotong uatentur keipin tar uelpoule tar ualasira tar uelmalaelhir, doh tar guata tar niguatar uia. ²⁵^gAhik pahi uakenua tar uiliodout misiana ka guata uoum per gisiamah, bo paki ueluaongole dedesieig. Guata ualatataunula tar puhunin ri banga to pe tena mareinir Tamata Noman e la uahuhutume.

²⁶^hBo geti uakuakelukeig teregigir nimalar tar guata pukula tar niguata uasa

^z10:10 Hib 9.12

^a10:11 KT 29.38

^b10:13 Ker 110.1

^c10:16 Hib 8.10

^d10:19 Hib 4.16

^e10:20 Mat 27.51

^f10:22 NKP 8.30; Isk 36.25; Epe 5.26

^g10:25 Hib 3.13

^h10:26 Hib 6.4-8

ki kale baka pe toro man, ahik baka poluk me giameher uahung re kale liu tar niguata uasanin. ²⁷iBo ter puh puk manasa re mok te tar uangangoul keip puk manasainir nisokoro tar nikedangeit re lame, doho tukuno hue gero turung mamantouo tasisit ra uelmatana tang God. ²⁸jGete mahang longoro me tamata tar uakeluk tena ualatoho Moses, ahik pah ra ueldolomoin, bo ra tung pousin. A puhon ra guatain geta tang torik ue a tang touon ura tur keip. ²⁹kBo hapengua tasisit ra banga uasa tar Tuna God, doh ka ngongo sira tar deuatingina Kristo paha iinetelik puk, kara hik paha dedeil. A puh peono teke uadelauana liu tatanono tar niguata uasa. A tamatonene ke uelsigala tar Iabena Dedeil gere keip teil tena niuldolomo God. Namana aha hape re turung uleik per niduh ra kaleinisin! ³⁰lGe inggeig pe i ate teil te God pe ke kula pare,

“A pe hahauanar niguata uasa nag kalekinaleo,

inggo katongo uoumumpe ru turung pe hahau.”

Kare kula poluk pare,

“A Tamata Noman e turung kedanga tosno tamat.” *Ualatut 32.35-36*

³¹A ualaskorong maluana tun gete uabang manate God Ger Tua tar tamat.

³²Namana tapokis tar haua ke kotpokoso tamiuoum sioun, binaka kung ate uakekene tang Kristo. Hape kung huata bolongur pe me tar niduh, gitiemper niduh uleik tun penin. ³³A binaka inggoum ka mene uasa tosioum tasir manai, kara heirisioum tar niduh. Kara binaka kung uahueoum tar tur keip tasisit ka guatais pare. ³⁴mKung huata keip tagu tar niduh tasisit ka bakalais tar karabus. Tar binaka ka kale liu turig nami hau-

oum tatamiau, inggoum kung uahue keip tar niuah. Teeit rung ate teil pe pare, a namiuir inete ke ualapagahaig God, a inetenin auia uainintieh, dohe moko dede tar mamang binakalik.

³⁵Ahik pah mu marapula kout tar tagorong mana tar Tamata Noman, ge gitie pe getung uatampopokoho dedempelasioum, inggoum mu turung kalengua tar uleikir bulauamiau. ³⁶Inggoum pakung uangangoul hamas mare getung guata inggoum tar haua ke malaraiig God, inggoum mu banotong kale tar haua ke ualapagahagion. ³⁷nGe no buk pe God o kula pare,

“Ahik pahi reh, kare lamer tamata gere turung kotpokos,

inggon ahik pahe turung tur uangoul bak.

³⁸Doha tamatar kodkodoh e turung tua to tar nitagorong man.

Bo gete tur tapokis me tamat, inggo ahik pahu turung uauaha tatanon.” *Habakuk 2.3*

³⁹Bo inggeig ahik paho tamatang tur tapokis, ahik pahi la i Hel, bo inggeig o tamatang tagorong man ka uaudeilisieig.

O Mahar 11

A tengkana tar nitagorong man

11 ^oA niguatang tagorong mana te pare, inggeig i ate uaia tun tar mamang inetelik ri uangangoulig tar kale, inggeig i turung kale nomana tananin. Gitiemper ahik peeig pahi bang huara tar inetenin, bo i ate tun pukumpe pare, e turung kotpokosonin. ²Ge teres nitagorong mana per tamatang sioununtieh, temaeit ke me uaha God tasisin.

ⁱ10:27 Ais 26.11 ^j10:28 Ual 17.6; 19.15

^k10:29 Mat 12.30-32; 1Ko 11.27-29 ^l10:30 Ual 32.35-36; Ker 135.14

^m10:34 Mat 5.11-12; 6.20 ⁿ10:37 Hab 2.3-4 ^o11:1 2Ko 5.7

^{3p}Inggeig ki tagorong mana puk, temaeit i naman manate tar mamang inetelik i ran, dohi kot a nitouo keip tono uelhire God. Temaeit a haua ra banotong bang huarain ke kotpokoso tur tar inet ahik pah ra banotong bang huarain.

^{4q}Abel ke tagorong mana puk, maeit ke heir tar uahung tang God auia uain ter nang Ken. Tena nitagorong manon, inggono ke heiringua tar niuaha tang God, kare kilangua God tatanon, a tamatar kodkodoh. Abel ke mat bo na nitagorong mana pukuon e ualasira harahampe a haua tunur nitagorong man.

^{5r}Misiana tang Enok, ke tagorong mana puk, maeit ka keip taroin i Heuen, ahik pah ke mata tagu, kare la tabo ualutarain, teeit God ke kale tatanon. Bo tar binaka puk halanono te la kai, inggono ka mene uaiain ke uauaha pe tang God. ⁶Ge gitie pe geta hikir tamata mena nitagorong man, e banoto leue tununguampe tar uauaha tang God. Gete me tamata re marang la tatanon, pake tagorong mana tang God e uangoul, kare uoto heir tar bulauan tasisit ra sir uelhir tun tatanon.

^{7s}Noa ke tagorong mana puk, maeit ke uakeluk uelhir ke uatagin pe God tar inete re turung kotpokos i uoumuha ge ahikiono pah ke banotong bang huar. Inggono ke longoro tang God, kare tuha tar parau geke banotong poul tasisina ro matmatame. O matmatame matmatang ione keip toso bung tus o niuelkarus. Noa ke tagorong man, maeit ke ualasinguaono tasir tamatang tar koto uakap ge ahik pah ka tagorong man, ka guata uasa pe. Ke kotpokosonguaon a tang sioko pono tasisis ka uakodkodoho keipsis tang God tar nitagorong man.

Abraham me Sara

^{8t}Abraham ke tagorong mana puk, maeit ke uakeluk tang God tar binaka ke kila tatanono tar la tar giameher uan geke ualapagahain God tar heir tatanon. Abraham e tel ia re la, bo ter nitagorong mana kompe, maeit ke hiliuiono tena uan, kare la. ^{9u}Doh inggono ke tagorong mana puk, maeit ke uangoul sirono tasir pokoso tar pang uan ke ualapagahain God. Inggono ke uangoul toro pang-pang taluh o nituha keip tar kapokousur meme. Aisak me Jekop ge kura kale tar siokonor ualapagah, kura uangoul ponome toro taluh sira pare. ¹⁰Ge Abraham pe ke bangbangala i uoum, kare uangoul uahingo tar uan uleik gere moko dede tar mamang binakalik geke namana tanikain God tar tuh.

^{11v}Sara a bouh, bo ke tagorong mana puk e turung guata God tar haua ke ualapagahain, song ke to tun. ^{12w}Gitiempe ke horong mahoho tun pe Abraham, bo tar tang sioko pukur tamatono ka bour turur burehentieher tamat, ka burehentiehe sira tasir pitopitosinaha tar langit, doh ka burehentiehe sira tar iononiko i teh ge ahik me tamata re banotong ah.

^{13x}O tamatasinasine ka mata tun puk, ahik pah ka peng kale baka tar haua ke ualapagahaig God tasisin, ka bangala i uoum tananin, doh ka tagorong mana teil e turung kotpokosonin, kara uaha uangoul tananin. Gisin ahik pah ka matala tar hire tauet o pokoso pe, karo tamatang uangoul uakaloto baka pukane tar kot. ¹⁴O tamata gera kula tar puhuninanine ra uakalahara pare, ra sirsir me pang uan ra banotong kulainisin a nas. ¹⁵Ge paka menmene uatuha

^p11:3 Uak 1.1; Ker 33.6; Jon 1.3 ^q11:4 Uak 4.3-10 ^r11:5 Uak 5.21-24

^s11:7 Uak 6.13-7.1 ^t11:8 Uak 12.1-5 ^u11:9 Uak 35.12

^v11:11 Uak 18.11-14; 21.2; Roum 4.19 ^w11:12 Uak 15.5; 22.17

^x11:13 Uak 23.4; 1OUTT 29.15; Ker 39.12; 1Pi 2.11

tosina tar pang uan ka la turin, paka banotong tupara me lelung uelhir tapokis. ¹⁶Bo gisina puk ka sirsir tar pang uan uaiantieh, a uan i Heuen. Temaeit God e ualasira pare, ahik pahe matala ra kila pesina tatanon, nas God. Teeit ke kaleuatoro manasa pe tenas uan uleikisin.

¹⁷yAbraham ke tagorong mana puk maeit, ke tangan tar heir tang Aisak ger tunono pare, a uahung tar binaka ke uedanga God tatanon, doh Abraham te geke kale tar ualapagah, kare heir tar tang siokon siounur tun. ¹⁸God ke kula tatanono pare, “Tang Aisak tera turung bour tur ro bungumua geku ualapa-gahasio.” ¹⁹zAbraham ke namana tang God e banotong uatua tapokis tur tang Aisak toro mat, doh tar nibang, Abraham ke kale tapokis nomanampe tang Aisak ngohina tar tamatetie ka uatua tapokis turin toro mat.

Aisak mes Jekop doh Josep

²⁰aAisak ke tagorong mana puk, maeit ke mene hape re turung guata uaia pe God tas Jekop me Iso, gitila i uoum.

²¹bJekop ke tagorong mana puk, maeit tar binaka ke uahuhutung mata peon, inggono ke mene tanik tar niguata uaia re turung kotpokoso tar toking tuna Josep, inggon e honoin toro tukana re lotu pe.

²²cJosep ke tagorong mana puk, maeit tar binaka ke uahuhutung mat, inggono ke hire tanik tasir Israel tar binaka ra turung hiliu i Isip. Kare ualatoho tasisin, hape ra turung guata pe tar hironon.

Moses

²³dA toking tinana Moses kura tagorong mana puk, maeit kura

touaouo tang Moses tar touonor bialok i muduhia ka poho pein. Rasina kura banga tara tus a siokor keketik tun pe, kara hik pah kura sokor, kaura de matura uakeluk tena ualatohor toiang Isip.

²⁴Moses ke tagorong mana puk, maeit tar binaka ke mahoho kaion, inggono ke ueluelde mata bang paroko sirain pare, a tunar kuaha toia. ²⁵Inggono ke malara pare, tar huata keip tar niduh toso tamata God, auia uain tar niguata uasa gera uahauhain tar sisikinalik pukur binak. ²⁶Inggono ke namana pare, tar kale tar nimatal e laig tang Kristo ter uia uain tar kale tar inete uaiang Isip. Teeit inggono ke bangala tar bulauana re turung kalein i uoumuha. ²⁷Moses ke tagorong mana puk, maeit ahik pah ke sokoro tar toia gete nimalian ke hiliu peon i Isip. Inggono ke kalekinalentiehe dede kompela tang God ger mahang bang luar. ²⁸eMoses ke tagorong mana puk maeit, ke uakekene keip toro niein uleik, ra kilain, “Leke liu ro Mat,” kare ualatoho ra sabaig me deuatinginar sipsip i rana tar pipiririk mara hikir angelou ger tang tung pous tasir keketik bulout gesir uoum pahe tung pous toso bung tusur Israel gesir bulout.

O Israel

²⁹fO Israel ka tagorong mana puk, maeit ka banotong sair kout tar laur ra kilain a “Retisi” misiana paha papadakanansioun, bo tar binaka ka lang uakelukular Isip tasisina ka la houp matengua.

³⁰gO Israel ka tagorong mana puk, maeit ke tatadur uahiuar padorong

y11:17 Uak 21.12; 22.1-14 z11:19 Roum 4.17

a11:20 Uak 27.27-29,39-40 b11:21 Uak 47.31-48.20

c11:22 Uak 50.24-25; KT 13.19 d11:23 KT 1.22; 2.2 e11:28 KT 12.21-30

f11:29 KT 14.21-31 g11:30 Jos 6.12-21

Jeriko i muduhia ka uiloho per Israel tar mouitir marein.

³¹^hRahab, ger uraur a peng Jeriko, ke tagorong mana puk, maeit ahik pah ka tung pous keipin tasisit ka mahang longoro tang God, teeit ke uaha uangoul peono tasir Israel geke lang bangbanga uanom.

O gisiamer tamata ka tagorong man

³²ⁱInggo paku bolo harahampela, bo teeit ahik manasa peo menag binak. Ge inggo pe halan tu uahire tamiu-oum tasir gisiamer poluk, pare tas Gidion mes Barak, doh Samson, doh Jepta, doh Debit, doh Samuel, doho propet. ³³^jO tamatasinasine ka tagorong mana tang God, kara touahia toro nitoia ka uiliatung keip pe. O gisiamer ka guata tar puhur kodkodoh, kara kalengua tar haua ke ualapagahain God tasisin. O gisiamer ka tagorong mana puk, maeit ka uoho uelngungut tar uauasir laion, ³⁴^kkaro gisiamer ka lomoho tar hue uleikintiehe tun, karo gisiamer ka lukup tur tasir tamata geke marang tung pous keip tasisina tar baenat barah. Gisin o maluan, bo God puk ke uatampopokoho tasisin. Gisina ka tampopokoho tar uiliatung, kara geil uaroke tasir tamatang uiliatungun toro gime uan. ³⁵^lO kuaha ka tagorong man, maeit ka kale tapokis toso tahisilik geke mat, o niuatua tapokis pe.

Bosir gisiamer tamat ka uelpusis, kara de mata luaka liuis, teeit ra tagorong mana pe tang God mara tua tapokis keip tar niuangoulur uia uain. ³⁶^mO gisiamer ka uuaneteis, kara halhaluh uaelmahingis, kara uih tane

keipis tar tiein, kara belelais tar karabus. ³⁷ⁿO gisiamer o nibakbak pous keip tar palau, karo gisiamer o nitokout kout puhung torik, o gisiamer o nitung pous keip toro baenat. Doho gisiamer ka la teil keip pukumpe tar kapokousur sip-sip, doha kapokousur meme a hangang gomon, ka gog, kara uaelmahingis, kara guata uasais. ³⁸^o tamatasin o tamata uaiantiehe liu tasir tamatang gane i kot. Gisina ka uiloho ueltebeir tar butur padenen, doho siusan, kara uangoul hahai tar lebanga mer tung i lolono tar kot.

³⁹^o tamatasinasine ke heiris God tar ueltada uleik tun tar mamang inetelikinine ka pehuara keipig ka tagorong mana pe! Bo ahik dedempe pah ka kale tar haua ka ualapagahaig, ⁴⁰ teeit God ke namana tanik tar inete uaiantiehe tagigeig. A tengkana tena ninamanon, maeit inggeig tokaha keip tasisin ra turung siokor guata uaiasieig.

O Mahar 12

Hape ke guata pe God tena ualatut, e ualasira uakalahara tena nimalaelhir

12^o Temaeit tar puhon gitie ka tur uiloho pe mer manai tamata geke ualasira tar nitagorong man ka tur keipin, inggeig pono paki baka liu tar mamang inetelik re ualala hamas tagigeig, kare uapuae kout ter niguata uasa tunumpenin gere uapuae kout dede tagigeig tar ualo ualahurula tar butur paki ualo uatampopokoho uelhirlaineit i uoum. ² Ti banga uanono tang Iesu gere tengkana tur regi nitagorong maneig, teono tere banotong uatuatuka

^h11:31 Jos 2.1-21; 6.21-25; Jas 2.25 ⁱ11:32 Ked 4.6-5.31; 6.11-8.32; 11.1-12.7; 13.2-16.31; 1Sa 16.1-1To 2.11; 1Sa 1.1-25.1 ^j11:33 Dan 6.1-27

^k11:34 Dan 3.23-27 ^l11:35 1To 17.17-24; 2To 4.25-37 ^m11:36 1To 22.26-27; Jer 20.2; 37.15; 38.6 ⁿ11:37 2OUTT 24.21 ^o12:1 1Ko 9.24-25

hihir tar nitagorong man e tuka tar uadouhin. Inggono ke uahuein tar mata pare, tar korose, ke uahuein tar kale tar nimatal. Teeit tar niuaha ke ate teilion e turung kale i muduhia. Doh ke la tabila tar pang mua tono tabtabila God.

³O mana tun, mu namana kompe hape ke uatut pemeono tar nimatal e la tur tasir tamatang guata tar niguata uasa geka turtur tane tatanon. Inggono ke kalkale hamas tun tar uelmahing, kare huata bolongur mara hikoum pah mu maluan, karung maluana kout tar tagorong mana tang God.

⁴O mana noman, inggoum kung uiliatung tar kale uahua tar niguata uasa, bo halana puk tung uelkoi uatuka tar binaka rung mat. ⁵P^Ue kung malabobour uakapangua inggoum tar meneng uatampopokoho giniane ke meneig God tamiuoum ro bung tun? Inggono ke kula pare,

“Ir tug, ualongoro tar binaka re uakokodohor Tamata Nomana totomua,

kara hik paho kale uasa tar binaka re uamarorono totomua.

⁶Ge a Tamata Nomana pe e uakokodoho tas gere malauelhiris,

kare uuelmahing tasisit re malauelhiris o bung tun.” *Nitabila Uaia 3.11-12*

⁷^qGitie ro kale pela ingga tar uelmahinginin, namana uanon, God e guata sira paha tuna tun totomua. Ue kaein me keketik ahik tamana pah ke ualatut? Ahik tun! ⁸Geta hik God pahe uakodkodoho totomua ngohina re guatang sioun pe toso bung tun, e baka siranguaono pare, ingga a tunang mok, kara hik paha tuna tagur tamat. ⁹I ranahia tar puhonene teso bung tamagigeigane i kot, gisina ka uuelmahing tagigeig, doh inggeig

ki ueltada tasisin. Temaeit inggeig paki longoro tununguampe tang Tamagigenah i Heuen ge tamanar iabegigeig mari tua dede.

¹⁰O bung tamagigeig ka heir uelmahing tagigeig tar sisikinalik pukur binak, teeit ka namana pe pare, auiantieher puhono tar guat. Bo God puk ke guata tar puhono torogio uiaeg mari dedeil sireig tatanon. ¹¹rTar binaka ri kale uelmahingeig, inggeig i kale sira tar puhono pare, e uaueldolomo tagigeig, kara hik pahi uah. Bo i muduhia puk a puhon, e uakotpokoso tar niuangoulur kodkodoh, kara hiarouon tasisis ka ualatutumeis tar hagarion.

¹²sTemaeit, mu hue kai tar limamiuinit re maluana kusa puk, doh mu uapagpagolo tar kekemiunitir malmaluan. ¹³tUakodkodoho me lel re ueihilaigir kekemiu, maeit geto peiloum, ahikingua pah ra banotong tula bise liuisioum tar lel. Bo mu uatampopokoho kalehe kompesioum.

Inggeig i uatampopokohosieig, kari tur uanon

¹⁴Mu petutup tar uangoul keip toro hiarouo tasir tamata uakap, karung uatampopokohosioum tar niuangoulur dedeil. Ge gisis pe ahik paho dedeil ahikingua pono pah ra turung banga tar Tamata Noman. ¹⁵Mu uelkauekesioum mara hik me kalamiuoum re oroho tena nimalauelhir God menia tena niueldolomon. Mu tagin geto hua kai mo uana ro douk uelbarang i uantinana tamiuoum o heir me niduh tamiuoum, kare la uasusa tamiuoum tena nibanga God. O bureh e uoto barangais tar uelbarangana roon.

^p12:5 Job 5.17; UGO 3.19 ^q12:7 Ual 8.5 ^r12:11 Jas 3.17-18

^s12:12 Ais 35.3 ^t12:13 NU 4.26

¹⁶^uAhik pah mu uamaluana tar niguatang ur ue mu ueluelde tar ueltada tar ineter dedeilir nang God e kotpokoso tamiuoum misiana tang Iso. Inggono ke uelpalihe keip tar niein tar heir liu tar hauar niuamatoto tatanono tar kale uahiuar uoum pe.

¹⁷^vInggoum mu ate, i muduhia ke guata baka peono pare, doh tar binaka ke malara inggon e mene tanik tamana hape re turung guata pe God tatanon, inggono ka utin, a mahang pe manas, gitiempe ke dangata tutup keip tun peono tar bulbulunar matan, ahik tununguampe inggono pah ke banotong tupa para me hagar tar uiuir tena ninamana taman.

**A timuhur uelhote,
doha uelhoter pensioun**

¹⁸^wInggoum halan te tugarasioum me inet, marung hagouo sira tasir Israel ka hagouo pe. Namana huar, gisina ka me uangoul uahuhut tar siusan i Sainai, kara banga toro luhluhuna ro tukuno hue, kara puhung kitup, kara tukung pang rom. ¹⁹^xKara longoro toro ururunguna ro tuil doha menmen e aling sira tar uauanar tamat. Tar binaka ka longorosin tar alialingonene, kara kula uapopokoho tununguampe ra de mata longoro baka poluk me puhung giameher puhung men. ²⁰^yTeeit gisin ahik pah ka banotong uatut tar ualatohe, “Gitiempe gete me inete puk ponompesitieir tua re haiala tar siusan i Sainai ra bakbak pousin.” ²¹^zA hua ka banga toinir tamat i Sainai a ualaskorontiehe tun, temaeit ke la kulangua Moses pare, “Inggo u poro keipintiehe tun tar nisokor.”

²²⁻²³Bo inggoum puk kung lame tar siusan i Saion tena uan uleikir God ger tua ter timuhur Jerusalemono gere mok i Heuen tar butur ra uangoulur burehentiehe tunur anggelou, ahik pah ra banotong ahais. Kung lame tar butur ra uangoul uaha toto ro bung tuna God gesir uoum ger nibolo uahiuar hangas i Heuen. Kung lame tang God ger Tang Kedanga tasir tamata uakap, doh kung lame tar butur ra uangoulur tamatasitir kodkodoho geka mat, karo niuakodkodoho hihir tun. ²⁴^aKung lame tang Iesu geke uakotpokoso tar timuhur uelhote, karung lame toro deuatingina Iesu gero nikiras, doh geko mene toro uelhire o uiantiehe uain toro deuatingina Abel.

²⁵^bMu kaukeke uaia tununguampeisoum pare, ahik pah mu mahang longoro tang God geteono pe, teene re menmene tamiuoum. Ge gitie pe ge pakene ahikir tamatang Israel pah ka ualo liu tar binaka ka mahang longoro tang Moses ge nas tamatang uoum keip uelhiresinane i kot, paka binaka uasantiehe tununguamape tagigeig ge paki de tanene re mene turuha i Heuen. ²⁶^cTar binaka ke mene turuha God tar siusan i Sainai, a uauanono ke uaguna tar kot. Bo daana puk ke guatono tar giameher ualapagah pare, “Inggo u turung uaguna baka poluk ahik pah tar koto puk bo i rana pon.” ²⁷A puhonener “Uaguna baka poluk,” e kula sira pare, tar inetenine i kot gera banotong uagunaig ter inetenine ger nitou, ra turung kale liuig mare la mokongua pukur inet ahik pah ra banotong uagunaig.

²⁸Gitie ri kale pe inggeig tar nitoia ge ahik pah ra banotong uagunain, ti la heir

^u12:16 Uak 25.29-34 ^v12:17 Uak 27.30-40

^w12:18 KT 19.16-20; Ual 4.11-12 ^x12:19 KT 20.18-21; Ual 5.22-27

^y12:20 KT 19.12-13 ^z12:21 Ual 9.19 ^a12:24 Uak 4.10; Hib 8.6

^b12:25 Hib 2.1-3; 10.26-29 ^c12:26 Hag 2.6

tar uatakai tang God, kari uauaha keip tatanono tar lotu ger kodkodoh, kara uleikir ueltad, kari uakeis bolongur keip puk tar nisokor. ^{29d}Ge nagi God peeig misiana ro hue uleik gero banotong ualualuh hihir tar mamang inetelik.

O Mahar 13

Mu malauelhir dedeisioum

13 Mu malauelhir dedeisioum ngohina paho matmatatahinalik. ^{2e}Ahik pah mu malabobour tar uaha uangoul tasir pokoso tonomio um, ge tar puh peon o gisiamhe ka me uaha uoum tosnosio pokos, doh gisin o angelou, bo ra tele teil puk o angelou pesin. ³Mu namana toso uanotoumiusit ra uangoul tar uih, namana to ge pake inggoumuono rung uangoul tagu tasisin. Doh toso uanotoumiusit ra kale uelmahing, mu namana to ge pake inggoumuono rung kale uelmahing tagu tasisin.

O le

^{4f}O le paka ueltadantiehe tuninir tamata uakap. Doho bulout le mesir kuahar le, paka uelueladeis, doh paka uangoul uadedeil keip torosio le, ge God pe e turung bang kedanga tasisit ra uangoul uasa keip tosnosio kuahar gisiamhe ue nosio buloutur gisiamhe, doh gisis pon ra ura ueltebeir.

A mani

^{5g}Ahik pah mu me uangoul sir “o uaha mani,” bo mu uaha keip puk manasa tar haua kung kale manasaig. Ge God pe ke kula pare, “Inggo ahik tun pahu turung hiliu ue u uelsakil tamiuoum.” *Ualatut 32.6,8*

⁶Temaeit inggeig i banotong ongolongua tar kula pare, “A Tamata Noman nagi tamatang pouleig, inggeig ahik pahi banotong sokoro me puh ra banotong guatainir tamata tagigeig.” *Ker 118.6*

O mamahoholikin tar lotu

^{7h}Mu namana uanono tosnomio mamahoholikin tar lotu geka mene tono uelhire God tamiuoum, bangbanga hamas tar haua ke kotpokosome tenas niuangoulusin, karung petut sir teres nitagorong manasin.

⁸Iesu Kristo a siokono nerau, daan, doh tar mamang binakalik. ⁹ⁱAhik pah mu uareihisioum tar mamang niualasiraniner giniamhe sioko tena niualasirar Tamata Noman. Auia geta uatampopokoho keipigir kolougigeig tar nimalauelhir doh na niueldolomo God, bo ahik pah tar ueluatatanar ualatutunar niein, ge gisis pe ka uakeluk taninin, ahikir puhunin pah ke poul baka tasisin.

¹⁰Inggeig nogio olta o giamehe sioko tonosio oltar Ju, bo o patere puk gera kalekinale to tenas buturung lotur Ju, ahik pah ra banotong ein to tagu tonogio oltaeig. ^{11j}Nas patere uleikir Ju e keip tar deuatinginar inetesisier tua tar Buturur Dedeilintiehe Tun tar heir tar uahung tar kale liu tar niguata uasa, bor tukunusir inetesisier tua ra ualuh toig i behia tar uan. ^{12k}Temaeit Iesu ke kale to pono tar uelmahing i behia toro pirikinar uan uleik tar uadedeil keip tasir tamata uakapa toro deuatingin. ^{13l}Inggeig i la uelhir to manasala tatanon i behia tar uan, kari la kale uelkout tena nimatalon. ^{14m}Ge gane pe i kot ahikieig menagi uan

^d12:29 Ual 4.24; 9.3 ^e13:2 Uak 18.1-8; 19.1-3; Roum 12.13 ^f13:4 Epe 5.5

^g13:5 Jos 1.5 ^h13:7 1Ko 4.16 ⁱ13:9 Roum 14.17 ^j13:11 NKP 16.27

^k13:12 Jon 19.17 ^l13:13 Hib 12.2 ^m13:14 Hib 11.10,16; 12.22

ri uangoul uamatoto tunin gere turung nagigeig dede, bo i sirsir tar uan uleik gere turung lame.

¹⁵ Temeait i lolono tena nitampopokoho Kristo, inggeig i heir dedempesieig tar uahungung uatakai tang God pare, ter uahungono ri heir keipieig tar uauagig tar binaka ri me hire tauete tatanon a Tamata Noman. ¹⁶ Ahik pah mu malabobour tar guata tar niguata uaia, doh tar ueluelpoule, geter uahung penin re uauaha tun tang God.

¹⁷ Mu longoro tosnomio mamahoholikin tar lotu, karung guata tar haua ra kulainisina gera kaueke pesina tamiuoum, ge gisina pe ra la turung hire sira tang God hape ka kalekinale pe. Getung longoroum tasisin, gisina ra banotong kalekinale keip tar niuah. Geta hikia paho longor, gisina ra turung kalekinale keip tar niduh, kara hinguamper puhono pahe banotong poul totomua.

¹⁸ Mu poul totoguo tenami lotu, inggo u ate teilio a kodkodoho reg ninaman, ge inggo pe u marang guata puk tar kodkodohor inete tar mamang binakalik. ¹⁹ Doh inggo u dangatantiehe tun tamiuoum tar lotu pare, mare heir tapokis ualahurume God totoguo tamiuoum.

²⁰ Inggo u lotu tar Godong Toro Hiarouo, geke kale tapokis tur tang Iesu

nagi Tamata Nomaneig toro mat toro deuatinginar uelhote gere moko dede, doh ge nas uleikir Tamatang Kaueke tasir sipsip, ²¹ tar heir uaburehe tamiuoum tar mamang inetelikir uia rung malaraig tar guata tena kalekinaleon. Doh inggo u lotu pono, maeit tang Iesu Kristo God e kalekinale i lolono tamiuoum tar haua re uauaha tatanon. Doh tang Iesu Kristo a uatakai a nanono tar mamang binakalik mamang binakalik! O Mana tun.

A uadouhinar men

²² Inggo u petutup tamiuoum ro bung uanotoug, mu ualongoro uanono tun tar haua ku menegio, ge inggo pe ku bolo puk tar sikir bolobolonine.

²³ Inggo u marang uahire tamiuoum tang uanotougigeig, Timoti, ka uatauete tur manasain tar karabus, gete la ualahurumeonane, inggo u turung kale tagume tatanono tar me banga tamiuoum.

²⁴ Heir tenag niuaha inggo tosnomio mamahoholikin tar lotu, doh tasir gisiameher tamatang tagorong man. O tamatang tagorong man i Itali ka heirila tenas niuah.

²⁵ A hamhamasar nang God e uangoul tagu tamiuoum uakapa tun.

^m13:15 Ker 50.14,23 ^o13:16 Pil 4.18 ^p13:17 1Te 5.12

^q13:18 Apo 24.16; 2Ko 1.12 ^r13:20 Jer 32.40; Isk 37.26; 1Pi 2.25

Jems

O Bolobolo ke boloin Jems

O bolobolo tang Jems

O bolobolo tang Jems, roon o bolobol i lolono tar timuhur uelhote toro Bae-boul. O tamata ra namana tang Jems ge tahina Iesu teke bolo tana roon. Inggono ke kotpokos a tamatang uoum keip tasir tamatang tagorong man i Jerusalem (Gal 1.19).

Jems e hire teil tosno tamatang timana tar bureher inet:

Inggeig i banotong kale tar niduh teetit ri uakeluk pe tang Iesu. Bo paki uan-guangoul hamas kompe (Jas 5.7-11).

Inggono ke menentiehe tasir tang inete gera guata uasa tasir tiome (Jas 2.1-4, Jas 5.1-7) God e turung kula tasisino pare ka guata uasa. Geta tagorong manar tiome tang God, a puhono ter uia uain toro tang inet (Jas 2.5-7).

O Mahar 1

Jems e heir tar niuah

1 ^sInngo, Jems, a tamatang kalekinale tang God, doh tang Iesu Kristo.

O bolobolo rone o la tasir siokor hangaul, doho torik ro bungusur Ju geka hiliu tenas uan, doh ra uangoul ueltebeir toro giniamhe ro uanane i kot.

A niuaha uaia tun tamiuoum!

A uatolau e uoto uatampopokoho tagigeig

²^tRo bung uanoutoug tar binaka re kotpokosor uatolaua tamiuoum, inggoum pakung uaha tun. ³^uGe tar binaka pe ra uatolauaig remi nitagorong manoum, a uatolauanin e uoto uakot-

pokoso tar hararing tur uapopokoho tar huata tar niduh. ⁴Bo mu uamaluana puk tar puhonene e hua ge tar binaka pe re hua uapopokohor puhonene remi nitampopokohoum tar haiala i lolono tar binaka re parakukuhur niuangoul ahik pahe punga uahiu, bo e kalekinale dedempe marung kotpokosoum pare, o mahoh, karo kodkodoho uakapa tun. Kara hik pah mu katupa me inet.

⁵^vDoh gete me tang sioko tamiuoum e katupa tar ninamana uaia, inggono pake lotu, kare dangata tang God gere turung heir tatanono ger uoto heir uaia tasir tamat, kara hik pahe uoto heiring ni-malian. ⁶Bor tamata gere lotu keip tar nitagorong man, inggon ahikingua pahe tagorong boho baka poluk. Mair tamata re tagorong boh, inggono misiana toro butuana gero puahpuaha ueltebeirin tar rom. ⁷⁻⁸A tamata sira pare, inggon a torik na ninaman, kare uoto uapalih dede tena ninaman. Inggon ahik pahe namanain, e turung kale tur me inete tar Tamata Noman.

O tang mani, doho tiome

⁹Gete me tang siokor tamat e uoto tagorong man, doh ahik paha tang mani, inggon e banotong uah, ter hauono tar matana God inggon a tohangan. ¹⁰^wBo a tamata puk gere uoto tagorong man, doha tang mani, inggono pake uaha tar binaka re kale uahiu God tatanon. Ter hauon o tamata gera uoto malara tar uamoko toto tenas inete ue a mani, gisin ra turung mata sira tar kalanguhuna ro doudoukulik roke. ¹¹Ge a pisara pe e hara keip tar uelsuk, kare uamate tar doudoukulik, doha kalanguhunar doudoukulik e sab i kot, kare taboig na nimataia. Ter siokono komper hagar re turung kotpokoso tar tang mani. Ing-

^s1:1 Mat 13.55; Apo 15.13; Gal 1.19; 1Pi 1.1 ^t1:2 Roum 5.3-5

^u1:3 1Pi 1.7 ^v1:5 NU 2.3-6 ^w1:10 Ais 40.6-7

gon e turung mata to tar binaka re tuha haraha tena kalekinale.

God e uoto heir tar mamang inetelikir uia

¹² A tamata gere uoto tur uapopokoh, kare huata tar niduh tar mamang uatolualalik, inggon e banotong uah. Ge tar binaka pe re pehuarono tar uatoluanin, inggon e turung kale tar bulauan geke ualapagahain God e turung heirin tasisit ka malauelhir tatanon, inggono ter ni-tuang tar mamang binakalik. ¹³ Gete me tamata ke reihin tar guata me hagar uasa, inggono paka hik pahe kula pare, "A uatolauene e la tur tang God." Ge God pe ahik pahe banot e uatolaua tar tamata tar guata me niguata uasa, doha niguata uasa ahik pahe banotong uatolaua tang God. ¹⁴ Bor tamat e banotong reih pukin tar guata tar niguata uasa tar binaka re uamaluanain re uakeluk to pe tar nimalara uasan tar tukunun, temaene re la guata uasanguaon. ¹⁵ A nimalahir uasaninanine ro uoto mahagia e uoto reihila tar tamata tar guata tar niguata uasa, doha niguata uasa e la uakotpokoso toro mat. ¹⁶ Temaene inggoum ro bung uanotoug ahik pah mu uamaluanasioum pare, ra uelourusioum.

¹⁷ A mamang inetelikininer uia, ri uoto kalegieig, doha ineteng uauahanitier uia tun a mamang inetelikinin e la tur i ran. Ginin e la tur tang God Tamagigeig geke touo tar luhung Heuen. Inggon ahik pahe uoto uapalih tagu tena niguat, e luh dede kompe ahik pahe kitup tagu. ¹⁸ Ter enonor nimalar, inggono ke uakotpokoso keip tagigeig toro uelhire gero man mari uangouleig o uakikilangana tar mamang inetelik ke touogion.

Inggeig i longoro kari uakeluk

¹⁹ Mu namana dede ro bung uanotoug, inggoum uakapa tun mu longoro uateuel, kara hik pah mu tororo tar men, doh tar nimalian. ²⁰ Ge na nimaliana per tamat ahik pahe banotong uakotpokoso tar hagarir kodkodohor nang God. ²¹ Temaene mu kale liouum tar mamang niguata uasalik, doha mamang hagar uasalik. Inggoum mu kale uahiuasioum, karung kale toro uelhire geke lebeiono tar koloumioum, roono gero banotong uelkarus tar iabeimioum.

²² aO uelhire gekung kalesioum, roono terung uakelukusioum, kara hik pah mung longlongoro puk, bo mung uakeluk tang roon, karung guata sir. Bo getung longlongoro pukuoum, kara hik pah mung guata uakeluk sir, inggoum mu bohboho katongosioum. ²³ A tamata gere longoro toro uelhire, doh ahik pahe uakeluk sira ro kulkula teil pe roon, inggono te misianar tamatetie re sisirin toro sisir, dohe banga sir tunin re baka pe, ²⁴ ke sisira uakapaion, kare hiliu, kara hik pahe namana huara baka poluk, hape re baka pe. ²⁵ bBor tamata gere timtimana hamas tun i lolono tena ualatut God ger kodkodoho uakapa tun geke luaka liu tur tagigeig tar nitampopokohonor niguata uasa, kare uakeluk dedengua, kara hik pahe malabobour tar haua ke longoroig, bo e guata sir, God e turung guata uaia tar mamang inetelik re guatagion.

²⁶ cGete kula me tamata pagiare a tang lotu, doh ahik pahe kaueke tena nimen, na lotuon ahik paha to nieinin. Doh inggon e bohboho katongo pukin. ²⁷ A lotur delauan, kara hik me ineter sa i lolon tere malaraiG God tamagigeig misiana pare, tar poul tasir keketikisiner

^x1:18 Jon 1.13 ^y1:20 OUNU 7.9 ^z1:21 Kol 3.8; 1Pi 2.1

^a1:22 Mat 7.26; Roum 2.13 ^b1:25 Roum 8.2; Jas 2.12 ^c1:26 Ker 141.3

tabo tamas, doho kuaha geke mata no-sio bulout tar mamang niduh ra hu-ataigisin, kari kaueke katongosieig gete reihir niguatang tar koto tagigeig.

O Mahar 2

Guata uelmatout tasir tamata uakap

2^dRo bung uanotoug gitie o tamatang tagorong mana peoum tenagi Tamata Nomaneig Iesu Kristo ger uleikir balbalana na nitampopokoh, inggoum ahik pah mung namana pare, o gisiamer tamat o tohangas uain tasir gisiamer.

²Gete me tang siokor tamat a tang mani e uamoko teil tena mindal a i ranar bulauan, doha hikhiku uaia uel-hir, kare la lekala tenami umang lo-tuoum, kare leka ponomer tamatetie ahik paha tang inet, dohe hiku teil tar hikhikunitier taktakih kara uh. ³Doh gete mu guata uaiantiehe pukuoum tanetie re hiku teil tar hikhiku uaia uel-hir, karung kula pare, “Nongo tabtabila uaia ingga rone,” karung kula tanetier tiome, “Tur uoumat,” ue, “Me tabi-lane i koto tar kekeguo.” ⁴Getung gua-toum tar puhonene, misianangua ing-goum pah kung bang kedanga keip tenas hagarir gisiamer teremiuir ninaman. Karung kotpokoso sira pare, o tamatang kedanga keip tar ninamana uasa.

⁵Ro bung uanotoug mu ualongor! God ke uamatoto tasir tiomeane i koto pare, ra turung uangoul uaia tun tar ha-garing tagorong man, kara turung kale tar nitoiaeit ke ualapagahain God tasisit ra malauelhir tatanon. ⁶Bo inggoum puk kung uelsigala tasir tiome. Ge mais pe ka

ueliu tamiuoum, kara reihila tamiuoum tasir tamatang tabila tar uelhire? Tesir tang mani! ⁷Teesina deh gera uoto uelsi-gal dede tar hangana uaia Iesu ger nana tamiuoum.

⁸fInggoum mu guata tar hagarir kod-kodoh getung uakeluk tena puhung ualatur Godene re moko toro Uel-hire Uaia, “Malauelhir tang uanotoum misiana ro malauelhir peia.”† ⁹gBo getung guata uaia pukuoum tar tang siokor tamat misiana ter tamata ua-iantiehe tar tang giameh, inggoum kung guata uasa tena ualatur God, karung kot-pokos o tamatang katego tar ualatur.

¹⁰hGete me tang siokor tamat e uoto uakeluk tar mamang hagar uaia ue a puhung ualatur, bo e katego pukuono tar siokon siounur puhung ualatur, ing-gono ke guata sira manasa tar tamatetie ke katego tar ualatur uakapa tun. ¹¹iGe God pe ke kula pare, “Ahik paho ur.” Kare kula pono pare, “Ahik paho uil-iatung pous tasir tamat.” Geta hikia paho ur, bo ko uiliatung pous puk mo tamat, ingga ko kotpokos a tamatang katego tar ualatur uakapa tun.

¹²jTemaene hingiar binaka rung mene inggoum ue a huaa rung guatain, namana dede pare, inggoum ra tu-rung kedanga tosium tar ualatur geke kotpokoso tur tena nimalauelhir God tagigeig gere luaka liu tagigeig. ¹³kGeta hikoum pah mu ualasira teremi niuel-dolomo tasir gisiamer tamat, God ahik pono pahe ualasira mena niueldolomo tamiuoum tar binaka re kedanga tami-uoum. Bor tamata gere ualasira tena ni-ueldolom, e banotong tur keip tar nion-golo tar binakang kedang.

†2:8 Bolobolong Kalekinaler Pater 19.18

^d2:1 Apo 10.34; Jas 2.9 ^e2:5 1Ko 1.26-28 ^f2:8 Mat 19.19; Gal 5.14

^g2:9 Ual 1.17 ^h2:10 NKP 19.37; Aha 20.7-12,24; Mat 5.19 ⁱ2:11 KT 20.13-14;

Roum 13.9 ^j2:12 Gal 6.2; Jas 1.25; 1Pi 2.16 ^k2:13 Mat 5.7; 18.32-35

A nitagorong man, kara niguat

¹⁴Ro bung uanotoug, hape re uia to pelaono gete kula me tamata pare, na nitagorong man, bo ahik puk na niguata pahe la keip? Na nitagorong manonene e banotong uelkarus tatanon? Ahik! ¹⁵Igete me uanotoumua e malara me hikhiku dohe katupa tar niein, ¹⁶bo ahik pukua pah ko heir tar haua re malaragiono tena niuangoul, hape re uia to pela nang puhung kula tatanono pare, “Auia, uangoul uaia, karo ein uaia.” ¹⁷Ter siokono kompe a nitagorong mana puk me pahen, doh ahik me niguata uaia re la keip, a nitagorong manon a mat.

¹⁸^mMe tamat e banotong kula pare, “O gisiameher tamata res nitagorong man, doho gisiameh o tang kalekinale.” Bo inggo u guata keip tenag niguata tar ualasira teregir nitagorong man.

¹⁹Ingga o tagorong mana pare, a tang sioko pukur God? Auia tun! O liouana uasa ra tagorong mana pon, kara sokorontiehe tun. ²⁰Ingga a tuktukar! O malara ra ualasiraia tar nitagorong mana ger mat ge ahik mena kalekinale uaia, kara tabo tengkana? Auia ualongor.

²¹ⁿSioun tubugigeig Abraham ke uamoko tar tun, Aisak toro olta, kare heir tatanono e lain a uahung. Temaene tar binakono God ke banga tena niguaton, kare kila tatanon a tamata kodkodoh. ²²^oBang! Na nitagorong mana Abraham, doh na niguata kura kalekinale tokah, doh na niguata uaiaononine ke uelmatout keip tun tena nitagorong manon. ²³^pTemaene ke kotpokoso sir tunur puh ko kulain no uelhire God pare, “Abraham ke tagorong mana tang God, temaene ke kila God tatanono pare, a tamata

kodkodoh, kara kila ponoin pare, a kaluana God.”

²⁴Temaait, inggoum kung ate manas, tar tagorong mana puk, God ahik pahe uoto kila to tar tamata pare, a kodkodoh. Ahik, God e banga to tar niguata uaia ri guatagieig, doh ter tengkanonene maait re kilono tatanono pare, a tamatar kodkodoh.

²⁵^qTe misiana kompe tang Rahab ger uraur, inggono ka kilain a kodkodoh, teene ka banga to pein tena niguat. Ke kilauatoro pe tar tang torikir peng Israel gekura me banga uanom, kare poul tasrasina tar ualo tapokisila tar giamehe siokor lel.

²⁶A siokono tar tukunun, inggon a mat geta hik uadeil me iaben. Doha nitagorong man a mat, geta hik pahe la keip me niguata uaia.

O Mahar 3

Inggeig i kauেকে tar mene ri meneig

3 Ro bung uanotoug, ahik pah mu siokor kotpokoso pare, o tamatang ualafir i lolono tar lotu, ge inggeig peene ri ualafir, e turung bangeahantiehe tunis God tar binaka re bang kedanga tasir tamat.

²A bureher binak, inggeig i uoto punga tar guata tar niguata uaia, kari guata uasa. A inetininanine e uoto kotpokoso tagigeig uakap, bo gete kaein me tamat a kodkodoho uakapa na men, inggon a tamata uaia tun, dohe banot e kauেকে tar tukununa uakap. ³Ualongor! Geti uamokeig mo mahar haene tar uauanar hos, inggeig i banotong reih kari uakauuir tar tukununa uakapono tar butur ri malaraiieg e laon. ⁴Namana tar parau a uleikintiehe tun, doha ualihinon a kikitilikintiehe tun, bo e banotong

uakauuir pukuono tar parau tar butur re malarainir tamatang uakapis e laon, gitiempe geta uleikir rom.

⁵Ter siokono kompe a uauan, a kikitilik tun tar tukununar tamat, bo a uleik tun pukumper hagar uasa re uoto guataig. Namana tar tatanguono ger kadkadak, e banotong luh uakapa kompe geto tentur tur mo tukun o hue me sikir kapopoton. ⁶Doha uauana te misiana toro hue. Inggono misiana tar pang uan ger uoun tar niguata uasa. I lolono tar giniamehenar mahar tukun, inggon e mamantouo tar udeilinear tamat, e la kotpokos a tamata uasa, kare uakotpokoso tar bureher niguata uasa tenagi niuangouleig misiana toro hue rotie ro ualuh uakapa tar mamang inetelik. O hue roono tero hueng Hel.

⁷O tamata ra banotong uelpurapur, kara kaueke tasir kahakahar inete ra uangoulane i kot. O inete sira pare, o tetiau, o soi doho mamang inetelik ra uangoul i laur. ⁸Bo ahik puk me tang siokor tamata re banotong kaueke tar uauan. Inggon a inete uasa, kara mahang uamahanam, kara uoun tar bilih uasa. ⁹Inggeig i uatakai keip tar uauagig tang God a Tamagigeig, dohi mamantouo keip pono tar uauagig tasir tamata gesir nitouo sira tang God.

¹⁰Ter siokon siounumper uauanonene re uoto tauete turuhar mene uaia doha soul. Ro bung uanatoug, a niguata deheninanine paka hik tun pahe kotpokos! ¹¹A kodomo mer teh ahik pahe banotong reih tauete turig me siokon siounur tung. ¹²Doh ahik me tamata re banotong lous tur me uauana ro maranga toro kuen ue me uauana ro kaloko toro marang. Ter siokono sira kompe, a nor ahik pahe banotong uana kai tar kodom.

A ninamana uaia e la tur tang God

¹³Gete kaein me tang sioko tamiuoum na ninamana uaia, kara naman manate, inggono pake ualasira to tena niuangoul uaia, doh na niguata uaia menia tar niguatar hamhamas gere la tur tar ninamana uaia. ¹⁴Bo getung uoto gehe uasa tunuoum tasir gisiameh, doh gete tar mamang binakalik mu uoto siroum me lel ue me hararing uairana katongosioum, ahik pah mu uasala teremi ninamana uaia ge a boho penin. ¹⁵Ge a niguatang gehe penin, kara niguatang kapipis, ahik pahe la turuha i Heuen, bo a nanar uanene i kot. Doh inggon e la tur tar nimalahir uasa re tentur tur pe tasir tamat, dohe la tur tasir liouana uasa. ¹⁶Ge a mamang buturulik pe gere mokor niguatang geh doha niguatang kapipis, a buturunin ra tupara toinir nitabila uasa, kara mamang niguata uasalik.

¹⁷Bor ninamana uaia gere la tur i Heuen te pare, uakikilangan a ninamanar delauan, kara tang uelhiarou, a hamhamas, e uoto longoro tenas ualatohor gisiameher tamat, a uoun tar niueldolom, kare uoto uakotpokoso tar kukuananar uia. Kare uoto guata uaelmatout tar siokonor hagar tasir tamata uakap, doh ahik pahe guata kokopo tar inet. ¹⁸tA tamatang uelhiarou e uoto lebe tar uatuna ro hiarou, kare uakotpokoso tar nitabila uaiar nang God.

O Mahar 4

O tamatang tagorong man ra longoro tang God

4 ^{uA}hauar tengkanar uelperinine tamiuoum? Doh ia re la turunin? Ginin e la tur tar nimalarang kapipis i lolono tar tukunun gere uoto uil-

^{†3:6} Mat 12.36-37; 15.11,18-19 ^{§3:8} Roum 3.13 ^{†3:18} Mat 5.9; Hib 12.11

^{u4:1} Roum 7.23

iatung dede i uantinanina tamiuoum. ²Inggoum mu malara tar inet, bo ahik puk pah mu kale tananin, karung gehe tar inet, bo ahik puk pah mu banotong kale tar haua rung malaraign, temaene mu uiliatung pousesioum. A tengkana maene ahikioum pah mu kale, teene ahik pe pah mu dangata tang God. ³Doh gete kung dangata manasoum, ahik pah mu banotong kale, ter hauon, remi nimanoum ahik paha kodkodoh. Mu malara kompe tar haua re heir tar niuaha tar tukunumi.

⁴Inggoum kung hiliu tang God misiana tar kuahetie ke hiliu tena bulout, kare ura keip tasir gisiamer bulout. Ualongor! Ue ahikioum pah mu ate pare, gete me tamata re malara tar mamang inetelikin tar kot, inggono na uelmatan God? Mair tamata re ueldokout tasir tamata gera uoto guata tar niguata uasang gane tar kot, inggon e guata katongoin pare, na uelmatan God. ⁵No uelhire God o kula pare, “A Iabena Dedeil geke uamokoin God tagigeig, e gehe tun tagigeig tar uangoul kompe tatanon.” Inggoum mu naman o tabo tengkana roon? ⁶wBo God puk e heir uaburehe tagigeig tar nitampopokoho tar tur tane tar nimalarar sa. Misiana ro kula pe no uelhire God pare,

“God e uoto tur tane tasir tamata gera uairana katongois.

Bo e uoto ueldolomo pukuon, kare guata uaia tasir tamata gera kale uahi-uais.” *Nitabila Uaia 3.34*

⁷xTemaene inggoum pakung heir katongosioum tang God, karung uangoul i kukulebanga tatanon. Inggoum pakung tur tane tang Satan mare ualo liuono tamiuoum. ⁸yLa uahuhutula tang God mare la uahuhutumeono tamiuoum.

Inggoumeitir uoto guata tar niguata uasa, uadelauana tar tukunumi! Inggoumeitir torik remi ninaman, uadelauana tar ninamana uasanit re moko tar balamiu. ⁹Inggoum pakung ueldolom, karung kiring. Ahik pah mu uaha baka poluk, bo mu kiring kompe tar niguata uasanit kung guataig, ¹⁰zkarung kale uahiuasioum tar matanar Tamata Noman. Gerung guatoum pare, a Tamata Noman e turung kale kai tamiuoum.

Inggeig ahik pahi mene uasa tar tang giameh

¹¹Ro bung uanotoug, inggoum ahik pah mu mene uasa tasir gisiamer tamatar nang God. Getung mene uasaoum tasir gisiamer tamat ue mu tohotola tar puhung uelhire tasisin, inggoum kung uelhire uasa tena puhung ualatut God, doh kung uelsigala tananin. Doh gete kung uelsigaloum tena puhung ualatut God, inggoum ahik pah mu uangoul sira baka poluk pare, o tamata ra uangoul teil i kukulebanga tena puhung ualatut God. Ahik, inggoum misiana pah kung kotpokoso sira pare, o tamatang kedanga tar ualatut. ¹²aGod me pahene ke uakotpokoso tar ualatut, doh inggono me pahener tamatang kedang. Inggono kompe re banotong uelkarus tasir tamat, doh tar mamantouo tasisin. Doh ingga te mai maro kedanga tasir gisiamer tamat?

Inggeig i tele tar niuangouleit i uoum.

¹³bAuia, mu ualongoro totoguo, inggoumeit rung kula pare, “Daan ue roliuou inggeig i la tar siokor uan, tar buturuon i la uangouleig mo sioko ro kris-mas, kari uualo menagi kalekinale, kari uakotpokoso me bureher mani.”

¹⁴cInggoum mu uoto kula tar puhuninanine, bo inggoum puk mu tel, a inete haua re turung kotpokoso roliuo. Nami niuangouloum misiana toro diku gero kotpokos, karo moko sikoro baka puk, karo rouo uakapangua. ¹⁵A uiantiehe ge pakung kuloum pare, “Gete malara God, auia inggo u uangoul, karu turung guata tar inete ku namanain pare u guat.” ¹⁶Bo inggoum puk mu uoto meneng uasalasium, karung uelhire tauete tar uleikir kalekinale rung marang guatain. A meneng uasalaninanine a hagar uasa.

¹⁷dNamana uanon gete ko ate manasa ingga me siokor hagar uaia ro banotong guatain, bo ahik puk pah ko guat, ingga ko guata manasa tar niguata uasa.

O Mahar 5

O uelhireng uatagin tasir tang mani

5 Auia, inggoumur tang mani mu ualongoro totoguo. Mu kiring, karung kula ualeik uasa tun tar uleikir niduh re marang kotpokoso tamiuoum. ²eNami inetoum ke mout manas, doh nami gomonom ka einigir kurkur. ³Nami gouloum, doha silva ke mout manas, doha moutinanin tere turung uahire teremi hagar uasaoum, dohe turung ein tar tukunumioum misiana toro hue. Inggoum kung uamoko toto tanik tenami inete tar uadouhinar marein.

⁴fBang! O tamatang kalekinale geke kalekinale tonomio ioumoum, doh ahikioum pah kung bulbulaua tasisin, ka kiring tang God mare pehahauono tenami hagar uasaoum. Nas nikiringisinasiner tamatang kalekinale ke la kotpokoso manasa tar talinganar Tamata Noman ger Tampopokohontieh. ⁵gNami

niuangouloumane i koto ke uoun tar bureher inet, doha niuahang tar kot. Inggoum kung uauleik tanikasioum tar Mareining Kedang, te ngohina kompe geta kaueke uauleikir tamata tasir hueit gera la toro niein uleik. ⁶Inggoum kung kedanga tasir tamatar kodkodoho pare, o sa, karung uiliatung pous tasisin. Doh gisin ahik pah ka tur tane tamiuoum.

Inggeig i uangoungoul hamas, kari huata bolongur tar niduh

⁷hRo bung uanatoug, mu uangoungoul hamas e tuka gete lamer Tamata Noman. Inggoum mu ate, tanener iom e uoto uangoungoul hamas tonoma har koto tar uakukuanana tar niein. Inggoum e uangoungoul hamas tena binakar huan, doh na binakar pisar ura kalekinale bak, song re kale tar niein uaia tun. ⁸iInggoum pono mu uangoungoul hamas, karung uatampopokohosium tar huata tar niduh re moko tatamiu, ge na marein per Tamata Noman ke uahuhut manasain.

⁹Ro bung uanatoug, ahik pah mu ueluelngure katongosium mara hik God pahe kedanga tamiuoum. A Tamatang Kedanga ke uahuhut manasain, ke uahuhutung kotpokoso manas.

¹⁰Ro bung uanotoug, mu namana uanono tasir propet geke uelhire tauete tar hanganar Tamata Noman. O uelmatan ka guata uasa tasisin, bo gisina puk ka uangoungoul hamas keip sikoro kompe tar niduhunin menia tar uelmahing. Mu guata sira tenas hagarisin, karung uakeluk. ¹¹jNamana uanon, inggeig i kula pare, “Mais ra uangoungoul hamas keip tar niduh, gisin tera banotong uah.” Inggoum

^c4:14 Ker 39.5,11; NU 27.1 ^d4:17 Luk 12.47 ^e5:2 Mat 6.19

^f5:4 Ual 24.14-15 ^g5:5 Luk 16.25 ^h5:7 Ual 11.14; Jer 5.24

ⁱ5:8 Roum 13.11-12; 1Pi 4.7 ^j5:11 KT 34.6; Job 1.21-22; 2.10; Ker 103.8

kung longoro ke uangoungoul hamas pe Job, karung ate hape ke poul per Tamata Nomana tatanon i muduhia. Ge a Tamata Nomana pe a uoun tar niueldolom, kara niguata uaia.

¹²kRo bung uanatoug, a uakikilangannar inete pakung namana uanonoium te pare, ahik pah mu uamana i ran. Inggoum ahik pah mu uamana tola i Heuen ue gane i kot ue mu uamana tola me giameher inet. Kula kompe, aa ue ahik mara hikoum pah mu haijala tena nikedanga God.

Lotu keip tar nitagorong man

¹³Gete kaein me tang sioko tamiuoum e huata teil me niduh, inggono pake lotu tang God. Doh gete kaein me tang sioko re uah, inggono pake ker tar kerekereng uatakai tar hangana God.

¹⁴Gete kaein me tang sioko tamiuoum re momouh, inggono pake kila tasir mamahoholikin tar lotu ra lotu keip tatanon, kara koboto tar uaiuai tatanono tar hanganar Tamata Noman. ¹⁵mA lotu ger nikotouo keip tar nitagorong man

e turung uauia tar momouh. A Tamata Noman e turung uauia tatanon, doha niguata uasa geke guatagion ra turung kale liuig.

¹⁶Temaene inggoumur tang siok, tang siok mu uelhire tauete teremi niguata uasa toso uanotomiu, karung ueluelotue, marung uiaoum. Na lotu tamatar kodkodoh a popokoh, dohe banoto tun e uakotpokoso tar haur inete ra dangatain. ¹⁷nElaija a tamata sira puk pono tagigeig. Inggono ke lotu uapopokoh mara hik me huan, doh ahik nomananguampe me huana ke dur tar koto toro touono ro krismas, doha tonomor bialok. ¹⁸oSong ke lotu polukuon, kare durar huan, song ke bukir tapokisir uan.

¹⁹pRo bung uanotoug gete hiliu tur me tang sioko tamiuoum tar leler kodkodoh, dohe keip tapokisime me kalamiuoum tatanon, ²⁰namana uanon, mai re keip tapokis tur me tamata uasa tar lele uasa ke uaudeil tar iabener tamata uasaono toro mat, doh ke guata maene a burehenar niguata uasar nanon ra turung kale liuig.

^k5:12 Mat 5.34-37 ^l5:14 Mak 6.13 ^m5:15 Mat 17.18-20

ⁿ5:17 1To 17.1; 18.1 ^o5:18 1To 18.42-45 ^p5:19 Gal 6.1

^q5:20 NU 10.12; 1Pi 4.8

1 Pita

*O uakikilangana
ro bolobolo ke boloin Pita*

O uakikilangana ro bolobolo tang Pita

O uakikilangana ro buk Pita o bolobol i lolono toro Baeboul tar timuhur uel-hote. A tamata ke bolo tana roon, inggono te Pita. Pita na aposoul Iesu. Pita teke tamatang uoum keip tasir uakikilangana tamatang tagorong man i Jerusalem.

Pita ke bolo toro bolobolo tasir tamatang tagorong man geke kale uelmahing tar niduh uleik. Pita ke mene uatampopokoho tasisina mara uangoul uadedeil dedeis. Res niduhusin e turung kappampe ahik pahi reh. Bo no uelhire God ahik paho kapa tagu. Gisina ra turung uangoul tagu dede tang God i Heven. Doh i Heven, gisin ahik baka poluk pah ra turung kale uelmahing.

God ke umatoto tasisina pare, no tamat (1Pi 2.10) Maeit gisin o tamata gimehesioko tun tatanon. Gisin ahik paho tamatang gane tagu i kot (1Pi 2.11). Gisin o peng heven.

Ge Iesu pe ke kale uelmahing tur pono tar bureher inet. Bo inggono puk ahik pah ke mene hahaua ka menmene uasa pein. Ahik pah ke menmene uabureh, inggono ke tagorong mana tang God.

Doh tar binaka ke maton, inggono ke kale uelmahing tar niuabatong teregi niguata uasaieg. Doh te pare teke guata peono tagigeig ke kilo pokoso pe tagigeig no tamata God (1Pi 2.21-25).

I lolono toro bolobolo rone:

A meneng uakalahar 1.1-2

A uanamanahuar tena niuelkarus God 1.3-12

Na nikila God tagigieig mari kotpokos o tamata dedeil 1.13-2.10

Nas kalekinaler tamatang tagorong mana tar binakang huata tar niduh 2.11-4.19

Hape re kale uahiua peisir tamatang tagorong man, kara kalekinale 5.1-11

A uaduadouhinar menemen 5.12-14

O Mahar 1

Pita e heir tar niuaha tasir tamat

1 Inggo Pita na aposoul Iesu Kristo, God ke umatoto totoguo tar kalekinale toсно tamaton geke kedangais gera uangoul ueltebeir toro pang uanineine: i Pontus, i Galesia, i Kapadosia, i Esia kari Bitinia. ²rGod ge tamagigeig ke kedanga tamiuoum sioun terener nimalar, inggoum kung dedeil tur tena kalekinaler Iabena Dedeil, kung uakeluk pe tang Iesu Kristo, kara uahuhioum tar deuatinginon. Inggo u lotu tang God mare heir tar hamhamas, karo hiarou o uoun tatading tun tamiuoum.

Ti uatakai keip tang God tar nitagorong maneit rung uangoul keipisoum ger tua

³Uatakai tang God ge tamana Iesu Kristo ge nagi Tamata Nomaneig! Tar uleikir niueldolomor nanon, inggono ke heir tagigeig tar timuhur nitua, kara timuhur nitagorong maneit rung uangoul keipisoum ger tua, ke tua tapokis pe Iesu Kristo toro mat. ⁴sTemaieit, inggeig i uanguangoulungua tar inete uaiaonene ra turung heirin tagigeig, ge ahik pahe matotong beng ue e sa tagu ue e la kapa kout. God ke uamoko uangoul taninin i Heuen tamiuoum. ⁵Inggoum ke gomo tane tun God teremi nitagorong manoum tar nitampopokoh e tuka tar uadouhinar binaka gete tur uakalaharar

¹1:2 Roum 8.29; 2Te 2.13 ^s1:4 Kol 1.12 ^t1:5 Jon 10.28; 17.11

tang uaudeil tagigeig. ⁶uTar inetenina-nine, inggoum mu uaha tun, bo gine puk daan, inggoum mu uangoul keip tar niduh, karung hagouo uasa tar mamang hagarilik tar sisikinalikir binak.

⁷vGinin ke pokos, maeit remi nitagorong manoum a mana tun, a i ranantiehe uain tar goul gere moko puk tar sikina geta uedanga toig toro hue ge para goul noman. Bo remi nitagorong manoum a i ranantiehe uain tar goul, ra uedanga ponoig mare moko uanon. Song rung turung kaleoum tar uatakai, kara uiniator, kara niueltada tar binaka re tur uakalahara Iesu Kristo.

⁸wO man, inggoum ahik pah kung banga tatanon, karung malauehirimpe tatanon. Gitiempe ahik peoum pah mu matotong banga tatanonene daan, bo inggoum kung tagorong mana dedempe. Temaeit inggoum kung uahauhantiehe tun, a uleikintiehe remi niuah. ⁹Teeit inggoum mu turung kale tar haua kung uamoko tunin teremi nitagorong mana mare uaudeil dede God tamiuoum.

¹⁰xSioun o propet ka me menmene uoum teil tar puhonene ka uaudeil peisoum, kare tar hamhamas, kara niueldolomo gere turung lame tamiuoum. Gisina ka sirsir, kara heheke uaia tun, ¹¹ymara ueltupara tun tang hingiar binaka re hire uamototo tunur Iabena Dedeil tasisina tar binaka re kale uelmahing Kristo, kare tar uiniatoro uleik gere uakeluk teil.

¹²A Iabena Dedeil ke uakalahara tasir propet, maeit ahikisina pah ra poul katongo pukis, bo ra poul pono tamiuoum tar binaka ra hire tar haua kung longoro me giamehene daan tosno tamatang

ualualatue God, ka hire tauete pe tamiuoum toro Uelhire Uaia ro la tur tar Iabena Dedeil geke la turuha i Heuen. Doho anggelou ra marang ate pono tar inetenin.

Uangoul uadedeil

¹³Temaeit inggoum mu kaleuatoro tanik teremi ninamana tar haua rung pilesig, kaueke uakodkodoho katon-gosioum. Karung uamoko tun teremi nitagorong maneit rung uangoul keipin tar niguata uaia ra turung heirin tamiuoum binaka re tur uakalahara Iesu Kristo. ¹⁴zLongor, karung ueltada tun tang God, doh ahik pah mu uakeluk teremi nimalara uasan tar tukunumi misiana kung uakeluk peme sioun tar binaka halana tung ate tang Iesu. ¹⁵God ger dedeil, inggono teke kila tamiuoum, temaeit guata keip tar haua rung guataig tar dedeilir hagar. ¹⁶aGe a puh pe a nibolo pare, "Uadedeilia ge inggo pe a dedeil."^z

¹⁷bInggoum mu kila tang God pare, Tamamiu, binaka rung lotu tatanon, inggono teke kedanga tasir tamata uakapa tun, e lampein tang hingiar hagar ke guatain, temaeit heir tar mamang binakalik rung uangoul pe tar sisikinalikir binakane i kot tar ueltada tang God. ¹⁸Ge inggoum pe mu ate, God ke bulaua tapokis tur tamiuoum tar niguataniner tabo tengkana gekung kale uahiuaturig toso bubungumi sioun. Inggon ahik pah ke bulaua keip me inetenine re matotong sa misiana tar mani ue me goul, doh silva. ¹⁹cInggono ke bulaua keip tagigeig tar deuatingina Kristo, ginin ter i ranantieh uain. Inggon ter sip-

^z1:16 Bolobolong Kalekinaler Pater 19.2; 20.7

^u1:6 Jas 1.2; 1Pi 5.10 ^v1:7 NU 17.3; Sek 13.9; Mal 3.3; Jas 1.3

^w1:8 Jon 20.29; 2Ko 5.7 ^x1:10 Mat 13.16-17

^y1:11 Ker 22; Ais 53; Luk 24.26-27 ^z1:14 Roum 12.2; Epe 2.3; 4.17-18

^a1:16 Mat 5.48 ^b1:17 Roum 2.11; KTH 2.23 ^c1:19 Apo 20.28; Hib 9.12-14

sip ahik me ineter sa ue me maharana taboig tatanon. ^{20d}Inggono ka uamotoing sioun tar binaka halanar koto te pokos, bo ka uatur uakalahara kompein tar uadouhinar mareninine mare poul tamiuoum.

^{21e}Inggoum kung tagorong mana tang God, teeit tang Iesu ke uatua tapokis tur pe God tatanono toro mat, kare heir tatanono tar uleikir uiniator, temaeit inggoum mu tagorong mana tang God, karung tagorong mana teil tar hua ke me ualapagahagion.

^{22f}Inggoum kung uadelauana katongo manasasioum kung uakeluk pe toro man, temaeit a uelmalaueireitir emiuoum toso uanotoumiu a mana tun. Mu uelmalauehir keip tunusioum i lolono tar koloumiu. ^{23g}Ge inggoum pe kung kale tar timuhur nitua, ahik pah kung kale tur tar inete ger mat, bo inggoum kung kale tur tar timuhur nituaono tang God gere uangoul dede, kare tono uelhireono gero moko dede. ^{24h}A puhung uelhire ka boloin sioun pare,

“O tamata uakapa tun misianar garas, doha nimataia tasisina misianar kalanguh.

O garas o makmakor,
kara kalanguh e sab.

²⁵ⁱBo no uelhire God o moko dede sira kompela.” *Aisaia 40.6-8*

Roono te rone ka hire tauetein tamiuoum.

O Mahar 2

Iesu tero palau gero tua

2⁸Mu uadelauana katongo bakasioum tar inetenine: a mamang niguata uasalikininer sa, o bohoboh, guata kokop tar inet, boho tola tar tang gi-

ameh, ueldud, karo ueluelsigalalik. ²Mu uangoul sira tasir keketikisiner nihing poh ra marang huh totouaha kompe tar huh, te misiana tamiuoum ge pakung marang kale totouaha tar mamang inete uaia gere la tur tar Iabena Dedeil marung turung huang tagal, kara uauedilisioum, ^{3h}misiana ka bolo peinir puhono sioun tono uelhire God pare, “Inggoum song kung ueltupara katongo tun hape re uia per Tamata Noman.”

⁴Mu la uahuhutume tar Tamata Noman, inggono misiana ro palaua gero tua geke kedangain God pare, o uia tun, bosir tamata ka ueluelde tatanon.

⁵ⁱInggoum misiana ponor palaua ger tua geke tuha keipig tena umar Iabena Dedeil. Ter buturuono mu kalekinaleoum pare, o patere dedeil tar guata tar uahung ger nanar Iabena Dedeil gere malauehirin God teeit tang Iesu Kristo.

^{6j}Ge o uelhire pe geke boloin sioun o hire teil pare,

“Inggo ku uatoko toro palaua geku kedangaio,

gero i ranar bulauan, o uatabil tar gon i Saion,

doh mai re tagorong mana tun tatanon ahik pahe matoto ra uamatalain.” *Aisaia 28.16*

⁷Inggoumene rung tagorong man, o palaua roon o i ranantiehe uain tun. Bo tasisine ahik pah ra tagorong man,

“Te misian toro palaua geke baka liuinir tang tuh,

bo roono puk tero i ranantiehe tun.” *Ker 118.22*

⁸Doho giamehe pono ro uelhire ka bolo ponoin pare,

“O palaua ko ueltuka tasir tamat, roon teko guat, maeit ka pungasin.” *Aisaia 8.14*

^d1:20 Epe 1.4; 2Ti 1.9-10 ^e1:21 Jon 14.6; Roum 5.1-2

^f1:22 Jon 13.34; Roum 12.10 ^g2:1 Epe 4.22; Jas 1.21 ^h2:3 Ker 34.8

ⁱ2:5 Epe 2.21-22; KTH 1.6 ^j2:6 Epe 2.20

Gisis ka pung teka tagorong boho toro Uelhire Uaia, teeit God katongompe ke malar.

⁹kBo inggoum tesir tamata ka kedanga manasasioum, inggoum te misiana pah terung pepe teil toro matina tasir pateres gesir toia, a pang uan a dedeil, kare no tamata God, karung mene uakalahara tar niguataniner uiar nanon, ge inggono pe ke kila tauete tur tamiuoum tar kitup, karung lame tar luh ger uiantiehe tun a nanon.

¹⁰“Sioun inggoum, ahik pah no tamata God, inggoum ahik pah kung kale tar niuel-dolomor nang God, bo gine daan, inggoum kung kale tena niueldolomon.” *Hosea 1.6,9; 2.23*

Uangoul sir tasir tamatang kalekinaler nang God

¹¹lRo bung uanotoug, inggo gine ru kula uapopokoho tun tamiuoum, uangoul sira misiana tasir pokos, karo luluaharane i kot, ahik pa mu tanganasasioum tar nimalara ger sa gere la tur teres nimalarar tamat gere uoto uelkoi keip tar iabeimiuoum. ¹²mUangoul keip uaia dede tasir tamata gera tele tang God, maeit geta marang boho tolasina tamiuoum me niguataniner sa, ahik pah ra matoto geta banga tar niguataniner uiar namiuoum, kara uatakai puk manasa tang God tar binaka re me banga tapokis tagigeig.

Uangoul i kukulebang tasir tamata uleik

¹³nHeir katongoia tar Tamata Noman tar mamang hagariliking uoum keip, kara haua gera uatenturig i uantinanina tasir tamat, hingiamper tang uoum

keip geta toiaoneitir i ranantiehe tun na nikauek, ¹⁴ue tang mai geke uamatotoinir toia tar heir me uabang manate tang mais geke guata uasa, kare uauaha tas mais ka guata uaia. ¹⁵oGod e malara tamiuoum tar guata uaia marung uangoul bukbukoum tenas nimener tuktukar ger tabo tengkan. ¹⁶Uangoul keip tar niuaha misiana tar tamata gere uangoul tena nimalara katong, ahik pah mu uahang rana puk, karung me guata kokopo keip tenami niguata ger sa, bo mu uangoul sira kompe no tamatang kalekinaler God.

¹⁷pUalasilr tenami uleikir ueltada tasir mamang tamatalik, malauehkir toso uanotoumiu gera tagorong mana tang Kristo, ueltada tang God, karung ueltada tar toia.

Uakeluk tena niguata Iesu

¹⁸qInggoumur karabus, uangoul i kukulebang, karung ueltada tenami tang kauek, ahik pah tas mais gera guata uaia ue ra hamhamas tamiuoum, bo tas mais ponompe ra guata uasantiehe tun tamiuoum. ¹⁹Ge God pe e turung guata uaia tamiuoum, ahik pe pah kung guata uasa, teeit kung uakeluk pe tena nimalaron, karung huata tar niduhunin, karung kale uelmahing. ²⁰rA hauangua ra turung kaleinisina geta guata uasa, kara halhaluhis, kare mahingis tar puhung barah? Bo getung kale uelmahingoum tar puhung barah tar niguataniner uia, God e turung guata uaia tun tamiuoum.

²¹sTar inetenanine, God ke kila tamiuoum, teeit Kristo ke kale uelmahing tamiuoum mara bangbanga toin na niguata Iesu rung uakeluk sira tun peoum tatanon. ²²t⁴Inggon ahik

^k2:9 Ual 7.6; 14.2; Ais 9.2; Apo 26.18; Epe 5.8 ^l2:11 Gal 5.17,24 ^m2:12 Mat 5.16 ⁿ2:13 Tai 3.1 ^o2:15 1Pi 3.16 ^p2:17 Roum 12.10 ^q2:18 Epe 6.5
^r2:20 1Pi 3.14,17 ^s2:21 Mat 16.24; Jon 13.15 ^t2:22 Ais 53.9

pah ke guata tagu me niguata uasa, doh ahik pah ka longoro taguin mo boho ko tauete tur tar uauan.”

²³uDoh tar binaka ka uelsigala no uelmatanono tatanon, inggon ahik pah ke uelsigala hahaua tagu tasisina tar binaka ke kale uelmahingon, inggon ahik pah ke perere ue e pehahaua tasisin, bo ke uamoko kompe tena nitagorong mana tang God ger kodkodoho tun na nikedang. ²⁴vInggono me pahene ke huata teregi niguata uasaeig tar tuku-nun tar korose, maeit geti mat inggeig teregi niguata uasa, inggeig i uangoul uakokodoh, ge toro deuatingina peono teko uauia tagigeig. ²⁵wGe inggoum pe misiana tasir sipsip geke hilhili ueltebeir, bo gine daan inggoum kung tapokisime tang Kristo ger tang kaueke sipsip tere kaueke uaia tun tamiuoum.

O Mahar 3

Hape ura ueltada katongo peis ramatang bulout

3^xTar siokonor hagar inggoumur kuaha le mu guata sira pon, karung kale uahiua katongosioum tosnomio bulout, doh getung leoum mo bulout ge ahik pah ra tagorong mana tang Iesu, inggoum mu guata uakeluk kompe tar haua ra malaraisisin, maeit ra banga tosina tar nipileser namiuoumur kuah, kara turung tagorong manangua toro Uelhire Uaia, ahik pah mu petutup tasisina tar kale tang roon. ²Gisin e turung uiuir katongois geta banga to tar nipileser namiuoum a delauana tun, kara niueltadar namiuoum.

³yAhik pah mu uamatmate hamas pukusioum tar inete, kara niguatane: uir tar ulun, mindal, a kabon

ger pang hain ger i ranar bulauan, kara gomono ger i ranar bulauan, ahik pah mu uamataia puk i morenehia. ⁴Bo inggoum pakung uamatmate hamas i lolono tatamiu tar ineteniner mahang kap: uanguangoul sikor, kara niguatar hamhamas ter nimataiaonene re malarantiehe tunin God. ⁵Ter hagarionene, ra uoto uakelukinir kuahang sioun gesir dedeil gera uamoko tun teres nitagorong mana tang God, ra ueltada pe, kara uakeluk tun tar nimalara gera kulain nosio bulout ter hagariono re uamatmata hamas tasisin. ⁶zMisiana tang Sara ke longoro pe tang Abraham, kare ueltada tatanon, kare kila tatanono na mamahoholik. Doh inggoum teso bung tunon getung guata uakeluk sira tunoum tar niguataniner kodkodoh, inggoum ahik pah mu matotong sokoro me inete gere ualakanuh.

⁷aDoh ngohina tamiuoum ro bulout pakung hamhamasa pono tosnomio kuah, karung ueltada tasisin, ter hauon gisina ahik mes nitampopokoho maura siokor uakotopokoso raoum ramatang bulout tar nitua gere heirin God, maeit ahik pono me inete re uapekout tenami lotuoum.

Kale uelmahing tar niguata ger uia

⁸Nag uadouhinar menmeno tamiuoum uakapa tun teenine: mu ueluahesioum, ueldolomesioum, uelmaluelhiresioum, kale uahiua katongosioum, kara hamhamasa nami niuangoul. ⁹Ahik pah mu pehahaua tapokis tar niguataniner sa, ra guataig tamiuoum tar hagar uasa, ahik pah mu uelsigala tapokis geta uelsigalasioum, inggoum mu heir tapokis kalehe puk tar niguatar uia, geter puh tun peon, maeit ke kila God

^u2:23 Ais 53.7; 1Pi 3.9 ^v2:24 Ais 53.5-6; Roum 6.11

^w2:25 Isk 34.5-6; Mat 9.36; Jon 10.14; Hib 13.20-21 ^x3:1 Epe 5.22

^y3:3 1Ti 2.9 ^z3:6 Uak 18.12 ^a3:7 Epe 5.25

tamiuoum mare heirono tamiuoum tar niguata uaia. ¹⁰Ge o uelhire pe geka boloin sioun o hire teil pare,

“Mai gere marang uangoul keip tar ni-uaha tena nitua, kare banga tar binaka uaia, inggon ahik pahe mene tar meneniner sa,

kara hik pahe ueluatata tar boh.

¹¹Inggono pake turung tar mud tar niguataniner sa,

kare uakeluk kompe tar niguata uaia.

Inggono pake uatampopokoho tar guata tar uahiarouo tasir tamat.

¹²Ge God pe e kauেকে tun tas mais gesir kodkodoh,

kare longoro tenas lotusin,

bor Tamata Noman e turung tur tane tas mais

gera guata tar niguataniner sa.” *Ker 34.12-16*

¹³Mai re turung tung tamiuoum getung malarantiehe tunoum tar niguata ger uia? ¹⁴^bBo, getung kale uelmahingoum tar niguataniner kodkodoh, inggoum mu uah, ge God pe e guata uaia tamiuoum, ahik pah mu sokoro tasisin, karung namanantiehe tun. ¹⁵Bo i lolono tar koloumiuoum uamoko tang Kristo pare, ter Tamata Noman. Kaleu-atoro tanik dede tar hire uakalahara tas mais gera dangata tamiuoum tar tengkanar nitagorong maneit rung uangoul keipisioum. Bo inggoum mu mene keip kompe tasisina tar hamhamas, kara niueltad.

¹⁶^cKale uanono tun tar ninamana ger kodkodoho tun rung heir pe tar uelhire tasisin, maeit mais gera marang mene uasa tamiuoum, auia tun pe nami niguata rung uakeluk pe tang Kristo, ka ra turung matala keip inguarina tonoso boh. ¹⁷Auiantiehe tun gete na ni-

malarampe God tar kale uelmahing tar niguataniner uia ue tar kale uelmahing tar niguataniner sa?

¹⁸Ge Iesu Kristo pe ke mata uasiokon sioun teres niguata uasar tamatang gane i kot. Ter tang siokor kodkodoh ke mata ueleheir tasir tamata ge ahik paho kodkodoh mare keip tasisina tang God. Inggono Kristo ka tung pousinir tuku-nun, kare uatua tapokisir Iabena Dedeil tatanon.

¹⁹Doh inggon teke la hire tasir iabeisir mat, gera uangoul tar karabus, ²⁰^dgeka mahang longoro sioun tar binaka ke heir binaka pe God tasisin mara uiuir tenas niguataniner sa. Tar binaka pe ke tuha Noa tar parau, o papagalik pukur tamata ka panete tar parauion, a tualang sioun kura udeil tar laur. ²¹Doha laurinin tere uahire teilinguaene daana tar uahuuene ri uoto kaleieig tar binakang babtais, ginina teke uauedil tamiuoum ahikiono pahe kale liu tar muskurum tar tukununar tamat, bo inggono ter ualapagah ri guataieig tang God mari tagorong mana dede tena nitua tapokis Iesu Kristo.

²²Kristo ke la i Heuen, kare tabila tar pang makoso tang God, o angelou uakapa tun, kara nikaueke uakapa tun, doha nitampopokoh e siokor moko tena nikaueke Kristo.

O Mahar 4

Uangoul sira no tamata God

4 ^eTemaeit ke kale uelmahing Kristo tar tukunun, inggoum mu uinatoro tanik pono tar siokonor hagarono gete lame tamiuoum. Ge mai pe re kale uelmahing tar tukunun, inggon e kapa manasa na niguataniner sa. ²Temaeit, a nituaene rung uangoul keipioum tar

^b3:14 Ais 8.12-13; Mat 5.10; 1Pi 2.20; 4.14

^c3:16 1Pi 2.12

^d3:20 Uak 6-7

^e4:1 Roum 6.2,7

kot, ahikir nimalara gere uauaha puk tar tukununa pahe uasuasa tamiuoum, bo inggoum mu uangoul sira re nimalara pe God. ^{3f}Ge inggoum pe kung uangoul keipime sioun tar niguata ra malaraisir tamata gera tele tang God geka uangoul keip toro uraur, o gehegehelik, uoto sipaka keip tar ninamana uasa, kara guata keip tar niein uelik tar inetenine, uasipaka tasir tamat, ura ueltebeir, kara guata uasantiehe tun tar lotu tasir god bohoboh.

⁴Doh gine daan, gisina ra turung lutara ke uiuir peisoum ahik pe pah mu uakeluk tar niguataniner roke gere moko teilir niguata uasar nasisin, song ra menmene uasanguasina tamiuoum. ^{5g}Bo gisina puk ra me turung hire uakalahara katongois tang God gere tabila uangoul puk manasa tar kedang tasir tua, doho mat. ⁶Ge inggono pe ter tengkan, maeit ka hire tauete ponoin, ro Uelhire Uaia tasir tamat geka mata uoum, maeit gisina ra turung kedangais, ra kedang uamatotois tenas niuangoulane i kot. Maeit gisina tar iabeis pake turung uangoul keip tar nimalaranang God.

^{7h}A uadouhinar marein ke uahuhut manasain, temaeit mu uatakapuka teremi ninaman, karung uakodkodoho bakasoum, song rung lotu. ⁸ⁱDoh ter puh re kokop tane tar mamang inetelik uakapa tun teene, uelmalauelhiresioum, teeit a uelmalauelhir e kokop tane tar bureher niguata uasa.

^{9j}Mu uelkila uatorosioum, karung ueluahesioum, ahik me mamangusul. ^{10k}Ge inggeig kahakaha pe o tang kaeke uaia tun tar inete uaia ke heirig God tagigeig mari poul keip tar niuia tasir gisiameh. ¹¹Gete me tansioko re

mene tauete me inet, inggon e guatampe geke kale tur peono tar uelhire tang God, doh gete me tang sioko re poul, inggono pake guata keip tar nitampopokoho ke heirin God tatanon, maeit tar mamang inetelik, God ra uatakaiain tur tang Iesu Kristo. Doh tang Iesu Kristo, a uiniator, kara nitampopokoh, e la dedengua tar mamang binakalik. O mana tun.

Kale uelmahing ro tagorong mana pe tang Iesu Kristo

¹²Ro uanotoug, ahik pah mu turung lutara tar uedanga gete la keipime tar uelmahing uleik tun misiana paha timuhur inete re pokoso tamiuoum, ^{13l}bo mu uaha kompe, ge inggoum pe ke kale keip ponosioum tar uelmahing geke kalein Kristo, maeit inggoum mu turung uahantiehe tun gete pokoso uakalahara tunur uinatoror nanon.

^{14m}Gete ka uelsigalasioum, teeit tang Kristo, inggoum mu kalengua tar niguata uaia, ge na uinatoro pe na Iabena Dedeil God e me uangoul dede tamiuoum. ¹⁵Ahik pah mu kale uelmahing tar tung pous tamata ue toro uenau ue tang hingiar hagar gere katego tar ualatut ue tar keipkeip uelhire, ¹⁶bo gete kung kale uelmahingoum tar hangana Iesu Kristo, inggoum ahik pah mu matal, mu uatakai kompe tang God.

¹⁷Doh gine daana ter binakang kedanga manas, e uakekene tur tosno tamata God, doh gete uakekene keipono tagigeig hopengua tas mais ge ahik pah ka ueltada tonono Uelhire Uaia God?

¹⁸Ge o uelhire pe geka boloin sioun, o hire teil pare,
“A parakukuh tun tar uauedeil tar tamata ger kodkodoh.

^f4:3 Epe 2.2-3 ^g4:5 Apo 10.42 ^h4:7 Roum 13.11-12 ⁱ4:8 1Pi 1.22

^j4:9 Hib 13.2 ^k4:10 Roum 12.6-8 ^l4:13 Apo 5.41; Jas 1.2; 1Pi 1.6-7

^m4:14 1Pi 2.20

Doh hopengua tas mais ahik pah ra tagorong mana tang God, kare tasir tamata uasa?" *Nitabila Uaia 11.31*
¹⁹Temaeit mais gera kale uelmahing tar nimalarar nang God, gisina paka uamoko katongois tang God ger uauaman geke touo tar koto uakapa tun, kare guata uaia dedempela.

O Mahar 5

O mahohong tar lotu doho bulout kalan

5 Inggo u kula uapopokoho tun tamiuoumur mahohong tar lotu, ku banga tun tena uelmahing Kristo, kare turung kale keip ponoio tena uinatorono gete pokoso uakalahar.

²ⁿTur sira pare, o tang kaueke tosno sipsip God ra uangoul i kukulebanga tar nikaueker namiuoum. Ahik pah mu guata puk, rung kale teil pe tar kalekinaleon, bo inggoum mu kalekinale keip tun tar koloumiu a delauan, kare tar nimalara re malara pe God. Ahik pah mu marang kale mani to puk tar kalekinaleon, bo inggoum mu uamoko tun teremi ninamana tenami kalekinale tar poul tasir tamat. ^{3o}Ahik pah mu uairanasioum tas mais rung kauekeis, bo inggoum mu ualasira mara banga tosina tamiuoum. ⁴Doh gete pokoso Iesu Kristo ger tang kaueke sipsip, inggoum mu turung kale toro keuarang tar uiniator gero mahang sa.

^{5pA}siokono ponompe tamiuoumur kalan, uanguangoul sikor, karung kale uahiua katongosioum, karung guata uakeluk kompe tar haua ra malarain nomio mahohong tar lotu. Inggoum

tokah mu gomosioum toro gomonong tar hamhamas rung kalekinale tokaha pe, teeit

"God e de toro kakaialik, bo e guat auia kompe tas mais gera kale uahiua katongois." *Nitabila Uaia 3.34*

^{6q}Kale uahiua katongosioum i kukulebanga tar limana God ger i ranantiehe tun mare turung kale kaiono tamiuoum gete matotoinir binak. ^{7t}Uamoko tereng mamang niduhulik tang God, ge inggono pe tere kaueke tamiuoum.

^{8s}Tagin! Karung uakaueke katongosioum, kare takapukar matamiu, ge nami uelmatan peoum Satan, gine re bue uiloho misiana tar laion^f ger roke, e marang konomo uadeil mena tamat. ^{9t}Tur tane tatanon, karung tur uanono keip puk tar nitagorong man. Ge inggoum pe mu ate, o uanotoumiuoum gera tagorong mana tang Iesu Kristo ra uangoul tar mamang buturulik i koto uakapa tun, ra kale pono tar siokonor uelmahing.

¹⁰Doh Godong tar nimalaelhir menia tar hamhamas ke kila uahiku tamiuoum tena uinator gere moko dede tang Iesu Kristo rung kale uelmahing peoum tar sikinar binak, inggono katongo re turung uadeil, kare uatampopokoh, kare uatur uanono tamiuoum, karung uangoul uaia dede. ¹¹God e uoum keip tar nitampopohoho uakapa tun tar mamang binakalik. O Mana tun.

A uadouhinar uelhireng uah

^{12u}Sailas teke poul totoguo, maeit ku bolo toro uelhire rone tamiuoum, inggo u namana tun tatanon, a uanotouguo tun

^f5:8 Laion ger kusi uleikintehe tun a ualasokoro tasir tamat ngohina tasir bakue ra ualasokoro tasir tamat.

ⁿ5:2 Jon 21.15-17; Apo 20.28 ^o5:3 2Ko 1.24; Pil 3.17; Tai 2.7 ^p5:5 Epe 5.21; Jas 4.6 ^q5:6 Mat 23.12; Luk 14.11; Jas 4.10 ^t5:7 Mat 6.25-30

^s5:8 1Te 5.6 ^t5:9 Epe 6.11-13; Jas 4.7 ^u5:12 Apo 12.2,25; 13.13; 15.22,37-40

ger uauaman. Inngo ku bolome tar uaongolo tamiuoum, karu hire tauete uakalahara pare, a uelmalahironene a mana tun e la tur tang God. Tur uanono keip tun tatanon.

¹³vO uanotoumiuoum gera uangoul i Babilon geke uamatoto ponois God,

ka heir tenas niuaha tamiuoum, doh Mak pon ger tuguo. ¹⁴Mu ueluahe katongosioum, karung nguh keip tar uelmalalhir.

Inggoum o nang Kristo, o hiarouo o la tamiuoum uakapa tun.

2 Pita

A uatorikina ro bolobolo ke boloin Pita

O uatorikina ro bolobolo tang Pita

O uatorikinaro bolobolo ke boloin Pita o la uiloho tasir tamatang tagorong mana toro mamang butur. A ninamana uleik tun tanaroono te tar mene uaate tasisina tar to uahiua tasir tang ualasil gesir bohoboh, gera ualasila tar ninamanang ur.

A siokor hagarang tur uagele tar niualasiranain tera ueltupara toin geta uoho uanonoinir ninamana ger nang God, doh na ninamana Iesu Kristo ger Tamata Noman. A ninamana geka ueliuimeigir tamata geka banga tang Iesu, kara longoro pono tena niualasiron.

Pita e namanantiehe tun tenas niulasirasis ra kula pare, ahik Iesu pahe turung tapokisiha.

Pita e hirhire pare, a niuapekout tang Iesu mata la uateueleha e mokompe tar limana God, ahik pe pahe malara me tang siokor tamata ra mamantouoin, bo e malara tagigeig uakapa tar tur kauiuir liu baka tenagi niguata uasa.

I lolono toro bolobolo rone:

A meneng uakalahar (1.1-2)

A nikila tasir tamatang tagorong man (1.3-21)

O tang ualasila gesir bohoboh (2.2-22)

Na uadohinar nilaha Iesu Kristo (3.1-18)

O Mahar 1

Pita ke heir tar niuaha tasir tamat

1 O uelhire rone ke boloin Saimon Pita na tamatang kalekinale, kare na aposoul Iesu Kristo.

Roon o la tas mais gera kale teil tar niguatar kodkodohor nang God me Iesu Kristo ger tang uaudeil tagigeig geke heir tamiuoum tar nitagorong mana ger i ranantiehe tun.

²Inngo u dangata tang God e guata uaia tun tamiuoum, kare heir dede toro hiarouo tamiuoum, teeit kung ate uaia tun peoum tatanon, karung ate pono tang Iesu nagi Tamata Nomaniege.

God ke kila, kare kedang

³Tar nitampopokohor nang God, inggono ke heir tar mamang inetelik ri malarageig tar niuangoulung gane i kot, kari guata uakeluk tun hape re malara peon, teeit inggeig i ate uaia tun tatanon, ke kila pemeono tagigeig i lolono tar uinatoro na nitampopokoh, kare tena niguata ger uia tun. ⁴Ter puhonene, temaeit ke heir God tagigeig tar i ranantiehe tunur ualapagah, maeit inggoum ahik pahe turung kale taguisioum tar nimalara uasa geke mamantouo tasir tamatane i kot, karung uanoul uiaia sira re malara pe God.

⁵Ge ter puhung uleik tun peonene rung petutupusioum tere tumana tar nitagorong manar eimiuoum tar niguata uaia. Kare tenami niguata uaiaoum e tumana tar niate ger uia tun, ⁶w^kkare tar niate ger uia e tumana tar niguatang tar uakodkodoho katongosioum, kare tar niguatang tar uakodkodoho katongosioum e tumana tar kalekinale keip tar niduh, kare tar kalekinale keip tar niduh e tumana tar niguata re malaraiig God, ⁷kare tar niguata re malaraiig God e tumana tar niguata uaiar emiuoum ger hamhamas misiana rung guata uaia pe toso uanotoumiu gera tagorong mana tang Iesu Kristo, kare tar niguata ger hamhamas e tumana tar uelmalaelhir tasir tamata uakap.

⁸Getung uakeluk dedeoum, karung guata tar niguatanine, ginin e uauleik dede tar niater eimiuoum tang Iesu Kristo ge nagi Tamata Nomana pe inggeig tere turung uakotpokoso tar bu-reher ineter uia, kara niguata uaia. ⁹Bo me tamata ge taboigir niguataninaniner uia, inggon a hihihauar matan a kut. Ahik pahe namana tapokis bak, ka uadelauana uoum pein tena niguata ger sa ger pensioun.

¹⁰Temaeit inggoum ro uanotoug, petutup dede tar tagorong man, marung ualasira katongosium pare, God ke kil, kare kedanga tamiuoum. Getung uakeluk dedeoum tar niguatanin, inggoum ahik pahe matotong punga remi nitagorong man, ¹¹kare turung heiringua God tamiuoum tar niuaha uangoul a uleik tun getung me pokoso tena Nitoiaon gere moko dede ger nana nagi Tamata Nomaneig Iesu Kristo ger tang uauheil tagigeig.

Na uelhire God

¹²Temaeit u uanamana dedempeo tamiuoum tar inetenine, bo inggoum mu ateng sioun taninin, kare toro man, rung tagorong mana uapopokoho tun peoum. ¹³Inggo u namana pare, giner tua haraha peo, auia tun tar uatua dedempe teremi ninamanoum marung namana dedeoum taninin. ¹⁴^xTeeit inggo u ate, ahik pahi reh, karu mat. Ge nagi Tamata Nomana pe inggeig Iesu Kristo ke hire uakalahara tun totoguo. ¹⁵Temaeit, inggo u petutup tun tar hire tamiuoum tar inetenin, maeit getu mata manaso, inggoum mu namana dede taninina tar mamang binakalik.

Inggeim king banga tar uinatoror nang Kristo

¹⁶^yInggeim ahik pah mi ueluatata mo kiukiu tamiuoum geke tut pukin me tamata tar binaka ring hire tamiuoum tar nitampopokoh, kare tar nilamer nang Iesu Kristo ge nagi Tamata Nomaneig, bo inggeim king banga katongo tun tar matamiu, hape re popokoho tun per barangana nitampopokohon. ¹⁷^zGe inggono pe ke kale tur tar uleikir uinator, kara uatakai tang God ge Tamanon. Tar binaka ke pokosor uau tang Iesu gere la tur tang Tamanon ger popokoho tunur barangan, inggono ke kula pare. “Gine ter Tuguo geru malauelhirintiehe tunin, inggo u uaha tun tatanon.” ¹⁸Inggeim king longoro katongo tun tar uau gere mene tur i Heuen tar binakon inggeim mes Iesu Kristo mi pepe i rana tar siusana ger dedeil.

¹⁹Doh inggeig ki kale tar uelhire ger nasir propet, ginin ra ate uaia tunig a man. Inggoum mu uakeluk uaia tun tar uelhirenin misiana toro lam gero luh uamarmarein tar butur kitupun. Uakeluk dedempe tar uelhirenin e tuka tar binaka re tapokisime Kristo, kare me uakalahara tar mamang inetelik tamiuoum misiana gete kihihainir marein, kara pitopitong tar lulein gere pid uamarmarein tar koloumiuoum.

²⁰A puhung uleik tun rung naman manatesioum pare, a uelhire ger nasir propet gerung banga togioum toro bolobol, ahik pahe la tur teres ninamana katongosin. ²¹^aGininar uelhire, ahik pah ke uatengkana tur teres nimalarasin ue mena ninamana me tamat. Gisinar propet ka uelhire tauete keip tena nitampopokohor Iabena Dedeil tonou uelhire God.

^x1:14 Jon 21.18-19; 2Ko 5.1 ^y1:16 Mat 17.1-5 ^z1:17 Mat 17.5

^a1:21 2Ti 3.16; 1Pi 1.11-12

O Mahar 2

O tang ualasira bohoboh

2^bO propet bohoboho ka uangoul nang God, te misiana pono tasir tang ualasira bohoboho ra uangoul tokaha keip pono tamiuoum. Gisina ra turung ualasira keip uanomo tenas boho tasir tamat mara namanampeiginin a man. Gininar boho e turung uasuasan-gua tar kolousur tamata gera tagorong mana taninin, gisina ra dengua pono mata uakeluk tar toia ger Tamata Noman geke bulaua tapokis tur tasisina tar niguata uasa. Temaeit gisin e turung sir uabir katongois. ²O bureher tamatang lotu ra turung uakelukungua tenas niguatasinaniner sa, kara niguata ger ualamatal, maeit o gisiamehe ra turung menmene uasangua tar hagarininer man, teeit tar niguataninaniner sa ka guataigir tamatang lotu. ³Doh toroso kiplasinar tamatang ualasira gesir bohoboh, gisina ra turung reih me mani tamiuoum tenas kiukiu puk. Ge a uabang manate pe gera kaleinisina ke moko tur manasa tar puhung barah, gisin ahik pah ra matotong uasiaua tar inete ger ualabir.

⁴^cGe God pe ahik pah ke poroko tasir angelou, ke heir tar uabang manate tasisina tar binaka ka guata uasasin, kare bakanguako tasisin i Hel tar butur ger kitupuntiehe tun e tuka tar binakang kedang. ⁵^dGod ahik pah ke poroko tasir tamata geke uangoulume sioun, ke uahoup tasir tamata uasa toro silu, bo ke uaudeil puk tang Noa geke hirhire tauete teil tar hauar ineter kodkodoh, kara mouit ponor tamata ka udeil. ⁶^eDoh misiana ke mamantouo pe God tar uan

uleik i Sodom dohi Gomora, ke ualuh uakalingoho pe tar toking uan uleik rasina mara ualasira tois hape ra turung guata pono peisir tamata uasa. ⁷^fGod ke uelkarus tang Lot ger tamata kodkodoh geke kale tar niduh toroso mahang matalar tamata ge ahik pah ka uakeluk tar ualatut. ⁸Lot a tamata kodkodoho ke uangoul keip tasisina tar mamang mareinilik, kare mahingintiehe tunin re longoro pe, kare banga teres niguata uasar tamatang katego tar ualatut.

⁹Doh gete te paaron, a Tamata Noman e turung uelkarus pono tasir tamata uaia gete kaleisir niduh, kare kusa tane tasir tamata uasa, kare heir tasisina tar uelmahing e la tuka tar binaka ra kedangaisir tamata uakapa tun. ¹⁰^gGininanine a mana tun, e la tasir tamata uasa gera uakeluk puk teres nimalara uasang tar tukunus, kara mahang longoro tono uelhire God.

A uabang manate e turung lame

Gisinasiner tamatang ualasira gesir bohoboh, karo tang uasala katongois, kara uairana katongois, ahik pah ra ueltada tas mais gesir uelpipih, bo ka uelsigala tasisin. ¹¹^hMisiana tosno angelou God, gisin o tampopokoh, karo uelpipih tun, ahik pah ra matotong uelsigala me mene ger sa tasisin i uoum tar matana God.

¹²ⁱBosir tamatasina ra menmene uasa kompe tar hauar inete ra telein, gisina misianar inetesiner roke, ahik mes nita-mpopokoho tar naman, bo ra uakeluk pukumpe tar guata tar niguata re malaragir tukunus. Gisin o nipoho mara lolois, kara tung pousis misiana tasir inete roke, gisina ra turung kale uelmahing pono toro mat. ¹³Gisina ra turung kale uelmahing sirampe tar uelmahing geke

^b2:1 Mat 24.11; Jud 4 ^c2:4 Jud 6 ^d2:5 Uak 6–8; 2Pi 3.6 ^e2:6 Uak 19.24;
 Jud 7 ^f2:7 Uak 19.1-16 ^g2:10 Jud 7-8,16 ^h2:11 Jud 9 ⁱ2:12 Jud 10

heirigisina tasir tamat. Res ninamanasin e moko kompe tar uauaha tar tukunus, ahik pah tar boung puk tar marein pon. Gisin o beng, ka uala uahiu tar uan, ra uauaha katongo kompeis ra einintiehe tun pe, kara sipak keip tar ninamana uasa geto taliaha ro niein tar binaka ra ein tokaha keip tamiuoum. ¹⁴A matasisin e uoun kompe toro uraur, gisin ahik pah ra matotong uakenua tar niguataniner sa, kara uelour pono tasir gisiamhe gera uaruara naman. Gisina ra uaate katongo kompeis mara kiplantieh. God e turung heir tasisina tar uabang manate a uleik tun. ¹⁵jGisina ka hiliu tar niguataniner kodkodoh, kara malara kompe tar uakeluk tar niguataniner sa ger nang Balam ger tuna Beor gere marang kale mani to puk tar niguataniner sa. ¹⁶kBo inggono puk ke loulouarainir donki tena niguataniner sa re uoto guataig, a donki ahik pahe matotong mene tagu, bo ke mene sira tun tar tamat, kare kula tane tang Balam ger propet ahik pahe guata baka poluk tar niguataniner nasir popouluan.

¹⁷lO tamatasin o tabo tengkan misiana tar noro kodomo geke papadak, kare misiana toro mahar langit gero u liuinir rom. A butur peniner kitupuntiehe tun ter nikaleuatoro tanika tasisin. ¹⁸Ge gisina pe ra mene nomana tar men, bo ahik puk paha to tengkan, gisina ra uoto hire pono tasir tamata pare, ra matotong guata tar niguatar sa gere uauaha puk tar tukunusisin, Gisina ra uelour tapokis kompe tasir tamata geka nihing ualo liu puk tasir tamata gera uangoul keip tar niguata uasa. ¹⁹Gisina ka ualapa-gaha tun tasir tamata pare, ra uangoul manasa teres nimalara katong. Bo gisina puk tera uangoulumpe i kukule-

banga tar nikauekeng tar niguata ger sa gera uoto guata katongoig, ge a tamata pe geka pehuara tapokisin e uangoul a karabus tar ineton. ²⁰mGete ka hiliuisina tar niguata ger saane i kot, kara ate tun tang Iesu Kristo ger Tamata Noman ger tang uelkarus tagigeig, kara uelour tapokis polukis, kara pehuarais, gisina ra turung santiehe uain tunungua, ahik pah misiana tar uakikilangan. ²¹nTemaait, auiantiehe tun tasisina pare, ahik pah ra matotong ate tar huar ineter kodkodoh, ter hauono geta atesina gisina ra turung turung tar mud dedempe tar ualatoho ger dedeil geka heirig tasisin. ²²oGe a puh pe ka boloing sioun toro bolobol ra kilain, "Tar nitabila uaia," o hire teil tun toro mana tasisina pare. "A lo ke lua, kare ein tapokis toro niluaan," doh "A hueit geka uahuhu uaia tunin, ke la ia-hi-aha teil poluk tar lobolob."

O Mahar 3

Na mareinir Tamata Noman

3 Ro uanotoug, rone tero uatorik-ina nogo ueluatato tamiuoum. Inggo ku bolo tasrasina tokaha tar uanamana dede tamiuoum tar inetenin mare kodkodoho dede remi ninamanoum. ²pInggo u marang uanamana tapokis puk tar uelhire geka meneigir propet gesir dedeil sioun, kare no aposoul Iesu Kristo geka heir tar ualatoho geke hireig nagi Tamata Nomaneig ger tang uaudeil.

³qA uakikilangan, inggoum mu naman manate tun pare, tar uadouhinar marein o bureher tamatang uauanete ra turung pokos, kara me uauanete tamiuoum, kara uakeluk teres nimalara uasang tar tukunus. ⁴rGisina ra turung kula pare, "Ia kaeionor tamata geke ualapagah e

j2:15 Aha 22.7; Jud 11; UGO 2.14 k2:16 Aha 22.28-35 l2:17 Jud 12-13

m2:20 Mat 12.45 n2:21 Luk 12.47-48 o2:22 NU 26.11 p3:2 Jud 17

q3:3 1Ti 4.1; Jud 18 r3:4 Mat 24.48

turung tapokisiha? Bang! O bung tamagigeig ka mata pon, bo a mamang inetelik a siokono sira kompela ke uakekene per kot.”

^{5s}Bo gisina puk ka malabobour pare, God ke mene puk, kare pokos i Heuen, kare uapopout kai tur tar pang uanene i koto tar laur, kare uamoko tar laur i tektekene uiloh. ⁶Doh tar laurunin God ke uasilu, kare mamantouor laur tar pang uanene i kot. ⁷Ter siokono komper puhung menon, i kot, dohi ran e moko uangoul e tuka tar binaka re ualuh God tasrasina toro hue geka uamoko uangoulin tar binakang kedang, kara mamantouoisir tamata uasa.

^{8u}Ro bung uanotoug, ahik tun pah mu malabobour tar puhene, a Tamata Noman e kula pare, a siokor marein misiana paho taosein ro krismas, karo taosein ro krismas misiana paha siokor marein. ^{9v}A Tamata Noman ahik paha gimih tar uakeluk tena ualapagaha misiana tasir gisiamer tamata ra namana pe. Inggon e uanguangoul sikoro keip tamiuoum, ahik pahe malara me tang sioko ra mamantouin. Inggon e malara tasir tamata uakapa tun, ra turung uapalih tenas niguata ger sa.

^{10w}Bo tar binaka re kotpokoso na mareinir Tamata Noman, inggon ahik pahe turung uahire, e la sirame tar ueuenau. Doh tar binakon, i ran e turung rou e la keip tar ualagoreih a uleik tun, a mamang inetelik gere mok i ran e turung luh uakapa toro hue, doh gane i kot, kara mamang inetelik gere mokoane tar uanene i kot ra turung uakuakapa hihirig.

¹¹Geta siokor mamantouo uakapaiginina tar siokonor hagar, hopengua rung la baka pelaoumur tamat? Inggoum mu

uangoul keip kompe tar nidedeil, kare tar nimalara hape re malara pe God. ¹²Tar binka rung uanguangoul peoum tar mareinir nang God gete pokos, inggoum mu reih uahuhut ualahurume tar mareinon. A mareinon e turung pokoso keip toro hue, o me mamantou i ran, kara mamang inetelik gere mok i ran e turung lalaur tar uelsukuna ro hue. ^{13x}Bo inggeig puk i uanguangoul tar ualapagaha ger nang God, inggon e turung uakotpokoso uatimuh tapokis i ran, kare tar pang uanane i kot, inggono tenas uanir tamata gesir kodkodoho nas niguat, kara niuangoul.

¹⁴Ro bung uanotoug, gine rung uanguangoul peoum tar inetenin, uedanga uapopokoho tun tar uangoul tar niuangoul ger delauan, kara kodkodoh ahik me inete ra tula tolain tamiuoum. Uangoul keip dede toro hiarouo tang God.

^{15y}Uamoko teremi ninaman, ae maene a uanguangoul sikoro nagi Tamata Nomaneig? Ter tengkana teene, inggon e marang uaudeil tagigeig misiana tar kuhur uanotougigeig Poul geke bolo pono tono ueluatata tamiuoum tar ninamana uaia, kara niate ger uia geke heirin God tatanon.

^{16A} bolobolonine ke bologion a siokono tun ka bolo peig, inggono ke menmene ponompe tar puhonene. Bo a giniamer pukur mener nanono geke bolo uahialaig taninin a parakukuh tun tasir tamat tar naman manate. O gisiamer tamat ahikingua pah ra uelhire sira uamatoto tar tengkana hape re kulkula penin ter siokono kompe tar giniamer uelhirer nang God, gisin ahik pah ra uelhire sira uamatoto tun, gisin e turung sir uabir katongo kompei.

^s3:5 Uak 1.6-9 ^t3:6 Uak 7.11; 2Pi 2.5 ^u3:8 Ker 90.4

^v3:9 Hab 2.3; 1Ti 2.4 ^w3:10 Mat 24.29,35; Luk 12.39; 1Te 5.2

^x3:13 Ais 65.17; 66.22; UGO 21.1,27 ^y3:15 Roum 2.4

A uadouhinar men

^{17z}Temaeit inggoum ro bung uan-otoug, gine kung ate manasa peoum tar puhonene, kaueke katongosioum mara hikir tamata gesir tabung ualatut, pah ra uoum keip tamiuoum tar lele uasa, ra boho pe tamiuoum, kara hikingua

pah mu turung tagorong mana toro man. ¹⁸Bo mu hua kai keip kompe tar hamhamas, kara niate ger nana nagi Tamata Nomaneig, kara tang uaudeil Iesu Kristo.

Siokor uatakai tatanonene daan, doh tar mamang binakalik! O Mana tun.

1 Jon

*A uakikilangana ro
bolobolo ke boloin Jon*

No uakikilangana ro bolobolo Jon

Jon ter uakikilanganar tamata ke uakeluk tang Iesu. Inggono ke ate uaia tun tang Iesu. Doh inggono ke ate uaia tun ponompe pare Iesu te God (1Jo 1-3).

Jon ke bolo toro bolobolo rone, o la tasir tamatang tagorong mana tar ate pare God e malauelhr tasisin (1Jo 3.1). God e malara tun tagigeig, temaene inggeig paki malauelhir pono tasir gisiamer tamatang tagorong man (1Jo 3.17; 1Jo 4.19-21). A puhono tena puhung ualatutampe God tar mamang binakalik (1Jo 2.8), inggeig paki malauelhir tasir gisiamer tamat.

Jon ke marang uanamana pono tasir tamatang tagorong mana toro mana pare, O tamatang tagorong mana tesno tamatampe God, doh gisina tera uaha tar matakaluana keip tatanon (1Jo 3.1; 2.3).

I lolono toro bolobolo rone:

A luh doha kitup (1.1-4)

No keketik God, kare no keketik Satan (1.5-2.2a)

O man, doho boh (4.1-6)

Na kalekinaler nimalauelhir (4.7-21)

Pehuara keip tar nitagorong man (5.1-21)

O Mahar 1

Iesu tero uelhire gero tua

1^aInggeim king bolome tamiuoum toro uelhire rone gero tua gero mokon sioun ke uakekene pemer binak. Inggeim king longoro tun toro uelhire roon, karing banga tun tar matamiu,

kare tuha tunur limamiu. ^{2b}Inggonene re heir tar nitua ke uamakahain tamiueim. Doh inggeim king banga tatanon. Inggono ke hire tun toro mana tamiueim, doh inggeim king hirhire tauete teil pono tamiuoum pare, inggono tere kale teil tar nitua gere moko dedengua, inggon e uangoul teil tang God ge Tamagigeig, kare me ualairain tagigeig. ³Inggeim king hire tauete tamiuoum tar haua king bangain, karing longoroin marung uangoul uaia keip tokahoum tamiueim.

Doha niuangoul tokaha uaiaonene a nagigeig mes Iesu Kristo, doh God ge Tamagigeig. ^{4c}Inggeim king bolo puk toro uelhire roonone mare unga uaha tun regi nuaheig.

God ke uadelauana teregi niguata uasaeig

^{5d}Rone tero uelhire geking longoro turuiem tang Kristo, karing hire tauete tamiuoum. God Inggono ter luh, dohi lolono tatanon ahik me kitup tagu.

^{6e}Temaeit geti kuleig pare, i uangoul tokaha uaia keip tang God, kari uangoul harahampela tar kitkitupun, inggeig o bohoboh, kara hik pahi uakeluk tun toro man. ⁷Bo geti uangoul keipeig tar luh misiana re uangoul teil pe God, inggeig i matot i ueluaiesieig, song re uadelauana tunur deuatingina Iesu ger God tagigeig teregi mamang niguata uasalik.

^{8f}Bo geti uoliheig ahik me niguata uasa kaeig tatagig, inggeig i bohboho katongosieig, karo uauaman ahik paho moko teil tagigeig. ⁹Bo geti hire luaka inggeig teregi niguata uasa, inggon e uadelauana teregi niguata uasaeig, kare uadelauana tagigeig tar mamang inetelikir sa. Teeit God a uauaman, kara kodkodoho dede. ¹⁰Bo geti kula inggeig

^a1:1 Jon 1.1 ^b1:2 Jon 1.14 ^c1:4 Jon 16.24 ^d1:5 1Ti 6.16; Jas 1.17

^e1:6 1Jo 2.4 ^f1:8 Ker 32.5; NU 28.13

pare, ahik pah ki guata me niguata uasa, inggeig i kulangua tang God a bohoboh, kara hik pahi uaui a tono uelhireon o lame i lolono tar niuangoulur nagigeig.

O Mahar 2

Iesu ter tamatang poul tagigeig

2⁸Ro bung tug! Inngo ku bolo pukume tar uelhireninanine tamiuoum, maeit inggoum ahik pah mung turung guata tar niguatar sa. Bo mai tagigeig ke guata uasa, inggeig nagi tang siokor tamata re tur keip tagigeig i uoum tang Tamagig Iesu Kristo ger tamat a kodkodoh. ^{2h}Inggono pe ter uahung ke me kale uelmahing teregi niguata uasaig, doh ahik pah tagigeig puk, bo teres niguata uasa ponomper tamata uakapa tunane i kot.

³Bo inggeig i turung ate tun pare, o nang God geti uakeluk tun tena ualato-hon. ⁴A tamata gere kula pare, “Inngo u ate tang God,” doh ahik pahe uakeluk tena ualatohon, inggon a bohoboh, ahik pahe uangoul keip toro man. ⁵ⁱBo mai re longoro, kare uakeluk tono uelhire God, inggon e ualairain pare, e malaelhirintiehe tun tang God, doha nimalaelhiron a kodkodoh tun. Inggono te paara, ri ate pe inggeig ri uangoul tokaha keip uaia pe tang God. ⁶Mai re kula pare, e uangoul tokaha keip uaia tang God, inggono pake guata sirangua pono tar niguata ke guata pe Iesu.

A ualatut mari uelmalaresieig

^{7j}Ro bung kaloug! Inngo ahik pah ku bolome tamiuoum me timuhur ualatut, bo a ualatohonene, “I uelmalaresieig.” Ter siokono kompe tar ualatut gekung

longoromegioum sioun tar uakekenen. ^{8k}Bo a ualatut pukuonene ku bolomeio tamiuoum a timuh pon, karo man tena nitua Kristo, doha nitua ponor emiuoum. Ter hauon a kitup e hilhiliu uain, kara luh ger man gine manasa re luh uamarmarein.

^{9l}Mai gere kula pare, “E uangoul teil tar luh, kare tokouasain tang uanotono gere tagorong mana pono tang Kristo.”⁸ Inggon e uangoul harahampe tar kitkitupun. ^{10m}Mai re malaelhirintiehe tang uanotono gere tagorong mana pono tang Kristo, inggon e uangoul teil tar luh, kara hik me inete re uasusa tatanon i lolono tena niuangoul. ¹¹ⁿBo mai re tokouasain tang uanotono gere tagorong mana pono tang Kristo, inggon e uangoul tar kitkitupun, kara hik pahe ate ia re lihihia, teeit a kitup ke uakut tatanon.

¹²Inngo ku bolome tamiuoum ro bung tug, teeit remi niguata uasaoum ka uadelauana manasaig tar hangana Kristo.

¹³Doh inggo ku bolo ponome tamiuoumur mamahoholik, teeit inggoum mung ate tatanonene re uangoulung sioun ke uakekene pemer binak.

Doh inggo ku bolo ponome tamiuoumur kalan, teeit inggoum kung touahiua tang Satan.

Doh inggo ku bolo pukume tamiuoum ro bung tug, teeit inggoum mung ate tang Tamagigeig.

¹⁴Karu bolo ponome tamiuoumur mamahoholik, teeit inggoum mung ate tatanonene re uangoulung sioun ke uakekene pemer binak.

Karu bolo ponome tamiuoumur kalan, teeit inggoum o tampopokoh, kare no uelhire God o uangoul teil

§2:9 toro uelhireng Grik “tahn.”

§2:1 Hib 7.25-26 ^h2:2 Jon 1.29; Kol 1.20; 1Jo 4.10 ⁱ2:5 Jon 14.21,23

^j2:7 Jon 13.34; 2Jo 5-6 ^k2:8 Jon 1.9; Roum 13.12 ^l2:9 1Jo 4.20

^m2:10 Roum 14.13 ⁿ2:11 Jon 12.35

tamiuoum, karung touahiuu tang Satan ger tang sa.

¹⁵Uakenua tar malauelhir i kot, doh tar ineteng gane i koto ger sa, bo gero malauelhira taninin na nimalauelhir God ahik pahe moko totomua. ¹⁶P Temaene a mamang inetelikane i kot misiana tar nimalauelhir sa, kare tar gehe tar inet, kare tar uairana katongo turin tena bureher inet. A niguatanin ahik pahe la tur tagu tang Tamagigeig, bo e la tur pukane i kot. ¹⁷Q Doha kot, kara mamang inetelik geka malarai g e turung kapa dede, bo mai re guat, kare uakeluk tena nimalara God, inggon e la turung uangoul dedenguampela.

No uelmatan Iesu

¹⁸R Ro bung tug! Gine ter uadouhinar binak, doh inggoum kung longoro manasa tena uelmatana Iesu e turung la manasame. Doh gine daan no uelmatana Iesu o bureh, gisine ra uangoul manas. Temaait ri ate inggeig pare, inggono ter uadouhinar binak. ¹⁹S Gisina ka hiliu tur tar totoene tagigeig, teene ahik pesina paho nagigeig tun. Bo ge pakene o nagigeig tunusin, gisina paka uangoul tagu dedempela tagigeig. Bo gisina ka hiliu tar totoene tagigeig e ualasingua pare, ahik me tang sioko tasisinar nagigeig.

²⁰T Bo inggoum ke uelpikur manasa Iesu tar Iabena Dedeil. Temaene rung atenguaoum toro man. ²¹ Inggo ahik pah ku bolome tamiuoum, teeit inggoum mung tele toro man, bo inggoum mung ate, karung ate pono pare, ahik pe mo boho ro la tur toro man. ²²U Maionor bo-

hoboh? Inggono ter tamata gere uolih tang Iesu pare, ahik pah ter Kristo. Doha tamata gere kula sira pare, na uelmatana Iesu, kare uolih pono tang God ge Tamagigeig mer Tun. ²³V Doh ahik me tang sioko re ueluelde puk tar Tunon e ueluelde pono tang Tamanon. Bo mai re kilauatoro tar Tunon, inggono ke kilauatoro pono tang Tamanon.

²⁴Banga tapokis tar haua kung longoro turig tar uakekenen, karung sanga dede taninin, getung uakelukoum, inggoum mung turung uangoul tokaha teil dede tar Tunon, doh tang Tamanon.

²⁵ Inggono ke ualapagaha tagigeig pare, "Inggeig i turung kale tar nitua gere moko dedengua."

²⁶ Inggo ku bolo pukume tanininanine tamiuoum tar tur tane tas maisir tamata gera marang uoum keip tamiuoum toro boh. ²⁷W Bo inggoum ke uahuhu manasa Iesu tar Iabena Dedeil, kare moko dedengua tamiuoum, ahik baka poluk pah mung sir me tamata re ualasingua tamiuoum. A Iabena Dedeil tere ualasingua manasa tamiuoum tar mamang inetelik. Doh na niualasiron a man, ahik paha boh. Uakeluk dede tar haua ke ualasinguagiono tamiuoum marung uangoul keip dedeoum tatanon.

²⁸ Ro bung tug! Uangoul keip dede tang Kristo marung ongoloum tar binaka gete kotpokos, kara hik pah mung tokouaouo, karung matala gete tapokisimeon. ²⁹X Getung ateoum pare, Iesu a tamata a kodkodoh, inggoum mung atengua pono pare, o tamata uakapa geke guata uaia, gisin o bung tunon.

^o2:15 Roum 8.7 ^p2:16 Roum 13.14 ^q2:17 Mat 7.21

^r2:18 Mat 24.5,24; 2Jo 7 ^s2:19 Apo 20.30

^t2:20 1Ko 2.15; 2Ko 1.21; 2Jo 2 ^u2:22 1Jo 4.3; 2Jo 7

^v2:23 Jon 5.23; 1Jo 4.15; 5.1 ^w2:27 Jon 16.13 ^x2:29 1Jo 3.10

O Mahar 3

O bung tuna God

3^yBang! Tamagigeig e malaelhir-intehe tun tagigeig, teeit ra kula peisieig pare, o bung tunon. Doh inggeig o bung tuna nomanon. Doh ter tengkana teene, maeit ra teler tamatane i koto uakapa tagigeig, teeit gisina ra tele tatanon. ²Ro bung kaloug! Gine daan inggeig o bung tuna God, doh hape ri la baka pela inggeig halana haraha ta atein, bo i la ate to kompe gete la uamakahain Kristo. Doh inggeig i la turung misiana tatanon, ge inggeig pe i turung banga tun tatanon, hape re baka pe. ³Doho tamata uakapasine ra uangoul keip tar nitagorong mana tang Kristo ra uadelauana katongois teres niguata uasa misiana tang Kristor delauana pe.

⁴Mais ra guata uasa gisina ra kat-ego tar ualatutur nang God. Doh geta guata kompelaigir hagarinin, inggono ter siokono kompe ra ueluelde pein God, kare na ualatut. ⁵aBo inggoum puk mung ate pare, inggono ke laha tar me kale liu tar niguata uasar nagigeigane i koto uakap, doh inggon ahik tagu me niguata uasa kaeig tatan. ⁶Temaeit mai gere uangoul keip dede tang Kristo, ahik pahe guata uasa tagu, bo mai re guata uasa dede kompela ahik pahe naman manate tang Kristo, kara hik pahe ate tatanon.

⁷Ro bung tug! Ahik pah mung longoro me tang sioko gere uelour tamiuoum. Teeit mai gere guata tar huar uia, inggon a kodkodoh te misiana kompe tatanon ger kodkodoh. ⁸bBo mais ra uangoul, kara guata uasa dede harahampe, gisin o nang Satan, teeit Satan ke uan-

goul, kare guata uasa tanik manasa toro kikilangan. Doh ter tengkana maeit ke lahar tuna God te tar me mamantou tena kalekinale Satan.

⁹cDoh ahik me tang sioko tas mais geke kotpokos o bung tuna God ra uangoul, kara guata uasa dedempela, teeit na nitua God e moko teil dede tasisin. Doh gisin ahik pah ra matoto ra uangoul, kara guata uasa tagu, teeit gisina ka kotpokoso tur tang God. ¹⁰Temaeit ri ate inggeig tas mais ro bung tuna God, kare mais ro bung tuna Satan. Mais ra guata tar haua ge ahik paha kodkodoh, gisin ahik tagu paho bung tuna God, kare mai ponompe ge ahik pahe malaelhir tagu tang uanoton gere tagorong mana tang Kristo inggono pon ahik paha nang God.

Uelmalahiesioum

¹¹dGine ter puhung uahire popokoho gekung longorosioum tar uakekenene pare, inggeig i uelmalahiesieig. ¹²eDoh ahik pahi guata sira misiana tang Ken ger nang Satan geke haluh pous tang tahin. Ae maene ke haluh pousono tatanon? Teeit tena nipilesone, kare na niguatono ger sa, bo na niguata tahinon a kodkodoh. ¹³fDoh ahik pah mung lutara ro bung uanotoug gete tokouasaisir tamatang gane i koto tamiuoum.

¹⁴gInggeig i ate pare, ka luaka liu tur manasasieig toro mat, kari kale tar nitua, teeit inggeig i uelmalahiesieig, bo mai ge ahik pahe malaelhir tagu, inggon e uangoul keip haraha toro mat. ¹⁵hDoh mai gere tokouasain tang uanoton, inggon a tang haluh, kare inggoum mung ate pare, ger tang haluh ahik tagu mena nitua gere moko dedengua. ¹⁶iGine teki bang paroko pe inggeig, kari ate tar nimalaelhir tun, Iesu Kristo

^y3:1 Jon 1.12-13; 16.3 ^z3:2 2Ko 3.18 ^a3:5 Jon 1.29; 1Pi 2.22-24; 1Jo 2.2

^b3:8 Jon 8.44 ^c3:9 1Jo 5.18 ^d3:11 Jon 13.34 ^e3:12 Uak 4.8

^f3:13 Jon 5.18-19 ^g3:14 Jon 5.24 ^h3:15 UGO 21.8 ⁱ3:16 Jon 13.1; Gal 1.4

ke heir katongo tar tukununa tagigeig. Doh inggeig paki guata sira pono toso bung uanotougig. ^{17j}Doh ge pare, me tang sioko na bureher mamang ineteliking gane i kot, kare banga tang uanotono ke katupa pe tar inet, doh ahik pah ke ueldolomo tatanon, hapengua re la moko pe na nimalaelhir God tatanon?

^{18k}Ro bung tug! Inggeig i uakenua manasa tar kulkula puk pare, i uelmalaelhiresieig, bo inggeig paki uamakaha tun tar uelmaluelhirono tar niguata, kara nipiles. ¹⁹Inggono ter niguata, kara nipileser nagigeig teri ate toeig pare, i uangoul keip toro man, song ahikieig pahi kanuh tar binaka ri la tur i uoum tar Tamata Noman. ²⁰Doh geti ate katongosieig pare, ki kouh, bo God puk ter i ranantiehe teregi ninamanaeig, kare ate teil tar mamang inetelik.

^{21l}Ro bung kaloug! Geta hikieig pahi uakanuh katongosieig, inggeig ahik pahi kanuh tar tur i uoum tang God, ²²kari kale tar mamang inetelik ri dangataig tatanon, teeit inggeig ki uakeluk tun tena ualatohon, kari guata tar nimalalar nanon. ^{23m}Ginine tena ualatohon, “Tagorong mana tar hanganar Tunon Iesu Kristo, kari uelmalaelhiresieig,” ngohina ke ualatoho peono tagigeig. ²⁴ⁿMais ka uakeluk tena ualatohono ra uangoul tokaha uaia keip tatanon, doh inggon e uangoul tokaha uaia keip tasisin, doh inggeig i ate pare, inggon e uangoul tokaha keip tagigeig, teeit tar Iabena Dedeil geke heirhaiono tagigeig.

O Mahar 4

A iabena ger man, doha iabena ger boh

4^oRo bung kaloug! Ahik pah mung uolong tagorong man tas mais ra kula pare, ra kale teil tar iaben. Bo mung uedanga baka tasisina ge pare, la turur iabeneit ra kale teilisisina tang God. Ge o burehe per propet bohoboh ra uangoul ueltebeir. ^{2p}Gine te hape rung turung ate paroko peoum ge pare, la turumper iabenono tang God ge me tang sioko re kula pare, “Iesu ger Kristo e la tur tang God ke la siraha tar tamat.” A iabenonene tar tamaton e la tur tang God. ^{3q}Bo mai gere kula pare, “Iesu ahik mata la siraha tar tamat.” A iabenon, ahik pahe la tur tang God, a iabenon e la tur tosno uelmatana Kristo. Inggoum kung longoro pare, inggon e turung lame, doh gine daan, inggono gine manasa i kot.

^{4r}Bo inggoum ro bung tug, inggoum o nang God gekung touahua manasa peoum tasir propet bohoboh, teeit a iabeneit re uangoul teil tamiuoum a i ranantiehe tasisit ra uangoul i kot. ^{5s}Gisin o peng gane i kot, kara menmene teil uamatoto tar ineteng gane i kot, doh gane i koto ra longoro tasisin. ⁶Bo inggeig o nang God, kare mais ra ate tang God ra longoro tagigeig. Bo mais ahik paho nang God tagu, ahik pah ra longoro tagigeig. Gininanine te mari bang paroko inggeig tar iabene ger uauaman, kare tar iabene ger bohoboh.

A uelmalaelhir e la tur tang God

⁷Ro bung kaloug! Inggeig i uelmalahiresieig, teeit a uelmalahir e la tur

j3:17 Ual 15.7 k3:18 Jas 2.15-16 l3:21 Hib 4.16 m3:23 Jon 6.29; 13.34

n3:24 1Jo 4.13 o4:1 Mat 7.15; 1Te 5.21; 1Jo 2.18; 2Jo 7 p4:2 1Ko 12.3

q4:3 1Jo 2.18 r4:4 Mat 12.29; 1Jo 5.4-5 s4:5 Jon 8.47; 15.19

tang God. Temaeit mai re malaelhir tang uanoton, inggon a tuna God, e ate tang God. ⁸Bo mai ahik pahe malaelhir tang uanoton, inggon ahik pahe ate tang God, teeit God inggono ter tengkanar nimalaelhir.

⁹tGine teke ualasira pein God re malaelhir pe tagigeig. Inggono ke heiriha tar tang siokor Tunane i kot mari uangoul keipeig tar nitua e la tur tatanon. ¹⁰uGine te hape tar uelmalaelhir, inggeig ahik pah teki malaelhir tang God, bo inggono pare, God ke malaelhir tagigeig, kare heiriha tar Tuna pare, a uahung mare kale uelmahing teregi niguata uasaieg.

¹¹Ro bung kaloug! Ge pare malaelhirintiehe nomana God tagigeig, inggeig i uelmalahire ponosieig. ¹²vAhik me tang sioko tagigeig ke banga tang God, bo geti uelmalahiresieig, God e uangoul tagu dede tagigeig, doh na nimalaelhiron e la uahiuo tunuhane i lolono tagigeig.

¹³wInggeig i ate pare, i uangoul tagu tang God, doh inggon e uangoul tagu pono tagigeig, teeit inggono ke heir tagigeig tena labena ger Dedeil. ¹⁴Doh inggeig ki banga, kari hire toro mana pare, God Tamagigeig ke heiriha tar Tuna tar me uaudeil tasir tamatane i kot.

¹⁵God e uangoul tagu tang mai gere hirhire tauete teil pare, "Iesu a Tuna God." God e uangoul tagu tatanon. ¹⁶Doh inggeig i ate uaia tun pare, God e malaelhirintiehe tun tagigeig, kari tagorong mana tatanono re malaelhirintiehe tun pe tagigeig.

God inggono ter tengkanar nimalaelhir, doh mais ra uangoul keip tar nimalaelhir gisina ra uangoul tokaha keip tang God, doh God e uangoul tokaha keip tasisin. ¹⁷Doh tar hagari-

onene a uelmalar e la popokoho tun i uantinanina tagigeig, maeit inggeig ahik pahi la kanuh tar binakang kedang, teeit inggeigane i kot i la misiana tang Kristo.

¹⁸Ahik me nisokoro kaein tar uelmalahir, teeit na nitampopokohor uelmalahir e uelueltula liu tar nisokor, bo a nisokor e la keipin tar niduh, doh mai re sokor, ahik paha popokoho na nimalaelhir. ¹⁹Inggeig i uelmalahiresieig, teeit God ke malaelhir uakikilanga tagigeig.

²⁰Ge me tang sioko re kula pare, e malaelhir tang God, kare tokouasa dedempein tang uanoton, inggonor tamaton a bohoboh. Hape geta hikieig pahi uelmalahiresieig, hapengua ri malaelhir pe inggeig tang God, ge ahik pe inggeig pah ki banga tatanon? ²¹xDoh Inggono ke heir tagigeig tar ualatutene, mai re malaelhir tang God, inggon e malaelhir pono toso bung uanoton.

O Mahar 5

A nitagorong mana tar Tuna God

5 ^yMaisir tamata gera tagorong mana tang Iesu pare, Inggono ter Kristo, gisina ka kotpokoso o bung tuna God, doh mais ra malaelhir tang Tamanon, gisina ra malaelhir pono tar Tunon. ²Gine te hape ri ate tun pe inggeig pare, ri malaelhir pe toso bung tuna God, inggeig i malaelhir tang God, kari uakeluk tena ualatuton. ³zTar malaelhir tang God ter tengkana teene, "Uakeluk tena ualatuton." Doh ginin ahik paha parakukuh tagigeig tar uakeluk. ⁴Ge inggeig uakapa tun peene ro bung tuna God i touahua manasa tar niguatar saane i kot. Gine ter uleikir nitampopokoho ka pehuara peinir kot, inggeig i tagorong mana tang Iesu.

^t4:9 Jon 3.16 ^u4:10 Roum 5.8-10; 1Jo 2.2 ^v4:12 Jon 1.18 ^w4:13 2Ko 1.22; 1Jo 3.24 ^x4:21 Mak 12.29-31 ^y5:1 1Jo 4.15 ^z5:3 Jon 14.15,23-24

⁵Maiono ke touahiua tar niguatar saane i kot? Teesine kompe geke tagorong mana tang Iesu pare, a Tuna God.

^{6a}Iesu Kristo Inggono ter tang sioko ke laha tar kodom, ka me uahuhu pein, karo me tading ro deuatingin ke me mata pe. Inggono ahik pah ke laha tar kodomo puk, bo Inggono ke laha tar kodomo doho deuatingin. A Iabena Dedeil teke tur keip, kare hire tauete toro man, teeit a Iabena Dedeil Inggono teger uauaman. ⁷Ge a touono per inete rasit ura tur keip, kara hire tauete toro mana tagigeig tang Iesu, ^{8b}a Iaben, kara kodom, kara deuating, doha touonor inete rasina ka uelhote. ^{9c}Inggeig i tagorong mana tar hua gera hire taueteigir tamata tagigeig, bo a hua puk geke hire taueteig God, ginina ter inete uleik, doh inggono ke hire tagigeig toro mana tar Tuna katong. ^{10d}Mai re tagorong mana tar Tuna God, inggono ke sanga dede tar uelhire geke hireig God tatanon. Bo mai ge ahik pahe tagorong mana tang God, inggono ke kulangua tang God a bohoboh, teeit inggono ahik pah ke tagorong mana tar uelhire ger man geke hire uamatoto tolaig God tar Tun.

¹¹O uelhire gero mana te pare, God ke heir tagigeig tar nitua gere moko dedengua, doha nituaon e moko tar Tunon. ^{12e}Mai gere uangoul tagu tar Tunon, inggono na nitua, doh mai ge ahik pahe uangoul keip tagu tar Tuna God, ahik mena nitua gere moko dedengua.

A uadouhinar men

^{13f}Inggono ku bolome tanininanine tamiuoumene rung tagorong mana tar hanganar Tuna God, maeit rung

ateoum pare, remi nituaoum e moko dedengua. ^{14g}Gine ter nitagorong mana re reih uahuhut tagigeig tang God. Geti dangata inggeig me inete tang God re malara pe, inggon e longoro tagigeig. ¹⁵Doh geti ate inggeig pare, inggono ke longoro tagigeig tar hua ki dangatain, inggeig song ri ate tun pare, i turung kale tar hua ri dangatain tatanon.

^{16h}Doh me tang sioko geke banga me uanotougigeigene ri tagorong mana tang Kristo ke guata tar niguata uasa ge ahik pahe uoum keip tagu toro mat, inggonor tang sioko pake lotu tang God mare heirono tang uantonono tar nitua. Inggono u menmene tas mais ka guata tar niguata uasa ge ahik tagu pahe uoum keip toro mat. Bo a niguata uasa gere uoum keip toro mat e mok. Inggono ahik pah ku kula pare, o lotua tas mais ra guata taninin. ¹⁷A mamang niguata uasalik ginin a sa, bo ahik puk pah teenina uakapa re uoum keip toro mat.

¹⁸ⁱInggeig i ate pare, mais geke kotpokoso tur tang God, ahik pah ra uaateis tar niguatar sa, ge a Tuna God pe e kapil uaia tun tasisin, doh Satan ahik pahe matot e mamantouo tasisin. ¹⁹Inggeig i ate pare, inggeig o bung tuna God, bo gane puk i koto uakap e moko tena nikauekon, kare na nitampopokoho Satan. ²⁰Doh inggeig i ate pono pare, a Tuna God ke laha tar me uanaman manate tagigeig, maeit ri ate inggeig tatanono pare, a God noman. Doh inggeig i uangoul tagu tatanono gere uaman, kare tar Tunono pon Iesu Kristo. Inggono ter God noman, kare ter nitua gere moko dedengua.

²¹Ro bung tug! Mung kapil katongosium tasir god bohoboh.

^a5:6 Jon 1.29-34 ^b5:8 Jon 15.26 ^c5:9 Jon 5.32-37 ^d5:10 Jon 5.36-40

^e5:12 Jon 3.36 ^f5:13 Jon 20.31 ^g5:14 Jon 14.13-14; 1Jo 3.21-22

^h5:16 Mat 12.31 ⁱ5:18 1Jo 3.9

2 Jon

O uatorikina ro bolobolo ke boloin Jon

No uatorikina ro bolobolo Jon

O uatorikinaro Jon, o bolobolo puhin i lolono toro Baeboul tar timuhur uelhote.

A tamata ke bolo tana roono te Jon geke bolo pono toro Uelhire Uaia tang Jon, karo uatauete toro uelhire gero ou, doho gime torik baka polukompe ro bolobol.

O uatorikinaro Jon o mene ualsira tagigeig mari malauelhir tasir gisiamerher tamtang tagorong man. God ke ualatoho tagigeig tar uelmalahirisieg (2Jo 5-6).

Inggeig paka hik pahi tangana mo tamata gera mene ualasira me inete me sa e lain tang Iesu (2Jo 7-11). Ge Iesu pe te God. Bo ke me tamata puk, mare me mata tagigeig. Tar binaka ke mata Inggon, Inggono ke kale tar uelmahingin tenagi niguata uasaieg.

A puhonene tero mene tun ro la tasir tamatang tagorong man.

I lolono toro bolobolo rone:

A meneng uakalahar 1-3

Na kalekinaler nimalauelhir 4-6

A uatagin tar niate ger boh 7-11

A uadouhinar menemen 12-13

O Mahar 1

**Inggeig i kale uanono tono uelhire
God gero man, kari tagin tasir
tamata gera ualasira siok**

1 O bolobolo rone o la tur tang Jon ger mamahoholik. Inggo John ku bolo umatotola tar kuaha geke umatotoin God menia toso bung tuna geru malauelhirintiehe tunusio toro man, doh ahik pah inggo puk, bo gisine ponompe ra

ate toro mana tang God. ²Ge o mana pe o uangoul i lolono tagigeig, karo turung moko dede tagigeig tar mamang binakalik.

³A hamhamas, kara niueldolom, doha uelhiarou e la tur tang God ge Tamagigeig, doh tang Iesu Kristo ger Tunon e me turung moko tagigeigene ri uangoul keip toro man, kara uelmalahir.

Uangoul keip dede toro man

⁴Jinggo ku uahantiehe tun tar binaka ku uelutpara tasir gisiamerhe ro bung tumua ka uakeluk tun pe toro man misiana ke ualatoho pe Tamagigeig tagigeig.

⁵kEr kuah, inggo ahik pah ku bolome totomua me timuhur ualatut, bo gine te geki longoro tur kompesieig tar uakekenen. Inggo u marang kula uapopokoho kompe pare, i uelmalahiresieig. ⁶Doha uelmalahironene inggeig i uakeluk tena ualatuton misiana kung longoro peoum tar uakekenen, doh na ualatutono teene, "I uelmalahiresieig."

Inggeig i sanga uanono dede tono uelhire Kristo

⁷O bureher tamatar bohoboho gera kula tang Iesu Kristo ahik pah ke la siraha tar tamat. Gisina ka la ueltebeir uakapane i koto uakap. Doha tamata gere kula paar, inggon a bohoboh, kare na uelmatan Kristo. ⁸Mung tagin teil mara hikioum pah mung uaheil tar bulauamiu geki kalekinalentiehe tun pe inggeig. Mung tur uapopokoho kompe marung siokor kaleoum tar bulauamiu uakapa tun i Heuen.

⁹Mai gere uasalain, kare uoumuoum teil re ualasira pe tar giniamerhe siokor nialasir, doh ahik pahe uakeluk tena nialasira Kristo, inggon ahik pahe uangoul keip tagu tang God, bo mai re uakeluk dedempe tena nialasira Kristo,

inggon e uangoul tagu tang God Tam-agigeig mer Tun.

¹⁰Doh mai re pokoso tamiuoum, doh ahik pahe uakeluk tar ualasar nang Kristo, ahik pah mung kilauatoro tatanono tenami um, karung uamaluana tatanono tang hingiar hagar. ¹¹Mai re kilauatro tatanon, inggono ke kale keip manasain ro bohoboh, kare tar niguatan-itir sar nanon.

A uadouhinar men

¹²Inggo nagu bureher mene ru marang boloig tar uahire tamiuoum,

bo ahik puk pahu marang bolo uahiualaane. Inggo u tagorong mana teil pare, u la pokoso tun tamiuoum, kari uelbange tunusieig, song ri ueluatata tokah, maeit regi niuaheig e la unga uaha tun. ¹³O bung tuna tahim kuaha geke uamatoin God, ka heir tenas niuah e lame totomua.

3 Jon

A uatouonono ro bolobolo ke boloin Jon

No uatouonona ro bolobolo Jon

O uatouonoa ro bolobolo tang Jon i lolono toro Baeboul tar timuhur uelhote.

Jon ke uaha tun ke longoro pe tang Gaius ke mene ualasira pe toro mene tar nitagorong man. Jon ke uaha pono tang Gaius ke kaueke pe tasir gisiamer tamatang tagorong man. O tamatang tagorong manasina ra lang mene ualasira tonu uelhore God tar gisiamer butur. Doh Gaius teke poul tasisin.

A giniamer niduh e mokompe toso tamatang tagorong mana Gaius. Maeit dohe marang lame mare me poul tang Gaius.

I lolono toro bolobolo rone:

A meneng uakalahar 1-4

Gaius ka uairanain 5-8

Diotrepes ka to uahuoin 9-10

Demitrius ka uairanain 11-12

A uadohinar menemen 13-15

O Mahar 1

1^mO bolobolo rone o la tur tang Jon ger mamahoholik, inggo ku bolola tang Gaius ger kaloguo tun geru malauelirintiehe tunuio toro man. ²Er kaloug, inggo u lotu dede tang God totomua maro uaha ingga, karo tagala dede, karo kalekinale uarabele uaia puk misiana tar iabeimua ru ate peo. ³Ingggo ku uahantiehe tun ka me pokoso pe ro bung uanotougigeig totoguo, kara me hire pare, ingga o uakeluk tun toro uelhore gero man, karo tagorong mana tang roon. ⁴Ingggo ke uleikintiehe tun regu

niuaha ku longoro pe toso bung tug ra uakeluk uaia tun pe toro man.

Kaueke uaia toso tamatang kalekinaler Tamata Noman

⁵Er kaloug, ingga ko guata uaia tun tar kalekinaler nang God ko kaueke pe toso uanotougigeig geka me pokoso tamioum ahik pah ko namana pare, o timuh pesina tamioum. ⁶^oGisina ka me hire tasir toto tamatane tar lotu, hape rung uelmalahire pesioum. Inggoum mu guata uaia dedempela tar uel-tutue tasisina tar butur ra lihihia. Inggoum mu uakeluk uaia dedempe tar puhono tere malara pe God. ⁷^pGisina ra la teil keip kompe tar hangana Iesu Kristo ahik pah ra kale to tagu me nipoul tas mais ge ahik pah ra tagorong mana tang Iesu. ⁸Doh inggeigene ri tagorong mana tang Iesu i guata uaia, kari poul tasisina tar huar inete ra katupain mari siokor kalekinale keip tokaha tuneig toro man.

Diotrepes me Demitrius

⁹Ingggo ku bolola toro bolobolo tasir toto tamatane tar lotu, bo Diotrepes puk ke ueluelde, doh ahik pah ke malara tang roon, teeit inggon e malara kompe te me pahene re uoum keip tar lotu. ¹⁰Doh getu lameo, inggo u me turung kila toto tasir tamat, karu hire tar huar ke uoto guatamegionu re uoto ngur pe, kare boho tola tagigeig tar niguata ger sa. A ineteninaniner sa ahik pahe uaunga uaha tatanon, ge inggono pe ahik pahe uoto kilauatoro tas mais gera tagorong mana tang Iesu, kare uoto tur tane tas mais ra marang guata uaia tasisin, kare uelueluata liuingua tasisina tar lotu tagu.

¹¹^qEr kaloug, ahik pah babasira tar niguatar sa, bo o babasira puk tar inete

^m1:1 Apo 19.29; Roum 16.23 ⁿ1:3 2Jo 4 ^o1:6 Tai 3.13

^p1:7 1Ko 9.11-12 ^q1:11 1Jo 3.6-10

uaia. Ge mai pe re guata tar niguataniner uia a nang God, bo mai puk re guata tar niguataniner sa, inggon ahik pahe ate tang God.

¹²Demitrius e uoto mene tun toro man, kara tamata uaia ra kula per tamat, kare no uelhire God o hire teil pon, doh inggeig i bang huara teil pono tatanono pare, a tamata uaia, doha mener nagigeig a man.

A uadouhinar men

¹³rInggo nagu bureher inete ru marang bololaig tamiuoum, bo ahik puk

pahu marang bolo uahiuu tanininane. ¹⁴Inggo u tagorong mana teil tar me banga tun tamiuoum mari tabila uiliodout tuneig, kari siokor ueluatata tokah.

¹⁵O hiarou o moko totomua. O bung kaloumua ka heir tenas niuaha totomua, karo turung heir kahakaha ponola ingga tenag niuaho toso bung kalouguosit rung uangoul tokahoum.

Jud

O bolobolo ke boloin Jud

No bolobolo tang Jud

No bolobolo Jud o puhina ro bolobol i lolono toro Baeboul tar timuhur uelhote. A tamata ke bolo tang roono te Jud, inggon a tahina pono Iesu.

Jud ke bolo toro bolobolo rone tar uatagin tasir tamatang tagorong mana tasir gisiamer tamat. O tamatasina ra uangoul haraha tar niuangoul uasa.

Jud ke mene uakalahara pare God e turung uabatampe tasisin.

Doh Jud ke mene uampopokoho tasir tamatang tagorong mana tar tagorong mana dedempe tang God.

I lolono toro bolobolo rone:

A meneng uakalahar 1-2

A nipiles, a niualasir, kara nisang tasir tang ualasira bohoboh 3-16

Pentampopokoho tar uoho uanono tar nitagorong man 17-23

Lotu keip tar uatakai 24-25

O Mahar 1

Jud e heir tar niuaha tasir tamat

1^sO uelhire rone o la tur tang Jud, inggono na tamatang kalekinale Iesu Kristo, kara tahina Jems. Inngo ku bolo tang roono rone tas mais uakapa tun, ke kilais God tamagigeig tar nimalaelhir nan gera uangoul tar nikaueker nang Iesu Kristo. ²Inngo u lotu tang God mare heir tamiuoum tar uleikir niueldolom, o hiarou, kara nimalaelhir.

A uatagin tar giniamehe siokor ualasir

³Inggoum ro bung kaloug, inggo ku namanantiehe tunumpe tar bolome tamiuoum tar uahire tar haua ke uaudeil tagigeig. Gine daan inggo ku bolome tamiuoum tar giamehe siokor inet, inggo u uatampopokoho tun tamiuoum tar tur keip toro uelhire ro man. God ke heir toro siokon sioun ro uelhire ro man toso tamata dedeil, ahik pahe matotong uapalih. ⁴^tGe o gisiamer per tamata ke me bir uoumis geka bolo uahiua peinir puhono sioun. Gisina ka me uahiku uanomo kompemeis tamiuoum. O tamatasin ahik mes nitagorong mana tagu tang God ka uapalih tar hamhamas ger nana nagi Godeig, kara uauia tasir tamata tar ura ueltebeir, kara uolih tang Iesu Kristo ger tang siokon sioun nagi toiaeig, kara Tamata Noman.

⁵^uInggoum mung ateng sioun inggo u marang uanamana puk tamiuoum pare, a Tamata Noman ke uelkarus tur tasir tamatang Israel uakapa tun i Isip, bo i muduhia puk inggono ke mamantou tas mais ahik pah ka tagorong mana dede tagu. ⁶^vMung namana tapokis kompe tasir anggelou ge ahik pah ka tur uanono keip tar kauek, ka ualo liu pono tonosio uan, a Tamata Nomana ke uamoko tasisina tar butur kitupun, kare sanga tane tasisina tar tiein gere moko dengua e tuka tar binakang kedanga tar marein ger uleik tun. ⁷^wTe misiana komper hagarono tasir tamatang Sodom, dohi Gomora, kare toro uan uleik uilohonine ka heir katongois toro uraur, kare tar hagar uasa. Gisina tera banga tonguais tas mais geka kale uelmahing tar puhung barah toro hue gero luh dede i Hel.

^s1:1 Mat 13.55 ^t1:4 Gal 2.4; 2Pi 2.1 ^u1:5 KT 12.51; Aha 14.29-30

^v1:6 2Pi 2.4 ^w1:7 Uak 19.1-25; 2Pi 2.6,10

⁸Doh ter siokono sira komper hagon tar tasir tamatasina ra borboriana tar inete gere guata uasa katongo tar tukunusisin, kara ueluelde tar nikaueke ger nanar Tamata Noman, kara menmene uasa tas mais gesir uelpipih gera uangoul i ran i Heuen. ⁹xBo tar binaka kura uelperere Maikoul ge nas uleikir angelou me Satan tang mai re kale tar tukununa Moses. Maikoul ahik pah ke menmene uasa tagu tang Satan, bo ke hire kompe tang Satan pare, “A Tamata Noman e loulouara totomua!” ¹⁰yDoho tamatasinasine ra menmene uasa tun harahampe tar hauar inet, ahik pah ra naman manatein, kara guata kompe tar haua ra marang guatain misiana tasir inetesiner roke ter niguataninane ke mamantouontiehe tun tasisin. ¹¹zKuusalik, God e turung heir tar uleikir uelmahing tun tasisin! Ka uakeluk pe tena niguata Ken, kara tang inete to tang Balam. Gisina ka mamantouois ngohina tang Korah ke mahang longoro pe tang Moses.

¹²aO tamatasin misiana tar lolouo ger ualasokor. I lolono toro nieining uah, gisin o mahang matal, o tang kauk ra marang gono kompe tar mamang inetelik. Gisina misiana pono tar mahar langit ge ahik pahe dur gere u bise liuigir rom. Gisina misiana ponor inua ge ahik pahe uoto ua tagu tena binak, kare misianar douk geke kahuhur, kare matmata hihir tunungua. ¹³Gisina misianar butuana roke i laur, doh res niguata uasasinaniner ualamatala ke puraka sir tar peroper. Gisina ra uangoul sira tar pitopit gere uana ueltebeir puk i rana tar langit. Gisina ra turung uangoul dede tar butur kitupun geke uamatotoin God tasisin.

¹⁴bInok a propet ter uamouitina toso bunguna Adam teke mene tanika sioun tar puhonene ke pokoso manasa tasir tamatasin,

“Bang, A Tamata Noman gine re lame menia toso tamata gesir dedeil o burehentiehe tun o mahang ah.

¹⁵Inggon e me kedanga tasir tamata uakapa tun,

kare kout luaka tenas nipileser tamata uasantiehe tun tasir tamata uasa, geke guata keipig tar hagar ger sa, kara menmene uasa geke meneigir tamata ge ahik pah ra uakeluk tang God,

kara menmene uasa tatanon.”**

¹⁶Gisinar tamatasina ra korere kompe, kara boho tola tasir gisiamah. Gisina ra uakeluk kompe teres ninaman, kara nimalaraniner sa. Gisina ra uairana katongo kompeis, kara uahihiana tasir tamata mara kale me bureher inet.

A uahire tar tur uanono dede

¹⁷Ro bung uanotoug, namana dede tar haua ra hireig no aposoul Iesu Kristo, ¹⁸cgisina ka hire tamiuoum pare, o tamat ra turung uelualeng uasa tar Tamata Noman menia tasir tamata gera tagorong mana tatanon, kara uakeluk kompe teres nimalara katongonine re deig God. ¹⁹Gisina tera turung uauelueltageih ueltebeir tamiuoum, ge gisina pe ra uakeluk kompe tar haua re uauaha tar tukunus katong ahik me Iabena Dedeil re moko tasisin.

²⁰dBo inggoum ro bung uanotoug, mung uatampopokoho dedempesioum teremi nitagorong maneitir dedeilintiehe tun, karung lotu keip dede tar Iabena Dedeil.

** 1:15 Bolobolo Inok 1.9

^x1:9 Dan 10.13,21; 12.1; Sek 3.2; 2Pi 2.11; KTH 12.7 ^y1:10 2Pi 2.12

^z1:11 Uak 4.7-8; Aha 16.1-35; 2Pi 2.15; 1Jo 3.12 ^a1:12 2Pi 2.13,17

^b1:14 Uak 5.18,21-24 ^c1:18 2Pi 3.3 ^d1:20 Kol 2.7

²¹Uamoko katongo dedempesioum tar nimalauelhirir nang God, karung uanguangoul tar niueldolomo ger nana nagi Tamata Nomaneig Iesu Kristo gere keip tamiuoum tar nitua gere moko dede. ²²Ueldolom, karung guata uaia tas mais ahik pah ra tagorong mana dede tagu. ²³^eUelkarus tur tasir gisiamehe toro hue, karung uaudeil tasisin. Ueldolomo tasir gisiameh, karung guata uaia keip tasisina tar nisokor, bo mung kapil puku-sioum tenas niguata uasasina gete sairi-sioum, karung sa pon.

Inggeig i uatakai tang God

²⁴God tere matotong kauেকে uaia tun tamiuoum, maeit ahik pah mung mato-

tong kouh tar sisiokong niguata uasa, kare uadelauana tun tamiuoum, kare keip tamiuoum i uoum tar niuahantiehe tun, kara uinatoror nan. ²⁵^fInggono ter tang sioko manasamper God nomana tun geke uaudeil tagigeig ke tangana pe tar tun Iesu Kristo nagi Tamata Nomaneig. A uinator a uelpipih, a nitampopokoh a i ranantiehe tun, kara nikauek e la tur tatanono sioun, gine daan, doh tar mamang binakalik. O Mana tun.

O Uelhire Uaia Geko Ou

O Uelhire Uaia Geko Ou

O bobolo rone toro Uelhire Uaia Geko Ou, roon o hire teil tar haua re turung pokosolaeit i uoum. Roon tero uadouhina ro bolobolo tar timuhur uelhote. Gine ke bolo tang roon Jon na aposoul Iesu.

O uelhire roono rone geko ou, o hire teil tar binakalanit i uoum. A uelutatanin a parakukuh tun tar uakalahara tar tankan. Bo ro bolobolo puk roono rone, e moko teilir giniameher ninaman a kalahara tun e lain tar binakalaeit i uoum.

O tamata uaia uakapa tun ahik pah ra matotong kale uelmahing tagu. God ke kaleuatoro tanik manas tenas umar tamata gera tagorong mana dede tang Iesu. Ahik me tamata re uangoul keip me ueldolomo tar buturon i Heuen a turung uan uaia tun.

Ahik tagu mo tamatang uoum keip gesir sa. Resi mahang ueldolomosin e tuka kout. Res nitampopokohosin e turung tuka kout. God e turung heir me uleikir uelmahing tasisin.

Iesu e turung tapokisiha tar uanene i kot. Song ra turung atenguar tamata uakapa tun pare, Iesu a God. Inggono tere turung kedanga tasir tamata uakapa tun.

Satan ahik tagu me na nitampopokoh. God e turung heir me uleikir uelmahing tang Satan. Doha uelpipihinar barangannar tang sa e turung rou.

Inggeig i kila uahuhutume tang God e me uangoul tagu tagigeigene daan. A ualasokorontiehe tunumper inete re turung pokoso halana pe Iesu te tapokisiha. Bo God puk e turung kapil uaia

tun tagigeig geti uamako tun teregi nitagorong man.

I lolono toro bolobolo rone:

O borborian 1.1-20

A bolobolo tar moutir buturung lotu 2.1-3:22

A borboriana tang God, kara Tunar Sipsip 4.1-5:14

A mouitir nihaila taner uabang manate 6.1-8:5

O mouit ro tuilinar uabang manate 8.6-11.19

O borboriana tar uanene i kot, kari Heuen 12.1-14.20

A mouitir nouhunar uabang manate 15.1-16.1

A uabang manate toro uraur, dohi Babilon 17.1-19.21

A uanene i kot e kap, kare lamer timuhur uan 20.1-22.21

O Mahar 1

1 ⁸Rone tono uelhire Iesu Kristo geko ou geke heirin God tatanono mare hire tanikono tena tamatang kalekinale tar huar inete re uahuhutung pokoso uakalahar. Iesu ke ualatueha tena anggelou tar me uaate toro uelhire roono tang Jon ge na tamatang kalekinaleon, ²Jon ke siokor bolo uahiua uakapa tun tar mamang inetelik ke bangaig, kare hire tauete tun toro mana pare, roono tono uelhire nomana God ke uakalaharain Iesu Kristo.

³^hA niguata uaia e la tang mai re timan, kare hire tauete toro uelhire rone ro nasir propet, kara niguata uaia e la pono tas mais ra longoro tang roon, kara uakeluk dede tar haua ka bolo uahiuaig tang roon, ge a binaka pe ke uahuhut manasain.

**Jon ke heir tena
niuaha tar mouitir butur**

⁴iInggo Jon u bolola tamiuoumur toto tamatang lotu tar mouitir butur tar pang Esia. A hamhamas, karo hiarouo tamiuoum, e la tur tang God gere pepeene daan, kare uangoulung sioun, kare turung la polukume. Dohe la tur pono tar mouitir Iaben gera tur i uoum tono tabtabila God ger toia,^{††} ⁵jkare la tur pono tang Iesu Kristo ger uauaman, ke hire tauete toro man. Inggono ter uakikilangana tas mais geka uatua tapokis turis toro mat, kara uoum keip tasir toia uakapa tunane tar kot.

Inggono ke malaelhirintiehe tun tagigeig, kare luaka liu tur tagigeig tar uihing teregi niguata uasa toro deuatingin. ⁶kInggono ke guata tagigeig pare, o toia, karo patere mari kalekinale tar God ger nanon, kara Taman. Uatakai, kara nitampopokoh gere moko dede e la tang Iesu Kristo tar mamang binakalik. O Man.

⁷lBang, inggon e la keipiha tar mahar langiting Heuen. Doha mamang matanalik e turung banga tatanon, mais ponompe ka soup tatanono toro bel. Doho tamata uakapa tunane i kot ra turung kiring tatanon. A puhonene a puhung mana tun. O man.

⁸mA Tamata Nomana ger God, ke kula pare, “Inggo ter Uakekenen, karu Uadouh keip poluk. Inggo u uangoulene daan, karu uangoulung sioun, karu tu-

rung la polukuha. Inggo ter uelpipihintiehe tun.”

Iesu ke pokoso tang Jon tar borborian

⁹Inggo Jon ge uanotoumiuoum ku uangoul keip pono tamiuoum tar niduh tena Nitoia God tar mamang niguata uasalik geka guatguatameig tagigeig mes Iesu. Inggo u uangoul tar tor i Patmos, teeit tono uelhire God, karu menmene ualasira tasisina tang Iesu. ¹⁰Tena mareinir Tamata Noman, na Iabena Dedeil God ke hiku totoguo, karu longoronguao tar uau re kula ualeik pe misiana geta uin ro tuil. ¹¹Inggono ke kula pare, “Bolo uahiuu uakapa tun tar haua ko bangaig, karo heir tasir tamata gera tagorong mana tang Iesu Kristo tar mouitir pang uaninine, i Epeses, i Smerna, i Pergamungn, i Taiataira, i Sardis, i Piladelpia kari Laodisia.”

¹²Gitie ku uagege uelhir peo tar marang banga maionene re menmene totoguo, inggo ku bang huara dedengua, toro mouit ro toktokono ro lam a nituha tar goul.^{‡‡} ¹³mDohi uantinanina taninin e turur tamata misiana tar keketik bulout ger Tunar Tamat.^{¶¶} E hiku teil toro hikhiku o baraha uatuk i koto tar kekenon, karo mahar gomom o abeaba iaiuiael o auih uiloho toro uaruaronon. ¹⁴oO lunon, kara ulunon a gaugaulintiehe tun misiana tar ulunar sipsip gauil ue misiana tar mahar langit gaugaul, kara toking matanon e luh sira toro luhluhuna ro hue.

^{††}1:4 “Tono tabtabila God ger toia,” God’s chair, “throne,” gitir tabtabil e ualasira tar nitampopokohor toia tasir tamata uakap

^{‡‡}1:12 “goul,” a pang hain iaiuiael abeabantiehe tun doha bulauan a i ranantiehe pon

^{¶¶}1:13 A Tunur Tamat a giameher hangan tang Kristo.

ⁱ1:4 KT 3.14-15; UGO 3.1; 4.5 ^j1:5 Ker 89.27; Kol 1.18

^k1:6 1Pi 2.9; UGO 5.10; 20.6 ^l1:7 Dan 7.13; Sek 12.10; Mat 24.30; Jon 19.34-37;

1Te 4.17 ^m1:8 UGO 21.6; 22.13 ⁿ1:13 Dan 7.13; 10.5

^o1:14 Isk 43.2; Dan 7.9; 10.6; UGO 2.18; 19.12

¹⁵Doha kekenon e abeaba sira tar brasener nisoro uaabeab,^{§§} kara alalin-ganar uauanon e kaling sira toro reihin tar kodom. ¹⁶^pDoh tar pang limanoner pang mua e takopo teil tar mouitir pitopit, karo tauete me ro baenata tar uauanon o uaraman. A porenon e balantiehe misiana tar pisara gere balantiehe tun.

¹⁷^qTar binaka ku bango tatanon, inggo ku mata uapuh, karu punga uahiu misiana tar tamatener mat, song ke uaponolaono tar pang limanener pang mua totoguo, kare hire pare, “Ahik paho sokor, inggo ter Uakekenen karu Uadouh keip poluk. ¹⁸Inggo ter tang sioko ger tua. Bang, inggo ku mat, bo gine daan inggo a tua tar mamang binakalik, karu kale teil tenas kir mat, kara ki tar uaning mat. ¹⁹Bolo uahiuu uakapa tun tar haua ko bangaig re pokosene daan, kare tar haua re turung pokosolaeit i uoum.”

²⁰“Ter tengkanar mouitir pitopit geko bangagia tar pang limouguo ger pang mua, karo mouit ro toktokono ro lam ger goul teenine: a mouitir pitopit tosnosi anggelour toto tamatang lotu tar mouitir butur, karo mouit ro toktokono ro lam tesir toto tamatang lotu tar buturin.”

O Mahar 2

Rone o la tasir toto tamatang lotu i Epeses

2^r“O bolobolo rone o la tar anggelou tar lotu i Epeses. Ginine tena ueluelhiner tang sioko, gere kale teil tar mouitir pitopit tar pang limana ger pang mua, kare latlateil i uantinana toro mouit ro toktokonor lam ger goul.”

^{§§}**1:15** “bras,” a pang hain iauiauel, kara abeab misiana tar “goul,” bo ahik paha siokon

^{*}**2:6** Nikolas a tang siokor tamat re ualasira tar niualasirar boh

^p**1:16** Hib 4.12; UGO 2.12; 19.15 ^q**1:17** Ais 44.6; 48.12; UGO 2.8; 22.13

^r**2:1** UGO 1.16 ^s**2:2** 1Jo 4.1 ^t**2:5** UGO 3.3 ^u**2:7** Uak 2.9; UGO 22.2,19

²^s“Inggo u ate tar haua ko guataia, ko kalekinalentiehe tun pemea tang Kristo, kara hamhamas nang niuangoul. Inggo u ate, ingga hik pah ko uahue tasir tamata uasa, kare hape ko uedanga pea tas gera kula katongois o aposoul, bo gisin ahik. Inggoum kung ate uaia tun manasa tasisina pare, o bohoboh. ³Ingga a hamhamas nang niuangoul, karo huata tar niduh tar hangouguo, doh ahik pah ko maluana kout. ⁴Bo reng puha teene re tokouasain totoguo: ingga haik manasa paho malaelhir totoguo misiana sioun. ⁵^tNamana tapokis ko uangoul peme sioun tar uakikilangan, kari ia ko me punga kout toa! Uapalih tenang niguat, karo guata tar haua ko guatameig sioun tar uakikilangan. Geta hikia paho uapalih tenang niguat, inggo u lame totomua, karu me kale liu tonongo toktokono nongo lama totomua tena butur. ⁶Bo ingga ko guata uaientiehe tun tar puh pare, re tokouasa peia tar haua ra pileseinir Nikolisen, ^{*} inggo e tokouasa ponoio tar puhon.”

⁷^u“Mai ge kaein me talingan, longoro tar haua re meneinir Iabene Dedeil tasir tamatang tar lotu. Mais geka touahiuu tar tang sa, inggo u uahue tasisina ra ein toro kukuanana ro doukung tua gero tur i Paradiso tang God.”

Rone o la tasir toto tamatang lotu i Smerna

⁸“O bolobolo rone o la tar anggelou tar buturing lotu i Smerna. Ginine tena

ueluelhirer tang sioko ger uakekenen, kara uadouhin gere uangoulung sioun, geke mat, kare tua tapokis.”

^{9v}“Inggo u ate tar niduh totomua.

O katupa tun tar ineteng gane i kot, bo ingga puk nang bureher inete ke heirig God. Inggo u ate ka menmene uasa per tamata gera kula pare, o Ju totomua, gisin ahik paho Ju, bo gisina no tamata Satan. ^{10w}Ahik paho sokoro tar niduh ro huatain. Inggo gine ru hire totomua, Satan e turung uamoko tasir gisiamehe tamiuoum tar karabus tar uedanga tamiuoum, doh inggoum mung turung kale uelmahing, kara niduh tar hangaulur marein. Tagorong mana kompe e tuka geto mat, doh inggo u turung heiro totomua toro keuarang nitua gere moko dede.”

^{11x}“Mai ge kaein me talingan longoro tar haua re hireinir Iabene Dedeil toro buturung lotu. Mai geke touahiuu tar niguata uasa, inggon ahik pahe turung tuparain ue e kale uelmahing toro uatorikina ro mat.”

Rone o la tasir toto tamatang lotu i Pergamungn

¹²“O bolobolo rone o la tar anggelou tar buturung lotu i Pergamun, Ginine tena ueluelhireon gero uaraman no baenata gero manantiehe tun.”

¹³“Inggo u ate tar butur ro pepea tar uan uleik gero toko no tabtabila uleik Satan. Bo ingga ko uamana noman, ahik pe pah ko uolih o tele totoguo, gititempe tar binaka ka tungpous toin tang Antipas geke tur keip tun tar nitagorong mana totoguo,

kara tar uan uleikeitir noumua re uangoulin Satan. ^{14y}Bo reng puha teene re tokouasain totoguo: o gisiameher tamata kaeis totomua ra kale teil haraha tar niguata ger nang Balam geke kouruin Balak tar uelour tasir Israel tar niguata ger sa, ka ein pe tar niein geke guata keipig tar uahung tasir god bohoboh, kara ura ueltebeir. ¹⁵Tar siokono kompe, o gisiamehe gisit pono totomua ra kale teil tar nualasira ger nasir Nikolisen. ¹⁶“Upalih tar niguatanitir sa.’ Geta hikion, Inggo ahik mpahu heir binaka tar lame totomua, karu me uelkoi keip tasisina toro baenat gero tauete tur tar uauouguo.”

^{17z}“Mai ge kaein me talingan, longoro tar haua re hireinir Iabene Dedeil toro buturung lotu. Mais geke touahiuu tar tang sa, inggo u turung heir tasisina tar giniamer mana† ger ououu. Inggo u turung heir pono tasisina kahakaha me gau-gauilir palau e tur teilir timuhur hangan a nibolola tang roon. Mai kompe re kale tang roono tere ate.”

Rone o la tasir toto tamatang lotu i Taiataira

^{18a}“O bolobolo rone o la tar anggelou tar buturung lotu i Taiataira. Ginine tena ueluelhirer tuna God gere luh sirar matana toro luhluhuna ro hue, kara kekenono misianar baras ger nisoro uaabeab.”

¹⁹“Inggo u ate tar haua ko guatguatagia, a nimalaelhirer eimua, kara nitagorong man, kara nipoul ko

†2:17 “mana,” a niein ke heirin God tasir Israel tar binak ka uangoul tar butur paden, bang toro Bolobolong Kale Tapokis 16.32-34

v2:9 2Ko 11.14-15; UGO 3.9 w2:10 2Ti 4.8; Jas 1.12

x2:11 UGO 20.14; 21.8 y2:14 Aha 22.1-25.2; 31.16; 2Pi 2.15

z2:17 KT 16.4,14-15,33-34; Ais 62.2; Jon 6.48-50 a2:18 UGO 1.14-15

guatagia, karo uanguangoul sikoro tun. Ingga ko guata uaiantiehe tunene daan. ²⁰^bBo reng puha teene re tokouasain totoguo: ingga ko uahue tar kuah, Jesabel gere kula katongoin pare, na propet God tar ualafir, kare uoum keip uasa tosnogo tamatang kalekina-
leo toro uraur, kara ein tar niein geke guata keipig tar uahung tasir god bohoboh. ²¹Inggo ku heir tatanono tar binaka mare uiuirin tonu uraur, bo inggono puk hik pah ke malar. ²²Temaait inggo u baka uapononguala tatanono tar uelmahingininer santiehe tun, karu guata tasisit ka guata tagu tatanono toro uraur, ra kale pono tar uleikir uelmahing e tuka gete uiuirisisin tenas niguataniner sa, ka guata taguig tatanon. ²³^cKaru turung uamat tas mais gera uakeluk tatanono mara turung ater tamatang lotu uakapa tun pare, inggo u ate uakapa tun teres ninamanasin, kare teres nimalarar tamata uakapa tun. Inggo u turung bulaua kahakaha tamiuoum, e matotompein tenami niguat. ²⁴Bo o gisiamhe tamiuoumur tamatang Taiataira, inggo u kula pare, totomuaeit ge ahik pah ko sanga uanono tena niualasirononiner sa, doh ahik pah ko ate uahiua tar niualasira gera kilaig pare, 'Na niate Satan ger ououu.' Inggo u kulangua pare, ahik pahu matot u heir me uleikir niduh tamiuoum. ²⁵^dKale uanono kompe tar haua kaein totomua e tuka getu lameo."

²⁶^e"Mai geke touahiua tar niguata uasa, kare guata tar nimalarar eiguo e tuka tar uadouhinar binak, inggo

u turung uahue tatanon, e kaueke uakapa tun toro mamang pang uanilik uakapa tun. ²⁷Inggon e turung kaueke keip tasisina toro bele sineir, kare turung mumumur tasisina misiana tar nouh, te misiana kompe tar nitampopokoho geku kale turio tang Tamoug. ²⁸^fInggo u turung heir pono tatanono tar pitopitong tar lulein ²⁹Mai ge kaein me talingan longoro tar haua re hireinir Iabene God toro buturung lotu."

O Mahar 3

Rone o la tasir toto tamatang lotu i Sadis

3 ^g"O bolobol o la tar anggelou tar buturung lotu i Sadis. Ginine tena ueluelhireono gere kale teil tar mouitir Iabenar nang God, kara mouitir pitopit."

"Inggo u ate tar niguatar noumua. Ingga ra uoto kulkulaia pare, a tua, bo ingga a mat. ²Tentur! Uakodkodoho tar haua re tua sikoro harah gere uahuhutung mat, ge inggo pe ku tupara tar niguatar noumua, ahik pah ko uakuakapa hihir tenang kalekinale tar matana God ger noguo. ³^hNamana tapokis tar haua ko kaleig, karo longoroig, uakeluk taninin, karo uapalih tenang niguataniner sa. Bo geta hikia paho tentur, karo guata tar puhonene, inggo u turung la sirame tar ueuenau, doh ingga hik paho turung ate tang hingiar binaka ru lameo totomua."

⁴ⁱ"I Sadis o papagalik puk manasamper tamatar delauana nas hikhiku. Gisina tera ueldokout keip totoguo ra hiku tar gaugauil, teeit

^b2:20 1To 16.31; 2To 9.22 ^c2:23 Ker 7.9; Jer 17.10; UGO 20.12-13

^d2:25 UGO 3.11 ^e2:26 Ker 2.8-9 ^f2:28 UGO 22.16 ^g3:1 UGO 1.4,16

^h3:3 Mat 24.43-44; 1Te 5.2; UGO 2.5; 16.15 ⁱ3:4 Jud 23

gisina ka uakeluk tereg nimalaro.
^{5j}Mai geke touahiua tar niguata uasa, inggon e turung misiana tasisin e hiku pono mo gaugauil. Inggo ahik pahu matotong dura liu tur tar hanganono toro bolobolong tua. Doh inggo u turung hire tauete tang Tamoug mesno anggelou pare, Inggon a noguo. Inggon e turung kalahara hangan i uoum tang Tamouguo mesno anggelou.
⁶Mai ge kaein me talingan, longoro tar haua re hireinir Iabene toro buturung lotu.”

Rone o la tasir toto tamatang lotu i Piladelpia

^{7k}“O bolobolo rone o la tar anggelou tar buturung lotu i Piladelpia. Ginine tena ueluelhireono ger dedeil, kara uauaman gere kale teil tena ki Debit. A haua geke pukaion ahik me tamata re matotong holor, doha haua geke holoroion ahik me tamata re matotong puk.”

^{8l}“Inggo u ate tar haua ko guatagia, doh inggo gine ku puka toro pirik ge haik me tamata re matotong holor. Karu ate pare, ingga a sisikinalik tun reng nitampopokoh, bo ko uakeluk uaia tun puk tar ualasarir nouguo, ahik pah ko uolih o tele totoguo. ^{9m}Inggo u turung guata me inete tas mais ra uangoul tena umang lotu Satan gera kula pare, o Ju, bo gisin ahik, gisin o bohoboh. Inggo u turung guata tasisina mara lame totomua, kara me kokolo uahiu i uoum toto-

mua, kara turung ate pare, inggo u malaelhir tun totomua.”

¹⁰ⁿ“Teeit ko sanga dede pe ingga tar ualatutur nouguo, karo uanguangoul sikor, inggo u uaudeilingua pono totomua tar binakang kedanga gere turung lame tar uanene i kot.
¹¹Ahik pahi reh, karu lameo. Kale uanono tar haua ka kale mana-sain, maeit ahik me tamata re turung kale tonongo keuara.[‡] ^{12o}Mai geke touahiua tar niguata uasa, inggo u turung guata tatanon, ngohina paho tur, o tur i uantinanina tena umang lotu God,[¶] kare turung uangoul dedengua. Inggo u turung bolola tatanono tar hangana nagu God, kara hanganar uan uleik ger nang God, ter timuhur Jerusalem geke la turuha i Heuen tar God ger nouguo. Doh inggo u turung bolo uahiuala tar timuhur hangoug tatanon. ¹³Mai ge kaein me talingan longoro tar haua re hireinir Iabene Dedeil toro buturung lotu.”

Rone o la tasir tamatang lotu i Laodisia

¹⁴“O bolobol o la tar anggelou tar buturung lotu i Laodisia. Ginine tena ueluelhire ro man ger uauaman, kare hire toro man, kare uatengkana tar mamang inetelik geke touoig God.”

^{15p}“Inggo u ate tar haua ko guatagia, inggo u ate ingga ahik paha molomol ue a uelsuk, inggo u malar, ingga paka molomol, kara uelsuk. Inggo u ate, ingga ahik paha pul ue a tagal, bo inggo u malara pare, ingga

[‡]3:11 keuar toro uelhireng inglis “crown.”

[¶]3:12 Na umang lotu God ue uamang lotu ger dedeil “Tempoul” a uelhire uarang pare, tar butur re uangoul dede tang God

^j3:5 KT 32.32-33; Mat 10.32; Luk 12.8

^m3:9 Ais 45.14; 49.23; 60.14; UGO 2.9

^o3:12 Ais 62.2; 65.15; UGO 14.1; 21.2

^k3:7 Ais 22.22 ^l3:8 1Ko 16.9

ⁿ3:10 Luk 21.19; 2Ti 2.12

^p3:15 Roum 12.11

pako uakeluk me siokor lele tar toking puh rasin. ¹⁶Temaeit inggo u abih liuingua totomuane tar uauoug, teeit ingga o uelsuk sikoro pukumpe ahik paha uelsuk ue a molomol. A lilio reng ninaman ahik paha siokon. ¹⁷Ingga o uoto kula katongoia pare, 'Inggo nang bureher inet, u matoto teil tun tar mamang inetelik, ahik pahu uahinga baka poluk me inet.' Bo ingga puk ahik paho bang paroko pare, ingga pe o katupa tun tar mamang inetelik, ahik meng niuldolom, a tiome, a kut, kara palapal. ¹⁸Inggo u kula uapopokohongua totomua pare, o bulaua turungua totoguo me goul ge ahik paha uelhouar, maeit ro tang mania, karo hiku mo gaugaul ro hikhiku maro uataraiia torongo mahang matal a palapala pe. Bulaua pono me marasin maro uamoka tar matoum maro banga uaia ingga. ¹⁹Inggo u uoto loulouar, karu ualatut uaia tun tas mais geru malauehleris. Temaeit ingga o uapalih tun tenang niguataniner sa toro man."

²⁰"Bang inggo gine ru kokolo tur toro pirik. Ge me tamata re longoro tar uauouguo, kare puka toro pirik, inggo u turung lek, karu ein tagu tatanon, kare ein taguono totoguo. ²¹Mai geke touahiua tar niguata uasa, inggo u uahue tatanono tar me tabila keip totoguo tonogo tabtabila gero nasir toia. Te misiana to-

toguo ku guata uoum, karu touahiua tar niguata uasa, karu tabila keip tang Tamoug tono tabtabilang toia. ²²Mai ge kaein me talingan longoro tar haua re hireinir Iabene Dedeil toro lotu."

O Mahar 4

O tabtabila gero nanar tamata uleik i Heuen

4^u muduhia tar ineteninanine inggo ku banga toro pirik i Heuen o takapuk. Doha uau geku longoro baka uoumio gere kaling sira toro tuil, ke mene poluk pare, "Kaeitiehane maru turung ualasira totomua tar haua re turung pokosolaeit i uoum." ²Ahik me manasan, kare hikur Iabene Dedeil totoguo, doh gane i uoum totoguo, o toko ro tabtabila gero nasir toia, e tabila teilir tang siokor tamat. ³A tukununar tamatonene re tabil e abeaba sira toro mahar jaspa,[§] karo mahar konilian.** Doho bato ko uiloho toro tabtabila roon o bukbukir sira toro mahar emiral.^{††} ⁴Doh toro tabtabila roono rone ro nasir toia e toko uiloho ponor giniamah. A torikir hangaul, karo toueit, ra tabila teilir mamahoholik, gisina ra hiku teil tar gaugaulir hikhiku, kare nas keuar a nituha keip tar goul e moko tar lusion. ⁵Toro tabtabila gero tok i uantinanina gero nasir toia e balbala turur kanau, kare pilar pil. Dohi uoum tang roon e mokor mouitir luh, a luhuntiehe tun. Ginina ter mouitir Iabenar nang God.

§4:3 "jaspa," a palau a matia, karo abeab, karo bukbukir

**4:3 "konilian," a palau a pon, karo abeab, karo matia, karo kubkubar

††4:3 "emiral," a palaua ngohina pah ro galas a matia, karo abeabantiehe tun, karo bukbukir

q3:17 Luk 12.21; 1Ko 4.8 †3:18 Ais 55.1

s3:19 1Ko 11.32; Hib 12.6; UGO 2.5 †3:20 Jon 14.23 u4:1 UGO 1.1,10

v4:2 Ais 6.1 w4:3 Isk 1.28 x4:4 UGO 3.18

y4:5 Isk 1.13; Sek 4.2; UGO 1.4; 8.5; 11.19; 16.18

^{6z}Dohi uoum toro tabtabila roon a mamedelaua uaia tun misiana tar laur.

Gane i uoum uiloho toro tabtabil roon kaeis o toueitir inet o tua, doh tar tukunus uakapa tunusin e moko uiloho uakapar matas i uoum dohi mud. ⁷A uakikilanganar inetesinasiner tua ngohinar laion, ^{3z} a uatorikin ngohinar kau, a uatouonon a porenon ngohinar tamat, a uatoueitin ngohinar manulab. ⁸^aDoh tasisinar toueitir inetesinasiner tua a tonomo uakapar titiauas, kare uoun uiloho uakapar matana taninin gane ponompe i kotohia tar pang titiauasisin. Tar mamang mareinilik, kara mamang boungulik, gisin ahik pah ra pepe uaha tar kula pare,

“A Dedeil, A Dedeil, A Dedeilir Tamata Noman, God ger i ranantiehe tun, gere uangoulung sioun, doh gine daan, kare turung lame.”

⁹Tar mamang binakalik o inetesinasiner tua ra uinatoro, kara uatakai, kara heir tar niuaha tatanonoene re tabila toro tabtabila gero nasir toia gere uangoul, kara tua tar mamang binakalik. ¹⁰^bA torikir hangaul, kara tang toueitir mamahoholik ra me uoto hatup uahiu i uoum tatanonene re tabila tono tabtabilar toia, kara lotu tatanonener tua tar mamang binakalik. Gisina ra uamoko tenas keuar i uoum toro tabtabila gero nasir toia, kara kula pare,

¹¹“Ingga a i ranantiehe tun, nami Tamata Nomaneim, kare nami God tar kale tar uinator, kara uatakai, kara nitampopokoh. Ge ingga pe ko tuha tar mamang inetelik, doh tar nimalarar eimua ginina ka tuhaig, ginine re moko daan a tua.”

O Mahar 5

A Tunar Sipsip e puka toro bolobol gero nihaila tane

5 ^cSong ku banga polukuo tar pang mua tatanonene re tabila toro tabtabila ro nasir toia, o moko ro bolobol o nibol i uoum dohi mud, a mouitir butur ka haila tane pein. ² Song ku banga polukuo tar anggelou uelpipih tun ke kula ualeikintiehe tun pare, “Mair uantiehe tun re matot e peis tar butur nihaila tane, kare puka toro bolobol?”

³I Heuen ue gane i kot ue i lolono tar kot ahik me tang sioko re matotong puka toro bolobol ue e bang i lolono tang roon.

⁴Inggo ku kiringintiehe tun, karu mahmahang buk, teeit ahik pe me tang sioko ka tuparain re matotong puka toro bolobol, kare bang i lolono tang roon.

⁵^dSong, a tang siokor mamahoholik ke kula pare totoguo, “Ahik paho kirkiringintiehe! Bang, a laion a peng toro matina tasir Ju, a bubunguna Debit, inggono ke pehuara tena uelmatan tere matotong peis tar mouitir butur ger nihaila tane uapopokoho tun, kare puka tang roon.”

⁶eSong ku banga polukuo tar Tunar Sipsip gera banga sirain paha nitung pous e tur i uoum toro tabtabila gero nasir toia, kara tur uilohor toueitir inete gesir tua tatanon, karo mamahoholik. Inggonor Sipsip no mouit ro seir, kara mouitir matan, ginina ter mouitir iabene ke heirihais God tar pang uanene i kot. ⁷A Tunar Sipsip ke lame, kare me kale tur tar pang mua toro bolobolo tang gere tabila tono tabtabilar toia. ⁸^fBinaka ke kaleon, a toueitir inete gesir tua,

^{3z}4:7 “laion,” a inete ngohina paha kusi, bo uleikintiehe tun

^z4:6 Isk 1.5-10,22; 10.14 ^a4:8 Ais 6.2-3; Isk 1.18; 10.12 ^b4:10 UGO 19.4

^c5:1 Ais 29.11; Isk 2.9-10 ^d5:5 Uak 49.9; Ais 11.1,10; UGO 22.16

^e5:6 Sek 4.10; Jon 1.36; UGO 13.8 ^f5:8 Ker 141.2; UGO 8.3-4

kara torikir hangaul, doha tang toueitir mamahoholik ka siokor punga uahiu i uoum tar Tunar Sipsip. Gisina uakapa tun ra siokor uoho teil tenas gita, kara kale teil tar nouh a nituha tar goul a uoum tar adua.[¶] Gininar diku e uamuhiua tenas lotur tamata gesir nang God.

⁹¶Gisina ka kere toro timuh ro kerekere rone.

“Ingga tero matoto tun tar kale toro bolobol,

karo peis tar butur geka haila tane uapopokohoin.

Teeit ingga ka tung pouuia, doh tar deuatingimua, ingga ko bulaua tasir tamat o nang God tur toro mamang matinalik,

doh toro mamang uelhirelik menia mamang tamatalik, kare toro mamang pang uanilik.

¹⁰hIngga ko uatoia, karo uapatere tasisina mara kalekinalesina tenagi Godeig,

kara turung uoum keipane i koto uakapa tun.”

¹¹iSong ku banga polukuo, karu longorongua tar uauasir anggelou, o burehentiehe tun ahik pah ra matotong ahais, gisina ka tur uiloho toro tabtabila gero nasir toia, karo inete gesir tua, karo mamahoholik. ¹²Gisina ka siokor kere ualeikintiehe tun pare,

“A Tunar Sipsip geka tung pousin, inggono tere matoto teil tun tar kale me nitampopokoh,

kare matoto teil tar mamang inetelik, kare tar niate uaia tun,

kara tampopokoh, ra ueltadain a matmata hamas tun,

kara uatakaiaian!”

¹³Song ku longoro polukuo tasir mamang inetelik i Heuen, doh gane i kot, kari lolono tar kot, dohi laur, kara haua gere moko taninin ka siokor kere pare, “Tatanonene re tabila toro tabtabila ro nasir toia,

kare tar Tunar Sipsip.

Siokor uatakai, kari ueltad, kari umatmata hamas tun,

kara nitampopokoho tar mamang binakalik,

kare la dedenguampela.”

¹⁴Doh gisisir ineter tua ka siokor kula pare, “O mana tun!”[!] Karo mamahoholik ka siokor hatup uahiu i kot, kara lotu.

O Mahar 6

A mouitir butur nihaila tane

6^jInggo ku banga tun tar binaka ke peisir Tunar Sipsip tar uakikilangannar butur ger mouitir nihaila tane, karu longoro tar tang sioko tasir toueitir inete gesir tua ke kaling ualeik pe, e kaling sira re kaling per pil, ke kula pare, “Lame!”²kKaru banganguao tar hos a gauil, gane i uoum totoguo, doh gine re ualo teil tatanon e kale teil tena lean karkin, inggono ka uatokolain ro keuar toro lun. Inggono ke tur uakalahar ke pehuara pe tar uiliatung, kare pehuara dedempe tar mamang uiliatungulik.

³Tar binaka ke peisir Tunar Sipsip tar uatorikinar butur nihaila tane, inggo ku longoro tar uatorikinar inete tasisitir tua ke kula ualeik pare, “Lame!”⁴Song ke taueter uatorikinar hos, inggon a kubar. Gine re ualo teil tatanon, ka heirin tar nitampopokoho tar kale liu tar uahiarouo tasir tamata uakap, gane i kot, kare guata tasir tamata ra ueluelitung pous ka-

[¶]5:8 “insens,” a bultan ue adua toro douk, ra kilain, “o frankinsense.”

⁸5:9 Ker 33.3; 40.3; 96.1; 98.1 ^h5:10 KT 19.6; Ais 61.6; UGO 1.6; 20.6

ⁱ5:11 Dan 7.10; Hib 12.22 ^j6:1 UGO 4.6; 5.1 ^k6:2 Sek 1.8; 6.1-6

tongois. Inggono ka heirin toro uleik ro baenat.

⁵Tar binaka ke peisonor Sipsip tar uatouononor butur nihaila tane, inggo ku longoro tar uatouononor inete gesir tua ke kula pare, “Lame!” Karu banganguao, gane i uoum toguo tar hos a kurum. Gine re ualo teil tatanon e kaba teil tar sikeil. ⁶Doh inggo ku longoro tar kaling ualeik misiana paha uau, i uantinana tar toueitir inetesisir tua, e kula pare, “A sikir raes-uit e lain tar bulauanar siokor marein, kara sikir bali-raes e lain tar bulauanar siokor marein. Ahik paho mantou tar uaiuai mer bino!”

⁷Tar binaka ke peisir Tunar Sipsip tar uatoueitinar butur nihaila tane, inggo ku longoro tar uauanar uatoueitinar inete gesir tua ke kula pare, “Lame!” ⁸Karu banganguao tar hos a madaiar tukunun! Doh gine re ualo teil tatanon a hangana tang mat. Doh nas uanir mat, e uakuakeluk uahuhut teil manasa tatanon. Gisina ka heiris tar nitampopokoho tar tung pous mo toueit ro mahar tasir tamata karo moko mo mahar touono gane i kot, doh tar tung pous keip toro baenat, tar gog, toro uelmata, doh tasir inete gesir roke.

⁹Tar binaka ke peisono tar uatolimannar butur nihaila tane, inggo ku banga tola i kukulebanga toro olta tar labeisistitir nitung pous, teeit ka tur keip pe tono uelhire God, kara uakeluk uaia tun tar haua ka tur keipin. ¹⁰Gisinar iabene ka siokor kula ualeik tun pare, “Tamata Noman ger i ranantiehe tun, ingga a Dedeil, karo man, mangiha ro lula tasir tamatang gane i kot geka uatading tar deuatingimieim?” ¹¹^mSong ka heir kahakahaisisina tar gaugauilir hikhiku a

baraha uatuk i kot, kara hireis tar uanogoul sikoro baka me sikin e tuka geta aha uakapaisir tamatang kalekinale, karo uanotous gera turung tung pousis ngohina ka tung pous uoum pesieim.

¹²ⁿInggo ku uakeis uanono tar binaka ke peisono tar uatonomonor butur nihaila tane. Binakon ke nunur nun a uleikintiehe tun. Doha pisar ke kurukurum misiana tar kitup. Doha bialok, ke kubkubara uakapa sira tar deuating. ¹³^oO pitopit i rana tar langit ka siokor dud uahiu i kot misiana tar kukuannar douk ger murak geke pung i kot tar binaka re uagunar pang rom. ¹⁴^pA langit ke kauiur misiana toro bolobol geka ligun uilohoin, doho siusan, karo toro tor ka uain liuig tar butur re tok. ¹⁵^qDoho toiang tar koto uakapa tun, karo tamatang kaueke toro pang uan uleik, karo tamata gesir i ranantiehe tun, karo ualualatouk, kare mais nas bureher mamang inetelik, karo karabus, karo tamata gera kaueke katongois, gisina ra siokor tokouaou i lolono tar lebang, kari uantinana tar mahar tulauanar siusan. ¹⁶^rGisina ra kilkila tar siusana mer mahar tulaua pare, “Pungaha tamiueim, karo uaouo tamiueim tar mataneit re tabila tono tabtabilar toia, kare tena nimalianar Tunar Sipsip! ¹⁷^sGe a marein uleik pe geura nimaliana to rasina ke pokoso manas. Bo mai puk re matotong udeil?”

O Mahar 7

144 taoseinir tamata ka uanasais

7 ^tI muduhia tanininanine, song ku bango tar tang toueitir angelou ra tur toro toueit ro gon tar pang uanene i

^l6:8 Jer 15.1-3; Isk 5.12,17; 14.21 ^m6:11 UGO 7.9,13; 19.14

ⁿ6:12 Mat 24.29; Apo 2.20; UGO 8.12; 11.13; 16.18 ^o6:13 Ais 34.4

^p6:14 UGO 16.20 ^q6:15 Ais 2.10,19,21 ^r6:16 Luk 23.30

^s6:17 Jol 2.11; Mal 3.2 ^t7:1 Jer 49.36; Dan 7.2

kot, gisina ra turtur tane tar toueitir rom gane i kot gete ume i rana tar uanene i kot ue i rana tar laur ue i rana tang hingampe ro douk.

²Song ku banga polukuo tar tang giameher angelou e la turuha tar butur re hara turuhar pisar. Inggon e kale teil tar inete gere uaanasa tasir tamat gesir nanar God ger tua. Inggono ke kula ualeikintiehe tun tasir tang toueitir angelou geka heiris tar nitampopokoho tar uauelmahing gane i kot, doh gane i laur.

^{3u}“Ahik pah mung uauelmahing tar uanene i kot ue i laur ue tar douk e matoto geting uaanasa bakeim tar pores no tamatang kalekinale nami God.”

^{4v}Song ku longoro tunuo a tang touiha tun ka bubunis. O tamatang toro mamang matinalik gera la tur i Israel a 144 taosein.

⁵Toro matina tang Juda, a 12 taosein ka uaanasais.

Toro matina tang Ruben, a 12 taosein.

Toro matina tang Gad, a 12 taosein.

⁶Toro matina tang Aser, a 12 taosein.

Toro matina tang Naptali, a 12 taosein.

Toro matina tang Manase, a 12 taosein.

⁷Toro matina tang Simion, a 12 taosein.

Toro matina tang Libai, a 12 taosein.

Toro matina tang Isakar, a 12 taosein.

⁸Toro matina tang Sebulun, a 12 taosein.

Toro matina tang Josep, a 12 taosein.

Toro matina tang Benjamin, a 12 taosein.

O burehentieh tunur tamata ra hiku teil tar hikhiku gaugauil e baraha uatuk i kot

⁹I muduhia tanininanine, inggo ku banga poluk gane i uoum totoug, o burehentiehe tunur tamat ahik me tamata

re matotong ah, ra la tur toro mamang pang uanilik, kare toro mamang matinalik, karo mamang tamatalik, kare tar mamang uelhirelik. Gisina uakapa tun ra tur i uoum tono tabtabilar toia, dohi uoum tar Tunar Sipsip. Gisina ra hiku teil uakapa tun tar hikhiku gaugauil a baraha uatuk i kot, kara kale teil tar rang kuen. ^{10w}Doh gisina ra kulkula ualeikintiehe tun pare, “A niuaudeil e la tur tang God ger nagigeig gere tabila tono tabtabilang toia, doh tar Tunar Sipsip”.

¹¹Doho angelou uakapa tun gera tur uiloho toro tabtabilar toia, kare tasir mamahoholik, kare tar toueitir inete gesir tua. Gisina ka siokor baka uahuais, kara kokolo uahiu, kara uatakai tang God, ^{12x}kara kula pare, “O mana tun! A niuataakai, kara nitampopokoh, kara ninamana ger i ranantiehe tun,

kara niueltad, kara niuelpipih, kara nitampopokoho uakapa tun e la tur tang God ger nagigeig gere uangoul dede tar mamang binakalik, o mana tun!”

¹³Song ke dangatar tang siokor mamahoholik totoguo pare, “Maisir tasisinasine nas hikhiku gaugauil ger barah pare? Ia ra la turusin?”

^{14y}Doh inggo ku hire tapokis pare, “Tamata Uleik, ingga o ate.”

Kare hireono pare, “Gisinasine te geka la tur tar niduh uleikintiehe tun, kara kale tar uelmahing ger uleikintiehe tun. Gisina ka uabusa uadelauana tenas hikhiku, kara uaugauil keip taninina tar deuatinginar Tunar Sipsip. ¹⁵Temaeit gisina ra siokor tur i uoum tono tabtabila God ger toia, kara kalekinale tatanono tar marein, doh tar boung tena umang lotuono ger dedeil. Doh inggonene re tabila toro tabtabilar

^u7:3 Isk 9.4,6; UGO 9.4 ^v7:4 UGO 14.1,3 ^w7:10 UGO 5.6-7

^x7:12 UGO 5.12 ^y7:14 Dan 12.1; Mat 24.21

toia e turung uangoul tagu tasisin, kare kauেকে tasisin, kare biana uauleik uain tena uma mare matoto tasisina uakap. ^{16z}Gisin ahik pah ra matotong gogo uapoul poluk, doh ahik pah ra matotong kamadaka uapoul poluk. A pisar ahik pahe matotong uauelmahing baka poluk tasisin. Ahik baka poluk me butur re kaukauele tar tukunusisin. ^{17a}Ge a Tunar Sipsip pe gere tur i uoum tono tabilar toia, inggono tenas tang kauেকেসিন. Inggono e turung uoum keip tasisina tar uatauete tar kodomo ger tua. Doh God e turung uamamahoul, kare tunaha liu tar kirkirininar matasisin.”

O Mahar 8

A uamouitinar butur nihaila tane

8 Tar binaka ke peisono tar uamouitinar butur nihaila tane i Heuen ke maligomo sikoro baka tar sikin. ²Doh inggo ku banga tar mouitir angelou ra tur pe i uoum tang God, kara heiris toro mouit ro tuil.

^{3b}A tang giameher angelou gere kale teil tar nouh ger nituha keip tar goul gera uoto ualuh tolaigir adua ke lame, kare me tur toro oltang uahung. Inggono ka heirin tar bureher aduang uahung menia tenas lotur tamatar nang God toro oltang uahung ger nituha keip tar goul i uoum tono tabtabilar toia. ⁴O diku nar adua menia tenas lotur tamatar nang God ke la kai tur tar limanar angelou ke la i rana tang God. ^{5c}Song ke kaler angelou tar nouh gera uoto ualuh tolai-gir adua, kare ongoko toro hue i lolono ra kale turin tar oltang uahung, kare baka uaduduntiehe tun tang roono tar uanene i kot, kare pila uareireihinguar

pil, kare kankanauar kanau, kare nunur nun.

A tuil

⁶Doh gisitir mouitir angelou gera kale teil tar tuil, ka kaleuato ro tanika manasa tar u taninin.

^{7d}A uakikilanganar angelou ke u tono tuil, kare punga uahiuanguar mahar ais popokoho misianar palau, doha hue ke uelhouara tar deuating ka baka uahiuahaig tar uanene i kot. O touono ro mahar tar uanene i kot ke luh uakap, doho touono ro mahar tar douk, kara mamang garasalik uakapa tununiner bukbukir ke siokor luh uakapa tun.

⁸A uatang torikinar angelou ke u tono tuil, doha inet misiana paha tinanar siusana ke luh, kara bakain i laur. O sioko ro mahara tar laur ke uapalih tar deuating, karo mahar torik kura udeil, ⁹a siokono ponompe tasir inete gesir tua gara uangoul i laur ka mata pe, kara siokono ponompe toro parau geke mamantouoig.

¹⁰A uatang touononar angelou ke u tono tuil, doha pitopit a uleikintieh, kara luhuntiehe tun ke dud turuha tar langit i lolonongua toro mahar sioko tar kodomo gere ualo turuha toro siusan, kaura udeil ro mahar torik, kare toro kodomo gere uana tauete tur i lolono tar kot. ^{11e}A pitopiton a hangana tang douk uelbarang. O sioko ro mahar tar kodomonin ke uelbarang, karo mahar torik ahik tagu, karo bureher tamata ka mata to toro kodomo geke uelbarang.

^{12f}A uatoueitinar angelou ke u tono tuil, o sioko ro mahar tar pisar ka haluhin, kara siokono pono pe tar bialok, kara siokono ponompe tasir pito-

⁷7:16 Ais 49.10 ^a7:17 Ker 23.2; Ais 25.8; UGO 21.4

^b8:3 KT 30.1-3; UGO 5.8 ^c8:5 KT 19.16-19; NKP 16.12; UGO 11.19; 16.18

^d8:7 KT 9.23-26; Isk 38.22; Jol 2.30 ^e8:11 Jer 9.15

^f8:12 Isk 32.7; UGO 6.12-13

pit, maeit o sioko ro mahara taninina uakapa tun e kitup, kaura udeil ro mahar torik taninina uakap. Karo sioko ro mahar tar marein ahik me luh, karo sioko ro mahar tar boung, karo mahar torik ura udeil.

^{13g}Gine ru banga peo, inggo ku banga tar pasukadau e lululuh teilanah i rana tar uantinaninar hagarin, e kulkula ualeik teil pare, “U ueldolom! U ueldolom! U ueldolomo tun tamiuoumur tamatang gane i kot, ge a tang touono per angelou ra turung u ualeikintiehe tun tenas tuil!”

O Mahar 9

A uatang tolimanar angelou ke u tono tuil

^{9h}Tar binaka ke u uakalingir uatang tolimanar angelou tono tuil, karu banganguao tar pitopit e tokane i kot ke punga turuha tar langit. Inggonor pitopit ka heirin tar ki nar butur a i lolonontiehe tun. ²ⁱBinaka ke pukono tar buturuonener tungununtiehe tun, o diku ko totongung kai tur tar buturuon misiana toro diku na ro hue uleik. Roono ro diku ko uakitupungua tar pisar, doh tar langit.

³Doho kakaring ka tauete tur pono toro diku roon, kara uoungua tar pang uanene i kot, gisina ka heiris tar nitampopokoho misiana tasir hilang. ^{4j}Gisina ka hireis, haik pah ra uuelmahing tar garas ue mo douk tar uanene i kot, bo ra uuelmahing kompe tas mais ge ahik pah ka uamoko tagu tena bubun God tar pores. ⁵Gisin ahik pah ka heiris tar nitampopokoho tar tung pous tasisin, bo ra uuelmahing kompe tasisina me tolimar bialok. Doha uelmahingonene ra tu-

rung kaleinisin a uelpisir tun. ^{6k}Doh tar marein nilaninanine o tamata ra turung sir toro mat, bo ahik puk pah ra matotong ueltupara tang roon, gisina ra malara ra mat. Bo roono puk ro mat o turung uasuasiaua tasisin.

^{7l}O kakaring misiana tasir hos gera kaleuatoro tanikais tar uiliatung. Gisina ra uamoko teil tar lus tar keuar a nituha keip tar goul, doha lususin misiana ro lunar tamat. ^{8m}A ulusisin a barah, kara sikoi, doha liuoususin misianar liuousur laion. ⁹ⁿGisina nas uatar a haen e moko tar tukunus. Doha kalkalinginar pang titiauasisin misiana geta roumer hos menia tar karis tar lang uelkoi. ¹⁰Gisin o touihis, karo touelhungus misianar hilang, doh tar uihisisin e mokor nitampopokoho tar heir tar uleikir uelmahing tasir tamata tar tolimir bialok. ¹¹Gisina nas toia e kaueke uakapa tasisin, Inggono ter angeloung tar tung ger uailolon. A hanganonor toia toro uelhiring Hibru te Abadon, doh toro uelhiring Grik inggono ra kilain tang Apolion.

¹²A uakikilanganar niueldolom ke la uoum, kara torik harahar niueldolom ura la harahame.

A uatonomonor angelou ke u tono tuil

¹³A uatang tonomonor angelou ke u tono tuil, karu longoronguaou tar uau ke tauete tur toro toueit ro seir gere moko toro oltang uahung gero nituha tar goul o tok i uoum tang God. ¹⁴Inggonor uau ke kula tar uatonomonor angelou geke u tono tuil pare, “Uatauete tar tang toueitir angelou geke kale uelmahing to tar kodomo uleik, gero moko ro reih i Upretis.” ¹⁵Doh gisinar tang toueitir

⁸8:13 UGO 9.12; 11.14 ^h9:1 UGO 20.1

ⁱ9:2 Uak 19.28; KT 10.12-15; Jol 2.2,10 ^j9:4 UGO 7.3

^k9:6 Job 3.21; Jer 8.3 ^l9:7 Jol 2.4 ^m9:8 Jol 1.6 ⁿ9:9 Jol 2.5

angelou ka uataueteis, kara uinatoro tanik uaia tun tang hingiar binak, kara marein, kara bialok, kare hingia ro kris-mas ka uamaluanais tar tung pous toro sioko ro mahar tasir tamata tar uanene i kot, karo udeil mo mahar torik. ¹⁶O tamatang uiliatung ra tabila tanik tonoso hos ra matoto tar 200ir milion. Inngo ku longoro ka aha peisisin.

¹⁷O hos, karo tamata gera ualo teil, inngo ku borboriana tasisina ra baka sira pare, nas hikhikung uatarasin a kubarantiehe tun, kara bubulumuntiehe tun, kara iauiauel. A lusur hos misianar lusur laion. Doh tar uauasir hos e tautauete turur hue, kara diku, kara palau gera kilaig a salpa.^{§§} ¹⁸O manaiar tamata ge ka uamatotoisane i koto ka mata tar touonor inete rasiner uelsuk, o hue, o diku, kara palau gera kilaig a salpa gere tautauete tur tar uauasir hos. ¹⁹A nitampopokoho tasir hos e moko tar uauas, kare tar uihis. Ge a uihis pesin misianar soi e moko teilir lun tero heir tar uelmahing tasir tamat.

²⁰O bureher tamat ge ahik pah ka mata tagu, ahik dedempe pah ke uiuiris tar haua ka tuhaig tar limas. Gisin ahik pah ka uanua tar lotu tasir liouana uasa, doh tasir god bohoboh ger nituha keip tar goul, a silva, a bron a palau, kare gesir nipuruh tar douk, ge gisina per godosin ahik pah ra matotong bang ue ra longor ue ra la. ²¹Doh gisinar tamat ahik pono pah ke uiuiris toroso tang uelpus, kara bilih, kare toro uraur, kare toroso ueuenau.

O Mahar 10

A angelou, doh no bolobolo God gero sasalik

10 Song ku banga polukuo tar tang giameher angelou ger tampopokohontiehe tun e hiua turuha i Heuen. Inngon e loho teil toro mahar langit, karo bato i ranahia toro lunon, o lunono misianar pisar, kara toking kekenon misiana toro tur geko ngangaua toro hue. ²Inngonor angelou e kale teil tono bolobolo God gero sasalik o niual o pon i rana tar limanon. Inngono ke uatur tar kekena ger pang mua i laur, kara pang kais i mok, ³kare kula ualeikintiehe tun misiana gete kaling ualeikir laion. Tar binaka ke kula ualeikon a uauasir mouitir pil ka men.

⁴Doh gitie ka mene per mouitir pil, inngo ku marang bolo uahiuu manas. Bo ku longoro puk tar uau e mene turuha i Heuen e kula pare, “Ateng paheim puk mnasampe tar haua ka meneigir mouitir pil, doh ahik paho bolo uahiu!”

⁵Doh angelou geku bangaio gere tur i laur, kari mok, ke hue kaiatig tar limana ger pang mua i Heuen. ⁶Inngono ke la ualapagaha tang ger tua dede tar mamang binakalik geke tou i Heuen, kara haua gere mok i Heuen, dohi kot, kara haua gere mok tar uanene i kot, kari laur, kara haua gere mok i laur. Inngono ke kula pare, “Ahik baka poluk me uapekout! ⁷Bo tar mareinlananine tar binaka re u uakalingir uamouitinar angelou tono tuil na inete God ger ouou e kalahara uakap misiana ke hire peono tosono tamatang kalekinale gesir propet.”

§§9:17 “salpa,” a palau a iauiauelentiehe tun o mok tar butur uelsuk

°9:20 Ker 115.4-7; 135.15-18; Dan 5.23; UGO 16.9,11 P10:4 Dan 12.4,9

°10:5 Ual 32.40; Dan 12.7 r10:7 Amo 3.7

⁸Song ke mene uagiamehe tur polukuhar uau i Heuen totoguo geku longoro baka uoumio pare, “La karo kale toro bolobol gero niual o pono tar limanar anggelou gere tur i laur, kari mok.”

⁹^sTemaait ku la uelhiro tar anggelou, karu dangata tatanono tar heir totoguo tono bolobolo God gero kit. Doh inggono ke kulangua totoguo pare, “Kale tang roon, karo ein. Roon o turung uauelteke toro baloumua, bo a uauoumua puk e turung lingiain ge roono pe misiana toro to.”¹⁰ Inggo ku kale tur tono bolobolo God gero kit tar limanar anggelou, karu ein tang roon. Inggo ke lingiantiehe tunumpeinir uauoug tang roon, bo tar binaka puk ku konomo manasa peo tang roon, o balouguo ko ueltekein. ¹¹Song ka hireio pare, “Ingga o hire tauete uapoul poluk tar haua re turung pokos i uoum, hire mo bureher tamat, kare toro mamang pang uanilik, kare toro mamang uelhirelik, kare tasir toia uakapa tun.”

O Mahar 11

A tang torik ura tur keip

11 ¹Inggo ka heirio toro uoh ra uoto paramain tar inete ue a butur, kara hireio pare, “Tentur karo la parama tena umang lotu God ger dedeil, karo oltang uahung, karo aha tasir tamatang lotu ge kaeis. ²^uBo i morenehia, ingga o hiliu, ahik paho parama tagu, teeit a buturuono ka heirin tasir gime uan. Gisina ra turung uiloh, kara bilinggala ueltebeir tar uan uleik ger dedeil tar toueitir hangaul, kara torikir bialok. ³Doh inggo u turung heir tar nitampopokoho tenag

tang torikir tang tur keip rasin ura hire tauete tono uehire God tar siokor taosein, kara 260ir marein tar haua re turung pokosolaieit i uoum, rasin ura loho teil tar gomonong ueldolom.”

⁴^vRasina tero torik ro oliv, karo torik ro toktokono ro lam e tur i uoum tar Tamata Nomanang tar uanene i kot. ⁵^wGe me tang sioko re uedanga tar uauelmahing tasrasin o hue o la tur tar uauas rasin, karo mamantouo tosnosira uelmatana rasin. Ter siokono kompe hape re turung mata pe me tamata gere marang uauelmahing tasrasin. ⁶^xRasin ura kale teil tar nitampopokoho tar uapisar, maeit ahikono pahe matotong huana tar binak ura hirhire uoum teil rasin. Rasina ura kale teil pono tar nitampopokoho tar uapalih tar laur mare deuating. Doh tar mamantouo tar pang uanene i koto tang hingiamper ro mata uasa, ura malarain.

⁷^yTar binak ura uakapa rasina tenasira ueluelhire a inete ger roke gere turung tauete turuha tar butur ger uailolontiehe tun, e me turung uelkoi keip tasrasin, kare turung pehuar, kare tung pous tasrasin. ⁸^zDoha tukunus rasin e turung rikin tar lele tar uan ger uleikintiehe tun geka uakuseinir Tamata Nomanana tar korose gera uamuamisiana tolain i Sodom ue i Isip. ⁹Tar touonor marein, kara puh o mamang tamatalik, karo mamang matinalik, karo mamang uelhirelik, karo mamang pang uanilik uakapa tun ra turung bangang duk, kompe tar tukunus rasin, kara de mata keu uatoro tar tukunus rasin. ¹⁰O tamata uakapa tunane i kot ra turung uaha tar tang torik rasin, kura mata pe. Gisina ra turung ualauah, kara ueluelbulie ka-

*10:9 “hani,” a teisir lang, a lingiantiehe tun

^s10:9 Isk 2.8–3.3 ^t11:1 Isk 40.3; Sek 2.1-2 ^u11:2 Luk 21.24; UGO 13.5

^v11:4 Sek 4.3,11-14 ^w11:5 2Sa 22.9; Ker 97.3 ^x11:6 KT 7.17-20; 1Sa 4.8; 1To 17.1 ^y11:7 Dan 7.21; UGO 12.17; 13.7; 17.8 ^z11:8 Luk 13.34

tongois tenas inet. Teeit rasinar toking propet kura heir tun tar uelmahing tasir tamatang gane i kot.

^{11a}Bo i muduhia puk ke karuh baka per touon, kara puhur marein a romong nitua ke me hiku tasrasin, e la tur tang God, rasina kura tur kai, doh mais ka banga tasrasina ka sokoro uasa tun. ^{12b}Song ka longorosina tar uau e kula ualeikintiehe turuha i Heuen tasrasina pare, “La kaiahane!” Rasina kura la kai keip toro mahar langit i Heuen, binaka ra banga nosira uelmatan.

^{13c}Ahik me manasan tar binakon ke nunur nun a uleikintiehe tun, ke mamentouongua toro sioko ro mahar, karo mahar lusio teko udeil tar uan uleikon. A mouitir taoseinir tamata ka mata tar nun. O gisiameme geke tua ka sokorontiehe tun, kara uatakai tar God gere uan-goul i Heuen.

^{14d}A uatorikinar niueldolomo ke la uoum, a uatouononor niueldolom e uahutung pokos.

O uamouitina ro tuil

^{15e}A uamouitinar anggelou ke u tono tuil, doha uau e kula ualeikintiehe turuha i Heuen pare, “A nitoiang gane i koto uakapa tun e moko manasa tar nikauekeng tenagi Tamata Nomaneig, kare tena nikaueke na Kriston, kare turung kaueke dedengua tar mamang binakalik.”

¹⁶Doh gisisir torikir hangaul, kara tang toueitir mamahoholik gera tabila tenas tabtabila uleik i uoum tang God ka siokor hatup uahiu, kara lotu tang God.

¹⁷Gisina ka lotu pare,

“Inggeim mi heir tun tar niuaha toto-muar Tamata Noman, a God ger tampopokoho tun gero uan-goulung sioun, karo uangoulene daan.

Teeit ingga ko kale keip tereng uleikir nitampopokoh, karo uakekene manasa tar kauekane i kot.

^{18f}O mamang pang uanilik ka nimalian. Bo reng nimaliana pukua gere la dede gine pono re lame. Doha binakang kedanga tasir mat ke pokoso manas, kare tar bulaua tapokis tosnongo tamatang kalekinale o propet, kare nongo tamat, kare mais ka ueltada tar hangoumua, hingiamper tamata ger tohangan ue ahik.

Doh tar mamantouo tas mais gesir mamantouane i kot.”

^{19g}Na umang lotu God ger dedeil i Heuen ke takapuk, doha bokisinginar uelhote ka keip uasoloin ium, kare kanauar kanau, kare pilar pil, kare nunur nun, kare duduhar mahar ais ger popokoho sira tar palau.

O Mahar 12

A kuah mer soi uleik†

12 A uleik tunur uaparok ke pokos i Heuen, a kuah e loho teil tar pisar, kara bialok i kukulebanga tar kekenon, karo keuar o toko toro lunon e moko teilir hangaul, kara torikir pitopit. ^{2h}Inggon a balakos, kare homala uasa tun tar uelmahing re hagouo manasa pe.

³ⁱSong ke pokoso polukur gameher uaparok i Heuen. Inggono ter soi a

†12:0 “dregon,” soi uleikintiehe tun a uelhire uarang tang Satan

^a11:11 Isk 37.5,10 ^b11:12 2To 2.11 ^c11:13 UGO 6.12; 16.18

^d11:14 UGO 9.12 ^e11:15 KT 15.18; Ker 10.16; Dan 2.44; 7.14

^f11:18 Ker 110.5; 115.13; Roum 2.5; UGO 20.11-13

^g11:19 Hib 9.4; UGO 8.5; 15.5; 16.21 ^h12:2 Mai 4.10 ⁱ12:3 Dan 7.7

kubkubar a uleikintiehe tun o mouit ro lun, karo hangaul no seir, karo mouit no keuara tar lunon. ^{4j}Inggonor soi ke kirkiras bise liu keip toro uihina toro mahar sioko ro mahara tasir pitopit i rana tar langit, karo moko ro mahar torik, kare baka uahiuaha i kot. Tar binaka re hagouong pohor kuah, a soi e tur tanik manas i uoum tatanon, maeit re turung ein tar keketik gete pohor kuah.

^{5k}Inggonor kuah ke poho tar keketik bulout, a keketikono tere turung kaueke keip tar puhung bele toro mamang pang uanilik uakapa tunane i kot. Bo gitir tunono ka karus liuin, kara keip kai i Heuen tonon tabtabilar toia gero nang God. ⁶Doh inggonor kuaha ke ualonguala tar butur padenen ter uan ke kaleuatoroin God tatanono mara kaueke toin e matoto tar siokor tausein kara 260ir marein.

^{7l}Song re pokosor uiliatung uleik i Heuen. Maikoul mesno angelou ka uelkoi keip tar soi menia tosno angelou, doha soi mesno angelou ka pehahau, ⁸bo ahik puk pah ka matoto ka touahiuais, kara geil liuinguais i Heuen. ^{9m}Inggonor soi ka baka tauetein. Inggonor ter soi ger mahohong sioun ra kilain tar tang sa ue Satan geke uoum keip tar uanene i koto uakapa tun tar niguata uasa. Inggonor ka baka uahiuahainane i koto menia tosno angelou.

¹⁰ⁿSong ku longoro tar uau e kula ualeik turuha i Heuen pare,

“Gine daan ke pokoso uakalahara manasar uelkarus, kara nitampopokoh, kara Nitoia ger nang God menia tar nikaueke

ger nang Kriston ger nanon! Ge a tang tohotola pe toso bung uanotougigeig ka baka uahiuahain i kot. Inggonor ke tohotola tasisina tar mamang inetelik i uoum tang God tar marein mer boung. ¹¹O uanotougigeig ka pehuara tang Satan, teeit tar deuatinginar Tunar Sipsip, kare tar uelhire ger mana geke mene taueteig, kara heir katongo tar tukunus toro mat. ^{12o}Temaieit i Heuen e uah, kare mais gera uangoul i Heuen. Bo a nisokoro ger uleikintiehe tun e la tar uanene i kot, dohi laur, ge Satan pe ke la uahiuaha i kot! Inggonor Satan ke uoum tar nimalian, teeit inggonor e ate a puhin tun na binak.”

¹³Tar binaka ke ate manasar soi pare, ka baka uahiuahain i kot, inggonor ke sir uakelul tar kuaha geke poho tar keketik bulout. ^{14p}Bo inggonor pukur kuaha ka heirin tar toking titiauan misianar manulab a uleikintiehe tun, maeit re luh liuono gete me tuparar soi, e la tar uan geke kaleuatoroin tatanono tar butur padenen mara kaueke to bakaiono mo touon, kara puh ro krismas.

¹⁵Temaieit gitir soi ke lua tauete tar laur, o moko ro reih e ualo i uoumunghia tar kuah mare reih liuin toro reih. ¹⁶Bo a koto puk ke poult tar kuah, ke pangang, kare konomo uakapa tar laur geke lua taueteigir soi. ^{17q}A soi ke nimaliana uasa tun tar kuah, kare hiliu, kare la uelkoi keip tosno tamata God uakapa tun geke ueltada tena ualatur God, kara uakelul tena ueluelhire Iesu. ¹⁸Inggonor soi e tur i tektekener laur.

^j12:4 Dan 8.10 ^k12:5 Ker 2.9; Ais 7.14; 66.7; UGO 19.15 ^l12:7 Jud 9

^m12:9 Uak 3.1,14; Luk 10.18; 22.31; UGO 20.2 ⁿ12:10 Job 1.9-11; Sek 3.1

^o12:12 Ais 44.23; 49.13 ^p12:14 Dan 7.25; 12.7 ^q12:17 UGO 11.7

O Mahar 13

A inete e la tur i laur

13^fSong ku banga polukuo tar inet a roke e puraka tur i laur. Inggon o mouit ro lun ka bololaigir puhung uelhire uasa tang God. Inggon, no hangaul ro seir e toko teilir keuar taninin. ²^sA inetonener roke misianar pusi uleik a tokotok, a kekenon misianar be,[‡] a uauanon misianar laion. Doha soi ke heir tena nitampopokoho tar inetonener roke, kare no tabtabilar toia, kare na popokoho tunur nikauek. ³^tO sioko ro lunar inetonener roke o loto uasantiehe tun o marang mat, bo a loto pukono ke uia. O tamata uakapa tun ka siokor lutara tar puhonene, kara keketengua tatanon. ⁴O tamata uakapa tun ka lotungua tar soi, teeit ke heir peono tar nikaueke tar inetonener roke, gisina ka lotu pono tar inetonener roke, kara dangata pare, “Mai misianar inetonener roke? Mai re matotong uelkoi keip tatanon?”

⁵^uA inetonener roke ka uahuein tar meneng uakaia katongoin, kare menemene uasa tar hangana God, kare guata tar haua re malarain, e matoto tar toueitir hangaul, kara torikir bialok. ⁶Inggono ka uahuein tar uelsigalantiehe tun tang God, kare mamantouo tar hanganon, kare na umon, kare tas mais ra uangoul i Heuen. ⁷^vInggono ka heir ponoin tar nitampopokoho tar uelkoi keip tasir tamatar nang God, kare touahiuu tasisin, kara uamoko ponoin e kaekeke uakapa tar mamang matinalik, karo mamang tamatalik, kara mamang uelhirelik, karo pang uan uakapa tunane

[‡]**13:2** “be,” a inete a roke ngohina lo uleikintiehe tun

i kot. ⁸^wO tamata uakapa tun ra lotu tatanon ge taboisir hangas toro bolobolo gero tua gero nanar Tunar Sipsip geka tung pousin tar binaka ke uakekener uanene i kot.

⁹Mai ger to talingan, longor! ¹⁰^xMai gere uangoul i kukulebanga tar uabang manatenar uenaua tamata tar binakang uelkoi, inggono ra uenauain. Doh mai gere uangoul i kukulebanga tar uabang manatenar tung pous keip toro baenat, inggono ra tung pous keipin toro baenat. Temaeit, no tamata God ra tur uanono tun, ra tagorong mana dede kompela.

A propet bohoboh a nanar inete ger roke

¹¹Song ku banga polukuo tar giamehe polukur inete roke e tauete turuha tar kot. Inggono no torik ro seir misiana tar sipsip, bo inggono puk e mene sira tar soi uleik. ¹²Inggono ke tur tagu tar uakikilanganar inete ger roke, kare kale tena nitampopoko uleikon mare reih tutup tar uanene i kot menia tasir tamata uakapa tar lotu tar uakikilanganar inete ger roke geka uauaiin na loto ger uleik. ¹³^yInggonener uatorikinar inetener roke ke me touo tar uleikintiehe tunur inet, inggono ke guata toro hue ko hiua turuha i ran ko lahaane i kot, o tamata uakapa tun ka siokor bang. ¹⁴Temaeit ka heiringuaionor uatang torikinar ineter roke tar nitampopokoho tar guata ueleheir tena nimalarar uakikilanganar inete ger roke mare boho tasir tamata uakapa tun tar uanene i kot, kare kula ra puruhusina mo no kaesaono tar ueltada tatanono ka tokout pein kare tua dedempe. ¹⁵Doh inggonener uatang

^f**13:1** UGO 12.3; 17.3,7-12 ^s**13:2** Dan 7.4-6 ^t**13:3** UGO 17.8

^u**13:5** Dan 7.8,25; 11.36; UGO 11.2 ^v**13:7** UGO 11.7

^w**13:8** Ker 69.28; UGO 17.8; 20.12,15; 21.27

^x**13:10** Jer 15.2; 43.11; UGO 14.12 ^y**13:13** 1To 18.24-39; Mat 24.24; UGO 19.20

torikinar ineter roke ka heirin tar nitampopokoh tar heir me romong tua toro kaesa gero nituha sira tar uakikilanganar ineter roke maro men, karo guatas mais gera de mata lotu tang roono ra mat.

^{16z}Inggono ke petutup tasir tamata uakapa tun, maisir to hangas ue ahik, kare mais nas bureher inete ue o tiome, kare mais ra uangoul tar karabus ue ahik, hapempe re baka per tamata ra bubunigir pang limas ger pang mua ue tar pores. ¹⁷Maeit ahik me tang sioko re matotong bulau ue e uabulau me inet, e kale tun baka tar bubun, geter hangana per inetono ger roke ue ra ahainir hangan. ¹⁸Inggonene ter ninaman, kara niate uaia. Mai ger naman manatentiehe tun inggono tere matotong ueltupara hape ra aha peinir hanganar inetonener roke, ge inggono pe a hanganar bulout. Inggono ra ahain pare, 666.

O Mahar 14

A Tunar Sipsip menia tar 144 taoseinir tamat

14 Song ku banga polukuo gane i uoum totoguo, a Tunar Sipsip e tur tar siusan i Saion, menia tar 144 taoseinir tamat. A hanganon, doha hangana God, ka bololais tar poresisin. ^{2a}Doh inggo ku longoro tar kaling e la turuha i Heuen, misiana toro puhung butuan, kare misiana gete pilantieher pil. Gitir kaling ku longoro misiana geta sarar tang sar tenas gita.

^{3b}Doh gisinar 144 taosein ra kere to toro timuh ro kereker i uoum tono tabtabilar toia, kare tar toueitir inete gesir tua, kare tasir mahmahoholik. Ahik me tang sioko re ate toro kerekere roon

tesir 144 taosein puk manasa geke bulau tapokis turis tar uanene i kot. ⁴Gisina te geke kaueke uaia katongo tunis kara dedeil uaia tun, ahik pah ka uangangoul keip tagu mo kuah. Gisina ka uakeluk kompe tar Tunar Sipsip tar buhur re lihihia. Doh gisina te geke bulau tapokis turis tasir tamata uakapane i kot, kare tesir uakikilanganar uahung ke la tang God, kare tar Tunar Sipsip. ⁵Ahik mo boho ko tauete tur tagu tar uauasisin, doh ahik pono moso uelhire tagu.

A tang touonor angelou

⁶Song ku banga polukuo tena angelou God, e luluhula i rana teil tun tar hagaran, ka ualatuein tar me hire tauete toro Uelhire Uaia gero moko dede tar mamang binakalik tasir tamatang gane i kot. Toro mamang pang uanilik, kara mamang matinalik, kara mamang uelhirelik, karo mamang tamatalik uakapa tun. ⁷Inggonor angelou ke kula ualeikintiehe tun pare, "Sokoro tang God, uatakai tatanon, ge na binaka peono tar kedang ke pokoso manas. Lotu tatanon geke tuh i ran, dohi kot, kare tar laur, karo kodomo gere tauete tur tar kot."

^{8c}A uatang giamehenar angelou e luluh uakeluk teil tar uakikilangan, ke kula ualeik pare, "O binop, o binop tar uan uleik i Babilon ger popokoho tun ke uainum tasir tamata toro mamang pang uanilik tar binong tar niguata ger sa, kare tono uraur."

^{9d}A uatang touononar angelou e uakeluk teil tar tang torikir angelou. Inggono ke kula ualeikintiehe tun pare, "Ge me tang sioko re lotu tar inete ger roke, kare tono kaesaon, kare bubun tena bubunono tar poren ue tar liman,

^z13:16 UGO 14.9-11; 16.2; 20.4 ^a14:2 UGO 1.15; 19.6 ^b14:3 Ais 42.10; UGO 5.9; 7.4 ^c14:8 Ais 21.9; Jer 51.7-8; UGO 17.2; 18.2-3 ^d14:9 UGO 13.12-17

¹⁰e inggon e turung inum pono tena binong nimaliana God geka ding kepi-laig tena nitampopokoh i lolono tena kapang nimaliana God. Doh inggon e turung kale uelmahingintiehe tun toro hue palakurum i uoum tasir angelou gesir dedeil, kare tar Tunar Sipsip. ¹¹fDoho dikung teres uelmahingisin o totongung kai dede kompe tar mamang binakalik, ahik me marein ue me boung ra pepe uahain tas mais gera lotu tar inete ger roke, kare tonon kaesaon ue mais ka bubunis tar hanganon.” ¹²gTemaieit inggoumur tamatar nang God mung uangangoul sikoro, karung kale uanonon kompe tena ualatut God, karung tagorong mana kompe tang Iesu.

¹³Song ku longoro polukuo tar uau e mene turuha i Heuen totoguo pare, “Bolo pare, A niuah tasir mat geka mata keip tar nitagorong mana tar Tamata Noman ginela daan.” Kare kular angelou pare, “Te paara noman, gisina ra pepe uah, ka kalekinalentiehe pe, teeit res niguata uaiasin e la keip tasisin.”

A ueuere tar uanene i kot

¹⁴hSong ku banga polukuo toro mahar langit gaugauil gane i uoum totoguo e tabila teilir tang siok, e baka sira tar Tunar Tamat. O toko teil ro keuara toro lun o nituha keip tar goul, kare kale teil toro ioubung ueuer o manatiehe tun.

¹⁵Doha tang giameher angelou ke tauete tur tena umang lotu God ger dedeil, kare kula ualeikintiehe tun tatanonene re tabila teil toro mahar langit pare, “Kale tonongo ioubung ueuer, karo tokout, ge a binakang tokout manasa peono ke matoto manasaigir ineteng gane i koto tar ueuer.” ¹⁶Temaieit git re tabila teil toro mahar langit ke aba tonon

ioubung ueuer gane tar uanene i kot, kare ueuere uakapa manas.

¹⁷A tang giamehe angelou ke tauete tur poluk tena umang lotu God ger dedeil e kale teil pono tonon ioubung ueuer o manantiehe tun pon. ¹⁸iSong ke hiua turur tang giameher angelou toro olta, inggon e kaueke toro hue nar uahung, ke kula ualeikintiehe tun tar angelou gere kale teil tonon ioubung ueuer pare, “Kale tonongo ioub, karo tokout toto uakapa tar bungbung bino uakapa tun gane tar iomo binoene i kot, ge ginina pe ke muraka manas.”

¹⁹Maieit gitir angelou ke aba uasiokon sioum tonon ioubung ueuer, kare tokout toto uakapangua tar bungbung bino uakapa tun tar iomo binoene i kot. Kare baka uasolonguako taninina tar pousung bino ger uleikintiehe tun ger nang God. Inggonor pousung bino tena nimaliana God. ²⁰jGinina ka pous toig tar pousung bino e tok i be tar uan uleik, kare tatading tauete turungar deuating tar pousung bino, kare silunguar uan. A butur ke silu e matoto tar 320ir kilomita re tahanga pe, kara siokor param re tunguna pe.

O Mahar 15

A mouitir angelou ra lang mamantou tar uanene i kot toro mouit ro mata uleik

15 Inngo ku banga i Heuen, doha uaparokene ku bangaio, ke me uatentur tun toro balouguo. A mouitir angelou ra lang guata toro mouit ro mata uleik. Inggonene ter uadouhinar niduh, ge na nimaliana pe God e la keip teil taninin. ²Song ku banga polukuo tar inet misiana tar laur ger mamade-

^e14:10 Uak 19.24; Ker 75.8; Ais 51.17,22; Jer 25.15-16; Isk 38.22; UGO 16.19;

20.10 ^f14:11 Ais 34.10 ^g14:12 UGO 13.10 ^h14:14 Dan 7.13

ⁱ14:18 Jol 3.13 ^j14:20 Ais 63.3; UGO 19.15

laua uaia tun ke uelhouara keip toro luh-luhuna ro hue, doh gisis ra tur i tek-tekenor laurinin te geka touahiuwa tar inete ger roke, gera uoto ahainir hangan, kare tono kaesaon. God ke heir tenas gitasinasinine, ^{3k}kara kerenguasina toro kereker ke kerein Moses ge na tamatang kalekinale God, kare toro kerekere ke kereinir Tunar Sipsip.

“God ger Tamata Noman a ranantiehe tun,

ger tampopokohontiehe tun.

A inete ko guatagia ke me uatentur tun toro balouguo.

A kodkodoh, kara mana tun nang niguat. Ingga nas uleikir toia uakapa tun tar uanene i kot.

^{4l}O tamata a uakapa tun ra turung sokoro totomuar Tamata Noman, kara heir tar uatakai tar hangoumua Ge ingga pe me pahemir dedeil.

O tamata uakapa tunane i kot ra turung lame,

kara lotu to i uoum totomua, ger nang niguata pea ger kodkodoho tun, ka uakalahara uakapaig.”

^{5m}I muduhia tar ineteninanine, inggo ku banga tar uamang lotu ger dedeil i Heuen a takapuk, doha tina uma ger dedeilintiehe tun ka pukain. ⁶Doha mouitir angelou gera lang guata toro mouit ro mata uleik ka tauet. Gisina ra loho teil tar delauana, kara abeaba uaia tunur gomon, kara kukuete ka auh uilohoig tar uaruarousisin a nituha tar goul. ⁷Song ke heirir siokor inete gesir tua tasisina tar mouitir nouh ka tuhaig tar goul, ke uoun tena nimaliana God gere uangoul dede tar mamang binakalik. ⁸ⁿDoh tena umang lotu ger dedeil ke uoun tun toro diku nar barangan, kare na nitampopokoh God. Ahik me

tamata re matotong lek ium e tuka tar binaka geta uakuakapa hihir tunur mouitir angelou toro mouit ro mata uleik.

O Mahar 16

A mouitir nouh a uoun tena nimaliana God

16 Song ku longoro tar uau e kula ualeikintiehe tur tun iuma tar umang lotu ger dedeil tasir angelou pare, “La karung ding tauete tena nimaliana God tur tar mouitir nouh.”

^{2o}A uakikilanganar angelou ke la, kare ding uoum ter nan i rana tar uanene i kot, kare pokosonguar pang kubar, kara uelmahing uleikintiehe tun tas mais geka bubunis tena bubunur inete ger roke, kara lotu tono kaesaon.

^{3p}A uatorikinar angelou ke ding ter nan i laur, kare uapalih siranguar laur tar deuatinginar tamata ger mat. O mamang inetelik gesir tua gera uangoul i laur ka mata uakapangua.

^{4A} uatang touononar angelou ke ding ter nan i rana toro kodom gero noro tur i lolono tar kot, kare toro kodom gero ualo turuha tar siusan. Ginin ke uapalihingua tar deuating. ⁵Song ku longoro tar angelou gere kaueke tar kodom ke kula pare, “Ingga ter tang siokor dedeil tun. A kodkodoho tunur uabang manatnine ko heirig. Ingga gero uangoulung sioun, doh gine daan.” ⁶“Ge o tamata pesinasinasine ka uatading toro deuating tasir tamata gesir dedeil menia tasir propet. Doh ingga ko uainum tapokis tasisina toro deuating, Ter bulauasisina manas.” ^{7q}Karu longoronguao tar uau ke mene tur toro oltang uahung pare, “O mana tun, God ger Tamata Noman a i

^k15:3 KT 15.1; Ker 139.14; 145.17 ^l15:4 Ker 86.9; Jer 10.6-7

^m15:5 KT 38.21 ⁿ15:8 1To 8.10-11; 2OUTT 5.13-14; Ais 6.4

^o16:2 KT 9.10; UGO 13.12-17 ^p16:3 KT 7.17-21 ^q16:7 Ker 19.9; UGO 15.3

ranantiehe tun. A uabang manate ko heirigia a mana, kara kodkodoho tun.”

⁸A uatang toueitinar anggelou ke ding ter nan i rana tar pisar, kare uel-sukuntiehenguar pisar, kare uatougougou tar tukunusir tamat. ⁹Doh gisina ke tougurur tukunus, kara menmene uasangua tar hangana God geke heirihia tar matanin tasisina, doh ahik mata uuiir tenas niguata ger sa, kara de mata uatakai puk tar hangana God.

¹⁰^sA uatang toliminar anggelou ke ding ter nan i rana tono tabtabilar toia ger roke, kare kitup uakapanguar pang uanene re kaukekeion. Doho tamata ke uelmahing uasantiehenguais, kara eiteit tar mias. ¹¹Gisina ka ueluelhire uasangua tar God ger peng Heuen, teeit ka kale uelmahingintiehe pe, kara uelote uleik pon, gisina ra de mata uapalih tenas niguataniner sa.

¹²^tA uatang tonomonor anggelou ke ding ter nan tar kodom i Upretis gero moko ro reih, kare papadakanguar kodom. Maeit ra kaleuatoro tanikain tasir toia menia tosnoso tamatang uiliatung gera la turuha tar butur re hara turur pisar. ¹³Song ku bango tar tang touonor liouana uasa ra banga sirais tasir rokrok, gisina ka tauete tur tar uauanar soi uleik, kare tar uauanar inete ger roke, kare tar uauanar propet bohoboh. ¹⁴^uGisinar liuana uasa ra touo tar inete tar matasir manai, kara la uelhir tasir toia uakapa tun, kara ruh kout tasisina tar me uiliatung tar marein uleik ger nang God ger i ranantiehe tun.

¹⁵^v“Ualongor! Inggo ahik pahi reh getu lame! A niuah e la tang mai re kaleuatoro tinikin, kare loho teil

tono gomon, maeit ahik pahe lateil palapal, kare matal ahik pe me inete re uatarain tasir manai.”

¹⁶^wSong ka kila uiliodoutisisin tar uaning Hibru, ra kilain i Armagedon.

¹⁷Song ke ding taueter uamouitinar anggelou ter nan i rana tar hagaran. Doh tena umang lotu God ger dedeil a uau e kula ualeik tur toro tabtabilar toia pare, “Ter uadouhin!” ¹⁸^xKare kanauanguar kanau, kare pilar pil, kare nunur nun a uleikintiehe tun ahik me nun misiana tatanono ke pokoso baka uoumane tar uanene i kot. ¹⁹^yA uan uleik i Babilon ger i ranantiehe tun ke tapolaka pang touon, karo uan uleik toro mamang uanilik ka mamantouoig. God ahik pahe malabobour tar uan uleik i Babilon. Inggono ke heir tatanono tar kap bino a uoun tun gere moko teil na nimalianon. ²⁰^zO Toro uakapa tun ke siokor rouo tar nunon, kara mamang siusanalik ke siokor rouo uakap. ²¹^aDoha mahar ais a popokoho sira tar palau a tolimar hangaulur kilagram ro duh pe ro mahara siok, ke dud turuha tar langit i ranangua tasir tamat. Gisinar tamata ka ueluelhire uasangua tang God, teeit tar mahar aisinin a uelmahingintiehe tun.

O Mahar 17

A kuah, kara inete ger roke

17^bA tang sioko tasir mouitir anggelou gere kale teil tar uamouitinar nouh ke lame totoguo, kare kula pare, “Lame maru ualasira totomua tar uabang manate gera turung heirin tar tang tinana uraur gere tabila toro burehe ro kodom. ²^cO toia uakapa

^r16:9 UGO 9.20-21 ^s16:10 KT 10.22; Ais 8.21-22 ^t16:12 Ais 11.15

^u16:14 UGO 19.19 ^v16:15 Mat 24.43-44; UGO 3.3 ^w16:16 Sek 12.11

^x16:18 UGO 4.5; 8.5 ^y16:19 UGO 14.10 ^z16:20 UGO 6.14

^a16:21 KT 9.23-24; UGO 11.19 ^b17:1 Jer 51.12-13

^c17:2 Ais 23.17; Jer 51.7; UGO 14.8

tun tar uanene i kot ka uangangoul uasa keip tatanon, kare uainum uapopouluanono tasir tamata uakapa tunane i kot tar binong tono uraur.”

^{3d}Song ke kilar anggelou tar iabeiguo kira la tar butur padenen. Doh tar buturuon inggo ku banga tar kuah e tabila teil i rana tar inet a roke a kubara uakap, ke uouu uilohor tukununa tar puhpuhung uelsigala tang God. Inggonor ineton o mouit ro lun, kare no hangaul ro seir. ^{4e}Gitir kuah e loho teil toro tabeliah, karo kubkubara ro gomom, kare uounur tukununa tar mamang inetelikininer abeaba umatmata hamas tun. Inggon e kale teil tar kap ka tuhain tar goul a uouu tar ineteniner sa, kare tono urauron. ^{5A} puhung uelhire geka bololain tar porenon a ououo. “I Babilon ger i ranantiehe tun te tinana ro uraur, kare tinanar mamang niguata uasalikininer sa tar uanene i kot.”

^{6f}Inggo ku banga tar kuahonene ke inum, kare popouluaana tar deuatingis no tamata God gesir dedeil, kara deuatingisir tamat geka tung pousis, teeit ka tagorong mana pe tang Iesu. Inggo ku lutara, kare siringuaio, ae maene ke guatono paar.

^{7g}Song ke dangatar anggelou totoguo pare, “Ae maene ko lutara, kare siria, ke guata peono pare?” Inggo gine ru hire uakalahara tar tengkana tar kuah, kare tar inete ger roke gere gere tabila teilion, gero mouit ro lun, kare no hangaul ro seir. ^{8h}A inete ger roke geko bangaia ke tua sikoro bak, kare mat kout, inggon e turung taute tur tapokis tar tung ger i lolono tun, song ra la mamantouin. Doho tamata uakapa tun tar uanene i kot ge ahik pah ka bolo uahialaisir hangas toro bolobolong tar ni-

tua, binaka ke uakekene pemer uanene i kot, ra turung lutara geta banga tar inetonener roke gete tua tapokis, kare la tapokisime.

⁹Doha anggelou ke kula pare, “A puhene e malara me niate, kare me ninaamana uaia tun. O mouit ro lun ter mouitir ponponin toro uan uleik gere moko tena nikaueker kuahon. O mouit ro luna rasin ka uamisiana to ponolain tasir mouitir toia. ^{10A} tang tolisma tasisina ka hiliu uoum, a tang sioko pukene re uangoul, doha tang sioko halana te lame. Bo gete pokoso pukuon inggon e me uangoul puk tar sisikinalikir binak. ^{11A} inete ger roke geke mata sioun, kare tua tapokis, inggono tere uatual tasir toia gesir mouit, kara turung mamantouo uakap tunin. ¹²ⁱO hangaul ro seir geko bangasia tesir hangaulur toia halana haraha ta heiris tar nitampopokoho tar kalekinale. Bo gisina puk menia tar inete ger roke ra turung heir pukis me sisikinalikir binaka tar kalekinale. ¹³Gininar lun a siokono res ninaaman, temaeit gisina ka siokor heir uain tar nikauek, kara nitampopokoho tar inete ger roke. ¹⁴Gisina ra turung uelkoi keip tar Tunar Sipsip, bo a Tunar Sipsip puk e turung touahiua tasisina uakap, teeit inggono nas Tamata Nomanar Tamata Noman, kare nas Toiar Toia uakapa tun. Inggono ka uelkepana keip tas gesir nikil, kare gesir nikedang, kare geka tagorong mana dede tatanon.”

¹⁵Song ke hire polukur anggelou totoguo pare, “O kodomo geko bangaia gere gere tabila teilir uraur, ginina tesir mamang tamatalik a mamang matinalik o mamang pang uanilik, kara mamang uelhirelik. ^{16j}Doha inete ger roke geko banga ponoia menia toro hangaul ro

^d17:3 UGO 13.1 ^e17:4 Jer 51.7; UGO 18.16 ^f17:6 UGO 18.24; 19.2

^g17:7 UGO 13.1 ^h17:8 Dan 12.1; UGO 11.7; 13.7 ⁱ17:12 Dan 7.7,24

^j17:16 UGO 18.8

seir e turung tokouasais tar uraur, ra turung liur liu tena mamang inetelikion, kara uapalapalain, kara ein uelhir tar singsinginon, song ra ualuh uakapa tatanono toro hue. ¹⁷ God ke guat tasisinar toia, maeit ke sioko puk res ninaman, kara heir teres nitampopokohong uoum keip tar inete ger roke e la uatuka tar binaka geta siokor tagorong manain, no uelhire God. ¹⁸ A kuaha geko bangaia inggono ter uan uleik ger popokohontiehe tun, ke uoum keip tasir toia uakapa tun tar uanene i kot.”

O Mahar 18

I Babilon ke la uahiu

18 I muduhia tar inetenine ku banga baka uoumugio, Inggo ku banga poluk tar tang giameher angelou e hiua turuha i Heuen. Inggon a uelpipihintiehe tun, doha balbalana na nitampopokohono ke uamarmarein tun tar uanene i kot. ^{2k} Inggonor angelou ke kula ualeikintiehe tun pare, “Ke la uahiu, ke la uahiu i Babilon ger i ranantiehe tun. Nas umar liouana bohoboh, kare nas uanir liouana uasa, kare na uanir mamang niguata uasalik, kare nas uanir tetiaua uasa. ³ Inggono ke uainum uapopouluna tasir tamata uakapa tunane i koto tar bino gere moko teilir uelmahingin tonu urauron. O toia uakapa tunane i kot ka siokor ura keip tatanon. Doh gisis ra uoto bulau, kara uabulaua tenas mamang inetelik ka tang manintiehengua, teeit tonu urauron.”

^{4l} Song ku longoro polukuo tar giameher uau e louara tur polukuha i Heuen pare, “Tauete liu nogo tamat, hiliu tatanon gete kale tagusiuom tar niguata

uasanitir enon, kara uelmahingininer sa gera heirig tatanon. ^{5m} Ge na niguata uasa peono ke ueluelpone ke la tuk i rana tar langit. God ahik pahe matotong malabobour tar niguata uasanitir enon. ⁶ⁿ E uabang manate tapokisimpe tatanono tar haua ke heirigion. Inggon e kale uatorikingua tar uabang manate e lain tena niguat. Houara uapopokohontiehe uapoul poluk tena inumon a hahauana tang geke uainumiono tamiuoum. ^{7o} Heir tatanono me uleikintiehe tunur uelmahing, kare me uleikintieher niueldolom a hahauana ke uairanantiehe tun peion, kare uahauaha katongoin. Ge inggono pe ke kula katongoin pare, ‘Inggo u tabila tonu tabtabilar kuaha toia ahik paha kamob, ahik pahu uangoul keip tagu me niueldolom.’ ^{8p} Temaeit a niduh kara uelmahingininer santiehe tun e pokoso kompe tatanono me siokon siounur marein, a niduhunina teenine: o uelmata uleik, kara niueldolom, karo hue o turung ein uakapa tatanon. Ge God pe ger Tamata Norman inggono ter i ranantiehe tun teke kedanga tatanon a sa na niguat. O tamata uakapa tunane i kot ka ueldolomo ke luh pe i Babilon.”

^{9q} “Tar binaka ko totongung kai ro diku ke luh manasa pe i Babilon o toia uakapa tunan i kot geka ura keip tatanon, kara uahauaha keip tatanono ka uangoul peme, ka ueldolom, kara urung tatanon. ¹⁰ Gisina ra tur kompe me i reh, teeit gisina ra sokoro tar niduh, kara uelmahinginine re kalgion, kara kulkula kirkiring pare, ‘Kuanalik, kuanalikir uan uleik ger i ranantiehe tun i Babilon. Ingga ter uan ger uleik, kara

^k18:2 Ais 13.21; 34.11-14; Jer 50.39; UGO 14.8

^l18:4 Ais 48.20; Jer 50.8; 51.6,45; 2Ko 6.17 ^m18:5 Uak 18.20-21; Jer 51.9

ⁿ18:6 Ker 137.8; Jer 50.15,29; 2Te 1.6 ^o18:7 Ais 47.7-9

^p18:8 UGO 17.16 ^q18:9 Isk 26.17; 27.30-35

uelpipih tun ko pidala puk tar sisikinalik, karo kapkapa hihir uakapa tun.”

¹¹r“O tamata uakapa tunane i koto gera bulau, kara uabulaua tenas mamang inetelik ka ueldolomontiehe tun tatanon, teeit ahik manasa pe me tamata re bulaua tenas inetesin. ¹²sGisine ra uoto uabulaua tar goul a silva o paluanit ger i ranar bulauan a daemon a ineteniner abeaba gaugauil re uoto moko toro bek ger i ranar bulauana, kara gomomoniner mataiantiehe tun a tabeliah a slika, kara gomono ger kubkubar. Gisina ra uabulaua pono tar mamang mahar doukuniner mataia, bo ahik paha bureh, kara mamang inetelikininer nituh, kara nipuruh, kare no liuir elepen, doha douk ger i ranar bulauan. Gisina ra uabulaua pono tar haen a matia, kara haen a popokoh, kara palau a matmata hamas tun ra uoto tuha keipig toro um, kara palau mamadelau. ¹³Gisina ra uabulaua pono tar mamang inetelikinine ra uoto houara ualingiaig, kara uamunghuiaig tar inete ue a niein, a bino a uaiuai ger nituha keip toro oliv a plaua, kara raes-uit, o kau, o sipsip, o hos, kara karis, kara uabulaua pono tasir amat geka uenauis tar uiliitung.”

¹⁴“Gisinar tamatang bulau, kara uabulaua tenas mamang inetelik ra kulkula kirkiring pare, ‘A mamang inetelik uaia tun ger uanimaoto tun totomua ke hiliu manasa totomua, doh rongo tang mania, kare rongo mataia ingga ko rou, ahik pah ra matotong tupara baka polukin.”

¹⁵t“O tamata uakapa tun geka tang mani to tatanono ka uabulaua pe tenas inete ra tur uairehe tun tatanono ra sokoro pe tar niduh, kara uelmahinginine ra heirig tatanon. Gisina ra beil,

kara ueldolomontiehe tun, ¹⁶u^kkara menene kirkiring pare, ‘Kuanalik, kuanalik tunur uan uleik ger i ranantiehe tun e uoto kaleuatoro uamatmata hamas uaia tun tar tukununa tar gomomoniner mataiantiehe tun a tabeliah, kara kubkubar, kare uaabeabain tar goul, kara palau ger i ranar bulauan, kara kuaman. ¹⁷vRongo tang mania ahik pah ko lain me puhung barah.”

“O tang uakapis uakapa tun toro parau, kare mais gera uelapokise taninin, karo tamatang kalekinale, doh mais gera kale mani to toro parau ra tur uairehentiehe tun tatanon. ¹⁸wGine ra banga pesina toro dikunono re luh pe, gisina ra menene ualeik kirkiring tun pare, ‘Kaempein me uan uleik misiana sira tar uan uleikonener i ranantiehe tun?’ ¹⁹Gisina ka uelkuhis tar taun, ra beil pe, kara ueldolomontiehe tun, kara uakuakuana kirkiring pare, ‘Kuanalik! Kuanalik tunur uan uleik ger i ranantiehe tun, gisine nosio parau ka tang mani to kompe torongo tang mania. A sisikinalik tunur binak ka uakapa peia. Ahik pah ko pidala baka me puhung barah, kare taboia.”

²⁰x“Inggoumeit i Heuen, kare no tamata God, karo aposoul, karo propet mung ualauah, ge God pe ke heir tar uabang manate tatanon e matoto tunin tar haua ke guatagiono tamiuom.”

²¹ySong ke kaler anggelou uelpipihintiehe tun toro tinana ro palakurum, kare dudur tang roon i laur, kare kula pare, “Te misiana tar uan uleikintiehe tun i Babilon ke dudur pe ahik pah ra banga kout baka polukin. ²²zBabilon ahik baka poluk pah ra longoro turia mo tang sar ra kere me kereker ue me kalkalinginar

^r18:11 Isk 27.36 ^s18:12 Isk 27.12-13,22 ^t18:15 Isk 27.31,36

^u18:16 UGO 17.4 ^v18:17 Ais 23.14; Isk 27.27-29 ^w18:18 Isk 27.32

^x18:20 Ual 32.43; Ais 44.23; Jer 51.48 ^y18:21 Jer 51.63-64; Isk 26.21

^z18:22 Ais 24.8; Isk 26.13

pagur ue me rauoto ra uig ue mo kalkalingina ro tuil. Ahik baka poluk mo tang puruh ue mo tang doul ue mo tang tuha tar inete ra banga uapoul tois totomua. Ahik baka poluk me kalinginar pang iah. ²³aAhik baka poluk mo lam ro luh iuma totomua. Ahik baka poluk me bulout ue me kuaha ra guluh toin mosira le totomua. ²⁴bI Babilon ke kale tar uleikintieher tunur niduh, kara uleikintieher uelmahing, teeit inggono ka tupara toigir deuatingisir propet, kara deuatingisir no tamata God, kara deuatingisir tamata uakapa tun geka tung pous toisane i kot.”

O Mahar 19

O tamata uakapa tun i Heuen ka uataakai tang God

19 I muduhia tar inetenine ku banga baka uoumugio, inggo ku longoro sira tunumpe paho manai ra uatuatapuak ualeik i Heuen. Gisina ra kulkula ualeik tun pare, “Uataakai tang God! O udeil, a uinator, a nitampopokoh a nanar God ger nagigeig. ²cA man, kara kodkodoho tun na nikedang. Inggono ke mamantouo tar uan ger uleikintiehe tun, teeit ke uoum keip uasa peono tasir tamata tar uanene i kot tono uraur. Inggono God ke heir tar niduh, kara uelmahing a uleikintiehe tun tatanon, teeit ke tung pous peono tosno tamatang kalekinaleon.” ³Doh gisisir manai ka siokor kula ualeik poluk pare, “Uataakai tang God! O diku nar uan uleik i Babilon ko la kai i ran, karo la dedengua tar mamang binakalik.”

⁴Doh gisisir torikir hangaul, kara tang toueitir mamahoholik, kara toueitir inete gesir tua ka siokor hatup uahiu-

gua, kara lotu tang God gere tabila tono tabtabilar toia. Gisina ka kula pare, “O Man! Uataakai tang God.”

⁵Song ke mene turur uau tono tabtabilar toia pare, “Uataakai tar God ger nagigeig, inggoumene rung kalekinale tatanon! Uataakai tar God ger nagigeig, inggoumene rung ueltada tatanon, inggoum uakapa tun o tamata uleik, karo tatamatalik ueltebeir.”

⁶dSong ku longoro polukuo tar uau a burehentiehe tun misiana geto puaha ro butuan ue ngohina gete pilar pil, gininar uau ke mene ualeikintiehe tun pare, “Uataakai tang God! God ge nagi Tamata Nomaneig ger i ranantiehe tun ke tur uakalahara ter toia! ⁷eInggeig uakapa tun i siokor uaniong uaha tun, kari uataakai tatanon. Ge no le per Tunar Sipsip ko uahuhut manasain. ⁸Doh na kuahaono ke kaleuatoro tanik manasa ponoin, no hikhikuon o gaugauil, karo abeabantiehe tun, teeit roono ka tuha keipin tar mamang niguata uaiialikininer uia ger nas no tamata God gesir dedeil.”

⁹fSong ke kular angelou totoguo, “Bolo pare, a niuah e la tas mais geka kilais tar me ein tar niein toro le tar Tunar Sipsip!” Song ke hireono totoguo pare, “Gininanine ko bolo uahiuagia tena ueluelhire God ger mana tun.”

¹⁰gGine ke hire peonor angelou totoguo tar puhonene, inggo ku hatup uahiu, karu lotu puk manasa tatanon. Bo inggono puk ke kula tane totoguo pare, “Ahik paho guata paar! Inggono na tamatang kalekinaleon misiana totomua menia toso uanotoumua geka tagorong mana tono uelhire Iesu. Lotu tang God! Ge no uelhire pe Iesu te misiana puk tar Iabene Dedeil gere uangoul teil tasir propet.”

^a18:23 Jer 7.34; 16.9; 25.10 ^b18:24 Jer 51.49; UGO 17.6

^c19:2 Ual 32.43; UGO 6.10 ^d19:6 UGO 14.2 ^e19:7 Ais 61.10; UGO 21.2

^f19:9 Mat 22.2 ^g19:10 Apo 10.25-26; UGO 22.8-9

A tang ualo e tabila teil tar hos a gauil

¹¹^hInggo ku bang i Heuen ke takapuk, karu banganguao tar hos a gauil, doh gine re ualo teil ra kilain tang, “Uauaman, kara kila ponoin tang O man.” Inggon a kodkodoh, kara uelmatout uaia tun na kikedang, kare tar guata tar uuliatung. ¹²ⁱInggono tar matan misiana ro luhluhuna ro hue, kara bureher keuar e moko toro lunon. Doha hangene ka boloin tatanon ahik me tang sioko re ate, inggono manasampe me pahene re ate. ¹³^jInggon e hiku teil toro hikhiku o baraha uatuk i kot o niuahu tar deuting, doh inggono tar hangan ra kilain, “No Uelhire God.” ¹⁴Doho uiluliatung gera uangoul i Heuen ra ualo uakeluk teil tatanon. Gisina ra ualo teil tasir gauil uakapar hos, kara siokor hiku teil tar hikhiku e baraha uatuk i kot a gaugaulintiehe tun, kara delauana uaia tun. ¹⁵^kDoh tatanonene re ualo uoum teil o baenat ko tauete tur tar uauanon o man uaia tun, roono tera tokout bubura keipin tasir tamata uakapa tunane i kot. Inggon e kaueke keip tasisina tar puhung bel, kare turung pous tauete liu tena bino God ger i ranantiehe tun gere moko tar pousung bino, ge ginina pe tere moko teil tun na nimaliana God. ¹⁶^lDoh inggonene re ualo uoum teil tasisin, no hikhikuono gero baraha uatuk i kot, kara puhung kekenono ger puhung uleik ka bolois pare, “Nas Toiar toia, kare nas Tamata Nomanar tamata noman.”

¹⁷^mKaru banganguao tar angelou e tur tar pisar, kare kula ualeikintiehe tun tasir tetiaua uakapa tun gera luhluh teil i rana tar hagarana pare, “Lame! Siokor la totomeane toro niein

uleik rone re guatain God. ¹⁸Maetit rung me einioum tar singsingisir toia, karo tamata uleiking tasir tamatang uuliatung uakapa tun, karo tamatang uuliatung, kara singsingisir hos menia tasir tamata gera ualo teil, kara singsingisir tamata uleik uakapa tun, karo tatamatalik ueltebeir.”

¹⁹Song ku banga polukuo tar inete ger roke, doho toia uakapa tunane tar kot menia tosnosio tamatang uuliatung. Gisina ka siokor la toto uiliodout uakapa tun tar uelkoi keip tang gere ualo teil tar hos menia toso tamatang uuliatung. ²⁰ⁿBo a inete pukuonener roke ka kusein, kara uih tanein, doha propet pono ger bohoboh gere uoto ualasira tasir manai tar nitou ger nanon. Doha inetenine ke touogion, ginina teke bohobo teres ninamanasit ka bubunis tena bubunur inete ger roke, kara lotu tono kaesaon. Doh inggonor inete ger roke, kara propeit ka baka tutualais toro luhluhuna ro hue geka bakalaigir tauununar salpa. ²¹Doho bureheisisina teka tung pous keipis toro baenat gero tauete tur tar uuanene re ualo teil tar hos. O tetiaua uakapa tun ka ueluelkaruse ra ein pe tar singsingisisin e tuka ka ein uakapa pe.

O Mahar 20

Satan ka karabusin toro taosein ro krismas

20^oSong ku banga polukuo tar angelou e hiua turuha i Heuen e kale teil tar ki nar tung ger i lolono menia tar tiein a popokohontiehe tun. ²^pInggonor angelou ke kusa tane tar soi ger pipigogolik a tang sa a hangana

^h19:11 Ker 96.13; Ais 11.4; UGO 1.5; 6.2 ⁱ19:12 Dan 10.6; UGO 1.14; 2.17

^j19:13 Ais 63.1-3; Jon 1.1,14 ^k19:15 Ker 2.9; UGO 1.16; 14.20

^l19:16 UGO 17.14 ^m19:17 Isk 39.17-20 ⁿ19:20 UGO 13.12-17; 20.10

^o20:1 UGO 9.1 ^p20:2 Uak 3.1; UGO 12.9

tang Satan. ³A anggelou ke uih tane tatanono tar tiein ger popokohontiehe tun e tuka geto karuh mo taosein ro kris-mas. Inggonor anggelou ke bakanguako tatanonor soi tar tung ger i lolonontiehe tun, kare holor tane uanono tun, kare tita tane uapopokoho tun toro pirik, maeit ahikono pahe uelour baka poluk tasir tamat e tuka geto karuh baka ro taosein ro krismas, song ra uatauete bakaiono me sikinar binak.

⁴qSong ku bango tenas tabtabilar toia ra tabila teilis mais geka heiris tar uoum keip tar kedanga tasir tamatasiner sa. Inggo ku banga tasisina te geka tokout liuigir lus, teeit ka tagorong mana pe, kara uakeluk tena ualatut Iesu Kristo, kare tono uelhire God. Gisin ahik pah ka lotu tagu tar inete ger roke ue tono kaesaon, doh ahik pono pah ka bubun taguis tena bubunono tar pores ue tar li-mas. Gisina ra turung tua tapokis, kara uoum keip tokaha mes Iesu Kristo e matoto mo taosein ro krismas. ⁵Inggonene ter uakikilanganar nitua tapokis. (O gisi-ameher mat halana ta tua tapokis i muduhia e tuka geto karuh baka mo taosein ro krismas.) ⁶rA niuah, kara niguata uaia e la tas mais geka kale tar uakikilang-anar nitua tapokisonene. O uatorikina ro mat ahik paho matot o kale uahiua tasisin. Gisina no turung patere God me Iesu Kristo, kara uoum keip tokaha mes Iesu Kristo e matoto mo taosein ro krismas.

**O binop ka guatain tang
Satan menia tosno tamat**

⁷Tar binaka ro karuh ro taosein ro krismas, Satan ra turung uatauetein tar karabus. ⁸sInggon e turung la tauet, kare

uelour tasir tamata uakap, toro toueit ro mahar tar pang uanene i kot. O tamata gera kilais o Gog menia tasir Magog gisina teka uelkeipana mes Satan tar uelkoi. Gisina ka burehentiehe tunungua misiana tar ion. ⁹tGisina ra turung uoum toro mamang buturulikane i kot, kara tur uiloho tar butur ra pepe no tamata God, gesir dedeil, inggono ter uan ger uleik gere malauehiritiehe tunin God. Bo o hue puk ko hiua turuha i Heuen, karo me ein uakapa tasisin.

¹⁰uDoh gitir tang sa geke uelour tasisin ka bakalain i uantinanina ro luhluhuna ro huenar salpa ter butu-ruono re uangoulur inete ger roke me-nia tena propet ger bohoboh, kaura kale uelmahing tar marein, kara boung, e la dedengua tar mamang binakalik.

**Mais ka mat, doh ahik pah
ka tagorong mana ka kale
tar uleikir uelmahing**

¹¹Song ku banga polukuo tono tabta-bilar toia o gaugaul, God e tabila tang roon. A kot doha langit, kura ualo liu tur i uoum tatanon ahikingua menas butur.

¹²vInggo ku banga tas geka mat o tamata uleik, doho tatamatalik, gisina ra tur i uoum tono tabtabila God, kara ualai-gir bolobol, song ka ualain ro uagiame-hene ro bolobol, roono tero bolobolong tar nitua. Gisisir mat ka heir kahaka-hais tar uabang manate e lampein tar haua ke guatain, ka bolo uahiua pein toro bolobol. ¹³wA laur ke siokor heir tasir mat gera pepe i laur, doh gisisir mat menia tenas uanir mat ka siokor heir tasir mat gera pepe tar buturunin. Song ka heir kahakaha uakapa tunisisin tar uabang manate e lampein tar haua ke

^q20:4 Dan 7.9,22,27; 1Ko 6.2; UGO 13.17 ^r20:6 UGO 1.6

^s20:8 Isk 38.2,9,15-16 ^t20:9 2To 1.10 ^u20:10 Ker 11.6; UGO 19.20; 21.8

^v20:12 Dan 7.9-10; Mat 25.31-46; Apo 17.31; 2Ko 5.10; UGO 13.8

^w20:13 Roum 2.6; 1Pi 1.17; UGO 2.23; 22.12

guatain. ¹⁴Song ka bakalaisir mat menia toro butur gera pepeisisin i uantinanina toro ngangauana ro hue uleik. Roono ro hue uleik ter uatorikin ra mata uagiamehe per tamat. ¹⁵Ge me tang siok ahik pah ka bolo uahiuainir hangana toro bolobolong tar nitua, inggono ra bakalain i uantinanina toro ngangouana ro hue uleik.

O Mahar 21

A timuhur Jerusalem

21 ^xSong ku banga polukuo tar timuhur Heuen, doha timuhur pang uanene i kot. A uakikilangannar Heuen, doha uakikilangannar pang uanene i kot ke rou, gine daan ahik baka poluk me puhung butuan. ^{2y}Inggo ku banga tar uan uleik ger dedeil, inggono ter timuhur Jerusalem e hiua turuha i Heuen tang God ka uinatoro umatmata hamas tunin misiana tar kuaha gera lang liuin tena bulout.

^{3z}Doh inggo ku longoro tar uau e kula ualeik tur tono tabtabilar toia pare, “Daan na uma God e uangoul keip tasir tamat, doh God e uangoul keip tasisin. Doh gisin o turung nanonongua, inggono katongo re turung uangoul keip tasisin, kare gisina nas turung God tatanon. ^{4a}Inggon e turung kale liu teres niueldolomosin, kare tunaha liu uakapa tun tar bulbulunar matasisin. Ahik baka poluk me mat ue me niueldolom ue me kiring ue me uelmahing, ge a niuangoulung sioun pe ger sa ke rouu uakap.”

^{5b}Inggonene re tabila tono tabtabilar toia ke kula pare, “Inggo u uatimuh uakapa tun tar mamang inetelik,” Song

ke kulono totoguo pare, “Bolo uahiu tar puhunin, ge a uelhire penin ra ate tunig a man.” ^{6c}Inggono ke hire totoguo pare, “Ginina ka guatguata hihir uakapa manasaig. Inggo ter Uakekenen, kare ter Uadouhin. Inggo u turung heirheir puk me kodomo tar kodomong tar nitua tang mai re kamadak. ^{7d}Mai geke touahiu tar tang sa inggono tere turung kale taninin, doh inggono na God totoguo, kara turung tugoungua tatanon. ^{8e}Bo gisisir tamata uasa ra turung kale uelmahing i uantinanina toro ngangauana ro hue uleik tera mata uagiamehe poluk per tamat! Te gisis tunumpesina re uoto punga kout res nitagorong mana ra sokoro pe geta kale uelmahing tar hangana Iesu, kare gisis ahik pah ra tagorong mana tagu tang Iesu, kare gisis ahik pah ra uakeluk tagu tar lotu tang Iesu, kare gisis ra tung pous ueltebeir puk tasir tamat, kare gisis ra ura ueltebeir puk teil, kare gisisir tang bilih, kara kila tasir liouana uasa tar uatampopokoho tenas inetesin, kare gisis ra uelour tasir tamata ra touo pe tar ineteniner boh, kare gisisir bohoboho uakapa tun.”

⁹A tang sioko tasir mouitir angelou e kale teil tar uamouitinar nouh a uoun tar uadouhinar uamouitinar uabang manate, inggono ke lame, kare me kula totoguo pare, “Lame maru ualasira totomua tena kuahar Tunar Sipsip.”

^{10f}Inggono ke kila tar iabeiguo, kare keipingua tar siusan a uleik kara i ranantiehe tun, kare ualasira totoguo tar uan uleik i Jerusalem ger dedeil e hiua turuha i Heuen tang God. ^{11g}Inggonor uan uleikono ke uoun tar balbalanar

^x21:1 Ais 65.17; 2Pi 3.13 ^y21:2 Ais 52.1; 61.10; Hib 11.16; 12.22; UGO 3.12

^z21:3 KP 26.11-12; Isk 37.27; Sek 2.10; 2Ko 6.16

^a21:4 Ais 35.10; 65.19; UGO 7.17 ^b21:5 2Ko 5.17 ^c21:6 Ais 55.1; Jer 2.13; Jon 7.37; UGO 1.8,17; 22.17 ^d21:7 2Sa 7.14; 1OUTT 17.13; Ker 89.26-27

^e21:8 Mat 25.41; UGO 20.15; 22.15 ^f21:10 Isk 40.2 ^g21:11 Ais 60.1-2,19

nitampopokohor nang God, kara abeabantiehe tun misianar tar daemon ue misiana re abeaba per palau gera kilaig a jasper, kara kalahara sira tun toro sisir. ¹²^hInggonor uanon a popokohontiehe tunur pampantuiun, kara i ranantiehe tun ka ur uiloho pein menia toro hangaul karo torik ro pirik, kara hangaul, kara tang torikir anggelou ra kaeke tar pirikinin. Doh tar pirikinin ka bolo kahakahalaigir hangasir hangaul, karo torik ro matinang Israel. ¹³O touono ro pirik tar paina re hara turur pisar, karo touono tar paina re hukor pisar, karo touono tar paina tar pang makos re hu pekor pisar, karo touono tar paina tar pang kais re hu pekor pisar. ¹⁴A palau geka uatabilaig tar pampantuiun uan uleikon a hangaul, kara torikir babeir re oboto pe. Doh a uatabilanin e moko teilir hangasir hangaul, kara tang torik no aposoulur Tunar Sipsip.

¹⁵ⁱGitir anggelou ke menmene to-toguo na sineir a nituha tar goul, inggono tere param keipiono tar uan uleikono menia tar pirikinon, kare tar pampantuiunaon. ¹⁶Tar toueitir paina tar uan uleikon, e uelmatout uaia tunur nitahangan tar iranana. A anggelou ke param keip tar uan uleikono tena ineteng param ger nituha tar goul, kare tupara pare, tar lih i kot tar siokor pain e kaelain tar touonor bialoko ue i ranahia, kara siokono ponompe re tahanga peon i rana pe. ¹⁷Inggono ke param pono tar pampantui, kare tupara pare, inggon a 216ir fit ue 65 mita re oboto pe. Inggonor anggelou ke param sira kompe ra uoto parama per tamata tar limas.

¹⁸^jA pampantuiun uan uleikono ka tuhain tar palau gera kilaig, a daemon, dohi koboro uakapa tun ka tuhain tar

goul uakapa tun a abeabantiehe tun misiana toro sisir. ¹⁹A palau geka uatabilaig tar pampantuiun uan uleikon a leleuara ueltebeir, kara abeaba uamatmata hamas tun. Gininar uatabil a siokor hangaul, kara torikir babeir re boto pe, a uakikilangan a palau gera kilaig a jasper, song a palau ger bubulumungntiehe tun gera kilaig a sapaia, song a tabeliaha sikor gera kilaig a aget, song a bubulumungntiehe tun gera kilaig a emiral, ²⁰song a helehele miaka gaugaul gera kilaig a sadonikis, song a miakantiehe tun gera kilaig a konilian, song a iauiauel a kalahara sira tun toro sisir, song a bubulum leleuara bukbukir ra kilaig a beril, song a iauiauele ra kilaig a topas, song a bukbukir misiana re bukir per inua, ra kilaig a krisopres, song a bubulum misianar pamboibo, ra kilaig a haiasin, song a tabeliah, ra kilaig a ametis.

²¹A pirik ger hangaul, karo torik ter hangaul, kara torikir kabono ger abeabantiehe tun. ^fDoha lelananin ka tuha keipig tar goul uakapa tun, kara mamedelaua sira tun toro sisir.

²²Inngo ahik pah ku banga mena umang lotu God ger dedeil tar uan uleikon, teeit God ger Tamata Noman, kara i ranantiehe tun mer Tunar Sipsip rasina ter umang lotu ger dedeilir nanar uan uleikon. ²³^kDoha uan uleikon ahik pahe malara tagu me pisar ue me bialok tar pid uamarmarein tatanon, ge a balbalanar nitampopokoho per nang God e luh uamarmarein tatanon, kara Tunar Sipsip tero laming tar uan uleikon. ²⁴^lO mamang tamatalik uakapa tunane i kot ra turung la teil keip kompe tena luhur uan uleikon, doho toia uakapa tun ra tu-

^f21:21 Gere uoto mok i lolono toro tidungana ue toro bek.

^h21:12 Isk 48.30-35 ⁱ21:15 Isk 40.3; UGO 11.1 ^j21:18 Ais 54.11-12

^k21:23 Ais 60.19-20; UGO 22.5 ^l21:24 Ais 60.3,5

rung keip pokoso tenas mamang inetelik ger matmata hamas tun.

²⁵^mA pirikinar uan uleikon ahik pahe matotong holoro tagu, ge ahik tagu pe me boung re pokoso tar uanon.

²⁶O mamang tamatalik uakapa tun tar uanene i kot, ra turung uatakai, kara ueltadantiehe tun tar uan uleikon.

²⁷ⁿAhik me tamata uasa re matotong lek iuma tar uan uleikon. Ahik me tamata re matotong guata me ineteniner sa gera uoto matalaig ue mo boh. Bo mais geka bolo uahiuaisir hangas toro bolobolong tar nitua gero nanar Tunar Sipsip, gisina tera matotong lek iuma tar uan uleikon.

O Mahar 22

Jon ke banga tar kodomong nitua

22^oSong ke ualasira polukur angelou totoguo tar kodomong nitua ger to reihin a delauanantiehe tun a kalahara uaia tun e tading tauete tur tono tabtabilar toia gero nang God mer Tunar Sipsip. ²^pInggonor kodomo ke ualonguako i uantinanina tar lele ger tahangantie tun tar uan uleik. Doh tar toking paina tar kodomon e turur doukung tua, ginin e uoto ua tar hangaul, kara torikir mamang inualik toro sioko ro krismas, ginin e uoto mahoho tar mamang bialokolik. Doha kamanan ra uoto uelkobout keipig tasir tamata uakapa tunane i kot.

³Ahik baka poluk me niduh ue me uelmahing re moko tar uan uleikon. No tabtabilar toia gero nang God mer Tunar Sipsip tero turung toko tar uan uleikon, doh na matang kalekinaleon e turung lotu, kare liata tatanon. ⁴^qGisina ra turung banga tar porenon a hanganon ra

turung bololain tar poresisin. ⁵^rA boung ahik baka poluk pahe pokoso tar uan uleikon ue me lam re luh baka poluk ue me pisara re pid. Ge God pe ger Tamata Noman tere turung heir tar luh tasisin. Doh gisina ra turung uoum keip dedengua toso tamata God tar mamang binakalik.

⁶^sSong ke kular angelou totoguo pare, “A uelhire uakapa tununine ra tagorong manaig, ge ginina pe a mana tun. God ger Tamata Noman, geke heir tar Iabene Dedeil tasir propet, ke ualat-ueha tena angelou tar me ualasira tena matang kalekinaleono tar hauar inete ke uahuhutig tar pokos.”

Iesu e pokos

⁷^tIesu ke kula pare,

“Tur uanonono dede nogo tamat, inggo ku uahutung pokos! A niguata uaia e la tang mai geke ueltad, kare uakeluk tenas uelhirer propet i lolono toro bolobolo rone.”

⁸^uInggo Jon teo ter tang sioko ku longor, karu banga tar inetenin. Tar binaka ku longor, karu banga taninin inggo ku baka uahiuaiu i uoum, matoto tar kekenar angelou, karu marang lotu tatanon, ge inggono pe teke ualasira taninina totoguo. ⁹Bo inggono puk ke kula totoguo pare, “Ahik paho guata paar! Inggo a ualualatue ter siokono puk totomua menia toso uanotoum, karo propet, kare mais uakapa tun gera ueltada dede kara uakeluk tar uelhire toro bolobolo rone. Lotu tang God!”

¹⁰Song ke kulono totoguo pare, “Ahik paho uoho tane tar uelhireniner uouuo toro bolobolo rone. Ge a binaka pe ke uahuhut manasain. ¹¹^vUahue tang

^m21:25 Ais 60.11 ⁿ21:27 Ais 52.1; Isk 44.9; 1Ko 6.9-10 ^o22:1 Isk 47.1

^p22:2 Uak 2.9; Isk 47.12; Jol 3.18; Sek 14.8 ^q22:4 Mat 5.8; UGO 3.12

^r22:5 Dan 7.18,27; UGO 5.10; 20.6; 21.23,25 ^s22:6 UGO 1.1

^t22:7 UGO 1.3 ^u22:8 UGO 19.10 ^v22:11 Dan 12.10

mai ra guata tar niguataniner sa, ra guata dedempe: mai ra mahang matal ge ahik pah ra baka tenas niguata ger sa, ra guata dedempe. Mai ra guata tar niguataniner kodkodoh, ra guata uakodkodoho dedempe; mai ger dedeil e dedeil dedempe.”

¹²w Tesu ke kula poluk.

“Tur uanono dede nogu tamat, inggo ku uahuhutung pokos, a bulauougou gine totoguo, doh inggo u turung heir uamatoto tun tasir tamata uakapa tun e matotompein tenas niguat. ¹³x Inggo ter Uakekenen, kare ter Uadouhin, a uakikilangan, kara surun.”

¹⁴yA niguata uai e la tas mais geka uabusa uadelauana tenas hikhiku ger baraha uatuk i kot, maeit gisina ra turung uahuenguais toro doukung tua, kara turung leka toro pirik tar uan uleik. ¹⁵Mais gera guata dedempela tar niguataniner sa, gisin ahik pah ra matotong uangoul tagu tar uan uleikonener nang God. Mais gera uelour tasir tamat, kara ualasira tar ineteniner boho tasisin, kare mais gera ura ueltebeir, kare maisir tang uelpus, kare mais ra lotu tar kaesa ue tar mahar palau, kare mais ra malauelhirintiehe tun toro boh tenas niguat. ¹⁶z Inggo Iesu ku ualatueha tenagu anggelou tar me heir tamiuoum tar uelhirenine tasir tamatang toro bu-

turung lotu uakapa tun. Inggo tero tengkanana ro douk gero tiuana tur toro matina tang Debit, kare ter pitopitong tar lulein ger luhuntiehe tun.”

¹⁷aA Iabene Dedeil, doh inggeim no tamata Iesu gere malauelhirintiehe tun nis misiana tar bulout gere malauelhirintiehe tun tena kuah. King kula tang Iesu pare, “Lame!” Uahue tang mai gere longor e kula pono pare, “lame!” Mai re kamadak uahue tatanon. Doh mai re uah, uahue tatanono tere kale tar kodomong nitua ger niheir. ¹⁸b Inggo u kula tane uapopokoho tun tasir tamata uakapa tun gera longoro toro uelhire rone ro nasir propet pare. Mai re tumana mena puhung uelhire taninin, God e turung tumana pono tar uabang manate geko hire tauetein ro bolobolo rone e la tar tamaton. ¹⁹Doh mai re kale liu me puhung uelhire i lolono toro bolobolo rone ro nasir propet God e turung kale liu tono bulon toro doukung tua, kare tar uan uleik ger dedeil gere hire tauetein ro bolobolo rone.

²⁰c Mai gere hire tauete tar uelhirenine. Inggon e kula ualeikingua pare, “Aa, inggo ku uahuhutung pokos.” O Mana tun. Lame Iesu ger Tamata Noman.

²¹Na hamhamas Iesu ger Tamata Noman e uangoul tagu tosno tamata God. O Mana tun.

w22:12 Ais 40.10; Jer 17.10; UGO 2.23 x22:13 Ais 44.6; UGO 1.8,17; 21.6

y22:14 Uak 2.9; 3.22

z22:16 Aha 24.17; Ais 11.1,10; Roum 1.3; UGO 2.28; 5.5 a22:17 Ais 55.1; UGO 21.6 b22:18 Ual 4.2; 12.32 c22:20 Mat 24.30-31; 1Ko 16.22